





Early European Books. Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.3.269



Early European Books, Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.3.269



2 Q.3

2.3.269

XXXIX
JORDAN.
ed. RAYN

RAYMVNDI
IORDANI
CANONICI REGVLARIS
SANCTI AVGVSTINI

Primùm Vticensis in Gallia Præpositi: Deinde Abbatis
Cellensis qui huc vsque nomen prætulit

IDIOTÆ OPERA OMNIA.

THEOPHILVS RAYNAVDVS ex Societate IESV, hanc
editionem, plurim Tractationum accessione cumulauit. Omnia
recensuit, distinxitque; ad loca subobscura facem prætulit.
Priores & posteriores suas de Authore
cogitationes exposuit.



PARISIIS,
Apud **IACOBVM QVESNEL**, viâ Iacobæâ,
sub signo Cochleæ, & Columbarum.

M. DC. LIV.

CVM PRIVILEGIO ET APPROBAT.



REVERENDISSIMO PATRI,
AMPLISSIMOQVE DOMINO

**FRANCISCO
BLANCHART**

PRÆPOSITO GENERALI,
necnon sanctæ Genouefę Pari-
fiensis Abbati meritissimo.

Et Reuerendis Patribus

FRANCISCO BOVLART,
& ANTONIO VVATRE'E Assistentibus:

ET VNIVERSO ORDINI CANONICORVM
Regularium S. Augustini Congregationis
Gallicanæ.

RAYMVNDVM IORDANI, qui
*hactenus sub sordido IDIOTÆ
pallio delituerat, & obscurus inter
Scriptores, præ obsoleta cognominatione,
binis iam seculis, eoque amplius iacue-
rat, luci vestræ reddo, PATRES RELIGIOSISSIMI.*

ã ij

Quam lucem vestram dicam, vel lusciosus, aut etiam cæcus videat. Cætus enim sacer, cuius apud vos successio perennat, in Apostolis gratia Christi primatibus occæptus, Et tot prælustrum virorum qui omnibus deinceps Christianis seculis, velut soles fulserunt in Templo Dei, radiis coruscus; quâ vite sanctitate, qua sacra doctrina iubare, qua factis in Dei gloriam Et Ecclesiæ decus ac diffusionem insignibus, adeo colluxit, ut nulli de splendore auto concedat, nemini gloriam gentilitiam inuideat. Quæ verò oratio fulgorem sanctitatis Et sapientiæ S. Augustini, quem colitis sacri instituti informatorem, satis assequatur? Quis Hugonem, ac Richardum, Et Lotharium postea Innocentium III. Et Nicolaum de Cusa, ac Ioannem Rusbrochium, Et Thomam Hemerchenum à Kempis, ac recentiore memoria Martinum ab Azpilcueta Nauarrum, Gabrielem Flammam, Ascanium Martinengum, Celsum Mancinum, Gabrielem Pennotum, Et alia clara in Ecclesiâ cælo sydera insigniter micuisse, Et auo suo tenebras orbi incubantes potenter dispulisse, non agnoscat? Cogor parcè agere, ne in immensum excrescat oratio.

Tanta ergo luci; Ordinis, Et antiquitate, primi (cum eius forma tametsi posterius feliciter exulta, tamen ipso teste Augustino, ab Apostolis initia sua repetat) Et fulgore omnium ornamentorum quibus cætus Religiosus insigniri præcellenter possit, sancti-

tatis inquam, sapientia, fructus in Dei Ecclesiam
micantissimi; R A T M V N D V M F O R -
D A N I, reddo: ita ut qui prius ne de nomine
quidem conspicuus erat, nunc & abiecta, vili co-
gnominis inglorij mastruca, nitens ac tersus prodeat,
& tot syderibus sacri sui Ordinis adiunctus, micare
pleniùs, & viam Domini carpentibus praelucere cla-
riùs queat.

Nactus ante annos aliquot, partem lucubra-
tionum eximij huius scriptoris, emiseram eas, cum
piorum (Deo laus) & fructu & approbatione.
Nunc eductis ex alia fauissa opibus multo pluribus;
(an omnes, non ausim dicere, ne iteratò impingam,
& epigraphen qua Idiotam totum dixerim, indu-
cere denuò cogar;) iis ipsis qua ante manca pro-
dierant, beneficio Codicum è Germania & Italia
suppeditatorum recognitis ac expletis; nomine quo-
que Autoris proprio feliciter è latebris educto, ac
muneribus queis cum laude functus est per publica
& indubie fidei scripta vestigatis; auo item quod
multos prima nota Scriptores ancipites diu habuit,
certa nota consignato; Tandem suspicionibus, si qua
fortè, è lubricis in speciem locis existerent, validè
discussis atque depulsis, purus undecunque, sistit se
vobis R A T M V N D V S, syllabum insignium
sacri Ordinis vestri Scriptorum, accessione sanè
nobili cumulaturus.

Pretium opera in eo comendo ac explendo naua-
ā iij

ta, si quod me manet, commune mihi cum Reue-
rendo admodum Patre, D. FRANCISCO BOR-
LARDO Ordinis Assistente, debere esse, gratis pro-
fiteor, quod eius & stimulus ad operis absolutio-
nem incitatus sim, & nunc eius cura in editionis
labore leuatus. Hominem munere quod per vos obit.
dignissimum; de Ordinis gloria, & fructu publico
solicitissimum, non RATMVNDVS duntaxat, sed
& THOMAS A KEMPIS, quem alij quidam aliò
auerteabant, eius maximè studio suis vendicatus;
prodidit. Quam ego tenuem pro curis Ordini per
honorificis, Ecclesia verò maximè commodis, gra-
tiam ago, vendicati ab illo cœlites, (digni certè
qui in Ecclesia vindicentur, ita ex eorum scriptis
ad vitæ rationem non erubescantibus conijcio;) ple-
nam atque commensam referent. Me si roris illius
benefici tantula aspergine, ac vel paucis stillis per-
fundi detur, & comprobationis vestra PATRES RE-
LIGIOSISSIMI fauens calculus accedat; erit cur sus-
pergressus vota, videri possim. Valete.

Humillimus in Christo seruus,

THEOPHILVS RAYNAVDVS
ex Societate IESV.



ILLVSTRIVM ALIQVOT
SCRIPTORVM DE IDIOTA
TESTIMONIA.



Ardinalis Bellarminus lib. de Scrip-
tor. ad annum 1305.

*Idiota, nomine proprio ex humili-
tate suppresso, scripsit libros quinque
contemplationum, valde pios & erudi-
tos.*

Franciscus Feu-ardentius ad l. 3. 5.
Irenæi cap. 33.

*Idiota pijs & docti viri, quem volunt
anno 850. vixisse, præclara aliquot verba prætermittere, nec de-
bui, nec potui, &c.*

Antonius Spinellus, in Throno Dei, admonit. de Au-
ctoribus, nu. 16.

*Idiota, qui Christianæ humilitatis ergo, nomen suppressit
suum, Idiote præter nomen, habuit nihil.*

Ferdinandus Salazarius lib. de Concept. Deip. cap. 42,
sæculo 10.

*Idiota, Vir sapientissimus, inter præcipuos puræ conceptio-
nis vindices, & assertores meritò censeri debet.*

Ægydius à Presentatione lib. 3. de præservatione à pec-
cato quæst. 4. artic. 3. §. 1.

*Sanctissimus ac vetustissimus Idiota, (hoc enim nomine, hu-
militatis gratia, proprio suppresso, appellari voluit) cum tamen
eius eruditio simul cum sanctitate, tanta fuerit, ut & Hereti-
cis formidini, & Catholicis admirationi habeatur, & inter san-
ctos Patres, meritò referatur.*

Hippolitus Maracius, Congregationis Matris Dei, in

Bibliotheca Mariana V. Raymundus Iordani.

Hic nolens ponere nomina sua in terris suis, hactenus humilitatis gratia, proprio suppresso, Idiota nomen prætulit: tantâ quo eruditione cum sanctitate coniuncta, conspicuus fuit: ut & hereticis formidini, & Catholicis admirationi sit habitus, atque à multis, etiam in sanctorum Patrum album non immerito sit relatus. Inter alia præclara opuscula Auctoris sui reconditam sapientiam pietatēque redolentia, scripsit doctis æquè ac piis omnibus, valdè probatas contemplationes.

Iacobri Fabri Stapulensis, luculentum de Idiora testimonium, suppetit, ex adornata per eum Idioræ editione. Sed quod de Tertulliano scriptum est à S. Hilario; consequens hominis error, detraxit scriptis probabilibus auctoritatem. Consecuta inquam, Fabri à Catholica fide defectio, cum à testimonio ferendo repellit. Authent. *Credentes* Cod. de Hæreticis; cap. *Si Hæreticus*. Et cap. *si Paganus*, 2. qu. 7. Ut mirum sit, eum è Simleri sectarij Scrobe, à Tirino, Gallia decus denominari.

INDI-

INDICVLVS EORVM

qua hoc opere continentur.

TRACTATVS IDIOTÆ.



ONTEPLATIONES de miserabili cursu vitæ præsentis, in quinque tractatus distributæ.

Tractatus I. de homine corruente in bello spirituali.

Continet Cap. XIV.

Tractatus II. de multiplici erga hominem misericordia Dei. *Continet Cap. X.*

Tractatus III. De vita præsentis, atque hominis nouissimis *Continet Capita X.*

Tractatus IV. Ad varios sanctos, aspirationes, & alloquia. *Continet Cap. XI.*

Tractatus V. Ad primum & secundum Adamum, aspirationes. *Continet Cap. XI.*

Contemplationes de innocentia perdita. *Continent Cap. VII.*

Contemplationes de conuersione, per duodecim menses anni spiritualis, producentis duodecim fructus spiritus. *Continent. Cap. XII.*

Contemplationes de conflictu assiduo inter animam, & carnem. *Continent Cap. VI.*

Contemplationes de septem donis spiritus sancti contra septem peccata mortalia. *Continent Cap. VI.*

Contemplationes quod Spiritus sanctus est adiutor animæ, deque variis Spiritus sancti erga hominem officiis. *Continent Capita XXIII.*

Contemplationes de octo beatitudinibus. *Continent Cap. XIX.*

Contemplationes de amore. *Continent Capita XXXVI.*
Contemplationes de vera patientia. *Continent Cap. XXI.*
Contemplationes de morte. *Continent Cap. XIX.*
Contemplationes de Beata Virgine Maria. *Continent*
Cap. VI.

Tractatio plena de Beata Virgine. *Continet Partes xvii.*

Opus tribus libris distinctum, de statu religioso.

Opus de oculo spirituali. *Continet Cap. XV.*

Supplementum eiusdem operis.

Regulæ Christianam vitam complectentes.

Paraphrasis in Psalmum decimumquintum.

*Hæc duo postrema opuscula, alibi tribuuntur Ioanni Pico Mi-
randulæ Comiti.*

Piores & posteriores cogitationes Theophili Raynaud-
di, Societatis Iesu, de Autore horum librorum.

Eiusdem Faculæ ad Idiotæ subobscura quædam loca.
Sive iudicium de quibusdam eius propositionibus, quæ
nonnullis cum receptiori doctrina Theologica, minùs co-
hærere videri possunt.

FINIS.



EXTRAIT DV PRIVILEGE
du Roy.

PAR grace & Priuilege du Roy, donné à Paris le
29. Decemb. 1653. signé DAVIDIGVIER, &
seellé du grand seau. Il est permis à IACQUES
QVESNEL, d'imprimer ou faire imprimer, tant en
latin, qu'en françois, en tel volume que bon luy sem-
blera, vn Liure intitulé, *Raymundi Iordani Canonici Re-
gularis S. Augustini, qui huc vsque nomen prætulit IDIOTÆ
opera omnia*, & ce pendant le temps de quinze ans, à
commencer du iour qu'il sera acheué d'imprimer, avec
defences à tous Libraires, Imprimeurs, ou autres de
quelque qualité qu'ils soient, de l'imprimer ou faire
imprimer, vendre ny debiter, en latin ny en françois,
sans la permission dudit QVESNEL, à peine de confis-
cation des Exemplaires, & de cinq cens liures d'amen-
de: Le present Priuilege estant tenu pour signifié, en
mettant au commencement ou à la fin desdits exem-
plaires l'extrait d'iceluy.

*Acheué d'imprimer pour la premiere fois
le 14. Mars 1654.*

Les Exemplaires ont esté fournis.



TRACTATUS QVINQUE-
partitus deplorationum miserabilis cursus
vitæ præsentis.

PROOEMIUM.



SEPARATUS à Deo per peccatum, cupiens ipsi re-
conciliari, consideret seipsum cogitatione profunda; &
cursum miserabilis vitæ suæ examinet diligenter, non solum
præsentem, sed etiam præteritum, nec in genere, sed altius
singulares eiusdem, non breui, sed morosa, non solum voca-
li, sed etiam mentali examinatione. Non querat solos ra-
mos scindere peccatorum, sed radices cogitet & euellat.
Terra enim inculta, non bonum fructum, sed spinas pullu-
lat: sed culta euulsis radicibus spinis, bonum fructum germinat, & producit. Sic
etiam oportet quod homo cultuetur diuersis laboribus, cogitando, & examinando
cursum miserabilis vitæ suæ; nunc peccatorum suorum humili recordatione, nunc
ipsorum contritione, nunc integra confessione, nunc condigna satisfactione, nunc
penitentia & emendatione, nunc cordis afflictione, nunc ad gratias referendas
iugi meditatione, nunc assidua oratione, nunc beneficiorum Dei consideratione,
nunc proximi adificatione, nunc operum misericordiæ exhibitione. Et tunc diuina
gratia infundetur & fructum germinabit, qui multiplicabitur in homine sic agen-
te, plusquam dici possit.

Modus autem examinationis, & deplorationis cursus miserabilis vitæ præsentis
particulariter infra scribitur per generalitates peccatorum, ut legens & contem-
plans generalia in seipso, specialia recognoscat, & recogitata deploret, ac deplo-
rando gratiam diuinam inueniat, & inueniendo cursum miserabilis vitæ suæ
præsentis, sine dilatione emendet.

Deplorationes igitur cursus miserabilis vitæ præsentis, in quinque partes di-
uiduntur.

SUMMA PRIMÆ PARTIS
huius tractatus.

Prima pars consistit in quatuordecim gradibus per multiplica-
tionem vitiorum.

PRIMVS GRADVS, miserabilis descensus hominis est, quod homo
creatus & per Baptismi lauacrum Deo iunctus, in bello huius mundi ponitur.

A

PROOEMIUM.

menta ministrare, ut sic recognoscendo meum, & spsum, vitam suam emendet, & conuertatur ad Deum.

OCTAVVS MODVS misericordiarum Dei ad hominem est, quod peccatorem misericorditer respiciens, inclinat eum, & compungit cor ipsius, ut de peccatis suis conuertatur, & ipsa humiliter confiteatur.

NONVS MODVS misericordiarum Dei ad hominem est, quod non solum confert peccatori predicta dona, imò ex abundantia sua charitatis, ministrat ipsi pretiosissimum corpus suum in cibum, & pretiosissimū sanguinem suum in potum, ut sic digne sumens, gratiam hic mereatur, & post mortem, vitam eternam.

DECIMVS MODVS misericordiarum Dei ad hominem est, quod Deus volens misericorditer peccatorem saluare, & non perdere, & trahere ad se, ut emendetur, corripit eum per varias corporis infirmitates: ut sic debilitato corpore, fortior fiat spiritus peccatoris, quod Apostolus attestatur, dicens: dum infirmor, tunc fortior sum. 2. Cor. 12. 10.

UNDECIMVS MODVS misericordiarum Dei ad homines est, quia flagellat peccatorem diuersis tribulationibus in hoc mundo, ut Deum diligat & noscat, veniam petat, mundum spernat, commissa desceat, & satisfaciendo virtus constantia & patientia in eo probetur, quia per multas tribulationes oportet nos intrare in Regnum Dei. Act. 14. 21.

SVMMA PARTIS TERTIÆ huius tractatus.

Tertia pars deplorationum miserabilis cursus vite presentis, continet decem deplorationes, quæ retrahunt hominem à peccatis, & inducunt ac excitant ipsum, ut secundum gradus & modos superius particulariter descriptos, oursum miserabilem presentis vite sue deploret. Legat easdem, & contempletur frequenter meditando, nunc unam, nunc aliam, quia sic abstinabit à malo, & faciet bona, quandoque amore præmi, quandoque timore supplicij.

SVMMA PARTIS QVARTÆ huius tractatus.

Quarta pars presentis tractatus, continet decem deplorationes cum confidentia diuina: Quarum aliquæ diriguntur ad certos Sanctos, quia scriptum est ad aliquem Sanctorum conuertere. Et aliquæ diriguntur ad omnes Sanctos. Quia licet peccator audiri & exaudiri non mereatur, tamen misericors & miserator Deus, Sanctorum deprecationibus, & multiplicatis intercessionibus inclinabitur, ut indulgeat peccatori misero.

SVMMA PARTIS QVINTÆ & vltimæ huius tractatus.

Quinta pars deplorationum miserabilis cursus vite presentis continet decem deplorationes partim deploratorias, partim deprecatorias, super vili & salubri confidentia peccatorum.



DEPLORATIONES

miserabilis cursus vitæ præsentis.

CAPVT I.

De corruente in bello spirituali.



OMNIPOTENS sempiternæ Deus, tua exuberante clementiâ, de nihilo me creasti; vt hîc in mundo tibi placidè seruiendo, tuam æternam beatitudinem possiderem. In campum magni certaminis me introduxisti, vt contra tuos & meos aduersarios viriliter dimicando, & eos prosternendo, titulo altioris gloriæ coroner. Et tuam in me creatura tua misericordiam ampliando, scuto fidei me armasti, & vt aduersarij terrerentur, no-
men tuum mihi imposuisti, vt à te Christo, Christianus vocarer, & me tanta fortitudine roborasti, vt non possent contra me aduersarij præualere. Et licet diuersis telis me inuaderent, arma plurima mihi contulisti. Nec tantam eisdem potentiam contulisti, quod possent, nisi vellem, me aliquo-
modo superare; quia eorum fortitudo in tantum debilis est, quod non possunt vincere nisi volentem.

2. Ego verò nequam proditor, & mei ipsius iniquissimus homicida, arma tua misericorditer data, voluntariè deposui, & in me miserabili meis, hostibus locum dedi: quia vt fictus, non vt verus Christianus, cum opera veri Christiani non facerem, in campo certaminis miserabiliter corruui: quia in bello, vt poteram, me non defendi. Magna mea dementia. Ab hominibus nolim vinci, & à vitiis vinci me permisi. Quotiescumque enim inimici cogitatione me impugnaverunt, totiens ferè aut consensu, aut opere eis consensui; & armis virtuosius, quibus me defendere poteram, imprudenter abieci, cum ipsis inimicis quasi fœdus iniij, vt eorum voluntatibus obediens semper essem. Et licet ad resistendum eisdem, mihi aspirationes bonas concederes ex benignitate tua, meam damnationem euitare nolui. Si aliquoties tibi parui, hoc rarò fuit, & tunc breui temporis spatio ad eos redij per peccatum, vt eorum voluntatibus me voluntariè subiungerem.

A iij

3. Ecce creator meus pugilem quem creasti. Ecce qualiter strenuè se habuit cum armistuis, & qualiter tibi fidelitatem seruauit. Imò vt cum veritate loquar, ego sum proditor maximus, tuorum aduersariorum amicus, desertor militiæ tuæ, tibi fidelitatem non seruans, vexillum fidei tuæ, vt iussisti, non sequens, sed potius contra te elato spiritu non desino rebellare. O plasmator meus, quis me lauabit à tam lugubri casu? Quisnam restituet arma quæ perdidisti? Quis mihi adiutorium præstabit? Quis mea vulnera curabit? Quis medicamenta valida mihi dabit? Quis me iuuabit, & defendet ne in manus inimicorum ulterius incidam cruciandus?

4. Certè benignissime Domine Iesu Christe, tu es ille qui potens es ad omnia; nullus est qui tibi possit contradicere. Exuberet in me tua infinita misericordia. Memento quia fragilitas mea magna est, & inclinata ad malum. Inter inimicos meos positus sum, quos fugere non possum, nec ab ipsis separari. Imò meam miseram carnem, meum domesticum inimicum, continuè portare cogor. Interimere ipsam non audeo, neque mihi licet, & eam nutrire compellor. Defendere me digneris Domine Iesu Christe, à cornibus inimicorum meorum. Hoc est studium eorum continuum, hoc unicuique desiderium eorum, vt deuorent animam meam quam creasti. Ideò ad te clamo, vt me liberes ab aduersariis quotidianis, qui siue dormiam, siue vigilem, siue comedam, siue bibam, siue quodcumque opus operer, instant modis omnibus, die ac nocte, fraudibus & artibus; nunc occultè, nunc palam, nunc sagittas venenatas contra me dirigentes, vt interficiant animam meam, & tanta est infamia mea pessima optime Domine, quod cum continuè videam contra me draconem ore aperto ad deuorandum, nihilominus dormio & lasciuius in pigritiis meis, tanquam securus, ante eum qui nihil aliud desiderat quàm vt me perdat.

5. Dilectissime Domine Iesu Christe, non deserat me pietas tua: redde mihi misericorditer arma quæ perdidisti, cum quibus superare valeam inimicos meos; ne dicere possint contra me, prauulimus aduersus eum: vt victoria de ipsis habita in hoc mundo, ad tuam gloriam cum triumpho perueniam, & tecum gaudeam per infinita sæcula sæculorum. Amen.

C A P V T I I.

De Prouitate ad malum, & difficultate ad bonum.

1. **D**omine Iesu Christe Saluator meus, ad te cor meum eleuare non audeo; si solum tuam iustitiam cogitarem, quam ex peccatis meis nefandissimis, non mihi piam, sed rigorosam, merito pertimesco. Sed tua misericordia infinita est, & ex magna misericordia tua, multæ sunt miserationes tuæ. Attendis enim contemptores vt corrigas, attendis etiam ignorantes vt doceas, attendis confidentes vt ignoscas. Hæc igitur misericordia tua firmam spem mihi confert vt non desperem, sed in te respirem, non prosternar sed eleuer, non confundar sed indulgentiam consequar quam affecto.

DE VITÆ CURSV.

3

2. Dūo Domine in me sentio, quā meam animam miseram nunc detinent alligatam, vt in te viuere non valeat. Vnum est pronitas ad malum, & aliud est difficultas ad bonum. Hæc duo mihi ad inuicem aduersantur, quia primum est diligens & currens ad malum, & secundum est negligens & tacens ad bonum: primum vigilat, secundum dormitat: primum placet corpori, secundum displicet animæ: primum impingit animam ad infimum, secundum colorat: primum copulat sibi & attrahit ad se animæ inimicos, secundum sibi nullos acquirit amicos. Tu præcipis, vt secundum primo faciam dominari, & secundum primo subiugari permitto. Primum animam vulnerat, & secundum de eius sanitate non curat. Primum venit otiosè in committendo, & secundum viuut otiosè in omittendo. Primum prouocat tuam vindictam, & secundum non mitigat tuam iram. Primum crescit multiplicando vitia, & secundum decrescit diminuendo virtutes.

3. O Domine Iesu Christe miserator & misericors Deus, qui tantam bonitatem tuam erga me miserum exhibuisti, vt non solum veram cogitationem in iis mihi benignè concesseris, verum etiam patientiam habuisti vt non me perderes, sed ad tuam penitentiam expectares. Ego enim pronitati prædictæ obediens semper fui, & ex hoc, (prout nunc ex tua aspiratione cognosco,) difficultatem ad bonum habui. Sed aufer à me, dulcissime Iesu, cor carneum, vt pronitati ad malum viriliter contradicam; & da spiritum nouum, vt à me difficultatem ad bonum repellam. Vertatur obsecro ipsa pronitas ad malum, in difficultatem, & ipsa difficultas in pronitatem ad bonum, vt difficultatem ad malum semper habeam.

4. Audi me ex benignitate tua & exaudi me secundum magnam solitam misericordiam tuam: vt maculæ animæ meæ, quas ex pronitate ad malum contraxi, deleantur & curentur. Et bonitas quæ superat ipsam pronitatem, ad nihilum deducat eandem: Et sicut hætenus vigilauit ad malum, sic de cætero te inuante ad bonum continuè excitetur: vt mala præterita in me corrigat, & emendet præsentia: inducat ad tuum placitum, & ad præmium consequendum. Et futura cum tuo timore præcaueat, ne sicut canis ad vomitum redeat, & plaga fiat in anima mea periculosior quàm ante. Sed sic ad exercitium virtutum attingere valeam, & eis sine intermissione insistere, vt tuam iram placare valeam: vindictam de peccatis meis penitendo sumam, & inchoata bona non deferam, sed vsque in finem vitæ perseuerem, & post eam gloriosum regnum tuum cum Sanctis tuis possideam per infinita sæculorum sæcula. Amen.

C A P V T I I I.

De subiectione Anima ad Carnem.

1. **C**reator & Redemptor meus, te ordinante & disponente, hanc miserabilem & lamentabilem peregrinationem intraui, compositus ex duobus. Nam à parentibus carnem ex vili materia contraxi, & à tua bonita-

te animam mundam; quam caro retinendo nunc virtutibus suffocatis, ad peccata diuersa prouocat. Sic etiam quæ carni meæ infecta & corrupta coniuncta fuit, sordida & maculata effecta est. Sed tua misericordia eam lauacro sacri fontis abluisti, ut in ea nullo peccati contagio remanente, gratis & virtutibus ornaretur, per quas tibi placeret & seruiret: & carnem sub tua seruitute teneret. Hanc carnem tanquam instrumentum ad bene operandum, eidem animæ contulisti, ut ieiunando, vigilando, orando, abstinendo, peregrinando, pœnitentias agendo, operibus misericordiæ insistendo, peccatis resistendo, tribulationes cum patientia supportando, & virtutibus inhaerendo, merita auferentur, & æternis gaudiis frueretur.

2. Sed heu Domine bone Iesu, animam meam debilitando, & pronitatem ad malum & difficultatem ad bonum incurrando, carni animam miserabiliter subiugavi, ancillam dominari permisi, non considerando carnis originem: quæ ex tali materia processit, quod non solum eam nominare, sed etiam cogitare abominabile est. Concepta in peccato, nutrita ex sanguine menstruo in utero materno, subiecta omni corruptioni, pœnalitati, & peccatis, deputatur irrevocabili mortui, esca vermium & bufonum facta. Et tumens & inflata, animam miseram suis ingeniosis vinculis colligauit: nunc ipsam vento eleuationis & superbiæ exponendo, nunc ad iracundiam prouocando, nunc ad gulæ illecebras incitando, nunc in fornacem auaritiæ introducendo, nunc peste inuidiæ sauciando, nunc in lecto pigritiæ detinendo, nunc virtutibus suffocatis ad diuersa peccata prouocando. Sic enim miserabiliter dominando, miseram animam maculauit, deuorauit, vulnerauit, morti perpetuæ deputauit.

3. Ecce Saluator meus qualiter animam meam tua pretiosa morte redemptam, quam mihi non dedisti, sed ad tempus commodasti, ignominiose gubernavi. Ecce magnum furtum quod commisi, auferendo quod tuum erat, & inimicis tuis dando. Ecce magnum sacrilegium quod commisi, rem spirituales taliter tractando. Ecce qualis illegalitas in me fuit circa gubernationem rei commissæ, quia rem pretiosam pro vilissima commutavi. Ecce qualem rationem reddere valeo de commissis, qui talentum traditum non duplicavi, sed in peccatis abscondi. Væ mihi iniquissimo peccatori, qui sic peruersè egi, permittendo ancillam dominari, & dominam ancillari. Ordo iste peruersus est, & iniquus, perpetuæque damnatione dignus, nisi tu misericors Deus, tuæ magnæ misericordiæ porrigas mihi manum. Aufer tantam iniquitatem à creatura tua, quam misericorditer creasti.

4. Parcere mihi Domine, & indulgere digneris. Non odium tuum, sed gratiam & clementiam sentiam. Nihil enim odisti eorum quæ fecisti. Reuoca à me regimen animæ meæ, quam sic nefandissime gubernavi, & tua misericordia dignetur eam assidua protectione defendere & gubernare. Fac me quæso dulcis Iesu Christe, bone & semper benedicte, tuo amore & desiderio, onus carnalium desideriorum & terrenarum concupiscentiarum superare, & calcare. Dominetur obsecro carni anima, anima ratio, rationi gratia tua, & tuæ me interius & exterius subde voluntati. Tribue mihi, ut laudent

te

DE VITÆ CURSV.

te cor meum & lingua mea. Dilata mentem meam, & attolle intuitum cordis mei, vt rapida cogitatione spiritus meus attingat te aeternam sapientiam super omnia manentem. Dissolue me, oro te, à vinculis quibus constrictus teneor, vt relinquens omnia ista, tibi soli placere festinem, tibi soli inhaream, & tibi soli intendam; vt qualem fecisti animam, talem tibi reddam illam in exitu huius vitæ; vt in tua gloria, tibi cum alijs Sanctis, laudes referam, per infinita sæculorum sæcula. Amen.

C A P V T I V.

De noxijs cogitationibus.

1. **O**pera manuum tuarum ne despicias misericors Deus, sed esto misericors meæ miseria, quia vni patior. Cor meum vagum est & instabile & velut arundo, hinc inde agitur præ multitudine cogitationum quæ ipsum ducunt, nunc ad cacumina montium, nunc ad profunda vallium, nunc orientem, nunc occidentem faciunt perlustrare, dum in te & de te cogitare deberet. Terrena cogitatio quam etiam voluntariè admitto, & in ipsa frequenter delector, ipsum trahit ad se, & dum ad tuum seruitium se præparat & tibi seruire cogitat, noxia cogitatio latenter subintrans, ipsum captiuat, & pertrahit ad diuersa, vt labijs te honorans, de tuo seruitio solus labor remaneat laborum.

2. O Deus meus cæcus fui non considerans quod cogitatio est radix, & principium omnium actuum: quæ nisi à principio celeriter euellatur, deducitur ad consensum vt exinde suos producat affectus. In hac noxia cogitatione delectatus fui, & perseueraui in ipsa, vt bonum quod nolebam non facerem, sed malum postea facerem quod volebam. O peruersa cogitatio, quæ animam meam separasti à Deo. O importuna cogitatio, quæ cor meum sic captiuatum deducis, vt tibi per importunitatem compellatur consentire. O distorta & nefanda cogitatio, quæ me vigilando, dormiendo, aut alia dicendo, cogitando, & faciendo quiescere non permittit. O sordida & inficiens cogitatio, animæ meæ inimica, quæ inter spirituales contemplationes mentis meæ, inter deuota ad Deum suspiria, inter preces cordiales calamitatum mearum, inter actus diuinæ bonitati placentes, inter diuinæ misericordiae inuocationem, inter sacrorum eloquiorum meditationem, & inter diuinorum officiorum lectionem, te immisces: & sic me constringis, vt ducam sub assiduo otio miserabilem vitam, & nulla mihi utilitas, sed solus labor temporalis sequitur.

3. O benignissime Domine Iesu Christe, nihil mutabilius corde meo, nihil velocius mente mea: quia sicut flos egreditur, & velut umbra euanesceit, ^{Iob. 14.} eleuatur & deprimitur in momento vt vnda maris. Quomodo ergo ante tribunal tui tremendi & districti iudicii audebo comparere, in quo me scio redditurum rationem de huiusmodi cogitationibus vsque ad minimam cau-

I D I O T A.

rum, in quibus persenerauī ferē sine intermissione, *Quandiu* in peregrinatione fui, & habui intellectum? Sed hoc mihi misero est, & non alteri, imputandum, quia virtutes debilitaui per peccata, & carni animam subiugaui. O benignissime Domine Iesu Christe, libera me ab isto multiloquio quod patior intus in anima mea misera in conspectu tuo: Nam confugiens ad misericordiam tuam, non cogitationibus taceo, etiam tacens vocibus. Et si quidem non cogitarem nisi quod placet tibi, non vtique rogarem vt me ab hoc multiloquio liberares, sed multae sunt cogitationes meae, tales quales nosti cogitationes hominum, quoniam vanae sunt. Da mihi eis non consentire, sed si aliquando me delectant, eas nihilominus improbare; nec in eis velut dormiendo immorari, ne in tantum valeant apud me, vt aliquid in opera mea procedat ex illis, sed ab eis saltem tuta sit sententia mea, & tota conscientia te tuente: vt te donante, tibi hic in praesenti, & in futuro seruire valeam, per infinita saeculorum saecula. Amen.

C A P V T V.

De assiduitate peccandi.

Pf. 138. 16. 1. **D**A mihi Domine veraciter cogitare miserabilem vitam meam, quia imperfectum meum viderunt oculi tui, & in libro tuo omnia scribuntur. Venio namque ad tuam misericordiam magnam, antequam veniat dies ille magnus & terribilis, ac peccatoribus omni amaritudine plenus: in quo libri aperientur & conscientia nunc absconsa. Tunc opus cuiusque patebit, & iudicium fiet illi sine misericordia, qui dum viueret, non fecit misericordiam. Praeuenio igitur illum diem, & confiteor tuae immensae pietati, quod iniquitas mea mentita est mihi: Quia tanta leuitate animi ductus fui, tanta spiritus mobilitate, tanta carnis inclinatione, tanta hostium impugnatione, tanta voluntatis inordinatione, tanta mentis cecitate, tanta beneficiorum tuorum obliuione, tanta peccatorum obstinatione, tanta corporis voluptate, vt cogitatione, consensu, aut opere ferē me dederim praua & antiqua consuetudine, vitiis quibuscumque. Et tanta fuit diuturnitas temporis in eisdem, & sic quasi in profundum vitiorum deueni, quod illa aut nulla, aut modica esse cogitaui, nec emendare curauī, sed illa contempsi. Istis detentus, manus ad operationem virtuosam non apposui, sed in ipsis vitiis malitiosē persistendo, praesumpsi me non posse abstinere, & sic te accusaui iniqua intentione mea, quasi virtutem resistendi, cogitationem discernendi, & liberum arbitrium non dedisses.

2. O sustentator patientissime, gratias tibi refero, quia me iuste damnandum, misericorditer sustinuisti ad poenitentiam. Eripe igitur animam meam e vitiorum abyssu; & licet te contempserit iniquitas mea, non condemnet me tua misericordia, sed inclinationem meam malam tolle carni, & conuertendo ipsam in bonum, sursum eleua ad te: Spiritum fortifica, hostes expugna, aufer noxias cogitationes, repelle prauos consensus. Da mihi noti-

DE VITÆ CURSV.

7

tiam peccatorum meorum, de quibus non curavi, sed habui ipsa in contemptum. Scio enim quod pessimum genus peccati est, non intelligere peccata. Omnes enim cognoscentes crimina sua, reconciliari tibi possunt per penitentiam. Nullus ex peccatoribus, plangi magis dignus est, quam qui putat se non habere quod plangat. Multa enim Domine delictorum genera sunt, & periculosiora, quædam quæ leuiores esse videntur. Et illa sunt magis noxia, quæ non æstimantur esse peccata. Nullum enim malum facilius decipit, quam cum non intelligitur esse malum.

3. O Deus meus, misericordia mea, peccavi grauiter, peccatis adhæsi pertinaciter, gausus fui de peccato, post peccata ambulavi extento collo, peccatum meum prædicaui & abscondi, & tu placatus eras. Ego te prouocaui ad iram, & tu conducebas me ad misericordiam. Ego irritabam te ad furorē, & tu differebas ad vindictam. Iusto exterminio punire me poteras peccantem, & subuere me negligentem: sed patienter expectasti, vt me corrigerem penitentem. O Deus meus misericordia tua, munda me ab occultis meis, & ab alienis parce mihi seruo tuo, quia iniquitatem meam vix ego cognosco, licet peccatum contra me fuerit semper. Hoc nunc scio, hoc notum mihi fecisti. Tu es illuminatio mea, tu es salus mea. Fac vt amplius me non absorbeat profundum vitiorum. Sed sicut hætenus ad malum, sic de cætero ad bonum animam habeam inclinatam, vt tibi placeam, cogitatione, consensu, & operatione: Et sic in præsentī corrigam me & emendem, vt te iuuante, vitam cœlestem consequar per infinita sæculorum sæcula. Amen.

CAPVT VI.

De aggrauatione peccatorum.

1. **C**onfundor in me ipso quia anima mea in amaritudine est (dulcissime me Domine Iesu Christe.) Aculeis enim diræ anxietatis compungor, dum considero facinorosos actus meos. Quia licet me flere incipiam nequissimum peccatorem; duo tamen inter cætera me grauant, & penetrant cor meum plaga horribili: scilicet magnitudo & multitudo scelerum, & altitudo dignitatis meæ. Tanta est namque peccatorum meorum magnitudo horrenda, tanta cumulatio innumerabilis, & tanta peccatorum iteratio confusibilis, quod memoria non sufficit ad cogitandum, nec cor ad dolendum, neque lingua ad confitendum, neque corpus ad penitentias supportandas. Væ mihi crudelissimo peccatori, quia ipsorum magnitudinem & multitudinem cogitare non valeo, nec ipsorum iterationem dinumerare: sicut nec stellas cœli, nec arenam maris, neque pluuiæ guttas. Et si vulnus iteratum tardius sanatur, quomodo vulnera mea, fœtidissima tibi & Angelis tuis, sanari poterunt, quæ non solum semel, sed etiam infinitis & innumerabilibus vicibus sunt iterata & perpetrata?

2. Altitudo etiam dignitatis meæ reddit ipsa horribiliora & grauiora.

B ij

Tantam namque dignitatem ex visceribus tuæ pietatis mihi indignissimo contulisti, ut inter tuos Christianos, Christianum me faceres, & ministrum sacri altaris, ut te immundissimis manibus meis sacrificando tractarem. Mediatorem inter te & populum me constituisti, ut iram & indignationem tuam mitigarem precibus, & populum tibi acceptabilem redderem meis monitionibus & exemplis.

Matth.
8.6.

3. Sed benignissime Domine Iesu Christe, præmissa reddunt vulnera mea diuturnitate temporis putrefacta & incurabilia, nisi tu qui es verus medicus, des operam ad sanandum. Dic igitur verbo, & sanabitur anima mea; non enim sum dignus ut venias ad me, quia homo peccator sum Domine. Non me spernas indignum proditorem tuum, male & iniquè tibi promerentem, de bonis tui patrimonij viuentem, illa inutiliter expendentem, & te contemnentem, tibi que displicentem, ac tuis inimicis inhaerentem: sed dextera tuæ misericordiæ me suscipias, me eleues, me confortes, me defendas, & me protegas: Et magnitudinem & multitudinem peccatorum meorum ac altitudinem dignitatis meæ mihi ulterius non imputes ad vindictam, nec ad iustitiam, sed ad piam correctionem, & emendationem. Adiuvet me tua clementia, quia mea malitia perire me fecit: sanet me tua immensa pietas, quia crudelissimis vulneribus mea iniquitas me fauciat: ut medelam te miserante consecutus, tuam gloriam obtineam; hoc est gratiam in præsentem, & in futuro gloriam sempiternam. Amen.

C A P V T V I I.

De obliuione proprij status.

Ps. 70.
38.

1. **D**Eus meus docuisti me à iuuentute mea, & vsque ad senium me non dereliquisti. Hoc Domine ad laudem & gloriam nominis tui fecisti, hoc ut te cognoscerem, hoc ut te diligerem & timerem, hoc ut viam scirem qua debeo ambulare, hoc ut ceteros ignorantes informarem, & exemplum bonè viuendi ostenderem; ut hostium astutias non ignorarem, ut modum eis resistendi cognoscerem, atque tua armatura me armarem quæ eos expugnarem.

2. Sed heu retributor omnium, me ipsum in obliuione dando, & tua beneficia non recolendo, quantò plus me docuisti, tantò plus tuam scientiam repuli. Quantò plus me docuisti, tantò plus pauper fui. Scientiam quam mihi dedisti, vtiliter non expendi, & sic in diuerfos vsus & dānabiles consumpsi, Vbi mereri debebā, demerui, vbi culpa debebat deleri, eam accumulauī; gloriam in penam conuersti, & gaudium in mœrorem: vnde retributionem acquirere debebam, damnationem acquisiui. Sed vnde hoc mihi Domine? Certe non à te quia totus bonus es, & magnam misericordiam mihi fecisti. Sed à mea maxime magna malitia. Sciebam namque me plus tibi teneri quam ceteros, quia corpus & animam mihi conseruasti, in sortem tuæ hereditatis me elegisti, scientiam mihi dedisti, victum mihi abundantem de tuo patri-

DE VITÆ CVRSV.

9

monio contulisti, quo non solum mihiipsi, sed etiam aliis subuenirem. His ego gratis usus fui non humiliter, sed superbe, non ad laudem tuam, sed ad damnationem meam, non ad bonum sed ad malum. Et ad ista sic miserabiliter peccanda, causam mihi praeiuit obliuio beneficiorum tuorum & meipsum.

3. O Domine Iesu Christe, scio & ignorare non possum quod grauius me iudicabis, quia plusquam aliis mihi gratiose tribuisti. Cum enim auges dona, rationes etiam tibi reddendae crescunt donorum, quas tibi reddere non valeo digne, sicut mihi praecepisti. Si me cum seuera iustitia tractare intendis, redigar in cinerem & fauillam, & ad inferos miserabiliter descendam, nisi misericorditer mecum agis. Sic spero firma fide, quia in magna misericordia tua confido; à qua absit ut recedam. Nunc me iustificabis, & de peccatore iustum facies, & de immundo mundum.

4. Deprecor te Domine Iesu Christe, ut in me misero veram confidentiam augeas, perditam obliuionem auferas, tuam misericordiam amplies, mea scelera indulgendo amoueas, remoueas, & abstergas, & tua dona (ut debeo) recognoscens, illa dispensem ad beneplacitum tuum in praesenti, ut in futuro tuam veram beatitudinem possideam, per infinita saeculorum saecula. Amen.

CAPVT VIII.

De ingratitudine temporis perdit, & indignitate seruitij diuini.

1. Totum me esse scio tuum, Domine Iesu Christe, quia totum me fecisti, & regenerando, & redimendo, & sine te nihil sum debitor tuus, quia totam vitam tuam pro me misero dedisti, & te Christum mihi dedisti, & das quotidie, & omni die in cibum & potum, me esurientem pascendo, sitienti potum tribuendo, & totam animam meam recreando & sanando. Quidquid sum, totum est de misericordia tua, totum me fecisti, ut totus tuus essem, & totus tibi seruirem, & toto corde, tota anima, tota mente, totis viribus te diligere, & toto tempore tibi seruirem. Ad hoc totum tempus mihi constitui, prohibendo ne alteri, in toto vel in parte, me darem aut seruirem, sed solum tibi aut proximis propter te. Haec omnia me docuisti, in omnibus me informasti, de omnibus cogitationem mihi dedisti, omnia sciri, omnia facere potui & adimplere, sed nolui, nec curavi. Voluptati carnis me dedi, & corporis seu animae passiones secutus fui, multa & enormia peccata committendo, & sic à te, quia totus tuus eram, totum me subtraxi, indignum seruitio tuo me reddidi, & fere totum tempus ad seruitium tuum ordinatum, tibi ex iniquitate mea maxima auferendo, in praedictis peccatis consumpsi, & sic damnabiliter commutavi.

2. O liberator meus de gentibus iracundis, qualis est, & quam incomparabilis haec ingratitudo mea, quanta est iniquitas mea, & quam grauissima prauitas cordis mei. Scio me obligatam ad reddendam archillimam &

B iij

strictissimam rationem de tempore ad tuum seruitium non impenso, & momentum de tempore non peribit. Et si mihi confusibilis condemnatio fiat, quia ad tuum seruitium tempus non expendi, vt debebam, qualis erit, & quanta illa terribilis condemnatio mihi debita dignè quia ad seruitium hostium tuorum & animæ meæ, ipsum tempus, turpissimè & nefandissimè sic expendi? & si vix quantumcumque iustificatus dignè tibi seruire debeat, quid erit de me misero, qui scienter, voluntariè & malitiosè tuo seruitio indignum me feci? Et si propter ingratitudinem donatio reuocatur, quæ sorte ego miser confidere debeo de gratiis à te mihi misericorditer collatis, vt de promissione saluationis meæ, quia semper tibi ingratus fui, & tota vita mea nihil aliud fuit, nisi ingratitudinis multiplicatio, & accumulatio? Et si furtum committitur rem seu partem rei alienæ contrectando, quantum & quale furtum commisi ego sceleratus, qui non partem mei, sed totum me ipsum, non rem vilem sed pretiosam, scilicet animam meam, tibi abstuli & violenter rapui.

3. O temporum dator & dispensator, rerum perditarum diligens inuentor, & mortuorum piissime sustentator, respice in me & miserere mei. Tolle à me misericorditer ingratitudinem, fac me de indigno dignum, quatum mea possibilitas modica sustinere valet. Et in seruitio tuo parce mihi longi temporis perditionem, qui etiam multis peccatoribus pepercisti, da temporis spatium tibi placens, vt malè impensum emendem. Ad infelicem pietas immanis, respice, ad miserrimum misericordia publica. Desperatus ad omnipotentem venio, vulneratus ad medicum curro. Serua pietatem mansuetudinis, qui tam diu suspendisti gladium ultionis. Dele vniuersitatem criminum, auge multitudinem misericordiarum, vt tibi dignè seruire valeam; nunc, & in futurum, per infinita sæculorum sæcula. Amen.

CAPVT IX.

De Ambitione.

1. **G**ubernator meus, clementissime Deus, tanta prouidentia me gubernasti, quod diuitias mundanas ne superbirem, aut malè dispensarem, & paupertatem ne desolatione, aut tristitia frangerer, mihi non dedisti, sed victui meo necessaria tribuisti. Et licet ex hoc & multis aliis gratiis & donis gratuitis, tibi incessanter, humiliatione deuota, gratias referre debuissim, tamen immemor beneficiorum tuorum ad diuitias fallaces, & honores mundanos & transitorios animum declinaui, & tuis donis immensis, quorum vnus dignus non eram, non contentus, ipsas diuitias & honores, superbè & ambitiosè concupiui, non solum cogitatione, sed consensu & opere. Qui etiam ad ista habenda vigilauim, laborauim, & tuo seruitio ad quod electus eram & adstrictus, derelicto, ad acquirenda illa corpus & animam dedicaui: & ex hoc, creaturis plus affectuosè quàm tibi Creatori, obsequium præbui, plus tibi quàm ipsis deferre volui, plus eis quàm tibi obe-

DE VITÆ CURSV.

11

diui, laborare in earum seruitio, leue mihi fuit, & in tuo seruitio valde graue. Vix de earum seruitio fessus fui, sed de tuo satis citò. De offensis quas eis feci, dolui, & veniam petij, sed de offensis, tibi factis, nec dolui, nec vix etiam longo tractu temporis, petij veniam. Imò, quod grauius est & horribilius, propter eas, te offendere non dubitauì, quia magis illis quàm tibi volui complacere.

2. O ambitio nequam, crudelis auaritia, damnabilis concupiscentia, quæ Dominum & retributorem omnium mihi abstulisti, & seruis mundanis me subjugasti: perpetuum pro temporali mihi commutasti, pro mercede vana & vacua omni bono, mercedem omni bono & dulcedine plenam relinquere fecisti: virtutibus abiectionis, in peccatis viuere me fecisti, & non solum inutiliter me viuere fecisti, sed damnabiliter: quia propter corpus veribus deputatum, & ab eis corrodendum, animam meam peccatis subjugasti, & Deo, cuius erat, abstulisti. Eia! quis mihi satisfaciet de labore impenso? cum ad hoc potentiam non habeas, restat mihi, vt quia peccatoribus cum peccatis seruiui, infernalis merces & retributio mihi detur.

3. Sed misericors Deus, qui neminem vis perire, & saluas sperantes in te, confidenter ad te redeo cum gemitu & dolore. Doleo namque de seruitio sic perduto. Erubesco, quia sic te deserui, tibi non seruiui, gratias non retuli, & placentem tibi operam non detuli: beneficia tua respui, nec de ipsis contentus fui. Et quia sic in me abundauit iniquitas, superabundet in me quoque misericordia tua. Et licet sit longè à peccatoribus salus, quia qui elongant se à te, peribunt: Tamen misericordiam promittis redeuntibus ad te, *Ps. 118.* & penitentes recipis manu pia. Recipiat me igitur misericordia tua, & veniam mihi tribuat de peccatis, vt ipsis non ponderatis, regnum tuum consequar sempiternum. Amen. *155.*

CAPV T X.

De vana spe longioris vitæ, & negligentia sui ipsius.

1. **A**D te confugio immensa clementia, quia nulli dees, ad te venio vt delicta iuuentutis meæ & ignorantias meas non recorderis; in ultio- *Ps. 24.* nem iustam deducendo, negligentiam quam habeo de salute animæ meæ, & *7.* spem longioris vitæ, quæ animam meam tuis virtutibus spoliavit, catenis vitiorum ligauit, pondere peccatorum grauauit, delictorum sordibus fœdauit, nunc pulchritudine & fortitudine iuuentutis, nunc affabilitate vocis, nunc agilitate membrorum, nunc cupiditate mundanorum, nunc corporis sanitate, nunc vani gaudij suauitate, nunc ingenij subtilitate, nunc animi mobilitate, nunc ira, nunc vindicta, nunc detractioe, nunc oculorum vanitate, nunc omnium sensuum corporalium inutili gubernatione. His & aliis grauius malis meam miseram animam opprimendo, prædicta negligentia, & spes, ipsam damnabiliter necauerunt. Insuper confessionem retardarunt, & quandoque absque confessione dimiserunt; Confessorem

idiotam eligere fecerunt; & quandoque extraneum & ignotum, vt peccatorum horribilium verecundiam vitarem. Pœnitentias injunctas nec suscipere, nec susceptas adimplere, nec de peccatis dolere permiserunt, nec ab illis abstinere in posterum voluntatem præbuerunt.

2. O peruersa negligentia, ô vana & inutilis spes, quæ spes non est dicenda, sed præsumptio. Vitam meam sic miserabiliter sperando, vsque ad senium deduxisti: quæ vita sic dici non potuit, sed mors potius; non consolatio, sed desolatio; non gaudium, sed mœror; non bonitas, sed malitia; non ignorantia, sed iniquitas affectata.

*Psal. 25.
11.*

3. O Saluator meus, ne despicias me sub tanto discrimine positum: adesto mihi propitius, in his maximis & periculosis necessitatibus. Nec sufficiens sum meipsum, neque tempus sic præteritum redimere meis operationibus. Sed tu Redemptor meus, redime me & miserere mei. Diffido namque & diffidere debeo de meis meritis, quæ merita non sunt, sed demerita: & de tuis miserationibus confidenter confido. Et longè ampliùs de tuis miserationibus confido, quàm diffidam de meis malis, & iniquis actibus. Tu ex sola misericordia tua, tuo pretioso sanguine me redemisti: In mea redemptione sic tibi fui carus; non sum tibi vilis ad perdendum. Respice me oculo tuæ pietatis, & aufer à corde meo ipsam negligentiam, & spem vanam omni bono vacuam, imò omni peccato plenam: Et da firmam diligentiam, & validam spem, pariter & timorem, vt in tua misericordia firmiter sperando, tuam iustitiam timeam; quæ me ad bonum excitent, & à malo retrahant, vt te miserante veram gloriam percipiam, per infinita sæculorum sæcula. Amen.

C A P V T XI.

De negligenti custodia gregis Dominici.

1. **C**onfusus ex peccatis meis, ad te venio Domine Iesu Christe, non iudicium, sed misericordiam implorans. Negligens enim fui, non solum contra regimen proprium, sed etiam contra regimen animarum mihi commissarum. Pastorem namque multarum animarum tuo pretioso sanguine redemptarum, ex pura bonitate tua cōstituisi, vt has verbo & exemplo juxta præceptum tuum pascendo, & à luporum moribus custodiendo, in conspectu tui tremendi iudicii præsentarem, ab omni contagione mali illæsas; & rationem tibi debitam, tibi que placitam redderem de eisdem.

*Isai. 56.
10.*

2. Sed heu Domine Iesu Christe, dum meum regimen considero, nescio quid faciam, aut quid dicam: quia nomen pastoris viurpavi, & mercenarius fui. Propter temporalem mercedem, regimen assumpsi, & de bona custodia gregis non curavi: Oves errantes non reduxi, sed errare permisi, & ad peccandum meo exemplo perduxi. A periculis non liberaui, sed tanquam cæcus, laqueos, & fornacem infernales mihi & ipsis paraui. Lupos in eas irruentes, non fugavi, nec aduersus eos me postposui, sed fui & steti mutus velut canis latrare non valens. Vulneratas non sanavi, famelicas victu spiritali

DE VITÆ CVRSV.

13

tuali & temporali non pavi, sed perire fame permisi. Væ mihi quia tacui, & super ipsam custodiam non vigilavi, sed tanquam custos negligens dormiui. Imò quod detestabilius est mihi dicere, verbis, operibus, & prauis exēplis non solum ipsas oues vulneravi, sed nequiter interire non memorans, quod tot mortibus dignus eram, quod eis exempla præbui malæ vitæ.

3. Quæ confusione confundar ante tuam maiestatem, cum videbo in tremendo iudicio tuo, Apostolos per eorum prædicationem, animarum multitudinē secum ducere; Martyres per martyrij susceptionem; Confessores per vitæ honestatem, Virgines per intemeratam virginitatem; Continentes per bonæ vitæ operationem; Pœnitentes per vitæ austeritatem, ac multos alios, per operum misericordiæ exhibitionem. Ego verò miser, & omni miseria dignus, vacuus & solus apparebo in conspectu tuo pro meis demeritis recepturus, & de multis ac multis accusabor. Nec fas erit mihi aliquid respondere, nec me potero aliquantulum excusare, quia non solum de animabus mihi commissis, imò nec de propria mea anima, bonam potero reddere rationem. Nihil tunc supererit, si tua misericordia hîc me præueniat, quam audire illam terribilem sententiam, *ligatis pedibus & manibus, proicere eum in tenebras exteriores, ubi semper est & erit fletus & stridor dentium.* Matth. 22.

4. O Redemptor meus, memor esto quo pretio me redemisti, & noli perdere sic redemptum. Non consideres malitiam meam, quia maior est misericordia tua. Non despicias carnem tuam, quia caro & frater tuus sum. Non abhorreas seruum tuum, te suum Dominum confitentem. Vince malum meum, per bonum tuum. Qui propter peccatorem aduenisti, compelle me peccatorem redire ad te. Tu Domine scis & dixisti, quod non egent sani medico, sed malè habentes. Veni ad me multipliciter agrotantem, sana infirmitatem meam, doce me ut verbo & opere pascam gregem tuum. Non remaneat in grege tuo mihi commissio, ouis morbida, sed ipsius medere infirmitatibus: ut tibi præsentando ipsas immunes ab omni malo, dicere possim, *Congratulamini mihi, quia inveni ouem meam, quam perdideram.* Et ut illud gaudium Angelorum impleatur, *gaudium est Angelis Dei super vno peccatore penitentiam agente*, omnis gaudij particeps efficiar cum animabus mihi commissis, per infinita sæculorum sæcula. Amen. Luc. 18.

CAPVT XII.

De defectu Charitatis.

1. **B**enignissime Domine Iesu Christe, tuam piissimam misericordiam imploro, ut non secundum peccata mea facias mihi, neque secundum iniquitatem meam retribuas mihi. Non me dimittat pietas tua, quæ me de morte ad vitam, & de tenebris peccatorum & ignorantia, ad lucem cognitionis tuæ misericorditer euocauit. Non permittas, ut fallacia hostis callidi me seducat, sed tua veritas me protegat, & defendat. Eleua mentem meam in terra prostratam, ad te, & fac ipsam manere in te. Sicut fui voluntarius ad

C

peccandum, non sim remissus ad emendandum, sed tu sis propitius ad ignoscendum. Doleam de peccatis ultra quam in ipsis fuerim delectatus.

2. Non retardes in me conuersionem, quia etiam velox fui in auersione. Per meipsum cecidi, & sine te resurgere non valeo. Fac ut resurgam, & recogitem omnes annos meos in amaritudine animæ meæ. Non sim in conspectu tuo sicut pulvis quem proicit ventus à facie iræ: sed apprehendam disciplinā, & quiescat contra me ira tua, ne peream de via iusta. Viuam spiritu, carnis desideria non perficiam. Hereditatem æternā, quam primi parentes perdidērunt, pretio incomparabili, hoc est tua pretiosa morte mihi emisti: ad eam possidendam me elegisti, & dare eam, misericorditer promissisti. Attendat mihi promissa inæstimabilis clementia tua, quia omnes homines ex sua manu largissima vult saluos fieri.

3. Sed heu, dulcissime Domine Iesu Christe, dum vitam meam miserabiliter ad memoriam reduco, nescio qua fronte, aut qua præsumptione, audeo aperire os meum ad petendum ut mihi promissa attendas; cum non fecerim, nec faciam iustitiam, propter quam, æternam gloriam promittebas. Præcepisti namque, ut charitatem perfectam haberem: scilicet ut te diligere super omnia, & proximum meum sicut meipsum. Hæc sunt præcepta tua singularia & præcipua quibus impletis cætera adimplentur, & ipsis relictis, cætera quantumcumque bona ad nihilum rediguntur. Istud est iugum tuum suauis, & onus tuum leue, in cuius obseruatione nemo potest se per impotentiā excusare. Per ista sancti viri vtriusque testamenti tibi placuerunt. Hæc est via, per quam præcipis ambulare. Hæc est porta, per quam patet Paradisi ingressus. Hæc est vita placens tibi. Nulli obest, omnibus prodest, animam decorat virtutibus, corpus adornat moribus, intellectum clarificat, mentem eleuat ad superna, Diabolum vincit, merita auget, peccata fugat. Hæc est via mädatorum tuorum, in quorum custodia retributio multa. Ista cognoscebam, & videbam, & sciebam, quia tua clementia me docuerat, & ea adimplere præceperat.

4. Sed ego miser & sceleratus, more aspidis obturans aures cordis mei, nolui intelligere, ut bene agerem, & more Pharaonis, tua præcepta spernens durior fui effectus, & animum ad deteriora mihi, ut non solummodo te non diligere, sed etiam quod prohibebas fieri totis viribus adimplere. In amicum, charitatem perfectam non extendi, & si quandoque eum dilexi, causa diligendi eum fuit carnis affinitas, bonum acceptum ab eo, vel etiam speratum. Aut finxi me diligere ob timorem; & quandoque vitium materiam dilectionis præbuit. Et sic talem charitatem seruando, charitatem destruxi. Inimicum odio habui, & pro posse de ipso me vindicaui, auferendo vindictam à te, quam tibi singulariter seruasti. Cum de facto non potui, corde tamen adimpleui, & in omnibus contra eum multas detractiones malitiose interposui, & alios ad similia aut deteriora contra eum prouocaui: fictam cum eo pacem feci, & si ei tunc non nocerem, gaudebam ob alios damnum inferentes, nec prohibui fieri, licet hoc possem.

5. Ecce, Deus meus, qui es suprema & indissolubilis charitas, qualiter obediens tibi fui, qualem charitatem seruavi, & qualiter quod præceperas ad-

impleui, Indulgentiam de iniquitatibus meis, frequenter petij, & aliis nolui indulgere. Debita tibi decem millium talentorum à te misericorditer petij, & remisisti. Et ego nequam, conseruo meo, imò fratri meo, nolui debitum centum denariorum remittere, neque ei charitatem exhibere. Quid igitur mihi restat, nisi vt tradas me tortoribus, quousque reddam vniuersum debitum? Dignum enim & iustum est, vt magna charitas mihi non fiat, qui modicam charitatem nolui exhibere.

6. Sed, misericordissime Iesu, absit à me talis iustitia. Misericordiam peto & non iudicium. Tuam clementiam exoro, Merita tuæ beatissimæ passionis flagito, vt defectus meos suppleant, tuam iram mitigent, vindictam in misericordiam commutent, charitatem inuocent, vitam meam emendent, poenitentiam de commissis tribuant, veniam de ipsis concedant, satisfactionem dignam donent, & animam meam veste indutam iniquitatis, charitate induant: vt sic veste nuptiali induta, te iuuante ad cœnam tuam veniat, vbi ab vbertate domus tuæ satiatur, & æternaliter repleatur. Amen.

CAPVT XIII.

De inuitili & damnosa gloriatione.

AD hoc natus sum, & ad hoc veni in mundum, Domine Iesu Christe, vt corde humili, & actu perseverabili, cogitatu, consensu, verbo, & opere placidè tibi seruirem. Et vt hoc experientius adimplerè, à mundo me separasti; ad te me vocasti, spirituali prerogatiua scientiæ, & plenioris notitiæ tuæ, me docuisti; qualiter tibi seruire, me singulariter informasti. Omnia sufficientia ad seruitium tuum dono gratuito pro parte tua ministrasti. Nihil enim mihi præcepisti, aut fieri voluisti per me, quin leuiter adimplere possè. Sed ex parte mea non defuit posse; sed velle omninò defuit, & nolle plus potuit in omittendo, quàm posse potuit in operando. In hac desidia me tenui, in hac pigritia perseueraui, modum voluntarium non mutavi, ad mundum de quo misericorditer me eieceras, redij, cum dilexi adhærendo, & flammis concupiscentiæ ipsius me exponendo: ad complacentiam carnis omnes sensus corporales dedicaui, cum quibus in superbiam eiectus sum, & sic Regi superbiæ obediui. Tota vita mea carnalis fuit, & non spiritualis, & sic te derisi & contempsi.

2. Sed benignissime Iesu, adhuc maiorem dementiam in me tua gratia illustrante cognosco: quia si interdum in aliquibus tibi seruiui, hoc reputaui gratiosè, non ex debito, tibi factum. Et ex hoc in superbiam erigebam, cupiens vt hæc videntes me laudarent. Et vt sic fieret, in peruersa cogitatione habebam; & ignorantibus hoc pandebam; & ab omnibus videri affectabam. Et ideo à te maiorem retributionem habere credebam, sic modicum tibi seruendo; & tamen ex debito semper tibi seruire debebam.

3. O singularissimæ bonitatis Domine Iesu Christe, qualis gloria tibi ista fuit? Quale seruitium tibi impendi? Quod gratiosum esse credebam, debi-

tum erat, & non solum interdum tibi seruire, sed iugiter tibi seruire debiti, erat & obligatio perpetua. Imò nec creatura pura quæcunque fuerit, dignè tibi seruire potest, nec hoc sufficit quantumcumque viuat. Et ego miser, vanè & otiosè gloriabar, & in hoc mercedem meam recipiebam, quia talis gloria in ignominiam conuertetur, nisi manum misericordiæ tuæ, ô pietatis auctor, super me extendas, & talem vanam gloriam in humilitatem conuertas, & reatum meum perfectè cognoscam, & cognoscendo doceam; & dolendo penitentiam corde humili & contrito agam, remissionemque à te misericorditer obtineam. Spes mea valida est in tua misericordia infinita. Sana igitur omnes languores meos, quia magni sunt & multi. Habet enim multa in me princeps huius mundi, & hoc fateor.

4. Sed tuam clementiam oro, vt liberare me digneris, quia Redemptor meus es. Viuifica me, tu qui peccatum non fecisti. Tu caput meum es, in quo nulla est macula. Adiua membrum exiguum & infirmum, reple me tuis sanctis virtutibus, & fac me pollere bonis moribus, & sanctis operibus, & perseverare vsque in finem, secundum tuam voluntatem, vt ad tuam beatissimam gloriam peruenire valeam, ibique manere per infinita sæculorum sæcula. Amen.

CAPVT XIV.

*De iustificatione sui ipsius, & de condemnatione
temeraria circa alios.*

1. **N**on sufficit impurissimus animus meus, cogitare, & inuestigare singulares maculas & peruersos actus miserabilis vitæ meæ. Tanta enim sunt vitia & peccata mea, quòd inuestigabilia sunt apud me, nisi tua misericordia magna reducat mihi illa ad memoriam. Ego nimia assuefactione & actu consuetudinario, enormia peccata mea, venialia & nulla esse putavi. Et quia erga me negligenter me habui, & vitam meam miseram cognoscere postposui, vitam aliorum iudicando temerariè denigraui. Alterum Pharisæum me sentio, qui iustificans seipsum, ceteros in genere, & Publicanum in specie accusabat. Sic etiam ego miser, me ipsum iustifico, & aliorum vitam condemno. Peccata mea leuia puto, & in aliis grauia.

2. Imò non mea, sed aliena considero & inspicio diligenter. De meis vitiis & malitiis interdum glorior & aliis nò compatiendo, vitam ipsorum vituperor. Mala mea secreta esse volo, sed aliena publica. Peccata mea inulta esse cupio, sed aliena cum rigore punià esse affecto. Misericordiam mihi quero fieri, sed aliis iustitià. Alios reprehendi, & me non respexi, alios posui ante oculos meos, & me posui post dorsum meum. Laudes humanas quaesui, & aliis libenter detraxi; delicta mea excusavi, & aliorum peccata accusavi; de me ipso præsumpsi omne bonum, & de aliis omne malum; quia facta ipsorum quantumcumque bona in deteriorem partem interpretatus fui, nec ab eorum detractatione cessavi. Dolui de laudibus aliorum, quia plus voluissem laudari. Et vt

melior reputarer, aliorum bonam famam mendaciis coinquinaui. Nihil mihi restat, nisi quod contra me, dignè & iustè Pharisei sententia proferatur.

3. O Domine Iesu Christe, scio, quod non glorificabitur ante te omnis caro: quoniam si quid boni parui vel magni est in me, donum tuum est, & in me non est nisi malum. Cum enim me glorificaui de bono, hoc feci de alieno, quia tuum est omne bonum. Et sic me glorificando, me constitui furem & latronem, quia furari volui gloriam tuam, & tamen laudare te debebam de bono tuo. Tu autem, Domine, non sinas me ampliùs cadere in illam exprobrationem, vt exprobretur mihi furari voluisse gloriam tuam, cuius est omne bonum. Mihi autem confusio faciei & miseria, cuius est omne malum, nisi tu, benignissime Domine Iesu Christe, qui Publicani pœnitentiam suscepisti, & me etiam ad pœnitentiam expectasti, misericorditer digneris preces meas suscipere.

Rom. c.
3.20.

4. Suscipe igitur clementer, vt cum Publicano dicam: *Deus, propitius esto peccatori.* Non enim dignus sum oculos ad cœlum leuare præ multitudine peccatorum meorum: sed percutere pectus meum vera contritione. Aperi os meum, vt recognoscendo peccata mea, integra confessione expandam. Da mihi gratiam dignè conterendi, & confitendi, & satisfaciendi de delictis, & indulgentiam tribue de eisdem; vt hîc in tua gratia viuendo, mala desiccam, & illa iterum non committam, sed opera tibi placita faciam: vt cùm dies vltimus vitæ meæ aduenerit, ad regnum tuum perueniam sempiternum. Amen.

SECUNDA PARS,

HVIVS TRACTATVS,


SIVE

CONTEMPLATIONES DE MISERICORDIA

Dei ad homines, gradatim & successiue concessa.

CAPVT I.

De misericordia Dei circa creationem hominis.

1.  MISERICORDIA tua, sempiternæ Deus, præuenit me, quia cùm nihil essem, aliquid me fecit de nihilo. Quippe me fecisti creaturam tuam. Sed qualem creaturam me fecisti? Certè non inanimatam, sicut lapides, sed animatam anima rationali, quæ corpus suum sua societate viuificaret, & semetipsum sua ra-

C iij

tione disponderet: habentem in se arbitrij libertatem, vt sua cogitatione eligeret & veller. Quæ sic colligata est corpori, vt nec cum vellet, se inde segregare posset, nec se retinere, cum iussionem tuam audiret. Hanc sum me mundam & speciosam creasti, & ad imaginem & similitudinem tuam mirabiliter productam tribus potentiis dotasti; scilicet intellectu, per quem te cognosceret & intelligeret; voluntate per quam te diligeret & amaret; memoria, per quam te Creatorem suum in mente memorie retineret, & vt beneficia tua, ex dono gratuito impensa semper recolendo, gratiarum actiones tibi non cessaret referre.

2. Sed, misericors Deus, vnde hoc tibi, vt me creares tam nobilem creaturam? Quia non solum cum creaturis terrenis, verum etiam cum creaturis celestibus, scilicet beatissimis Angelis participem me fecisti. Nam ex voluntate tua totaliter dependebat creare me, vel non creare, vel creare cum anima, aut sine anima. Certè sic est, nec quisquam de hoc addubitare potest. Quis igitur te mouit vt creares me cum anima rationali? quæ fuit causa motiua tua? quid ad hoc faciendum te induxit? hoc solum fuit summa & immensa misericordia tua, quæ talem me creauit, vt regnum possiderem æternum, socius essem Angelorum beatorum, & cum ipsis perpetuo te laudarem.

3. O benignissime Deus, quanta fuit misericordia tua erga me miserum peccatorem, qui sic me dignatus es creare, & honorare, & eligere ad te laudandum cum beatissimis Spiritibus celestibus? Non enim mea merita, nec meæ gratiæ te coegerunt, vt me creares, sed benigna bonitas tua & clementia tua. Illa charitas quæ te coëgit ad me creandum, ipsa, quæso, cogat te ad regendum. Quid enim prodest, quidve contulit charitas tua, si per eam, miseriam meam non releues, & non regat me dextera tua? Ipsa te vincat charitas ad soluendum, quæ te vicit ad creandum, quia non minor est. Nam tua charitas tu ipse es, qui semper idem es. Non est abbreviata manus tua, vt saluare nequeat; neque aggravata auris tua, vt non audiat: sed peccata mea diuiserunt inter me & te, & inter lucem & tenebras, quia maxima fuit mea ingratitude, qui sciens & non ignorans prædicta beneficia, illa tibi non recognoui, gratias tibi non reddidi. Imò te Creatorem meum aspernans, & non timens, nec verens, non laudaui, sed vituperavi; non honoravi, sed dehonestaui; gratias non retuli, sed te irritavi; gloriam tibi non dedi, sed me ipsum glorificaui super te.

4. Ecce, piissime Creator meus, creaturam, quam creasti ad imaginem tuam, deformaui per innumerabilia peccata, & deturpavi. Tuam igitur clementiam deprecor humiliter, vt oculos tuæ immensæ charitatis ad me conuertas. Dele iniquitates meas. Referam in me imaginem & similitudinem tuam, vt recognoscam tanta beneficia tua. Concede mihi gratiam, vt officium ad quod me elegisti, faciam puro corde. Præsta misericorditer, vt in præsentī vita, continuè tibi gratias referam, & in futura cum sanctis Angelis tuis te laudem, & benedicam in tua gloria, per infinita sæcula sæculorum. Amen.

De misericordia Dei circa regenerationem hominis.

1. **M**ultiplicasti misericordiam tuam, in me creatura tua, misericors Saluator meus, quia animam meam mihi dedisti speciosam & incubitam: ex coniunctione & vnione infecti corporis, infecta & maculata originali peccato fuit, per quod pœnam damni incurrit, vt tua diuina visione perpetuò priuaretur. Sed ex magna misericordia tua, oculos tuæ pietatis in eam defixisti, & per Baptismi gratiam, ab ipsa, peccati maculam exterxisti, vt non pœnam damni aut sensus vltèrius subiret, sed ad tuam gloriam separata à corpore conuolaret. Ipsam insuper tibi in sponsam desponsasti, & annulo tuæ sacratissimæ fidei subarrasti, inimicis & corporum noxiis renuntiare fecisti, & donis & gratiis spiritualibus mirificè decorasti. In hoc, piissime Pater, misericordia tua abundauit, tua immensa clementia exuberauit, & tua summa bonitas sic me elegit. In infidelitate cum multis aliis infidelibus reliquisse me potuisses. Vbi te aut tua dona non nouissem, sicut multi alij non nouerunt, qui simulacra aut idola fraude diabolica non desinunt adorare, vt sic daemonibus seruiendo, miserabiliter cum ipsis perpetuò trucidentur, & pœnis infernalibus obligentur.

2. Sed heu, Domine Iesu Christe, plus infidelem me video quàm sint ipsi infideles: quia te & misericordiam tuam agnoui, & post agnitionem quodammodo retrocessi. Nam. promissionem meam tibi factam, irritam feci. Quia inimicis quibus renunciaueram, & eorum pompis, per consensum & operationes volui adherere, & te cum infidelibus copulatus reliqui, abjeci, & contempsî. Onus tuum leue, cui me subjugaueram, deposui, & ceruicem meam durissimam submissi sarcinæ peccatorum, & voluntati inimicorum meorum.

3. O benignissime Redemptor meus, adhuc regeneratione magna indigeo, quia mortuum me sentio, & nihil sum. Ad nihilum sum deductus. propter multitudinem peccatorum meorum quæ commisi, & propter multas iniquitates, negligentias, & ignorantias meas, in quibus totam miseram vitam meam expendi. Regenerare me igitur digneris, dulcissime Domine Iesu Christe, de culpa ad gratiam, de tenebris ad lucem, & de morte ad vitam perpetuam, per tuam piissimam misericordiam, vt de nihilo aliquid me facias tibi placens. Simque creatura placens & acceptabilis, & per bona opera, gratiosa. Viuam hîc per gratiam, qui mortuus fui per culpam. Pœna quam merui, conuertatur te miserante in gloriam: & de beneficiis tuis tibi gratias referam, & te laudare valeam per infinita sæculorum sæcula. Amen.

De misericordia Dei circa aspirationes diuinas.

1. **Q**uantas ostendisti mihi, benignissime Domine Iesu Christe, aspirationes multas & bonas in vita mea, vt declinando à malo bona facerem? Hoc tu solus scis, quia præterita, præsentia & futura, in conspectu tuæ diuinæ maiestatis, manifesta manent. Nihil tibi est absconditum vel occultum. Nihil à memoria tua excidit. Omnia vides, omnia scis, omnium recordaris. Nam licet magnus peccator sum, & ex iniquitate mea & peruersa voluntate, in profundum vitiorum venerim: tamen tua immensa misericordia aspirationes salutes semper mihi dedit & præbuit. Non fuit in hoc temporis interpellatio, non dierum electio, non horarum diuisio, non momentorum interruptio, sed temporum, dierum, horarum, & momentorum mirabilis continuatio. Iis enim aspirationibus tuis cor meum frigidum in amorem tuum inflammasti; animum prostratum ad te eleuasti; mentem meam vacantem otio, ad bene operandum clementer stimulasti.

2. Has aspirationes à me non separasti, ne importunitate vincerem, qui repiditate vincebar, eas in me multipliciter cumulasti. Nunc ad contemplandum, nunc ad officio vacandum, nunc ad Missas celebrandum, nunc ad peccatis resistendum, nunc ad te laudandum, nunc ad gratias tibi referendum, nunc ad te & proximos diligendum, nunc ad iniurias & rancores remittendum, nunc ad discordias mitigandum, nunc à detractionibus præcauendum, nunc ad proximis indulgendum, nunc ad otiosa fugiendum, nunc ad corpus animæ subjugandum, nunc ad bona pauperibus erogandum, nunc ad desolatos consolandum, nunc ad opera misericordiæ & alia bona meritoria exercendum, & alia multa & innumerabilia ad salutem corporis & animæ, per tuas piissimas & continuas aspirationes, mihi indigno & miserabili, manu largissima præparasti, & misericorditer tribuisti, & tribuere assidue non cessasti; quocunque irem, vbicunque essem, quidquid cogitarem, dicerem aut facerem, semper me benignè aspirasti. Hoc non merueram, neque dignus eram, vt sic per tuas benignas aspirationes me visitares, & ad te me traheres, qui à te fugiebam, à te me separabam, tuis aspirationibus contradicebam, nec eis adherere volebam.

3. Ecce, misericors Domine Iesu, qualiter animam meam coram te exhibeo virtutibus destitutam, catenis vitiorum ligatam, discissam vulneribus demonum, puridam & foetidam vlceribus criminum; his & aliis omnibus malis obrutam, compressam, circumdatam; bonorum omnium releuamine destitutam. Ecce quanta coarctat me miseria sincerè. O vniuersa misericordia, grauitè coram te peccaui, quia non solum multa & enormia peccata commisi, sed etiam tuas benignas aspirationes non recepi, sed eas contempni. Indulgere mihi digneris, dulcissime Iesu. Non recedant à me misero

DE VITÆ CVRSV.

27

mifero peccatore tuæ aspirationes, sed eas recipiam, & opere compleam te adiuvante; cor meum malignum mudent à vitiis, & vitam meam laudabilem tibi reddant, & animam meam ad te perducant, vt misericorditer tecum viuat, per infinita sæculorum sæcula. Amen.

C A P V T IV.

De misericordia Dei circa cognitionem peccati & emendationem ipsius.

1. **A**uxiliator meus, benignissime Iesu Christe, tot & tanta beneficia animæ meæ pro salute tua misericorditer contulisti, & conferre non definis omni die, quod memoria mea, ea retinere non valet, nec mens cogitare, nec lingua proferre. Nec etiam mea modicitas, ingenioli ac potentia, dignas gratias referre potest. Inter cætera dona misericordiæ tuæ mihi gratiosè concessa, agnosco, dulcissime Iesu, & Saluator meus, sollicitudinem quam erga me miserum peccatorem habuisti de salute & saluatione mea, ne morte perpetua perirem, sed æternaliter viuerem cum bonis. Scio namque me nequissimum peccatorem, & primum ad omne malum: cui operam dedi, vt nequissimos conceptus opere adimplerem: tua mandata contemnendo, & tua consilia non seruando.

2. Sed tu, piissime Redemptor meus, mala quæ iniquè perpetrabam, ad uiscendum non considerasti, sed vt animam maleuolam retraherem à peccatis, & de ipsis dolerem, & gratiam primam acquirerem, cogitationem perfectam dedisti. Tantæque gloria me illuminasti, quod quacumque hora seu momento temporis ad peccandum descendebam, peccati mihi notitiā dabas, vt illud non committerem, vel saltem de commissio satisfacerem & dolerem, & ad te redirem sine mora; ne inimici mei de lapsu meo lamentabili diutius gauderent, nec me possent trahere secum pariter ad infernum. Hæc fuit tua prouidentia pia erga me, hoc fuit adiutorium magnum mihi, hæc fuit permissio emendandi vitam meam miseram, hæc magna miseratio tua, Domine Iesu Christe, quia scio quod cognitio peccati nō potest haberi sine cognitione tui. Non enim noscerem tenebras, si semper in tenebris essem, sed lucis notitia contrarium suum non dimittit incognitū. Tu namq; fuisti lux illuminans mentem meam, vt peccatorum tenebras cognoscerem.

3. Igitur secundum magnam misericordiam tuā memento mei, tu, propter bonitatem tuam, Domine, quia dulcis & rectus & benignus es, Domine, propter hoc confido, & firmiter spero, quod dabis mihi delinquenti gratiam in hac vita. Et quamuis tua miseratione peccata cognouerim, & propter huiusmodi cognitionem à peccatis non delij, tamen in exuberante misericordia tua confido. Et absit quod de ea diffidam, quantumcumque sim nefandissimus peccator, & sagena peccatorum multorum circumdatus. Recipiat igitur me solita pietas tua, non deferat me misericordia tua, indulgeat mihi clementia tua custodiat me tua immensa bonitas: vitam meam tibi odibi-

D

Iem emendem : pro peccatis meis lugeam & satisfactionem condignam iuxta possibilitatem meam impendam, vt peccatis & vitiis per tuam largissimam bonitatem misericorditer indultis & remissis, ad tuam gloriam veniam, eamque possideam per infinita sæcula sæculorum. Amen.

CAPVT V.

*De misericordia Dei, ne peccator tantum peccet,
quantum vellet.*

1. **V**Sque nunc cæcus fui in mente mea, Domine Iesu Christe; quia tuas immensas misericordias non cognoui. Fui namque & sum maximus peccator, multis criminibus inuolutus, ad quæ commitenda animum inclinavi, & opere consummaui, & longa consuetudine illa in mente retinui, & quadam animi obstinatione, quasi in naturam conuersti. Sed vnde hoc mihi vt multa alia non commiserim sicut ista? Num virtus animum meum retraxit? numquid subiectum ad illa committenda non disposui?
2. Scio, piissime Iesu, & verè scio, quodd virtus propria me non retraxit, vt subiectum dispositum & inclinatum ad illa perpetranda. Non stetit per me, quominus illa ex magna malitia commiserim, & alia multa. Sed, misericors & miserator Domine, manus dispensatiua misericordiæ tuæ, se interposuit, animum meum tenuit, me retraxit, tentantium potentiam restrinxit, frænum mihi posuit, & non laxauit, vt subiectus ei, malum non conciperem, aut conceptum perducerem ad effectum.
3. Laudo igitur & magnifico & benedico nomen tuum, Saluator meus. Gratias tibi refero de tantis gratiis & misericordiis mihi peccatori impensis. Quia sicut multa peccata perpetravi, sic etiam multa alia perpetrassem, nisi tua infinita misericordia mihi peccatori miserabili subuenisset. Quis igitur potest considerare, quæ bona amicis tuis præstas, qui mihi inimico tuo propter multitudinē peccatorum meorum, sic subuenire dignatus es, vt tanta facinora non admitterem, quanta vellet mea iniquitas; non solum actum, sed etiam occasionem tollendo?
4. Parce mihi, Domine Iesu Christe dulcissime; parce mihi. Indulgere mihi digneris ingratiissimo peccatori, cæcitate cordiali repleto, omni gratia & misericordia indignissimo. Parcere & indulgere mihi digneris misericorditer; aufer puluerem cæcitatē de corde meo, vt tuam misericordiam videā. Tolle ingratitude de mente mea, vt tuam pietatem, & misericordiam agnoscam, & cognoscendo gratias referam, & referendo, tua immensa misericordia in me miserabili peccatore augmentetur & multiplicetur, vt peccata mea deleantur, virtutes infundantur, cor meum eleuetur ad te, & vita mihi meritoria tibi placita tribuatur, vt vita ipsa temporali me moriente finita, vita spiritali tecum viuam, per infinita sæculorum sæcula. Amen.

DE VITÆ CURSV.

23

CAPVT VI.

De misericordia Dei expectante peccatorem ad penitentiam.

1. **O** Misericordia infinita, pietas immensa, clementia exuberans, virtus indeficiens, bonitas me cōseruans, patientia me sustinens, fortitudo me confortans, sapientia me instruens & informans, dulcedo me recreans, salus me languentem sanans, fons terram aridam cordis mei irrigans, summa bonitas me prospiciens, suprema potentia me defendens, mitissime Domine Iesu Christe, ego iniquissimus peccator & fugitiuus longauis temporibus, ad tuam misericordiam redeo, quæ mihi semper affuit, & nunquā mihi defuit. Mea fragilitas nulli alteri comparabitur, attento, quod tanta & talis fuit. Sed tuam ineffabilem misericordiam volui cogitare. Vita namque mea misera & nōminatione indigna, tota fuit indignis vitiis & peccatis maculata, & sordidata criminibus & delictis, repleta fœtoribus & spurciis, tota contaminata dolo & fallaciis, & tota sauciata iniquitatibus & mendaciis.
2. Ex his autem subiectus fui inimicis animæ meæ, qui potentiam in me fraudulenter vsurpauerunt; me iniquē prostrauerunt; à te, me volente & consensum præbente, separauerunt, & eorum ditioni me miserum subiugarunt. Et quid aliud restabat, nisi iustissima recipere? Nisi quod terra me viuum absorbuisset, & mox Internus perpetuū deglutisset, vbi corpus & anima penam iustam & dignam pro suis demeritis recepisset, & in illorum manibus semper esset, quibus in hac vita te derelicto, volutariè me submissi.
3. Et vade hoc mihi, Redemptor meus, quod tua iustitia fuerit retardata? Vnde hoc quod inimici mei, quorum voluntati & potestati me subiugaueram, huiusmodi iustitiam, sicut etiam affectabant, non fecerunt, quamuis cupientes, vt me cum ipsis perderent in aeternum: vt sicut eis in hac vita deslenda, fueram socius consolationum carnalium, sic in Inferno fierē cum ipsis socius passionum? Sed misericordissime Domine Iesu Christe, tu me tua gratia illuminasti superabundanter, & superueniētem misericordiā tuam, nunc cognosco. Illa sola fuit, & non altera, quæ prædictam iustitiam retardauit, voluntatem meam prauam, & inimicorum meorum potentiam cohibuit, & meam dementiam non sequendo, manu pia me tenuit; nec permisit, vt inimici in me suam complerent voluntatem. Quando offendebam te, tu me custodiebas; à te recedebam, & tuo inimico me tradebam, & tu ipsum me acciperet, impediēbas. Sic me multoties à faucibus Diaboli liberaſti. Sciebas enim, Domine, quia si tunc mors me occupasset, animam meam Infernus suscepisset, & perpetuū damnatus fuisset.
4. O benignissime & piissime Saluator meus, gratias tibi refero, quantum mea misera fragilitas se extendit, quia in tali vita miserabili & iniqua, tua magna misericordia me cum patientia sustinuit. A tantis & tam im-

D ij

mensis periculis, in quibus tantis temporibus steti, me liberauit, & meae malitiae compatiendo, inimicorum meorum voluntatem retraxit, & à faucibus infernalibus me piè eripuit. Fac per tuam misericordiam magnam, vt vitam meam emendem, tempus enim misericordiae, non iudicij est. Tu donas remissionem conuersis; patiens es super peccatores, donec cōuertantur; & quando conuersi sunt, peccata obliuioni tradis; futura promittis, hortaris pigros, consolaris afflictos, doces studiosos, adiuuas dimicantes, neminem deferis laborantem, & clamantem ad te corde contrito. Igitur lamentabiliter clamo ad te, vt inimicis meis potēti virtute resistā, & tibi placita faciam; vt hīc in tua gratia viuendo, gloriam tuam acquiram & possideam, per infinita saecula saeculorum. Amen.

CAPVT VII.

De misericordia Dei circa prouisionem victualium temporalium.

1. **C**Ur vixi haecenus, aut adhuc viuo, Domine Iesu Christe, qui non sum dignus pane quo vescor, cūm sim tibi ingratus peccator? Victum mihi temporalem tribuisti liberaliter, vt ad tuum placitum viuendo, aeternam gloriam obtinerem; vitam meam diutius conseruasti, vt tibi affectuosē seruirem; me ad pēnitentiam expectasti, ne morte aeterna perirem, bona temporalia mihi largitus es, vt ex eis mihi & pauperibus subuenirem.

2. Sed heu, misericordissime, victum gratanter recepi, & tibi placere non curavi; vitā, quam mihi benignē conseruasti, ad tuum seruitium non expendi. Etsi me ad pēnitentiam expectasti, non propter hoc me emendauī; sed oblectamenta corporis concupiui. Bona temporalia mihi gratiosē concessa voluptuosē consumpsi, pauperibus non ministraui; ex his multoties superbiui. Ceteros, minores, pares, aut maiores contempsi; de his omnibus gratias tibi non reddidi, nec contentus fui istis, sed ex maxima cupiditate, plura alia, & maiora, malo desiderio affectaui, non vt tibi seruirem, sed vt mihi ipsi & mundo abundarē; non vt subessē, sed vt praessē, non vt humiliarer, sed vt superbirem, non vt erogarem, sed vt cupidē retinerē. Tu has gratias mihi impendere non cessasti, & ego illis malē vtendo causam, propter quam haec mihi gratiosē contulisti, negligenter & malitiosē postposui adimplere.

3. Cur igitur in tali vita me sustinuisti, cūm potius vita priuari debuissē? Cur manum largissimam tuam non retraxisti, ex quo renuebam facere quae iubebas, vt cessante causa etiā cessaret effectus? Benignissime Domine Iesu Christe nunc cognosco & intelligo, quod nulla causa alia te induxit ad continuationem & largitionem tantorum donorum, nisi summa & inscrutabilis misericordia, & exuberans benignitas tua, vt rebellem voluntatem meam, quae sponte tibi seruire nolebat, donis & promissionibus ad seruiendū tibi multipliciter immutaret. Gratias igitur tibi refero, dulcissime Domine Iesu Christe, gratias tibi reddo, & gratiarū actiones. Corde humili assurgo.

DE VITÆ CVRSV.

25

ad te. Concede mihi miserabili peccatori, vt cor meum tibi gratias acceptabiles referre non cesset, sicut etiam nec tua dona cessant. Sola misericordia tua erga me iniquissimum peccatorem, patientem te reddit, & iustitiam tuam mitigat, ab Inferis me eripit, à morte me liberat, & cognoscere te & tua largissima beneficia facit. Tu pascis me, tu erigis me, bona das, blandiris ne fatiger in via, corripis, cedis, percutis, dirigis ne aberrem in via. Siue ergo blandiris ne fatiger in via, siue castiger ne oberrem in via, tu Domine, refugium factus es mihi.

4. Augeatur in me misero peccatore tua misericordia infinita, quam corde humiliato prout possum deprecor & oro, vt mihi hanc vitam tibi placitam tribuat, & in futuro misericorditer gloriam sempiternam. Amen.

CAPVT VIII.

De misericordia Dei circa confessionem peccatorum.

1. **O** Inestimabilis dilectio charitatis! ô amor insuperabilis! ô patientia inuincibilis! piissime Domine Iesu Christe, non potest intellectus meus modicus, capere aut comprehendere infinitam misericordiam tuam, mihi nequam peccatori exhibitam, quam etiam exhibes omni die. Licet enim tua magna misericordia me creauerit, & ex aqua & Spiritu sancto me regenerauit, tamen nihil mihi ad salutem profuisset, quia propter malitiam & iniquitatem meam frequenter naufragium pertuli: hoc est, diuersa peccata corpori & animæ periculosa commisi; & nisi misericorditer tua immensa bonitas per secundam tabulam mihi subuenisset, incendio infernali subuersus fuisset, nec eius voraginem euasissem.

2. Sed hæc secunda tabula, scilicet confessio, contritio, & satisfactio, quam mihi ordinasti ad emendandum, & euitandum mortis pericula, me liberauit te adiuuante à naufragio vitiorum, & me elongatum à te, nauigando cum ea, peruenire fecit sine periculo ad te. Istam tabulam tu diligis, ista placet tibi, & in ista delectaris; quia tibi reconciliat peccatorem, de inimico amicum facit, tuam indignationem mitigat, tuam misericordiam prouocat, iustitiam tuam in clementiam conuertit, iniustum viuificat, sententiam tuam formidandam auertit, malas maculas cordis tergit, virtutes ministrat, pacem procurat, inimicos vincit, Infernum claudit, cælum aperit, gaudium affert Angelis, animam lætificat, & bona omnia sibi parat. Sed ego miser & sceleratus peccator, nauigando per periculosum & tempestuosum mare huius sæculi fluctuantis, hanc tabulam contempsi, & dum per aspirationes tuas piissimas, eam in corde meo misisti, recipere recusaui; & dum habui, cum debito modo non gubernauit, sed quandoque eam fregi & diuisi, & sic periculum propinquabat.

3. O misericordissime Redemptor meus, quàm infelicitissimus peccator sum, quàm salutis meæ immemor, & quàm ingratus tibi, qui tantum

D ij

beneficium mihi salutiferum non recolens, tantum donum non acceptans, periculis me exposui, periculis me submisi, & pericula euadere non curavi. Et ideo non solum infirmitatem aut vulnera lethalia, sed etiam mortem frequenter incurri. Adiuua me, Domine Deus meus, in mortis articulo constitutum, naufragio circumdatum, ventis mortiferis expositum peccatorum turbinibus agitatam. In tua namque misericordia fixi anchoram spei meae. Praesta mihi misericorditer hanc tabulam tibi placitam, mihique necessariam & salubrem, per quam possim euadere pericula cuncta, tibi placere, & ad te tuto venire valeam, securus de remissione omnium, peccatorum meorum, quam humiliato corde flagito misericorditer mihi dari.

4. Da, Domine Iesu Christe, misericordiam misero, quia tamdiu pepercisti criminoso. Inclinet ad remedium humilitatis poenitentis, quem prouocare non potuit diuturnitas peccatoris. Dirige pedes meos in viam pacis per quam ingrediat in viam tabernaculi admirabilis usque ad domum Dei, in voce exultationis & confessionis: quia confessio est via, per quam regredior ad te, per quam regredior ab inimico, & redeo ad te: viam, quam te iuuante sequar, ut cum tuis Sanctis laudes & gratias tibi referam, & secute viam per infinita saecula saeculorum. Amen.

CAPVT IX.

*De misericordia Dei circa communionem sui sacri Corporis
& sui pretiosissimi Sanguinis.*

1. **Q** Vis me horribilem peccatorem potuit plus amare quam tu, clementissime Domine Iesu Christe, qui corpus, & animam & omnia bona quae habui, & habeo, spiritualia & temporalia, vitam quoque diuturnam mihi misericorditer & donatione gratuita tribuisti, & morte tua piissima me redemisti. Et ampliora beneficia mihi contulisses, si mea peccata non interuenissent, & illa beneficia debito modo & tibi placito recipere voluisssem. Sed semper tanquam iniquus & peruersus, aduersus te recalitraui, & contra propria commoda laboravi, fatuitatem meam & negligentiam sic ostendens.

2. Sed quid amplius, Domine Iesu Christe, mihi miserabili peccatori donasti? Certè donum excellentissimum, & incomparabile; scilicet sanctissimum Corpus tuum in cibum, & salutiferum Sanguinem tuum in potum, ad recolendam memoriā tuā beatissimā passionis, & meae gloriosae redemptionis. Odonium singularissimum, & omni admiratione plenum! qui te digne recipit, à malis retrahitur, ad bona promouetur, peccata sua minuit, & virtutes acquirit. O cibus suauissimus animam nutriens & impinguans! qui te digne comederit, viuet in aeternum.

3. O panis Angelorum, habens omne delectamentum & omnem saporem

suauitatis, panis vitæ, panis munde; sumentem reficiens & nō deficiens; purgans & non inficiens; mentem confortans & non debilitans; viuificans non interficiens; pacificans non bella prouocans; salutē non morbum tribuens; gloriam non pœnam ministrans, gratiam dans, & pœnam auferens; noxia debilitans, & bona largiens; consolans imbecillem & superbum humilians; quis dignē potest te extollere laudibus? quis dignis precibus exaltare? quis dignis studiis magnificare, & glorificare? Quis dignis vocibus venerari, & dignē suspiriis humilibus adorare? Quis digna mente, & mundo corde sumere te potest? O donum pretiosissimum, & omni laude dignissimum, omnem immensitatem excedens, in quo idem est ipsum donum cum datore, & dator vnum & idem cum dono.

4. O largitor omnium bonorum, pretiosius donum mihi dare non potuisti quàm te ipsum: hæc fuit tuæ misericordiæ suprema affluentia: hæc fuit summæ charitatis tuæ exuberantia; hoc solum præcessit ea tota cordiali amicitia, solita bonitate, benignitate immensa, & clementia infinita. Ad tuam igitur misericordiam venio trepidus, & anxius, misericors Deus; non quòd de tua misericordia diffidam, sed quòd peccatis meis confundor, quia donum huiusmodi, indignē sumere non expaui, frequenter respectu humano ductus, quandoque consuetudine, non deuotione; non humiliter, sed superbe; non contritus, sed dolosus & ingratus.

5. Indulgere mihi digneris, piissime Domine Iesu Christe, meritis tanti doni; hoc est, tui ipsius. Veniam mihi tribue de peccatis, vt doni tui ipsius suffultus auxilio, gratiam in præfenti, & in futuro gloriam percipiam sempiternam. Amen.

CAPVT X.

De misericordia Dei circa infirmitates corporales.

1. **N**Orum mihi fecisti, Domine Iesu Christe, quòd infirmitas corporalis prouenit frequenter ex infirmitate spiritali. Hæc autem infirmitas spiritalis, periculosior est, quia hæc est in anima, altera in corpore; ista eterna, illa temporalis; ista te Deum offendit, illa solum corpus corrumpit, & frequenter stimulat animam. Istam infirmitatem spiritualement, ex mea malitia & iniquitate incurri: sed infirmitate corporea cecidi, quandoque ex voluptuosa vita mea; & quandoque te iubente & permittente, vt per istam corporalem, spiritalis sanaretur, & corpus seruituti animæ subiceretur, vt te Creatorem & Saluatorem & dominatorem humiliter cognoscendo, vita misera emendaretur, & à te venia peccatorum misericorditer obtineretur.

2. De sanitate infirmitatis spiritalis non curavi, sed morbum morbo iugiter accumulavi. Hanc infirmitatē, vt veniret, non expectavi, sed præueni, & vt veniret, coëgi, plures occasiones mihi dedi. Dolorem inferebat, quem dulcorem putabam. Negligens fui pro salute recuperanda, quia te medicum

non quæsiui, sed vt te quærerem, quærendo inuenirem, & inueniendo sanitatem obtinerem, infirmitatem corporalem dedisti, vt per hanc, illa ab anima expelleretur, & mihi moriendo diceres; *Ecce sanus factus es, iam amplius noli peccare, ne deterius aliquid tibi contingat.* Sed ista ego miser non aduertendo, neque patienter sustinendo, diligenti studio sanitatem corporis procuravi, medicum corporalem perquisiui, donis multiplicatis ipsum attraxi, corpus ieiuniis & abstinentiis extenuavi, sirupis, & amaris potionibus repleui, vinum in potum ei præbui, sanguinem cordis & corporis minui, vota multiplicaui, peregrinationes feci, bona mea libenti animo in his consumpsi. Hæc omnia feci, vt infirmitas corporis sanaretur, quæ medicinalis animæ meæ erat, non mortalis.

3. O bone Iesu, qui es omni bonitate plenus, animarum lugentium medicus peritissimus, sanans omnes infirmitates, cum nihil impossibile sit apud te, non respicias in indignatione vultus tui cæcitatem meam, quæ tanta fuit, vt plus timerem infirmitatē corporalem, quàm spiritualem: plus essem sollicitus in curatione illius, quàm istius. Tu qui es pius Samaritanus, recipe me infirmum, & vulneribus lauciatus, quia mei aduersarii me reliquerunt semiuivum. Duc me in stabulum gregis tui, infunde oleum misericordiae, & vinum penitentiae salutaris. Conforta cor meum vt patienter tuas recipiam medicinas, vt mihi sint tua medicamenta salutaria, per quæ in ista vitabili purgatus, ante conspectum tuæ maiestatis sanus reputer, victurus in æternum. Amen.

CAPVT XL

De misericordia Dei circa temporales tribulationes.

1. O Amator & desiderium animæ meæ, piissime Domine Iesu Christe, impleuisti faciem meam ignominia, & procella, & tribulatione; vt quia promissionum & donorum tuorum benignitas à peccatis non reuocabat, saltem terrore suppliciorum & tribulationum tuarum ad non peccandum inuitarer, & vt quærerem nomen tuum, mundum non diligerem, ad te mentem eleuarem, cor meum in te firmarem, peccatis resisterē, caduca & transitoria respuerem, virtutibus inhaererem, corpus penitentiis castigarem, vitam miseram in meritoriam commutarem, & relictis illecebris huius mundi miserabilis, operatione continua tibi humiliter seruirem & te adiutorem in meis semper necessitatibus inuocarem.

2. Ideo more piissimi patris, qui filium quem diligit, corripit, cordi meo anxietates dedisti, carni meæ vanas infirmitates parasti, litigia vt mouerentur contra me, permisisti: insuper amicorum perditionem, guerrarum multiplicationem, æmuloꝝ detractionem, bonorum temporalium perditionem, inimicorum multiplicationem, corporis indispositionem, dolores & pericula circa multa. Hæc, & multa alia corpori aduersantia ad, utilitatem animæ,

animæ, misericorditer ministrasti. Sed ego impius tua benigna flagella non recognoscens, nec patienter acceptans, ad iracundiam fui motus, & impatiens fui factus. Te blasphemavi, tua sancta irritavi, & eis maledixi. Tu iustè me affligebas, & ego iniquè conquebar. Tu meam salutem volebas, & ego meam damnationem procurabam. Tu ab inimicis meis eripiebas, & ego eis adhærere cupiebam. Tu mihi aspirationes patientiæ dabas, & ego inimicorum tentationes impatienter acceptabam. Plus volebas mihi misereri, quàm ego miser à miseria liberari. Tua flagella credebam mala, & voluptates corporis credebam bonas. Iustè me corripuebas, & impatienter portabam; quidquid ad salutem animæ meæ faciebas, molestè ferebam. Vitam veram spernebam, & vita mundana mihi grata erat. Temporalia meliora iudicabam, quàm spiritualia.

3. Væ mihi nefandissimo peccatori, qui dixi malum bonum, & bonum malum; dulce amarum, & amarum dulce; ponendo lucem tenebras, & tenebras lucem. Qui etiam ad tantam dementiam deveni, quòd tribulationes mihi datas diuinitus ad me probandum, & corripiendam miseram vitam meam, patienter non suscepi: contra te murmuravi, & me erexi, nec propter hoc vitam meam emendaui, neque gratias tibi retuli, qui me sic misericorditer visitabas, & de multis periculis ac peccatis animam meam miseram eripiebas; in quibus fuisset miserabiliter lapsus, si nullam tribulationem sensissem.

4. O tribulatio desiderabilis & amanda, quæ me coëgisti Deum quærere. Nam in die tribulationis, meum Deum exquisivi manibus meis: quia in die deliciarum mearum Deum non quæsiui, idèd dedit mihi tribulationes, non irascendo, sed magis miserando. Non me deseruit, sed ut ipsum quærerem, voluit. Profuit tamen mihi tribulatio, ut mihi Dei inquisitio cura fieret. Inquisitionem sequetur inuentio, quoniam cum ipso sum in tribulatione; & tunc tollitur tribulatio, quia eripiam eum, & glorificabo.

5. O benignissime Saluator meus, qui volentibus subuenis, & desideras misereri peccanti: tu nosti meam indigentiam, & necessitatem. Da mihi misericorditer, quod vtilius erit animæ meæ, & quod tibi plus expedire tibi videtur, ad saluationem perpetuam: ut hinc tuis afflictionibus & tribulationibus patienter susceptis, consolationes tuas sentiam per infinita sæcula sæculorum. Amen.

TERTIA PARS

HVIVS TRACTATVS,


SIVE

CONTEMPLATIONES. PECCATOREM

inducentes, & excitantes, vt deploret miserabilem cursum
vitæ suæ, & cum emendet sine mora.

CAPVT I.

De vita præfenti.

1.  TA præfens, vita lugubris & damnosa, miserabilis & incerta, plena dolore & angustia, languore & tristitia, tribulatione & ærumna: vita non querenda, sed respuenda; non amanda, sed timenda: vita quæ mihi vita non es, sed mors, non solum temporalis, sed etiam perpetua, circumuenisti me, quia in tua longitudine confidebam, quæ quò plus longior fuisti, tantò plus damnabilior mihi fuisti, quia dum plus uiuo, plus deficio: peccata mea tempore non redimo, sed tempore multiplico. Tempus datum est mihi ad merendum, quod exposui ad me perdendum.

2. O vita longa & periculosa animæ meæ! Quid hîc facio? quid hîc ago? Data eras mihi, vt Deo seruirem, & Deo non seruiui, sed peccata cumulaui. Melius mihi fuisset, si antea mihi defecisses quàm vt sic me traheres ad miserabiles cruciatus. In te nulla cōsolatio est, sed omnis desolatio. Corpus & animâ affligis; sine intermissione inquietas. Qui te diligit, decipitur; qui te suscipit, ambulat in tenebris; qui tibi consentit, irridetur; qui te bonam credit, fallitur; & qui in te sperat, illuditur. Innixum super te corrucere facis, molestas hominem in corpore, molestas & in mente. Qui tibi aliquo vinculo dilectionis iungitur, in amaritudine & instabilitate uiuit, nunc infirmus, nunc dolens, nunc tristis, nunc mœrēs, nunc anxius, nunc desolatus, nunc pauidus, nunc acediosus, nunc tacens, nunc nimis loquens, nunc iracundus, nunc vindicatiuus, nunc ridens, rarò autem gaudens. Et sic machinationibus quandoque facis aliquem gaudentem, breui temporis spatio reddis eum turbatum, & sic facis eum mutabilitati assidue subiacere.

3. O misera vita, quantos de prosperis decepisti, tantos seduxisti. Quæ dum fugis, nihil es, dum videris, ymbra es; cū exaltaueris, fumus es. Tu dulcis es stultis, amara sapientibus. Qui te amant, non te cognoscunt, qui te contemnunt, ipsi te intelligunt. Timenda es, fugitiua es, quasi ymbra es, & velut somnium. Periculosa es, breuis es, & nihil es, vā qui tibi credunt, beati qui te contemnunt: ipsi te intelligunt. Vera non est via quam ostendis. Alius

te ostendis longam, vt perdas in fine, aliis breuem, vt dum poenitere voluit, non permittas, aliis latam, vt faciant quæ volunt, aliis angustam, vt non bene faciant, aliis tristem, vt non consoletur. De bono interroganda es, & non credenda, misera es, & mortalis, non diuturna, sed casura. Et qui tibi amicus esse voluit, inimicus Dei constituetur.

4. O vita iocunda & perpetua, Deus meus, erubescio venire ad te & redire, quia ex iniquitate deserui te, & huic vitæ præsentī adhaesi, per quam me deceptum cognosco. Sed quia dixisti peccatoribus, *Convertimini ad me, & ego conuertar ad vos, & in quacumque hora ingemueri peccator, omnium iniquitatum eius amplius non recordabor.* Ex his de tua misericordia confusus, gemēs, & tremens redeo ad te in perpetuum. Incolatum quem per peccata perdi, mihi misericorditer restituas, ad quem possidendum, tua clementia me elegerat, peccata dimittas, vt hac caduca vita spreta, tecum, qui es vita æterna, vitam per infinita sæculorum sæcula. Amen.

CAPVT II.

De deceptione præsentis vitæ.

1. **N**on sum sicut cæteri homines peccatores, Redemptor meus, quia inter malos pessimus sum, inter imperfectos imperfectissimus, inter impios impiissimus, inter ingratos ingratisissimus. Tanta enim cæcitare, cordis lumine orbatus sum, tanta mentis fatuitate percussus sum, & tanta eleuatione, quod meipsum non cognoui: imò penitus ex magna impietate mea scire, aut advertere non curavi, quamvis mihi misero frequenti impulsu noticiam planam dares. Fui namque mortuus, & in morte quasi continua, impia operatione prostratus. Et sic procedendo in diebus meis, vsque ad senectutem deueni. Sic namque viuendo in morte viuere me putabam, & tamen mortuus eram, quia vivebam solo corpore, at spiritu semper mortuus eram.

2. Vt autem corpus viueret, diligentiam adhibebam: sed vt spiritus viueret, negligenter prætermittebam. Pro vita miserabilis corporis, labores suscepi libeter, sed pro salute animæ, nolui laborare. Delectationes corpori placentes dilexi, & eas cum diligentia procuravi, & pro posse, opere consummaui: sed illis quæ animæ placent, & concernunt eius salutem & perfectum statum, renui vacare, & eas adimplere contempsī. Imò nec ad ipsas quæ corpori displicebant, manum ad operationem assumere volui. Sic fatuus fui, & quantum ad animam mente alienatus, quod dum corpus vivebam modo præmissis, animam etiam viuere credebam; & sic alendo indiscretè corpus, alimoniam animæ subtrahebam, mundana prudenter pro honore corporis, pro vt seui & potui, gubernavi; sed circa spiritualia, quæ salutem animæ concernunt, me habui negligenter. In corpori complacendo tantis temporibus laboravi, deduxique ad corruptionem, & nisi tua misericordia superueniat, animam deduxi ad damnationem.

3. Ecce, Saluator meus, qualiter vita præses me decepit. Quia mortuus erā, & viuere credebam. Imò vt veriùs loquar, ecce qualiter meipsum decepi.

Ecce fructū quem reporto viuendo in morte, & in moriendo in vita; oculi enim plenē lumine carent; pedum grauitas terræ imprimit profunda vestigia; auditus subaudit; dentes nigrescunt & putrescunt, & à faucibus euelluntur, aut dolorem inferunt; sanguis vilescit, memoria tenacitas euanescit; membra viribus deficiunt; mors appropinquat, etsi peccata me dimittunt actu, nō ego illa cogitatione, aut consensu. Inimici mei, quos ad actus meos exercendos pro corporis mei delectatione voluntariē admisi, expectant animam meam miseram, vt eam crucient in æternum. Iam totus forteo in sepulcro flagitiorum, non quatruiduanus, sed quinquagenarius ligatus vermicibus vitiorum. Lapis prauæ consuetudinis & indurationis super me positus est, nec fugere valeo à sepulcro.

4. O piissime Iesu, qui Lazarum resuscitasti, iube misericorditer, vt reuoluetur lapis. Dissolue ligamina quibus sum ligatus, suscita me mortuum de sepulcro vitiorum; clama, clama, peccator, veni foras, vt tua misericordia suffragante, hic viuendo per gratiam, in futuro tecum viuam per gloriam sempiternam. Amen.

CAPVT III.

De fine hominis.

1. **F**inis vitæ meæ appropinquat, de proximo instat Domine Iesu Christe, non respondens vitæ meæ principio, quo me misericorditer de lauacro Baptismi abluisti. Mediam viam vitæ meæ corrumpti, & in peccatis consumpti, à quibus non cessauī, nec cessare volui, quamuis possem. Imò occasionem mihi dedi, nec semper tentationem expectaui, sed eam frequenter præueni, tuam aspirationem obuiantem tentationi, à me ipso totalitè repellendo.

2. O Domine Deus meus, redemptor meus, tardè venio ad me, quia tardè me ipsum recognosco, sed tardè non venio ad te, & ad tuam immensam misericordiam, quæ extensis brachiis piissimis peccatorem recipit quandoque ad eam humiliter se conuertit, reatum suum debito modo cognoscendo, & veniam postulando. Ad ipsam igitur venio ego miserrimus peccator: pena æterna dignus, & corde contrito, & humili confiteor, quod longitudinem dierum meorum in peccatis consumpsi, & paucos dies retinui mihi viles; vtinam in conspectu diuinæ maiestatis tuæ non inutiles & damnales, cum nemo sciat vtum sit dignus odio, vel amore. Hos dies inutiles miserabilis vitæ meæ, redimere non valeo à longinquitate dierum, quia modicum tempus vitæ meæ restat vsque ad mortem. Imò fortè mihi non superest vna hora, quia de mane vsque ad vespem finies me; inimici mei me expectant vt me perdant, me rapiant, me deuorent, & secum trahant in damnationis abyssum.

3. Quid igitur faciam? quid dicam? quid cogitem? aut quomodo mihi prouidebo, cum finem meum propinquum expectem, sed non vt deberem: imò nec ipsum venturum de proximo considerem omni hora, neque ad

eius aduentum mihi incertum me præparem expiando & plangendo quantum in me est, & facinora quæ commisi, vt manus rapacis hostis euadere possim: nec tuam propitiationem inuocem, assidua deprecatione. In pigritia mea iaceo, de sola corporis placida & voluptuosa sustentatione cogitans. Non sum frigidus, neque calidus, sed tepidus. Ideo timeo ne me relinquas, meque separet à te, de me amplius non cures, iudicio meo me dimittas, regimini malo meo meipsum committas, quia tibi parere nolui, tuis mandatis non obediui, te non dilexi, ad te vocantem non veni, de te non curavi, te non timui, propter te peccare non desij, & tota vita mea tibi odiosa fuit, & esse debuit.

4. O benignissime & clementissime Domine Iesu Christe, non consideres prædicta delicta in me crudelissimo peccatore. Amoue indignationem tuam à me factura tua. Ne abiicias me à tua magna misericordia. Nunc in tempore senectutis meæ, non me derelinquas, neque despicias me; furor iræ tuæ non me comprehendat. Nemo enim nouit potestatem iræ tuæ, & præ timore tuo iram tuam dinumerare. Ne reminiscaris delicta mea, neque vindictam sumas de ipsis, sed memento mei in beneplacito tuo, in misericordia, & charitate tua libera me ex omnibus angustiis meis, & dimitte mihi omnia peccata mea, & propitius esto mihi peccatori propter nomen tuum. Libera me, quia egenus & pauper sum, & cor meum conturbatum est intra me. Respice in me, & miserere mei, & saluum me fac sperantem in te. Da mihi finem bonum, quemadmodum etiam principium bonum dedisti. Me miserum peccatis & vitiis fordidatum & infectum, aqua pietatis tuæ & misericordiarum ablue & exerge, vt conclusio fine vitæ meæ, vitam infinitam & æternam percipiam, te miserante, per infinita sæcula sæculorum. Amen.

CAPVT IV.

De morte corporis.

1. **P**rotektor vitæ meæ, dulcissime Domine Iesu Christe, continuatis diebus, horis, & momentis, ad mortem cursu veloci festino, nec interrumpitur cursus meus dilatione quacumque, aut aliquo interuallo. Comedam, aut bibam, dormiam, aut vigilem, sim tristis, aut gaudens, semper ad mortem accedo; nec eius via continua aliquo obstaculo impeditur. Hæc namque mors non fugit, vbique me expectat, arcum suum in me tenens paratum, vt animam meam à corpore separet cum dolore, ipsaque anima coram te tremendo iudice se præsentet, redditura de factis propriis rationem, & corpus terræ visceribus tradetur, à vermibus corroendum, & resuscitandum in generali resurrectione, recepturum cum anima prout hinc gesserint, siue bonum fuerit, siue malum.

2. O mors amara, à morsu dicta, eo quod per morsum primis parentibus vetitum, ex inuidia Diaboli orbem terrarum intrasti, & potestatem in homines suscepisti, & à Deo iudice iusto pro pœna in peccatores permissa es.

E iij

dominari; nihil parcis sexui, nulli ætati, nullus te fugere potest. Non valet quis seipsum eripere de manibus tuis prætextu scientiæ aut prudentiæ, bonitatis aut nequitia, nobilitatis aut potentia, dignitatis aut præminentiæ, simplicitatis & ignorantia, iuventutis aut senectutis, diuitiarum aut paupertatis; sed omnes distincte percutis & occidis, & in manu tua cõcludis.

3. O Deus meus, qui es vera vita, scio quodd in hac valle miseriæ, nihil mihi certius quàm mori, initium meum & finem ignoro, nescio vnde venio, aut quò vado. Hoc planè scio, quodd mortalis sum, & velim, aut nolim, moriar. Sed quando, vbi, & qualiter, hoc mihi, aut alteri non est notum. Tuæ maiestati scio hoc reservatum. Hæc timorem mihi incutiant, dolorem inferunt, & animum inquietant: non solùm quia ventura sunt, sed etiam quia illa expauescens, tamen meipsum salubriter non dispono ad suscipiendum illa, sed potius contrarium operatus sum omnibus temporibus vitæ meæ, quibus ex tua misericordia cognitionem dedisti. Peccaui, Domine, peccaui, & multiplicata sunt delicta mea; non sum dignus de te cogitare, aut loqui, præ multitudinem iniquitatis meæ, quoniam irritavi viam tuam, & malum coram te feci. Ex his igitur mors iustissimè mihi debetur, quia stipendia peccati, mors; & tantò citiùs ista stipendia mihi debentur, quanto frequentius peccata commisi.

4. Heu me, Saluator meus, si propter transgressionem vnus præcepti tui, genus humanum mori statuisti, quot mortibus ego miser & iniquissimus peccator dignus sum, quia à iuventute mea vsque nunc, inobediens tibi fui, & præcepta tua voluntariè & iniquè præterui. Tua namque misericordia operata est, in miserabili creatura, patienter supportando inobedientias & iniquitates meas. Non tradas me, Domine Iesu Christe, cum iniquitatibus meis, quia scio, quodd in illis actibus, in quibus vnusquisque homo inuentus fuerit, in eis iudicabitur, quando anima exierit de corpore. Tunc enim in illa hora angustia, vox detinetur, lingua verbum excutere non valebit, oculi hinc inde volentur, & videbunt assistentes lamentantes, nec loqui eis valebunt.

5. Quò ibit misera anima, & qualem remissionem recipiet, aut qualem locum intrabit? Assistent subito Angeli tartarei miseram animam expectantes; & si impropèrata fuerit, conturbabitur, & fugam inire non poterit, sed oculis miseris, & vultu plorabili stabit anxia, trepida, audiens prædictos Angelos, clamantes, & dicentes, o misera anima, omnibus diebus tuis in peccatis vixisti. Finis tuus aduenit, Deus ordinavit, vt egrediaris & separeris à corpore, crucianda nobiscum in igne æterno, secundum opera tua. Non est tibi spes salutis, sed perpetua damnatio.

6. O pie Iesu, largitor indulgentiarum, & amator humani generis, fac me ante illam horam mortis, eurrere ad poenitentiam. Suscipe me sicut suscepisti latronem, publicanum, & adulteram mulierem, nec in finem iratus, reserues mala mea. Et si tempus & locum postremum vitæ meæ non permittis mihi scire, fiat saltem misericordia tua super me, vt cum benignitati tuæ plaquerit mihi mortem mittere, & caro mea à vermibus cõpente deuorari in

DE VITÆ CVRSV.

35

sepulchro, anima mea ornata bonis operibus cum Sanctis subleuetur in
cælos, victura cum ipsis per infinita sæculorum sæcula. Amen.

CAPVT V.

De morte anima.

Humani generis Conditor & Redemptor, benignissime Domine Iesu
Christe, scio me in hac vita miserabili duobus periculis subiacere, scilicet
duplici morti; quarum prima erit in corpore, secunda in anima; prima erit
temporalis, secunda perpetua. Prima est necessaria, secunda voluntaria, utraq;
in certa quando venit; utraque periculosa, sed periculosior secunda. Prima
provenit ex alieno peccato, secunda ex proprio. Prima est separatio corporis
ab anima, secunda est separatio anime à Deo. Prima est corporis corruptibili-
tas, secunda est animæ impietas; prima est naturalis, secunda accidentalis;
prima venit homine nolente, & recusante, secunda homine volente, & con-
sentiente; prima omnibus est præparata, secunda solis malis, impiis, infide-
libus, & blasphemis, & his qui sanæ doctrinæ aduersantur. Primam nullus
evadere potest, sed à secunda unusquisque si voluerit, poterit liberari.

2. Sed, clementissime Pater, audi me clamantem, & miserum; meam mi-
seriam confitentem, & indulgentiam petentem. Solo corpore viuendo, ani-
mam meam mortuam per peccata longinquitate & diuturnitate temporis,
portavi. Eius mortem lugubrem, & periculosissimam, tibi displicentem non
timui. Illā, quamvis aspiratione multiplici me excitares, resuscitare per pœ-
nitentiā non curavi; sed de misericordia tua præsumptuosè confidens, il-
lam non solum vna morte, sed etiam pluribus interemi, quia peccata pecca-
tis cumulavi, intra meipsum cogitans frequenti infania, ut ætate iuuenili
vigente, concupiscentias exsatiarem & adimplerem, postea in senectute
malorum meorum pœnitentiā acturus. Et tu pius & misericors, facinorū
meorum non recordaris amplius. Non considerabam, sed ignorabam qua
die moriturus sum; cum nemo in præsentī vita positus quantumcumq; pru-
dencia fulgeat, scire valeat, (nisi quantum misericordia tua ei reuelavit)
exitus sui diem. Non enim omnes moriuntur in senectute, sed in diversis
ætatibus. Cum enim diluculo surgo, ignoro, si ad vesp̄eram viuus potero
peruenire: & cum in lecto infirma membra mea depono, nescio si lucis ad-
uentum potero intueri.

3. O Saluator meus, quanta stultitia & dementia plenus sum, qui mortem
corporis timeo & abhorreo, quam necessariò habiturus sum; & tamen mor-
tem animæ, quam tua pietate & clementia evadere possum, non timeo in-
currere. Et si ad tantam malignitatem deveni, ut propter me mortem animæ
incurrere non timeam, saltem propter gloriam & honorem tuū, quia eam
creasti ad imaginem & similitudinem tuam amare deberem eā, sicut etiam
possem, si vellem, te suffragante, diligentissimè custodire ne moreretur. Pro
morte carnis, quæ sine dubio vêtura est, pro posse sui sollicitus, & inde labo-

raui, ne morerer, necessario moriturus; sed non laboraui ne peccarem, in æternum victurus.

4. O Redemptor meus, qui es vita, per quem omnia viuunt, & sine quo omnia mortua computantur, sola misericordia tua est, quod non sum consumptus; sola pietas tua animam meam sustinuit, ne moreretur in æternum, sed sanaretur. Sola tua clementia viuere me fecit in præfenti, & ad poenitentiam expectauit. Tuam igitur benignissimam misericordiam humiliter exoro, vt vitam corporalem talem mihi tribuere digneris, ne mortem æternam incurram, sed tecum viuam in gloria, per infinita sæcula sæculorum. Amen.

CAPVT VI.

De morte subitanea.

1. **I**N valle miserabili & lamentabili penitus, benignissime Domine Iesu Christe, in statu periculoso iaceo prostratus; quia vita mea præfens non distat à futura, nisi tenui & fragili pariete corporis mei interposito. Hic paries propter vetustatem, ruinam minatur, nunc infirmitate, nunc anxietate, nunc fame, nunc siti, nunc frigore, nunc calore, nunc somno, nunc vigilia, nunc labore, nunc dolore, nunc aliis multis pœnalitatibus & passionibus: & semper declinando, mutatur, & non permanet in eodem statu. Ignoro quando, & qualiter paries mei corporis miseri destruetur. Video namque alios gladio cadere, alios veneno mortifero, alios aliis potionibus, alios apostematibus, alios diuersis præcipitationibus & doloribus. Quæ singula, parietes huiusmodi concutunt, & repentino casu diruunt, funditus dissipant, & subuertunt: & sic anima desolata, peccatis plena, nec contrita, nec confessa, à misero corpore subito separatur.

2. Quò tendat, non mihi, sed tibi notum est. Sicut illis accidit & euenit, ita mihi accidere, & euenire potest, quia homo sum sicut illi, mortalis sum sicut illi, in mundo sum sicut illi, peccator sum sicut erant illi, & fortè maior quàm illi. Dum hæc repentina pericula cogito, expauesco; timor & tremor inuadunt me, terror concutit cor meum, viscera cruciantur, caput turbatur dolore & amaritudine, omnia membra commouentur. Nescio quid faciam, aut quale remedium quæram, qualiter mihi prouidebo; quia præuidere prædicta pericula subitanea non possum per meipsum.

3. Itaque ad tuam immensam misericordiam recurro, benigne Domine Iesu Christe, qui me voluisti, antequam me creares, & quicquid tibi placuit, ordinasti de me antequam de utero matris meæ exirem, & in mundum venirem. Scio quæ & qualis fuit præterita vita mea, quia peccatis & iniquitatibus tota plena fuit. Sed qualis in futurum erit, & quali exitui seruetur, hoc ignoro. Tu solus hoc scis ab æterno; & quod futurum est, in conspectu tuæ æternitatis iam factum est. Alia quidem vasa ex eodem luto facis in honorem, & alia in contumeliam sempiternam. Quos elegisti de multis, mundas,

DE VITÆ CVRSV.

37

mundas, & effundis super eos aquam mundam, quorum nomina tu solus nosti, qui numeras multitudinem stellarum & omnibus eis nomina vocas: Ps. 146.
 & ij cum cadunt non colliduntur, quia tu supponis manum tuam. Alios Ps. 136.
 quidem præsciisti ad mortem æternam, antequàm faceres cælum & terram, quorum dinumeratio apud te est, qui numerum arenæ maris dinumerasti, & dimensus es profundum abyssi. Neminem tamen cogis ad peccandum, sed benè præuides eos qui propria voluntate peccabunt. Sicut enim nemo memoria sua cogit facta esse quæ præterierunt, sic & tu præscientia tua non cogis facienda esse quæ futura sunt. Et sicut homo, quædam quæ fecit, meminit, nec tamen omnia quæ meminit, fecit; ita tu omnia quidem bona recordaris tanquam eorum autor, cætera verò tanquàm aliunde exorientia, recordaris. Quorum autè non es malus autor, iustus es ultor. Rom. 12.
 Ad quem istorum statuum venire debeam, ignoro; quia ad altitudinem diuitiarum sapientiæ & scientiæ tuæ attingere non valco, quia incomprehensibilia sunt iudicia tuæ iustitiæ. Sed misericordiam tuam deuotè exoro, 33.
 pietatem tuam suppliciter deprecor, clementiam tuam humiliter imploro, benignitatem tuam corde contrito flagito, benignitatem tuam crebris gemitibus obsecro, vt qui me creasti, non me dimittas; qui me redemisti, non permittas vt meipsum perdam. Defende me ab hoste maligno, parce peccatis meis; da mihi cor contritum, & humiliatum; tribue, vt delicta desceam, emendem, & pro eis satisficiam; pœnitentiam veram de ipsis agam; non semper à tua misericordia, quæ me patienter sustinuit in mea malitia, alienatus persistam. Liberare me digneris à morte subitanea & æterna. Da mihi huc vitam tibi placitam, ne ampliùs in gurgite vitiatorum demergar; præsta mihi misericorditer, vt in fine dierum meorum, te verum Deum, & Redemptorem meum cognoscam, & post cum Sanctis tuis vitam mihi benignè tribuas sempiternam. Amen.

CAPVT VII.

De extremo iudicio.

Non intres, benignissime Domine Iesu Christe, cum seruo tuo in iudicium, quod meritò expauesco, sed misericordia tua præueniat me, Ps. 143.
 quia non iustificabitur in conspectu tuo omnis viuens: quia si iustus vix saluabitur, peccator impius vbi apparebit? Venies enim manifestè, & non filebis, venies in ea carne iudicaturus, in qua veneras iudicandus, solis bonis formam Dei ostendens, & malis formam hominis. Constitutus es iudex viuorum & mortuorum à Deo Patre, qui omne iudicium tibi dedit. 2.
 Venies namque Iudex terribilis & districtus, testè contra me non quærens, cum ipse testis sis vitæ meæ. Tantæ namque sapientiæ es & iustitiæ, quod falli non poteris, nec corrumpi. Testis & Iudex eris, quem nulla peccatorum conscientia effugere poterit, omnia nuda & aperta erunt oculis tuis. Tu namq; qui iniuste iudicatus es, iudicabis orbem terræ in æquitate, &

populos in iustitia. Tu etiam non poteris ibi ab aliquo per gratiam praeueniri, nec misericordia flecti, nec pecunia corrumpi, nec satisfactione mitigari. Erit namque tuum iudicium sic terribile, quod etiam Angeli, & alij caelestes ministri pauebunt, & te iudicem intuentes horrenda formidine contremiscent. Ostendes mihi & aliis signa passionis tuae, ut cognoscam quod pro me misero tanta poenae acerbitate crucifixus fuisti. Quid terroris erit? quid miseriae? quando ego infirmus peccator diuersis peccatorum maculis vulneratus, veniam in publicum, & latissima nequissima vitae historia, ante oculos omnium apparebit?

3. Tunc te iudice veniente, praecedet exercitus Angelorum, qui triumphale Crucis vexillum praeferentes, diuinum & tremendum iudicium nuntiabunt, ut sciat unusquisque peccator quanto charitatis amore nos dilexit. Illa insuper clauorum & lanceae signa, bonis salutaria, malisque terribilia ostendentur, ut cognoscam quae pro me impio tua pietas pertulit. Tu locus non erit correctioni, sed damnationi. Erit ibi poenitentia, sed infructuosa, quia tarda. Quam lugubre ergo erit homini, te videre & perdere, & ante Creatoris conspectu perire? Timor me conturbat, conscientia confundit, eogitationes increpant, fugere non licet. Ecce in quo periculo incessanter consisto, quia hoc non semper cogito. Eo autem miserior & miserabilior quod hoc obliuisci possum. Semper enim vides me & peccata mea. Semper etiam intimentur mihi in mente. Semper inuisibiles insidiatores parati sunt, ut illic rapiant animam meam. Dicturus est namque insidiator falsus contra me: Aequissime iudex, iudica illum, meum esse ob culpam, qui tuus noluit esse per gratiam. Tuus enim fuit super naturam, meus autem per miseriam: tuus per passionem, meus autem per observationem. Tibi inobediens, mihi vero obediens fuit. Iudica igitur illum meum esse, & mecum damnandum esse. Hac omnia quae hic attulit, mea esse cognosco. Meus esse voluit & concupuit, mecum puniri debet, quoniam quem tu dignatus es tanto pretio liberare, ipse se mihi postmodum, libenter sic voluit obligare.

4. Sic sum cum vigilo: cum dormio, sic sum cum rideo, cum lator: sic sum cum superbio, cum irascor, & cum tristior: sic sum cum deliciis corporis miserabiliter amplector: denique sic sum semper & ubique. Heu me miserum, ubi sum, qui nescio ubi futurus sum? Nec possum dicere pro defensione mea. Nesciui te Deum meum esse. Non legem dedisti, sanctorum exempla non legi, aspirationes ad bene operandum & ad resistendum peccatis, non dedisti mihi; discretionem discernendi inter bonum & malum, ac liberum arbitrium non concessisti: quia tanta gratia me illuminasti, ut te Deum verum & Redemptorem meum cognoscerem; legem dedisti, ut mandata tua seruando, modum viuendi haberem; Sanctorum exempla ante oculos meos posuisti, ut tibi digne seruiendo eorum vestigia imitari & sequi deberem; ad quae peragenda aspirationes salutares protectione assidua tribuisti.

5. O Iudex meus, quomodo, intrabo in tuum tremendum iudicium, ubi erit ineffabilis mugitus, in consolabilis luctus, inenarrabiles lacrymae? Nudus ibi assista, solam tarcinam peccatorum meorum in humeris meis portans; poe-

nitentiam mihi debitam videbo, & locū pœnarum. Ibi lingua mea blasphemans & maledicens exuretur sine intermissione, nec erit qui refrigerium præstet. Ibi os meum plenum superbia & elatione, ignibus obturabitur à tartareis Angelis. Ibi manus meæ cupidae & impuræ pendentes tremunt, & extendi non poterunt pro gratia obtinenda. Ibi oculi mei pleni vanitate effodientur. Sed vbi tunc parentes, & fratres, & amici & vicini? vbi potestas & superbia mea? vbi vestimenta & calceamenta splendida? vbi ornamenta? vbi excellentia? vbi cibaria varia & delicata? vbi habitationes ornatae & splendidae? Confiteor tibi, Domine Iesu Christe, quod tuæ iudicia iusta sunt, vera & digna, & unicuique tribues secundum opera sua, siue bona fecerit, siue mala. Superas enim omnes iudices, & qui se putat iustum coram te, iniustus est. Tu solus iniuste iudicaris, vincis autem cum iudicaris. Misericordiam, & iudicium cantabo tibi, Domine: non confidam sic in misericordia tua, ut peccata committam, & iudicium non timeam; neque sic tuo iudicio discreto terrear, quod de tua misericordia diffidam, quia non in pietate misericordiae, perdis iudicij severitatem, nec in iudicando cum severitate, amittis misericordiae bonitatem.

6. Scio, Domine Iesu Christe, quod in tuo terribili iudicio quatuor ordines erunt: duo bonorum, & duo malorum. Primus erit illorum qui amore tuo omnia bona sua reliquerunt, & te secuti fuerunt. Isti saluabuntur & non iudicabuntur, sed cæteros iudicabunt. Secundus erit illorum, qui sua bona iuste possidentes opera misericordiae impleverunt: & isti saluabuntur & iudicabuntur, quibus dicturus es: *Esuriui, & dedistis mihi manducare, &c.* quos iudicabis dicens: *Venite benedicti Patris mei, percipite regnum vobis paratum.* Tertius erit malorum Christianorum, qui fidem tuam mortuam habentes, operationem bonam non habuerunt, & isti damnabuntur & iudicabuntur, quibus dicturus es: *Esuriui, & non dedistis mihi manducare.* Ideo illis dices, *Ite maledicti in ignem æternum.* Quem in duas partes diuides, ut splendor ad saluatos, & ardor ad damnatos transeat. Quartus erit infidelium qui damnabuntur & non iudicabuntur, quia sine lege fuerunt, & sine lege peribunt.

7. Sed heu, Domine Iesu Christe, in quo ordine collocabor? Gratias tibi humiliter refero, quia me seruum tuum ab ultimo ordine misericorditer liberaſti. Et si tantæ perfectionis nō sum, ut primum ordinem adipiscar, fac cum seruo tuo misericordiam, ob meritum passionis tuæ sacratissimæ, ut hinc non tertium, sed secundum ordinem possideam, & in tuo iudicio reportem benedictionem tuam salutarem, duraturam per infinita sæcula sæculorum. Amen.

CAPVT VIII.

De Purgatorio.

1. Inclina aures tuas pietatis, misericors Deus, & audi placatus, gemitus cordis mei. Propitius esto mihi, & tuarum misericordiarum multitudinem mihi non deneges iniquissimo peccatori, quoniam vitam meam an-

nuncio tibi, quam melius nosti; pono lacrymas meas in conspectu tuo, quas affluenter educere digneris de laxo durissimo cordis mei, ut redimam tempora vite mee perdita.

2. Scio, nec occultum mihi fecisti, benignissime Domine Iesu Christe, quod decursus huius miserabilis vite curriculis, varia habitacula sunt ob-
euntibus preparata. Nam in sanctitate & perfectione vite fideliter deceden-
tibus, & iis qui pro nomine tuo, martyrio se voluntarie exposuerunt, ac
etiam innocentiam seruantibus preparasti gloriam sempiternam, in qua per-
petuo tecum gloriabuntur, quorum anime fruuntur cum sanctis Angelis
visione & plenitudine diuinitatis tue, quantum eorum merita suffragan-
tur. Et post tremendi iudicii tui diem, eorum glorificata corpora tuam san-
ctam humanitatem videbunt. In peccatis vero capitalibus, morientibus,
pœna infernales sunt preparata, & perpetui cruciatus, ut quia te infini-
tum offenderunt, infinite etiam puniantur. Nec cessabit eorum pœna, quia
dum vivebant, non cessauit culpa. Peccatoribus autem de suis peccatis pœ-
nitentibus, & secundum eorum demerita pœnitentiam non agentibus, pœ-
na purgatorii preparata est temporalis. Ut quod nunquam iuste, dum hic
vixerunt, emendauerunt, ibidem dignè suppleatur.

3. Tanta autem est misericordia tua erga miseros peccatores, quod in ipso-
rum libero arbitrio posuisti, ut ex istis habitationibus eligerent, quam plus
vellent. Imò tam affluens & exuberans fuit, & est tua immensa clementia,
quod eisdem piis aspirationibus tuis, & aliis remediis praeuenis, ad acqui-
rendum & possidendum tuam gloriam sempiternam. Ista scio & sciui, quæ tu
ineffabiliter tradidisti, & mihi misericorditer ostendisti. Sed tanta fuit de-
mentia mea, tanta iniquitas, tanta malitia, & tanta negligentia, quod istam
notitiam mihi datam contemnendo, peccata, tam capitalia quam minuta,
multipliciter perpetraui. Et te non verendo, nec pœnas debitas timèdo, imò
nec mihi ipsi compatiendo, de tua misericordia peccando presumptuose
confidebam, quod me creaturam tuam non perderes in æternum, sed ad pœ-
nitentiam expectares. Etsi ignem Purgatorii sustinerem, non molestabar in
corde, licet ibi diuturno tempore permanerem, certificatus nihilominus
quod ille ignis purgatorius est durior quam omnia genera pœnarum, quæ in
hoc sæculo aut videri, aut cogitari, aut sentiri possunt. Et tamen hic solo di-
gito, ignem modicum tangere non audebam, nec afflictionem modicam
voluntarie sustinerem. Tanta enim fuit voluptuosa delectatio ad miseram
& corruptam carnem, quod sibi plusquam animæ voluit complacere.

4. O spes & refugium meum, Redemptor meus piissime, licet peccato-
rem horribilem me cognoscam, absit, ut de tua immensa misericordia
diffidam, quod me tradas æternis suppliciis. Nec sic presumptuose confido,
quod sine pœnitentia de commisis malis, deposito carnis onere me eleues
ad superna, quin ignis purgatorius maculas meas consumat. Sed tuam piissi-
mam misericordiam, quæ nullis clauditur limitibus, & exuperat omnem
meam nequitiam humiliter imploro, ut cor contritum & humiliatum mihi
dones, doceam & satisfaciam pro commissis. Indulgentiam plenariam à te

miseriçorditer consequar, & merita tua beatissimæ passionis ac etiam meritæ & intercessionis gloriosæ Virginis Mariæ dignissimæ Matris tuæ, ac omnium ciuium supernorum defectus suppleant delictorum meorum; vt hic iustificatus per gratiam tuam, cœlestes sedes quas mali Angeli propter superbiam perdidērunt, ingrediar, & possideam per infinita sæcula seculorum. Amen.

CAPVT IX.

De gloria Paradisi.

1. **O** Ciuitas gloriosa, domus secunda, mansio beata, incolatus iucunditatis & lætitiæ, quis tuam beatitudinem cogitare potest, quam oculus non vidit, nec auris audiuit, nec in cor hominis ascendit? In te namque manet virtus sine vitio, in te manet gloria sine opprobrio, veritas sine mendacio, solatium sine radio, securitas sine fastidio, gaudium sine dolore, charitas sine rancore, requies sine labore, scientia sine errore, sapientia sine fatuitate, sanitas sine infirmitate, iuuentus sine senectute, amor sine fraude, pax sine terrore, populus sine murmure, vita sine morte, bonorum abundantia sine defectu, honor sine superbia, dilectio sine inuidia, felicitas sine miseria, exultatio sine tristitia, omnium ciuium summa vnitas, nulla ibi mala societas, securitas sine timore, consolatio sine desolatione, formositas sine deformitate, tranquillitas animi sine turbatione, societas sine confusione, eloquentia sine detractio, humilitas sine fictione, laus sine intermissione, vnitas animorum sine diuisione, dies sine nocte, lux sine tenebris, visio inastimabilis, fructus infatigabilis, status immutabilis, perpetuitas omnis boni infinitabilis.

2. Quidquid de tanta gloria homo detexit, est quasi stilla de mari, vel quasi scintilla de igne. Ibi enim est omnipotens Deus, in sua beatissima Trinitate suam diuinitatem sanctis Angelicis Spiritibus & animabus iustis communicans & ostendens. Ibi beatissima Virgo Maria gloriose regnat, suum beatissimum Filium assidue pro peccatoribus exorando. Ibi ciues Angelici sub triplici Hierarchia, & Sanctorum animæ, sanctam & diuinam Trinitatem sine intermissione laudantes; ibi nulla indigentia, nulla poenitentia, nulla egestas, nulla desolatio, nulla calamitas, nulla necessitas, sed ibi est omnis felicitas, iucunditas, suauitas, iubilatio, exultatio, & omnis boni perpetua repletio. Ibi nullus superior superbus erit, & nullus inferior inuidus; ibi nullus melius esse vel superius concupiscet, quam erit, nec aliud desiderabit, quam quod erit. Quidquid ibi desiderabitur, habebitur. Voluntas cuiuscunque adimplebitur, quia illud solum vult, quod Deus voluit, & nihil aliud nolit, nisi quod Deus noluerit. Ibi quisque saturabitur & gloriabitur. Quidquid desiderabit, fruendo comprehendet. Nihil sibi remanebit incompletum; quia ibi est beatitudo, plenitudo, & perfectio omnis boni. Quidquid aliquis petet, quidquid quæret, quidquid desiderabit, omnia ha-

bebit, omnia tenebit, omnia possidebit; non ad tempus, sed in perpetuum; non per partes, sed in totum. Gloriosa est igitur, Domine Iesu Christe, tua sancta ciuitas, quam per passionem & mortem tuam piissimam peccatoribus misericorditer emisti, & per gloriosissimam Ascensionem tuam, portas eius aperuisti, ut quisquis vellet, eam intraret, & perpetuo permaneret.

3. Beati, qui inhabitant in domo tua, Domine, qui te laudant in saecula saeculorum. Ijsunt illi qui ingrediuntur sine macula, & operantur iustitiam; qui loquuntur veritatem in cordibus suis, qui non habent dolum in lingua sua, qui non faciunt proximo suo malum, nec opprobrium accipiunt aduersus proximos suos. Qui etiam cordis munditiam habent. Beati namque mundo corde, quoniam te soli videre possunt, & tuam beatissimam gloriam introire. Sed ego miserimus, quid facturus aut dicturus sum, qui viam mihi ipsi praclusi, & ingressum sanctae ciuitatis supernae mihi prohibui. Si enim immaculati hanc beatissimam ciuitatem inhabitant, quid ego miser faciam, multis & diuersis vitiis & peccatis maculatus & contaminatus: qui iustitiam non feci declinando a malo, & bonum faciendo, sed potius declinaui a bono, & malum feci coram oculis tuae maiestatis. Qui licet ex bonitate tua, veritatem in corde meo cognoscerem, tamen mendacium, dolum, verbum otiosum, blasphemiam, & stultiloquium habui in ore meo; proximis etiam meis, malum aut feci, aut fieri feci, aut mihi placebat quando fiebat, aut dixi aut cogitaui: insuper nullam cordis munditiam habui, imò omnem immunditiam, & conceptus mentis meae corruptos.

4. O Redemptor meus, exul factus sum a tanta beatitudine, propter peccata mea. Indignum me feci tanta gloria. Procul factus sum a tanta felicitate, extraneus ab ista hereditate, segregatus a tanta dulcedine. Pro malo bonum peridi, vitam in mortem commutaui, pro temporali perpetuum dereliqui, pro momento temporis longitudinem dietum, pro corruptione incorruptionem, & extrema gaudij luctus finaliter occupabit; quia ex his latam & spatiosam viam ingressus sum, quae ducit ad infernum, nisi oculo tuae pietatis & misericordiae respicias me, Domine Iesu Christe, & me iniquum & reprobum reducas ad arctam viam quae ducit ad tuam ciuitatem celestem. Vias tuas demonstra mihi, & semitas tuas edoce me, dirige in conspectu tuo viam meam, deduc me in via tua quam ingrediar in veritate tua, fac mecum signum in bonum, ut videant qui oderunt me & confundantur, quoniam tu, Domine, adiuuisti me, & consolatus es me. Tu enim suavis & mitis es, & copiosus in miserationibus tuis, omnibus inuocantibus te, non deneges eas mihi, cum locus & tempus sit nunc misericordiae. Nec differas, cum nunc necessitas urgeat. Nec de me nefandissimo peccatore fastidium habeas, cum sim creatura tua. Nec me contemnas, cum per te pretio inestimabili sim redemptus, sed viam arctam & angustam, per quam ad tuam ciuitatem celestem venitur, non solum mihi ostende, sed etiam meum rebellem & durum animum intrare compelle.

5. Adueniat, obsecro, regnum tuum, regnum aeternum, regnum omnium

seculorum, sine carens, ubi est pax exuberans omnem sensum, in quo Sanctorum animæ requiescunt, & læticia sempiterna super capita eorum, gaudium & exultationem obtinent, & fugit dolor & gemitus ab eis. O quam gloriosum est regnum tuum, Domine, in quo tecum regnant omnes Sancti. Adueniat, obsecro, in me regnum tuum; per tuam piissimam misericordiam compelle me illuc intrare, ut te facie ad faciem aspiciens, te laudem cum Sanctis omnibus per infinita secula seculorum. Amen.

CAPVT X.

De Inferno & pœnis eius.

TImor & tremor venerunt super me, clementissime Domine Iesu Christe, quia dum cogito miserabilem vitam meam, diuersis peccatorum maculis fordadatam, mihi iustissime debetur, non gloria, sed pœna; non temporalis, sed perpetua; non saluatio, sed damnatio; non Paradisus, sed Infernus, ubi nulla est redemptio, nulla consolatio, nulla peccatorum remissio, sed continua punitio: ibi ignis inestimabilis, non lucens, sed miro modo ardens & vrens: ibi aquæ frigidissimæ congelatæ, ut ab aquis niuium peccator transeat ad calorem nimum, ibi tortores tormenta multiplicia ministrantes non solum actu, sed etiam ipsorum horribili & terribili aspectu; ibi clamor & gemitus, fletus & ululatus, qui tantò acrius cruciat, quanto fortiùs vnus ab alio lamentationes & mœores audit.

2. Non est ibi spes salutis, aut veniæ, aut misericordiæ obtinendæ. Nulla ibi mitigatio aut intermissio tormentorum, nec tortorum lassitudo. Ibi tenebræ perpetuæ nullam claritatem habentes; ibi timor & tremor, dolor & labor, calamitas & egestas, angustia & tristitia, obliuio & confusio, amaritudines & terrores, fames & sitis, sulphur & ignis ardens, ibi vermes, & aliæ cruentæ bestię non morientes, sed supplicia inferentes, ibi subtractio omnimoda visionis diuinæ, ibi blasphemia Creatoris, & defectus totius charitatis, ibi omne malum & nullum bonum, nulla felicitas, sed perpetua infelicitas. Sola mors quæ hic plus timeretur & plus terret, ibi sola desiderabitur, sed non habebitur. Quanto ampliùs quis hic in deliciis corporalibus fuit, tanto plus tormentorum patietur, quia potentes ad peccandum, potenter tormenta sustinebunt.

3. Ibi immanissimus rugitus tortorum, ut peccatores fortiùs expauescant. Ibi pœnarum diuersitas, & maxima acerbitas ipsarum, ut damnati de vna ad aliam transeundo grauiùs molestantur & conquerantur. Ibi fœtor horribilis, dolor intolerabilis, cruciatus indicibilis, locus terribilis, gemitus irremediabilis, pœna durabilis & infinibilis, priuatio omnis auxilij, desperatio cuiusvis remedij, vita miserabilis, societas inconciliabilis, tortor inuincibilis, & importabilis. Ibi vita moriens, & mors viuens, quia tanta est ibi calamitas, tanta pœnarum crudelitas, tanta cruciatorum impatentia,

Ps. 9. 13. tanta cruciantium inhumanitas, quod vita mirabilium damnatorum, mors merito dici potest.

4. O Redemptor meus, Domine Iesu Christe, circumdederunt me gemitus mortis, dolores inferni circumdederunt me, quia scriptum est, *Conuertantur peccatores in infernum, omnes gentes quae obliuiscuntur Deum*: de quorum maioribus me esse cognosco. Adiuua me, Domine Deus meus, ne perdas cum impiis, Deus, animam meam, & cum viris sanguinum vitam meam; libera me de ore leonis. Tu es qui extraxisti me de ventre matris meae, tu es spes mea à iuuentute mea. Tribulatio mihi proxima est, & non est alius qui me adiuuet. Si peccata mea cum iustitia respicias, pereō; sed si cum misericordia respexeris, me perditum restaurabis. A te dependet damnatio aut saluatio mea, non est qui possit resistere voluntati tuae, nec de manu tua possit erui; vel audeat dicere, cur hoc facis? Et licet maximus peccator sim, tamen tua misericordia est maior, quia miserationes tuae super omnia opera tua, & misericordia tua plena est omnis terra. Veniat super me magna & immensa misericordia tua: veniat mihi miserationes tuae, ut viuam per gratiam in praesenti, & à penis infernalibus liberatus, viuam in futuro, per gloriam sempiternam. Amen.



Q V A R T A P A R S
H V I V S T R A C T A T V S,
C O N T I N E N S
C O N T E M P L A T I O N E S D E P R E C A T O R I A S
ad Sanctos.

C A P V T I.

*Ad Beatam Mariam Genitricem, & Beatum Ioannem
Euangelistam.*

1.



D refugium tuae pietatis & clementiae confugio, misericordissima Virgo Maria. Ego miser, omni miseria plenus, qui per denia ambulando, & in voraginem vitiorum meipsum damnabiliter submergendo viam salutis deserui, & dereliqui, viam bonam odio habui, & viam iniquam dilexi, viam securam dimisi, & viam non securam concupiui, viam vitae contempsi, & viam mortis suscepi; viam lucidam abhorruui, & viam tenebrosam iecutus fui; viam planam neglexi,

glexi, & per viam spinosam ambulavi, viam arctam, quæ ducit in Paradisum, respui, & viam latam, quæ ducit ad Infernum, amavi; & de vitio in vitium incedendo vsque nunc perduxī miserabilem vitam meam. Tua igitur misericordia indigeo, Virgo pia, quæ me ab illa magna vitiorum voragine eruat, & in viam salutis reducat.

2. O Beate Ioannes Apostole, & Euangelista Domini nostri Iesu Christi, inclina aures pietatis tuæ ad necessitatem meam, quia anima mea indiget valde; & ora illum, qui Virginem Matrem Mariam tibi commendavit, & te Discipulum; Filium eius misericorditer fecit. Vos estis illi duo, in quorum meritis & precibus confidenter confido, qui me facietis gratiosum & acceptabilem Domino Iesu Christo.

3. Tu benedicta Virgo Maria, mater & virgo fuisti, & tu beate Ioannes, virgo & discipulus fuisti. Tu gloriosa Virgo Maria, Filium Dei benedictum intra sacra viscera tua suscepisti. Tu Sancte Ioannes, supra pectus illius, in cœna recubisti. Tu Virgo Maria, illum diligenter nutristi. Tu sancte Ioannes, ei seruiisti, & illum prædicasti. Vterque virgo, uterque dilectus speciali privilegio amoris, uterque secreta eius nosti. Ad maiorem amoris cumulum in cruce pendens benedictus Iesus Christus, te Discipulum in Filium dedit Matri, & tibi Matrem suam in Matrem tuam Discipulo adinuicem commendavit.

4. Per hanc coniunctionem dilectionis, vos humiliter deprecor, vestram clementiam exoro, vestram charitatem posco, & toto corde flagito, ut pro me nefandissimo peccatore intercedere dignemini, apud illum qui tanto amore vos dilexit, & tanto privilegio vos dotavit, ut me respiciat oculo suæ misericordiæ infinitæ; & suum amorem in me ampliando, crimina deleat, virtutes tribuat, & ad æternam gloriam me clementer perducatur. Amen.

CAPVT II.

Ad sanctos Angelos.

i. O Beatissima agmina beatorum Spirituū, anxius sum, & perplexus in abominabili vita mea. Vestra quidem intercessione indigeo, sed eam vereor requirere; & rogare non audeo, quia peccator sum, & vos innocentiores terrenus sum, & vos spirituales; corruptus sum, & vos incorrupti; Deo sum propter peccata mea odibilis, & vos propter vestram innocentiam & charitatem amabiles; vos Deum facie ad faciem cernitis, ego solum modò per fidem; Deo semper assistitis, ego propter malitiam meam elongatus sum ab eo, laudes semper ei persolvitis, ego otiosa quæro; vos pro peccatoribus propter charitatem oratis, ego ad damnum & vindictam multorum tendo; vos gaudetis super emendationem peccatoris, ego multos ad peccandum prouocaui, vos confirmati estis in gratia, ego inhiemus propter peccata, vos a mole carnis separati, ego ipsa sum oneratus; quidquid placet Deo facitis, ego inobediens sum ipsi, vos demones debellatis & vicistis, ego cum ipsis

G

bellando, remansi victus; vos Creatori gloriam dedistis, ego verò creaturam vos hereditatem cœlestem possideris, ego terrenam,

2. Quid igitur faciam, si vobis indigeo, & requirere vos non audeo? Si taceo, mihi ipsi noceo, si loquar, à vobis audiri non debeo, cum corruptibilis ab incorruptibili multum distet: sed audaciam loquendi cum fiducia in me fumo, & dico. Vnum Creatorem communem habemus, qui vos & me creauit ad vnum effectum, scilicet ad sibi seruiendum & laudandum. Nos & vos creauit, sed diuersimodè, quia vos in spiritu, & me in carne & spiritu: vos leues, me autem grauem, vos fortes, me debilem, vos immortales, ne mortalem: vos absque peccato, me in peccatis: vos nulli tentationi subiectos, me tentationi omni subiectum.

3. Sed cum magna confidentia accedit ad charitatem vestram cor meum, quia scio, quòd ad me custodiendum vos elegit Creator noster, quia Angelis suis mandauit, vt in omnibus viis custodiant me. Quam defensionem generosè suscepistis: ad bene operandum me induxistis, orationes & bona mea Deo presentastis, pro me misero Deo preces fudistis, nisi in mea desidia remansent, à malis cogitationibus & actibus me retraxistis, de emendatione mea gauisi fuistis propter saluationem meam, & vt vobiscum essem affectastis, etsi ex magna malitia mea vobis non parui, sed inobediens & molestus fui. Compatiamini mihi, & Deum iugiter exoretis, vt mihi peccata remittat, gratiam tribuat, vt decursis huius vitæ miseræ periculis, cœlestis gloriæ vobiscum particeps efficiar, vt pariter Deum laudemus per omnia sæcula sæculorum. Amen.

CAPVT III.

Ad beatum Andream Apostolum.

1. **O** Glorioso Domini nostri Iesu Christi Apostole & amice, beate Andrea, vnde hoc, vt Saluator noster benedictus te ex litore & rete vocauerit, & traxerit ad se? Hæc fuit misericordia & clementia sua & summa ipsius bonitas cupiens te, & per te multos alios trahere ad æternam salutem. Te namque de piscatore piscium, constituit hominum piscatorem, & de piscatore te fecit prædicatorem & doctorem. Sed vnde hoc tibi, vt ad primam vocationem ipsius, retia quorum vsu actûque viuebas; relinqueres, & ipsum sequi velles? Quæ scriptura hoc te docuit? quæ lex tibi ostendit? quis Propheta tibi annuntiavit? Tu ignarus eras pariter & indoctus, artem piscatoriam solam sciens, quis te docuit istum esse Saluatorem mundi? Quis te mouit mox ad sequendum eum, cum præmia æterna ignorares, & eius retributionem non agnosceres? Certè non tua merita, neque scientia, sed sola miseratio diuina, & largissima manus charitatis ipsius.

2. Non reuoces ad cor in malum, si sic præsumptuosè loquar, quia veritatem loquendo, Dei bonitatem laudo & glorifico, & tuam promptam & voluntariam obedientiam profiteor, & meam duram ceruicem agnoscendo,

manifesto. Tu semel vocatus es, & mox secutus es vocantem, Ego vicibus infinitis vocatus sum, & nondum compareo debite. Tu Saluatorem ignorabas, ego ipsum agnosco, tu eius miracula non videras, ego illa oculata fide aspexi, tu premia aeterna non sciebas, ego scio: tu propter vocationem omnia reliquisti, ego non solum mea retineo, sed & alia concupisco. O Deus meus, sic famulo tuo Andrea aspirationes dedisti salubres, nec mihi indigno denegasti: sed ille benigne, humiliterque illas suscepit, & ego illas peruerso corde tenui. Ex illa susceptione meruit ipse gloriam aeternam obtinere, ego ex ipsarum despectione, damnationem perpetuam merui digne & iuste.

3. Adiuua me, sanctissime Andrea, tuis deprecationibus sanctissimis, laxa rete sanctum tuum super me, & comprehende me. Compelle cor meum, durum, ingratum, & iniquum intrare tecum, ad memoriam illius sanctissime passionis Domini nostri Iesu Christi, pro cuius amore sanguinem tuum fundisti, & in cruce martirium suscepisti. Imprime in corde meo illam beatissimam crucem, in qua Saluator noster de inimicis triumphauit, & acerbissimam mortem sustinuit, ut ore & corde tecum dicam: O bona crux, quae in corpore Christi dedicata es, & ex membris eius tanquam margaritis ornata, accipe me ab hominibus, & redde me Magistro & Saluatori meo Domino Iesu Christo, ut per te me recipiat, qui per te me redemit suo Sanguine pretioso, cuius meritis peccata mea delect, & ad aeternam gloriam me misericorditer & clementer perducatur. Amen.

CAPVT IV.

Ad Beatum Blasium.

1. **O** Triumphator inclyte, Martyr Christi fortissime, athleta Ecclesiae, Blasi, sanctissime Pontifex Domini nostri Iesu Christi, cuius gratia & benedictionem sortitus es. Tibi enim commisit oues, quas suo proprio Sanguine redemit, ut earum Pontifex fieres, illis prouidens, per quem de terra ad caelum iter facerent, per observationem fidei, & mandatorum diuinorum. Tanta virtutis diuinæ redundantia abundabas, ut tortores tuos vincendo mirifice superares, & de tuis hostibus triumphares. In te charitas mansit, compassio non defuit, ut non solum peccatoribus, sed etiam brutis animalibus subuenires. Tuum nomen sanctum per vniuersum orbem praedicatur, & tua sancta vita in memoria habetur. Te veneratur omnis populus Christianus, quia à te repulsam non patitur, sed in suis necessitatibus auditur, & iuuatur. Nam Saluator noster gloriosissimus, tanta gloria singulariter te dotauit, ut tui memoriam facientes, à quacumque inhumilitate vel aduersitate tenerentur, per tuam piissimam orationem misericorditer liberarentur.

2. Hoc beneficium tibi contulit, hanc gratiam tibi fecit, hunc thesaurum tibi dedit, hoc munus benedictionis tibi impendit, quia tua beata vita hoc meruit, tua merita hoc valent, tua constantia in crudeli martyrio hoc tibi concessit. O beatissime Praeful Blasi, ex istis confisus, ad te venio confisus.

G ij

denter, tuum patrocinium inuoco, tuum auxilium imploro, tuum medicamen requiro, audi infirmitatem meam, nec me abhorreas propter immanissimam ipsius foeditatem. Nam Medici valentis curare aegrotum est, ut vulnerratum audiat, & audiendo sciat, & sciendo cognoscat, & cognoscendo remedium necessarium apponat. Infirmus sum vetustissima & grauissima infirmitate, quia à planta pedis usque ad verticem capitis non est in me sanitas.

3. Putruerunt, & corruptae sunt cicatrices meae à facie insipientiae meae: non est sanitas in carne mea, non est pax ossibus meis à facie peccatorum meorum. Quoniam iniquitates meae supergressae sunt caput meum, & sicut onus graue grauatae sunt super me. Nihil in me sentio nisi peccata multiplicata, & multiplicatis vicibus iterata. Haec foetorem parturiunt, dolorem inferunt, mortem minantur, cruciatus cumulant, terrorem incutiunt, damnationem inducunt.

4. Heu, bone Medice, per sacram orationem tuam, & merita sancti martyrij tui, cura in me hanc infirmitatem. Et licet non sit semper in medico ut aeger curetur, in me tamen manet tanta virtutis compassionis bonitas, ut per orationem tuam curetur quiuis infirmus, & omnis infirmitas per illum supremum medicum, qui nunquam deest neque deficit, sed petenti se tribuit, pulsanti aperit manu misericordiae suae. Hunc exora, hunc implora, non sileat tua benigna deprecatio, ut tuam orationem pro me misero audiat & exaudiat, & sanitatem mihi animae & corporis tribuat, nunc & in perpetuum. Amen.

CAPVT V.

Ad Beatum Laurentium.

1. **O** Strenuissime miles Christi, Beate Laurenti, qui tanta fortitudine & virtute diuina roboratus fuisti, ut non solum inferiores Iudices sed etiam Caesarem Decium non timeres. Licet enim crudelissimos cruciatus, sacro corpori tuo inferret, & mortem tibi proximam nunciaret, tamen carnem tuam despiciens Deo animam coniunxisti, & ab eo nullo modo te separasti. Tu thesaurorum Ecclesiae sanctae fidelissimus dispensator fuisti, illos non congregasti, sed dispersisti, non perdidisti diuitibus largiendo & inutiliter consumendo, sed mercedem recepisti pauperibus indigentibus erogando. Tu cratem ferream candentem non expaui: sed corpus tuum sanctum, super cratem ipsam expansum, prunis ardentibus subtus positum, assatum est. *Iam versa, & manduca*, tortori dixisti, magnam patientiam ostendisti, & Deum non denegasti, sed benedixisti.

2. O sanctissime Leuita, quomodo sum confusione plenus dum in corde meo recole miserabilem vitam meam tibi omnino dissimilem. Timui enim mundum, & eius sequaces plusquam Deum, furorem mundanum expaui plusquam furorem diuinum, thesaurum mihi traditum non dispensaui uti-

lirer in vsus pauperum, sed ipsum aut vitiosè retinui, aut inutiliter consumpsi. Hoc non fuit simplicitas, non ignorantia, sed potius nequitia & malitia mea. Sciebam enim quod bona Ecclesiæ mihi tradita, vtiliter, & in bonos vsus dispensare debebam, quæ tamen inutiliter & in malos vsus consumpsi.

3. O beatissime dispensator iam quæritur quis inter dispensatores fidelis inueniatur. Verè tu ille es, sed non ego, quia in carcere positus sum, in quo visum interiorum oculorum mentis meæ perdi. Ora pro me, athleta Christi dignissime, extende super me misero & cæco gratiam tibi datam. Illumina mentem meam in carcere hic positam tuis sanctissimis precibus, sicut Lucillo in carcere posito visum corporalem restituiti, & lumen veræ fidei dedisti. Deprecare omnium bonorum largitorem, vt mihi dispensatori prodigo, qui consumpsi substantiam mihi datam, perperam & iniquè, indulgere & remittere dignetur offensam, & me positum in crate ferrea tribulationis aduersitatum huius mundi, subtus positus prunis ardentibus variarum tentationum, respiciat misericorditer: nec me permittat tentari vltra id quod possum sustinere, sed faciat cum tentatione prouentum, ac veram patientiam mihi donet, illum non negem neque blasphemem, sed laudem & benedicam tuis precibus & meritis intercedentibus, per infinita sæcula sæculorum. Amen.

CAPVT VI.

Ad beatum Nicolaum Episcopum.

Beatissime Nicolae, qui magna misericordia & compassione plenus fuisti in hac peregrinatione, & longè plus in patria, ad te mentem meam dirigo, misericordia tua & compassione multipliciter indigentem. Tu enim ab vberibus matris tuæ corpusculum tuum per ieiunia domuisti, & Deo seruire incepisti. Tu puellas virgines à peccato & infamia, ac earum progenitorem ab opprobrio & inopia præseruasti. Tu tres innocentes iuvenes, à morte liberaisti. Tu pauperibus in suis necessitatibus subuenisti, oppressos releuasti, & in periculo constitutis adiutorium præstitisti. Tantæ enim compassionis, charitatis & misericordiæ fuisti, vt super cunctos afflictos pia viscera gestando, nulli tuum auxilium denegares, dum vineres in humanis: nec nunc denegas in cœlesti gloria collocatus: quin te humiliter deprecantibus, & tuum auxilium in suis necessitatibus postulantibus, subuenis apud Deum.

2. Ex tumba tua sacratissimum corpus tuum oleum manat, quo multi cæci lumen recipiunt oculorum, surdis auditus redditur, omnesque debiles, ac languidi, pia subuentione curantur. O pie Pater misericordiæ, & pietatis, compassionis & charitatis, si omnibus indigentiam patientibus subuenis, digneris mihi plus cæteris indigenti, pietate compassiua subuenire. Pauper sum, in laboribus à iuuentute mea, & vsque ad senium deueni, semper infirmitate crucior, hoc est, peccato, & peccatis multiplicatis. Et hæc infir-

G iij

mitas est ad mortem æternam assequendam. Miserere mei Domine, quoniam infirmus sum, sana me, Domine, tuis deprecationibus, quoniam conturbata sunt ossa mea.

3. Tu qui aliis medicamentum præparasti, & præparas omni die, non deneges mihi succurrere, nec abhorreas fœtorem & putrefactionem tantæ infirmitatis antiquæ in me; sed sicut plus indigeo, ita plus & velocius digneris tuis sanctissimis precibus occurrere, & remedium mihi sauciato & debilitato misericorditer adhibere. Et si indignus sum, (sicut veraciter cognosco me indignum,) tuo sanctissimo adjutorio, tuæ merita charitatis & compassio, superabundent: & etiam merita illius sacratissimæ passionis Domini nostri Iesu Christi, Redemptoris nostri, qui non solum te, sed etiam me redemit, non tuis, neque meis meritis, sed solum immensa & nimia charitate sua. Et quia in iis gratias illi refero, qui tibi hanc gratiam donauit, ut illi gratus fieres, exora assiduis precibus ipsum, ut de me ingrato faciat tibi gratum, nec cesset in hoc tua miseratio, nec oleum tuæ misericordiæ, quia quod per me impetrare non possum, nec audiri debeo propter iniquitates meas, ut ab hac infirmitate spiritali, qua languet misera anima mea, curetur & sanetur, te deprecante & adiuuante, & Dei clementia operante, qui tecum uiuit in gloria, per infinita sæcula sæculorum. Amen.

CAPVT VII.

Ad Sanctum Martinum.

1. **S**ancte Martine & verè sancte, tu par Apostolis, tu gemma Præsulum, tu pater & dispensator pauperum, tu suscitator mortuorum, tu medela languentium, tu expugnator hostium antiquorum, tu virtuosus debellator criminum, tu seminator virtutum, tu norma poenitentiae, ut splendor Ecclesiæ, tu regula bonè viuendi, tu exemplar bonum faciendi, tu innocentia plenus, tu charitate non vacuus, tu director animarum, tu fiducia miserorum, tu speculum religionis, tu via deuotionis, tu contemptor terrenorum, tu zelator supernorum, tu solatium deuotorum, tu concuius beatorum. Hæc & multa alia tibi concessit misericordia Dei nostri, ad tantam gratiam recipiendam te ipsum ordinasti & disposuisti.

2. O beatissime Confessor Christi, qui propter amorem ipsius & proximi tui, viuere non recuisti, neque mori timuisti, quanta amoris dulcedine te Saluator mundi honorauit, quando Spiritum sanctum in specie globi ignei super te descendere fecit, & torques aureos ad cooperiendum sacra brachia tua nuda, per Angelum transmisit, & vnguentum pretiosissimum per Sanctos Apostolos suos Petrum & Paulum tibi de cælo transmisit ad languorem tuum curandum. O sanctissima anima, quam possidet Paradisus, quæ vitro purior & lacte candidior, etiam carne circumdata fuisti, quæ in hoc mundo tantum eleuata fuisti, ut terram videre renueres, & cælum assidue aspiceres,

DE VITÆ CURSV.

51

O vir sancte, virtutibus pollens, quis similis tibi in profunda & perfecta oratione, qui oculos & manus ad cælum eleuando, inuictum spiritum ab oratione non relaxabas. O sanctissima persona, in qua inimicus peccatum non potuit inuenire, sed de ipso virtuosè triumphasti.

3. Intende in me piissime Pater, ac tuis meritis & deprecationibus adiuua me miserum, vitiis plenum, subjectum inimicis; qui non ad cælum, sed ad terram, mentis oculos tenui depressos, & vagationi, non orationi vacavi, propter quod non gloria, sed pœna æterna mihi debetur. Ora pro me miserabili peccatore, benignissime Pater. Non consideres prauitatem & iniquitatem meam maximam, in qua positus sum ex defectu meo. Multiplica in me misero tuam mirabilem charitatem & compassionem, quam in hoc mundo habuisti, & nunc longè ampliorem possides coram illo qui ipsa charitas est, & qui in eo manet, in charitate manet. Fac me in eo manere tuis sanctissimis precibus, hîc per contemptum mundi & orationem continuam eleuatam ad Deum, & in futuro per gloriam sempiternam. Amen.

CAPVT VIII.

Ad Sanctum Augustinum.

Sanctissime Augustine, pater & gubernator & fundator Religionis, quam ego indignus professus sum, ad te tanquam ad refugium meum confugio. Tu namque scientia tua & doctrina mundum illuminasti, errores confudisti, veritatem ostendisti, sacram Scripturam elucidasti, vitia & peccata viciisti, virtutes prædicasti, ad earum exercitium homines informasti. Insuper spiritualia ordinando vitam regularem more Apostolico instituísti, sub qua professi Saluatori nostro liberiori famulatu seruirent; huius sanctissimæ regula primus Pater fuisti, non solum ordinando, & instituendo, sed etiam affectualiter obseruando. Per ipsam enim spiritualiter hominem contra inimicos armasti, & de terreno cœlestem fecisti abdicando terrena ab eo, nisi in quantum necessariò indigebat; angelicæ vitæ ipsum coarquisti, quia castè ipsum viuere præcepisti, & Iesu Christo similem fecisti in obedientiæ obseruatione, qui Patri suo obediens fuit vsque ad mortem. Sub tuo salutifero vexillo me posui, & arma militaria tuæ Religionis me portaturum per professionem corde & opere me obligavi, vt quæ volebas, & fieri præciperbas, adimplerem.

2. Sed, beatissime Pater, sub tuo virtuosò ducatu, & habitu viuendo, & cum extrinsecus possidendo, dissolutam vitam duxi; me Religiosum habitu ostendendo, sed non existendo. Imò nec interdum apparendo, quia etiam dissolutus fui in habitu; aut occultando, aut inhonestum portando. Tuam regulam vilipendi & contempsi, & illa ad quæ astringebar, non impleui. Superioribus meis non obediui, & si quandòq; obediui, fictè hoc feci, non propter Deum, sed propter mundum; non amore, sed timore. Iracundiam contra eos habui; & si ad factum non processi, verbo tamen maledico & detractio processi, proprium possedi, quandoque factò, animo tamen semper, quia.

terrena concupiui contra professionem meam; oculos habui impudicos, & pudicitiam non seruavi; communem vitam Fratrum despexi, & singularem amavi; carnem ieiuniis ad quæ astrictus eram, & aliis abstinentiis non domavi, sed voluptuosè nutriui, exempla nequissima fratribus ostendi, & in scandalum illis fui; silentium & alias observationes præterui, & in murmuraciones varias & noxias linguam frequenter laxavi; correctiones & debitas reprehensiones cum humilitate & patientia non suscepi, sed peccata mea & defectus meos occulta & impunita esse volui, & manifesta defendi, etiam contra veritatem; horis indebitis, & non necessariis cibum & potum sumpsi; defectus aliorum quandoque occultavi, & quandoque defendi in Dei injuriam, & fratrum læsionem; ad Ecclesiam coactus accessi, ibique Officium in partem aut in totum dimisi negligentia, aut dormitione, aut locutione, aut mentis euagatione, aut oculorum improvida aspersione, & illud quod dixi, ore protuli, & non corde. Hæc multa & alia ego miser contra regulam commisi, quæ verbo aut scriptura proferre non possum, nec corde etiam cogitare.

3. Ecce, Pater mi, ecce filium tuum, quem Iesu Christo genuisti: sed mihi, non tibi imputandum, quod degeneravi. Dulcissime Domine, ecce famulum tuum negligentem perterritum, quia talentum à te ei traditum suscipiendo, non augmentavit, sed ad nihilum redegit. O miles inuictissime, ecce subditum tuum, quem tibi ad militandum sociasti: projecit enim arma tua, & in bello voluntariè corruit. O director veritatis, ecce discipulum tuum, scholam & doctrinam tuam salutiferam despicientem, & à suis condiscipulis se totaliter separantem. O Pastor gregis dominici, ecce ovem morbidam, & lupi moribus vulneratam & laceratam, quia à sancto tuo grege seipsam miserabiliter segregavit.

4. Ora pro me misero, piissime Pater, & adiuua me tuis sanctissimis deprecationibus. Non despicias me sic elisum, & in tantis calamitatibus constitutum. Et quia tibi aut tuis præceptis ex mea iniqua malitia nolui obedire, reatum meum cognosco, & veniam humiliter peto. Non abhorreas seruum tuum peccatorem, quia scis, quod misericordia Dei indiget peccator, sine qua saluari non potest. Expertus es in te, quia etiam peccator fuisti, sed tuæ sanctæ matris precibus, misericordiam & remissionem peccatorum tuorum à Deo obtinuisti. Ora etiam tu pro me impiissimo peccatore, ut sicut tibi fieri voluisti, sic & mihi fiat tuis precibus & meritis: ut indulgentiam consequar omnium delictorum meorum, & tecum viam in cælesti gloria, per infinita sæcula sæculorum. Amen.

CAP V T IV.

Ad Mariam Magdalenam.

I. O Gloriosissima & sanctissima Magdalena, confusus de tua immensa charitate, corde lacrymabili venio ad te: peccator ad iustissimam; peregrinus in valle miseriæ, ad ciuem ciuitatis supernæ; plenus vitiiis ad abundantem

dantem gratis, pauper ad diuitem, superbus ad humilem, imperfectus ad perfectam, desolatus ad consolatum, nequam ad bonam; impœnitens ad exemplar omnis pœnitentiæ, instabilis ad firmatam, ruinosus ad reparatam, in periculis constitutus ad liberam & securam ab omni periculo, immundus ad mundatam, impius ad piam, odiosus ad dilectam, plenus odio ad dilectricem, mortuus ad immortalem, dignus supplicio ad plenam gratiæ, miser ad felicem, priuatus æterna gloria, ad habitantem in cœlesti curia, prouocans sibi ex demeritis iram Dei, ad mitigantem suis precibus indignationes Dei, imbecillis ad fortem, cupidus terrenorum, ad amplexantem cœlestia, amator carnalium, ad diligentem spiritualia, inquietus ad mitem: ingratus ad laudes & gratias referentem, contemptor Dei ad obedientem ipsi, inclinatus ad malum, ad eleuatam ad bonum, lugens ad lætantem, inimicis consentiens, ad vincentem inimicos, peccata sua tegens ad detegentem vitia sua.

2. O Beatissima, titulos prauitatis vitæ meæ in præmissis contestando, timeo, timendo deficio. Ne despicias me, Domina pia: nec abhorreas me peccatorem iniquum, sed considera, quia hunc mundum cum peccato intrasti, sicut ego: nauigasti per mundum, & naufragium pertulisti, sicut ego: misericordia Saluatoris Domini nostri Iesu Christi indiguisti, sicut ego: misericordiam inuenisti & obtinuisti, utinam ego miser sic obtineam. Vitam tuam magnifico, Domina, non retracto in tui opprobrium, sed in laudem misericordiæ diuinæ, quoniam peccatoribus subuenit, & in exemplum omnium peccantium te liberauit: esto mihi propitia, quia periculum euasisti, in quo totus positus sum, partem optimam suscepisti, qua me indignum esse fateor. Ora pro me illum, ad cuius pedes misericordes peccatorum tuorum veniam inuenisti, ut mihi faciat, sicut & tibi fecit. Et quamuis tanta gratia non sum dignus, tamen non est eius gratia diminuta, quam mihi misericorditer largiri dignetur per sanctas orationes tuas, & per meritum suæ sacratissimæ passionis, per infinita sæcula sæculorum. Amen.

CAPVT X.

Ad Beatam Catharinam.

1. Clarissima Virgo, sanctissima Catharina, Domini nostri Iesu Christi sponsa electa, sacra scientia illuminata, defensatrix fuisti fidei Christianæ; indoctos docuisti salutaria documenta; gentiles ab idolis reuocasti, & ad Deum conuertisti; virginitatem Deo gratam in annis iuuenilibus, & corpore specioso integram conseruasti, templum Deo in tuo habitaculo præparasti, terrena despexisti, & tua pauperibus misericorditer erogasti, regale fastigium contempsisti, & humilitatem effectualiter dilexisti, peccata odio habuisti, & virtutes toto corde amasti, pro fide Christi graues martyrij pœnas in corpore sustinuisti, & in sexu fragili virili victoria

H

de inimicis triumphasti. O Sanctissima Virgo, & deuotissima Deo, quantæ virginitatis & integritatis fueris, tuum sacratissimum martyrium demonstrauit, in quo de tuo corpore virgineo, lac pro sanguine emanauit. Quanto dilectionis amore Sponsus tuus benedictus Iesus Christus te honorauerit, in tua sepultura ostendit, quia per sanctos Angelos suos ad montem Sinai te portari iussit, & ibidem per eosdem sepeliri fecit. Quantæ charitatis & compassionis fueris, sacra membra tui corporis manifestant, de quibus, non infectio, neque sordes, sed purissimus liquor manat, quo peruncti deuotè, sanitatem recipiunt de infirmitatibus suis.

2. O splendor mulierum, gemma pretiosa Virginum, non tadeat te, quia ego peccator te audeo nominare, pollutis labiis, & corde infecto. Non auertas aures tuas pietatis à me, licet sim horribilis peccator; non despicias me creaturam miseram, & tanta miseria plenam, qua me ipsam per peccata deformauit; non spernas me recedentem, & fugientem à Deo, & eius inimicis adhaerentem, quia ad te confusus rubore vitæ meæ confugio, ad te venio cum tremore, tibi insinuo facta mea, quæ talia sunt, quod solum ea nominare, abominabile est, illa cogitare detestabile est, & illa perpetrare mors. O dulcissima Virgo, nihil displicibile est Deo, quin hoc egerim, aut corde, aut opere. In hoc studij, in hoc perseueraui, in hoc operam dedi. Sic vixi, sic tempus meum expendi, sic inutiliter consumpsi; Deum contra me prouocaui, ipsum irritaui; cælestes ciues, inimicos meos constitui, nullum amicum mihi retinui; omnes à meo auxilio eieci, ipsos vilipendi, gloriam æternam mihi abstuli, damnationem perpetuam acquisiui. Illa mihi debetur, illam meruerunt facta mea, vita mea horribilis in hoc fuit, vix aliud egi. Istum statum tenui, istum seruaui, ab isto non declinaui, nec in iuuentute, nec in senectute, nec in aliis ætatibus meis.

3. O dulcissima Dei amica, animarum languentium felicissima adiutrix & defensatrix, digneris me reconciliare benedicto Sponso tuo Domino Iesu Christo, quem ex magna malitia mea grauissimè offendi. Intercede pro me, vt ad misericordiam recipiat me, peccata mea benignè mihi remittat; vulnera animæ meæ sanet, & tuis intercessionibus intercedentibus, ac sanctissimis precibus & meritis tuis, regnum æternum mihi misericorditer tribuat, per infinita sæcula sæculorum. Amen.

CAPVT XL.

Ad omnes Sanctos.

1. **C**onstanter ac confidenter aperio cor meum vobis omnibus, Sancti Dei, qui in hac valle miseriæ & lacrymarum, in qua nunc sum, fuistis, charitate ad Deum, & proximum repleti. Diuina bonitas, de angustia & periculis huius maris fluctuantis, vos eripuit, peccata remisit, & ad cæli gaudia vos perduxit. Nunc estis in lætitia, ego in mœrore: vos


DE VITÆ CVRSV.

35

à peccatis mundati, ego iniquitatibus plenus: vos sine intermissione Deum laudatis, ego in cogitationibus, dictis, & operibus, irritum illum: vos corruptam carnis sarcinam deposuistis, ego illam circumferre compellor: vos Deo placetis, ego propter miseriam meam illi displiceo: vos mortis passum cum felicitate pertransistis, ego infelix illum passum cum tremore exspecto: vos tentationes euasistis, ego illis conturbor vos penas infernales de cetero non timetis, ego illas merito pertimesco: vos nulli pœnalitati subditi estis, ego cum pœnalitate patior vos: in quiete perpetua estis, ego in labore & ærumna: vos bonum quod possidetis, non potestis amittere, ego illud perdere possum, imò si illud habuero, hoc ignoro. Charitas vestra multiplicata est in vobis, in me autem non charitas, sed malitia multiplicata est: vos Deum facie ad faciem videtis, & simili modo videre ipsum, non est meum. Nihil est in vobis nisi bonum & gloria, in me autem nihil est nisi malum: perfecta est vita vestra, mea verò imperfecta: illa à vobis non potest auferri, mea autem auferitur à me. Nulla anxietas aut perplexitas est in vobis, sed tribulationes & angustia inuenerunt me: vos quicquid petitis, obtinetis; ego quod desidero, non obtineo.

2. Misere mini mei, saltem vos: fratres mei, misere mini qui hanc miserabilem viam, in qua nunc positus sum, aliquando probastis, & ipsius pericula experti fuistis, nec illa euasistis sine gratia Saluatoris nostri, qui non solum ex operibus iustitiæ, quæ fecistis, sed per suam misericordiam vos saluos fecit, mortem crudelissimam sustinendo pro vobis, imò etiam pro me miserabili creatura sua. Compatiamini mihi igitur fratri vestro, & coheredi, sicut vobis compati voluistis Redemptorem nostrum, ut per merita suæ beatissimæ passionis, sicut fecit vobis misericordiam, sic & faciat mihi, in hac via impedita, ut onere carnis deposito coniungar vestro beatissimo collegio, per infinita sæcula sæculorum. Amen.


H ij



QVINTA PARS
HVIUS TRACTATVS,
SIVE
CONTEMPLATIONES DE VTILI ET
salubri confidentia peccatoris.

CAPVT I.

Ad primos parentes, Adam, & Euam.

1.  **N** O B E L I X ego homo, quis me liberabit de corpore mortis huius! utinam gratia tua, sicut spero, piissime Domine Iesu Christe, per quam solam hic viuo, & sustentor. Corpus namque meu miserabile, & corruptibile animam meam impleuit illusionibus ut vim mihi faciant, qui quærunt, illā ad perdendum, quibus ipsum corpus affligit, & non resistit, obedit & non contradicit: vitam meam corrumpit, non abluit: vulnerat, & non sanat: mortificat & non viuificat: prosternit & non eleuat, deducit ad inferos, sed non reducit ad cœlos.

2. O Adam & Eua, progenitores mediati mei, per vestram genealogiam ipsum corpus à vobis suscepi, quod per vestrum peccatum corruptum est; ex qua corruptione peccati, misera anima mea nunc illud agit quod non vult, nec sibi expedit, & illud non agit quod vellet, & sibi expediret. Peccatum vestrum me separauit à Deo, hæreditate æterna me priuauit, dominium rerū viuificatarum, & aliarum, mihi à te, Domine Iesu Christe, benignè datum, abstulit: cum labore & sudore, victum mihi acquirere facit: fructus terræ in spinas & tribulos frequenter conuertit: infirmitates varias mihi donat: tribulationes mittit multiplices & diuersas, charitatem adimit, innocentiam tollit, peccata multa in anima mea introducit, & finaliter corpori & animæ infert mortem. Hæc omnia mala & aduersa propter peccatum vestrum habeo, patior, & sustineo, à quibus omnibus liberatus fuisset, si peccatum non commisissetis. Victum namque sine labore terra mihi dedisset, innocentia obseruasset, absque peccato vixisset, omnibus animantibus in hoc mundo imperasset, & omnia mihi ocedissent, ab omni infirmitate alienus fuisset omnia quæ in mundo sunt ad seruitium meum habuisset, & ego soli Deo seruitium impendisset: & finaliter quando Deo placuisset, absque aliquo genere mortis ad suam æternā gloriam in corpore & anima me per-

petuò eleuasset, vbi cum laudassẽ cum Angelis ac Sanctis omnibus sine fine. 3. Peccatum igitur vestrum, non solum damnum pœnalitatum mihi intulit, sed & gloriam abstulit sempiternam. Et nisi misericordia diuina subuenisset, melius mihi fuisset, si natus non fuisset. Hæc immensa misericordia vos redemit, à pœnis infernalibus vos eripuit, & ad cœlestem gloriam vos vocauit, vbi Deum laudatis & laudabitis sine fine. Ad vos igitur intrepidus & mente secura accedo, cum parentes mei sitis, & cum parentes filios diligant naturaliter, & amore intimo diligere debeant, cum semper amor descendat, & non sit amor qui vincat paternum. Vestrum auxilium cum magna fiducia imploro, confidens de vestris sanctis orationibus, vt sicut fuistis causa meæ damnationis, sic etiam sitis diuina misericordia adiuuante & ordinante, per vestras orationes continuas, causa meæ saluationis. Probastis namque effectualiter quàm malum & amarum sit relinquere dominum per peccatum, & quanta pœna dignus sit peccator suum Creatorem offendens. Sicut illa probastis, sic etiam illa hîc probo, & in futurum probabo, si iustitia mihi fiat.

4. Intercedite igitur pro me miserrimo peccatore, & compatimini mihi filio vestro magnam necessitatem & indigentiam patienti, ne propter occasionem vestram, & factum meum peruersum inde secutum, damnum patiar sempiternum, sed sicut Dei exuberans misericordia vos saluauit, sic mihi misero subueniat eadem misericordia, vestris sanctissimis & assiduis deprecationibus. Vt hîc carne peccatis mortua, anima viuat per bona opera, & in futurum vobiscum possideam gloriam sempiternam. Amen.

CAPVT II.

Ad benignum Dominum Iesum Christum fratrem nostrum.

1. **I**N te, Domine Iesu Christe, spiritali fiducia confido, quia secundum humanitatem frater tuus sum. Et ideo confido, quia nemo carnem suam odio habuit. Ex eisdem parentibus originem traximus per lineam ascendentem, sed diuersimode, quia tu sine peccato, ego cum peccato, quia in peccatis concepit me mater mea; Tu miraculosè, ego secundum naturam; Tu ex matre Virgine, ego ex matre corrupta; Tu operante Spiritu sancto, ego operante virili amplexu; Tu omnia sciens, ego omnia ignorans; Tu sine Matris dolore, ego cum matris tristitia, quia mulier, cum parit, tristitiam habet, Tu ad me redimendum, ego ad tibi seruiendum. Via tua in hoc mundo fuit dissimilis vitæ meæ, quia tu sine peccatis, mea cum peccatis; Tua sine ignorantia, mea cum ignorantia; Tua cum operatione virtutum, mea cum operatione vitiorum; Tua cum Dei Patris obedientia, mea sine tua obedientia; Tua cum paupertate rerum temporalium, mea cum cupiditate ipsarum rerum; Tua cum humilitate, mea cum superbia; Tua cum tribulationibus & pœnalitatibus aliis, mea etiam cum tribulationibus & pœnalitatibus, non tamen similibus; quia tuæ majores & aciores fuerunt, meæ autem minores.

H iij

& leuiiores; Tu iniuste illas passus es, ego vero iuste & digne illas passus fui & patior; Tua vita tota cum patientia, & mea sine patientia; Tua viam vite monstrauit, mea viam mortis; Tu vitam tuam finisti me redimendo, ego vitam meam finio tibi digne non seruendo; Tu fecisti & adimpleuisti omnia, propter quæ veneras, ego non adimpleo omnia propter quæ natus sum; Finem vite tuæ mihi notum fecisti, sed finis vite tuæ mihi ignotus est; finis vite tuæ mihi utilis fuit, sed qualis erit finis vite meæ, hoc ignoro; post finem vite tuæ resurrexisti cum corpore glorificato, & ad cælum gloriose ascendisti, at quod post finem vite meæ, corpus meum ad cælum ascendat, à tua magna misericordia dependet.

2. Adiua me, gloriosissime: exaudiat misericordia fratris, necessitatem & indigentiam fratris: non abhorreat felicitas magna iusti fratris, infelicitatem miseri fratris Subleuet potentia pii fratris, debilitatem impij fratris: abluat clemētia summi fratris, sordes nequissimi fratris: remittat benignissima misericordia fratris, iniurias & peccata nequissimi fratris: emendet boni fratris pietas animam maculatam nefandissimi fratris. Non contemnat benignitas sanctissimi fratris, animam immundam nefandissimi fratris: trahat ad se amor dulcissimi fratris, animam fordidissimi fratris fugitiuam: compatiatur charitas purissimi fratris, animæ impudici fratris sine charitate.

3. O bone Iesu, clementissime frater, non molestē feras, quia fratrem te nomino lingua impia & impudica, nec præsumptioni adscribas. Sed mihi misero, tua benigna & misericors fraternitas dignetur misereri; digneris etiam in meis maximis necessitatibus subuenire, vitam meam emendando, & me disponendo ad implendum illa propter quæ natus sum: vt hîc tibi placitē seruendo, vitam tuam cœlestem adipiscar, & possideam per infinita sæcula sæculorum. Amen.

CAPVT III.

*Ad benignissimum Dominum nostrum Iesum Christum
Redemptorem nostrum.*

1. **R**edemptor & Saluator meus, piissime Domine Iesu Christe, scio quod nihil mihi profuisset nasci in hoc mundo, nisi me misericorditer redemisses. Ita benignissima & salutifera redemptio, securum me reddit de reconciliatione mea, cum filius essem iræ, & spem mihi confert de saluatione mea, cum damnari debuisssem. Et licet peccator sim maximus, & omni nequitia plenus, tamen merita huius sanctissimæ redemptionis, flagitia mea nefandissima excedunt, & pretium tantæ redemptionis dilectionem tuam ostendit. Cur namque, benignissime Domine Iesu Christe, pro redemptione mea tantum pretium exposuisti, cum sola modica gutta tui Sanguinis pretiosissimi suffecisset, non solum pro redemptione mea, sed etiam pro redemptione totius generi humani? In hoc tuam charitatem suberabundantis

& interminabilem ostendisti, hæc tua sanctissima redemptio, magna fiducia cor meum firmat, quia per ipsam hostes humani generis debellasti, & vicisti, eorum potentiam debilitasti, & me ac ceteros fideles virtutibus roborasti, & cælum nobis aperuisti, vt mediante ipsa beatissima redemptione securi sumus, si voluerimus de saluatione nostra. Sciò namque quòd neminem vis perdere, quantum in te est, & in tuo beneplacito est rem tanto pretio emptam saluare. Sed, dulcissime Redemptor meus, quamuis in prædictis, fiduciam meam geram, tamen duo meæ fiduciæ contradicunt: scilicet maxima mea ingratitude, & multorum vitorum perpetratio. Ingratus enim fui, & sum, de tanto beneficio redemptionis; gratias tibi non retuli, sed animum dedicaui ad committendum & perpetrandum multa & diuersa vitia & peccata. Et nisi tua immensa misericordia mihi vilissimo peccatori indulgentiam præstis, tua sanctissima redemptio mihi non proficeret ad saluationem, sed meam augmentaret damnationem.

2. O misericordissime Domine Iesu Christe emptus sum pretio magno, rem pretiosam mihi misericorditer dedisti, scilicet animam meam. Sed longè plus pretiosior est effecta, quia tanto & tam incomparabili pretio est redempta. Conserua eam, bone & piissime Domine Iesu Christe, conserua eam, ne tuum pretium in ea perdas. Non dissoluas vinculum tanti amoris in ipsius redemptione ostensi, non relaxes contra eam manus hostis, cuius potentiam per ipsam benignissimam redemptionem debilitasti, ne ulterius lædere possit eam. Clemens Redemptor meus, non fruster spe ipsius redemptionis; sed in me ipsius confidentia augeatur. Auferatur à me ingratitude, vt gratias tibi referam de tanto beneficio tantæ redemptionis; delectantur mea peccata per merita ipsius beatissimæ redemptionis; vt sic viam in præsentem, quòd meritis ipsius salutiferæ redemptionis, saluationem consequar sempiternam. Amen.

CAPVT IV.

Ad benignum Dominum Aduocatum nostrum.

1. **L**Is mortalis mota est contra animam meam, clementissime Domine Iesu Christe, per inimicos meos, qui quærunt ipsam, vt auferant eam. Et tanta est eorum perniciofa subtilitas, tanta versutia fallitatis, tam importuna persecutio, tam fraudulenta accusatio, & tam iniqua sophisticatio, quòd miseram animam meam nunc blandis suggestionibus mulcent, nunc falsis persuasionibus mouent, nunc peruersis tentationibus inclinant, nunc venenatis delectationibus peruertunt, nunc prauis cogitationibus incitant, nunc fallaci interpretatione malum bonum & bonum malum asserunt, ita quòd ad quacumque partem se vertat, ipsam animam captiuant, trahunt ad se, & deducunt ad deuia & interitum sempiternum; quia laqueos continuè parant, in cibo, in potu, in vigilia, in somno, in cogitatione, in loquela, in factis, in statu, in prosperitate, in aduersitate, in tempore, in ætate, in bono,

in malo, in vita, in morte, in securitate, in abiectione, & in omnibus aliis, quæ etiam humana fragilitas cogitare non valet.

2. Omitissime Domine Iesu Christe, quis in hac miserabili peregrinatione est tam prudens, ut versutias hostium valeat prævidere? Quis tam fortis, ut laqueos ipsorum possit rumpere? quis tam ingeniosus, ut ipsorum astutias possit cogitare? quis tam potens, ut ipsorum malitiis possit obuiare? quis tam sapiens & prudens, ut contra ipsos inlite huiusmodi, valeat obtinere? Non ego, bone Iesu, non ego, qui litem sustineo indefensam, nec curo meipsum defendere, sed succumbo. Quid igitur faciam ego miser, qui ad iudicium sum vocatus? Causa ardua mota est contra me, & ego fragilis. Ipsi sunt diligentes & vigilant, ego sum negligens & dormio. Ipsi sunt scientifici, & ego sum ignarus: ipsi sunt subtilissimi, & ego grossus ingenio. Necessitas mihi incumbit, ut in lite succumbam & condemner, aut aduocatum habeam, qui me velit, & sciat defendere & iuuare, & litem dicere, ne succumbam, nec condemner in ea. Et quis erit iste aduocatus volens & sciens dicere istam causam, in quo possim confidere, & magna fiducia sperare, quia non vacillabit, nec cum meis aduersariis concordabit? Tu es ille peritissimus aduocatus benignissime Domine Iesu Christe, dicente Scriptura, *Aduocatum habemus apud Patrem, Iesum Christum Iustum.*

1. IOAN.
2.

3. Exurge igitur, misericordissime Iesu Domine, & defende causam meam, quia potens es. Adiutor meus esto, ne derelinquas me, neque despicias me opus manuum tuarum. Domine virtus salutis meæ, in adiutorium meum intende, quia in te est tota fiducia mea. Te ductore nullus poterit aduersum me præualere. Te patrocinate, nullus poterit aliqua contra me obicere, nec contradicere. Exerce igitur, Domine Iesu Christe, misericorditer tuum aduocationis officium pro me misero, ut te defendente in causa contra me mota per aduersarios ius meum, victoriosum reportem de ipsis in fine triumphum, & gloriam consequar sempiternam. Amen.

CAPUT V.

*Ad Benignissimum Dominum Iesum Christum
Iudicem nostrum.*

1. O Misericordissime Domine Iesu Christe, laudo, benedico, & glorifico nomen tuum benedictum, quia cum magna fiducia spero misericordiam obtinere. Sed si solummodò peccata mea multa & enormia considerarem, & alia non cogitarem, desperatione frangerer, & morti me possem iuste tradere præ dolore: quia tot sunt peccata mea, & talia, & tam innumerabilia, horribilia, & nefandissima, quod omnia elementa deberent mihi deficere, & infernus iustissime me viuum in carne & anima deglutire deberet. Sed tua infinita misericordia me sustentat. Illa sola causa est,

est, quia non sum perditus & consumptus. Tota vita mea semper fuit corrupta, & totum tempus meum ferè consumpsi & peridi in peccatis. Vix aliud cogitavi, vix aliud egi, in istis fuit tota inclinatio mea, in istis fuit tota delectatio mea, in istis fuit tota consolatio mea. Ista, iuventus mea augmentavit & multiplicavit, & senectus non minoravit: & si quandoque minoravit, non virtus, sed inopia fuit causa; non amor tuus, sed timor mundanus; non utilitas animæ, sed honor personæ. Non consideraui quodd ex vita ista miserabili oportebat me iudicium subire, sententiam expectare, & pœnas debitas sustinere, quæ licet ad tempus retardarentur, tamen ex necessitate erat ut venirent.

2. Sed quis erit iudex meus, Domine Iesu Christe? quis audiet causam meam, & me iudicabit? Numquid iste iudex erit mihi suspectus? Num crudelis & austerus erit mihi? Numquid partem faciet contra me? Numquid extraneus erit mihi & ignotus? Nonne prosequetur me odio capitali? Numquid per meos aduersarios corruptetur? Numquid contra me sententiam iniquam feret, odio vel amore? Certè, benignissime & piissime Domine Iesu Christe, cum magna securitate viuo, quia cum magna confidentia contemplan, cum magna fiducia cogito, & verè scio, quod tu es & eris iudex meus, quia Deus pater te constituit iudicem viuorum & mortuorum. Tu duplicem curiam tibi statuisti, vnâ misericordiæ in præsentî, alteram iustitiæ in fine sæculi. Non es mihi suspectus, neque extraneus aut ignotus, neque partem contra me facies, quia frater tuus sum. Non es, neque eris mihi crudelis, aut austerus, neque prosequeris me odio capitali, quia misericors es. Non te corrumpent aduersarij mei, nec fauore, aut odio contra me sententiam ferres, quia iustus es, & iustitiam diligis.

3. Ad curiam igitur misericordiæ nunc venio, & ibi compareo, quia sum delatus de multis criminibus & peccatis. Non peto, nec requiro, ut mihi iustitiam facias, sed ut pro tuæ pietatis immensitate serues modum & stylum istius curiæ, quæ nunc tua curia dicitur & est. Fac igitur mihi secundum magnam misericordiam tuam, qua summè nunc indigeo. Ipsam deprecor, & exoro humiliter, & contrito corde, mihi fieri; ut cum securitate & fiducia postea ad curiam iustitiæ veniendo, ad dexteram partem collocatus, sententiam reportare valeam perpetuam electorum. Amen.

CAPVT VI.

*Ad benignissimum Dominum Iesum Christum
largitorem gratiarum.*

1. **O** Misericors & miserator Domine Iesu Christe, defensor & gubernator meus, largitor & dator omnium gratiarum, & saluator omnium in te fideliter sperantium, quis intrauit altitudinem bonitatis tuæ? Quis nouit profundum pietatis tuæ? quis nouit latitudinem charitatis tuæ? Tua

namque bonitas respicit peccatorem, compatitur peccatori, attrahit peccatorem, excitat peccatorem, & iustificat peccatorem. Tua pietas recipit peccatorem, indulget peccatori, dirigit peccatorem, sustinet peccatorem, & viuificat peccatorem. Tua charitas inducit peccatorem, diligit peccatorem, aspirat peccatorem, bonum ministrat peccatori, & eleuat peccatorem. Tu, benignissime Domine Iesu Christe, propter peccatores in mundum venisti, cum peccatoribus conuersatus fuisti, peccatores vocare venisti, quia te teste, non iustos, sed peccatores, ad penitentiam vocare venisti.

2. O mira & stupenda amoris immensitas! ô inestimabilis salutis prouidentia! Bone Iesu, bonorum operum merita, non malorum operum pœnas, nobis adinuicem communicasti, & communicas omni die. Decreuisti enim, ut pœna peccati solum teneat suum actorem, quia filius non portabit iniquitatem patris, neque pater iniquitatem filij. Sed bonorum operum, aut virtutum merita; ut non solum in suos actores conuerterentur, ordinasti; sed etiam quod in omnes fideles in statu gratiæ constitutos extenderentur; quia quidquid fidelis virtuosè cogitat, quidquid virtuosè loquitur, quidquid boni agit, in his omnibus cuncti fideles participes efficiuntur, nec excludi possunt, nisi per peccatum.

3. O grandis fiducia, summa securitas, magna confidentia peccatoris, cum videt se partem habere in omnibus bonis, quæ dicuntur, & fiunt per vniuersos fideles. Et quis potest diffidere de saluatione sua, pro qua tot habet adiutores, & suffragia ministrantes? Certè, dulcissime Domine Iesu Christe, ego sum ille miser & pessimus peccator. Ego sum ille, qui diffidere debeo potius quàm confidere, si vitam meam miserabilem & iniquam respicio oculo cordiali. Vita namque mea, ferè tota fuit assiduus vitiis & peccatis plena, & maculata. Et sic à prædictis bonis fidelium separati, in quibus, in mortali peccato constitutus, non percipit partem quantum ad saluationem suam habendam.

4. O piissime Iesu, quantum perdidisti: quantum defecisti: quantum negliger, & malitiosè me habui erga meipsum, qui non solum neglexi bonum facere peccatis iniquis resistendo, sed etiam bona vniuersorum fidelium perdidisti, quia ad recipiendum ipsa, meipsum non disposui? Succurre mihi vacuo ipsis bonis mitissime Domine Iesu Christe, succurre mihi in tanta necessitate constituto, ex terendo, & delendo peccata mea; & da mihi indigenti gratiam tuam misericorditer: ut opera meritoria agam, & aliorum operibus bonis & meritoriis particeps efficiar, per quæ tua clementia suffragante, gloriam percipiam sempiternam. Amen.

DE VITÆ CVRSV.

63

CAPVT VII.

Ad Dominum Iesum Christum bonorum operum remuneratorem.

Manus clementiæ tuæ, Domine Iesu Christe piissime non cessat operatione continua, mihi prauissimo peccatori, gratiam ministrare, quamuis à peccatis, & iniquitatibus non desistam. Operuersa nequitia mea! Tu, benignissime Domine, vocas me, & ego fugio; clamas post me, & audire te non curo; trahis me, & renuo te sequi; compellis me venire ad te, & contra te moueor & irascor; tuis & meis aduersariis per peccatum me committo, & tua misericordia non me relinquit. Pecco assidue, & tu me sustines, & expectas quotidie, vt ad te reuertar. Salutem animæ meæ desideras, ego illa dimissa, salutem corporis procuro. Quotidie deficio, & iniquè ago, & te ad iracundiam prouoco, & tu quotidie reficis, & gratias plurimas largiter mihi donas. Tu es Creator meus, ego creatura tua: Tu Dominus meus, ego seruus tuus: Tu Pater meus, ego filius tuus: Tuum est mihi precipere, meum est tibi obedire: Tuum est dominari mihi, meum est tibi famulari: Tuum est mercedem & præmia mihi dare, meum est tibi humiliter & debite seruire. Non est hora aut momentum temporis, quo gratia tua caream, nec hora aut momentum temporis debet esse, quo tibi seruitium non impendam.

2. O infamia mea maxima! ceruix durissima! superbia incomparabilis! ingratitude indicibilis! quia tibi, Domine Iesu Christe, non seruiro, & mercedem seruitij quotidie mihi tribuis. Imò etiam mihi seruitia facis. Quidquid indigeo, aut plus, mihi requiro, & peto à te, nec tu denegas mihi petenti, qui semper gratiam largiris: sed quod tibi placet, & requiris à me, non adimpleo, sed audire contemno, quamuis interdum ipsa gratia largiente, aliqua bona opera agam.

3. Sed quid mihi profunt ista bona, Domine Iesu Christe, cum in criminalibus peccatis persistam, & sic extra charitatem maneam? Certè, dulcissime Domine Iesu Christe, tanta est misericordia tua, tanta est immensa clementia tua, tanta est infinita benignitas tua, tanta est summa bonitas tua, & tanta est suprema tua ad nos miseròs peccatores prouidentia, quòd nullum bonum, factum per nos peccatores, te iuuante, irremuneratum relinquis. Imò etiam remuneras vltra condignum. Et si propter iniquam dispositionem peccatoris prædicta bona facientis, ad saluationem ipsa bona non profunt, saltem ex operatione ipsorum illustras cor peccatoris, vt ad te per pœnitentiam reuertatur. Reprimis potentias hostium, ne tantum peccatori noceant quam vellent. Bona temporalia peccatori auges. Disponis ipsum ad assuefactionem bonorum operum, & si in peccatis pertinax fuerit in morte, in pœna grauius supplicium patietur.

4. O Saluator misericordissime, quanta fiducia, quanta securitas, quanta spes, quanta confidentia de tua misericordia debet esse in homine, quem non solum diligis in gratia existentem, sed etiam in peccatis constitutum, gratiam multiplicem largiendo. Hoc enim operatus es in me, cui inique viuenti plurimas gratias indigno, misericorditer tribuisti. Exabundet igitur, & superabundet in me misero, bone Iesu, tua assueta misericordia, quia abundauit, & abundat in me iniquissimo magna malitia. Reduc me ad charitatem per peccatorum meorum condignam satisfactionem; Et da clementer mihi creaturam tuam, quam tuo pretiosissimo sanguine redemisti, ut meritorios actus agam, per quos tibi placeam, & in futurum obtineam misericorditer tuam gloriam sempiternam. Amen.

CAPVT VIII.

Ad Dominum Iesum Christum peccata remittentem.

Misericordia tua, Domine Iesu Christe, misericordia ab aeterno usque in aeternum super timentes te. Sed quid fiet illis piissime Domine, qui te non timent, sed blasphemant, & irritant nomen tuum, qualis ego sum? Imò principalem in eis, ac maiorem aliis me esse cognosco, quia dum mentem meam segrego à mundanis, & recludo in meipso, tamquam in libro coram oculis meis aperto, non diuertendo ad alia; studeo, lego, discuro, ratiocinor & contemplan miserabilem vitam meam; nihil timoris tui, nihil amoris tui, & nihil honoris tui reperio in meipso. Sed comparari possum iumentis insipientibus, & similis factus sum illis, quamuis in honore hominis me posuisses. Quem honorem intellexi, sed eo uti nolui, quia tota cura mea fuit more iumentorum in delectatione corporali, velut si animam meam non nouissem, quam mihi misericorditer donasti, ut corpori dominaretur, & per ipsam virtuosa opera & meritoria, ac tibi placentia, exerceret; per quam vitam obtineret aeternam. Et ideo si in eos qui te timent, facis misericordiam, restat ut mihi te non timenti, non misericordia, sed iustitia ministretur; quæ me consideratis & ponderatis delictis meis non saluabit, sed potius aeternaliter me damnabit.

2. Diffidam ergo, Domine Iesu Christe, de tua misericordia, aut quale remedium recipiam, ut iustitia mihi debita in misericordiam conuertatur, damnatio perpetua euitetur? Absit à me Domine Iesu Christe benignissime, quod de tua misericordia aliquammodo diffidam, quia licet te non timuerim, sed te innumerabilibus peccatis offenderim, per peccatorum nefandissimorum multiplicationem, tamen non diffidam de tua misericordia, sed confidam in ipsa. Confido igitur in ea. Fiducia animæ meæ tota est in ipsa, & tota spes mea, & securitas mentis meæ in ipsa consistit. Ab illa non recedo, neque recedam te miserante: in illa firmissimo corde perseuero, & perseuerabo te iuuante, & ab illa numquam separabor te suffragante.

3. Sed vnde hoc mihi, piissime Domine Iesu Christe, vt mala perpetrando, & te ad iracundiam contra me prouocando, de tua misericordia sic confidam, cum potius considerare deberem me terribilem sententiam recepturum secundum facinora quæ commisi? Certè, misericordissime Domine Iesu Christe, scio, & notum mihi fecisti, quod proprium est tibi misereri semper & parcere, tanta est misericordia tua, tanta est clementia tua, & tanta est bonitas tua, tanta est pietas tua, tanta est benignitas tua, & tanta est compassio tua ad miseros peccatores, & tanta est beneuola inclinatio tui piissimi cordis ad saluationem ipsorum; quæ quantumcumque fuerit aliquis maximus peccator, quantacumque peccata perpetravit, qualiacumque quotienscumque, & vbicumque illa commiserit, si ad te humiliter redierit, veniam petendo de ipsis, & debite conterendo, omnia ipsi donas, omnia remittis, veniam præbes, & indulgentiam mox concedis. Hoc non differs, non prorogas, non procrastinas, sed quocumque tempore, quacumque hora, aut quocumque momento, peccator corde contrito & humiliato ad te reuertitur, & veniam petit, manu misericordiæ tuæ eius peccata remittis, gratiam largiris & salutem æternam promittis. In hac igitur misericordia, tota confidentia mea est, tota spes & fiducia mea.

4. Sed absit à me, bone Iesu, vt propter spem tantæ misericordiæ tuæ, incliner actualiter amplius ad committendum peccata: sed de commissis doleam, & alia non committam, dignèque satisfaciam, vt tuam misericordiam merear obtinere, ac in tua gratia viuens in futurum tuam gloriam misericorditer possideam, per infinita sæcula sæculorum. Amen.

CAPVT IX.

Ad Benignissimum Dominum Iesum Christum gubernatorem nostrum.

1. **I**N te, Domine, speravi, non confundar in æternum: sed sicut hætenus me misericorditer gubernasti, sic in perpetuum tua immensa misericordia me gubernet. Scio, pie Domine, & verè scio, quamdiu est quod anima mea in inferno habitasset, nisi quia tu me, piissime & benignissime, gubernasti. Quidquid boni cogitavi, dixi, aut feci, aut faciendum aliis exemplum verbo & opere præbui, & ostendi, hoc non à me, sed à tua gubernatione processit. Quidquid mali omisi cogitare, dicere, aut facere, tua gubernatio, causa fuit. Quidquid potentiæ virtualis in me fuit resistendi prauis & iniquis cogitationibus, locutionibus, & actibus, mihi tua gubernatio ministravit.

2. Cum aliorum peccata cum charitate argui, & reprehendi, & à peccando retraxi, tua gubernatio me induxit. Cum te & proximum dilexi, & peccata non peccatores odio habui, hoc mihi tua gubernatio demonstravit. Cum iniurias & animæ rancōres propter te remisi, & de inimicis vindictam

non quæsiui, & pro ipsis tuam misericordiam imploraui, hoc in me tua gubernatio ordinauit. Cum negotia mea salubriter processerunt, & ad effectum peruenerunt optatum, non mea prudentia, neque peritia causa fuit, sed gubernatio tua pia. Cum de prosperitate, quæ mihi frequenter successit, ad votum non superbiui, nec de meipso præsumpsi, sed in conspectu tuo me humiliavi, gratias tibi reddidi, & à te, non à me omnia habere cognoui, hoc à tua gubernatione prouenit. Cum aduersitas aduersum me irruit, medijs varijs & diuersis, & tribulationes se ingesserunt, & in quacumque parte me percusserunt, & ex his meus animus non fuit prouocatus ad iram, nec ad blasphemiam contra te fuit motus, sed omnia sustinuit & libenter subiucuit incommodo, & se dignum existimauit ista pati, hoc tua gubernatio ipsi demonstrauit. Cum astutias fallaces & iniquas callidi hostis agnouit, & eis non consensi, sed contradixi; tuamque misericordiam, ut mihi propitiaretur, imploraui; hoc mihi contulit gubernatio tua sancta.

3. O piissima gubernatio, non sæuens, sed demulcens: non acerba, sed benigna: non puniens, sed pie corrigens; non damnans, sed saluans: nondum cognoueram te: sed ex mea malitiosa superbia, & ingratitude maxima ignorare volebam. Bona quæ agebam, & prospera quæ habebam, non tibi, sed mihi: non tuæ gubernationi, sed meæ prouidentiae attribuebam: & aduersa quæ patiebar, non peccatis meis iniquissimis, non ignorantiae meæ, non miserie meæ, non imprudentiae meæ, sed potius malæ fortunæ, seu alteri imputabam.

4. O benignissime gubernator meus, sentiam misericorditer dilectionem & charitatem tuam. Gubernator per te, quia numquam tua gubernatione destituis, quos in soliditate tuæ dilectionis instituis. In tua gubernatione confido, in ipsa spero, & de ipsa fiduciam gero. Respiciat igitur me miserum, ipsa misericors gubernatio tua, quæ corpus, & animam, cogitationes, & omnes actus meos gubernet. Non me dimittas meæ impiæ gubernationi, quæ prodigaliter me exposuit meis inimicis, & eorū dirioni, miserabiliter subiugauit. Sed sic me seruum tuum gubernare digneris, ut tibi non resistam, sed obediam; & obediendo, tibi placeam, & placendo tuam gratiam hic obtimeam & in futuro gloriam sempiternam. Amen,

CAPVT X.

*Ad benignissimum Dominum nostrum Iesum Christum,
prope peccatores existentem.*

1. **P**ropè es, amantissime Domine Iesu Christe, omnibus inuocantibus te in ueritate, & voluntatem timentium te imple, & omnes te diligentes, custodis. Ista sciuimus, & scio, & per sacram Scripturam tuam me largissimè de his informasti, & ad ista peragenda me misericorditer induxisti.

2. O desidia & pigritia cordis mei negligentis! ad mecum ostium pulsabas, benignissime Saluator, & tibi non aperiebam. Monebas me, & requirebas

DE VITÆ CURSV.

67

vt peterem, quia mihi petenti donare volebas; quærerem & inuenirem, pulsarem, & mihi illico aperires: Ad meum adiutorium semper paratus fuisti, numquam te abscondisti, neque tuum auxilium denegasti, sed te ipsum obtulisti & me ad recipiendum tua dona continuè inuitasti, imò mihi non petenti plurima contulisti: & ampliora contulisses, si peccata mea non impediuisent, & tibi gratiosum me exhibuissem. Non stetit per te, nec in tua misericordia remansit, quominus vita mea existeret virtuosa, & animam meam ab omni cogitatione peccati immaculatam seruarem.

3. O clementissime Domine, quanta est bonitas tua, vigilans ad saluationem meam! Et quanta est iniquitas mea, vigilans ad perditionem meam! Tu vigilas pro me, & ego vigilo contra me. Tu venis ad me, & ego te fugio: tu offers mihi bona tua, & illa renuo recipere. Non vendis ea, sed donas, non ex debito, sed ex gratia; non pauca, sed magna; non parcè, sed affluenter; non tardè, sed continuò; non impropèrando, sed miserando. O misericordissime Domine Iesu Christe, vnde mihi tanta miseria, tanta dementia, & tanta cordis duritia, quòd te venientem ad me miserum non recipiam, propè existentem te fugiam, tua dona non recipiam, sed recusem? Non consideres, Domine piissime, miseram & inquam negligentiam meam, & duritiem maximam cordis mei circa obliuionem clementiæ tuæ, & saluationis meæ: nec cessent tua dona propter ingratitudinem meam, quam si respicere volebas cum iustitia, non bona, sed mala mihi dares: non saluationem, sed damnationem; non tuam misericordiam, sed indignationem.

3. Adueniat, obsecro, & propè sit, tua infinita misericordia, quæ me inuocantem exaudiat. Timeâ te, vt voluntatem meam adimpleat. Diligam te toto corde meo, vt me custodiat. In ipsa namque confido, & spero, & magnam fiduciam in ipsam habeo. Hanc humiliter deprecor, suppliciter imploro, corde contrito flagito, & exoro, vt ex immensitate suæ bonitatis meam ingratitudinem & peccata auferat indulgendo: bona ad salutem animæ meæ conferat miserando: vt hîc in tua gratia viuendo, futuram gloriam misericorditer percipiam, per infinita sæcula sæculorum. Amen.

CAPVT XI.

*Ad benignissimum Dominum Iesum Christum remunerantem
peccatorem ultra condignum. & punientem
citra condignum.*

1. **N**on potest humanis mentibus comprehendi, nec memorando contemplari, Domine Iesu Christe, immensitas bonitatis tuæ potentiæ. Tua namque potentia humiliat & subleuat, viuificat & mortificat, deducit ad inferos, & reducit ad cælos, percutit & sanat, dirigit & retrahit, liberat & condemnat, sustentat & prosternit, minatur & demulcet, saluat & damnat, dirat, & pauperat, diligit & irascitur, prouehit & dimittit, pro-

rogat & abbreviat, augeat & minuit, manifestat & abscondit, custodit & derelinquit, tribuit & confortat, allicit & pungit, ignoscit & punit, blanditur & terret, suscipit & respuit, exaudit & contemnit. Et cur ista sic agat, inquirere nemo audeat, quia inuestigabilia sunt apud mentem humanam. Omnia namque vniuersaliter quæ sunt in cælo, & sub cælo, manu sua concludit. Dum hanc potentiam cogito, expauesco, quia quo fine concludat, ignoro. Ipsam fugere non valeo, & propinquare timeo propter horribilem vitam meam, in qua pauca bona egi, & multa mala commisi. Vnde si mercedem debitam pro bonis meis confidero, reperi illam exiguam valde esse debere. Si verò malorum meorum punitionem respicio, iuste inuenio illam magnam. Hæc me terrent, timorem incutiunt, dolorem inferunt, mentem perturbant, confidentiam auferunt, & me quasi in desperationem inducunt.

2. Sed, misericordissime Domine Iesu Christe, dum in libra debitæ considerationis mentis meæ, hanc potentiam contemplor, in ipsa reperi tantam bonitatem & misericordiam, tantam clementiam & bonitatem, pietatem tantam, benignitatemque & charitatem erga miseros peccatores, quod semper in dexteram tuam infinitæ dilectionis declinando, assidua compassionem bona remunerans ultra condignum, & mala puniens citra condignum, mercedem auges, & pœnam minuis; mercedem augmentas, & pœnam mitigas; non compensas facta peccatoris cum magna iustitia, sed cum immensa misericordia: quia bonorum eius retributionem multiplicas, & delictorum eius ultionem debitam & condignam diminuis miserando.

3. O benignissime Domine Iesu Christe, magna est, & esse debet confidentia mea. Magna spes, & magna plenitudo fiduciæ in tua suprema misericordia; de qua scio & firmiter spero, quod ex modicis bonis meis non condignam solum, sed planè magnam retributionem mihi dabis, & de meis maximis & nefandissimis criminibus non condignam, sed misericordem ultionem mihi dabis clementer. Sed absit à me, misericordissime Domine Iesu Christe, absit à me, quod huiusmodi ultio sit perpetua. Respice me oculo tuæ immensæ pietatis, & dele omnes iniquitates meas. Præsta mihi misericorditer roboris firmitatem, ut peccatis resistendo, si non temporalem, saltem perpetuam ultionem euadam. Tuam clementissimam bonitatem humili corde exoro, ut non facias mihi secundum peccata mea, neque vindictam sumas de peccatis meis. Et si punitionem, sicut etiam dignum & iustum est, fieri ordinasti de ipsis, clementiam tuam humiliter imploro, corde compuncto deprecor, & totis viribus mentis meæ flagito, ut puniar misericorditer. Quia hinc peccaui, non differas ultionem post mortem: sed anima mea purificetur in præsentem, tua misericordia operante, ut separata à corpore miserabili & corrupto, gloriam percipiat sempiternam. Amen.

*Finis tractatus quinquepartiti deplorationum
miserabilis cursus vitæ præsentis*


L A.

LAMENTABILIS CONTEMPLATIO

innocentiæ perditæ & iniquitatis admissæ, diuisa in septem partes, vt lector deuotus singulis diebus septimanæ, vnâ partem contempletur, ne frequens lectio aut prolixitas ipsius, fastidium generet. Morosè legantur verba singula, meditando prout Deus deuotionem, & gratiam ministrabit. Et supplico Lectori, ex debito charitatis, vt inter compunctionem cordis sui, memor sit mei nequissimi peccatoris.

CAPVT I.

Excitatio animæ post innocentiam perditam.

1.  Anima sceleratissima, non vita, sed morte perpetua ex tuis actibus digna: redi ad te, quæ longè fuisti à te: excita te ipsam de somno mortis: surge à lecto, in quo vulneribus sauciata diutius iacuisti, require medicum te valentem & volentem curare: labora vt illi placeas fugiendo curas & occupationes labiles, quas hætenus eius præcepta, doctrinam & consilium spernendo, tota mentis intentione amplexata es. Surge de arida terra & sterili delectationis carnis & mundi. Respice illa quæ diu possidere non potes: abhorre ea quæ te præparant ad interitum: appete cum affectu illa quæ perpetuò possidere vales: & felicem te facere possunt. Intra secretum cubiculum mentis tuæ, vt ipsam valeas cognoscere: ibi paululum requiesce: & exclude cætera præter Deum & te.

2. Excute torporem, discute conscientiam tuam, & diligenter examina odiosam Deo & horribilem vitam tuam. Scias te esse coram illo cui nihil est incognitum, nihilque impunitum remanet. Considera, quid es, & quid fuisti. Fuisti namque, sola Dei misericordia, ex nihilo creata, ad eius imaginem facta, sacri fontis lauacro regenerita, virtutibus & gratiis adornata, Dei filia, Iesu Christo desponsata, eius fide decorata, sancti Spiritus amica, rationis capax, contra aduersarios tuos armatura inexpugnabili armata, sociâ Angelorum, particeps hereditatis æternæ, templum æterni Regis, habens ad tuam custodiam Angelum delegatum. Tantique pretij fuisti, vt totus mundus tibi comparari non posset: & vt tuo Creatori, à quo facta es, & per quem facta es, ac ad quem facta es, seruires, effecta fuisti: & ideo cuncta tibi subiecit, vt tibi seruirent. Adde quòd pretium tuum, quo redempta es, & à morte perpetua liberata, non fuit aurum & argentum, sed Sanguis & mors Iesu Christi Filij Dei, donum sine pretio, gratia sine merito.

K

3. Ad tuum præsidium, sororem & sodalem tibi misericorditer concessit, scilicet innocentiam: per quam in periculis tuta fuisti, ubique secura, ubique libera, sancti Spiritus inspiratione ducta, Dei coniuncta consortio, à malis omnibus aliena, & à terrenis actibus separata, charitate Dei & proximi illuminata. Per hanc sororem Deo placuisti, amicitias cum eo contraxisti, & ei gratum seruitium exhibuisti. Ipse verò ex vñone amoris tecum assidue mansit, te custodiuit, exaudiuit, donis spiritualibus dotauit, tibi opportuna & necessaria ministravit, & ab omni re sinistra & aduersa te illam præseruauit. O anima ingratitudine plena: argue temetipsam coram Deo, eo quòd hucusque de cunctis eius beneficiis ingrata fuisti, & eius misericordias quamplurimas agnoscere renuisti.

CAP V T I I.

Quanta mala innocentia perdit afferat.

1. **O** Anima mea, anima infelix, peccatis innumerabilibus inquinata: considera nunc statum tuum. Abiecisti innocentiam sororem tuam fidelem, à præsidio mentis tuæ, & locum eius occupari fecisti, introducendo inimicam eius, scilicet iniquitatem, per quam Creatorem & benefactorem tuum à te miserabiliter proiecisti, & Diabolum intromisisti: cuius imago per ipsam innocentiam inimicam facta es periura Deo, adultera Christo, inimica Spiritui sancto, virtutibus & gratiis spoliata, fide mortua, promissione Dei priuata.

2. Armatura spirituali sponte derelicta, tuis hostibus voluntariè te subiungasti, & particeps effecta es damnationis æternæ. Per iniquitatem, bonum incommutabile respuisti, & in cæno peccatorum te prouoluisti: cõtempnisti benignum, & adhæcisti maligno: cælum ad quod possidendum electa fueras, vilipendendo amisisti, & regnum tenebrarum acquisisti. O perditam & miseram acquisitionem! Consolationem renuisti, & desolationem inuenisti: noluisti benedictionem datam recipere, & elongabitur à te: induisti iniquitatem sicut vestimentum: idèò perdidisti id quod facta eras: plena enim eras, & vacua facta es: videbas lucem, & cæcitatem incurristi: videbas spiritum, quem (quantum in te est) sponte oppressisti. Exul facta es à patria quam perdidisti nequitia tua, amplectendo cum delectatione temporalia: spiritualia contempsisti, mundum amasti, & timuisti plus quàm Deum. Bona voluisti prædicari, & apparere: sed non existere. Amicam huius sæculi te fecisti, & inimicam Dei te constituisti. Deum & omnia in tui vltionem pronocasti, nec tibi aliquod remedium procurasti.

3. O anima misera, considera qualem te Deus fecerat, & qualem tu te fecisti: de filia iræ, filiam gratiæ te fecerat: & tamquam sacrilega, filiam Diaboli te fecisti. Hæc & multa alia tibi cum iniquitate pariter aduenerunt: adèò enim misere corruisti, quòd per teipsam surgere non possis; sic vulnerata es, quòd per te sanari non queas; sic maculata, quòd per te mundari non

DE INNOCENTIA PERDITA. 71

valeas. Erige ergo totam mentem tuam corde compuncto, ad illum qui erigit elisos, accede ad illum qui sanat contritos corde, adiunge te illi, qui omnium sordium est mundator; vt te misericorditer subleuet, sanet, & ab omni iniquitate emundet.

C A P V T III.

Quanta bona innocentiam comitentur

1. **O** Anima mea, perquam miserabilis, dic mihi in quo te læsit innocentia, per quam tot bona & gratias recepisti? Dic mihi, quæso, in quo te læsit, vt eam ate nequissimè proiiceres, & in locum eius iniquitatem, quæ illi inimicatur, subrogares? Nonne innocentia soror tua, tecum nata est, & tecum ad nuptias Christi venit, quando ipsum in sacro Baptismate in sponsum recepisti, & thalamum eius gratiis & virtutibus ornatum introisti? Feliciter tecum nutrita est: siue vigilares, siue dormires, tecum semper erat, tecum fidem vouit, te dilexit, tibi in omnibus operibus tuis comes fidelis fuit, & salutem tuam procurauit. Numquam per se, aut ex factis suis à tuo consortio declinauit: nisi quando ex magna ingratitude tua eam à te malignè eiecisti, & iniquitatem in thalamum tuum (proh pudor!) excepisti.

2. **O** nefandam commutationem, crudelem casum, lamentabilem lapsum, intolerabilem dolorem, importabilem cruciatum! Cecidisti, ô anima nequam, per huiusmodi commutationem, de sublimi in profundum, de gratia in peccatum, de virtute in vitium, de gloria in pœnam, de cælo in infernû, de vita in mortem, de salute in infirmitatem, de bono in malum, de gaudio in mœrorem, de consolatione in desolationem, de securitate in timorem, de felicitate in miseriam, de libertate in seruitutem, Dominum à quo bona cuncta procedunt deferendo, eius inimicis, imò etiam hostibus propriis, à quibus omnia mala prodeunt, adhæcisti. O perfida anima, quid egisti? non est hæc mutatio dexteræ Excelsi, abominabilis es Deo, odiosa Angelis, horribilis Sanctis, foetida omnibus, intolerabilis tibi ipsi. Melius tibi fuisset, si creata non fuisses: quàm sic Creatorem tuum contemnendo, & in te sæuendo, temetipsum peremisse. Dic lacrymabiliter; dic: Hei mihi quia cecidi, quia peccaui, Deum & Sanctos contra me prouocaui. Iram tremendi iudicis in me concitavi. Væ mihi, quia sic perperam egi, sic inconsultè feci.

3. **Q**uis eruet me de manu potenti, & brachio extento contra me? Quis præseruabit me à ventura ira, à morte æterna, à laqueis infernalibus, à rugientibus præparatis ad escam, nisi tu, misericors Saluator & Redemptor meus? Tibi namque proprium est, misereri & parcere; qui omnipotentiam tuam parcendo semper & miserando manifestas. Inclina ergo aures tuæ pietatis ad me, ne desperem de te: sed respirem in te cum fiducia, & remaneam de tua misericordia per teipsum & propter teipsum perpetuo consolata.

Ad Deum confugiendum esse, & in eo sperandum.

1. **O** Anima mea desperatione circundata, mentem tuam erige, & eleua ad Deum, spera in eo cum fiducia, surge & sta, produc de corde gemitus, clama die noctuque. O innocentia soror mea, vbi es? quò tetendisti? qua arte, quòve ingenio me dereliquisti? quò tandem loci deuenisti? Sed vae mihi animæ peccatrici: quia corde maculato & pollutis labiis, hanc sororem meam audeo nominare, quam offendi, quam violauì, imò, quod execrabilius est, quam sic penitus à me ipsa pepuli, sic abieci, quòd eam recuperare non valeo. Extranea & peregrina facta est ipsa mihi: imò præ iniquitate mea ego illi: & quamuis tot bona mihi præpararit, ego tamen ingrata, cum iniquitate amicitiam contraxi.

2. O iniquitas, quare me illudendo circumuenisti? quare innocentiam sororem & amicam meam à me eiecisti, quæ me gratam fecerat Saluatori meo? Quare me cepisti, colligasti, & subiugasti? & mihi Deum, Angelos, & Sanctos abstulisti, eosque mihi inimicos constituisti? Quare me bonis & gratiis omnibus crudeliter spoliasti: & inermem solamque in conflictu & inter aduersarios me reliquisti? Nihil enim lucra ex eis consequi poteras, quæ sic me, (nescio quæ de causa) prostituisti. Quid tibi malefeceram, vt me sic tractares? Quis te docuit, vt ad talia me prouocares, informares, & perpetrare faceres? Quæ ratio te mouit? Nihil enim mihi tecum. Non noueram te, non quærebam, non curabam, à te elongata eram: debitor tibi vlla in re non eram. Cur me morti perpetuæ & damnationi æternæ obligasti? & sine consolatione, imò cum desolatione, seu desperatione reliquisti? Abstulisti enim à me amicos & protectores meos, vt cum iniustitiâ tua me perderes. Meum quoque Pastorem, qui mihi alimoniam præbere solebat, & sub quo vitam ducebam, abire fecisti: vt sic egens & inops facta, fame perirem. Sed & lupum rapacem ad me introduxisti: à quo sustentatione negata vulnerata sum, imò interfecta & enecata.

3. O Pastor Pastorum, ouem errantem require, & repertam impone super sacros humeros tuos, reduc eam ad caulas gregis tui, sana infirmam, pascue famelicam, imò iam fame morientem: vigila super eam, ne amplius lupus rapax inuadat, rapiat, & enecet eam.

Quòd nulla neceffitate, fed fponde, perditur innocentia.

1. **O** Nullius valoris homuncio, vermis inutilis. Dum præmiſſa confide-
ro, datus ſum in reprobum ſenſum, & in obliuionem. Mihi ipſi ex-
cæcatus ſum, rationabile iudicium perdidì, in magnam dementiam incidi,
quia imputo alteri factum, quod ſponte perfecì, ſcilicet innocentiam ex-
pellendo, & iniquitatem introducendo. Sciebam & verè cognoſcebam,
quòd ante oculos meos erat vita & mors, bonum & malum, gloria & pœna:
& cùm liberum arbitrium haberem eligendi alterum ex his, elegi tamquam
ſatius & iniquus, mortem, malum, & pœnam. Et licet prædictæ electionis
cogitatio, & primi motus non eſſent in mea poteſtate: tamen moroſa dele-
ctatio, conſenſus, & operis conſummatio à mea voluntate pendeabant; nec
cogi ab aliquo poteram, niſi voluntariè conſenſiſſem, id quod ego feci. Imò,
quod pernicioſus mihi eſt, frequenter tentationes præueni, ita vt iam non
poſſem dixi patiens, ſed agens.
2. Inimicis meis adhæſi: & ſuggeſtioni eorum conſenſum præbui. Primi-
tias iuuentutis meæ Deo debitas, ad eorum voluntatem expendi. Nullum
peccantem, quamuis à peccatis retrahere poſſem, retrahere volui; imò ad
peccandum verbis & factis impulſi, aut ſaltem ad facinora perpetranda ex-
plum dedi. Deum qui me genuit, dereliqui: & oblitus ſum Domini Creato-
ris mei. Ex actibus meis, dignus ſum odio, non gratia. Quànto diutius miſe-
ricorditer me Deus ſuſtinuit, & ad pœnitentiam expectauit; tantò durior
corde fui, & contra eum ac eius præcepta ceruicoſè inſurrexi. Fides in me
propter bonorum operum defectum mortua fuit. Dei inſpirationes longè à
me proieci, & quæ meæ ſaluti contraria erant, libenter ſuſcepi. Labores cor-
porales, ad ſalutem animæ meæ promouentes, vitauì. Antiquis & uſitatis
peccatis non contentus, noua & inſolita adinueni, & opere conſummaui.
Semel ac iterum & ſæpiùs ad vomitum redij. Nulla facinora reperiuntur,
quibus non fuerim vel mente, vel opere contaminatus. Et quàntò magis
ad finem vitæ accelero, tantò magis peccatis inuoluor.
3. Ecce, bone Ieſu, qualiter tempus à diebus originis meæ expendi: ecce in
quibus ſtadium meum conſumpſi, in quibus laboraui, cum quibus amici-
tiam contraxi, quæ dilexi, quibus parui, & quibus (te ſpreto) obediui. Non
habeo quid dicam, quid reſpondeam, qualiterve me excuſem, quia non iu-
ſtificabitur in conſpectu tuo omnis uiuens. Sed tu, Domine Ieſu Chriſte, à
cuius miſericordia ſpes & ſalus mea dependet, quique tempus viuendi mihi
tribuiſti; tempus pœnitendi & emendandi mihi miſero. & indigno miſeri-
corditer concedere digneris. Tu namq; Creator meus es: ego verò non poſ-
ſum non eſſe creatura tua: fiat tamen de me, qui ſolus parcere & iuſtificare
potes, voluntas tua.

Quod postea miseria propria cognoscitur, per solam Dei misericordiam reuelanda.

1. **O** Creator & reformator meus, Domine Iesu Christe, qui neminem vis perire, nec lataris in perditione animarum, audi me nefandissimum peccatorem. In vespere vitæ meæ positus sum, plenus vitiis & peccatis, non paucis, sed innumerabilibus; non modicis, sed maximis: cor meum à conscientia pulsatur: fallax mundus, in quo dormio, deficit: corpus ruinam minatur: vita brevis est, finis dubius, exitus horribilis. Mors me undique expectat: mihi Diabolus insidiatur. Tempus transit, iudicium tuum appropinquat Te, & omnia alia contra me prouocaui: quia nihil mihi inoffensum reseruavi, imò te vocantem me ad vitam, fugi; & hostem, me ad mortem persequentem suscepi.

2. Torquet me conscientia mea, terret me futura damnatio, quam merui: & quam ex actibus meis euitare non valebo. Si me confidero, horror sum mihi intolerabilis: si me non respicio, mors mihi est ineuitabilis. Fugere non possum, comparere non audeo: quia tot accusatores habeo, quot peccata. Tu es iustus accusator meus: tu es verax testis actuum meorum, tu es rectus iudex meus. Tui coniudices me accusant, tui & mei inimici, cum quibus amicitiam iniij, mei sunt accusatores importuni. Nemo pro me loquitur, aut loqui audet. Qui me iuuare poterant, ignominiose abieci, & meos impugnatores in sinum meum recepi. Nunc solus prostratus iaceo, omni auxilio destitutus, & à quolibet confusus & derisus.

3. In proximo est dies tui tremendique iudicij, in quo omnia facta mea usque ad minimam cogitationem discutientur: reuelabitur ignominia mea, & videbitur opprobrium meum, quia arbor sterilis & infructuosa fui. In ignem æternum proiectus ardebo, & ab eis quibus me fociaui, cruciabor, qui data sententia damnationis æternæ, rapient me; & sine interuallo & absque fine, crudeliter tormenta ministrabunt, à quibus in æternum non cessabunt, nec vlla amplius misericordiæ via mihi patebit.

4. Nihil mihi nunc superest, nisi exuberans misericordia tua. In illa & per illam respiro, quia benignus & misericors es, nec vis mortem peccatoris. Memor esto, quod Creator meus es tu: & ego creatura tua: ne perdas opus tuum, propter peccata mea. Tu es Redemptor meus, & Saluator. Salua igitur me peccatorem per gratiam tuam, quem damnare potes periuritiā: cito misericors erga miserum: da pœnitenti veniam, & noli secundum mea merita ferre sententiam. Sed sicut tua misericordia principium vitæ meæ præuenit, sic finem eiusdem concludat, & mecum perpetuo maneat.

Deploratio ad veniam obtinendam.

1. **O** Misericors & miserator Deus, quis miserebitur mihi, quis auxiliabitur mihi, aut quis consolari me valebit, nisi latitudo charitatis tuæ, altitudo potentie tuæ, longitudo meritorum passionis tuæ? Nam dum cogitata perpendo, & perpetrata mente reuoluo, hebetudine cordis deficio. Obtenebratur mihi animus, quia in stuporem vertitur, & dolore conficitur: quia veste innocentie, qua tua gratia indutus fueram, penitus reiecta, veste iniquitatis à bonis despecta, me à planta pedis vsque ad verticem capitis cooperui impudenter, qua me formatum deformauit, quia similis tibi eram, & factus sum tibi dissimilis. Prostratus sum & elisus, & non possum me erigere, nec respicere sursum. Villicus sum iniquitatis, apud te multipliciter diffamatus, quia dissipavi bona naturæ, gratiæ, & fortunæ: pauper & spoliatus sum, viuendo iniquè. Hic fame pereor, & egestate laboro.

2. Surgo igitur & venio ad tuam misericordiam: & dico corde lacrymanti & penitenti: Pater misericordiarum, & Deus totius consolationis, peccavi in cælum & coram te: & substantiam naturæ, gratiæ, & fortunæ, tanquam prodigus expendi, viuendo iniquè: non sum dignus vocari filius tuus; fac me sicut vnum de mercenariis tuis: recipiat me misericordia tua ad osculum: da mihi vitulum saginatum: scilicet tuam gratiam, qua anima mea impinguetur: da mihi lacrymas tibi placentes, & ad te habentes liberum ingressum, quæ longè recesserunt à me. Ne obliuiscaris me, nec auertas faciem tuam à me. Illumina oculos meos, & ostende mihi faciem tuam. Veni ad me; quia longè recessi à te. Doce me venire ad te. Ad te enim venire non possum, nisi tu doceas me; quia tu es via. Procul fac à me omnem errorem; quia tu es veritas. Libera me à morte repentina & æterna; quia tu es vita.

3. Tu qui es misericors, nō permittas me à tua misericordia fieri alienum: & qui expectas ad penitentiam peccatorem, benignè suscipe ad te reuertentem. Veniat super me misericordia tua, ignosce mihi per clementiam tuam: ne ultionem tuam in perpetuum sentiam. Non te ostendas mihi durum, qui me inestimabili pretio redemisti. Audi me clamantem, & aperi ostium pulsanti. Non abiicias creaturam tuam, quam misericorditer creasti. Si ex malitia mea recessi à te, fac, vt benignitas tua reuocet me ad te: vt per penitentiam dolorem, consequar à misericordia tua, quod per Baptismum mihi elementer concessisti: vt cum dies exitus vitæ meæ aduenerit, tu pius iudex & propitius defensor sis: vt qui tibi in hoc mundo fui seruus inutilis, in tua beatitudine & felicitate perpetua, ineffabiles laudes tuas concinam, & facie ad faciem te intuens, tibi vtiliter seruiam, te laudem, honorem, & glorificem, per infinita sæculorum sæcula. Amen.

 BREVIS DOCTRINA PER CONTEMPLATIONES
 super conuersionem Religiosi, seu alterius
 peccatoris ad Deum:

*Diuisa per duodecim menses anni spiritualis, producentes
 duodecim fructus Spiritus.*



Quar ad te, Domine Iesu Christe benignissime, quamuis sim puluis & cinis, nulla gratia, sed omni miseria, peccatis meis exigentibus, dignus. In tua namque misericordia, spem & fidem posui & pono, quia me creasti sola pietate tua, & tuo pretiosissimo Sanguine redemisti, ut ad tuam ineffabilem gloriam peruenirem. Tu, clementissime Domine Iesu Christe, decursum vitæ præsentis per annum spirituale, duodecim menses continentem, homini statuisti: ut si secundum tua mandata feliciter se gubernaret, duodecim fructus Spiritus, per menses illos, exinde ad cumulum suæ saluationis reportaret.

Contemplatio primi mensis spiritualis.

1. **P**rimus mensis, est amara compunctio pro peccatis, quæ vocatur Ianuarius, quia contritio est ianua, per quam intratur ad vitæ sanitatem. Et sicut Ianuarius est bifrons, si consideretur prout est finis anni præteriti, & initium futuri, sic vera contritio bifrons est, quia debet plangere flagitia præterita, & proponere alia non committere in futurum plangenda. Et tunc talis producere debet fructum primum Spiritus, qui est charitas: quia contritio non esset accepta tibi, neque esset pars veræ poenitentiae, nisi formaretur vera charitate. Quia sine charitate nihil prodest, imò quamuis omni venustate virtutum quis fulgeat, tamen sine charitate nec meritum quis habet, nec præmium.

2. O misericordissime Domine Iesu Christe, quid faciam ego nequissimus peccator, qui licet infinita & enormia peccata commiserim, & in illis longissimis temporibus perseverauerim, nondum tamen hunc mensem Ianuarium perfecte intraui; hoc est ad veram contritionem de meis peccatis nondum perueni. Inclina, Domine Iesu Christe, aures tuæ pietatis ad me, & qui sanas contritos corde, sana contritiones cordis mei, ut recogitem tibi omnes annos meos in amaritudine animæ meæ. Perfice in me, ut plangam paululum dolorem meum antequam vadam ad terram tenebrosam & operam mortis caligine: & inde producam fructum qui est charitas. Fructus enim

DE MENSIBVS SPIRITVALIBVS. 77

enim est honoris & honestatis, quo obtinetur fructus gloriæ sempiternæ, qui numquam marcescit, nec minuitur, sed semper præparatur illis, qui te in veritate diligunt, Domine Iesu Christe: tibi sit gloria, tibi honor, per infinita sæcula sæculorum. Amen.

Contemplatio secundi mensis spiritualis.

1. **A**bundantia lacrymarum quæ emittitur pro peccatis, benignissime Domine Iesu Christe, potest dici Februarius, qui est mensis aquosus & pluuiosus, in cuius principio Sol est in Aquario. Vnde sicut in anno vsuali post Ianuarium sequitur Februarius, sic post amaram compunctionem cordis, quæ fit propter peccata commissa, debet sequi abundantia lacrymarum. Cum enim, Domine Iesu Christe, anima diligenter recogitat quæ miserabiliter commisit, ex illa diligenti consideratione eleuatur in suo hemisphærio quidam vapor verecundiæ, qui condensatur in quadam nube confusionis, quæ postmodum doloris vehementia resoluitur in pluuiam lacrymarum. Et tunc tu, clementissime Domine Iesu Christe, quies Sol iustitiæ, es in Aquario. Das enim tali peccatori, potum in lacrymis, in mensura, vt videlicet eius mens tantas pœnitendo compunctionis suæ fundat lacrymas, quantas lapsus est antè per culpas. Lacrymæ enim, Domine, tollunt maculam internam, lauant culpam, animam consolantur, corroborant sensus, placant tuam offensam. Omnino namque quod culpa infecit, lacryma tergit.

2. O humilis lacryma, tuum est regnum, tua est potentia. Ante aspectum iudicis intras, quidquid petis obtines, accusantibus inimicis silentium imponis. Imò, quod fortius est, vincis inuincibilem, & ligas omnipotentem. Vbi enim abundas, cogitationes sordidæ non approximant. Ex huiusmodi lacrymarum abundantia, procedit secundus fructus Spiritus, scilicet gaudium; quia vir pœnitens pro peccatis suis lacrymando, simul dolet, quia peccauit, & gaudet, quia confidit dimissam sibi diuina benignitate iniquitatem. Ille fructus est propriè illius ligni quod est plantatum locus decursus aquarum, & flumen lacrymarum, quod fructum suum dabit in tempore suo. Fructus quidem est, quia gaudium spirituale est, & datur in tempore suo, id est tempore lacrymarum. Nam post lacrymationem, imò simul in illa lacrymatione, gaudium & exultatio effunditur.

3. O misericordissime Domine Iesu Christe, produc de corde meo fontem lacrymarum, riga stratum cordis mei. Lacrymis plorans, plorem in nocte huius mundi caliginosi, & lacrymæ meæ in maxillis meis. Fiant mihi lacrymæ meæ panes die ac nocte, vt fructum veri gaudiij consequar, quem nemo à me auferre possit, sed ipsum percipiam in æternum. Amen.

Contemplatio tertij mensis spiritualis.

1. **S**icut in anno vsuali, clementissime Domine Iesu Christe, post Ianuariū & Februariū sequitur Martius, in quo aperiuntur pori, ascendant & descendunt humores, à vitibus & aliis arboribus superflua amputantur. Sic in anno spirituali, post contritionem & lacrymationem, debet sequi aperta oris confessio, per quam aperiuntur labia ad secretorum reuelationem, & amputentur superflua per sacramentalem absolutionem. Nam humiliter confitenti tu remittis peccatum, & Diabolus amittit principatum, quem in corde peccatoris exercuit. Confessio enim est ornamentum animæ, quæ peccatorem purgat, & iustum reddit. Confessio sanat, confessio iustificat, confessio veniam dat peccati: omnis spes in confessione consistit, in confessione locus est misericordiæ.

2. O Domine Iesu Christe, nunc tempus est gratiæ tuæ diuinæ, nunc plenitudo temporis, nunc plena est curia tua, Domine, dulcedine & misericordia, quia ibi reo ostendenti factum suum creditur, nec testes contra eum producantur, nec alius qui dicat contra, auditur, & dum clarè crimina per eum perpetrata manifestantur, non condemnatur, sed citius absoluitur, & gloria ei aeterna promittitur, (si mandatis Ecclesiæ stare voluerit,) & amicus tuus constituitur.

3. O felix humilitas pœnitentium, oprata spes confitentium, quàm potens es apud omnipotentem, quàm facîle vincis inuincibilem, quàm citò tremendum iudicem conuertis in piissimum patrem! Ex eo namque oritur & producitur tertius fructus Spiritus, scilicet pax. Quia quamuis per contritionem & lacrymationem peccator reconciliatur Domino, & secum faciat pacem, adhuc tamen non habet pacem cum Ecclesia, sed mystico tertio mense, qui est aperta confessio peccatorum, reconciliatur Ecclesiæ, & perfecte pacificatur cum ea. Aduuare me digneris, Domine Iesu Christe dulcissime, & aperire cor meum & linguam meam ad confessionem puram, veram, & integram, vt tibi reconciliari valeam, & fructum pacis recipere per infinita sæcula sæculorum. Amen.

Contemplatio quarti mensis spiritualis.

1. **A**prilis, Domine Iesu Christe, quasi aperilis, quia omnia aperiuntur in eo, & omnia gramina & flores de terra & arboribus egrediuntur. Tunc enim est Sol in Tauro; tunc terra est aperta agricultura & seminationi. Sic etiam debet esse, Domine Iesu Christe, in homine, qui tibi desiderat placere, & animam suam perducere ad tuam gloriam sempiternam. Nam post lamentum veræ pœnitentiæ talis debet pura intentione cordis seminare terram cordis sui per boni propositi conceptionem, & rectam intentionem, & germinare per boni operis executionem, & producere

DE MENSIBVS SPIRITVALIBVS. 79

folia virentia, & flores per honestam conuersationem & exemplorum ædificationem. Sic enim probatur penitentia fuisse vera, & cum charitate, quia charitas numquam est otiosa.

2. Hoc est sacrificium, Domine Iesu Christe, quod super omnes hostias quaeris & diligis, vt per misericordiæ & iustitiæ opera, nomen tuum vbiq; laudetur, & Deus verus seruorum tuorum esse, verissimè comprobetur. Non enim ex foliis & floribus, sed ex fructu arbor bona cognoscitur, quia opera non vera discernunt inter filios tuos Domine, & filios dissidentiae: & nisi quis fructum boni operis faciat, excidetur, & in ignem mittetur æternum. Ideo semper operandum est, quia nec opus, id est, tempus operandi, nec ratio excusandi, nec sapientia allegandi, nec scientia defendendi erunt apud inferos, neque valebunt post mortem, sed tantum antè. Operari igitur quis debet, dum viuit, quia veniet nox, id est mors, quando nemo poterit operari. Tempus enim seminandi est nunc, Domine, vt in futurum quis colligere valeat.

3. Sed, Domine Iesu Christe, in his operibus necessarius est quartus fructus Spiritus, scilicet patientia, quia sicut agricola, statim ac seminauerit, non percipit terrenos fructus, sed cum patientia expectat: sic agricola spiritualis, cum seminauerit bona opera & exempla, statim non percipit fructum optatum, imò detractiones multorum. Quia qui piè volunt viuere in te, Domine, persecutiones patiuntur. Ideo patientia est eis fructuosa in presenti: & fructum æternum percipient tuæ gloriæ, si patientiam perfectè habeant, vt præcepisti.

4. O clementissime Domine Iesu Christe, ego miserrimus peccator parce seminavi bona opera & exempla. Ideo dubito, quod paucos fructus colligam in futurum, nisi tua misericordia me iuuare dignetur & meos supplere defectus. Sic spero & confido. Concede igitur mihi gratiam benè operandi, & patientiam constantem, vt sanctum percipiam fructum (te miserante & concedente) gloriæ sempiternæ. Amen.

Contemplatio quinti mensis spiritualis.

1. **M**aius, Domine Iesu Christe, te ordinante, mensis est alacritatis & amorum, in quo aues maxime gaudent, garrunt & vociferantur, & est tunc Sol in Geminis: quia propter temperiem aeris, & amœnitatem temporis, iucunditas in hominibus geminatur. Sic etiam, Domine Iesu Christe, est Maius aliquis spiritualis. Quia post menses spirituales qui pertinent ad peccatorum punitionem & virtutum seminationem, in quibus anima extollitur & fecundatur, sequitur Maius, scilicet mentis exultatio, gratiarum actio & exhibitio laudis, vt vitium ingratitude euitetur. Debet igitur in hoc mense iucunditatis, iucunditas geminari, vt sit in corde lætitia, & in ore gratiarum actio, & vox laudis.

2. Tu, Domine Iesu Christe, semper laudandus es, siue blandiaris in prosperis, siue castiges in aduersis. Laudari namque debes bonis operibus, assidue

orationibus, & cogitationibus sanctis. Nihil enim tam statum cœlestis habitationis repræsentat, sicut alacritas iucundantium in te. Igitur qui ad tuum, Domine, confortium peruenire cupit, studeat cum affectu te laudare & amare. Non debet etiam tardus esse aut piger in referendo tibi, Domine, gratias, sed debet addiscere ad singula tua dona gratias referre, vt sic nulla dona tua, debita gratiarum actione frustrentur. Colligenda enim sunt fragmenta non solum maiora, sed etiam mediocria, sed etiam pusilla, ne pereant; id est quod etiam minora beneficia tua non sunt danda obliuioni.

3. Ex his, Domine Iesu Christe dulcissime, producit quintus fructus, qui est lōganimitas. Nihil enim, Domine, in ista vita sic facit expectare longanimitatem absque afflictione spiritus, illud quod homo vehementer desiderat, sicut spirituale gaudium & iucunda vita. Iste est fructus oris laudantis & benedicens te, Domine. Tu namque, Domine, moues illum, qui istum menssem ad tuum beneplacitum obseruat, dicens ei: *Expecta Dominum, & viriliter age.* Tu enim, Domine, non fraudas debitores te expectantes, quia vniuersi, qui te expectant, non confundentur, Et si tardius quis auditur, non propter hoc credendum est, quod à te, Domine, negligatur.

4. Sed, misericordissime Domine Iesu Christe, quomodo possum ego iniquissimus peccator, & tibi ingratus, producere aut habere istum fructum, qui non habui mentis exultationem, nec gratiarum actionem, neque laudis exhibitionem, sed habui ingratitudinem, multa peccata deliberatè perpetrando? Succurre mihi, Domine, misericordia tua, quæ peccata mea deleat, & ad gratiarum actionem cor meum prouocet per bonorum operum effectum, vt expectatum hîc placitum inueniam in futurum. Amen.

Contemplatio sexti mensis spiritualis.

1. **S**icut, benignissime Domine Iesu Christe, in Iunio qui immediatè sequitur Maium, humores deficcantur in radicibus, fœna secantur, & omnia ad maturitatem tendunt, & Sol est in signo Cancrî. Sic in Iunio spirituali post strenuitatem operationum, post alacritatem gratiarum actionum, humores corrupti & nociui deficcantur per illicitorum motuum repressiōnem, deficcantur fœna per carnis macerationem, quia omnis caro fœnum. Sic in concupiscentia carnis vltà non procedit homo, sed facit retrogradationem: sicut Sol materialis, quando est in Cancro, facit retrogradationem. Sic etiam omnia seminata, vel concepta, tendunt ad perfectam maturationem, aliter non debet expectari fructus, nisi fructus mortis, dicente

Rom. 8. Apostolo: *Si secundum carnem vixeritis, moriemini.* Caro namque infert bellum animæ, & illam pro posse demergit in foueam infernalem, quia suggerit vanas voluntates, sollicitudinibus onerat, contumelias suggerit, præcepit est ad odium, & prona est ad omne malum. Ideo mortificari debet, & domari.

2. Et tunc producit homo sextum fructum Spiritus, qui est bonitas, id est dulcedo animi. Cum enim amaricatur caro, anima dulciter requiescit.

DE MENSIBVS SPIRITVALIBVS. 81

Pretiosus est iste fructus: quia non solum est dulcis, sed ipsa dulcedo. Et tanta dulcedo, Domine Iesu Christe, homini, quod totum mare huius mundi dulcorat. Iste namque fructus, propriam corruptionem hominis sanat, quia scriptum est. *'Dulce anima sanitatis est officium.* Iste insuper fructus ab igne tribulationis hominem sanat, gratiam in corripiendo tribuit. *Verbum namque dulce multiplicat amicos.* Prov. 16.
Ecclesiastic. 6.

3. O clementissime Domine Iesu Christe, ego prauissimus peccator carnem miseram non mortificaui per illicitorum motuum repressionem, & sic humores nociuos & corruptos in anima non desiccaui, sed amplius quotidie pullulare permisi. Nec fit in me ex magna malitia mea retrogradatio vitiorum, sed potius augmentatio & accumulatio ipsorum. Respicere me digneris, misericordissime Domine Iesu Christe, oculo pietatis & misericordiae tuae, ut non secundum peccata mea facias mihi, sed clementer indulgere mihi digneris peccata remittendo. Concede mihi gratiam, ut carnem mortificando, & subiugando animae, fructum immensae tuae beatitudinis percipiam, per infinita saecula saeculorum. Amen.

Contemplatio septimi mensis spiritualis.

Creator & dispensator omnium rerum, Domine Iesu Christe, Iulius est mensis calidissimus, tam ex Sole, quam ex signo calidissimo Leonis, quod tunc Sol subintrat, ac etiam ex sidere calidissimo, scilicet Canicula, quae tunc oritur. Sic in Iulio spirituali, postquam culpa sunt depolarata, virtutes sunt seminatae, post laudis exhibitionem & carnis macerationem sub sidere calidissimo charitatis calidioris quam sit Canicula, & fortioris quam sit Leo, quia fortis est ut mors dilectio, excitatur ardor dilectionis, per quem homo depuratur, eleuatur, transformatur, & sufficienter disponitur ad percipiendum suauitatem caelestium pigmentorum. Quam dulcis es & suavis charitas, quae fessos alleuias, debiles roboras, maestos laetificas, & iugum suaue facis, & onus leue vitae humanae. Sine dolo mulcet, patienter nouit irasci, & humiliter indignari. Et sicut sine via, nullus potest peruenire quod tendit: ita sine hoc sidere charitatis, homo non potest recte ambulare, sed errare.

2. Ex hoc, Domine, producit septimus fructus qui est benignitas, & donandi largitas. Cum enim anima sic ardet dilectionis igne, tunc est ad erogandum largissima. Tunc etiam dat se tibi per adhaesionem veram, sibi ipsi per carnis subiectionem, & proximo per compassionem. Tu, Domine, dabis benignitatem, & terra nostra dabit fructum suum. Haec autem benignitas, Domine, est virtus lenis, blanda, tranquilla, omnium donorum aperta consortio, inuitans ad sui familiaritatem, dulci alloquio, & motibus temperata.

3. O benignissime Domine Iesu Christe, hunc fructum benignitatis non potest producere cor meum, quia sub sidere calidissimo charitatis non vixi, sed sub sidere frigidissimo odij, & rancorum, & aliorum diuersorum vi-

tiorum. Vnde ad tuam misericordiam recuro, Domine Iesu Christe, indulgentiam de peccatis meis humiliter implorando; vt digneris mihi misericorditer indulgere, vt sub fidere veræ charitatis viuendo, fructum tuæ benignitatis percipiam in æternum. Amen.

Contemplatio octauæ mensis spiritualis.

1. **G**ubernator temporum es, Domine Iesu Christe, qui prout placet, vbi illa ordinas & disponis, omnia obedire tibi tenentur. In Augusto, Domine, fruges colliguntur, & in horrea reconduntur. Tunc enim Sol est in Virgine, quoniam sicut virgo videtur sterilis & infœcunda, quia suis fructibus est orbata; & sicut Augustus sequitur immediatè Iulium; sic in anno spirituali, post magnam inflammationem mentis, sequitur perfectio humilitatis, per quam colliguntur merita, ac reconduntur, & absconduntur aduersariis, & per hoc optimè custodiuntur, quia deprædari desiderat, qui thesaurum in via publicè portat. Quamuis enim charitas aperiat oculos mentis; respectu tui, Domine, respectu etiam proximi, & respectu defectus proprii, claudit tamen eos respectu profectus & virtutis propriæ. Vnde post magnam mentis inflammationem, est, Domine Iesu Christe, in anima veri iusti, signum Virginis. Tunc enim anima videtur sibi sterilis & infœcunda, sicut virgo, & bonorum operum fructibus spoliata. Et quamuis sic sibi appareat in conspectu tuo; tamen, Domine, est augusta, & in Augusto; id est ab augendo dicta, quia scriptum est, *Deus superbis resistit, humilibus autem dat gratiam.*

1. Pet. 5.

2. Et tunc, Domine, nascitur & producitur octauus fructus Spiritus, qui dicitur mansuetudo. Et certè, Domine Iesu Christe, nihil mansuetius, nec fructuosius humilitate. Nam anima humilis brevis est in propria reputatione, & tamen initium dulcoris habet fructus eius, quia sine humilitate, nullum spirituale est dulce; imò totum dispergitur. Quia qui sine humilitate virtutes conquirat, quasi iumentum paleas portat. Mansuetus igitur, Domine, nec irritat malum, nec irritatur a malo, nec aduersus eum præualeat causa peccati, nec aduersus alterum aliquando nascitur causa peccandi; sed magis contentus est iniuriam pati, quàm facere.

3. O amantissime Domine Iesu Christe, ego nefandissimus peccator sterilis sum & infœcundus, ac fructibus bonis orbarus, sed fœcundus sum in perpetrandis vitiis & peccatis, nullam in me mansuetudinem habens. Propter malitiam meam, Domine ad istam infertilitatem perueni quia tu plures aspirationes bonas, ad benè operandum mihi clementer concessisti, quibus uti recusaui, sed ad peccata mea effectualiter inclinaui. Succurre mihi, Domine Iesu Christe, per tuam magnam misericordiam. Dele iniquitates meas, & da mihi mansuetudinem, & veniam in præsentem; vt te mansuetum & beneuolum inueniam in æternum. Amen.

DE MENSIBVS SPIRITVALIBVS. 83

Contemplatio noni mensis spiritualis.

1. Sicut in Septembri, Domine Iesu Christe, vindemia est matura, & racemi colliguntur in cartallo, qui quidem September immediate sequitur Augustum; sic in anno spirituali, Domine, post mentis inflammationem & humilitatem, distillat in anima suauitas tuæ spirationis. Ministratur namque ei vinum cœleste lætificans cor hominis; introducit in cellam vinariam sponsi sui; id est, tui, qui es eius sponsus, ubi inebriatur ab vbertate domus tuæ. Datur autem iste potus cœlestis patriæ, qui quasi est infinitus; unde in Septembri Sol est in signo Libræ: ad designandum, Domine, quia omnia dona tua, in hac vita sunt mensurata & librata. At respectu donorum æternæ patriæ non est mensura. Hic donum mixtum est cum dolore, quia quandoque dulcia, quandoque amara præparas peccatoribus, ut ad te conuertantur. Sed ibi erit donum consolationis sine commixtione tristitiæ, quia scriptum est: *Gaudium & letitiam obtinebunt, & fugiet dolor & gemitus.*

Isa. 35.

2. O dulcissime Domine Iesu Christe, veniat mihi tui saporis misericordia, & inenarrabilis fragrantia, quæ semper malas in me exsiccat concupiscentias, & in corde meo producat venas aquæ salientis in vitam æternam. Dulcescat mihi, Domine, dulcedo non fallax, dulcedo felix & secura, recolligens me à dispositione iniqua. Frustrà dimissus sum, dum à te, imò aduersum te, in multa euanui. Suauissima igitur, Domine, est dulcedo tua & perfecti saporis, non palato carnis, sed palato mentis.

3. Ex hoc, Domine Iesu Christe, nascitur & producit nonus fructus Spiritus, qui dicitur fides. Cum autem in hac vita gustat vir iustus aliquam scintillam cœlestis dulcedinis, iam habet certitudinem. In cœlo unde scintillæ fluunt spiritualis dulcedinis, consolatio semper plena est. Fides namque inuisibilem est certitudo. Unde aliter fides pro virtute, & aliter hic pro fructu Spiritus. Et ideo anima sic lætificata potest dicere cum Psalte: *Dedisti letitiam in corde meo, à fructu frumenti, vini, & olei tui, multiplicati sunt. In pace in idipsum dormiam, & requiescam.*

Psal. 4.

4. Sed, clementissime Domine Iesu Christe, ego miserrimus peccator præmissa cum veritate dicere non valeo, quia delectationes meæ fuerunt mundanæ, & in rebus transitoriis & peccatis diuersis, quæ nullius felicitatis sunt, nullius gloriæ, nulliusque beatitudinis. Auxiliari mihi digneris, Domine Iesu Christe, peccata misericorditer remittendo, consolationem mundanam à me misero penitus auferendo, & delectationes spirituales clementer concedendo: ut ad tuam interminabilem delectationem, tua pietate donante, valeam peruenire. Amen.

Contemplatio decimi mensis spiritualis.

1. **O**ctober, piissime Domine Iesu Christe, est mensis qui in principio sui est calidus, & in fine frigore captus pungit, vnde in medio Octobris Sol subintrat signum Scorpionis, qui est vermis facie blandiens, & cauda pungens. Sic est, Domine Iesu Christe, te miserante in Octobri spirituali: quia post dignam peccatorum compunctionem, post deuotam mandatorum tuorum implerionem, & iucundam diuinorum mysteriorum gustationem, immediate sequitur iste October spiritualis, qui est in principio calidus & in fine frigidus, facie vngit, & cauda pungit. In quo si homo considerat peccata, quae commisit, & beneficia quae recepit, praemia Sanctis debita, & supplicia peccatoribus designata & parata, ista consideratio prius calefacit & vngit, considerando beneficia & praemia; secundo autem infrigidat & pungit, considerando peccata & supplicia.

2. O Domine Iesu Christe, nulla sunt mea merita comparatione donorum tuorum. Considero, Domine, misericordiam tuam, & beneficia tua, & considero quae merui. Cum beneficiis caelestibus facta mea perpendo; cum diuinis muneribus, actus meos meditor, & cum intelligo, memoror, iudico, quid sum, quid fecerim, calefaciunt & vngunt tua beneficia cor meum. Sed excludi, Domine Iesu Christe, a bonis propter peccata, & alienum effici ab iis quae preparata sunt Sanctis tuis, tantum haec ingerunt cruciatum, tantumque dolorem, vt etiam si nulla extrinsecus poena torqueret, haec sola sufficeret. Quemuis enim gehennae exuperat cruciatum, carere propter peccata bonis, quibus potestatem quis habuerit perfrui. Vnde ista considerando infrigidari debet cor meum miserum.

3. Et ideo vir iustus ex his producit decimum fructum spiritus, qui est modestia, id est, moditenentia. Ista enim, Domine, consideratio facit semper in dictis & in factis tenere modum, & excedere nunquam. Iste est fructus floridus, & honorabilis, fructus honoris & honestatis.

2. O clementissime Domine Iesu Christe, ego miserabilis peccator, istam considerationem habui in memoria, sed viuendo secundum carnem, multa crimina perpetraui, & diuersis voluptatum illecebris animum meum dedi. Succurre mihi, Saluator meus, non perdas pretium tui pretiosissimi Sanguinis in me, sed dele misericorditer peccata mea, exuberante clementia tua, qua me perducas ad vitam aeternam. Amen.

Contemplatio

Contemplatio undecimi mensis spiritualis.

1. **P**lissime Domine Iesu Christe, in mense Nouembri Sol subintrat in signo Sagittarij, quia nunc emittit sagittas pluuiæ, sagittas niuis, & sagittas grandinis, sic etiam in Nouembri spirituali, vir spiritualis & iustus debet esse, Domine, in Sagittario, vt sagittet peccatores. Primò sagittis pluuiæ, promittendo suauitatem tuæ misericordiæ diuinæ. Secundò sagittis niuis, reuocando ad memoriam frigiditatem mortis vicinæ. Tertiò sagittis grandinis, intorquendo terrorem extremæ sententiæ, vt sic Octobri spiritualis considerationis interueniente, succedat Nouember spiritualis, per eruditionem doctrinæ. Non enim talis debet esse mollis, sed resolutus, fortis, & per cuncta robustus; nec debet quisquam attingere præclari muneris functionem, nisi paratus sit animam suam millesies tradere in discrimen, atque mortem. Meticulosi namque in lege repelluntur.

2. Ex hac igitur emissionem sagittarum, Domine Iesu Christe, producit & nascitur undecimus fructus Spiritus, qui dicitur continentia. Vir namque iustus, vt possit melius sagittare peccatores, debet continere se, non solum ab illicitis, verum etiam a multis licitis. Sic autem vitam prolongat, tam spiritualementem, quam corporalem, quia qui abstinens est, adiiciet vitam quietam. Nam quæta est, Domine Iesu Christe, continentia vita: quam non inquietat vxorum suspicio, non sollicitat ancillarum sumptus, non conturbat filiorum peruersitas, quæ munditiæ gignit florem, puritatis parit fructum, & bonæ conscientia præfert odorem.

3. O misericordissime Domine Iesu Christe, ego impiissimus peccator tanta mentis frigiditate constrictus sum, & sic à vera charitate tui & proximi separatus ex mea mera malitia, quod huiusmodi eruditionem doctrinæ à meipso expuli, & aspirationes salutes, quas super hoc frequenter dedisti, præsumptuosè abieci; & ad peccata committenda animum inclinavi; & illa ad effectum miserabiliter perduxì. Et sic fui, cum cor continentia non addixi, sed ad incontinentiam cor miserum & immundum laxaui.

4. Adiua me, Domine Iesu Christe clementissime, in tanta miseria constitutum, ne sic miserabiliter finiam dies meos; sed indulgere misericorditer mihi digneris, vt continenter viuendo, charitatem perfectam ad te, & proximum habeam in æternum. Amen.

Contemplatio duodecimi mensis spiritualis.

1. **D**Ulcissime Domine Iesu Christe, in Decembri vsuali, est solstitium. Tunc enim tantum est Sol à nobis remotus, quòd non potest à nobis plus elongari; & tunc est Sol in signo Capricorni, Caper enim suis cornibus perit superiora; sic Sol cum est in illa parte Zodiaci, incipit ascendere versus arietem & cancrum. Sic est, benignissime Domine Iesu Christe, te miserante & adiuuante in Decembri spirituali. Nam post condignam peccatorum compunctionem, post deuotam mandatorum impletionem, ac iucundam diuinorum mysteriorum prægustationem, homo perfectus sic est à mundo separatus, & à vita carnali iam mortuus, quod plus non possit elongari. Et tunc existentem in spirituali Capricorno, ipsum tadet viuere. Fastidiosum est ipsi quidquid in hac vita placet, & mentis suæ cornibus, intellectu & affectu, superiora quæriri: cupiens cum Paulo dissolui, & esse tecum in gloria, in qua vna est omnibus inseparabilis singulorum voluntas, ab omni malo libera, & omni bono impleta, indefectualiter fruens æternorum iucunditate gaudiorum, abluta à culpis oblitaque pœnarum, nec tamen ita suæ liberationis oblita, vt tibi, Domine, qui es liberator eius, sit ingrata.

2. Ex his namque vir iustus & perfectus, profert & producit duodecimum fructum spiritus, qui dicitur castitas. Tunc enim anima tamquam sponsa castissima, abhorrens fornicari à te, de suo cubiculo amplexus tuos castissimos desiderat; & suis cornibus pulsat ad ostium, vt introducatur per te misericorditer, in tuum æternum cubiculum, vbi de ipsa dicatur, *hæc quæ nesciuit thorum in delicto, habebit fructum in respectione animarum sanctarum.*

3. O misericordissime Domine Iesu Christe, confiteor me fuisse elongatum à tanta perfectione ex magna iniquitate mea; quia à mundo non me separavi & tibi adhæsi, sed viuere cum eo volui: intellectum & affectum ad cœlestia non direxi, neque fructum continentia exinde produxi. Adiutor clementissime, dignare adiuuare me; digneris misericorditer parcere peccatis meis. Tolle miserrimum animum meum ab istis transitoriis & caducis. Eleua illum ad te, vt tibi obediam & placeam, gratias incessanter referam, beneficia tua humiliter recognoscam; In fine, te misericorditer donante, ad tuam sempiternam gloriam perueniam. Amen.

CONTEMPLATIO DEPRECATORIA
de conflictu assiduo inter animam & carnem.

CAPVT I.

De conflictu diuitiarum & paupertatis.

DNI POTENS & misericors Deus, inclina aures tuas pietatis & misericordie ad me fragilem & miserum peccatorem, in bellis continuis & periculosissimis constitutum, magnamque vim & violentiam assidue patientem, quæ euadere nullo modo valco per meipsum nisi immensa clementia tua adiuuare me dignetur. Te namque misericorditer inspirante, anima mea mundi diuitias vilipendit, sciens quoniam diuitiæ pungunt eam, lacerant, & affligunt, quoniam inducunt eam in tentationes, prouocant ad peccandum, auferunt charitatem, tollunt quietem, sunt momentaneæ, & sine labore mentis & corporis non acquiruntur, sine timore non possidentur, absque dolore non amittuntur.

1. Et ideo beati pauperes spiritu, quoniam ipsorum est regnum cælorum; quia tales, nec intrinsecus per auaritiam vtuntur; nec extrinsecus per controuersiam læduntur, sed sursum per desiderium eriguntur, & eligunt abiecti esse in domo tua Domine, magis quam habitare in tabernaculis peccatorum. Sed misericordissime Domine Deus meus, caro mea misera, stimulante mundo labili, contra animam dimicat, natura ei repugnat, & consuetudo resistit, ut vincant animam & superent, & de ipsa triumphent. Abhorret namque caro misera & infirma, paupertatem, & diuitias amplexatur, quia paupertas est ei dura, & diuitiæ suauis, & ita nimia importunitate & violentia, nititur animam subiugare.

3. O munde immunde, hæc pugna à te procedit, bellum ingeris, & sensualitatem fatuam prouocas in tui adiutorium. Sed quare sic impugnas animam meam tuis momentaneis diuitiis, cum quibus peribis tu, & concupiscentia tua? Tu enim multa promittis, & pauca reddis: imò sic fallax es & defectuosus, ut quos hic tuis diuitiis extollis, in fine nudos dimittas. Nihil in te amator tuus habet, nisi dolorem & lacrymationem, laborem & fationem, horrorem & confusionem, transitum & corruptionem, fraudulentiam & deceptionem. Et licet videatis nutritor corporum, tamen carcer es animarum. O durum bellum, fortis vis, grauis difficultas, magna violentia: quæ sic infelicitè animam meam trahitis ad infernum.

M ij

4. O Domine Deus omnipotens, qui dixisti & facta sunt, mandasti & creata sunt, qui cuncta fecisti & nosti antequam fierent, tibi sunt futura præterita, vel potius tibi sunt præsentia omnia tam præterita quam futura. Qui vocas stellas: & dicunt, Assumus: qui facis angelos tuos spiritus, & ministros tuos flammam ignis. Tuæ voluntati nihil omnino resistit. Tibi nullum verbum est impossibile. Tibi venti & mare obediunt, & tibi flectitur omne genu, caelestium, terrestrium, & infernorum.

5. Fac mecum misericordiam tuam, vt in isto conflictu grauissimo non desperem. Tu enim non solum recipis penitentes, verum etiam trahis ad te peccatores. Tu patiens es, & misericors, & præstabilis super malitiam, suavis, ac mitis, & copiosus in misericordia omnibus inuocantibus te. Te igitur humillimè toto corde inuoco: da robur & fortitudinem spiritui meo, vt mundum labilem vincat, & carni miseræ viriliter dominetur, ac illas diuitias solummodò diligit, quas fures non effodiunt nec furantur, tæque solum vitæ æternæ thesaurum, inueniat & perenniter diligit. Amen.

CAPVT II.

De conflictu gula & abstinentiæ, luxuriæ & continentiæ.

1. **A**dhuc Domine Deus meus, grauissimam & assiduam pugnam patior. Cum enim prima inhibitiō quæ facta fuit homini, de ciborum extiterit abstinentia, quam dum ipse custodiuit, feliciter perstitit; ad abstinentiam & ieiunium frequenter spiritus meus se disponit, vt sic possit iram tuam placare, abs te veniam impetrare, pœnam vitare, nequitiam extirpare, munditiam retinere, & gratiam obtinere. Ista enim omnia ieiunium operatur. Sed misera caro se illi ex aduerso opponens, auaritatem edendi commouet, gulam incitat, appetitum prouocat, voluptates ingerit, diuersitatem ciborum exquirat, varietatem saporum affectat, contemnit sufficientiam, & superfluitatem desiderat, & non solum in variis ferculis & lautis cibariis desiderium suum ponit, sed etiam horam præuenit ex appetitu inordinato. Nam voluptas sub necessitate latitans, dum necessitas solui debitum sibi querit, suum expleri desiderium appetit, tantoque facilius illam gula in præceps rapit, quanto honestiore nomine necessitatis se contegit.

2. Verum Domine Deus meus, quia frenum abstinentiæ non restringo, grauior pugna infurgit. Cingulo namque castitatis laxato, venerem amplectitur misera caro cogitationibus importunis. Familiaris autem nimium est iste hostis: & ideo difficilius potest euitari. Habitat namque non procul, sed propè, non extra, sed intra. Nam virtus eius in lumbis eius, & fortitudo illius in vmbilico ventris eius.

3. O misera caro, quid te mouet vt meam animam velis spoliare virtutibus, & deicere in infernum? Tu namque cunctis virtutibus denudata es; ideoque diceris caro à carendo, quia cares omni bono. Tu es illa terra Adam, quæ fuit à Deo maledicta. *Maledicta* (inquit) *terra in opere tuo: non*

DE CONFLICTV CARNIS ET ANIMÆ. 89

dabit fructus suos: sed spinas & tribulos germinabit tibi. Id est desideria mala, & delectationes, in te germinabunt. Tu misera caro, cares status firmitate. Quia modò es sana, modò agra, modò tristis, modò læta, modò turpis, modò pulchra, modò viuens, modò mortua; & quasi flos transis, & velut umbra fugis, & numquam in eodem statu permanes. Tu cares mentis puritate, & quicquid tangis, aut tibi sociatur, maculas. Tu cares morum honestate, nisi stimulis coarcteris. Et quid tibi caro misera pròderit, si animam meam præcipitaueris in gehennam; cum tibi quoque cum ea, pœna gehennæ post tremendum iudicium præparetur, si in hoc tuæ ditioni subiugaueris ipsam?

4. O Domine Deus meus, scrutans corda & renes, qui pluuiæ guttas, & arenas maris dinumeras. Deus scientiarum Dominus, qui omnia scis, omnia penetras, perspicax occultorum omnium explorator, tu non vis mortem peccatoris, sed vt conuertatur & viuat, qui non venisti vocare iustos, sed peccatores ad pœnitentiam, qui venisti quærere & saluare quod perierat, qui dixisti: *Non egent qui sani sunt medico, sed male habentes.* Effunde igitur super me misericordiam tuam, ne tantam vim patiar quæ animam meam sic miserabiliter captiuat, sed comprime hostium vires, & carnem miseram animæ meæ subiugare cum effectu dignare: vt de ipsis victoriam obtineas, te lapdem liberatorem meum in perpetuas æternitates. Amen.

C A P V T I I I.

De conflictu humilitatis & inanis gloriæ.

1. Quid amplius faciam Domine Deus meus? vexat enim me multipliciter aliud luctæ genus, scilicet inanis gloria: quia mundani fauoris aura me miserabiliter demulcet, laudum præconia mihi applaudunt, & adulationis lingua blanditur, & sic caput meum nequissimi peccatoris, tale oleum impinguat. Rapior in altum, attollor ad summum, erigor in excelsum, inferiorem me non reputo, humiliorem præsertim corde non exhibeo, nec minorem me ostendo. Sicut autem præconia me exhilarant & extollunt, sic opprobria me deiiciunt & contristant. Et licet quandoque laudem humanam non appetam, oblatam tamen cum delectatione suscipio.

2. O humani generis inimice, inuentor mortis, superbix institutor, radix malitiæ, scelorum caput, princeps omnium vitiatorum, & omnium voluptatum persuasor, quare sic vexas animam meam? quid te ad hoc inducit? quid tibi prodest hæc importuna vexatio, cum potius scias hoc tibi nocere, quia quanto magis me ad peccandum inducis, tanto amplius tua pœna augefcit?

3. O Domine Deus meus qui es iudex iustus, fortis & longanimis, & metuendus super omnes deos, requirénsque tua vsque ad nouissimum qua-

M iij

drantem, qui nec prece, nec pretio, nec amore, nec odio, declinas à semita rectitudinis, sed via regia semper incedis: nullum malum deferis impunitum, nullum bonum irremuneratum relinquis. Quis ergo stabit ante conspectum tuum, cum horrendum sit incidere in manus tuas? Quod si iustus vix saluabitur, ego impius & peccator ubi parebo? Sed absit Domine Deus meus, ut de tua misericordia desperem: quoniam miserationes tuæ super omnia opera tua. Non enim ex operibus iustitiæ quæ fecimus nos: sed secundum tuam misericordiam saluos nos fecisti.

4. Multum Domine peccauit Cain quando interfecit Abel: sed magis peccauit cum ait: *Maiores est iniquitas mea, quam ut veniam merear.* Absit enim Domine, ut maior sit iniquitas mea, quam misericordia tua: cum defectus à bono, qui est iniquitas, summo bono comparari non possit, quæ est misericordia tua, Deus. Ne autem hac elatione extollar amplius, compesce Domine vires inimici, & da mihi misericorditer veram humilitatem, quæ in me violentum motum elationis cohibeat, & prudenter excessum arrogantiae moderetur: ut in humilitate tibi placeam, tibi que humiliter seruiam in sæcula sæculorum. Amen.

CAPVT IV.

De conflictu diligentium & non diligentium inimicos.

1. **T**Vam maiestatem latere non potest sempiternus Deus meus, quod vim nimiam patior, quia dum spiritus meus inclinatur iuxta præceptum tuum, ad diligendum inimicos, ad orandum pro persequentibus & calumniantibus, ad remittendas iniurias illatas, & ad benefaciendum iis qui odio me habent, ut inde anima mea efficiatur filia tua, necnon ad ferenda omnia aduersa patienter; caro mea miserrima, cum suis adiutoribus pro virili repugnat, iniuriam reuocat ad animum, accenditur ad iram, rapitur in furorem, præ magna impatientia vindictam perquirat, damnum inimici procurat, in verba contumeliosa prorumpit, murmurat, & detrahit, & sic animæ meæ reluctatur, eamque nititur captiuare.

2. Quare o tu, qui es verus David manu fortis, qui vicisti vrsū, superasti leonem, prostrasti Philistæum: adiuua me in hoc periculoso duello. Confido namque de tua magna misericordia, non solum me veniam adepturum, sed etiam gloriam obtenturum. Pono enim Domine Deus meus, ante oculos meos, mulierem quæ erat in ciuitate peccatrix, quæ multa, te testante, peccata habuit. Pono ante oculos meos, mulierem deprehensam in adulterio. Pono ante oculos meos latronem: qui propter homicidium & seditio-nem missus fuerat in carcerem, & deinde suspensus in cruce. Pono ante oculos meos David, prius adulterum & homicidam, postea factum prophetam. Qui omnes Domine, materiam confidentiæ mihi præbent de tua infinita misericordia.

DE CONFLICTV CARNIS ET ANIMÆ. 91

3. Sed quia scripturæ, in hoc mundo promittunt tribulationes & angustias, pressuras & augmenta dolorum, abundantiamque tentationum, tu miserere Domine, dignare me præparare ad patientiam, ne deficiam imparatus. Compelle igitur Domine rebellem carnem meam, ut subiiciatur spiritui, nec ei ultra dominetur: ut possim animam meam in patientia possidere, & ad tuum seruitium ad quod eam creasti, conseruare in sempiternum. Amen.

C A P V T V.

De consuetu malarum & bonarum cogitationum.

1. Importunè vexor, & magnam violentiam patior Domine Deus meus: quia variæ & noxiæ cogitationes dissipant cor meum, & separant ac diuellunt animam meam à te. Ista est mihi Domine pugna domestica, quæ quanto est familiarior, tanto grauior est, & periculosior. Sed quis Domine Deus, creator & redemptor meus, malarum cogitationum insultum vitare possit?

2. Scio utique Domine, quod non est in hominis potestate, facere, ne surgant. Utinam sit in eius virtute, facere ne crescant: quia paruulæ me vehementer affligunt; adultæ perimunt violentè. Primos quippe motus, Domine, non possum non sentire, quamuis illis possum non consentire. Ista pugna, Domine, mihi assidua est, nec me dimittit: siue vigilem, siue dormiam, aut quippiam boni cogitem, dicam, aut faciam; semper enim & vbiq; me inuadit: nec importunitate grauat, nec continuatione lassescit, nec tempore perit, sed per vsum vetus est, & per augmentum quotidie renouatur. Ista sunt iacula quæ præmittit insidiator antiquus. Isti sunt præcursores, proximum aduentum inimici generis humani denunciantes.

3. O benignissime Domine Deus meus, adiuua me in hac pugna, quia tu es creator & redemptor meus: hominem namque creasti & redemisti. Magnum quidem est quod creasti: sed maius est quod redemisti, nam creando, factus est homo ad imaginem & similitudinem tuam: sed redimendo, factus fuisti, Domine, totius bonitatis & clementiæ, ad imaginem & similitudinem hominis. Quia temetipsum exinaniuisti, formam serui accipiens. Magnum autem est habere similitudinem tuam: sed maius est quod tu assumpseris imaginem & similitudinem nostram, maius inquam ratione dignitatis & etiam utilitatis.

4. Quis ergo diffidere possit, Domine Deus meus, quin miserearis illius, quem fecisti ad imaginem & similitudinem tuam? Nemo certè. Sed multò quoque minus dubitare valeat Domine, quin tu miserearis illius propter quem exinaniuisti temetipsum formam serui accipiens. Miserere igitur mei Domine per meritum sacratissimæ incarnationis & passionis tuæ, & pugna pro me in hoc quotidiano prælio, ut non vincar, sed vincam per cogitationes bonas & operationes studiosas, & triumphem de ipso inimico, ac cum sanctis tuis tibi seruiam in sæculorum sæcula. Amen.

De conflictu malarum consuetudinum.

1. **A**D fortificandum, Domine Deus meus, prædicta certamina contra animam meam, inualuit consuetudo inueterata, quæ adiuuat carnem miseram ac defendit. Durum namque est illi apprehendere disciplinam: & proinde conatur spiritum restinguere, ne transeam de dulcibus ad amara, de placidis ad molesta, de prosperis ad aduersa, de epulis ad ieiunia, de voluptate ad penitentiam, de fabulis ad silentium, de somnolentia ad vigilias, de similitate ad dilectionem, de vanis cogitationibus ad sanctam contemplationem, de inani gloria ad humilitatem, de lubricitate ad continentiam, de diuitiis transitoris ad paupertatem, & de libertate carnis ad seruitutem Dei.

2. O Domine Deus meus, durum est istud bellum, magna est ista violentia; imò tanta, quòd sine potentissimo adiutorio tuo, vincere non valeam. Adiuuare igitur me digneris misericorditer, tu Domine, qui tantum dilexisti mundum, vt Filium tuum vnigenitum dares pro mundo; cuius sanguis clamat pro nobis ad te; qui exauditur in omnibus pro sua reuerentia. Aduocatum enim habemus apud te, Iesum Christum iustum, qui semper interpellat pro nobis, signa passionis ostendens, & ipse est propitiatio pro peccatis nostris. Redempti enim sumus, non corruptibilibus auro vel argento, sed pretiosissimo sanguine agni immaculati.


3. Tibi Domine Deus meus attribuitur, quicquid pertinet ad potentiam. Diuinam autem potentiam euidentius nihil manifestat, quam iustificare impium, nam hoc est trahere peccatorem iuxta quod legitur: *Deus qui omnipotentiam tuam parcendo maxime & miserando manifestat.* Melius enim est iustificare, quam creare: cum creando detur natura, iustificando verò & auferatur culpa, & conferatur gratia. Ostende igitur Domine omnipotentiam tuam in me miserabili peccatore: vt quamdiu in præsentis sæculo militabo, victoriam de inimicis meis te adiuuante obtineam, quia non est alius qui pugnet pro me, nisi tu Deus meus, cui seruire, quem laudare cupio in sempiternum. Cui est honor & gloria in sæcula sæculorum. Amen.

CON-

CONTEMPLATIONES DE SEPTEM
donis Spiritus sancti contra septem
peccata mortalia.

CAPVT I.

*Prima contemplatio de dono timoris, contra
peccatum superbia.*

1.  ENI sancte Spiritus in animam meam peccatis diuersis miserabiliter tenebrescentem. Nam hostis iniquus vt facili- ter de peccato in peccatum ipsam præcipitaret, excæcavit in ea oculum rationis, vt sic capta per, exteriora vagando, in super- biam, quæ est principium omnis peccati erigeretur, & virtutes destrueret ac enervaret, & seipsam opponeret suo Creatori. Veni igitur sancte Spiritus, & emitte cœlitus in animam meam, donum timoris, quod est fundamen- tum omnis boni spiritualis, per quod ad cognitionem sui anima illustretur. Nam illuminata ex cogitatione & consideratione suæ fragilitatis, & culpæ ac vilitatis, ac diuinæ iustitiæ & seueritatis, humiliter, sicut decet, timens, parenti caput submittit & humiliat, ne lædatur. Mitte ergo sancte Spiritus in eam donum timoris, fundamentum omnis boni spiritualis, vt sic expel- latur & euanescat superbia, principium omnis mali. Nam nihil æquè effi- cax est ad gratiam promerendam & retinendam, quàm si in omni tempore coram Deo inueniatur anima non altum sapere, sed timere, quia scriptum est: *Timentis Deum non occurrent mala, sed in tentatione Deus illum conser- uabit, & liberabit eum à malo.* Eccl. 35.

2. Veni sancte Spiritus, & emitte donum timoris in animam meam, quia si praua mens mea, prius per timorem, non auertitur ab assuetis vi- tiis, non emendabor. Timor namque Domini expellit peccatum, & incipit operari omnium virtutum plenitudinem, dum per iustitiam desert maiori, per prudentiam non credit se sibi, per temperantiam refugit discernere, & per fortitudinem, totum se obedientem subdit, non ad discernendum, sed ad implendum. Timor Domini nubes carnalium delectationum & affectio- num fugat, & mentem serenat. Riuos concupiscentiarum restringit, reptilia vitiorum de terra corporis humani exterminat, Mare mundi congelando consolidat, vt per illum ambulare quis possit, nec admittit superbiam re- pletus timore Domini.

N

3. Veni Sancte Spiritus, mitte in me timorem qui est fons vitæ indeficiens, hominem glorificans, quia humilem spiritum suscipiet gloria, quia dum à vana & peruersa delectatione hominem cohibet, veram & æternam delectationem meretur; quam obrinere valeam, Sancte Spiritus, tua clementia operante, per infinita sæcula sæculorum. Amen.

CAPVT II.

De Dono pietatis, contra peccatum inuidiæ.

i. **V**eni Sancte Spiritus in animam meam peccatis afflictam, quia serpens antiquus qui bonis omnibus inuidet, & vult omnes esse socios suæ miseriæ, illam voluit sibi miserabiliter sociare, infundendo venenum inuidiæ, per quam mors intrauit in orbem terrarum, & quæ Cain armavit contra Abel, & filios Iacob contra Ioseph, & Iudæos contra Christum. Veni Sancte Spiritus, quia hac peste perfidus insidiator animam meam percussit, vt in malis alienis consolationem reciperem, vt in bonis alienis contristerer, nec ea possem directe respicere: & vnde bonus proficiebat, ego miser ex inuidia tabescebam.

2. Adiua me Sancte Spiritus consolator, mitte in animam meam donum pietatis, quæ malis alienis condolet, bonis verò alienis atque perfectionibus gaudet, & sic à tua affluentia gratia, per pietatem, ab anima mea expellatur misera inuidia. Mitte igitur, Sancte Spiritus, in animam meam donum pietatis, vt cogitem cum affectu de necessitatibus pauperum, de anxietatibus oppressorum, de perturbationibus tristium, de culpis delinquentium, & de omnibus ærumnis quorumcumque miserorum, etiam si fuerint inimici. Pietas namque hominem amabilem Deo facit, & diabolo displicibilem. Quia licet diabolus in multis respectu hominis excellat, in hoc tamen quod pietatem non habet, homo eum excellit.

3. Veni ergo Sancte Spiritus, confer mihi misericorditer pietatem quæ Deum placat, à seruitute diaboli liberat, à morte spirituali suscitatur, gratiam conseruat, hostem impugnat, quæ à Deo petuntur impetrat, amicos & adiutores homini multiplicat, in bono hominem roborat, Filium etiam Dei in mundum fecit descendere, & homines facit ad cælum ascendere. Veni Sancte Spiritus, da mihi ex tua clementia pietatem, vt per ipsam inuidia à me peccatore miserabili expellatur. Da mihi oleum pietatis in affectu, & effectu, sine quo non potest haberi ignis charitatis. O Sancte Spiritus, scio quod si eam mihi dederis, aliorum onera portabo, & tanto melius curram: quia ad beatitudinem perpetuam festinantiùs tendam, quam mihi concedere dignetur tua immensa bonitas per infinita sæcula sæculorum. Amen.

DE DONIS SPIRITVS SANCTI.

95

C A P V T I I I.

De Dono scientia contra peccatum iræ.

Veni Sancte Spiritus in animam meam quam hostis humani generis ex sua malignitate & calliditate, malignissime transfodit gladio iræ & furoris. Accendit namque suos stimulis iræ ad vindictam faciendam. Hæc ira frequenter cor meum miserum inflammavit, totum corpus meum tremere ex nimio furore fecit, linguam impediuit, faciem ignoscere fecit, & mentem meam miserabilem ad multorum malorum perpetrationem induxit, ideo à Deo elongatus fui, qui Deus pacis dicitur, non Deus iræ, non attendens quod sicut vnumquodque fugit suum contrarium, sic Deus qui est vera pax, fugit iram, & cor turbidum & iracundum. Ex hac ira, proximis meis fui inimicus, lædens eos non solum in rebus aut corporibus, sed etiam in fama, imò etiam primò meipsum læsi.

2. Veni ergo Sancte Spiritus, & imprime in animam meam iracundia plenam donum scientiæ per quod addiscam, & veraciter sciam qualiter, valeat conseruari in quiete mentis & tranquillitate pacis. In medio nationis prauæ & peruerse, amicabilem & gratiòse me in omnibus, & cum omnibus placabilem reddam, in omnibus me irreprehensibilem exhibeam, & inter alios conuersando iram & furorem totaliter sciam & valeam euitare. Veni Sancte Spiritus, confer mihi donum scientiæ, vt cognoscam infirmitates spirituales, & sciam discernere inter vitam veram & non veram. Vera vita est coniunctio mystica cum Deo, vel per gratiam, vel per gloriam.

3. Veni Sancte Spiritus dona mihi scientiam vt agnoscam vanitatem præsentis vitæ, quæ est vapor ad modicum parens; cognoscam amaritudinem & pericula ipsius; sciam spiritualem passionem præferendam esse corporali, & prius occurrendum esse damnis & molestiis spiritualibus, quàm corporalibus. Veni Sancte Spiritus, tribue mihi donum scientiæ; vt veraciter cognoscam deceptiones carnis, mundi, & diaboli quas faciunt amatoribus suis. Et sic iram mitigare in præsentem, vt indignationem æternam, te auxiliante, valeam euitare. Amen.

C A P V T I V.

De Dono fortitudinis contra peccatum Acedia.

Veni Sancte Spiritus in animam meam torpore & acedia plenam. Sic namque captiuat me malignus spiritus, quod ad exercitium bonorum operum surgere, quantum in eo est, non permittit: cui misera caro consentiens, animam meam languere facit: vt si libeat legere & orare, non delectet: neque aliqua bona meditari, nec inchoare, imò inchoata fastidit perficere. Et licet bonum propositum concipiam, tamen ad modicum ten-

N ij

tionis impulsus, acedia quadam languet, & à bono incepto per somnolentiam in indevotionem & tepiditatem desisto: non considerans quod pigros & otiosos, Dominus increpat, dicens: *quid hic statis tota die otiosi?* Et quod servus qui abscondit pecuniam domini sui, condemnatus fuit. Unde scriptum est, *per agrum hominis otiosi transiit, & per vineam stulti, & ecce totum replerant spinæ.* idest pravae cogitationes, & prava opera. Et ideo sequitur *quod desidia pigrum occidit*, id est prava cogitatio.

2. Veni igitur sancte Spiritus clementer ad animam meam, & concede donum fortitudinis quod me confortet in bonis inceptis consummandis: ne terra mentis meae, inculta remaneat, & germinet spinas & tribulos, sed dono fortitudinis sic eam cultuare digneris, ne actus proferat vitiosos. Veni sancte Spiritus, quia in campo certaminis huius mundi positus sum. Dona fortitudinem, ut malis resistendo viriliter, bona valeam operari, quia nec opus, nec ratio, nec scientia, nec sapientia erunt apud inferos quod ego propero. Expelle à me acediam & torporem, & da fortitudinem, sine qua necesse habeo tamquam infirmus incidere inter manus crudeles hostium antiquorum. Veni sancte Spiritus, quia anima mea egestate laborat, quia carne putrida obstante, renuit operari; scriptum est enim, *egestatem operata est manus remissa, manus autem fortium divitias parat.*

3. Tribue igitur mihi ex abundantia tuae bonitatis donum fortitudinis, quod regnum coelorum violenter ingreditur, sicut scriptum est, *regnum coelorum vim patitur, & violenti rapiunt illud*, hanc violentiam mihi concedere digneris, ut requiem habeam sempiternam. Amen.

CAPUT V.

De dono consilij contra peccatum avaritiae.

1. Veni sancte Spiritus in animam meam miserabilem, quae decepta per perfidos hostes suos, cogitur oculos & affectus declinare in terram, idest terrenorum amorem, cum continua miseria & labore divitias congregando, cum continua inquam miseria & dolore: quia scio quod veniet tempus dimittendi omnia congregata, & sic cum thesauro pecuniae thesaurum irae Dei, pariter cumulari. Unde cum peccatum reddat hominem promptum ad malum, & difficilem ad bonum, suo pondere inclinat semper ad terram, id est, ad terrenorum amorem. Quod expresse significatur in illa muliere de qua dicitur, *Ecce mulier quae habebat spiritum infirmitatis, & erat inclinata, nec poterat omnino sursum respicere.* id est, se ad desiderium caeleste erigere. Veni ergo sancte Spiritus, & corrobora animam meam morbo avaritiae languentem, dono consilij, quod est, *si vis perfectus esse, vade, & vende omnia quae habes, & da pauperibus, & veni, sequere me, & habebis thesaurum in caelo.* Vade ergo & vende omnia quae habes, & da pauperibus, in quo notatur terrenorum contemptus: Et veni, in quo notatur supernorum appetitus: *Et habebis thesaurum in caelo*: in quo notatur fructus & praemium consilij.

2. O Sancte Spiritus quàm nobile, quàm salubre, quàm vtile est consilium tuum, per quod thesaurus in terra corruptibilis facillimè deperditur, & thesaurus in cælo acquiritur vbi, fures non effodiunt, nec furantur, per quod transitoria in sempiternalia, temporalia in spiritualia commutantur. Veni igitur Sancte Spiritus, reple cor meum tuo dono consilij, quia sine te nemo bonus, neque potest aliquid supra naturam, nisi à te adiutus operari. Tu quidem das magnifica consilia, & recta. Talia fuerunt consilia quæ attulit in mundum istum sapientia Dei Patris Iesus Christus benedictus, de quo scribitur, *Vocabitur nomen eius admirabilis, consiliarius.* Istud est consilium pacis quod attulit rex pacificus de quo scribitur, *Qui sequuntur pacis* Prov. 12. *consilia, sequetur eos gaudium.* Consilium igitur pacis, est abrenuntiatio diuitiarum. Veni ergo Sancte Spiritus, & mitte in me donum consilij, vt contemnam terrena, & superna toto corde appetam, vt in fine vitæ meæ, gaudium obtineam sempiternum. Amen.

CAPVT VI.

De dono intellectus contra peccatum luxuriæ.

1. Veni sancte Spiritus in animam meam, quam carnalis delectatio luxuriæ inficit, & inquinat, intellectum deprimit & obnubilat, vt videre claritatem veri luminis non valeat; sed vnde fortius delectatur, inde ad superna caliginem patiatur. Sensum hebetat, & maculat voluntatem. Sicut enim caro nihil per se intelligit, vel potest intelligere, quia potius habet cogitationem animæ impedire, quia corpus quod corrumpitur aggrauat animam; sic ego miser cum sim totus caro, per peccatum carnalitatis, non valeo ad perscrutandum cælestia, mentem eleuare.

2. O quàm detestabile vitium, per quod homo perdit sensum, & sicut vinum & ebrietas, eum qui nimium bibit, mentis suæ inopem facit; ita fornicatio & voluptas pervertit sensum animi, quem debilitat, & de rationali homine, animal brutum facit; sicut scribitur, *Homo cum in honore esset, non intellexit comparatus est iumentis insipientibus, & similis factus est illi* Psal. 48. *de quibus dicitur. Putruerunt iumenta in stercore suo.* Quia quemadmodum putredo ob. 1. solet foetorem emittere, sic caro corrupta putredine luxuriæ, foetorem euaporat infamiæ. Hunc foetorem non valens Deus sustinere, decreuit omnem carnem diluuij aquis perdere dicens. *Non permanebit spiritus meus in homine in æternum, quia caro est.* Quæ tunc maximè fœtebat, quia omnis caro cor- Gen. 6. ruperat viam suam super terram. Ad corruptionem ergo & foetorem ablendum & remouendum, Dominus diluuium transmisit, luxuriosos subuertit, quinque ciuitates igne & sulfure combussit.

3. Veni ergo Sancte Spiritus in animam meam per donum intellectus, quod circa æterna & spiritualia versatur, vt per inuestigationem, & per contemplationem eorum, spiritualis creatura iuuetur, & surgat quodcumque possibile est in contemplationem, & cogitationem ipsius munditiæ.

N iij.

Oculus animæ meæ lapsus est, propter peccatum carnis, nec potest claras, & nobiles creaturas cernere spirituales, & multominus possit creatorem cognoscere. Veni Sancte Spiritus purifica & clarifica oculum animæ meæ, ut possit intelligere mirabilia cœlestis curiæ, quantum est fas dicere, & sicut verus pullus aquilæ, possit respicere Solem iustitiæ in rota sua; id est in æternitate sua quæmadmodum rotæ carent principio & fine. Munda igitur me Sancte Spiritus dono intellectus, ne per corpus miserum, anima corumpatur, sed viuat foeliciter in æternum. Amen.

CAPVT VII.

De Dono sapientiæ contra peccatum gula.

1. **V**eni Sancte Spiritus in animam meam, oppressam per gulam quæ facit ut mihi dulcescât terrestria, & amarescant cœlestia, quia palato non bene sano, bona & bene sapida non bene sapiunt. Gula supra modum venatrix est deliciarum quas licere putat & expedire. Quidquid illud sit quod eam delectare possit, voluptati seruire semper desiderat. Aër, mare, & terra, vix ei sufficiunt. Propter hoc contingit interdum pauperes spoliari, & rapinas fieri, ut fames pauperum transeat in delicias diuitum. Nam regnum Dei non est esca neque potus, non purpura, neque byssus, quia diues ille utroque circumfluens, in puncto ad inferna descendit. Sicut enim ignis & aqua simul esse non possunt, sic spirituales & carnales delitiæ in eodem se non patiuntur. Et ubi curiosa ciborum diuersitas pascit ventrem, cœlestium ieiuna desiderat mens. Et sic dulcedinem cœlestem non sentit neque per amorem & dulcedinem degustat, quia multam dulcedinem, & multam suauitatem in rebus humanis intuenit. In ipsis quoque plurimum se delectat. Dulce namque est esse in rebus humanis. Ideoque de cœlestibus gaudia nulla gustabit, quia quanto minus æterna intelligit, tanto delectabilius in temporalibus requiescit.

2. Veni sancte Spiritus in animam meam per donum sapientiæ, prout sapientia dicitur à *Sapore*, ut sit sapientia *Sapida scientia*, nam mentis visio est intelligentia, & gustus sapientia. Illa contemplatur, & ista delectatur. Veni Sancte Spiritus, & mitte donum sapientiæ in me, ut prioris vitæ desiccam peccata, huius miserabilis vitæ desideria, & delectabilia transitoria parvipendam, & æternam beatitudinem toto desiderio concupiscam, & sic istam sapientiam super me clementer effundas, ut prædictorum singula prout sunt mihi sapiant, te iuuante: ut tota die, corde, & mente humiliter & deuotè clamem ad Dominum, & dicam, *O quam bonus & quam suauis est spiritus in nobis Domine. Qui respondens dicat, Spiritus meus super me dulcis, & hereditas mea super me & fauor.*


3. Veni ergo Sancte Spiritus per donum sapientiæ, ut anima mea sentiat aliquam scintillam prædictæ dulcedinis, ferueatque desiderio: ut quod ei dederis ex tua benignitate ac bonitate aliquo modo degustandum in via, plenius & copiosius possideat in patria cœlesti. Amen.

CONTEMPLATIONES QVOD

Spiritus Sanctus adiutor est animæ.

CAPVT I.

*Quod Sanctus Spiritus soluit peccati vincula & agendi
vigorem præbet.*

1.  ENI Sancte Spiritus in animam meam impotentem ad aliquid boni operandum. Nam frequenter ligatur ab hoste antiquo, multiplici vinculo peccatorum, & ab ipso trahitur, nunc fune peccati consensionis, nunc fune peccati verbalis, nunc fune peccati operationis, & quia *Funiculus triplex difficile rumpitur, Eccl. 4.* Istum funiculum vel potius istos tres funes misera anima mea disrumperere aut euadere per se non potest, nisi tuo auxilio, Sancte Spiritus, adiuuetur, & tu in ipsam descendens, huiusmodi peccatorum funes dissolvas.
2. Veni igitur Sancte Spiritus qui *Donum Dei altissimi*, nuncuparis. Donum in quo omnia dona donantur, Donum inquam, non temporale, sed æternum, non commutabile sed perpetuum, non paruum aut limitatum, sed immensum; nihil isto dono sublimius, nihil nobilius, nihil melius, quia est in Patre & in Filio consubstantiale, & coæternum & coæquale, sicut fides catholica confitetur. Istud donum pete fiducialiter, & require o anima mea: ipsum dilige totis affectibus, ipsum affecta totis præcordiis, vt tua impotentia eius fortitudine roboretur, tua indecentia sua pulchritudine decoretur, & ignorantia sui sensus magnitudine illustretur.
3. Veni Sancte Spiritus, dissipa, & consume funes, & ligamina quibus ligata est anima mea misera, & sicut ad ardorem ignis materialis fila stupea de facili comburuntur, & in cineres rediguntur, sic ad ardorem tuum, Sancte Spiritus, qui in specie ignis in Apostolos descendisti, vt ipsorum corda ad tui dilectionem inflammares omnia peccatorum meorum vincula citissime destruantur, & consumantur, nec patiaris animam meam esse amplius otiosam; sed potius manum tuam, hoc est gratiam, ei infundendo, suam impotentiam adiuuare digneris, & ipsam instigare & stimulare ad operandum strenue. Quamto manum tuam laxabis amplius, id est gratiam tuam abundantius infundes, tanto facies animam ipsam abundantius operari.

4. Veni Sancte Spiritus in me clementer, qui remissionem peccatorum operaris, qui facis sollicitum ambulare cum Deo, qui scrutaris profunda peccatorum meorum, qui discretus cogitationum indagator, cordis scrutator es, qui nec minimam paleam intra cordis quod possides habitaculum permittis: munda & adiuua cor meum, vt tibi seruiat in æternum. Amen.

CAPVT II.

Quod Spiritus Sanctus iuuat in debellandis animæ hostibus.

1. **V**eni Sancte Spiritus in animam meam, ab hostibus malignis diuersimodè obsessam, imò non solum obsessam, sed etiam oppugnatam, & miserabiliter captiuatam; scilicet à carne, mundo, & diabolo. Isti tres inimici, magnæ sunt potestatis, & magnæ dolositatis. Sunt fortissimi, & tantæ fortitudinis, quod de fortitudine cuiuslibet eorum potest intelligi quod scribitur, *non est potestas super terram, quæ possit ei comparari.* Sunt etiam malitiosissimi, & dolositæ & fraudulentia semper vtuntur: in expugnatione animæ meæ miseræ Gladiis armantur venenatis, & statim dum cutis fuerit aliquantulum perforata, anima mea misera læditur, vulneratur. Caro impudica impugnat animam meam acuto veneno carnalitatæ & immunditiæ; mundus percutit animam iaculo venenato cupiditatis, & auaritiæ. Et diabolus inuadit eam iaculo venenato vanitatis & superbiæ.

2. Ecce ergo ô Sancte Spiritus quor gladij venenati sunt, & quàm citò cutis mea ab ipsis perforatur; id est cum peccatis per malitiosam suggestionem supradictorum inimicorum, progreditur; tam citò vulnus mortiferum animæ meæ datur. Scio quod eorum potentia, & fraudulentia resistere non possum, nisi tuo auxilio sim fulcitus, vnde scribitur, *Spiritus Domini irruit in Sansonem, & dilacerauit leonem;* qui est animal feritissimum, rapacissimum, & ferocissimum. Per leonis namque feritatem designatur luxuria, & tamen dicitur Sanson virtute Spiritus Domini leonem lacerasse. Intelligitur fidelis anima in virtute tua, Sancte Spiritus, suos aduersarios fortissimos & fraudulentissimos superasse.

3. Veni igitur Sancte Spiritus, qui ex immensitate bonitatis tuæ in anima in qua tibi habitaculum elegisti, stare non pateris nimiam rubiginem peccati, quin eam statim igne subtilissimæ circumspectionis exuras, qui ex dulcedine & suauitate tui amoris, nostram voluntatem erigis, dirigis, & trahis ad tuam, vt eam veraciter intelligere, & feruenter implere possimus, sicut scribitur, *Hæc autem omnia operatur vnus & idem spiritus,* digneris clementer auxiliari mihi in bello assiduo existenti, & aduersariis resistere per me non valenti, vt hostibus te miserante, deuictis, regnum consequar sempiternum. Amen.

CAPVT

*Quod Spiritus Sanctus varia omnino operatur
adiuuans animam.*

1. **V**eni, Sancte Spiritus, in animam meam, quia cum sis admirabilis, in omnibus mirabiliter operaris; nam de nihilo creas, de perduto re-creas, de destructo reformas. Ideo de te scribitur, *Spiritus Domini omnium* Sap. 4.3. *est artifex, omnem habens virtutem, omnia perficiens*, immutans ad perfectam conuersationem peccatores, & iniustos ipsos mirabiliter conuertens, sicut patet in Petro, Paulo, Dauide, & similibus qui per te conuersi, subito in aliud sunt mutati.

2. Tu Sancte Spiritus, habes virtutem eleuatiuam, eleuas namque ad contemplanda & desideranda celestia, sicut scribitur, *Eleuauit me Spiritus, intro duxit me in portam orientalem.* Tu Sancte Spiritus habes virtutem contemplatiuam, contemplaris enim diuersas sectas ad veritatem Dei perducendo, & diuersa corda ad vnitatem amoris inducendo, sicut præcipitur, *Solliciti seruire vnitatem spiritus in vinculo pacis.* Tu Sancte Spiritus habes virtutem conseruatiuam, quia conseruas in bono perseverare faciendo, & ab hostiū temptationibus defendendo, sicut scribitur, *Numquid abbreviatus est spiritus Domini ut saluare non possit?* Tu Sancte Spiritus habes virtutem illuminatiuam. Illuminas enim mentes gratis tuis, ipsas inspirando sicut scribitur, *Spiritus veritatis, quem mittet Pater in nomine meo, ille vos docebit omnia & suggeret vobis omnia quaecumque dixerō vobis.* Et breuiter, tu Spiritus Sancte es sic admirabilis, & habes tot effectus & tot virtutes, quod etiam mortuos, id est obstinatos peccatores, ad vitam gratiæ suscitās, & in bono stabili confortas.

3. Veni ergo Sancte Spiritus misericorditer in animam meam, quam inuitare digneris ad perfectam conuersionem; eleua ipsam per æternorum affectionem, copula ipsam per amoris vnitatem; conserua eam per bonorum perseverantiam; renoua eam per virtutum redolentiam; illumina eam per gratiarum & donorum tuorum gratuitam largitionem, & cum misera caro superata fuerit, ad regnum ipsam perduc æternum. Amen.

Quod Sanctus Spiritus est ductor, doctor, tutor, rector, corrector, pastor & consolator animæ.

1. **V**eni Sancte Spiritus in animam meam tuo auxilio indigentem, sine quo vivere non valet, quia tu es ductor ad gubernandum, doctor ad informandum, tutor ad protegendum, rector ad corrigendum, pastor ad nutriendum, consolator ad mitigandum, mediator ad concordandum, roborator ad solidandum.
2. Tu Sancte Spiritus admirabilis es, & in rebus mirabiliter operaris. Habes namque officium ductorum: quia sicut ventus ducit naues ad portum, sic tu ex immensa clementia tua ducis animas ad paradysum, quia de te scriptum est, *Spiritus tuus bonus deducet me in viam rectam*. Tu Sancte Spiritus habes officium doctorum, quia ex immensitate tuæ bonitatis, doces & instruis in veritate animas: sicut scribitur, *Spiritus veritatis docebit vos omnem veritatem*. Tu Sancte Spiritus habes officium tutoris & defensoris: idcirco eas adiuuas ne ex tanta infirmitate corruant in æternum. Tu Sancte Spiritus officium rectoris habes & correctoris. Corrigis namque aduersarios animarum nostrarum, ne ipsas deiciant, aut prosternant. Ideo scriptum est, *Dominus Iesus Christus Antichristum interficiet spiritu oris sui*. Tu Sancte Spiritus habes officium pastoris & nutritoris, quia nutris & pascis animas nostras famelicas. Ideo scribitur *Spiritus meus super mel dulcis, & hereditas mea super mel & fauam*. Tu Sancte Spiritus officium habes consolatoris, quia nominaris Paraclitus, qui interpretatur consolator, ideo cantat Ecclesia, *Consolator optime, dulcis hospes animæ, dulces refrigerium*.
3. *O quam bonus est Domine Spiritus tuus in nobis!* Tu Sancte Spiritus habes officium ordinatoris, quia scriptum est, *à modo iam dicit Spiritus ut requiescant à laboribus suis, opera enim illorum sequuntur illos*. Veni ergo Sancte Spiritus in animam meam in qua exercere digneris misericorditer, tua officia, quibus mediantibus, viuat in præsentia anima mea per gratiam, & in futuro te auxiliante, gloriam percipiat sempiternam. Amen.

Quod Spiritus Sanctus est Spiritus inspirans, aspirans, vegetans, & persflans animam.

1. **V**eni Sancte Spiritus in animam meam, spira in eam, quia tu spiras ubi vis, cui vis, quantum vis, tempore quo vis, sicut enim ventus, ita, es subtilis, & penetratiuæ naturæ, quæ ubicumq; inuenit foramen apertum

DE SPIRITU S. ADIVTORE.

103

quamquam sit modicum intrat, & spiritus etiam corporis, per occultas venas, & arterias corporis se diffundit, & ubique sensum & motum facit, & infundit, sic tu o Sancte Spiritus, ita labilis es, & penetratiua naturæ, quod ubicumque foramen cordis tibi per affectum aliquantulum aperitur, statim subintrat, & te mentibus hominum præsentat, & eis sensum contritionis, & motum bonæ operationis ministras. Spiritus namque dicitur à spirando, spirare autem nihil aliud est, quàm flatum ab ore emittere. Et idèd, tu Sancte Spiritus, es flatus ab ore Patris & Filij procedens, qui nobis insufflans & inspirans, doces & instruis, & reuelas illa quæ pertinent ad salutem, quia de te scribitur, *Spiritus ubi vult spirat, & vocem eius audis.* Io. 11. 3.

2. Tu Sancte Spiritus, es legatus à sede Patris & Filij quotidie veniens, & vocem tuam nobis insinuans, ac in illis quæ ad salutem pertinent nos informans, quod benè ostendisti in Apostolis qui per perceptionem tuam, omnium genera linguarum sciuerunt, & donum prophetiæ acceperunt, & variis linguis Dei magnalia retulerunt, vnde scribitur. *Ceperunt loqui variis linguis Apostoli prout Spiritus sanctus dabat eloqui illis.* Et, aliis datur per Spiritum sermo scientiæ secundum eundem spiritum. Et, *diuisiones sunt gratiarum,* 1. Cor. *unus autem Deus, hæc autem omnia facit unus atque idem spiritus diuidens* 12. *singulis prout vult.*

3. Tu Sancte Spiritus per gratiæ distributionem, habes vegetare & viuificare, quia sicut Spiritus corporis, corpus vegetat, atque viuificat, & admodum disponit & ædificat: sic tu Sancte Spiritus animam cui per gratiam te infundis, spiritualiter viuificas, & ad motum bonorum operum disponis & aptas. Ideo scribitur, *dabo vobis spiritum, & viueris.* O Sancte Spiritus, homo spiritualiter viuere non potest, neque bonorum operum motum exercere sine te. Veni igitur Sancte Spiritus in animam meam. Inspira in eam ex magnitudine tuæ clementiæ, spiraculum vitæ; vt uiuat spiritualiter perfla eam misericorditer; igne tui amoris continuè accendatur, per quem ipsa meritoria exercendo, ad gloriam perueniat sempiternam. Amen. Exech. 37.

CAPVT VI.

Quod Sanctus Spiritus animam erigit & stabilizat.

1. VEni Sancte Spiritus in animam meam collapsam, tu qui es verus releuator & sustentator animarum. Sicut enim Spiritus corporis facit stare, durare, ac perseverare, quod pater, quia corpus sine spiritu non potest stare, imò necesse habet cadere vel iacere; durare etiam non potest, quia citò habet corrumpi & putrescere, & fætere; sic vere tu Sancte Spiritus facis homines stantes & perseverantes, fortes, durabiles, & constantes. Quemadmodum ignis vasa fictilia & lutea decoquendo, stabilia facit atque dura Illud apparuit in Apostolis qui ante tuum aduentum erant lutei, timidi atque fragiles: sed postquam igne tuo, Sancte Spiritus, fuerunt afflati, facti sunt stabiles & audaces.

O ij

2. O Sancte Spiritus, anima sine te non potest stare, imò habet cadere & corrumpi, per peccatum, & fœtere horribiliter in conspectu diuinæ maiestatis. Tu igitur causa es stabilitatis ipsius; sicut scribitur *ingressus est in me spiritus, & statuit me supra pedes meos*. Tu Sancte Spiritus per contemplationem habes subleuari, quia cum ex benignitate tua habitas in homine, non permittis eum inferius in terrenis commorari. Imò facis eum sursum ad contemplandum cœlestia subleuari. Ignis namque fauillas, & ventus paleas eleuant. Sic etiam ille, qui igne & flatu tuo Sancte Spiritus, motus fuerit, statim & ad contemplandum cœlestia subleuatur, sicut scribitur, *leuauit me Spiritus, & assumpsit me*.

Ezech.
43.

3. Tu Sancte Spiritus habes tot effectus mirabiles & stupendos, qui non possunt ab homine declarari, idè de te scribitur quod *tu es Spiritus intelligentia, Spiritus multiplex, vnicus, subtilis, modestus, discretus, mobilis, incoinquinatus, castus, amans bonum, humanus, benignus, stabilis, securus, omnem habens virtutem, omnia prospiciens*. Veni ergo Sancte Spiritus in animam meam, fœrentem propter diuersa peccata. Munda eam flatu & igne tui amoris, fac eam stare ne cadat, sed sit stabilis, & constans, eleua eam flatu tuæ dulcedinis ad contemplandum cœlestia, ne ampliùs in terrenis moreretur, sed tecum maneat in æternum. Amen.

Sap. 7.

CAP V T V I L

Quod Sanctus Spiritus non ad credendum tantum, sed etiam ad agendum iuuat animam.

1. V Eni Sancte Spiritus in animam meam tepidam circa agenda: tu namque, Sancte Spiritus, sciens non sufficere homini, si habeat lumen sufficiens ad intelligenda & credenda, nisi etiam habeat ad agenda, quia non pretiabitur quis plus alio propter maiorem notitiam occultorum, vel etiam credendorum, nisi si possit, habeat maiorem numerum operum sanctorum, loquendo de parte exteriori vel interiori, quia scribitur, *Opera enim illorum sequuntur illos*. Quod non dicitur de scientia, vel fide nudata operibus: quia talis est mortua; idè tu Sancte Spiritus, consolator piissimus, & amator intimus, non solum illuminas hominem & dirigis in intelligendis, & credendis; verum etiam in agendis, idcirco scribitur de te, *Cum venerit ille docebit vos omnem veritatem*: omnem scilicet, quoad intelligenda, credenda, & agenda.

Ioan. 16.

2. Quæ quidem agenda vtilia sunt, quando eliguntur secundum rationem, non secundum sensualitatem, quando etiam moderantur secundum discretionem: vt scilicet non minus vel plus quàm oportet aliquis operetur: & quando ordinantur per intentionem, vt scilicet non operetur quis propter inanem gloriam, sed propter Deum, & propter bonum exemplum proximo dandum, plurimi enim salui facti sunt aliorum exemplo quia pro

DE SPIRITU SANCTO ADIVTORE. 105

pter exempla aliorum moti fuerunt ad poenitentiam faciendam, & ad exercitium bonorum operum; propterea dicebat Christus, *Exemplum dedi vobis, ut quemadmodum ego feci, ita & vos faciatis.* Vel etiam per studium deuotæ orationis, sicut enim abundantes in temporalibus, debent per elemosinas subuenire pauperibus; sic etiam homo abundans in gratiis, & illuminationibus tuis, Sancte Spiritus, debet peccatoribus subuenire suis orationibus. Tales enim Dominus confuevit exaudire, sicut scribitur. *Orationes pauperum exaudiet Dominus.*

3. Veni igitur Sancte Spiritus in animam meam, negligentem aliqua bona operari, illumina eam, ut non solum intelligenda & credenda intelligat, sed etiam ne ad agenda tepescat: excita eam & roborata virtute tua, Sancte Spiritus, ut viriliter & assidue, virtuosa, & meritoria, ac tibi placita operetur: ut in præfenti ad honorem & gloriam tuam viuendo, in futuro regnum consequatur æternum. Amen.

CAPUT VIII.

Quod Spiritus Sanctus replet animam sanctitate & veritate.

1. **V**eni Sancte Spiritus, in animam meam tua gratia vacuam, reple eam digneris tu qui reple orbem terrarum. Tu Sancte Spiritus reple cælum & orbem terræ maiestate, sicut de te scribitur, *Cælum & terram ego impleo.* Cælum namque impleo, hoc est deitatem quantum ad personarum numerum, quia in diebus non est perfectus numerus, qui debet habere medium, primum & postremum. Et sic est in tribus personis, in quibus sunt primas, medianitas, & postremitas. *Ieremia. 23.*

2. Tu Sancte Spiritus terram reple, quia sicut humanus spiritus præsens est omnibus membris corporis, sic tu Sancte Spiritus præsens es omnibus mundi partibus, sicut scribitur, *Si ascendero in cælum tu illic es, si descendero in infernum ades.* Tu Sancte Spiritus orbem terræ reple sanctitate videlicet quosdam sanctificatione sufficienti. Et sic sanctificas peccatorem, cum culpam sibi remittis; de qua sanctificatione scribitur, *In sanctitate & iustitia coram ipso omnibus diebus nostris.* Tu Sancte Spiritus quosdam sanctificas sanctitate abundanti, sic sanctificas iustum cum gratiam sibi auges. Sanctificas etiam sanctitate excellenti, & sic iustificatus est Christus, de qua sanctificatione scribitur, *Impleatur visio & prophetia & ungetur sanctus sanctorum.* Dicitur enim Christus, *Sanctus Sanctorum*, quia excellit omnes in sanctitate & gratia, sicut scribitur, *Non enim ad mensuram dedit Spiritum Deo Filio.* Tu Sancte Spiritus reple orbem terræ veritate, quæ triplex est. Reple namque veritate cognitionis, dum nos illuminas contra ignorantiam, de qua scribitur, *Veritatem medietur guttur meum.* Tu Sancte Spiritus reple veritate loquutionis, cum nos regulas contra fraudulentiam unde scribitur, *Et non auferas de ore meo verbum veritatis usquequaque.* Reple etiam veritate fruitionis, dum nos glorificas contra miseriam sicut *Dan. 9.*
Ioan. 3.
Prov. 8.
Psa. 118.

O iij

Ioan. 8. Scribitur, *Cognoscetis veritatem & veritas liberabit vos*, scilicet veritas æterna, quæ visa, cognita liberat à præsentī miseria, & latiat in gloria, quia *hec est vita æterna ut cognoscant te, & quem misisti Iesum Christum.*

Ioan. 17. 3. Veni igitur Sancte Spiritus in animam meam, & reple eam dignis sanctitate sufficienti, & abundanti veritate cognitionis & loquutionis, ut in futurum te miserante repleatur veritate fruitionis diuinæ. Amen.

CAPVT IX.

Quod Sanctus Spiritus est ignis altaris nostri.

1. **V**eni sancte Spiritus in animam meam, ut corde humiliato & deuoto dicere possim, *Ignis in altari meo ardebit, quem mittet sacerdos ligna* *Leuit. 6.* *submitrens manū per singulos dies.* Tu Sancte Spiritus es iste ignis: qui es perpetuus, quia numquam deficiis quantum in te est in altari. Altare istud est anima mea, cor nostrum, spiritus noster rationalis. O altare dignissimum, quia in honore Trinitatis increata est consecratum à summo Pōtifice. Nam *creauit Deus hominem ad imaginem & similitudinem suam*, quantum ad animam, in qua secundum suarum trinitatem potentiarum, trinitatem expressit personarum. O altare sanctissimum, o altare cum omni diligentia mundissimè seruandum, & idè cor tuum puræ conscientie est inuoluendum, ne cogitatione sordida, fœtida, consensu vitioso, opere nefario polluat. In hoc altari debemus offerre sacrificium iustitiæ, oblationes misericordiæ, holocausta orationis, vitulos mortificationis carnis. In sanctissimo atque dignissimo altari debet ignis accendi.

2. Sed tu, Sancte Spiritus, facis per gratiam, ut cum Propheta quisque dicat, *Concaluit cor meum intra me, & in meditatione mea exardescet ignis.* Sic igitur Sancte Spiritus, cum cor accensum fuerit, mittendus es. Idcirco sequitur, *Quem mittet sacerdos subiiciens ligna.* Ignis fomentum quærit & ardet, & sicut fomentum ignis materialis, est suppositio lignorum; sic fomentum tuum Sancte Spiritus, est rememoratio diuinorum beneficiorum. Ad te igitur Sancte Spiritus intuendum est. Primò debet anima cogitare beneficium creationis, quod producta fuit de nihilo, & diuina imagine insignita. Secundò recogitare debet beneficium dominationis, quod accepit rerum omnium obsequia, in suo multiplici iuuamine. Tertiò recogitare debet beneficium recreationis: quod fuit Dei pretioso sanguine redempta, hoc super omnia tibi Sancte Spiritus, tribuit in anima nutrimentum. Recogitet etiam alia infinita beneficia, quæ præ multitudinem numerati non possunt. Et hoc facit *manè*, id est ante omnia & *per singulos dies*, id est sine obliuione, & secundum quod plura cogitabit, secundum hoc te, Sancte Spiritus, amplius confouebit, quia scriptum est, *Secundum ligna sylvarum exardescet ignis.* *Ecd. 18.*

3. Veni igitur Sancte Spiritus ad hoc altare, id est animam meam, &

DE SPIRITU SANCTO ADIVTORE. 107

concede mihi ex tua clementia gratiam, ut intus te tenere valeam per praedictorum beneficiorum recordationem continuam, ut gloriam obtineam sempiternam. Amen.

CAPVT X.

Quod Sanctus Spiritus dat sensum, loquelam & motum animæ.

1. **V**eni Sancte Spiritus in animam meam, tu qui es dulcissimus conseruator. Vnde sicut Spiritus creatus corpori confert sensum, quia sine spiritu corpus non sentit; dat verbum, quia sine spiritu non loquitur; dat etiam motum, quia sine spiritu non mouetur; dat etiam statum, quia sine spiritu non potest stare. Ita sine te Sancte Spiritus, homo spiritualiter non sentit, nec loquitur, nec mouetur, nec stare potest. Vnde tu Sancte Spiritus animabus das sensum charitatis, non carnalitatis; verbum veritatis, non vanitatis; motum sanctitatis non confusionis, statum firmitatis, non leuitatis. Das etiam castitatem in corpore, veritatem in ore, motum in bono opere, & perseverantiam in continuatione. Et sic facis amare feruenter, loqui veraciter, operari innocenter, & continuare perseveranter.

2. Facis enim tu, Sancte Spiritus, amare feruenter, sicut patet; quia omne agens siue naturale, siue artificiale, intendit semper imprimere similitudinem suam in his quæ agit. Ignis enim calidus est in forma sua, & ideo in illud in quod agit, calorem suum imprimat. Ita in artificialibus quoque Carpentarius similitudinem suam, quam habet in mente, siue in imaginatione, imprimat in arca, siue in alia materia in qua operatur. Tu vero Sancte Spiritus, amor es Patris & Filij Ergo in illos in quos agis, vel in quibus habitas, habes imprimere similitudinem tui amoris, ut homo per amorem efficiatur Deiformis. Facis igitur tu Sancte Spiritus amare feruenter. Et ex hoc aufers ardoris oppositum, quod est peccatum: quia tu adueniens in animam tollis peccatum ab ea Sicut enim ardor ignis auferat rubiginem de argento, item ardor solis auferat lutositatem de terra, aqua fontis auferat sordorem corporalem; Ita tu, Sancte Spiritus, aufers sordes peccati, & ideo dicitur, *Ioannes baptizauit aqua, vos autem baptizabimini Spiritu Sancto*, scilicet qui auferat peccatum. Ador. 1.

3. Veni ergo sancte Spiritus in animam meam, quæ sine te non sentit, sine te non loquitur, sine te non mouetur, sine te stare non potest. Aufer ab ea peccatum, & da ei sensum caritatis, ut amet feruenter verbum veritatis, ut loquatur veraciter motum bonæ operationis, ut operetur innocenter statum firmitatis, ut tibi seruiat in æternum. Amen.

*Quod Sanctus Spiritus dat medicinam, tutelam, & cautelam
contra peccata.*

1. **V**eni Sancte Spiritus, in animam meam graui infirmitate oppressam, tu qui es medicus animarum potentissimus. Das enim poenitendi medicinam contra peccata praterita, sicut scribitur, *lex Spiritus vita, liberauit me à lege peccati & mortis.* Tu Sancte Spiritus, das medicinam & intelligentiam contra peccata presentia, vt non veniant in nobis. Nam sine te Sancte Spiritus, vix potest diu esse homo qui non cadat in peccatum, quia peccatum quod per poenitentiam non diluitur, mox suo pòdere ad aliud trahit. Et quandiu est in peccato homo, seruus est diaboli atque peccati, & trahit ipsum peccatum. Sed tu Sancte Spiritus, liberum facis hominem ne cadat in peccatum, & ideo scribitur, *ubi Spiritus Domini, ibi libertas.* Tu Sancte Spiritus das medicinam, & cautelam contra peccata futura, quia sicut prudentia carnis mors est, ita spiritus est vita; & ideo dicit scriptura, *Spiritu ambulate, & desideria carnis non perficietis,* peccata mortalia perpetrando.
2. Tecum ergo, Sancte Spiritus, ambulare debemus, ne peccatum perpetremus: quia *Spiritus concupiscit aduersus carnem, & caro aduersus Spiritum, & hac sibi adinuicem aduersantur, vt non quaecumque volumus faciamus.* Habemus namque, Sancte Spiritus, hostem domesticum, scilicet carnem miseram quæ semper aduersatur, & contrariatur animæ, ex quo vniuntur in vna persona. Et hæc contrarietas prouenit, quia caro est naturæ terrestris, spiritus autem est naturæ cælestis, & quilibet trahit ad suam nationem. Vnde caro trahit inferiùs, & spiritus trahit superiùs. Et ideo fortis est pugna, vt non quaecumque volumus, faciamus; quia si facimus mala, spiritus non vult. Et si facimus bona, caro non vult.
3. O Sancte Spiritus, tu qui es deffensor animarum doctissimus, adiuua animas nostras in ista pugna periculossima, vt contra omnes hostes animarum nostrarum pugnemus fortiùs, vincamus securiùs; perseueremus firmiùs, videamus clariùs, eleuemur altiùs, amemus ardentius, proficiamus ampliùs, armemur virtuosiùs, & obediamus perfectiùs.
4. Veni igitur, Sancte Spiritus, in animam meam, custodi eam ab hostibus suis, ne ei nocere possint; da ei medicinam poenitentiae contra peccata praterita, tutelam contra peccata futura, vt ad gloriam perueniam sempiternam. Amen.

Quod Spiritus S. calefacit & habitum vestimenve dat animæ.

1. **V**eni Sancte Spiritus in animam meam tu qui es ardor calefaciens animas. Sicut enim corpora superiora, sicut Sol cuius lumina irradiant corpora inferiora mediante luce generat in eis calorem, ut ubi plus est de luce, ibi plus sit de calore, & ideo in æstate quærimus umbram, quia ibi est minus lucis, & per consequens minus calor. Ita tu Sancte Spiritus illuminans in aduentu tuo, generas calorem charitatis in animabus sicut scribitur, *Charitas Dei diffusa est in cordibus nostris, per Spiritum Sanctum Rom. 5. qui datus est nobis.*

2. Deinde quemadmodum habitus corporalis, ad tria accipitur à nobis, scilicet ad ornamentum formositatis, ad usum necessitatis, & ad signum discretionis; sic in religiosis similiter habitus charitatis qui à te Sancte Spiritus nobis datur, ad tria spiritualiter valet, nobis ad ornamentum formositatis, quia Charitas est forma virtutum, & quicquid est in anima siue potentia, siue virtutis, siue opera, quæ procedunt ab anima, nisi formentur habitu charitatis, infirma sunt nec habent meritum vitæ æternæ. Et ideo scribitur, *Spiritus Domini ornavit celos*, id est, viros cælestes: cælum enim *Iob 26.* habens puritatem in materia, speciositatem in forma, sublimitatem in situ, & utilitatem in effectu: Ita viri cælestes, & Deum timentes, habent puritatem in affectione, speciositatem in conversatione, sublimitatem in contemplatione, & utilitatem in aliorum edificatione. Secundò valet nobis habitus charitatis ad usum necessitatis: quia quantumcumque sint opera bona sine charitate, non sunt meritoria vitæ æternæ, siue sint ieiunia, siue orationes, siue eleemosynæ; quia regnum Dei non est esca, neque potus, sed iustitia, pax, & gaudium in Spiritu Sancto. Tertiò habitus charitatis valet nobis ad signum distinctionis quia sicut per habitus varios distinguuntur homines; ita per habitum charitatis distinguuntur Filij Dei, à filiis diaboli. Unde scribitur, *Sic nos existimet homo, sicut ministros Christi, in multa patientia, in ieiuniis multis, in Spiritu Sancto, in charitate non ficta.* *1. Cor. 14.*

3. Veni igitur Sancte Spiritus in animam meam, à qua auferre digneris ex immensitate bonitatis tuæ, amoris oppositum, & conferre digneris amoris habitum; ut tuo amore fruatur in æternum. Amen.

Quod Spiritus est pignus æternæ hereditatis.

1. **V**eni Sancte Spiritus in animam, & da ei præmium amoris tui, scilicet hereditatem æternam, quia tu Sancte Spiritus es pignus hereditatis æternæ, & tantum est pignus quanta hereditas. Veni ergo Sancte

Eph. 1. Spiritus in animam meam, quia sic certus ero de hereditate habenda, unde de te scribitur, *credentes signatis estis promissione Spiritus Sancti, qui est pignus hereditatis.* Et, ipse Spiritus reddit testimonium Spiritui nostro, quia sumus *Filij Dei, & heredes.*

2. Tu Sancte Spiritus ex magnitudine clementiae tuae, procura nobis hanc hereditatem tuam, in qua est vita sine morte, dies sine nocte, gaudium sine merore, iucunditas sine dolore, tranquillitas sine labore, fortitudo sine debilitate, rectitudo sine perversitate, pulchritudo sine deformitate, veritas sine falsitate, charitas sine invidia, felicitas sine miseria. Tu Sancte Spiritus ad hoc ut homo tantam hereditatem percipiat facis eum loqui in confessione ut pacificetur, quia sicut ventus pacificat aera, ita confessio pacificat corda. Vnde scribitur, *a quatuor ventis veni Spiritus, & susfla supra interfectos istos.* Quatuor venti sunt quatuor affectiones animae, videlicet dolor, gaudium, timor, & spes. Dolor est de culpa, gaudium est de venia, timor de iustitia, & spes de misericordia. Tu Sancte Spiritus virtute tua nociua purgas, sicut scribitur, *Spiritus purgavit peccata illius.* Quia facit loqui veraciter in confessione. Vnde Iob dicebat, *Memento mei Domine quia ventus est vita mea;* & post sequitur, *quapropter non peream, ore loquar in tribulatione spiritus mei, consolabor in amaritudine anime meae.* Tu Sancte Spiritus facis nos loqui in oratione, ut humilians & divinae maiestati subiacens. Et ideo scribitur, *Os suum aperuit, & implevit illud Dominus Spiritu sapientia, & intellectu.* Tu Sancte Spiritus facis nos flere, ostendendo nobis peccata commissa, unde scribitur, *Flabit spiritus eius & fluent aquae, & exitus aquarum deduxerunt oculi mei.*

Eccl. 47 c. 7.

Eccl. 15. 3. Veni igitur Sancte Spiritus in animam meam & nuda eam a labere peccati, ut hereditatem percipiam sempiternam. Amen.

CAPVT XIV.

Quod S. Spiritus dat bona scire, velle, & posse.

1. Veni sancte Spiritus in animam meam desideria & negligentia plenam, excute ab ea torporem, & da ei motum bonae operationis, quia sicut ventus agitat scintillas, sic tu Sancte Spiritus agitas animas quae per se non mouentur. Vnde scribitur, *ubi erat imperius Spiritus, illuc gradiebantur.* Ad motum autem bonae operationis, requiruntur tria, scilicet posse, scire, & velle, siue potentia, scientia, & voluntas. Ista autem tria das tu Sancte Spiritus.

2. Das enim sapientiam regentem in opere, sicut scribitur, *Spiritus Paraclitus quem mittet Pater in nomine meo, ille vos docebit omnia, & suggeret vobis omnia.* Tu Sancte Spiritus das potentiam ad exequendum opus. Sicut enim superiora corpora dant inferioribus virtutem germinandi, & fructificandi, ita tu S. Spiritus illis in quibus habitas das virtutem bene operandi, ideo scribitur, *Verbo Domini caeli firmati sunt, & spiritu oris eius omnis virtus eo-*

DE SPIRITU S. ADIVTORE. III

rum. Tu S. Spiritus das voluntatem ad opus applicantem. Quia sicut ratio inclinat voluntatem ad bonum eligendum, ita tu sancte Spiritus inclinas rationem ad hoc quod arguat peccatum, sicut scribitur, *cum veneris Para-* Ioan. 6.
clitus ille arguet mundum de peccato, quod commiserunt, de iustitia quam
amiserunt, & de iudicio scilicet quod non timuerunt. Tu Sancte Spiritus ostendis nobis beneficia præstata, & facis nos gratias agere, sicut de Zacharia dicitur, qui repletus tua gratia dicebat, *Benedictus Deus Israel quia visi-* Luc. 1.
tauit & fecit redemptionem plebis sue, & erexit cornu salutis nobis in domo
David pueri sui.

3. Veni igitur sancte Spiritus, cuius sapientia est inenarrabilis, prouidentia infallibilis, cuius veritas est interminabilis, cuius clementia est admirabilis, cuius bonitas est inexplicabilis. Veni, inquam, in animam meam Spiritus sancte, quia sine te surgere non valet. Excita eam à somno pigritiæ & acedia, da ei scientiam, potentiam, & voluntatem bene operandi, & de beneficiis sibi misericorditer concessis, humiles & assiduas gratias referendi, & hic in præfenti te donante viuat, & vitam in futurum consequatur æternum. Amen.

CAPVT XV.

Quod S. Spiritus firmitatem confert in bono.

1. **V**eni sancte Spiritus in animam meam mutabilem & inconstantem, quæ velut arundo ad impulsu cuiusque tentationis, agitur & circumfertur hinc inde. Sed tu sancte Spiritus das perseverantiam in bonis operibus exercendis, ex redundantia tuæ clementiæ. Sicut enim corpus humanum sine spiritu humano cadit deorsum; ita sine te anima cadit in culpam, in peccati consuetudinem & in gehennæ pœnam. Ideo de te scribitur. *Ingressus est spiritus in me & statuit super pedes,* videlicet conferendo *Exec. 3.*
firmitatem in opere bono.

2. Tu sancte Spiritus confers & das istam firmitatem tripliciter. Primò in statu pœnæ consolando. Ideò nominaris Paraclitus, id est consolator. Vnde cantat Ecclesia *Consolator optime, dulcis hospes animæ, dulce refrigerium.* Tu sancte Spiritus das firmitatem in bono opere, dando victoriam in pugna, quia tu Sancte Spiritus virtus es, & etiam charitas, quæ potest resistere tentationi. Sed si potest hoc facere charitas creata, multo plus potest hoc facere, tu sancte Spiritus, qui es charitas increata. Vnde scribitur de Samsone, *quoniam insiluit in eum Spiritus Domini, & debellauit leonem.* 3. Tu *Indit. 6.*
sancte Spiritus das firmitatem in bono opere, in statum bonum reducendo sicut scribitur. *Spiritus tuus bonus deducet me in terram rectam:* scilicet *Pf. 141.*
vitæ æternæ, ad quam allicis nos tu sancte Spiritus, vt ad illam animum eleuamus continuè. Ibi namque iuuentus nunquam senescit, amor nunquam tepescit, sanitas nunquam marcescit, dolor nullus sentitur, gemitus nullus auditur, lætitia semper habetur, malum nullum timetur, quoniam omne bonum ibi possidetur.

3. Veni igitur Sancte Spiritus misericorditer in animam meam, & da e robur & fortitudinem aduersus hostium tentamenta; & da ei firmitatem & perseverantiam in bonis operibus exercendis. Da ei constantiam vt non declinet ad dexteram prosperitatis, neque ad sinistram aduersitatis, sed via directa & tibi placita in presenti semper intendens, ad regnum te adiuuante perueniat sempiternum. Amen.

CAPVT VIX.

Quod Sanctus Spiritus est donum igneum.

1. **V**eni Sancte Spiritus in animam meam. Tu namque es primum donum quod Christus de cælo transmisit, & licet sint etiam dantes Pater & Filius, tamen specialiter Christus dedit te nobis, sicut scribitur. *Mittam vobis Spiritum qui à Patre procedit.* Tu Sancte Spiritus es donum nobile, quia es æqualis Patri & Filio: non tantum diuinus, sed etiam coniunctus, quia non est maior nobilitas in duabus personis, quam in vna, nec etiam in tribus simul. Tu Sancte Spiritus datus es nobis ad hoc vt facias nos charos. Ideo summè te diligere debemus quia Deo nos facis charos. Vnde dicitur, *charitas Dei diffusa est in cordibus nostris per Spiritum Sanctum qui datus est nobis.* Tu Sancte Spiritus, es donum ita copiosum, & perfectum, & tam magnum, quod tecum omnia dona nobis donantur. Donum namque es diuini amoris, quia tu completes cor charitate & dilectione. Ideo petimus & cantamus, *reple tuorum corda fidelium, & tui amoris in eis ignem accende.*

2. Tu Sancte Spiritus ad modum ignis materialis purgas & reddis animam mundam ab omni carnalitate. Animus enim infectus carnalibus cogitationibus & affectionibus non habet te; sed animus purus & mundus, idcirco petimus *cor mundum crea in me Deus, & spiritum rectum innoua in visceribus meis.* Tu Sancte Spiritus, subtilias, & alleuias, & reddis animum liberum ab omni cupiditate. Cupiditas enim terrenorū aggrauat animum, & trahit ad amandum, nec permittit eum ascendere in cælum. Sed paupertas voluntaria, habet cor liberum ad desiderandum cœlestia, quia scriptum est, *Vbi spiritus Domini, ibi libertas.* Tu Sancte Spiritus tranquillās animum cum proximo ab omni animositate. Vbi enim animositas est, ibi Sancte Spiritus manere non potes, sed vbi est pax & tranquillitas cum proximo, ibi Sancte Spiritus es, venis & manes.

3. Veni igitur tu sancte Spiritus in animam meam infectam carnalibus cogitationibus & affectionibus, à quibus digneris ex immensitate amoris tui eam purgare & mundare. Alleua eam ad æterna, & fac eam liberam ab omni cupiditate, vt cœlestia semper contempletur. Concede ei misericorditer veram tranquillitatem & pacem cum omnibus, vitia repellendo: vt te miserante & iuuante, hic viuat per gratiam, & in futuro per gloriam sempiternam. Amen.

DE SPIRITU SANCTO ADIVTORE. 113

CAPVT XVII.

Quod Sanctus Spiritus ad triplicem amorem inflammat, tenet hominem, hostem repellit longius.

1. **V**eni Sancte Spiritus in animam meam ex defectu amoris multipliciter desolatam. Tu namque Sancte Spiritus inflammas hominem ad amandum seipsum, quia sine te non potest homo diligere. Et quia pro modica dilectione carnis non timet pœnam mereri æternam, pro diuitiis modicis temporalibus, non timet diuitias perdere æternas, sed te veniente inflammas hominem ad sui dilectionem. Tu Sancte Spiritus, inflammas hominem ad amorem proximi quem sine te nescit diligere, siue sit amicus, siue sit inimicus: Tu autem Sancte Spiritus superueniens doces hominem ut amicum diligit in Deo, & inimicum propter Deum. Tu Sancte Spiritus inflammas hominem ad dilectionem Dei, quia sine te homo frigidus est & tepidus in Dei amore. Sed tu Sancte Spiritus hominem inflammas: quia si est extinctus, ipsum viuificas, si est remissus, ipsum fortificas, si est infectus ipsum perficis, ut sit fortis in quibusvis passionibus, ita quod non auellatur minis nec carceribus, nec verberibus, nec morte, quia scriptum est, *fortis est Cant. 8. ut mors dilectio*, quare etiam sit firmus in tentationibus ut à Deo nulla tentatione separetur.

2. Tu Sancte Spiritus tenes hominem ne defluat, hostem repellendo, sicut à te frequenter petendo dicimus, *hostem repellas longius*. Hostis enim nonster in tantum est malitiosus & importunus, quod vix quis se ab ipso defendat si habeat eum præsentem. Et ideo tu Sancte Spiritus in mentibus nostris existens facis eum esse remotum, & sic in tua gratia conseruatur. Tu Sancte Spiritus tenes hominem ne cadat per concupiscentiam, eam minuendo, tendit enim concupiscentia nostra ad malum, & adeo inclinatur ut vix valeat quis se retinere. Sed tu Sancte Spiritus adueniens, concupiscentiam ipsam refrigeras & sic in tua gratia conseruas hominem. Tu sancte Spiritus tenes hominem labatur: scilicet gratiam augmentando. Gratia enim magna, multò plus potest conseruari quàm parua. Et ideo tu Sancte Spiritus venis in hominem, venis cum plenitudine gratiæ, & sic gratia confortata ne melius conseruatur, de qua scribitur, *dabit capiti tuo augmenta gratiarum. Rom. 4.*

3. Veni igitur Sancte Spiritus in animam meam, inflammando eam ad dilectionem Dei & proximi & sui, hostem longius repellendo, concupiscentiam minuendo, & gratiam augmentando, ut relictis vitiis quibuscumque, de virtute in virtutem ambulet, quousque perueniat ad gloriam sempiternam. Amen.

Quod Sanctus Spiritus purgat, mollificat, & salubriter contundit.

1. **V**eni Sancte Spiritus in animam meam peccati rubigine deformatam digneris eam purgare igne tuæ dilectionis, vt emolliatur per contritionem, quia si quis vult purgari, necessarium est sibi quod virtute tua, sancte Spiritus, emolliatur. Hæc enim emolitiō siue contritiō, est medicina contra peccatum, & contra morbum spirituale, id est contra peccatum veniale, ac etiam resuscitat à morte spiritali, id est à mortalibus peccatis. In hoc Sancte Spiritus, hæc medicina excellit medicinas corporales, quæ aliquando curant hominem ab infirmitatibus, numquam tamen à morte.
2. O Sancte Spiritus, si quis purgari desiderat, non solum necessarium est sibi, vt igne tui amoris emolliatur, sed expedit etiam sibi vt post emolitionē per te contundatur; sicut ferreum post emolitionem contunditur. Homo enim Sancte Spiritus, est ægrotus spiritaliter, eo quod sit promptissimus ad cadendum. Et ideo non tantum indiget medicina curatiua spiritali quæ est contritiō, sed etiam præseruatiua: qualis est penitentialis afflictio. Quæ non solum est utilis ad peccati punitionem, sed etiam ad præseruationem. Cum enim corpus suum quis affligit & quodammodo contundit ieiuniis, vigiliis, & verberibus, non tantam habet ad peccandum inclinationem. Quia caro tunc non est potens ad rebellandum in ipsum. Ideo Apostolus 1. Cor. 9. dicebat, *Castigo corpus meum & in seruitutem redigo*. Tunc tu Sancte Spiritus homini sic contrito in anima, & sic afflicto in corpore, das ex infinita bonitate tua spirituales consolationem. Hic enim Sancte Spiritus, est ordo debitus, vt videlicet post contritionem in anima, & afflictionem in corpore sequatur spiritalis consolatio, etiam in hac vita; sicut consueuerunt sancti viri sentire, qui carnem suam crucifixerunt & afflixerunt aliquando: & postea quadam spiritali dulcedine sunt refectioni, de qua scribitur, *Gustate & videte quoniam suavis est Dominus*.
3. Veni igitur Sancte Spiritus misericorditer in animam meam, & vt dignè à peccatis purgetur, mollifica eam per veram contritionem. Contere cor meum, vt miserabile corpus meum affligatur, ieiuniis, vigiliis & disciplinis, vt spiritus, te iuuante, corpori dominando, gloriam consequatur sempiternam. Amen.

Quod Sanctus Spiritus est virtus potentiaram.

1. **V**eni Sancte Spiritus in animam meam, infunde in eam gratiam vt sit Deo similis. Nam gratia est quidam habitus Deo assimilans ipsam animam. Itaque anima ex gratia tua, non solum est ad Dei imaginem, sed

DE SPIRITU SANCTO ADIVTORE. 115

etiam ad Dei similationem. Per hunc habitum das tu Sancte Spiritus animæ virtutem in potentiis. Potentiæ enim animæ, maximè post peccatum, sunt debilitatæ. Itaque intellectus non potest conuenienter Deum intelligere, nec voluntas diligere, nec memoria reminisci. Et ideo necessarius es tu Sancte Spiritus, qui virtute tua roboras potentias animæ. Ille enim intellectus qui de sua natura non erat sufficiens ad cogitandum sublimia, & diuina, assumpto habitu fidei & sapientiæ roboratur & confortatur, in tantum ut possit conuenienter intelligere & credere prout conuenit in hac vita. Illa etiam voluntas quæ non sufficit ad amandum Deum super omnia quantum est de se, confortata per charitatem fit potens; sic etiam de memoria fortificata per habitum spei, vel alios quos affers tecum. Vnde scriptum est: *Sensum tuum quis sciet nisi tu dederis sapientiam, & miseris Spiritum tuum* Sap. 9. sanctum de altissimis.

2. Tu Sancte Spiritus, das animæ efficaciam in opera. Opera enim hominis in gratia tua non existentis, non sunt efficacia ad vitam æternam propter sui indignitatem; sed fortè ad aliqua præmia temporalia. Ut cum existens in peccato mortali in quo etiam moritur, facit aliqua bona opera, ut cum audit missas & sermones, facitque elemosynas. Sed hæc eadem opera si faciant iusti viri, sunt meritoria vitæ æternæ. Non enim possent sufficienter præmiari extra vitam æternam, propter gratiam tuam, Sancte Spiritus quæ opera illa sanctificat. Et ideo aiebat David, *Spiritus tuus bonus Ps. 142. deducet me in terram rectam*, id est ad gloriam tuam, ubi omnia sunt rectè. Et mea quidem opera; vilia nimis, & miseraabilia sunt: sed tu Domine mitres Spiritum tuum, qui donis suæ gratiæ, opera mea dignificabit, ut tantis præmiis fiant digna.

3. Veni igitur Sancte Spiritus in animam meam, in qua reuocare & roborare digneris eius potentias: scilicet intellectum, voluntatem & memoriam propter peccatorum infirmitatem debilitatas: ut opera mea tibi placeant, & per ipsa te iuuante perueniam ad tuam gloriam sempiternam. Amen.

CAPUT XX.

Quòd Sanctus Spiritus est lumen animæ.

1. **V**eni Sancte Spiritus in animam meam peccatorum tenebris inuolutam, & illumina eam, ea virtute illuminatiua de qua scribitur; *deduxit eos in illuminatione ignis*. Tu namque Sancte Spiritus ex dulcedine tuæ bonitatis, illuminas hominem quoad intelligenda altissima, ut sunt multa in scriptura sancta, quæ etsi multi valent legere, nullus tamen potest ea intelligere absque illuminatione tua. Sicut ostenditur in scriptura, ubi dicitur quòd Spiritus ingressus est Ezechielem, qui Spiritus expandit librum qui prius erat inuolutus, & erat scriptus intus & foris. Iste namque liber inuolutus, est liber sacræ scripturæ, quæ propter sui obscuritatem est inuoluta homini non habenti te Spiritum sanctum. Post ingressum autem

tuum expanditur & apparet scriptura interior & exterior, quia ex tunc fit parens scriptura sacra, non tantum quantum ad sensum naturalem seu litteralem, sed etiam quantum ad sensum spiritualem qui est sensus interior.

2. Tu sancte Spiritus illuminas hominem quoad intelligenda futura. Nulli enim creatura concessum est ex natura sua, posse futura contingentia praevidere. Et tamen tu sancte Spiritus, adueniens, das aliquando intelligentiam seu praevidentiam futurorum. Propter quod scribitur, quod aliis datur sermo sapientie, aliis prophetia in eodem Spiritu. Tu item sancte Spiritus illuminas hominem quoad credenda. Articuli enim fidei ita sunt alti, & supra vires intellectus nostri, quod intellectus suo tantum naturali lumine non posset eis vllatenus assentire. Quis enim videat Virginem peperisse, Deum incarnatum, & in modica specie panis, totum Christum? Et ideo tu sancte Spiritus intellectum illuminas donec ea credat, ad quae infidelis non potest aliquatenus peruenire. Illuminas autem sic tu sancte Spiritus, quia licet articuli fidei arduissimi, creduntur tamen facilliter à subtilibus, à rudibus, & à mediis. Vnde scribitur. *Spiritus Domini repleuit orbem terrarum.* Replet enim tu sancte Spiritus ut dictum est, lumine tuo ad credendum, tam rudes, quam subtiles, ac etiam medios.

3. Veni igitur sancte Spiritus in animam meam, & sic eam illuminare digneris, ut frui valeat indeficiente lumine in aeternum. Amen.

CAPVT XXI.

Quod Sanctus Spiritus pellit in anima ignorantiam.

1. **V**eni sancte Spiritus in animam meam ignorantem: Digneris eam erudire, id est extra ruditatem ponere; quia reuera natura humana, rudis est sine te & indigesta nimis; sed te adueniente extra omnis ignorantia ruditatem ponitur, & Euangelica lege imbuitur & informatur. Ideo scribitur. *Beatus quom tu erudieris Domine, & da lege tua docueris eum.* Tu S. Spiritus qui es ignis spiritualis, illustras in nobis intellectum veritatis splendore. Duos namque defectus ante tuum aduentum patitur; humanam scilicet firmitatem carnis, & cœcitatem mentis. Sed tu sancte Spiritus prædictis effectibus remedia tribuis. Nam contra infirmitatem carnis, expandis nubem consolationis in protectionem, ut dicere quis tibi possit, *protexisti me à conuentu malignantium*: contra autem cœcitatem mentis, das ignem & lumen tuum. Ideo cantat Ecclesia, *De patris ergo lumine, decorus ignis almus est, qui fida Christi pectora, calore verbi compleat.* Hæc est lux & veritas sancte Spiritus quam petebat Dauid. *Emitte lucem tuam & veritatem tuam.*

2. O sancte Spiritus quantum regratiandum est tibi propter veritatem istam, sine qua nihil valuissent beneficia diuina. Quid enim nobis profuisset cœli & terræ creatio, quid Filij Dei incarnatio, nisi de his adesset nobis

DE SPIRITU SANCTO ADIVTORE. 117

bis à te Sancte Spiritus eruditio debita qua bonis diuinitus paratis uti possemus? A te verò ea eruditio multifarie multisque modis est allata. Ideò ille Zacharias, cœcitate mentis suæ volens extirpare, dicebat: *illuminare his qui in tenebris, & in umbra moris sedent, ad dirigendos pedes nostros in viam pacis.* Euc. 11.

3. Veni igitur sancte Spiritus in animam meam, quia licet sim cœcus ac multiplici cœcitate plenus, nihilominus tamen lumen istud purissimæ ac clarissimæ veritatis in tantum neglexi, quod inter illos numerari possum de quibus scribitur, *dilexerunt magis tenebras quàm lucem.* Veni Sancte Spiritus, per immensam clementiam tuam, expelle à me vitia & peccata quæ mentem meam excœcarunt, & illustra me lumine tuæ veritatis: ut ignorantia & cœcitate exclusus, quæ agenda sunt videam, & opere compleam, & vitam consequar sempiternam. Amen. Ioan. 3.

CAPVT XXII.

Quod Sanctus Spiritus dat saporem spiritualem, & fastidium carnalium ingenerat.

1. Veni sancte Spiritus in animam meam gratis spiritualibus vacuam. Tu enim ex vbertate clementiæ tuæ, repleas hominem charitate, quum das homini amorem. Sine charitate namque Deum diligere non possumus. Ideò per oppositum qui non diligit, non est in charitate. Hæc charitas quam tu das Sancte Spiritus, dat saporem homini. Sine charitate enim Deus non sapit homini, sed ipsa charitas dat saporem, tollendo omnem corruptionem à nostro corde, quæ impediret saporem de Deo, ideò scribitur, *qui in carne sunt, secundum carnem sunt, & sapiunt, qui autem secundum Christum sunt, ea quæ secundum Christum sunt sapiunt.* Hæc charitas Sancte Spiritus dat vigorem. Qui enim charitatem non habet, frigidus est & piger ad omne opus bonum. Vnde scribitur. *Accipietis virtutem sancti Spiritus superuenientis in vos.* Rom. 8. Acl. 1.

2. Qui autem sancte Spiritus, gustauerit hanc charitatem tuam, facili- ter spernit & horret carnales voluptates. Nec mirum, quia minor volu- ptas facilius spernitur pro maiori: quia voluptas tuæ charitatis maior est quàm sit carnis, pro eo quod est nobilioris naturæ, ideo carnalis amor faci- liter spernitur ab eo qui aliquando fuit charitate tua satiatus. Aliter autem Sancte Spiritus, nisi homo maiorem dulcedinem inueniat in charitate tua quàm in mundana, cum maxima difficultate potest resistere affectionibus carnalibus. Vincimur namq; nisi diuinitus adiuuemur. Itaque dilectio cha- ritatis vincit in nobis earum rerum delectationes, quas vel habere cupiendo vel amittere metuendo peccamus. Qui item Sancte Spiritus, degustauit hanc charitatem tuam, facilius tolerat aduersitates temporales. Nam in tua charitate, plena dulcedine roboratur spiritus. Et propterea scriptum

Cant. 3. est; *fortis ut mors dilectio.* Quia ille qui benè Deum diligit, etiam vsque ad mortem pro Deo pati est paratus; quia tu Sancte Spiritus semper das consolationem, quia consolator nominaris.

3. Veni igitur Sancte Spiritus in animam meam, imple eam misericorditer tua charitate, ut à te in perpetuum separari non possit. Amen.

CAPVT XXIII.

Quod Sanctus Spiritus renouat faciem terræ.

Gen. 1. 1. **V**eni Sancte Spiritus in animam meam diuersis peccatis maculatam. Veni & noli tardare, & renouabis faciem terræ, id est animam peccatricem quæ terra merito appellatur, quia est elementum obscurum, unde minus habet de luce: & sicut ad extinctionem candelæ domus manet tenebrosa, ita & terra sine extrinseco lumine solis & syderum per quod illustratur. Unde scribitur. *Terra autem erat inanis & vacua, & tenebra erant super faciem abyssi.* Sic ergo peccator, nisi tu, Sancte Spiritus, ei lumen affundas, est totus tenebrosus, & obscurus, & nescit quò vadat, palpsans in meridie. Terra est elementum immundum, quia sœx elementorum est, & recipit omnes immunditias. Ita peccator assuetus in peccatis, est immundus in corde per fordidam affectionem seu cogitationem; in ore per immundam locutionem: in opere per inhonestam exterius conuersationem; Terra est elementum infimum. Sic peccator qui stabat in alto gratiæ, cadit in infimum gehennæ, quia scriptum est. *Impi non habitabunt super terram.*


Prov. 2. 2. Sed per te, Sancte Spiritus, omnia renouantur, unde omnia obscura fiunt clara, & immunda fiunt munda, & infima fiunt alta. Tu Sancte Spiritus es ignis diuinus, & quod facit ignis materialis circa ferrum, hoc tu facis Sancte Spiritus circa cor ferreum & durum. Per ipsum namque ignem materiale, ferrum frigiditatem, & duritiem deponit. Ita etiam per te sancte Spiritus, totus animus ardescit pariter & liquefcit in amorem Dei, quousque anima à corpore sit separata, & gloriam percipiat sempiternam, in qua potentia animæ, quod magis desiderabunt, habebunt. Intellectus namque erit in plenitudine siue claritate lucis. Sicut enim oculus corporalis, nihil tantum desiderat, sicut lucem, nec de vilo tantum lætatur; sic oculus noster mentalis, super omnia desiderat lucem Dei, & in ipsa magis reficitur: sicut scribitur. *Valde delectabile est oculis videre Solem, scilicet æternum.* Voluntas erit in suauitate dulcedinis. Sicut enim gustus corporalis delectatur in dulci, sic gustus noster spiritalis in spiritali dulcedine, & potissimè in Deo. Unde scribitur, *Fructus eius dulcis gutturi meo.* Memoria erit in certitudine vel æternitate pacis. Sicut enim virtus nostra hic totum suum conatum facit pro pace, & eam appetit, ac in illa libenter consistit; sic virtus nostra spiritalis, & pacem appetit, & in pace quiescit.

Cant. 2. 3. Veni igitur Sancte Spiritus in animam meam, & renoua eam, ut de obscura fiat clara, de immunda munda, de infima alta, & te Sancte Spiritus iuuante; pacem consequatur æternam. Amen.

CONTEMPLATIONES DE OCTO
beatitudinibus.

CAPVT I.

De duplici Beatitudine.

1.  VPLEX est, Domine Iesu Christe, benignissime beatitudo, scilicet quadam perfecta, & quadam imperfecta. Perfecta namque est illa, Domine, quæ est finis & quies omnium desideriorum, & præmium omnium meritorum, quæ consistit in clara visione tua, & in perfecta tui fruitione, & omnis boni firmissima retentione, de qua scribitur. *Beatitudo est status omnium bonorum aggregatione perfectus.* Ista beatitudo, Domine Iesu Christe, non potest cum mortalitate corporis simul stare.
2. Beatitudo autem imperfecta, est quadam virtus nobilissima transcendens alias, quæ heroica vocatur, cuius actum spiritualis homo exequitur, non modò humano, nec superhumano, sed quasi inhumano: & tanquam non existens homo, nec curans de esse suo, sed potius dolens de prolongatione præsentis miseriæ præ desiderio futuræ vitæ, quia cupit dissolui & esse tecum. Propter quod talis homo fatuus & insensatus reputatur à carnalibus hominibus; iuxta illud quod dicent damnati in inferno, *ij sunt quos aliquando habuimus in derisum, & in similitudinem impropri, non insensati* Sap. 5. Ista beatitudo, Domine Iesu Christe, quæ non est solum vna sed multiplex, quia multæ sunt tales virtutes quæ dicuntur beatitudines, haberi potest in hac vita: non quidem beatitudine perfecta, nisi solum in spe, sed beatitudine imperfecta, id est virtute omnem aliam transcendente. Per istas autem beatitudines acquisierunt ciues cælestis patriæ, id est homines qui iam secundum animas sunt beati, illam perfectam beatitudinem per quam sancta mater Ecclesia ipsos honorat, & de ipsis celebrat festa.
3. O misericordissime Domine Iesu Christe, respicere digneris oculo pietatis tuæ & misericordiæ, me iniquissimum peccatorem, multis & gravibus peccatis involutum. Absterge illa misericorditer ab anima mea per veram contritionem, confessionem & dignam satisfactionem Da mihi, immensitate clementiæ tuæ, istam imperfectam multiplicem beatitudinem in hac vita, cuius actum te mediante & largiente spiritualiter exequar, contemnendo istam miserabilem vitam, & desiderando futuram; ut finita ista miserabili vita, ad illam perfectam peruenire merear, te iuvante. Amen.

Qij

De dulcedine sermonis Christi.

E Loquium tuum dulce est, clementissime Domine Iesu Christe, quia in principio tuæ sanctissimæ prædicationis, dum peccatores vocare venisti, viam qua conuerti & saluari poterant, dulciter ostendisti, non præcipiendo, non prohibendo, non comminando, non terrendo, sed suauiter demulcendo more piissimi patris, mellifluis verbis, & exhortationibus docens, qualiter regnum acquirere & possidere poterant sempiternum, ut difficultas laboris eos non retraheret à mercede inestimabili quam recepturi erant, si tuæ beatissimæ prædicationi acquiescerent.

Sap. 8. 2. O dulcissime Domine Iesu Christe, quanta & qualis fuit doctrina tuæ sanctissimæ prædicationis quam in montem ascendendo docuisti. Diffusa namque gratia erat in labiis tuis, quia regulas viuendi tradidisti, ut eas obseruantes, æternam felicitatem mererentur. Et licet lex promitteret suis obseruatoribus benedictionem temporalis prosperitatis, & suis transgressoribus comminaretur maledictionem temporalis aduersitatis; Tu tamen benignissime Domine Iesu Christe, in hac tua nouæ legis sanctissima prædicatione beatificas, & beatos esse prædicas, & doces, obseruatores ipsius. *Attingit* ergo hæc tua sacratissima doctrina à fine usque ad finem, & interiora hominis penetrans, suauitatem effectualiter ostendis. Si bene obseruetur ipsa animam ad bonum ordinat, perfecte purgat mentem, infirmitatem expellit, peccati sollicitudinem, & amorem sæculi aufert à cordibus hominum, & perturbationes excutit ab iis qui ipsam satagunt obseruare.

3. O doctrina salutifera, salubris cogitatio, prædicatio salutaris, exhortatio dulcorosa, quis tam negligens qui te non audiat? quis tam durus qui te non intelligat? quis tam insanus qui te obliuiscatur? quis tam immemor suæ salutis, qui te cum affectu non obseruet? aut quis tam proteruius qui te firma dilectione non diligat, ut à corde suo etiam modicum tui non effluat? Ego sum ille piissime Domine Iesu Christe; Ego sum ille impiissimus peccator, negligens, durus, insanus, immemor meæ salutis, & proteruius, qui tuam sanctissimam doctrinam neglexi & contempsi. Indulgere mihi digneris misericorditer, Domine Iesu Christe, mihi miserrimo gratiam tribuendo, ut tuam doctrinam obseruem, & beatitudinem consequar sempiternam. Amen.

DE OCTO BEATITVDIN.

121

C A P V T I I I.

De prima Beatitudine.

1. **P**rima Beatitudo tuæ sacratissimæ prædicationis, misericordissime Domine Iesu Christe, quam magister veritatis ostendisti, est *Beati Matt. 5. pauperes spiritu, quoniam ipsorum est regnum cælorum.* Tu Domine Iesu Christe, volens radicitus euellere superbiam, quæ radix fuit & fons malitiæ vniuersæ, incepisti à beatitudine humilitatis. Hanc igitur posuisti contra superbiam velut quoddam stabile fundamentum, super quo stabiliter alia superædificantur. Sed eo despecto pereunt quæcunque homo cogitauerit bona. Sicut ergo præsumptio spiritus superbiam & audaciam significat: ita paupertas spiritus, humilitatem. Beati ergo pauperes spiritu, id est, humiles & continentés te, Domine, & qui non habent iustantem spiritum, sed qui se ipsos voluntariè humiliant, non vt necessitate coacti, qui non sunt digni, laude, nec tales tu Domine beatificas: beati enim pauperes spiritu, id est spirituali voluntate, spirituali intentione, desiderio spirituali, propter solùm beneplacitum tuum Domine & animarum salutem. Paupertas etiam spiritus non solum consistit in humilitate, sed etiam in rerum temporalium abdicatione & voluntate, qua fiunt pauperes rebus mundi. Pares igitur spiritui sunt contemptores mundi. Hunc enim tenent sub pedibus, & sunt supra mundum.

2. Hanc paupertatem, tu Domine Iesu Christe, non solum docuisti, sed etiam in hoc mundo plusquam triginta annis tenuisti. Te docente cognouimus, quòd terrena substantia, æternæ felicitati comparata pondus est non subsidium. Per paupertatem non mouentur lites, paupertas non timet fures, nec latrones, non timet aëris passionés. Donum tuum Domine est à paucis cognitum, quia scriptum est, *Pauperes & honestas à Deo sunt.* Paupertas vitiiis materiam subtrahit, quia non habet unde suum pascatur amorem. Beati ergo sunt, Domine Iesu Christe, pauperes spiritu, & humiles, & diuitiarum mundanarum contemptores, quoniam ipsorum est regnum cælorum, propter quod sunt beati beatitudine perfecta in spe & in re.

3. O Benignissime, Domine Iesu Christe, negligens discipulus fui, in obseruatione tuæ doctrinæ, quia non fui pauper spiritu, id est verus humilis, sed diuitias temporales concupiui & amaui. Parce mihi Domine, & da mihi spiritum humilem & spernentem mundana, vt regnum consequar sempiternum. Amen.

C A P V T I V.

De secunda Beatitudine.

1. **M**isericorditer nos docuisti dulcissime, Domine Iesu Christe, qui es magister veritatis, dum dixisti, *Beati humiles quoniam ipsi possidebunt terram.* Mites Domine Iesu Christe cedunt improbitatibus & non re-

Quij

fistunt in malo, sed vincunt in bono malum: mitigant affectum proprium ut non irascantur, aut ne irati peccent, quia scriptum est. *Irascimini & nolite peccare.* Quia est quædam ira per vitium, & quædam ira per zelum. Præclarum enim est, Domine, motum temperare consilio, nec minoris virtutis dicitur cohibere iracundiam, quam omnino non irasci. Istam beatitudinem habuit excellenter Moyses, de quo scribitur, *Quod erat mitissimus super omnes homines qui habitabant in terra.*

2. Beati igitur mites, quoniam ipsi possidebunt terram, de qua euelli non poterunt, illam inquam terram de qua scriptum est: *Portio mea Domine sit in terra uiuentium.* Significat enim, Domine, quandam stabilitatem hereditatis æternæ, ubi anima per bonum affectum tanquam in loco suo quiescit, sicut corpus in terra, & vnde suo cibo alitur sicut corpus de terra. Mites igitur Dñe possidebunt terram uiuentium, de qua scribitur. *Miseri autem hereditabunt terram.* Id est corpora sua quibus dominantur, & etiam malis motibus. Possident terrena, Domine, in quibus non turbantur, sed illa perdunt, quia non diligunt, sed ab eis animas elongant. In præsentem enim seipos possident, ut in futuro hereditate tua non priuentur. Mitis, Domine Iesu Christe malitiam vincit, nulli malum infert, mala in bonum conuertit, & non irritat neque irritatur, non nocet, neque nocere cogitat, sed omnia æquanimiter sustinet, subesse vult, nec superiori resistit. Et quia in pace viuunt, iustum est, ut terram pacis possideat.

3. O clementissime Domine Iesu Christe, hac beatitudine vacuum me sentio propter iniquitates meas. Iracundus fui, ad vindictam paratus, impatiens in omnibus aduersitatibus, & tribulationibus fui; malum reddens pro bono. Auxiliari mihi digneris, Domine Iesu Christe, tu qui mitis es, & humilis corde, mihi misericorditer indulgendo. Da mihi clementer istam beatitudinem, ut mitis & patiens sim in præsentem, & in futuro, te adiuuante, terram uiuentium valeam possidere. Amen.

CAPVT V.

De Tertia Beatitudine.

1. O Doctor veritatis, benignissime Domine Iesu Christe, qui doctrina tua salutifera, nos ad beatissimam tuam consolationem misericorditer inuitasti: Tu docuisti nos sic lugere, ut perpetuò consolari possemus; & *Mat. 5. dixisti, beati qui lugent quoniam ipsi consolabuntur,* Non tamen lugentes contumelias eis illatas, seu damna temporalia sustinentes; sed peccata sua flentes, sed de malis quæ occurrunt, vel de bonis quæ deficiunt vehementer dolentes. Tales enim dicis beatos, & eis promittis consolationem, quia beati qui lugent pro miseriis huius mundi, & pro desiderio cœlestium. Istum autem luctum, Domine Iesu Christe, habent pauperes spiritu & mites, qui cum mundum non diligant, recognoscunt quia est miser, & ideo te solum concupiscunt. Conuenienter autem Domine, lugentibus promittis con-

DE OCTO BEATITVDIN.

123

solationem, vt qui triftati funt in præfenti, gaudeant & confoletur in futuro.

2. Domine Iefu Chriſte, tanta eſt & tam immenſa miſericordia tua, quod ſemper das laborantibus maiores diſtributiones. Nam regnum cœlorum Domine, rapi vult noſtris ſletibus, quod noſtris meritis non debetur, nihil enim Domine conglutinat tantopere tibi, vt illæ lacrymæ quas peccati dolor & amor virtutis effundit. Et ſicut poſt vehementes pluuias, aër mundus & purus efficitur, ita etiam poſt lacrymarum pluuias, ſerenitas ſequitur atque tranquillitas: omniſque peccatorum offuſa caligo diſſoluitur. Beati igitur Domine qui lugent, luctu ſcilicet compunctionis & mœroris, interim dum conſiderant ſuas conſcientias virtutibus denudatas, criminibus maculatas, & doloris fraterni, propter eorum peccata, tormenta, & infortunia. Beati Domine qui lugent luctu dilationis ſuperni ſplendoris. Dilatio namque ſupernæ gloriæ, reddit hominem gembundum de qua ſcribitur *gaude in ea vniuerſi qui iugebatis ſupeream* Nam tu Domine, licet lugentibus, æternum præmium promittis: quia beati qui lugent quoniam *Iſai. 66.* ipſi conſolabuntur.

3. Sed piiffime Domine, Iefu Chriſte, lugere non valeo nequam peccator, quia cor durum & impium habeo, terrena diligo in quibus meipſum occupo. Indulgere mihi digneris Domine, & ſic lugere tribue, vt perpetuò valeam conſolari. Amen.

CAPVT VI.

De quarta beatitudine.

1. **S**ua iſta dulciſſima redolet dulciſſime, Domine Iefu Chriſte, tua ſanctiſſima prædicatione quam docuiſti ad iuſtitia obſervationem, dum dixiſti, *beati qui eſuriunt & ſiunt iuſtitiam quoniam ipſi ſaturabuntur.* Non enim ſufficit nobis velle iuſtitiam, niſi pariamur iuſtitia famem, & ſub hoc exemplo doces ne putemus vnquam nos ſatis iuſtos, ſed ſemper eſurienda iuſtitia opera intelligamus. Ille, autem benigniſſime Domine, eſurit iuſtitiam, qui ſecundum iuſtitiam deſiderat conuerſari, & ille ſitit iuſtitiam, qui ſcientiam tuam cupit acquirere. *Matt. 5.*

2. Quia tu Domine dicturus eras de miſericordia, ideo prius monſtras qualiter miſereri oporteat, quia non ex rapina, non ex avaritia, quia eſſet contra iuſtitiam. Vnde illud quod eſt avaritiæ proprium, ſcilicet elurire, & ſitire, nunc iuſtitia & iuſto viro attribuis, Domine. Eſurientibus autem & ſitientibus promittis ipſorum auaritatem perfectam in cœlo ſatiare, & replere. Vnde ſequitur, *quoniam ipſi ſaturabuntur*, ſcilicet largitate tui remunerantis, quoniam maiora, erunt Domine, tua præmia quàm ſanctorum merita; Vel *ſaturabuntur* in præſenti illo cibo de quo tu dicis, Domine,

Ioan. 4. *meu cibus est ut faciam voluntatem Patris mei, quod est iustitia. Et illa aqua de qua quicumque biberit fiet in eo fons aquae salientis in vitam eternam.* Opera namque bona cibus sunt animae; virtutes etiam quae sunt quasi quaedam membra animae sustentantur & reficiuntur, propriis operibus: & sine illis deficerent. Ideo rectè dicitur esuries esse iustitia. Esuries enim est respectu nutrimenti & refectionis.

Prov. 31. *3.* Qui igitur Domine Iesu Christe, esuriunt & sitiunt iustitiam, id est, vitae rectitudinem vel bonitatem, & in se, & in aliis beati sunt, quia saturabuntur in futuro, adepto eo quod desiderant, quia totaliter viuent tibi, & bona eorum opera tunc pascent eos. Ideo scribitur. *Date illi de fructu manuum suarum*, bonorum scilicet operum suorum. Sed clementissime Domine Iesu, hac beatitudine meipsum priuavi propter peccata plurima quae commisi. Digneris illa delere ex tua immensa clementia: fac ut esuriam & sitiam iustitiam, & saturari valeam in æternum. Amen.

CAPVT VII.

De quinta Beatitudine.

Matt. 9. *1.* Iustitia & misericordia, piissime Domine Iesu Christe, conjunctæ sunt, & altera ab altera temperatur. Iustitia sine misericordia, crudelis est; & misericordia sine iustitia dissolutio est. Ideo Domine, postquam doctrinam de iustitia nobis clementer ostendisti, nunc de misericordia humiliter nos informas, dicendo: *Beati misericordes quoniam ipsi misericordiam consequentur.* Misericors Domine est, quasi cor miserum habens, quia alterius miseriam quasi suam reputat, de alterius damno quasi de suo dolet. Nec solam Domine ista misericordia intelligitur in elemosynis corporalibus, sed etiam in omni eo quod est necessarium proximo, siue sit spirituale, siue corporale, ut sic alter alterius onera portemus.

2. Beati igitur sunt, Domine, qui subueniunt miseris, quoniam eis ita rependeretur ut de miseria liberentur, prout ibi sequitur, *quoniam ipsi misericordiam consequentur.* In tantum enim tu Domine delectaris in nostro beneuolentiae affectu, ut solis misericordibus sis misericordiam præstiturus, sed non erit aequalis Domine, quia maior per infinitum est tua misericordia, quam humana. Beati ergo sunt Domine misericordes. Et quid est, dulcissime Domine Iesu Christe, misericordia nostra, nisi miseriae alienae quædam compassio in corde, qua ubi possumus subuenire compellimur? Seruit autem iste motus rationi quando ita præbetur misericordia ut iustitia conseruetur, siue cum indigenti tribuitur, siue cum ignoscit penitenti. Bonus est igitur homo, Domine, qui dum aliis subuenit, sibi consulit, & in alieno remedio vulnera sua curat. Cognoscit se hominem qui nouit ignoscere, & ite per vias tuas Domine, qui carne suscepta maluisti in hunc mundum venire redemptor, quam iudex.

3. O misericordia quæ peccato obsistis, tu spatium penitentiae hominibus

DE OCTO BEATITVDIN.

125

bus impetras: temporalia multiplicas, Dominum placas, à morte spiri-
tuali hominem suscitari facis, gratiam conseruas, & hostem impugnas. Qui
igitur perfectè misericors est, beatus representatur quoad spem, tandem
futurus beatus in re. *Beati igitur misericordes quoniam ipsi misericordiam con-*
sequuntur. Respicere me digneris misericors Deus, & fac mecum miseri-
cordiam tuam, vt te auxiliante in præsentī sic misericorditer viuam, quod
misericordiam consequar sempiternam. Amen. Matt. 9.

G A P V T V I I I.

De sexta Beatitudine.

1. **C**onuienter, Domine Iesu Christe benignissime, sexto loco posuisti
cordis munditiē, quia sexto die fuit homo cōditus ad imaginem Dei,
quæ fuit deformata per culpam: sed in mundis corde reformatur per gra-
tiam. Vnde das doctrinam salutarem illis qui te videre desiderant, dicendo:
Beati mundo corde, quoniam ipsi Deum videbunt. Illos Domine vocas
mundos corde, qui vniuersalem virtutem possident, & nullius malitiæ sibi
conscijs sunt: vel qui in temperantia consistunt, quæ maximè est necessaria
ad videndum te Domine; iuxta illud quod scribitur, *Pacem sequimini & san-*
ctimoniam, sine qua nemo videbit Deum. quoniam sunt multi qui misereantur
proximis, sed impudica agunt. Ostendis igitur Domine quia primum, sci-
licet misereri non sufficit sine secundo, id est, sine munditia cordis, ideo
post misericordiam apposuisti de munditia cordis. Matt. 5.
Hab. 12.

2. Et quia tu Domine mundus es, & à mundis corde vis conspici, ideo
scribitur, *quoniam ipsi Deum videbunt.* Ista autem visio, merces est fidei, cui
quidem mercedi, per fidem corda mundantur. Et secundum quod mundan-
tur, secundum hoc magis aut minus videris ab hominibus, Domine. In hac
quidem vita imperfectè, quia in speculo, & ænigmate; in sæculo autem
futuro, videris facie ad faciem, à mundis corde. Non enim potes videri sicuti
es facie ad faciem in tua diuinitate, nisi quis funditus moriatur: siue anima
exeat à corpore, siue ita alienetur à carnalibus sensibus, vt meritò, sicut ait
Apostolus, *in corpore vel extra corpus nescio.* In illa non subiacetur vitio.
Mundum est igitur cor ab omni forde peccati, mundus enim rex, mundum
vult habere populum, mundus homo, mundum lectum.

3. Vnde, mundissime Domine Iesu, cum tu sis mundus rex, mundus Do-
minus, mundus homo, & in cordibus humanis, cogitationibus & affectioni-
bus tibi elegeris domum ad quiescendum, ad habitandum, & ad imperan-
dum, summè necesse est quod hæc omnia sint munda & ab omni peccato
penitus aliena. Sed vix mihi iniquissimo peccatori, clementissime Domine
Iesu Christe, ob immunditiam cordis mei, qua impediēte, necdum mereor
ad illam beatissimam visionem tuam admitti. Sed ad tuam infinitam boni-
tatem recurro, vt digneris ex immensitate tuæ bonitatis, seu pietatis, cor
meum mundare, & mundum creare, vt liberatus ergastulo huius vitæ, fa-
cie ad faciem te videam in æternum. Amen.

R.

De septima Beatitudine.

1. **T**V misericordissime Domine Iesu Christe, qui es rex pacificus, humili doctrina prædicasti, pacificos esse beatos, dum dixisti: *Beati pacifici, quoniam Filij Dei vocabuntur.* Pacifici namq; Domine Iesu, sunt qui primò in corde suo, deinde inter fratres dissidentes, faciunt pacem. Pacifici, Domine, sunt illi, qui in semetipsis, sui animi motibus compositis, & rationi subditis ac carnalibus concupiscentiis edomitis, faciunt regnum tuum. In talibus enim hominibus, illud quod est in eis præcipuum & excellens, imperat cæteris reluctantibus; quæ sunt nobis cum bestiis communia, atque id ipsum quod in eis excellit, id est mens, eis non subicitur. Et hæc est pax quæ datur in terra hominibus bonæ voluntatis; non tamen potest esse in aliquo quin nec vita nec lex repugnans legi mentis non sit omnino in membris: Sed hæc regunt pacifici, domando concupiscentias carnis, donec ad pacem plenissimam quæ erit in patria, veniatur.

2. Beati ergo sunt homines pacifici qui pace gaudent intra se, & extra se, etiam erga inimicos. Quantum est ad se, pacem habent ad omnes. Illa est pax beata, quæ in corde posita est, non tantum in verbis. Quia autem qui pacem diligunt filij sunt pacis, & Beatitudo pacificorum, adoptionis est merces, ideo subditur, *Quoniam Filij Dei vocabuntur.* In præsentī meritò vocantur Filij Dei, qui exercent officium illud quod tu Domine Iesu Christe habuisti in hoc mudo, in quo bella pacificasti: sicut de te scribitur. *Confregit potentias arcuum, scutum, gladium, & bellum.* In tuo namque aduentu, impletum fuit quod scribitur. *Constabunt gladios suos in vomeres, & lanceas suas in falces.* Tu Domine es pax nostra; tu sedasti litem quæ erat inter nos & Deum Patrem, quoniam fecisti iudicium, & causam meam. Tu Domine finis es, ideo in te quiescendum, & in te pax habenda est, non in via, sed in fine viæ.

3. O benignissime Domine Iesu Christe, ego miser peccator non sum pacificus interius propter plurima & varia peccata quæ commisi, & quotidie committere non desino; neque exterius cum proximis, quia multipliciter eos offendi, & quotidie offendo, verbo, consensu, aut opere. Parce igitur mihi Domine; da mihi pacem in diebus meis, Domine per tuam immensam misericordiam, vt hæreditatem filiorum consequar in æternum. Amen.

CAPVT X.

De octaua Beatitudine.

1. **C**Lementissime Domine Iesu Christe, beatos doces & prædicas persecutionem patientes propter iustitiam, dicendo. *Beati qui persecutionem patiuntur propter iustitiam, quoniam ipsorum est regnum calorū.* Propter

iustitiam, inquam, id est propter veritatem, propter pietatem, propter defensionem aliorum: & generaliter propter quamcumque virtutem. Iustitia enim pro omni virtute poni consuevit Domine. Vnde Domine, signanter dixisti, *propter iustitiam*. Multi namque propter peccata sua patiuntur passionem & persecutiones, & non sunt iusti, ac per hoc nec beati. Ideo scribitur, *Si quid patimini propter iustitiam, beati estis*. Non enim aspiciendum est ad personas persequentes, sed solummodo ad causam propter quam infertur persecutio. 1. Pet. 3.

2. Ista octaua Beatitudo, Domine Iesu Christe piissime, est quedam firmitas aliarum beatitudinum, quia ex hoc apparet, Domine, de illo, quoniam est firmatus in paupertate, in nuditate, in luctu prædicto, in esurie iustitiæ, in amore misericordiæ, in munditia cordis, & in tranquillitate pacis; quoniam propter nullam persecutionem à quocumque illatam propter iustitiam, deserit aliquod istorum, nec paupertatem, nec nuditatem, nec aliquod aliorum. Ideo isti beatitudini octauæ, omnium Beatitudinum debentur præmia. Vnde tu, Domine Iesu Christe, in assignando eius præmium, redis ad caput, dicens, de persecutionem patientibus. *Propter iustitiam, quoniam ipsorum est regnum cælorum*. Primum igitur (Domine) præmium, scilicet regnum cælorum, quod assignasti pauperibus spiritu, assignasti etiam istis, vt ex hoc intelligeremus, quod etiam omnia alia prima, videlicet terræ possessio, plena consolatio, saturatio, misericordia, Dei visio, ac etiam eiusdem filiatio debentur istis. Regnum igitur cælorum, Domine Iesu Christe dulcissime, pauperibus & martyribus promittitur, quia paupertate quidem emittitur; sed in passione pro te, sine omni dilatione percipitur. Et sic emittitur dolore gaudium, labore requies, vilitate gloria, & morte vita. Mat. 5.

3. O misericordissime Domine Iesu Christe, iniquissimus peccator sum: Et si persecutiones passus sum, hoc est propter peccata quæ innumerabilia commisi, adiuuare me digneris Domine, misericorditer indulgendo, vt te donante & miserante, ad regnum perueniam sempiternum. Amen.

CAPVT XI.

Cur beatitudines donis Spiritus sancti adaptantur.

1. Timor Domini, Domine Iesu Christe, congruit humilibus, de quibus dicitur. *Beati pauperes Spiritu*, id est non alta sapientes sed timentes; timor namque humilitatem introducit, sicut qui solet se inclinare timore gladij supra se eleuati, ideo scribitur, *Humiliamini sub potenti manu Dei*, Domine Iesu Christe piissime, mitibus conuenit pietatis donum, quia per pietatem, quis compatitur membris Christi, & non affectat nocere proximo, quod est mitem fieri. Dulcissime Domine Iesu Christe lugentibus conuenit scientia, qui cum fuerint scientia illustrati, sciunt quibus malis inuoluantur, vt dolere & lugere oporteat. Sic scribitur, *Qui addit scientiam addit laborem*. Non enim potest aliter homo scire in quibus bonis vel malis sit in Mat. 5.
1. Pet. 5.
Eccl. 3.

R. ij

præsenti vita. Mansuetissime Domine Iesu, fortitudinis donum conuenit esuriens & sitientibus iustitiam: ne in via lassescant. Et sicut de fortitudine bellica prouenit esuries certantium, sic de dono fortitudinis prouenit esuries iustitiæ in præsenti vita, quæ certamen habet, ut scribitur: *Militia est vita hominis super terram.*

Iob. 7.

2. Misericordissime Domine Iesu Christe, misericordibus conuenit donum consilij, quia omne remedium & consilium ut possis de tantis malis erui, est dimittere aliis, & dare: quod est hominis misericordis. Eget namque misericordia spiritu consilij, sine quo nemo æterno spectaculo inferetur. Mundissime Domine Iesu Christe, mundis corde congruit intellectus, qui est oculus mentis, ut purgato oculo intellectuali videre possint, quod oculus non vidit. Sapientia increata, Fili Dei benedicti, donum sapientiæ conuenit pacificis, in quibus nullus motus est rebellis, sed omnia obtemperant

Psal. 4.

spiritui. Et si Domine præparant tibi locum quietis; ut dicas, *In pace dormiam & requiescam.* Octauæ beatitudini, Domine, non adaptatur specialiter donum Spiritus Sancti, quia illa est confirmatio & manifestatio omnium præcedentium. Et omnia præmia quæ debentur aliis septem, debentur isti octauæ. Et ita intelligendum est de aliis præmiis, sicut de possessione terræ, de consolatione, & aliis.

3. Adiua me, clementissime Domine Iesu Christe, per tuam immensam bonitatem, ut sic viuam gratia tua in præsenti, quod merear obtinere præmium gloriæ sempiternæ. Amen.

C A P V T XII.

Quare aliud præmium assignatur Beatitudinibus quàm regnum cælorum.

1. **A**mantissime Domine Iesu Christe humanæ salutis amator, tu pauperibus spiritu & persecutionem patientibus propter iustitiam, regnum cælorum promissisti, in quo omnia bona continentur. Quare piissime Domine Iesu Christe, aliis beatitudinibus, ipsum regnum non promissisti? Certè Domine Iesu Christe piissime, præmia aliarum beatitudinum nihil aliud sunt quàm regnum cælorum, quod est vita æterna, & ipsa beatitudo perfecta intelligitur. Verum quia ipsam beatitudinem æternam, humanus intellectus non capit; ideo ex immensitate clementiæ tuæ, illam per diuersa bona nobis nota descripsisti, attribuendo ipsis beatitudinibus ipsa præmia quæ prædictis beatitudinibus attribuuntur, & in vita futura consummabuntur.

2. Interim autem in hac vita quodammodo inchoantur, quia istæ beatitudines sunt quædam inchoationes beatitudinis æternæ. Regnum enim cælorum quod est præmium primæ beatitudinis potest intelligi, Domine Iesu Christe, perfectæ Sapientiæ initium, per quam tu Domine regnas in

DE OCTO BEATITVDIN.

119

homine, vnde scribitur, *Initium sapientie timor Domini*. Possessio autem terræ quæ debetur mitibus, significat effectum bonum animæ quiescentis in stabilitate hereditatis perpetuæ, quæ per terram designatur. Vterius consolantur, Domine, sancti viri in hac vita percipiēdo Spiritum Sanctum, qui Paraclitus dicitur, id est consolator. Saturantur etiam in hac vita cibo, de quo tu dixisti, *Meus cibus est vt faciam voluntatem Patris mei*. In hac etiam vita fit purgatio oculi per donum intellectus, quo quodam modò potes videri, Domine. Similiter etiam, Domine, in hac vita qui motus suos pacificat, ad similitudinem Dei accedentes Filij Dei nominantur. Ioan. 4.

3. Hæc igitur præmia, Domine Iesu Christe piissime, imperfectè & inchoatiuè habentur in hac vita; numquam tamen perfectè, sed præmia quæ post hanc vitam promittis, Domine, nullis verbis exprimi possunt. O misericordissime Domine Iesu Christe, respice me iniquissimum peccatorem, oculo tuæ pietatis immensæ, & remitte mihi clementer flagitia, quæ iniquè commisi, & concede mihi istas beatitudines in præsentī, & in futuro beatitudinem sempiternam. Amen.

C A P V T X I I I.

Quare beatitudines sunt hic preparatiua beatitudinis æternæ.

1. **S**unt istæ beatitudines, Domine Iesu Christe, quædā inchoationes beatitudinis æternæ, & ad ipsam quædam præparationes. Quædam enim de ipsis sic disponunt ad æternam beatitudinem, te iuuante, quod amouent illa quæ impediunt; quædam autem sic disponunt, quod ponunt illa quæ omnino expediunt.

2. Inter cætera, Domine Iesu Christe dulcissime, tria sunt quæ impediunt. Primum est affluentia bonorum externorum: siue sint diuitiæ, siue sint honores, & ab iis retrahitur homo per primam beatitudinem, qua dicitur, *Beati pauperes spiritu*. Quod refertur potest ad contemptum honorum vel diuitiarum. Secundum quod ab æterna beatitudine impedit, est sequi passionem irascibiles quæ mouent homines ad litigandum & ad turbandum proximos: & ab isto retrahitur homo per secundam, qua dicitur, *Beati mites*. Tertium impedimentum, Domine, est sequi passionem concupiscibiles, quæ mouent hominem ad vana gaudia, & ad lætitiā ineptam: à quibus retrahitur homo per tertiam, qua dicitur, *Beati qui lugent*. Inter alia, piissime Domine Iesu Christe, quæ expediunt ad acquirendam æternam beatitudinem; quædam sunt quæ ordinant hominem respectu proximi, & sunt duo; vnum sub ratione debiti, & hoc, Domine, pertinet ad seruens desiderium iustitiæ, de quo dicitur, *Beati qui esuriunt & sitiunt iustitiā*. Aliud est sub ratione spontanei beneficij, & hoc pertinet ad misericordiam. *Beati inquit, misericordes*. Illa verò Domine quæ ordinant hominem respectu sui, sunt duo; vnu Matt. 5.

R. iij

de munditia cordis, vt scilicet passionibus non inquinetur; & de hoc dicitur, *Beati mundo corde*. Secundum est tranquillitas mentis, per quam homo accedens ad Dei similitudinem, Dei filius nominatur. Et de hoc dicitur, *Beati pacifici*. Octaua autem beatitudo, Domine Iesu Christe, pertinet ad septem præcedentes scilicet. *Beati qui persecutionem patiuntur propter iustitiam*. Qui enim pie viuunt, multa patiuntur, sicut scriptum est. *Omnes qui volunt pie viuere in Christo persecutionem patiuntur*. Numquàm enim Domine, fuit aliquis aduersus pie viuens in te, quin persecutiones passus fuerit propter iustitiam, & hoc à carne sua concupiscente aduersus spiritum, à dæmone, vel ab homine malo, Iudæo vel Pagano, vel Hæretico, vel falso Christiano desertore iustitiæ.

3. O Benignissime Domine Iesu Christe, dispone me per tuam infinitam misericordiam ad obseruantiam istarum beatitudinum, vt te donante consequar beatitudinam. Amen.

CAPVT XIV.

Quare Beatitudo æterna redditur per iustitiam.

1. **B**eatitudinem hæc obseruantibus & tenentibus, Domine Iesu Christe, benignissimè promittis, & das mercedem æternam, dicendo eis, *gaudete & exultate quoniam merces vestra copiosa est in celis*. Vnde beatitudo perennis, propter quam gaudent beati ineffabiliter, redditur à te, Domine, per iustitiam. Et idcirco dicitur *merces*. Merces enim secundum humanam loquutionem dicitur illud, quod redditur operanti, sicut scribitur. *Cum sero esset factum, vineæ Dominus, per quem intelligi potes Domine, dæxit procuratori suo, voca operariis, & redde illis mercedem*.
2. Serò igitur quod est mors cuiuslibet, vel ipse finis mundi, tu Domine reddis & reddes cuiuslibet fidei operario mercedem, id est beatitudinem æternam tanquam sibi debitam, & ideo scribitur, *Ei autem qui operatur, id est qui facit iusta opera & bona, merces non imputatur secundum gratiam, sed secundum debitum*, scilicet suæ operationis. Id est, in hoc quod sibi redditur ista merces, non tantum fiet sibi gratia sed debitum, quia, vt scribitur, *di- gnus est mercenarius mercede sua*. Non igitur fiet tantum sibi gratia, sed etiam debitum, gratia enim fit, eo quod principium & forma omnis operationis bonæ, venit à gratia gratis data, & non ex meritis. Et ideo merces illa imputatur etiam principaliter ipsi gratiæ, imputatur etiam non solum ipsi gratiæ, sed etiam merito bonæ operationis, tanquam debita. Et ideo quantum ad hoc, merces, quæ est beatitudo æterna redditur, per iustitiam, vnde Apostolus scribit, *reposita est (inquit) corona iustitiæ, quam reddet mihi Dominus in illa die*, scilicet extrema iudicii, vel in die cælestis patriæ, vbi erit solum dies, cui nox non succedet.
3. Reddes igitur tu, Domine, qui es iustus iudex, retribuēsque bona iuste pro bonis, sed non sine misericordia, vt dictum est. Et quod tu Domine, qui

DE OCTO BEATITVDIN.

131

esiustus iudex, vocas mercedem, Apostolus *coronam iustitiae*: ergo beatitudo redditur per iustitiam. Da mihi clementissime Domine Iesu Christe, per tuam clementiam, gratiam per quam bona opera agam, vt gratia & iustitia tua beatitudinem consequar sempiternam. Amen.

CAPVT XV.

Quod Beatitudo aeterna augetur per clementiam.

1. **T**anta est clementia tua, Domine Iesu Christe, ad tuos electos, quòd beatitudinem eis auges per tuam infinitam clementiam, idcirco dicis eis: *merces vestra copiosa est.* Et benè est Domine copiosa, quia longè maiorem beatitudinem das cuilibet beato, quam meruit; vnde beatus quilibet beatificatur à te vltra condignum. In omni namque opere tuo, semper sunt simul iustitia & misericordia, nec possunt ab inuicem separari, vnde & in punitione reproborum non solum est iustitia, sed misericordia etiam: quia puniuntur citra condignum. Et sic in beatificatione electorum, non solum est iustitia, sed etiam misericordia, quia vltra condignum: & ideo dicitur, *merces copiosa & alibi, merces multa.* Illud autem piissime Domine Iesu Christe, quod est ex quadam excellentia, omnem transcendit mensuram & numerum, indeterminatè dicitur *magnum* vel *multum.* Ideò scribitur de te quia *multus es ad ignoscendum, & quòd patiens es, & multa misericordia.* Ita etiam merces gloriæ tuæ, indeterminatè dicitur multa, quia omnem mensuram & numerum ac etiam meritum excedit. Mart. 5.

2. Et idcirco dulcissime Domine, non solum tradis eam ex iustitia, sed etiam auges ex misericordia. Ita merces multa & copiosa, es, tu-met, misericordissime Domine Iesu Christe qui es beatitudo increata & infinita. Igitur merces tua dici potest copiosa, & magna nimis, & indeterminatè multa: quia excedit omnem mensuram. Non tantum simpliciter & absolute sicut bonum increatum excedit creatum, sed etiam quia excedit mensuram omnis mentis. *Est enim status omnium bonorum aggregatione perfectus.* Quamuis autem tres diuinæ personæ sint vna merces, & vna beatitudo omnium electorum, tamen scriptura specialiter dicit de te Domine, *Cum dederis dilectis tuis somnum, ecce hereditas Domini.* id est beatitudo cœlestis patriæ, scilicet offertur eis. Quod autem eris illa hereditas, declarat cum subdit, *Filius merces fructus ventris tui,* id est fructus ventris virginalis, de quo scribitur *Benedictus fructus ventris tui,* iste quidem fructus, erit merces filij tui adoptiui, id est cuiuslibet electi. Luc. 6.

3. Hanc mercedem concedere & augere mihi digneris per tuam misericordiam, vt tecum maneam in æternum. Amen. Isai. 55.

Quòd beatitudo aeterna firmatur in aeternum per potentiam.

1. **P**Er tuam potentiam, misericordissime Domine Iesu Christe, aeterna beatitudo in beatis tuis electis firmatur & continuatur sine fine, quia scriptum est *ipsi autem in perpetuum uiuent, & apud Dominum est, id est aeternaliter, merces eorum*, quod esse non posset sine tuae virtutis influentia & assistentia; ista autem continuatio perennis est, quia dicitur *merces copiosa est in caelis*, quod enim est, perstat neque transit. Ideo tu piissime Domine Iesu Christe, das nobis salutiferam doctrinam, dicendo. *Thesaurizate vobis thesauros in caelo, ubi nec arugo nec tineae demolitur, & ubi fures non effodiunt nec furantur*. Id est, ubi nihil transit, sed bonum quod est ibi semper permanet. Ideo alibi scribitur: *vendite quae possidetis, & date eleemosynam, facite vobis sacculos qui non veterascunt, thesaurum indeficientem in caelis*.
2. Thesaurus iste qui semper manet in caelis, & numquam potest deficere, es tu Domine, qui es ipsa beatitudo merces obiectiua omnium electorum, ipsiusque visio & perfecta cognitio, erit merces formalis sicut scribitur. *Hac est vita aeterna*. Tu dicis Domine Iesu Christe Deo Patri tuo, *ut cognoscant te Deum verum, & quem misisti Iesum Christum*. Et si haec diuinae tres personae sint omnium bonorum una merces, unumque obiectum beatificum, tamen tibi attribuitur, Domine Iesu Christe, quia licet tu una, cum Patre & Spiritu Sancto beatificetis principaliter secundum diuinitatem; quodammodo tu, Domine Iesu Christe, beatificas omnes electos homines, & forsan Angelos secundum humanitatem. Ergo merces illa, est merces copiosa, quia *apud te est misericordia & copiosa redemptio*. Ista est mensura bona & conferta & coagitata & supercelsus, quam das tuis electis, propter quam gaudent & exultant ineffabiliter.
3. Hanc mercedem paratam habes, Domine, ex tua misericordia, dare tuis electis secundum opera eorum, sicut scribitur de te, *Ecce venio cito, & merces mea mecum est, dare unicuique secundum opera sua*. Hanc mercedem non merui ex operibus meis, Domine Iesu Christe, quia iniquus peccator sum. Sed iustificare me digneris per tuam inmensam pietatem, ut te donante, mercedem obtineam sempiternam. Amen.

CAPVT XVII.

De Beatitudinibus peccatorum, delectantium se in mundanis.

1. **H**omines lasciuui, Domine Iesu Christe, beatitudinem & finem boni, ponunt in deliciis carnis, & superbi altitudinem quarunt dignitatum & honoris eminentis. Auari autem ipsam quarunt in diuitiis, ignorantes, aut frequenter non considerantes ex malitia, quod *beatitudo est status om-*

DE OCTO BEATITVDIN.

133

omnium bonorum aggregatione perfectus. Vnde, Domine Iesu Christe piissime, vbi bonum aliquod deest, beatitudo esse non potest. Nam pereunt deliciae, diuitiae, & honores, deficiunt dignitates. Deliciae; Domine Iesu Christe dulcissime, beatum aliquem non faciunt, qui sponte fastidiuntur, aut in ventre putrescunt, & saepe aegritudinum causa, & mortis existunt. Lasciuiæ, Domine, beatum non faciunt, quia tristitiam inducunt, vires corporis minuunt, & ad mortem disponunt. Honores autem Domine, beatum non faciunt, quia quantum hominem ad altiora subuehant, tantum ei præcipitium ingerunt, quantum gradus est altior. Vnde ascendere nihil aliud est quam sibi præcipitium præparare.

2. Falsa igitur est, mitissime Iesu Christe, & vana beatitudo quæ haberi potest, à malis in mundo. Hanc autem beatitudinem describit Propheta, sed eam esse beatitudinem, non asserit, dicens. *Erue me, Domine, de manu filiorum alienorum, quorum os loquutum est vanitatem, & dextera eorum dextera iniquitatis,* & ista est, Domine, oris & operis iniquitas; sed addit de prosperitate mundana quoad felicitatem, dicens. *Quorum filij sicut nouella plantationes, in iuuentute sua, filia eorum composita circum ornata ut similitudo templi.* Addit Domine de diuitiis, quia *promptuaria eorum plena, eructantia ex hoc in illud. Oues eorum fœtosa.* Addit, Domine, de corporum sanitate quia *non est ruina macerie, neque clamor in plateis eorum; & beatum dixerunt populum cui hec sunt.* Sed tales non asserit homines, Domine Iesu Christe, propheta beatos; sed dicit *beatus populus cuius est Dominus Deus eius.* Non enim possunt dici beati, Domine, propter bona supradicta quæ citissime transeunt, nec ducunt ad vitam, sed ad damnationem æternam.

3. O misericordissime Domine Iesu Christe, miser factus sum & fui, istas transitorias beatitudines amplexando & diligendo, potius quam beatitudinem sempiternam. Adiuua me Domine per tuam immensam pietatem, & aufer à me istas damnosas beatitudines, vt in beatitudinibus quas docuisti, operando, te donante, ad beatitudinem perueniam sempiternam. Amen.

CAPVT XVIII.

De Beatitudinibus hominum vigilantium in mandatis diuinis.

Beatissimus est ille seruus, sicut scribitur, Domine Iesu Christe piissime, quem *Mat. 24.* cum venerit Dominus, inuenerit vigilantem. Amen dico vobis quod super omnia bona sua constituet eum. Si igitur beatissime Domine Iesu Christe, beati esse volumus hac beatitudine, necesse est vt vigilemus specialiter in duobus, scilicet vt mala sollicitè declinemus, & bona sollicitè faciamus. Nam malum dimittere, & bonum facere sunt duæ partes iustitiæ, quibus peruenimus te iuuante ad beatitudinem, non solum viæ, sed & patriæ. Vnde dicit propheta. *Beatus vir qui non abiit in consilio impiorum, & in via peccatorum non stetit.* Et sic est Domine, mali dimissio sed in lege Domini, vo-

S

tentiam.

terna bea-
fine, quia
d est eter-
fluentia &
ces copiose
mine Iesu
vobis the-
effodiant
et perma-
am, facire
lis.

deficere,
lectorum,
scribitur.
vi cognos-
tres per-
atificum,
um Patre
em; quo-
nines, &
uerces co-
mensura
s, propter

dare tuis
to, & mer-
nercedem
peccator
e donan-

indanis.

em boni,
gnitatum
orantes,
tatis om-
quinta

lunas eius. Et sic est, Domine, boni operatio. In desertione autem mali, ponit, Domine, propheta, tria, scilicet *abire, stare, & sedere*; Plus enim est *stare* quam *abire*, & plus *sedere* quam *stare*. Nam benignissime Domine Iesu Christe, *abire* est citò transire, sed *stare* est quadam stabilitate manere, sed *sedere* est perfectè quiescere.

2. Abire igitur, est malis consiliis modicum consentire; stare, est malis operibus operam dare; sed sedere, est peccatum in consuetudinem trahere. Primum ergo scilicet consentire, est malum; secundum, id est malis operibus operam malam dare, est maius malum; sed in malo perseverare, quod est ipsum in consuetudinem trahere, est pessimum. Sed prima, Domine, duo malorum genera, facillè sunt corrigibilia; sed tertium est quasi in naturam versum, nec absque magna difficultate relinquendum. Ideò non sine tua pietate Domine, curationis est susceptivum. Est enim consuetudo Domine, quasi altera natura, quia naturale fit, quod diutius implevit.

3. Igitur Domine Iesu Christe clementissime, si beatitudinem vitæ æternæ obtinere cupimus, ante omnia à malo nos retrahere debemus, nec stemus, nec ambulemus in consilio impiorum, sed in lege tua Domine meditari debemus in die ac nocte; Vt per legem discamus quid corde credendum, quid sperandum, quid amandum, quid meditandum, quid ore loquendum, quid orandum, quid aliis consulendum, quid opere sit agendum, quid fugiendum, quid de Deo, quid de proximo sit apprehendum, unde scribitur.

Psalm. 118. Beati immaculati in via, qui ambulant in lege Domini, quantum ad recessum à malo, & quantum ad promotionem in bono.

4. O misericordissime Domine Iesu Christe, parce mihi per tuam clementiam, quia non reliqui malum, nec bona egi ut deberem. Concede mihi posse & velle bonum facere, ut fruor beatitudine sempiterna. Amen.

C A P V T XIX.

De Beatitudinibus hominum fruuentium bonis æternis.

1. **N**on est vana neque transitoria, Domine Iesu Christe clementissime, illa beatitudo hominum fruuentium bonis summis, pacificis & æternis & deliciis infinitis. Ista sola est perfecta, quia ab omni malo prorsus remota, & omnibus bonis plena, quia serena, & iocunda, secura, & pacifica, & æterna. In illa summa beatitudine, piissime Domine Iesu Christe, videtur lumen æternum, id est, tu Domine videris, sicuti es; quod erit summè delectabile; quia te visis, videntur omnia, sequuntur omnia, sciuntur omnia, cognoscuntur omnia, quæ beatitudini humanæ sunt necessaria. Et sicut obiecta omnia resultant in speculo, sic etiam ibi omnia resultant in te speculo æterno, unde scribitur, *Beati oculi qui vident quæ vos videtis.*

Luce. 10.

2. Huiusmodi visio, Domine Iesu Christe benignissime, tam iucunda est, quòd si quis in inferno existeret & te videret, nullum dolorem sentiret, quia dolorem magnum maior delectatio absorberet. Nam Domine, in hac vita

multi fuerunt sancti, qui propter delectationem incommutabilis boni, ita à sensibus omnibus pro tunc fuerunt abstracti, quod nihil exterius sentiebant. Illa etiam beatitudo, suauissime Domine Iesu Christe, consistit in audiendo te summum magistrum. Multum namque delectat & demulcet auditum, harmonia instrumentorum. At longè incomparabiliter Domine delectant & demulcent auditum, melodia cœlorum, & melodia innumerabilium Angelorum, & melodia sanctorum, & insuper melodia æternarum personarum.


4. O Dulcissime Iesu Christe, si delectare sic potuit audientes musica Platonis, eloquentia dulcis Livi, & rhetorica Ciceronis, sapientia Salomonis, quod à finibus terræ homines ad se traxit, sine comparatione Domine amplius, imò in infinitum plus delectat & demulcet auditum, audire te, sapientiam diuinam, qui sapientiam omnibus confers. Si enim Domine, tam dulce est in hac vita te audire, sicut attestatur propheta dicens, *Quam dulcia* Psal. 118.
sancibus meis eloquia tua, super mel oris meo! Quid erit tunc Domine, quid erit? Certè nihil est nec erit delectabilius, quàm videre te lumen æternum; nihil suauius, quàm te summum magistrum audire, nihil dulcius, quàm gustare te, panem mellissimum & cœlestem.

4. O misericordissime Domine Iesu Christe, indulgere mihi digneris per tuam bonitatem, & misericordiam, remittendo mihi iniquitates & peccata: & disponere me digneris, vt te miserante, te donante, ad beatitudinem perueniam se impiternam. Amen.

CONTEMPLATIONES IDIOTÆ
de Amore.

CAPVT I.

Quid sit amor.

1.  MOR, dulcissime Domine Iesu Christe, fons veri amoris, est affectio vehemens cordis & animæ, ac mentis applicatio ad aliquid diligendum. Inclinat enim amor amantem. Neque in hoc laborat, licet labor non amantibus grauis sit. Amor namque difficultatem non nouit; sed impatiens est, nisi inueniat quod desiderat: nec aliud cogitat, quàm quod diligit, nec accipit de dilatione solatium. Lucerna fulgoris, est verus amor; ardens in mente per desiderium, & splendens in facie per exemplum. Et hic amor, iam nudus non est & purè naturalis, sed indutus fontani amoris radio: iam infusus, iam purgatus, iam illuminatus & eleuatus supra naturæ potentiam, iam

S ij

patiens, iam formatus. Qui spiritus forma est, purè naturalis & per se agens, informis est, impotès & depressus. Amor naturalis, fulgor oculi in tenebris: amor infusus, fulgor oculi in lumine; vel veriùs, lumen efficax in fulgore.

2. Amor ceteros affectus in se ducit & captiuat. Viget namque ipse amor, cum præsto est quod amatur, & languet, cum abest. Quod nihil aliud est Domine Deus meus, quàm tedium quoddam impatientis desiderij, quo necesse est affici mentem vehementer amantis, absente eo quem amat. Natura quippe amoris est semper amare, proprium postponere, & commune præferre, diuersa corde vnire, extraneum domesticum facere, corda iracundia ignita extinguere, pacem semper procurare. Amor contracta solidat, depressa subleuat, nutantem animum constantem reddit. Amor docet & addiscit, & inimicum nescit. Amor laudat; amor reprehendit; amor praua suspitione caret. Vbi amor defuerit, nihil valet quicquid agitur. Contra, omnia valent, quæ cum amore aguntur, Amor, hominem lætificat, & à terrenis subleuat. Amor, numquam est otiosus, sed semper aliquid operatur, semper crescit & augetur. Amor vita est animæ, & qui non amat, mortuus est.

3. Verus amor non requirit præmium, etsi mereatur. Sine amore, nec elemosynæ largitio, nec martyrij susceptio, nec aliquorum bonorum operatio, proficere ad habendum salutem potest. Amor hominem perficit, omnia sultinet, omnia patienter portat. Amor facilis res est, omnibus se exhibet, nulli se negat. Caput eum bonus & malus, iuuenis & senex, vir & mulier, sanus & infirmus, diues & pauper, summus & infirmus, liber & seruus, secularis & religiosus, debilis & fortis: nec est qui se valeat excusare, quin in eum dirigat radios puri amoris.

4. O amantissime Domine Iesu Christe, vnde omnis defluit amor, ego sceleratissimus peccator, semper frigidus fui, & ab amore multipliciter elongatus. Singularis fui & sequestratus, ac sine amore & dilectione degens; adeò quod frequenter etiam vixi cum odio & simultate. Adiuuare ergo me digneris per tuum dulcissimum amorem, & accendere cor meum ad amorem tibi placitum: vt amem & diligam quæ amare & diligere debeo, vt vitam amoris, in te amando, consequar sempiternam. Amen.

CAPVT II.

Vnde oriatur amor.

1. **O** Ritur amor, dulcissime Domine Iesu Christe fons veri amoris, velut lacrymæ quæ ab oculis in pectus cadunt, quia ab intellectu amor oritur & cadit in cor per fidem. Sic sancti per fidem vicerunt regna. Fides enim sanctissimum bonum est humani pectoris, quæ nulla necessitate ad fallendum cogitur, nec villo corrumpitur præmio, sed est firmamentum stabilitatis & constantiæ in animo. Oritur amor à gratia Dei patris, sicut tu Domine Iesu Christe, amantium vita dixisti: *Nemo potest venire ad me, nisi*

Hebr. 11.

1040. 6.

Pater meus traxerit illum, scilicet per gratiam ad mei amorem. Intrat verò amor mentem hominum, per auditum aurium. Quia dum de aliquo bona aliqua audiuntur, ex ipso auditu concipitur amor in corde audientis, ad diligendum illum. Oritur amor, per locutionem bonam, quia principium amicitiae, est bene loqui: Male verò dicere exordium inimicitiarum. Oritur amor per bona obsequia praestita inuicem & recepta. Nam qui obsequium praestare nescit, iniuste petit, imò etiam in odium cadit.

2. O misericordissime Domine Iesu Christe, qui omnia diligis, si ista in corde meo continua meditatione cogitarem, super omnia diligere te deberem, videlicet per fidem, quae sic tibi placet, quod per ipsam omnes sanas & saluas. Quia dicis: *Fides tua te saluum fecit, Et sine illa nemo tibi placere potest.* Luc. 8. Oritur etiam amor ad te amandum, per auditum, quia de scriptum est: *Hebr. 11. Qui audit me, non confundetur.* Sed beati sunt qui audiunt, & qui te vero amore diligunt. Oritur etiam amor ad te diligendum, per beneficia à te multipliciter nobis collata. Quia quicquid boni habemus, à te habemus, & ultra multa dona, te ipsum nobis dedisti, cum de caelo propter nos descendisti, te ipsum exinanienti & formam serui accipiens, minoratus paulominus à Deo: cum etiam propter nos conuitia, flagella, opprobria, contumelias, sputa, & tandem mortem turpissimam, crudelissimamque sustinui. Sed ego ingratus peccator, licet tanta & tam magnifica dona tua cognouerim, & originem tanti amoris viderim; tibi tamen pauca aut nulla dona rependere curavi: sed totus ingratitudine plenus, tanquam quoddammodo inimicus, aduersum te me posui: tibi contraria & displicentia, corde, voce, & opere exercendo.

3. Aduert igitur me clementissime Domine Iesu Christe amor tuus, remittendo quae iniquè egi, & inflammer ad amorem tuum dulcissimum; ut te timendo, & efficaciter diligendo, tibi placita agam feliciter & adimpleam: iniqua autem toto corde & opere respuam, ut ad regnum perpetuò te amantium perueniam sempiternum. Amen.

CAP V T I I I.

Qualiter Deus nos dilexit.

1. **D**ilexisti & amasti nos dulciter, benignissime Domine Iesu Christe, fons veri amoris, dum carnem nostram mortalem humiliter induisti, sola dilectione & amore inductus. Dilexisti nos sapienter, o amantium, vita, Domine Iesu Christe, quia carnem nostram mortalem induendo, omni peccato caruisti. Dilexisti nos fortiter, quia mortem turpissimam & crudelissimam, pro nobis miseris voluntarie sustinui. Et licet nos in carne visitaueris, non tamen carnaliter amasti, sed in prudentia spiritus. Itaque quos in carne quaesiuisti, dilexisti in spiritu, & redemisti in virtute. In carnis autem assumptione, accommodasti te nobis: in culpae visitatione consulisti tibi: & in mortis susceptione satisfecisti Deo Patri.

2. Et sic Domine Iesu Christe, vita nostra, amicus dulcis, consiliarius prudens, & adiutor fortis fuisti. Et nisi amasses nos dulciter, non requisisses in carcere. Sed adiunxisti affectioni, & dilectioni sapientiam, quia tyrannum decepisti. Adiunxisti etiam patientiam, qua offensum Deum patrem placasti. Et sicut ad operandum salutem in medio terræ, ex nimia dilectione semel venisti in carne visibilis: ita quotidie propter maximam dilectionem quam habes ad animas nostras, venis inuisibilis ad saluandas eas, mentes nostras tua potentia inuisibili illustrando. O clementissime Domine Iesu Christe, indeficiens amor, si tuam infinitam dilectionem considerarem, non oporteret me transfricare maria, penetrare nubes, montes transire: quia non grandis mihi restat via ad te amandum: solum enim opus, est, ut curram ad meipsum: scilicet ad compunctionem & confessionem: ut sic exeam de sterquilinio miserrimæ conscientiæ, ut illuc intrare valeas per gratiam & amorem.

3. O misericordissime Domine Iesu Christe, ego iniquissimus peccator, dignus sum, & dignum me sentio, odio, non amore tuo, pœna non gloria. Quia licet cognouerim ex tua immensa pietate tuam exuberantem dilectionem & amorem dulcissimum; tamen his obliuioni quodammodo traditis, gratias tibi non rependi, nec me ipsum disposui, ut tuam dilectionem in me ampliori gratia augeres. Sed te potius ad iracundiam & vindictam prouocaui ob miserabilem vitam meam, quam diuersis vitiis & peccatis contaminaui. Succurre mihi Domine Iesu Christe per tuum sanctum amorem; & sic me misericorditer dispone, ut amor tuus dulcissimus reformetur in me, per quem hîc viuendo in gratia tua; in fine, amore tuo perfruar sempiterno. Amen.

CAPVT IV.

Qualis est amor Dei.

1. **O** Amor præceps, amor flagrans, amor vehemens, amor te intra te cohibere non valens, qui præter te aliud cogitare non finis, fastidis cætera, contemnis omnia præter te, dulciter capis, strenuè stringis, sapienter erudis, gloriosè illaqueas, oneras delectabiliter, feliciter vis, indicto expectaris, nec consilio temperaris, nec pudore refrenaris, neque rationi subiceris: affectu es desiderabilis, experientia dulcis, iucunditate plenus, fruitione æternus, satians & reficiens, numquam fastidium generans. Nihil, Domine Iesu Christe, fons veri amoris, amore tuo suauius, nihil dulcius, nihil vtilius, nihilque iucundius.

2. Amor tuus, Domine, non molestat; sed cum exultatione & gaudio stringitur, & cum securitate desideratur. Vbi tuus amor est, Domine, labor non est, sed sapor seipso contentus est, confundit ordines, dissimulat risum, ignorat modum, totumque quod opportunitatis, quod rationis, quod pudoris, & quod consilij iudiciue esse videtur, triumphat in seipso, & redigit

in captiuitatem. Amor tuus, Domine, libertatem donat, timorem pellit, laborem non sentit, meritum non respicit, primum non requirit, fessos al-
leuiat, debiles roborat, mœstos lætificat, esurientes reficit, & deficientes
iucundos reddit. Amor tuus, Domine Iesu Christe, qui es fons amoris, imò
amor ipse, dissimulat, & expectat, & sustinet delinquentem, eumque beni-
gnè trahit, adducit, & conuerti facit ab errore viæ eius. Amor tuus, Domine
Iesu Christe, fons vitæ est: nec viuere anima potest, quæ non hauserit ex illo:
neque haurire potest, nisi præsens fuerit ipsi fonti, scilicet tibi qui es fons
totius amoris.

3. O fons veri amoris & immensa dulcedinis, qui numquam deficis, sed
semper reficis: ego miserabilis peccator, oneratus magno pondere peccato-
rum, magnam sitim amoris patior, quia à te fonte viuo, sum nimium
elongatus. Respicere ergo me digneris misericorditer, & deducere me ad te
fontem amoris & dilectionis, vt hauriam aquam tanti amoris tui: illam
bibam, illa recreer, illius suauitatem & saporem degustem; ex illa lauetur &
mundetur anima mea ab omni macula peccati: vt mundata ab omni iniqui-
tamento, tibi placeat, & tibi seruiat, ac tecum viuat per amorem, in infi-
nita sæculorum sæcula.

CAPVT V.

De violentia amoris Dei.

1. **O** Violentia diuini amoris, qua summus omnium, omnium infimus
factus est. Hoc namque fecit verus amor, dignitatis nescius, digna-
tione diues, affectu potens, suauis efficax. Nihil enim Domine Iesu Christe,
fons, imò abyssus amoris, violentius triumphat de te, quàm amor: propter
quem temetipsum exinanisti, vt sciremus plenitudinem effusam esse, alti-
tudinem adæquatam, & singularitatem associatam. Atque violentia tui
amoris nos fœdos & deformes amauit: non sic tamen vt nos tales dimit-
teres, sed vt ex fœdis pulchros, & ex deformibus formosos faceres. Amasti
enim nos Domine Iesu Christe abyssalis amor, ex abyssu amoris, & fecisti
te propter nos hominem. Subiecisti te, & suscepisti nos; Inclinaisti te, vt nos
erigeres. Exinanisti te maiestate, vt impleres nos diuinitate. Descendisti
vsque ad nos, vt ascenderemus ad te. Non enim est pater, non mater, non
amicus, non alius quisquam qui nos tantum dilexerit, quantum tu Domine
qui fecisti nos.

2. Absorbeat igitur, quaeso, amantissime Domine, mentem meam ab
omnibus quæ sub cælo sunt, ignita & melliflua vis tui amoris: vt totus
tibi inhaream, solæque suauitatis tuæ dulcedine pascar, delecter, ac inebrier.
O Domine Iesu Christe, quàm felix bonum est & quàm desiderabile, vio-
lentiam tui amoris sentire, quæ pectora nostra radiis tanti amoris quo-
tidie illustrat, pestes mentis sanat, secreta cordis illuminat, mentem fo-
uendo saginat, & animam exhilarando corroborat. O quàm dulcis est mi-

fericordia & suauitas amoris tui Domine Iesu Chryste largitor amoris, qua perfruuntur illi qui præter te nihil diligunt, nihil quærunt, nihil etiam cogitare concupiscunt: Ad amorem tuum præueniendo nos inuitas, præripis, & pertrahis; tanta est violentia tui amoris. Nulla enim est maior inuitatio, præceptio & pertractio ad amorem, quam præuenire amando; quia animus qui prius torpebat, cum se præamari sentit, excitatur. Quod si iam feruebat, cum se amari & præamari didicit, magis accenditur.

3. O amantissime Domine Iesu Chryste, licet me indicibiliter amaue-
ris, ego tamen impiissimus peccator, cor lapideum & ferreum gerens, amo-
rem tuum ignitum in pectore meo frigido non recognoui. Et licet tuam
dilectionem quam vltro impendebas, desiderarem mihi impendi, nolui ta-
men vice versa dilectionem tibi rependere. Auxiliari igitur mihi dignare
piissime Domine Iesu Chryste, qui non potes non amare: & per violentiam
tui dulcissimi amoris, compelle rebellem animum meum ad te amandum;
ut tibi placide seruiam, & vitam obtineam in amore sempiternam. Amen.

CAPVT VI.

Quomodo cognoscit anima se diligere à Deo.

1. Scio benignissime Domine Iesu Chryste, amor & amantium vita, quod
S qui vehementer diligit te, etiam à te infinites vehementius diligere non
ambigit. Quodque sua singulari intentione, sollicitudine, cura, opera, dili-
gentia, ac studio, quo incessanter & ardentius inuigilat quo pacto placeat
tibi, multo magis omnia hæc in te indubitanter agnoscit. Amor enim tuus
amorem animæ parit; & tua præcurrens intentio intentam animam facit,
sollicitudoque sollicitam. Qualem igitur se præparauit anima tibi, talis &
tu eminenter per tuam infinitam misericordiam appares ei, quia scriptum
psal. 17. est. *Cum sancto sanctus eris, & cum viro innocente innocens eris.* Quare & cum
amante amans, cum vacante vacans, cum intento intentus, & cum sollicito
sollicitus.

2. Tanta est Domine Iesu Chryste, amantium summe, benignitas & mi-
sericordia tua erga animas nostras, quod si anima ad te vigilat, multo prius
vigilat & tu. Si anima confurgit in nocte in principio vigiliarum, & acce-
lerat quantum potest; etiam ipsas longè anticipare vigilias inueniet te,
nec poterit te præuenire. Semper enim in tali negotio, prius aliquid tribuis
gratiæ tuæ, & plus semper amas. Plus quoque extenditur & dilatatur amor
tuus ad ipsam animam, & ante & post. Quæ omnia deuota & tibi grata ani-
ma considerans, & sic admirans tuam ineffabilem maiestatem, cætera non
curat, sed tibi soli intendere gloriatur: & se tibi soli (te donante) postpo-
nitis curis omnibus, tota deuotione custodit.

3. O amor amorum, ô amantissime Domine Iesu Chryste, qui tanta &
tam inestimabili bonitate refulges, quod semper amando nos præuenis:
quærentibus te exhibes & occurris, diligentes te diligis, imò tua immensa
dilectio

DE AMORE.

141

dilectio usque ad inimicos se extendit. Nulli te negas, nullum spernis, sed omnes manu amica vocas & recipis; nisi quantum per peccatum à te inuito & nolente, contumaciter & inobedienter recedunt. Sed adhuc tam immensa & exuberans est tua dilectio, quòd in peccatis miserabiliter iacentes expectas ad pœnitentiam, & interdum rebelles redire compellis. Aduuare igitur me digneris misericordissime Domine Iesu Christe, ignis & lux amoris; & accende & illumina cor meum durum, & rebelle ad amorem tuum: Quo adiuuante, de peccatis & malis meis propter te doleam, dignè per te satisfaciam, opera studiosa, & tibi placita, corde puro, humili, & amanti, exerceam. Vt tua gratia praueniente, assistente, & subsequente, sic in præfenti vita amore tuo viuam; vt illa finita, ad te gloriosè amandum, misericorditer vitam obtineam sempiternam. Amen.

CAPVT VII.

De operatione amoris Dei.

1. **O** Admiranda diuinæ propitiationis dilectio! Serui digni non sumus. Tu autem benignissime Domine Iesu Christe, plenitudo amoris, amorem tuum & dilectionem ostendendo & operando in indignis seruis tuis, & (vt de cæteris taceam) in me miserabili creatura tua, à multis variisque periculis me liberaſti, quia me deuiantem reduxiſti; ignotum docuiſti; dum peccarem, ad pœnitentiam expectaſti; prostratum erexiſti; & ad te venientem largiſſima pietate tua ſuſcepſti. Omne meritum meum, nihil omnino eſſe poteſt, in comparatione operationis amoris tui.

2. Amor tuus dulciſſime & amantiſſime Iesu Christe operatur in me, ſine ſpe recipiendi à me: quia *bonorum meorum non eges*: neque quicquam condignè amoris tuo conferre poſſum; nec eum explicare ſermone. Quia tantus eſt & tam immenſus amor tuus, quòd dum peccabam, tu ſilebas: dum non continebam à vitis, & peccatis, tu à verberibus abſtinebas: dum perfeuerabam in iniquitatibus multis & diuerſis, tu vindictam differebas. Ad omnem tribulationem & neceſſitatem apertus mihi fuit dulciſſimus amor tuus: & ſinus tuæ infinitæ dilectionis expaſſus: nec conſiderauit indignum, ſed neceſſitatibus meis omnibus ſubuenit.

3. O amoris inæſtimabilis operatio! Sic enim Domine me viſitaſti, & cor meum durum mutaſti, vt amara ſentiam nunc illa, quæ antea malè dulcia mihi erant: & qui latabar tunc cum malè in rebus peſſimis agebam, nunc incipiam *tibi recogitare annos meos, in amaritudine animæ meæ*. Quare, o Domine Iesu Christe, amator bone, qui commoues terram cordis mei, & conturbas eam, ſana, obſecro, contritiones eius, quia commota eſt. Non recedat operatio tui dulciſſimi amoris à me creatura tua. Intret in animam meam, & mundet eam à ſæcibus peccatorum. Illuſtre eam incendio veræ dilectionis. Excitet eam à tempore ignauiæ: Tollat ab ea ignorantiam, & doceat quæ agere & exercere debeam.

Iſai. 38.

T

4. O misericordissime Domine Iesu Christe, qui omnem amorem superas, cogitare non valeo, quanta dilectione me amasti, & quam liberaliter & gratis: Quia licet te diuersis modis offenderem, nec à peccatis cessarem, tu tamen dissimulabas, nec ad puniendum me accelerabas, imò tanquam ouem errantem & pereuntem, vt sacris humeris tuis imponeres, requirebas, præ tuo incomprehensibili amore, quo cuncta quæ fecisti, amas. Gratias itaque tibi ago, & tuo immenso amori, tuæque immensæ pietati & clementiæ, & te humili corde ac simplici precor, vt tua dilectio me non deserat, sed mecum sit, me adiuuet, & me defendat ab omni periculo animæ & corporis, Vt hic ad tuum placitum viuendo, tibi semper seruiam, te incessanter diligam, & tandem ad dilectionem tuam perueniam sempiternam. Amen.

CAPVT VIII.

De magnitudine amoris Dei.

1. **L**icet Domine Deus meus, mundus in maligno positus esset, & plenus miseria, tamen pro nobis in mundum, tuum benedictum Filium misisti. Imò etiam ex abundantia tui amoris illum in infernum transimisti, vt inde suos extraheret. Ad hoc enim misisti ipsum in mundum, vt venditus nos redimeret, occisus viuificaret, iniurias passus honoraret, & in filios adoptaret. Misisti igitur verbum tuum, misisti spiritum tuum, promittis vultum tuum, & ne quid in cælestibus vacet, ad opera nostra sollicitanda, etiam illos beatos spiritus, propter nos mittis in ministerium, & in super humanam naturam, in eadem persona, diuinæ naturæ associari voluisti.
2. Dilexisti nos Domine gratis, morti damnatos & vita indignos. Omnes enim ducebamur, tanquam latrones ad supplicium: quia ad infernum trahebamur. Sed filius tuus super benedictus nobis subuenit, & pro nobis fideiussit. Quam fideiussionem semper in memoria habere debemus, sicut *Ecd. 29. scriptum est. Gratiam fideiussoris ne obliuiscaris: dedit enim pro te animam suam.* Tu Domine Deus meus, præ magnitudine amoris tui, non pepercisti filio tuo vnigenito: sed pro nobis omnibus illum tradidisti; & ad te nos attraxisti, dum sororem nostram, scilicet humanam naturam, benedicto filio tuo inseparabiliter copulasti. Sic enim scibitur: *In charitate perpetua dilexisti te, idcirco attraxisti te miserans.*
3. O Domine Deus meus, ignis amoris consumens, gloriosius non potuit nubere caro nostra. Vnde si matrimonium inter homines sic attrahit eos, vt de inimicis valde amicos faciat, quantum deberet homines id attrahere ad amandum te, quod sororem nostram, scilicet humanam naturam, tuo benedicto filio inseparabiliter copulasti? Sed Domine Deus meus, ego sum ingratus ille & superbissimus peccator, qui tantam ingratitudinem amoris non considerans, & tam miserabilem copulam non contemplan, me ad amandum te, tuum Filium, & Spiritum Sanctum, vnum Deum & vnum Dominum, non disposui; sed ad amanda mala, noxia & iniqua fui

multipliciter inclinatus, & illa ad effectum frequenter perduxi. Adiuuare ergo me dignare, misericordissime Domine indultor amoris: & dirige me, vt te super omnia diligam, & tua infinita beneficia recognoscam, mente teneam, & pro ipsis gratias tibi agam; & in fine, vitam in amore mihi misericorditer concede sempiternam. Amen.

CAPVT IX.

De causa diligendi Deum.

1. **O** Misericordissime Domine Iesu Christe, causa diligendi te, tu ipse es. Et te diligendi modus, est sine modo: quia cum infinitè bonus sis, & omnis modus noster diligendi finitus, diligendus es supra omnem modum. Et ideo nihil te iustius, nihilque fructuosius diligi potest. In infinitum namque Domine Iesu Christe, verè amantium amor, meritis es de nobis, quia nobis immeritis temetipsum dedisti. Tu es causa efficiens & finalis amoris & dilectionis, vt occasionem habeas glorificandi nos. Quia tu occasionem das, tu affectionem creas, tu desiderium consummas. Tu enim fecisti hominem, imò factus es homo, vt te amemus. Tuus amor amorem nostrum præparat & remunerat, præcedit benignius, & expectatur suauius, & diues est in omnibus qui inuocant illum. Se dat in meritum, se seruat in præmium, se apponit in refectionem animarum sanctarum, & se distrahit in redemptionem captiuarum. Si tuum meritum quaeritur, illud est præcipuum, quia tu prior dilexisti nos.

2. Et ideo dignum & iustum est vt te redamemus, præsertim si mente humili & deuota desiderare velimus tuam misericordiam, gratuitam dilectionem, inopinatam dignationem, inuictam mansuetudinem, & stupendam dulcedinem. Quid enim aliud ista faciunt benignissime, & superamabilis Domine Iesu Christe, diligenter considerata: nisi vt considerantis animum ad te visceraliter rapiant, vehementer afficiant, faciantque contemnere omnia præter te Domine? Verus amor tuus, clementissime Domine Iesu Christe, vacuus esse non potest: sed eius præmium, incipienti proponitur, amanti promittitur, & perseveranti redditur. Anima, te, Domine, veraciter amans, aliud præter te, sui amoris præmium non requirit: aut si aliud requirit, profectò te non diligit.

3. O mitissime Domine Iesu Christe, ego sum ille peruersissimus peccator, qui te posthabendo, in transitoriis & caducis amorem cordis mei posui, & illa quæ diu conseruare non poteram, tota mente dilexi. Adiuua me piissime Domine Iesu Christe, amator fortis, & dirige cor meum, vt te amem & diligam, & mundana contemnem, ea tanquam inutilia & noxia penitus derelinquam, peccata odio habeam, de præteritis doleam, & condigne, virtute amoris, satisfaciam, & à futuris malis & peccatis præcaueam. Vt tibi amore sincero & assiduo seruiendo & placendo, tandem tuam dilectionem per infinita sæculorum sæcula adipiscar immortalem. Amen.

Qualiter Deus diligatur.

1. **N**on mirum est, Domine Deus meus, si infidelis minùs diligit te; minùs enim te agnoscit. Sed quid est Domine, de miserabili creatura tua? Te enim per veram fidem agnosco, & te teneo vitæ meæ non solum gratuitum largitorem, largissimum administratorem, pium consolatorem, sollicitum gubernatorem; sed insuper etiam copiosissimum redemptorem, æternum conseruatorem, datorem, & glorificatorem. Urget namque ratio & iustitia naturalis, vt totum me per amorem tradam tibi, à quo me totum habeo, & si totum me debeo tibi, quia me fecisti, ad magis amandum sum tibi obligatus, quia me refecisti, nec tam facile me refecisti, quàm fecisti. Nam semel dicendo, me fecisti; Sed reficiendo & dixisti multa, & gessisti mira, & pertulisti dura: Nec tantum dura, sed & indigna.

2. O benignissime Domine Iesu Christe, amor meus; quid retribuam tibi, pro omnibus quæ retribuisti mihi? In primo enim opere, me mihi; in secundo verò, te ipsum mihi dedisti, & tunc te mihi dando, me mihi reddidisti. Datus ergo & redditus, me pro me debeo, & bis quidem debeo. Quid ergo retribuam pro te? Nam etiam si me infinities rependere possem, nihil sum ego ad te. O Domine Iesu Christe, languentes animos amore reficiens; si intelligentia quam mihi dedisti, vt vellem sicut deberem, cernerem manifestè, quo modo, imò quàm sine modo à me creatura tua amari merueris: qui prior dilexisti me tantus & tantum, & gratis, tantillum & talem & ingratum. Scio Domine, quòd dilectio quæ tendit in te, tendit in immentum & in infinitum, quia tu immensus es & infinitus. Quæso igitur Domine, qualis finis debet esse mei vel modus amoris? Amor enim meus Domine, non est gratuitus, sed rependitur debitus.

3. O clementissime Domine Iesu Christe, amicos tuos viuificans amore, extende ad me peccatorem miserabilem, tuam exuberantem dilectionem, vt te diligam pro dono tuo, & modo meo: minùs quidem iusto; (nam etsi quantum debeo non possum, non possum tamen ultra quàm possum: poterò autem plus, cum plus donare dignaberis:) numquam tamen prout dignus haberis. Da igitur mihi tuum amantissimum amorem, quo te donante, te diligam & amem, tibi placeam, tibi seruiam, tua præcepta adimpleam, à te non separer in præsentem & in futuro, sed tecum maneam agglutinator amoris in sempiternum. Amen.

De triplici modo diligendi Deum.

1. **O** Immenſitas amoris, dulciſſime Domine Ieſu Chriſte, doce me quē-
admodum diligam te. Fac mecum tuam miſericordiam, vt te amem
dulciter, prudenter, fortiter. Dulciter, ne amaritudine auertar. Prudenter, ne
decipiar. Fortiter ne opprimar, aut ab amore tuo vllō modo, ſiue mundi glo-
ria, ſiue carnis illecebris aut voluptatibus abducatur. Informes me Domine,
tu qui ſapientia es, ne ſeducar ſpiritu mendacij & erroris. Luceſcas in me
tu qui es veritas, ne aduerſitatibus & ſcandalis offendar. Conforta me, tu qui
es virtus, ne deficiam in tuo ſeruitio. Zelum meum inflammet charitas tua,
tua ſcientia cognitionem meam dirigat, & conſtantia tua propoſitum bo-
num firmet: vt prædictis munitus, ſim in tuo amore ſeruicus, circumſpe-
ctus, & inuiſtus: ne teporem habeam, nec caream diſcretione, & ne timidus
efficiar; ſed diligam te Dominum meum toto & pleno cordis affectu, dili-
gam te tota rationis vigilantia & circumſpectione, diligam te tota virtute,
adeo vt nec mori pro tuo amore pertimeſcam.
2. Sis ſuauiſ & dulcis, Domine, affectui meo, contra fallaces & malè dul-
ces vitæ carnalis illecebras; & vincat falſam dulcedinem, dulcedo tua ve-
ra, quemadmodum clauum clauus extrudit, & ſis intellectui præuiſa lux, &
dux rationi. Non ſolum ad cauendas hæreticae fraudis decipulas, & ab eo-
rum verſutis fidei veritatem vindicandam; verum etiam vt nimiam &
indiferentiam vehementiam in mea conuerſatione deuitem. Tu namque Do-
mine ſapientia es; & vis amari non ſolum dulciter, ſed & ſapienter. Alio-
qui, facillimè, zelo meo ſpiritus illudet erroris, ſi ſcientiam negligam. Scio
namque, Domine, quod non haber callidus hoſtis machinamentum vllum
efficacius ad tollendam de corde dilectionem, quàm ſi efficere poſſit, vt in
ea incautè & ſine ratione ambulem.
3. Domine Ieſu Chriſte, amantium fortitudo, robur & firmamentum, ſim
fortis & conſtans ad te amandum, non cedens terroribus, nec ſuccumbens
laboribus. Diligam te, Domine fortitudo mea; quia tu es firmamentum
meum & refugium meum, liberator meus, Deus meus, adiutor meus, amor
immenſus, amor æternus, amor ſupereminens, amor cuius magnitudinis
non eſt finis, amor cuius ſapientia non eſt numerus, amor cuius pax exu-
perat omnem ſenſum; diligam te non verbo ſolum ac lingua, ſed opere &
veritate; vt tua gratia in præſenti ſuffulſus, in fine ad amantium gloriam, te
miſericorditer donante, perueniam ſempiternam, Amen.

Quid sit diligere Deum ex toto corde.

1. **T**Oto corde te diligere clemētissime Domine Iesu Chrīste, immēsitudo amoris, est non abduci blanditiis, non seduci fallaciis, non frangi iniuriis, sed integrē te sic diligere ex toto corde, vt ad nullius rei dilectiōnem cor magis inclinetur quā ad te, nec delectetur in aliqua re magis, quā in te. Minus enim te amat, qui aliquid tecum amat, quod non propter te amat. Totum namque exigit, qui totum hominem fecisti. Diligi enim debes Domine ex toto corde, ratione & creationis & recreationis, Quia enim hominem fecisti, debet seipsum amorī tuo; & quia eum redemisti, debet se amorī tuo. Et tantō magis debet se amorī tuo, quā sibiipsi: quantō tu maior es ipso, pro quo te ipsum dedisti.

2. O benignissime Domine Iesu Chrīste, amor immense, frange & molifica cor meum durissimum: vt si aliū non valeat eleuari, saltem ad purum amorem sensibilem flectatur, scilicet ad benedictam carnem tuam & ad illa quæ in carne gessisti vel iussisti; vt omnia libenter audiam, studiōse legam, frequenter recolam, suauiter mediter: Te annunciatum contempler deuotē; aut nascentem, aut lactentem, aut docentem, aut ieiunantem, aut prædicantem, aut miracula facientem, aut morientem, aut resurgentem, aut ascendentem, aut ad iudicium venientem. Sic animus meus stringatur in amore tuo, vt carnis deuiter vitia, fugiat illecebras, desideria maligna extirpet, & in te assidue recreetur: atque tuo dulcissimo amore pascatur.

3. Scio Domine, quod per amorem tuum vita carnalis excludetur, mundus contemnetur; & efficietur ac perficietur vita spiritalis: vt ipsa in omnibus quæ oportet sentire, te sentiat, & vera fide firmetur, puritas conseruetur, diabolica circumuentio euitetur, augeatur exercitium virtutum, & amor tuus mihi dominetur, nec posthac separetur à me, sed sic in præsentī me gubernet, conseruet, & viuere faciat, vt te adiuvante, & donante, amor in regno tuo, sit mihi vita sempiterna. Amen.

Quid sit diligere Deum ex tota anima.

1. **D**iligendus es, Domine Iesu Chrīste, totius amoris plenitudo, ex tota anima: scilicet fideliter, sicut nos dilexisti, qui maluisti animam tuam separari à corpore, quā animas nostras separari à te. Qui enim diligit tota anima, non timet mortem: quia dilectio, est condimentum dulcorans; nam nihil dulcius aut delectabilius amore. Sine amore, omnia sunt insipida & amara. Quæ autem sunt amara, quantumcumque sint amara, fiunt dulcia amore. Sicut sancti Patres in desertis probauerunt, vtentes pro ali-

mento, herbis & arborum corticibus, sicco pane & aqua frigida, terra pro lecto, lapide pro cervicali, & cilicio pro vestimento. In quibus omnibus, propter amorem tuum, saporem, delectationem, & dulcedinem magnam sentiebant.

2. Omnia namque graua & difficilia, verus amor facit facilia & quasi nulla. Ideo sancti Martyres, omnia tormentorum genera tanquam dulcia, non solum patienter, sed etiam hilariter præ ardenti amore sustinebant. Labor namque non fatigat amorem: tormentum amorem non superat: amor quiete fit inquietior. Quiescit afflictio, quiescit tentatio, sed dilectio quiescere nescit. Irrequies enim est eius quietudo. Qui huius amoris gustu inebriatus fuerit, ad omne opus bonum hilarescit. Dolet, & non sentit, laborat, & non lassatur. Deridetur, nec aduertit. Amorem animæ, thesaurus nullus superat. Nescit enim homo pretium eius, quia omne aurum in comparatione amoris, arena est exigua. Sine amore diues pauper est, & cum illo pauper diues est. Quia qui Deum tota anima amat & diligit, iam habet quem amat, nec eum verè diligere posset, si eum quem diligeret, non haberet. Amorem tuum, Domine, alienus amor non occupat, nec ei commiscetur, quia non possunt commisceri vera vanis, æterna caducis, spiritualia corporalibus, summa imis.

3. O clementissime Domine Iesu Christe, incomprehensibilis dilectionis author & infusor, ego miserrimus peccator omni iniquitate plenus, te non dilexi ex tota anima mea: imò, quod damnabilius mihi est, tuo amore spreto & derelicto, amorem meum posui in mundanis, vanis, & noxiis, damnabilibusque rebus. Et sic iste miserabilis amor, ducet me ad odium tuum perpetuum, nisi tua infinita misericordia, infinitus amor tuus, adiuuare me dignetur. Augeatur igitur in me tuus gloriosus amor qui me trahat ad te, relicto isto transitorio amore: ut in tua dilectione perpetuò valeam manere. Amen.

CAPVT XIV.

Quid sit diligere Deum ex tota mente.

1. **P**lissime Domine Iesu Christe, totius exaltatio amoris, diligere te debemus ex tota mente, scilicet memoranter, perpetim ac perseveranter; ut omnes sensus hominis, scilicet voluntas, intellectus, memoria, & omnes eorum operationes tibi vacent. Quod si in aliorum dilectione occupetur, iam ex tota mente, qui sic occupatur, te non diligit. Scriptum est enim: *Omni tempore diligit, qui amicus est.* Talis igitur dilectio totius mentis est ligamen, viscum & glutinum, hominem tibi indissolubiliter vniens atque ligans: Quia amor, est quædam vis mutua, & virtus agglutinativa: summa mouens ad infima; & nouissima, id est subiecta, ad meliorum, id est suprapositorum conformationem, ut anima hoc glutino glutinata, tibi dicat; *Dilectus meus mihi, & ego illi.*

2. Tantus est namque amor à tota mente procedens, quòd anima tibi vnita talis dilectionis glutino, nec pœna, nec tormento, nec igne, nec ferro, nec vllò alio supplicio potest dissolui, nisi adueniat peccati mortalis immunditia. Imò citius Domine Iesu Christe, amantium portus, manus à brachio, caput à collo solueretur & amoueretur, quam anima tali glutino amoris tibi vnita & coniuncta à te aliquo modo separaret. Res enim forti glutino glutinata, citius rumpitur & frangitur in aliis locis, quàm in ipsa coniunctura. Sic etiam est de anima, vt patet in sanctis martyribus, qui à tuo amore, nullis pœnis poterant auelli, vel quantulumcumque separari. Facilius enim pes separaretur à tibia, & caput à ceruice, quàm ipsi à te. O dilectio, quàm magnum est vinculum tuum, quo ligari potuit Deus?

3. O piissime Domine Iesu Christe opifex amoris, hoc vinculum te in cruce tenuit, quem omnes funes totius mundi nullatenus tenuissent. Amor, benignissime Domine, ex mente procedens est triplex funiculus qui difficile rumpitur: Quia te diligere debemus ex toto corde, id est intellectu sine errore; tota anima, id est voluntate sine contradictione; & tota mente & virtute, id est memoria sine obliuione. Concede mihi misericordissime Domine Iesu Christe, largitor amoris potentissime, gratiam te amandi toto corde, tota anima, & tota mente: vt à te numquam valeam separari, sed tecum perpetuò in perfecto amore permaneam. Amen.

CAPVT XV.

Quòd amor est fortis armatura anima.

1. **H**omo scuto & armatura munitus amoris tui, benignissime Domine Iesu Christe, amatorum victoriosissime, in tentationis praelio stat inconcussus, inuincibilis, atque firmissimus, non timens, etiam si cum eo tota acies dæmoniaca decertaret. Tu enim, piissime Domine Iesu, homini amorem habenti, bonus adiutor & fortis defensor assistis, quia tu amor es, & qui in tuo amore stat, tecum stat. Assistis etiam homini dilectionem habenti, vt verus & fidelis amicus qui libenter subuenit amico suo, & cum defendit, sicut scriptum est: *Custodit Dominus omnes diligentes se: & omnes peccatores* (id est dæmones infernales, vel homines pestilentes, disperdet.

2. Sed Domine, non sic est de alia virtute, quia tu, si quis sine dilectione aliquid faciat, non sic præsto es ei, nec assistis ad adiuvandum. Dilectio vera in te, Domine Iesu Christe amator verissime, hominem inuincibilem reddit. Eum enim ex omni parte protegit & defendit: quod nulla facit alia virtus, sed ex vna parte tantum. Nam abstinentia à gula tantum defendit: pudicitia à luxuria, & ita de cæteris. Imò alia virtus sine dilectione, ex vna parte defendit, & ex altera succumbit; dum scilicet de eius actu & opere oritur iactantia, & nascitur vana gloria, vt patet in elemosyna & ieiunio, quæ nihil valent, nisi tua dilectione directa sint & protecta. Et ideo diabolus, hanc

hanc armaturam dilectionis inuadere summopere studet. Nam si castitas in nobis fuerit sine dilectione, non timet, quia ipse in carne non premitur, ut in luxuriam dissoluatur. Abstinenciam non timet, quia cibo non vitur, qui necessitate corporis non vrgetur. Distributionem rerum terrenarum non timet, si dilectio desit; quia diuitiarum subsidiis non eget. Sed valde timet in nobis dilectionem veram, qua te diligimus, & proximum, & semper concordia inuidet: quia dilectionem quam tenemus in terris, ipse tenere nolens, corruiet à cœlis.

3. Dilectio tua, Domine Iesu Christe, ab omnibus diligere dignissime debet omnem tentationem repellit, non alia virtus. Nam alia virtus cum peccato informis esse potest, ut etiam morales virtutes in Philosophis fuerint. Ideoque, non ab omni peccato, nec ab omni tentatione defendunt. Sed dilectio tua omni peccato contrariatur, & omni tentationi resistit; imò nec morti, nec tormento succumbit. Vinci nequit, imò de morte obtinet victoriam & triumphum. Hanc veram dilectionem tribue mihi misericorditer Domine Iesu Christe tota virtus & vigor amantium, ut tecum in amore maneam in sempiternum. Amen.

CAPVT XVI.

Quòd per amorem peccatum remittitur.

Tanta est vis amoris superamende Domine Iesu Christe, quòd per amorem peccata remittuntur. Non est enim peccatum, quod dilectione tua non remittatur. Non culpa, non noxa, noxa grauis vel enormis, quæ adueniente dilectione tua non expellatur. Non macula tam fœda, tenax, ac etiam inueterata, quæ non tua dilectione & amore dissoluatur, quia tua dilectio, omni culpæ mortali contrariatur, nec cum aliqua esse potest. Habet enim tua vera dilectio omnem culpam expellere, sicut calidum frigus expellit. Sed non est de alia quacumque virtute.

2. Et ita patet de beata illa Peccatrice, quæ tot peccata habuit: & tamen dilectionis virtute, omnia sunt ei dimissa, quia ab ore veritatis dictum est: *Remittuntur ei peccata multa, quoniam dilexit multum.* Licet *Luc. 7.* enim abundanter fleuerit, pedes lachrymis lauerit, capillis terferit, pedes osculata fuerit & vnixerit, tamen istis non attribuitur remissio, sed soli dilectioni, quia sine dilectione parum valuissent, sed fuerunt signa quædam scintilla ignis, à dilectione preparata, quæ catenus tibi grata fuisse, quatenus ab amore imperata. Dilexit namque te multum, quia ex toto corde, ex tota anima, & ex tota mente. Quod euidenter patet in iis dilectionis signis quæ ostendit. Dilexit enim te super omnia, sed non nimis: quia tu Domine nimis diligere non potes, imò modus diligendi te, sine modo est. Et in hoc etiam patet nobilitas & valor dilectionis: quia in excessu non amittitur, nec augmentum eius in vitium vertitur, sed in commodum & profectum. Contra tamen homo potest nimis ieiunare, elemosynas dare,

orare, & sperare. Virtutes quoque morales si transcendant modum vel medium, in vitium & malitiam conuertuntur.

3. O clementissime Domine Iesu Christe, amator bone, ego malus & vitiosus peccator, ista mente reuoluens, nec mente, nec opere ad effectum perduxi: sed a vero amore & dilectione elongatus, & totus frigidus factus, in peccatis & vitiis innumerabilibus, tempus meum miserebiliter consumpsi. Adjuuare me digneris misericordissime Domine Iesu Christe, immente fons amoris, & vt peccata mea benignè remittas, dilectionem tuam mihi digneris infundere sempiternam. Amen.

CAPVT XVII.

Quòd amor est via rectissima ad Deum.

1. **V**era dilectio, benignissime Domine Iesu Christe, qui es merces amoris, est via rectissima veniendi ad te: nec opus est aliqua alia virtute, in cuius exercitio potest esse via obliqua; sed solum amore & dilectione, quæ ad cœlestem Patriam verè ducunt. Quia alia quæcumque virtus informis esse potest & cum peccato, & ex eius actu sæpe oritur vana gloria, quæ vt ventus, impedit viatorem, imò impellit in chaos inferni. Nam peregrè pergens, carnis afflictionem assumens, eleemosynas erogans, sæpe vento vanæ gloriæ impetitur: & dum ad pœnitentiam ire credit, labitur in infernum. Non ergo, Domine Iesu Christe, susceptor amoris & largitor, ieiunium, oratio, eleemosyna, est via recta omnino; sed amor & dilectio tua, est via rectissima absque deuiò; via brevis absque tædio: via plana absque tumultu; via clara absque nubilo; via secunda absque periculo; via iucunda cum bono socio, scilicet cum te, Domine, amantissimo duce, via veniendi ad æterna gaudia, quæ non permittit viatorem ad dexteram, quæ est prosperitatis, nec ad sinistram, quæ aduersitatis est, declinare.

2. Ista via amoris, Domine Iesu Christe, dux amantium æternæ, est vera, non ficta, neque palliata: via cordialis, non verbalis: via fructuosa, non otiosa: via non solum sermonis, sed etiam operis; via cauta, non improuida: prudens, non fatua; ita quòd persona ametur, & culpa refutetur: via magna, non modica; ita quòd animam suam ponat quis pro amicis suis: via constans, non momentanea, sicut tu Domine, in fine ostendisti, quia cum dilexisses tuos, in finem dilexisti eos. Si quis igitur Domine Iesu Christe amator constantissime, ad patriam cœlestem velit celeriter peruenire, per viam dilectionis & amoris ambulare debet. Quia qui amat ardentius, currit velocius, & peruenit citius.

3. O misericordissime Domine Iesu Christe, qui ob nimium amorem etiam non amantium misereris, iniqua & perueria atque falsa fuit dilectio mea; quia non fuit cordialis, sed verbalis; non vera, sed ficta: Meos amicos in suis sceleribus & peccatis defendi; & sic iniquos odio non habui. Amaui fortunam, & ea mutata, amorem mutavi. Parce mihi piissime Do-

mine Iesu Christe misericordissime amator; & veniam dare mihi dignare, & concede mihi misericorditer tantam ad te amandum gratiam, ut relicto vano amore tibi non placito, te super omnia amem & diligam assidue, & sine alicuius temporis interpositione; nec à tua dilectione separer, sed cum ea permaneam per infinita sæculorum sæcula. Amen.

CAPVT XVIII.

Quòd amor obtinet quæ iustè petuntur à Deo.

1. **A**mor & dilectio, clementissime Domine Iesu Christe, qui es ipse amor, postulata à te, promptè & facilitè obtinet: quia illum qui te veraciter diligit, libenter exaudis, & postulata ei concedis, quia scriptum est: *Dilexi quoniam exaudiet Dominus vocem orationis meæ.* Tam exuberans *Pf. 114.* est amor tuus, dulcissime Domine Iesu Christe, spiritualis amator, quòd tu diligenti te, vñà cum spiritualibus bonis, bona etiam temporalia tribuis & concedis, sicut dictum est à te: *Si obediat mandatis meis, ut diligatis Deum.* *Dominum Deum vestrum, & seruiatis ei in toto corde vestro, anima, &* *Deut. 10.* *mente vestra, dabo pluuiam temporaneam & serotinam, ut colligatis fructum vini & olei, & fœnum ex agris.* Ostendis etiam, & extendis diligenti te misericordiam, sicut scriptum est: *Faciens misericordiam in millia millium, iis* *Exo 20.* *qui diligunt me.* Infundis etiam sapientiam tuam diligenti te, sicut scriptum est: *Vnus est altissimus, & sapientiam suam (id est datum suum) prebet dili-* *Ecd. 1.* *gentibus se.* Tribuis etiam & liberaliter concedis diligenti te gaudium & læticiam, sicut scriptum est: *Dilexisti iustitiam, & odisti iniquitatem: pro-* *Pf. 44.* *pterea vixit te Deus, Deus tuus oleo lætitiæ.*

2. Diligentes igitur te, Domine Iesu Christe, amantium remunerator largissime, exaudis, & eisdem multa bona impartiris. Sed non sic illis euenit, qui te non diligunt, nec diligere volunt; non enim eos exaudis: sed potius te prouocant ad iram, cum aliqua à te petunt. Quia cum indignus ad intercedendum mittitur; irati animus ad deteriora prouocatur.

3. O misericordissime Domine, quoties te prouocaui: quia indignissimus & nefandissimus peccator, multa à te petij, & nullo dignus eram: quia te non dilexi corde & opere, sed solum verbo & lingua. Quare non amore, sed odio dignus eram, pœna & non gloria. Sed in tuo indicibili amore confido, piissime Domine Iesu Christe fons inexhaustibilis amoris, quem à me, obsecro, non retrahas, sed illud mihi clementer concedas, quo inflammare digneris cor meum frigidum, ad amandum & diligendum te, ut spreta dilectione transitoria & caduca huius miseræ vitæ, ad te eleuer per puram dilectionem in te manentem, per assiduam contemplationem, in sæcula sæculorum. Amen.

Quòd amor Dei defendit & liberat à malis.

1. **F**idelis & verus amicus es Domine Iesu Christe amator vigilantissime, qui diligentem te custodis, liberas & defendis à malo & periculos sicut ostendisti in seruo tuo Daniele, te toto corde diligente: qui coniectus in lacum leonum, illæsus te protegente fuit extractus, & penitus liberatus. *Daniel. 24.* Vnde dixit, *Recordatus es mei Domine, non dereliquisti me.* Liberas igitur Domine diligentem te à malo, & à leonis infernalis insultu, & illæsum eripis ab eodem: Et quia sicut fidelissimus amicus liberas à malo, protegis & defendis; clamat Propheta in persona cuiuslibet te amantis: *Diligat te Domine fortitudo mea: Dominus firmamentum meum & liberator meus, Deus meus adiutor meus: & sperabo in eum: Protector meus & cornu salutis mee, & susceptor meus.* *Isa. 17.*
2. O misericordissime Domine Iesu Christe ineffabilis dulcedo amoris, inestimabilis est dilectio tua, quæ semper adjuuat peccatorem & defendit. Peccat enim miserabilis peccator praua suggestionem & cogitationem: sed runc es diligenti te fortitudo, ne cogitatio possit introire. Quòd si peccator ultra procedat, scilicet ad delectationem: tu es tunc ei firmamentum, ne possit delectatio inualefcere. Cùm autem peccator ad consensum voluntati laxat habenas: tu Domine illi es refugium, vt consensui contradicatur. Quando verò defendit peccatum: tu ei liberator es; vt ab audacia abhorreat. Si latenter peccare vult, tu illi es adiutor qui vbique præsens es, ne id faciat. Sed si patenter, tu es ipsius aduersus nequitiam protector. Si autem inducatur in consuetudinem, tu es ei cornu salutis. Si verò falsò seducatur, vel desperatione aut induratione conficiatur; tu eius, ne desperet, nève induretur, susceptor es.
3. Fidelissimus igitur amicus es Domine, & tua vera amicitia omnem aliam excedit amicitiam. Tu semper diligis, in vita & morte. Tu diligis in prosperitate & aduersitate, & etiam magis felicem mortuum, quam infelicem viuum. Tu Domine plus in immensum amas quàm ameris: & etiam amas, licet non ameris. Tu propter patres amas filios: Imò propter vnum bonum in ciuitate vel societate, amas multos malos.
4. O amantissime Domine Iesu Christe: ego miserrimus & prauissimus peccator omni dilectione vacuus, sed malitia & iniquitate plenus, te vt debuisssem non dilexi. Sed cor durum & vagum habendo, ad diligenda frequenter mihi damnosa & noxia, ipsum applicui. Quod erigere digneris Domine ad te amandum semper: vt vita mea & gloria mea, sit dilectio tua sempiterna. Amen.

Quòd amor Dei reficit hominem.

1. **N**on honor, non pecunia, neque aliqua terrena substantia, nec etiam virtus, nec ars aliqua vel scientia, benignissime Domine Iesu Christe plenitudo amoris, potest implere animam, & satiare conscientiam, sed sola & vera dilectio tua. Nam dilectio, aut est cum gratia, aut sine. At sine ea, non potest esse dilectio vera. Illud autem quod in via potest solum reficere & quietate animas, est gratia; cum qua similiter est & dilectio vera. Et quia qui diligit te Domine, habet te, sicut scriptum est: *Si diligamus invicem, Deus in nobis manet: non potest esse pauper; quia Deum habet quem amat.* 1. Ioa. 4. Et quomodo posset esse pauper, qui te, qui es omne bonum, habet in conscientia? Qui habet aurum in arca, dives non est: sed qui te habet in conscientia, dives est. Vnde scribitur de te: *In me sunt divitiæ & gloria,* Prov. 3. *ut ditem omnes diligentes me, & thesauros eorum repleam.*
2. O misericordissime Domine Iesu Christe in amore ditissime, qui ditari cupit & satiari, dilectionem veram debet habere, qua mentem reficit, perficit & eidem sufficit. Nam qui vera dilectione caret, etiam si omnes divitias mundi haberet, & insuper sapientiam, fortitudinem, simplicitatem, pulchritudinem, omnes denique virtutes à Philosophis conscriptas, pauper tamen & miserabilis esset, quia illis non contentus, alia semper appeteret. Ideò de quodam diligente terrena, scribitur: *Tu dicis quia dives sum & locuples, & nullius ego: & nescis, quia tu es miser & miserabilis, pauper, nudus, & cæcus. Suadeo tibi emere aurum ignitum, ut locuples fias.* Apoc. 3.
3. O clementissime Domine Iesu Christe, amor consumens, quantam doctrinam nobis peccatoribus ostendisti pro saluatione nostra, monendo ut emamus aurum ignitum, per quod intelligitur amor & dilectio: Quia sicut aurum excellit omnia alia metalla, sic dilectio omnes alias virtutes. Debet autem hoc aurum esse ignitum amore tuo, & dilectione tua summe inflammatum. Neque emitur nummo vel denario, sed bona voluntate, bono desiderio, bono affectu. Vnde hac dilectione nihil melius emitur, & nihil charius est, cum possidetur. O piissime Domine Iesu Christe, locuples in amore, ego sum miser & miserabilis, pauper, nudus & cæcus. Da mihi hoc aurum ignitum; hoc est dilectionem tuam, quo inflammetur mens mea, ut ea reficiatur & quietetur in te, & ipse ditatus gratia & dilectione tua, ad regnum amoris perueniam sempiternum. Amen.

Fructus amoris, & in via, & in patria.

1. **D**ilectio Virtus summa, quæ gloriam sempiternam nobis acquirit, à te hoc procedit, dulcissime Domine Iesu Christe; quam clementer dones nobis; nulla enim alia virtus obtinet regni tui gloriam, nisi sola dilectio; ista sola gloriam obtinet, & non alia virtus sine ipsa: Scriptum est, *Iacob. 2. nonne elegit Dominus pauperes in hoc mundo, diuites in fide & heredes regni, quod promisit Deus diligentibus se?* sola autem dilectio in gloria durat, & permanet; quo fortius & intensius ibi, Domine Iesu Christe, diligaris; & non sic de aliis virtutibus, quia aliquæ ex ipsis, etiam quantum ad habitus, non manent ibi, sicut fides & spes: aliæ autem quantum ad actus, qui ita habentur, sicut fortitudo & patientia; sed vera dilectio numquam excidit. Imo beati sunt, qui te diligunt, Domine; quia summa beatitudo est in tua dilectione & fruitione.

2. Tu clementissime Domine Iesu Christe, gloriam tuam immensam sic mensuras & præbes. Non qui plus ieiunauerit, abstinerit, orauerit, vel peregrinatus fuerit, maiorem gloriam habebit; sed solum, qui plus dilexerit. Vnde dilectio nihil aliud est quam gloria consummata; & ideo scribitur; *Eccl. 12.6. Cum dederit dilectis suis somnum, scilicet æternæ quietis, ecce hereditas Domini, filij, merces, fructus ventris.* Vera dilectio, Domine Iesu Christe, in viâ omnem culpam expellit, nec esse potest cum aliquo peccato mortali, sed ab ipsa omnis virtus perficitur, & ideo dicitur forma virtutum. Ipsa sola nullâ labe inficitur & inquinatur. In patria verò ipsa sola gloriam procurat, ipsa sola in æternum durat, & ipsa sola gloriam mensurat.

3. O amantissime Domine Iesu Christe, non permittas me sine ista dilectione viuere; à qua multis temporibus miserabiliter me subtraxi viuendo in vitiis & peccatis, & in delectatione miserimi corporis, & in complacentia & voluptate hostium antiquorum. Succurrat, piissime Domine Iesu, Christe, tua infinita misericordia: non me dimittat tua inestimabilis dilectio, sed me benigne suscipiat, protegat & defendat, & ad æternam gloriam me perducatur, Amen.

CAPVT XXII.

Quod amori Dei est insistentium.

1. **I**nsistendum est, clementissime Domine Iesu Christe, amator bone, dilectioni tuæ: quia dilectio non est nisi boni: & tu es fons totius bonitatis. Tu es pater, creatione & deitate. Tu es frater, redemptione & humanitate. Tu es Dominus naturalis, non extraneus. Quicquid habemus, à te habemus: & in fine à te expectamus præmium sempiternum. Et ideo conueniens est

ut te diligamus, & tuæ dilectioni continuè insistamus, sicut scribitur; *Audi Deus Israel: quid nunc requirit Dominus, aut quid petis à te, nisi ut timeas Dominum Deum tuum, & ambules in viis eius, & diligas eum, & seruias ei in toto corde tuo, anima, & mente tua, custodiasque mandata Domini, ut bene sit tibi;* Israël, est quilibet fidelis Christianus, per fidem te videns, qui ad diligendum te maximè est astrictus, quia à te magis dilectus. Nam dilexisti nos, & lauisti in sanguine tuo.

2. Tu confusis nobis, & mones dulciter, non acriter, quæ à nobis requiris, scilicet ut te timeamus, dum dicitur, *ut timeas Dominum Deum tuum.* Vnde in timore tui originem suam habet dilectio, quia scriptum est: *Timor Domini, initium dilectionis:* quæ vires accipit & augetur exercitio aliarum virtutum à dilectione imperato. Et ideo dicitur: *Et ambules in viis eius,* id est in bonis operibus: utpote eleemosyna, ieiunio, oratione, & cæteris. Ex his enim vegetior redditur dilectio, sicut ignis, lignorum appositione. Completur autem dilectio tui, Domine, ex affectu interioris amoris; Ideo dicitur: *Ut diligas Dominum Deum tuum.* Completur etiam ex actu exterioris honoris. Ideo dicitur: *Ut seruias ei in toto corde tuo, anima & mente tua.* Conseruatur denique mandatorum tuorum obseruatione; Ideo dicitur, *Custodiasque mandata Domini, ut bene sit tibi.*

3. O benignissime Domine Iesu Christe, quem iustissimum est amari, utilem & salubrem regulam te diligendi nobis clementer dedisti. Nam summæ æquitatis est, ut te timeamus, summæ leuitatis, ut in viis tuis ambulemus; summæ bonitatis, ut te diligamus; summæ dignitatis, ut tibi seruiamus, summæ æquitatis & sanctitatis, ut mandata tua custodiamus. Optissime Domine Iesu Christe amator misericors & iuste, non ponderes peccata mea ad vindictam, sed misericorditer mihi ea condonare digneris, & que mihi gratiam tuam; ut per timorem tui oriatur in me vera dilectio; per affectum interioris amoris, & per actum exterioris honoris compleatur; & per obseruationem mandatorum tuorum conseruetur: ut mihi bene sit te amando, nunc & in perpetuum. Amen.

CAPVT XXIII.

Quod diligere Deum est summè leue.

1. Verba tua verissima sunt, misericordissime Domine Iesu Christe, exemplum & forma amoris, qui dixisti: *Iugum meum suauē est, & onus meum leue.* Hoc est Domine, te veraciter diligere & amare; quod summè suauē est & leue, adeò quòd nullus habet, nec habere potest, causam aut excusationem aliquam te non diligendi. Vnde si alicui dicatur quòd ieiunet, dicere potest, corpus habeo fragile. Si dicatur ei quòd det, potest dicere, pauper sum. Si dicatur ei ut oret, & limina Sanctorum visitet; potest dicere, infirmus sum. Sed cum ei dicitur, dilige Deum & proximum, nullam habet excusationem.

2. Quare benignissime Domine Iesu Christe, dilector amoris: scio quod tam facile est te diligere, quod ex hoc corpus non affligitur, pes non pungitur, caput non dolet, venter non læditur, lingua non vexatur, crumena non euacuatur. Quia dilectio propriè consistit in anima. Et inde sequitur, quod qui amat non laborat. Non est dilectio supra facultatem hominis, ita quod non possit eam perficere. Nec est dilectio longè ab eo, scilicet ultra cognitionem eius, ita quod non possit eam apprehendere. Sed est iuxta hominem, scilicet in ore eius & in corde: ut adimpleat eam, & diligit te Domine qui es summè gloriosus, summè delectabilis, summè pretiosus. Amicitia namque est respectu boni, honesti, delectabilis, aut vtilis. Quæ omnia, sunt in te, Domine Iesu Christe, superamabilis & superbone.

3. Ex dilectione homo viuit vita gratiæ, & multiplicat bona opera, ut terram viuientium possideat. Facilis res est, Domine Iesu Christe, superamande, dilectio; à qua nullus cuiuscumque status, gradus aut conditionis existat, excusa: i potest. O miser & miserabilis peccator quid faciam: Oculata enim fide hoc video & cognosco, quod facere deberem, & non facio; scio clementissime Domine, nullo me modo aliter tibi placere posse, nisi per dilectionem. Ad illam meum animum non conuerto, illa vilipendo, ad illam habendam me non dispono: sed inclinationes meas ad vitia & peccata perficio, in illis permaneo, in illis delector, in illis ferè continuè prostratus miserabiliter iaceo.

4. Respicere ergo me dignare, piissime Domine Iesu Christe, animarum per amorem purgator, oculo tuæ pietatis & misericordiæ. Dele iniquitatem meam maximam, & inclina cor meum prauum & peruersum, ad te diligendum & amandum. Non recedam à te, neque à tua benignissima voluntate: sed quicquid præcipis, faciam: quicquid prohibes, euitabo totis viribus, cogitatione, locutione, & opere. Ut te donante, dilectionem tuam obtineam sempiternam. Amen.

CAPVT XXIV.

De vtilitate amoris Dei.

1. **F**ructus & vtilitas, Domine Iesu Christe, totius dilectionis autor, quæ ex dilectione tua acquiritur, non solum est æterna gloria, de qua dicitur *1. Cor. 2.* Quod nec oculus vidit, nec auris audiuit, nec in cor hominis ascendit. *Ex Isai.* derunt quæ preparasti diligentibus te, Sed etiam est vtilitas magna in hac vita. Quia diligens te, Domine castigatur à te, sicut à patre dilectus filius, si contingat eum deficere vel errare, dulciter corripitur & castigatur, qui de seruo extraneo non curat. Vnde magnum signum amoris tui est Domine, correctio & immissio flagelli. Sed homines desperatos & peruersos, quolibet ire permittis, & in præcipitium peccatorum incidere: quia quem diligis castigas, & flagellas omnem filium quem recipis.

2. Diligens te Domine, pacificè conuersatur. Est enim in pace conscientia, &

& tranquillitatis iucunditate, non in similitudine & odio. Diligens te Domine, diligenter per te à malo præseruatur. Sicut enim homo pupillam oculi sui sedulo custodit, & eam summè diligit, sic tu Domine Iesu Christe, amator bone, amicum & dilectum tuum protegis & defendis, & custodis ne in peccatum labatur, nè à diabolo affligatur. Scriptum est enim: *Qui diligitis Dominum odite malum: custodit Dominus animas Sanctorum suorum, de manu peccatoris liberabit eos.* Custodis animas, non cutem carnis splendidam, non possessiones & terras: quia talia, tibi chara non sunt. Sed custodis animas Sanctorum, ne in peccatum labantur: & de manu peccatoris liberas eas, ne à dæmone affligantur.

3. Diligens te Domine Iesu Christe, amantium gloria, multum honoratur. Quia actus diligendi, est actus tuus & Angelorum, non dæmonum. Tu enim diligis, quia scriptum est: *Ego diligentes me diligo.* In Angelis autem est vis & actus maximi amoris quoad te Domine, & quoad eos qui tui sunt consortij, & quo ad nos. Diligunt enim aded, quod ordo supremus, ab ardore charitatis nominatur Seraphim. Diligentem te Domine suscipis ad penitentiam, eidem remittis offensam, & tua maxima pietate, inenarrabilique benignitate, ac inæstimabili largitate, gratiam misericorditer donas & tribuis.

4. O misericordissime Domine Iesu Christe, semper amari plus quam dignissime, quanta miseria ego nequissimus peccator plenus sum, qui perspecta tanta vtilitate tui amoris, te propter temetipsum diligere debebam? Quod si propter teipsum te diligere nolebam; saltem propter meipsum & vtilitatem meam te diligere debebam: ut ex inordinato amore, tandem venissem ad verum amorem tuum, qui est diligere te non ob aliud, sed propter teipsum solum. Mihi ergo digneris succurrere benignissime, & creare in me cor mundum: ut ab iis quæ tibi displicent abhorrando, & ea penitus execrando, te diligam & amem, tibi seruiam, tibi obediam, præcepta tua adimpleam. Ut te verè, ordinate, non ob aliud quam ob teipsum, diligam per infinita sæculorum sæcula. Amen.

CAPVT XXV.

Quod amor est vestis pretiosa anime.

1. Inuitatus ad tuas cælestes nuptias, dulcissime Domine Iesu Christe, Iamantissime cælestis sponsæ, vestem nuptialem deferre debet: ne si fortè intret sine veste nuptiali, eiiciatur iussu tuo extra, & proijciatur in tenebras exteriores, ubi semper est & erit fletus, & stridor dentium. Ista vestis, ô benignissime Domine, est amor & dilectio, quæ excellit omnes alias virtutes. Ista vestis, ex pretiosis filis, idest, tuis beneficiis homini collata, est contexta, & à te subtili magisterio facta & decorata, quæ designatur per tuam tunicam inconsutilem: quæ nec scissa fuit, nec diuisa: quia amor, neque diuidi debet, neque scindi, Et qui eum diuidunt vel scindunt,

peiores videntur quàm milites te crucifigentes, qui tuam tunicam diuidere noluerunt.

2. Ista vestis nuptialis, Domine Iesu Christe, sponse amoris, summè potens, & efficax existit: quia defendit hominem à frigore cupiditatis, & ad tuum amorem hominem inflamat, ipsumque exornat plurimùm & venustat. Ista vestis nuptialis, sola distinguit filios regni & perditionis. Quia qui eam deserit, regnum tuum intrabit vt conuiua tuus & filius charissimus. Qui verò ea caruerit, etiam si deferat, omnes alias vestes, il est omnes alias virtutes, expelletur à regno tuo. Ista vestis, operit multitudinem peccatorum. Ista vestis, commendabilis est colore & valore. Est enim deaurata vel potius aurea, illud iuxta: *Assistit Regina à dextris tuis in vestitu deaurato*. Et sic ista vestis ornat animam, quòd sine isto ornatu indigna est anima cælum ingredi. Ista vestis nuptialis, munit hominem: *Quia fortis est vt mors, dilectio*. Eius etiam pretiositas, patet ex materia, quia si pretiosum sit quod trahitur ex metallis, gemmis & animalibus, longè pretiosius est quod ex te trahitur. Ista autem vestis nuptialis ex te venit, & à te procedit. Ex ea quoque tegimur, viuimus & ditamur: qui enim hanc vestem habet, nihil ei deest: & sine ista, nihil ei prodest.

3. O misericordissime Domine Iesu Christe, cœlestis sponse, ego miserabilis peccator nudus sum: & cùm hanc vestem nuptialem non habeam, non sum dignus vt intrem ad tuas cœlestes nuptias, sed vt proiciar in tenebras exteriores. Succurre ergo mihi piissime Domine Iesu Christe, æterni nuptialis conuiuij dispensator largissime; & da mihi tua benignitate hanc vestem gloriosissimam, vt inuitatus & vocatus ad tuas sempiternas nuptias, illuc cum veste nuptiali intrem, ibique cum amicis tuis, amore tuo perpetuo fruam, te laudem, te admirem, te glorificem æternitatis regem, & gloriosissimum sponsum, viuentem & regnantem in sæcula sæculorum. Amen.

CAP V T XXVI.

Quòd amor à malis animam custodit.

1. **V**erus amor, Domine Iesu Christe amantium conseruator, custodit hominem à peccatis. Custodit namque ab æmulatione siue inuidia, quæ vehementer corrumpit animam. Inde enim prouenit vt anima in malis proximi delectetur, & in bonis contristetur. Sicut verus amor facit, vt in bonis proximi delectetur, & in malis contristetur. Quia sicut viror naturaliter delectat visum corporis, sic bona naturaliter delectant animam. Custodit, Domine, verus amor ab ambitione, quæ est cùm quis quærit sui exaltationem & proximi deiectionem, vt sic altior factus, à pluribus videri possit, & in admiratione haberi. Nam verus amor, sui exaltationem & proximi deiectionem non quærit. Custodit Domine verus amor ab amore primio proprij boni, ex quo solet fieri vt homini nullo modo cura sit de

bonis proximi, imò cum scandalo sua repetat: quærit namque propria commoda, & negligit aliena. Verus autem amor, quæ sua sunt non quærit, sed quæ tua sunt Domine. Custodit etiam verus amor à maligna cogitatione super iniuriis vindicandis. Talis autem cogitatio, quasi ferrum in vulnere semper hæret, & ideo scribitur; *Auferte malum cogitationum vestrarum ab oculis meis.* Verus namque amor Domine, omnia remittit propter te: repellitque non solum actum, sed etiam omnem cogitationem. Custodit Domine verus amor, ne gaudeat homo super iniquitate, quod est diabolicum, & signum magnæ corruptionis animæ & elongationis à te: cum talis iniquitas summè tibi displiceat. Sed amor verus, Domine, semper gaudet super bono, & non malo.

2. O misericordissime Domine Iesu Christe, amantium cultos fidelissimè, dum præmissa omnia & singula mente reuoluo, sentio me à vero amore elongatum, quia invidia plenus fui & sum. Meipsum exaltaui & proximum deieci; me nimis dilexi; animum habui vindictæ cupidum; in malis gaudium concepi; & denique ad omne malum, propter amoris tui defectum, multipliciter pronus fui. Adiuua me piissime Domine Iesu Christe, largitor & conseruator amoris: & da mihi verum amorem indeficientemque, ut ab iis quæ tibi displicent abhorream; & quæ tibi placent recipiam, teneam, & adimpleam. Ut in fine tuam gloriam perenniter & sine fine diligam. Amen.

CAPVT XXVII.

Quod amor continet in se doctrinam veritatis.

1. **P**erfectus amor, clementissime Domine Iesu Christe, qui omnes perficis; amantes, docet veritatem: quia *in dilectione tota lex pendet* & *Mat. 22. Propheta.* Quicquid latet, & quicquid patet in diuinis sermonibus & in tota sacra Scriptura, dilectio ipsa comprehendit: quia scriptum est; *Plenitudo legis, est dilectio.* Nam tota lex, imò tota scriptura, aut præcipit & consulit ea quæ faciunt ad tuam & proximi dilectionem, sicut patet in præceptis affirmatiuis; aut inhihet & dissuadet illa quæ impediunt & dirimunt dilectionem, ut liquet in præceptis negatiuis. Quid ergo est quod scribitur: *Qui Rom. 13. proximum diligit legem impleuit,* nisi quod qui diligit proximum, diligit & te Deum? Quia eadem est virtus & dilectio, qua quis vtrumque diligit: ut idem est radius quo quis solem & terram intuetur: Sed illum in imo tuæ dilectionis radio diligit: te autem in illius summo. Aliarum autem rerum dilectio, qualis est in mundo, ô Domine Iesu Christe, sol amoris, miserabilis profecto est & stulta & exprobrabilis infania, quod scilicet relicto tuo amore, dilectioni aliarum rerum homo adhæreat.

2. Sed benignissime Domine Iesu Christe, ad verum amorem reductor, ego prauissimus peccator dando meipsum voluntariè quodammodo in reprobum sensum, tuam veram & animæ meæ contemnendo, dilexi vanam voluptatem, interdum fortunam & temporalem facultatem: non con-

Psal. 4. siderans quoddam qui amat diuitias, fructum non capiet ex eis, dilexi frequenter mundanam vanitatem, contra consilium scripturæ dicentis: *Fili hominum, ut quid diligitis vanitatem?* Interdum dilexi irrationabiliter cognitionem & propinquitatem meam plus quam te; & sic non eram te dignus; quia qui amat patrem aut matrem plus quam te, non est te dignus. Aliquoties dilexi munera & dona; sæpè etiam superstitiones & deliramenta. *Matth. 23. 10.* Frequenter contumelias, detractiones ac conuitia. Et idè dignus eram *Psal. 103.* ut maledictio mihi veniret, sicut scriptum est. *Dilexit maledictionem, & venit ei.* Dilexi interdum vindictam & malitiam & iniquitatem, quas *Psal. 51.* reprehendit scriptura dicens: *Dilexisti malitiam super benignitatem, iniquitatem magis, quam loqui equitatem.*

3. Ista fuit, ô superamende Domine Iesu Christe, miserabilis & iniqua vita mea, non attendentis scripturam dicentem; *Nolite diligere mundum, nec ea quæ in mundo sunt.* Sed tu misericors & miserator Domine, ignoscere misericorditer mihi dignare: & illustra mentem meam, ut te perfectè diligam: ut sic informetur anima mea doctrina veritatis, ut tecum qui es amor & veritas, in amore & veritate viuam per infinita sæculorum sæcula. Amen.

CAPVT XXVIII.

Collatio amoris cum arbore fructifera & thesauro.

1. Arbor est fructificans, Domine Iesu Christe, verus amor tuus, fructus imputribiles ferens. Nam *omne opus electum iustificabitur, & qui operatur illud, honorabitur in illo;* Ab hac namque arbore, non excidit folium, flos, neque fructus, quia sempiternus est, quia scriptum est, *folium eius non defluet:* in hac namque arbore amoris, pendent omnia vera bona, quia in dilectione tua & proximi tota lex pendet & Prophetæ.

2. O Domine Iesu Christe, scis quoddam plus valet vnus flos huius arboris, scilicet vnum bonum propositum dilectionis, quam infinita millia auri & argenti, de quo flore scribitur, *flores mei, fructus honoris, & honestatis.* Ex solis fructibus istius arboris Domine Iesu Christe benignissime, pasceris ab homine; ex illis solis viuatur in Paradiso: & qui hanc arborem dilectionis seruat, amittere te non potest: quia tu es arbor veræ dilectionis. Et qui manet in ipsa arbore dilectionis, manet in te, & hinc dilectio in morte non excidit, id est, non ex toto cadit, quia si moritur corpore, viuunt spiritu; & licet moriatur mundo, viuunt tamen tibi; quia si te diligit, qui te non videt in præfenti; multò ampliùs diligit te in futuro, cum te videbit.

3. Vera dilectio, mirissime Domine Iesu Christe, est ille thesaurus in agro cordis absconditus pro quo vniuersa, quæ habet homo essent vendenda, si aliter haberi non posset; Istum thesaurum non potest auferre homini in fine mors, vel mundus; sed alios thesauros temporales bene.

auferet. Iste thesaurus, Domine, ita pretiosus est, quod nullum pœnitebit de comparatione ipsius, quando eius valorem cognoscit perfecte, quantumcumque sibi constiterit, etiamsi dederit omnem substantiam domus suæ, pro isto thesauro. Habetur hic thesaurus tuus, sine quo non profunt thesauri huius mundi.

4. O dulcissime Domine Iesu Christe, quid faciam ego impiissimus peccator, qui ab ista arbore me elongaui, & istum pretiosum thesaurum spreui, & contempni. Parce mihi ex tua maxima misericordia. Concede mihi fructum istius arboris degustare, & degustando eum in corde tenere, & hunc thesaurum in anima conservare, vt tecum permaneam in æternum. Amen.

CAPVT XXIX.

De amore quo Deus diligit hominem.

1. **A** Mantissime Domine Iesu Christe, tu diligis hominem qui seruat munditiæ puritatem. Simile enim, suum simile diligit: & quia tu purus es, & omnium maximè purus, ideò diligis puros, sicut scriptum est: *Qui diligit cordis munditiam, habebit amicum regem.* Sic enim dilexisti beatum Ioannem Euangelistam, de quo scribitur: *Hic est discipulus ille, quem Ioan. 21. diligebat Iesus.* Diligis etiam Domine hominem qui tenet sapientiæ claritatem atque veritatem: quia scriptum est: *Neminem diligit Deus, nisi qui Eccl. 4. cum sapientia est:* quia non potest venire commodum, neque honor de amicitia stulti. Ideò Domine dilexisti Salomonem, sicut scribitur: *Vocauit Do- 3. Reg. 10. minus Salomonem, & dilexit eum.*

2. Diligis Domine Iesu Christe, amator innocentissime, illum qui amat innocentia lenitatem, sicut dicitur: *Scio Domine Deus (ait Dauid) quod pro- 1. Par. 29. bas renes & corda; & simplicitatem, & non dolositatem diligit.* Diligis etiam Domine, amicitiam amicitia rependentem, & seruantem amicitia firmitatem, sicut tu Domine dixisti: *Ego diligentes me diligo.* Hoc namque iustum Pro. 8. est, quòd qui diligitur, diligit. Sic enim Moysen dilexisti, sicut scribitur: *Dilectus Deo & hominibus Moyses.* Diligis Domine Iesu Christe amantium liberalissime, illum qui ostendit effectum, beneficentia suæ largitatem: quia hilarem datorem diligit Deus. Lagni enim & pij, diliguatur à te; sicut patet etiam de Martha, cuius animus erat largitate & pietate fecundus. Ideò scribitur: *Diligebat Martham Iesus.* Diligis Domine illum, qui sectatur iustitiam, & aequitatem: quia scriptum est: *Qui sectatur iustitiam, diligitur à Domino.* Sic enim dilexisti Domine Samuelem aequitate solidum, sicut scriptum est: *Dilectus à Deo Samuel propheta.*

3. O dulcissime Domine Iesu Christe, omnium perfecte amator, dum omnia prædicta in mentis meæ secreto considero, erubesco; imò corde deficio præ timore, quia non sentio in me miserabili peccatore, aliquam ex causis prædictis, ob quam tu debeas me diligere, sed potiùs ob opposita odio habere. Sed tamen ad tuam immensam clementiam confidenter accedo, vt

X. iij

parcere mihi digneris, & remittere misericorditer omnia peccata mea: & sic me disponere in cogitatione, locutione & opere, vt per inuocationem tibi placeam, & causam habeas me diligendi, vt te diligentem me, per infinita sæculorum sæcula vicissim rediligam. Amen.

CAPVT XXX.

Quòd amor est excellentissima virtus.

1. **I**nter cæteras virtutes, benignissime Domine Iesu Christe, superamabilis excellentissime, vera dilectio est excellentissima, & ideo oleo comparatur: quia sicut oleum aliis liquoribus supernatat, sic vera dilectio alias virtutes vel gratias antecellit. Ista vera dilectio sic reddit tibi Domine hominem charum & pretiosum, vt filius tuus nominatur. Qui autem illam non habet, despectus est: & erit coram te sicut stilla situla. De quo & similibus scribitur: *Ecce gentes quasi stilla situla, & quasi momentum statere sunt, & quasi puluis exiguus.*

2. Scio Domine Iesu Christe, operum virtutum æstimator iustissime, quòd licet talis exerceat opera de genere bonorum; parui tamen valoris sunt, si dilectionem non habeat, nec ex ipsis operibus quantumcumque fuerint pretiosa, obtinere valebit regnum cælorum, nisi ea faciat in dilectione & amore. Hæc enim vera dilectio, vnit hominem tibi tamquam capiti, & fidelibus tanquam membris. Ideò hæc vnio valde chara debet esse homini. Sicut enim vnitas quæ est inter caput & corpus diligitur: sic etiam incomparabiliter diligi debet vnitas quæ est ex vera dilectione inter te & hominem; & abscissionem ac separationem tantæ vnitatis, summopere cauere debet homo, & fugere plusquam proprii capitis abscissionem. Sine hac vera dilectione, nullum verum bonum adest homini. Imò in vanum & frustra habentur cætera bona, saltem quantum ad salutem æternam obtinendam. Si autem homini adsit vera dilectio, habet omnia bona, vel in se, vel in aliis. Vera dilectio Domine, est scientia & sapientia, de qua scribitur: *Eccl. 1. Dilectio Dei honorabilis sapientia.* Vnde non solum scientia esse videtur, quia scientia in multis hominem regere non potest.

3. O misericordissime Domine Iesu Christe amantium rector & gubernator, quoties hanc vnionem veræ dilectionis ego miser & sceleratus diuisi & fregi, perpetratione multorum & diuersorum peccatorum; & proinde opera mea inutilia feci, & tempus mihi datum ad operandum bonum perdididi? Adiuua me piissime Domine, & dele iniquitates meas, & reforma in me veram dilectionem: qua mediante opera talia hinc adimpleam, quòd ad regnum amoris æternum tandem pertingere valeam. Amen.

DE AMORE.

163

CAPVT XXXI.

De amore Dei & proximi.

1. **O**rdinata dilectio, clementissime Domine Iesu Christe, qui omnia per amorem ordinas, est amor verus ad te & proximum. Nam hominis amor ordinatus ad te est, si te amet propter te & super omnia. Si autem amor quo quispiam te amat, est propter ista temporalia, non est amor ordinatus, sed tibi contumeliosus: quia qui te amat propter temporalia, plus amat temporalia, quam te. Vnde cum tali amore præponatur creatura tibi creatori, non est hoc sine contumeliis & offensa tui. Non enim est amor ordinatus, nisi tu super omnia ameris, cum tu in infinitum melior sis omni creatura.

2. Amor verò proximi ordinatus est, si ametur proximus propter te, æquè ad te ordinatè amandum creatus est. Si autem parentes aut propinqui plus quam tu amentur, non est talis amor ordinatus: neque sic amans, est te dignus. Duo enim sunt præcepta à te nobis data; dilectio Dei, & proximi. Et licet duo sint præcepta, tamen vnus est amor: quia alius amor non est, quo quis diligit proximum, & quo diligit te; alioqui non esset propter te. Nec potest te quisquam diligere, qui in proximi dilectione nescit aberrare. Cogitatio namque hominis, Domine Iesu Christe veræ dilectionis ordinator, semper debet esse ad te diligendum, & proximum; Te quidem ex toto corde, & ex tota anima, & ex tota mente, proximum autem sicut seipsum, vt scilicet caueat inferre proximo quæ sibi inferri nollit, & impendat ei beneficia, quæ sibi vellent impendi. Ista namque, benignissime, Domine semper sunt attendenda, semper cogitanda, semper retinenda, & semper totis viribus exercenda, & adimplenda. Per amorem autem proximi cognoscitur amor tuus, Domine, conseruari & nutriri. Nam qui verè te amare negligit, & diligere proximum nescit.

3. O misericordissime Domine Iesu Christe, qui solam amas ordinatam dilectionem; quid dicam aut quid faciam, ego durissimus peccator qui præ maxima duritia cordis mei, non te ordinatè dilexi; neque proximum propter te, sed frequenter propter vtilitatem propriam consequendam, aut damnum euitandum, & ita non fuit in me verus amor sed adulterinus? Auxiliari mihi digneris piissime Domine Iesu Christe, charitatis & pulchræ dilectionis ordinator, parcendo mihi peccatori, & misericorditer impartiendo immensam clementiam tuam; & cor meum lapideum sic mollificando, vt ad te tota mente conuertar, te diligam, & proximum propter te: vt tecum in ordinata charitate viuam in æternum. Amen.

De amore inimicorum.

1. **M**agnum est dulcissime Domine Iesu Christe quid nihil odis, si erga hominem qui nihil mali mihi fecit, sum beneuolus & pacificus. Sed Domine illud multo maius est, & magnificentissimæ benignitati tuæ similis, si meum diligam inimicum, & ei qui malum mihi intulit, & adhuc inferre vult si possit, bonum semper velim, & faciam si possim. A tua gratia & benignitate Domine hoc procedit. Nihil tibi in natura similis est, quam homo qui maleuolis & inimicis, se lædentibus placabilis est. Qui enim diligit inimicum, imitatur te qui dilexisti, nos cum adhuc inimici essemus. Et non solum dilexisti, sed & tunc pro nobis mori, morte turpissima voluisti, & pro crucifixoribus rogasti. Nobis quoque præcepisti, vt inimicos diligeremus, sicut scriptum est: *Diligite inimicos vestros, & benefacite iis qui oderunt vos.* Et sequitur præmium quod promittis, *Vt sitis filij patris vestri qui in caelis est.*

Matt. 5.

2. Vna namque est & summa, Domine Iesu Christe cui proprium est misereri & parcere, probatio dilectionis; si nos eum diligamus, qui nobis aduersatur, & bona nostra impedit. Probari etiam solet dilectio per solam odij aduersitatem. Vnde sicut homo vincitur humana felicitate: sic diabolus vincitur inimici dilectione. O Domine Iesu Christe in amore misericordissime, & in misericordia amantissime, scio quod separatio à te mors est animæ. Et contra vnio per dilectionem tecum, vita. Sicut igitur quilibet naturaliter amat vitam corporalem, & mortem timet, sic & amare debet veram dilectionem, & vitare odium: quia qui non diligit: manet in morte. In morte enim culpæ iam talis est, & debitor est mortis eternæ.

3. O clementissime Domine Iesu Christe, à quo exulare non potest amor, licet tibi non sint occulta quæ ego nefandissimus peccator gessi, tamen corde & ore confiteor me iniquè vixisse, & præ mea malitia & iniquitate, vera dilectione caruisse. Inter alia Domine quæ malè concepi & egi, est quod inimicum odio habui: & licet scirem ex mandato tuo quod eum diligere deberem, vilipendi tamen, & spreui mandatum tuum. Simultatem contra multos concepi, & conceptam corde & animo compleui. Et si quandoque facto non compleuerim, ad detractiones tamen, & infamationes processi. Succurre mihi piissime Domine Iesu Christe per tuum benedictum & misericordem amorem; veniam mihi concedendo, vt vitam meam miserabilem emendem, & sic te diligam & alios propter te, vt hic amor numquam deficiat, sed in vitam perduret sempiternam. Amen.

CAPIT

DE AMORE.

169

CAPVT XXXIII.

De amore sui.

1. **Q**uis est, benignissime Domine Iesu Christe, per quem & cum quo aeternus processit amor, qui se verè diligit? Credo & scio Domine, quod ille solus nouit se verè diligere, qui veraciter te amat, & sedulò agit, ut te qui es summum & verum bonum, amando fruatur. A te Domine manat vera amicitia, quam non temporalibus commodis, sed gratuito amore metiri conuenit. Nemo enim potest veraciter seipsum amare, qui te veraciter non amauerit. Nam te amando, seipsum amat. Te autem non diligendo, seipsum non diligit. Quia amor proprius & priuatus, oculum mentis vehementer claudit; & est omnium causa, radix, & fomes malorum.

2. O Domine Iesu Christe, sol unde fluunt radij amoris, quanta insania plenus est ille qui solummodò seipsum amat? Nam talis peruersio amoris est fundamentum abiectæ charitatis, & crescit usque ad contemptum tui. Duo namque amores ciuitates duas faciunt, scilicet Hierusalem, & Babylonem. Cælestem Hierusalem facit amor tui usque ad contemptum sui, sed infernalem Babylonem, facit amor sui usque ad contemptum tui. O iniquum & peruersum amorem, qui sic me miserum peccatorem colligauit, & incitauit, ut verum amorem abiicerem, & contemnerem, & se toto corde amplecterer, se desiderarem, se tenerem, se vterer totis viribus, & se celando in occulto pectoris in culpam facilè prauis cordis laberer & operis.

3. O misericordissime Domine Iesu Christe, qui solus amari dignissimus es, quid faciam ego iniquissimus peccator? Quem amatorem potero inuenire qui me diligit, cum nullum dilexerim, nisi meipsum, & in peccatis innumerabilibus vixerim? Quis me liberabit à ventura ira? à rugientibus preparatis ad escam, & à laqueo infernali? Meipsum iuuare non possum, necque te requirere audeo, cum te non dilexerim. Imò quia neminem dilexi, neminem audeo in adiutorium meum inuocare. Sed ad tuam immensam pietatem recurro, o amor, qui errantes reducis, qui misericors es & miserator, & neminem vis perire, sed saluas sperantes in te. Succurre ergo mihi, & da veniam de peccatis, & gratiam, ut numquam me respiciam, sed te, vel me in te: Ut diligam te toto corde, nec à tua dilectione vnquam recedere valeam, sed ipsam conferuam, nunc, & in vitam sempiternam. Amen.

CAPVT XXXIV

De amore mundi.

1. **S**cio & expertus sum, ego ingratus peccator, clementissime Domine Iesu Christe supercælestis amator, quod amor mundi animas

Y

quas ingreditur, quietas esse non patitur. Semper enim suspicionibus vanisque terroribus sollicitat eas. Talis namque amor mundanus premit semper amatores suos, & non adducit eos ad bonum. Sed qui tali amore utitur, à tuo amore, Domine, excluditur. Talis amor mundanus, cum tuo amore non iungitur, nec ei congruit. Neque ad societatem filiorum tuorum pervenit, qui se à carnali generatione non diuidit.

2. Amor mundi Domine, sese cum suis consolationibus, ne dicam desolationibus, vndique ingerit. Per auditum namque quasi per fenestras irruit & mente suorum amatorum vehementer occupat, animam polluit, charitatem violat, proximum ladic, te Dominum spernit, amorem tuum repellit, totum hominem capit, ac eundem decipit, cum labente labitur, & cum eum tenere quispiam credit, de facili evanescit. Non consolatur, sed contristat; non permanet, sed fugit. Eius dulcedo in amaritudinem vertitur. Eius pulchritudo in horrorem mutatur. Eius desiderium in pœnam convertitur. Qui huiusmodi amorem amplectitur, decipitur, & praecludit sibi ipsi ingressum tui amoris. Quia ubi amor mundi inhabitat, non ingreditur amor tuus.

3. O benignissime Domine Iesu Christe amor increate, vā mihi impiissimo peccatori, qui creaturam amando, te creatorem deserui. Propter condita conditorem reliqui. Transitoria dilexi, & sempiterna spreui. Desolationes pro consolationibus suscepi. Pœnam pro gloria, mortem pro vita, peccatum pro virtute, & mendacium pro veritate. O misericordissime Domine, respicere me dignare oculo pietatis & misericordiæ, & mihi misericorditer ignoscere. Aufer à me amorem sæculi, & da mihi gratiam ut te amem & diligam corde & opere, nec ab amore tuo separer, sed in ipso permaneam in perpetuum. Amen.

CAPUT XXXIV.

De amore diuitiarum.

1. Certa experientia didici benignissime Domine Iesu Christe, sine mensura diues in amore, quod nihil laboriosius est in hoc mundo quam terrenis æstare desideriis. Nam terrenarum diuitiarum amor infatiabilis est: & longè amplius desiderio torquet animam, quam refrigeret usu suo. Talium quoque diuitiarum acquisitio magni laboris est: Possessio, magni timoris: & amissio, magni doloris. Qui illas amat, te Dominum amare non potest, sed cum ipsis labentibus labitur in perditionem. Et qui eis inniritur per amorem, cum ipsis defluit in mœrorem. Qui enim eas inuenit, requiem perdit. Et cum vigilat, augmentum cogitat. Cum dormit, fures somniat. In die afflictus, & in nocte pauidus: Semper autem mendicus.

2. O clementissime Domine Iesu Christe, cuius amor nullum fallit, video per effectū, quod laqueus est in auro, viscumin argento, & pedica in

prædio. Quia qui aurum petit, strangulatur: qui argentum, visco hæret: & qui prædia, alligatur. Qui manè quarrit lucrum, vespere reperit animæ detrimentum, & sic deperit quicquid agitur. Ad tuum Domine extremum iudicium, sine vlla temporis intercapedine, & continuè, volens nolens properat, & amat quod necessario relinquit: id verò negligit, ad quod necessario peruenit. Amat namque illa, quæ possessa onerant, amata inquant, & amissa cruciant, quæque arctius parta, quam concupita constriungunt.

3. O misericordissime Domine Iesu Christe, qui solus verè amandus es, ego nefandissimus peccator, quæ scripsi & scribo, sciui & veraciter scio talia esse. Sed tanta est malitia mea & iniquitas, ingratitude & superbia: quòd omnia tibi placita, consilia & præcepta tua proteruo animo contempni & spreui & ad miseram diuitias mundi cor meum penitus inflexi, illas concupiui & desideravi, & vt eas requirerem laboravi, & ad hoc ipsum vigilavi, & quasque vias adinuenire valui, adinueni. O piissime Domine adiuuare me digneris, & delere, tua maxima misericordia, omnia peccata mea; segregare mentem meam à desideriis terrenis, eleuare illam ad diuitiarum celestium desiderium, quæ in tuo solo consistunt amore: vt eas auxilio tuo consecutus, te perpetuò diligam, & tuo amore fruam in sæcula sæculorum. Amen.

CAPVT XXXVI.

De amore peruerso mulierum.

1. **A**mor carnalis, benignissime Domine Iesu Christe, spiritualis amator, & verè in spiritu & spiritualiter amande, insatiabilis est: quia extinctus, reaccenditur; & post copiam, rursus inops fit, animumque virilem effæminat: & præter passionem quam sustinet, nihil finit aliud cogitare, quia rationis obliuio est, & infania est proximus. Talis peruersus amor turbat consilia, altos & generosos spiritus frangit, à magnis, & altissimis cogitationibus ad paruas & humillimas attrahit, iracundos & temerarios facit. Insuper, qui tali amori coniungitur, tentationibus continuè subiacet.

2. Talis amor, est laqueus animæ, discrimen vitæ, mors suavis, blanda percussio, interfectio leniens, mel felleum, pernicies delicata, dulce venenum, malum spontaneum, sapida ingulatio, & omnium rerum calamitas. Nam Adam & Euam, de Paradisi deliciis eiecit; cælestes, terrenos fecit: humanum genus in infernum demersit; vitam, abstulit mundo; laborem, pressuram inuenit, & malum quod ad mortem perducit. Fædat pueritiam, perdit iuuentutem, & incitat ac inquietat emortuam carnem & senectutem. Talis amor, Domine Iesu Christe, sanctitatis, munditiæ & puritatis amator, est veræ amicitiae inimicus, ineffugabilis pœna, noxium malum, naturalis tentatio, desiderabilis calamitas, domesticum periculum, mali natura boni colore depicta, cõtina sollicitudo, indefinens pugna, quotidiana

mun danum, domus tempestatis, solitudinis & orationis impedimentum, continentis viri naufragium, adulterij vas, perniciosum prælium, & pondus grauissimum.

3. O misericordissime Domine Iesu Christe casti conditor amoris, qui me de nihilo creasti, & tuo pretiosissimo sanguine redemisti, tuam misericordiam supplex imploro, corde & ore efflagito, vt cor meum fragile longè facias à tali amore. Erue me à tanto periculo; defende me à tam miserabili casu; protege me à tanta circumuentione inimici Libera me misericordissime Domine à tanto laqueo perditionis: Da mihi fortitudinem resistendi; concede mihi veniam peccatorum. Eleua mentem & cor meum, vt te amem & timeam; tibi placeam & seruiam; te verum Deum corde, ore, & opere confitear & agnoscam, & à tua infinita misericordia me non repellas. Fac me perseverare in bonis & tibi acceptis operibus: vt in præsentis sic viam, & semper ad vltiora procedam, vt in fine huius transitorie vitæ meæ, vitam inueniam in amore tuo sempiternam. Amen.

CONTEMPLATIONES IDIOTÆ
de vera Patientia.

CAPVT I.

De tribulationibus & aduersitatibus.



Mat. 17.

Mnipotens sempiterne Deus, misericordiam tuam nobis miseris tribuis incessanter, dum tribulationes & aduersitates super nos multiplicas, quæ non ex odio procedunt, sed potius ex amore. Nam super benedictum filium tuum, coeternum & connaturalem, quem dilexisti & diligis sicut scribitur: *Hic est Filius meus dilectus in quo mihi bene complacui*: tribulationes multas & diuersas propter nos miseros peccatores sustinere voluisti. Vnde filiis adoptatis sufficere debent, si sic à te misericorditer diligantur, sicut diligis filium tuum proprium. Quod si super benedictus filius tuus nos diuersis flagellationibus flagellat; non ex hoc se nobis ostendit inimicum, sed potius verum amicum, sicut ipse suis discipulis dicebat: *Sicut dilexit me Pater, & ego dilexi vos.* &

Ioan. 15.

Apo. 3.

Quos amo, arguo & castigo.
2. Vnde quamuis omnis fortuna sit timenda, tamen magis timenda est prospera, quam aduersa, quia hæc quidem, læuendo erudit; illa autem blandiendo seducit. Hæc illuminat hominem; illa excæcat. Ista, mentis oculos aperit; illa claudit. O Deus meus, vehementer peccatori irasceris, dum permittis cuncta ei ad votum succedere, & postea cum supplicia tolerare. Non

DE VERA PATIENTIA. 169

enim est Christianæ dignitatis, his temporalibus exaltari, sed potius deprimi: cum mali nihil habeant in cælo, & boni nihil in mundo. Flagellas namque filium quem diligis, das disciplinam, vt non auferas misericordiam cædis contumacem, vt reddas ei promissam hæreditatem. Nec mirum si hîc flagellas paruulos, quos exinde grandes quæris hæredes. Flagellas igitur & erudis & custodis: & illis ad tempus parcis, quos in æternum dam-
nabis.

3. O vniuersorum creator & gubernator: multas & diuersas tribulationes & aduersitates mihi miserabili peccatori misericorditer dedisti, non ex odio sed ex amore; vt me retraheres ab iniquitatibus meis, & cor meum prostratum ad te eleuares, & vt mala relinquerem, & te querendo humiliter bona, & mihi profutura opera exercerem. Sed tribulationes & aduersitates mihi misericorditer datas, impatienter tuli. Nulla virtus patientiæ mihi comes affuit, quamuis scirem me tantis tribulationibus dignum propter nefandissima scelera quæ commisi. Adiua me misericordissime Domine Deus meus, ne peream in hac vita, præsta mihi patientiam in aduersis; per quam hîc disponar, vt purges peccata mea præterita; & præsentia, & à futuris caueam: & sic opera tibi grata hîc adimpleam: vt in fine vitæ meæ, grata sint tibi seruitia mea in vitam sempiternam. Amen.

CAPVT II.

De miseria mortalis vitæ.

1. **V**Ita præsens, Domine Deus meus, laboribus & tribulationibus plena est. Nam cum luctu agitur, & cum lacrimis amittitur. Tanta igitur est tribulatio huius miseræ vitæ, vt nec vita sit dicenda, sed potius mors, vel quippiam aliud morte deterius, cum vix aliquis pertranseat sine tribulatione vel vnicum diem. Causa verò seu occasio præcipua huius tribulationis, fuit peccatum primorum parentum. Nam cum duæ sint partes hominis, scilicet corpus & anima: Tu Domine Deus meus, vtrique parti locum delectabilem præparaueras: corpori quidem paradysum voluptatis in terris; animæ verò cælum splendidum in supernis, vbi modò sunt animæ sanctorum, & angelorum chori. Non enim bonitas tua, Domine Deus meus, homini tribulationem attulit, sed peccatum.

2. Vnde nobiscum egisti non solum iustissimè, sed etiam misericordissimè, & maximè si respiciamus ad damnationem angelorum irreuocabilem. Cum enim tolerabilior sit superbia in diuite quàm in paupere, & angelum illum sideribus clariùs micantem, irreuocabiliter damnaueris propter suam superbiam: constat, Domine Deus meus, te misericordissimè egisse cum vermiculo qui contra te superbiuit, præceptum tuum transgrediendo. Nam huius tribulatio, temporalis est; illius verò, perpetua. Vnde sicut exaltantur cæli à terra; sic exaltatæ sunt viæ tuæ, scilicet misericordia & iustitia tua.

3. Quod si propter peccatum primorum parentum tribulamur, quanto magis tribulationes in nobis peccatoribus augendæ sunt, qui quotidie peccamus, & innumerabilibus peccatis inuoluimur & delictis? Ideo magis misericorditer nobiscum agis, piissime Domine, tribulationes immittendo: quam terrenas consolationes. Quia qui exceptus est à passione & tribulatione flagellorum, exceptus etiam erit à consortio electorum filiorum, quia scriptum est: *Va vobis qui habetis hic consolationem vestram.* At de tribulatis patientiam habentibus, scribitur: *Beati qui lugeris; quoniam consolabimini,* & *Beati eritis, cum vos oderint homines.* quod est magna tribulatio in hoc mundo. Patienter igitur tolerandæ sunt tribulationes, quæ adducunt tribulatum patientem ad consolationem perpetuam.

4. Sed ego miserrimus, quid dicam, aut quid faciam? quia impatientissimus fui, & sum in tribulationibus meis: quas iustissime sustineo, non solum propter peccatum primorum parentum, sed etiam propter multitudinem peccatorum meorum quæ hæcenus commisi, & adhuc quotidie per malitiam meam committo. Succurre igitur mihi Domine Deus meus. Tolle ingratitude meam. Aufer iniquitates meas, concede mihi veram & firmam patientiam, in præsentibus tribulationibus meis, & in futurum in tuam laudem perpetuam, consolationem æternam.

CAPUT III.

Quod patienter ferenda est tribulatio, & in ea gloriandum.

1. **V**irtus in infirmitate, id est tribulatione, perficitur, misericordissime Domine Deus meus, quia hostem nostrum, scilicet corpus debilitat, quod concupiscit semper aduersus spiritum, quem fortiolem reddit. Ex quo occasio datur Domine Deus meus, ut gratia tua augeatur, sicut scriptum est: *Fidelis est Deus, qui non patietur vos tentari supra id quod potestis, sed faciet cum tentatione prouentum,* id est virtutis augmentum. Tribulatio namque materiam habet pugnae. Vnde fit ut occasionem præbeat victoriae, & per consequens coronæ, quia non coronabitur, nisi qui legitime certauerit.

2. Et ideo Apostolus libenter gloriabatur in infirmitatibus suis. Quia homo, nobilis creatura est, ad gloriam regni cælestis creata. Ideo naturaliter vult gloriari. Sed necesse est ut sciat in quo gloriari debeat; ne fortè gloriatur vnde potius debuerat confundi. Gloriari igitur debet in tribulationibus suis, ut inhabitet in eo virtus Christi, id est gratia Christi, nam qui tribulationes patienter sustinet, ipsum imitatur, cui assimilari gloria magna est, sicut scribitur: *Magna gloria est, sequi Dominum.* Tribulatio igitur est patienter sustinenda, quia mentem sanat, ut patet de quodam sancto, cuius vulnus corporis sanauit vulnus mentis.

3. Tribulatio, est medicina tua, Domine Deus meus. Ideo qui infirmus est, mente gaudere debet quando datur ei tribulatio, tanquam magnam

DE VERA PATIENTIA.

171

spem habeat salutis recuperandæ. cum talis medicus qualis es, sanitatem illius procuret. Tribulationes, debita nostra solvunt, & hæc est valde magna misericordia, tua benignissime Domine: quod pro pœnis futuris des tribulationes præsentis, quæ nullæ sunt respectu futurarum. Dantur namque præsentis tribulationes timentibus te, significationem ut fugiant à facie arcus, id est pœnæ futuræ.

4. Tribulatio in super inducit odium præsentis vitæ. Nam sicut cibus adhæret vasi in quo coquitur nisi moueatur, & perdit saporem debitum, debitumque colorem: sic cor hominis adhæret isti mundo, nisi moueatur per tribulationes, iuxta quod scribitur: *Conglutinatus est in terra venter noster.* Psal. 43. Tua namque misericordia, Domine Deus, electis tuis iter asperum præbet, ne delectati in via, obliuiscantur quæ sunt in patria.

5. O Domine Deus meus, hæcenus cæcus fui, ingratus, negligens & iniquus. Non enim considerabam quare tot flagellis & tribulationibus affligerbar, nec patientiam ullam habebam, cum tuam misericordiam non cognoscerem, propter superbiam & iniquitatem meam. Nunc autem tibi gratias humiliter ago, quia ipsius cognitionem mihi largitus es. Concede ergo mihi tribulatio patientiam & emendationem vitæ: ut tibi hic placeam, deuotique ac humili corde in tribulationibus seruiam, & in futuro sæculo in consolatione & securitate in vitam sempiternam. Amen.

C A P V T I V.

Quanta bona afferat tribulatio.

1. **A**peri oculos tuos rex æterne, aperi oculos tuos, & vide tribulationem meam; ut aspectus tui benignitate, eam cum patientia tolerem, & cum gratiarum actione sustineam, quia si sic misericorditer mecum agas, operabitur in me tribulatio carnalium affectionum extinctionem. Nam sicut mare Aegyptios operuit, & Israëlitis non nocuit; sic amaritudo tribulationum, opera vitiorum impedit, & virtutum opera iuuabit, sicut scriptum est: *Curatio*, id est tribulatio, cessare faciet peccata maxima.

2. Tribulatio reddit hominem securum iudicii, quia non consurget duplex tribulatio. Ostendit præterea salutem æternam: quia si compatimur, & conregnabimus. Quia si tu Domine Iesu Christe, latronem te in cruce consistentem audisti, & eidem dixisti: *Hodie mecum eris in paradiso*, socium tribulationis à communione tua non patieris repelli. Tribulatio excitat cor hominis ad deuotionem; quia scriptum est: *Multiplicate sunt infirmitates eorum, postea accelerauerunt.* Et rursum. *Imple facies eorum ignominia, & quarent nomen tuum Domine.* Post tribulationem Domine Deus meus, consolatione donas, sicut patet in beato Paulo, cui post multas variâsque tribulationes patienter toleratas, consolationes indicibiles donasti, quando illum rapuisti usque ad tertium cælum, & audiuit secreta verba quæ non licet homini loqui. Ideo postea libenter gloriabatur in infirmitatibus suis, ut inhabitaret

Ecol. 19.

Luc. 23.

Psal. 15.

Psal. 32.

2. Cor.
10.

in eo virtus Christi: vt & factum est, cū illi dictum fuerit: *Sufficit tibi Pater
le gratia mea.*

3. O Domine Deus, quomodo consolari potero, aut debeo, cū tribulationes & aduersitates mihi datas non sustinuerim, neque adhuc sustineam patienter, quas cognosco & cognoscere possum, te misericorditer donante, ad vtilitatem animæ meæ mihi datas, vt me pientissimè flagellares? Auxiliari igitur mihi dignetur misericordia tua Domine Deus meus, & creator meus. Da mihi veram notitiam mei ipsius, & aufer à me ingratitudinem omnem. Corroborā cor meum, vt patienter sustineam tribulationes, vitam meam emendem, de peccatis satisfacere studeam, dignam pœnitentiam agendo: vt à te remissionem obtineam qui solus peccata dimittis, firmum cum effectu propositum habeam ad vomitum peccati post hac non redeundi; sed studiosa, & fructuosa, tibi que placita opera sic agam, vt decursis huius periculosa vitæ spatiis, regnum securitatis in tuo sempiterno seruitio ex dono tuæ misericordiæ consequar sempiternum, Amen.

CAPVT V.

Ob quas causas tribulamur in mundo.

1. **D**ominator cæli & terræ, scio quod post transgressionem parentum, in hoc mundo miserabili diuersis tribulationibus affligimur propter indictum necessitatis, propter exemplum authoritatis, & propter præmium vtilitatis. Tribulamur namque & diuersis flagellis affligimur, propter indictum necessitatis. Nam passio tribulationis est nobis indicta à te post transgressionem mandati tui, & necessitas à natura, quia sicut scribitur: Impossibile est vt homo sit & non patiat tribulationes, quia illud oportet fieri quod à te est indictum, & natura necessarium, nam sicut infirmitas quæ à circumstantium & superiorum corporum impressionibus infligitur, necessario radices agit in homine, ita quod vix aliqua medicina curari possit, sic necesse est, quod tribulationes quæ à causis superioribus, scilicet à te & à tua iustitia & misericordia, & à naturæ necessitate generaliter omnibus sunt indictæ, patiamur, & quod ab ipsis quamdiu viuimus affligamur.

2. Tribulamur etiam propter exempli authoritatem, quia si vt tu benignissime Domine Iesu Christe, filij quoque sancti tribulationes sunt passi, & per tribulationes cæleste regnum ingressi: multò fortius necesse est, vt nos qui continuè peccamus, tribulationes sustineamus.

3. Tribulamur denique & affligimur propter præmij vtilitatem; scriptum est enim *Sicut socij passionum estis, sic eritis & consolationis*, quia introitus gloriæ cælestis, patientibus & tribulatis est promissus, & illis reuera dabitur, qui mundi tribulationes patiuntur: etsi passiones huius temporis, condignæ non sint ad futuram gloriam quæ reuelabitur in nobis.

4. O

4. O redemptor meus misericordissime Domine Iesu Christe, respice me digneris oculo tuæ infinitæ pietatis : Ego enim fatuus & stultus hucusque fui, quia licet diuersis tribulationibus & aduersitatibus me affligeres, non cognoscebam tamen qualis inde vtilitas sequeretur, & ideo maxima cum impatientia eas toleravi : ita quod frequenter me ferè perduxerunt ad dissidentiam vsque, tui sancti auxiliij. Parcere igitur mihi iniquissimo peccatori digneris clementissime Domine Iesu Christe : & tantam fatuitatem & dementiam remittere, vt tuas tribulationes agnoscam : & cum patientia eas humili corde suscipiam, & gratias tibi pro ipsis agam ; & te misericorditer donante, te laudem in vitam æternam. Amen.

CAPVT VI.

Quòd afflictiones temporales sint paterna correptiones.

1. **M**agna est misericordia tua, clementissime Domine Deus meus, erga nos miseros peccatores : quia nos affligis tribulationibus diuersis temporaliter & paternè. Temporaliter enim tribulas & affligis peccatorem, vt de commissis criminibus puniantur : sed paternè hoc agis, vt deuiantem reducas, & errantem corrigas, & de morte æterna eum eripias. Timorem ei incutis, vt eum ab amore mundi retrahas & auellas. Et sic occulto tuo iudicio in hac vita tribulatione percutis, ne via pro termino, & peregrinatio pro patria diligatur. Tua igitur paterna tribulatio producit mærorem, & compunctionem, inducit timorem & contritionem, educit languorem & infectionem, adducit vigorem & curationem, sicut scribitur : *Reuertamur ad Dominum, quia ipse cepit & saluabit nos, percutiet & sanabit* Osee 6. *nos, vulnerat, & medetur, percutit, & manus eius sanabunt.*

2. Effectus igitur tribulationis, quamuis sit amarus & toleratu difficilis, est tamen potentissimus ad sanandum, & ad diuinæ gratiæ subsidium inueniendum. Dissoluit namque per compunctionem : confortat & consolidat per spem & consolationem : corrodit carnem putridam & extenuat per dolorem, roborat & conglutinat per sanitatis spiritualis iustificationem. Animam quoque à morte & corruptione inferni præseruat, per vitæ æternæ collationem. Hæc insuper tribulatio calcit superbiā, respuit auaritiā, pessundat luxuriā, fugat furorem, & format in tribulato verum amorem.

3. O benignissime Domine Deus meus, ego peccator ingratus sum tibi fui : quia per flagella tua nolui meipsum corrigere & emendare : sed magis fui obstinatus & induratus, & ad deteriora inclinatus ; per similes incudi, quæ quanto magis percutitur, tanto magis induratur. Ideo timeo ne de me dicatur, quod de mihi similibus dictum est : *Domine percussisti eos, & non doluerunt. Vulnerasti, & à visis suis non sunt reuersi.* Succurre ergo mihi misero peccatori benignissime Domine : vt flagella tua sint mihi salutaria, condamnabilia. Sint mihi ad correptionem & emendationem peccatorum

meorum, non ad vindictam & ultionem, & per illa ad te humiliter reuertar, vitam meam miserabilem emendem, & in tua gratia perseuerem: ut in fine vite, in tua laude & gratiarum actione, misericorditer consequar sempiternam. Amen.

CAPITULUM VII

Quod Deus patienter nos expectat ad penitentiam & emendationem vite.

1. **O** Diuina patientia, quæ nihil aliud es quàm longanimitas tuæ expectationis; quæ scilicet nos expectas ad penitentiam, nolens nos peccatores continuo iudicare, sed patienter sustinens mala nostra. Neque propter hoc subtrahis à nobis peccatoribus beneficia tua. Nam solem tuum facis oriri super bonos & malos: & pluis super iustos, & iniustos. Tanta patientia roboratus, patienter expectas vniuersos. Ideo de te scribitur: *Patienter agit, nolens aliquem perire, sed omnes ad penitentiam reueri.*

1. Pet. 3. Tu enim es Deus iudex iustus, fortis, & patiens, nec irasceris per singulos dies.

2. O misericordissime Domine Deus meus, si tu patiens es erga nos miserabiles peccatores super peccatis & iniquitatibus nostris, quanto magis patientes esse debemus in tribulationibus & aduersitatibus nostris, quas propter scelera & peccata nostra quotidie sustinemus? non enim est patientia in prosperis, sed potius in aduersis. Et ideo dum tribulamur, fortitudinem & firmitatem virtutis habere debemus. Quia non tanta à te toleramus, quanta à te ex nobis miseris tolerantur. Et ideo sine dubio leuius tolerare debemus minora quæ patimur, quando cernimus oculo puræ mentis, illa quæ tibi inferimus.

3. Debemus insuper tribulationes ipsas patienter sustinere, propter magnitudinem valoris & utilitatis. Sicut enim agricola patienter sustinet labores propter spem fructus quem expectat, hic quia propter mundi labores & tribulationes, fructus æternæ gloriæ ex tuæ providentiæ sola benignitate expectamus, ipsas tribulationes patienter sustinere debemus, sicut scribitur: *Patientes estote fratres, usque ad aduentum Domini. Ecce enim agricola expectat pretiosum terre fructum, patienter ferens donec accipiat.*

4. Sed ego miserrimus & sceleratissimus peccator, quamuis scirem & sciam quod patienter me expectas, quia misericordia tua est quod non sum consumptus, quodque propter peccata mea horribilia tribulationes multas & aduersitates mihi donas: tamen impatientissimus fui, & illas cum magna impatientia toleravi, & vnde tibi placere debebam, & penam peccatorum diminuire, displicui, & penam adauxi.

5. Adiuua me igitur benignissime Domine Deus meus: & sicut me hactenus misericorditer expectasti, adhuc me patientissime expectando,

DE VERA PATIENTIA.

175

peccata mea dele, de quibus pœnitentiam agam & condignè satisfaciam, tua gratia adiuuante, vt in fine ex misericordia tua peruenire merear ad laudes tuas in gloriam & vitam sempiternam. Amen.

C A P V T V I I I.

Quod tribulationes patimur: ne in æternum propter peccata nostra puniamur.

1. *C*um iratus fueris, mitissime Domine Deus meus, misericordie recordeberis. Ira tua paternæ est erga nos miseros peccatores: quæ licet ad vtilitatem nostram sit, videtur tamen in nos quandoque sæuere. Hæc ira, quæ tribulationes nobis inuehit, est misericors. Quia ad finem pium & misericordem, & ad saluationem nostram. Et licet, Domine Deus meus, sæpè exteriùs appareas durus per iustitiam & correptionem: tamen interiorius es valde mitis & pius per compassionem, & benignissimam intentionem.

2. Ideo tuam tribulationem patienter sustinere debemus, cum certi simus; quod propter bonum nostrum, tribulationem illam frequenter infligis. Quapropter de te scribitur: *Non in perpetuum irascetur, neque in æternum comminabitur. Non secundum peccata, nostra fecit nobis, neque secundum iniquitates nostras retribuit nobis. Quoniam secundum altitudinem cæli a terra: corroboraui misericordiam suam super timentes se.* Cum autem tribulamur, occasionem patientiæ nobis donas, eo quod tribulationes parum durare soleant, & citò deficere ac cessare. Hæc autem patientia placat seueritatem, seruat mentis tranquillitatem, sedat iræ ferocitatem, retinet cordis humilitatem, habet lucri vtilitatem, arcet carnis agilitatem, & implet diuinam voluntatem. Præterea tribulatio, neque respectu pœnarum futurarum quæ nobis propter iniquitates nostras debentur, aliquid est, neque respectu gloriæ, quam speramus. Non enim condignæ sunt tribulationes præsentis temporis, ad futuram gloriam quæ reuelabitur in nobis.

3. Quare, ô Pater misericordiarum & totius consolationis, qui consolaris nos in omnibus tribulationibus nostris, misericorditer respicere me digneris miserrimum peccatorem, diuersis tribulationibus & angustiis afflictum & tribulatum. Nam licet peccata mea innumerabilia, tribulationes longè maiores & acriores incessanter pati meruerint: tamen tua immensa & infinita misericordia, exuperat omnes iniquitates meas. Ad hanc igitur misericordiam exuberantem recurro: & illam humiliter inuoco, precor & obsecro, ne me ad debitam ultionem peccatorum meorum, sed ad plenam ipsorum remissionem & veniam respiciat. Vt vita mea culpabilis & misera, conuertatur in vitam gratiæ & virtutum, quæ me inimicum, tibi amicum verum faciat, & vitam in laude & glorificatione tua pariat mihi sempiternam. Amen.

Z ij

Quod tribulatio sit res necessaria.

1. **A**D nostram doctrinam scriptum est, clementissime Domine Deus meus, ut omne gaudium existimemus cum in tribulationes varias incederimus. Quia tribulatio, est via vite, via gloriæ, via ciuitatis habitaculi, via regni. Res enim necessaria est tribulatio, quæ in gloriam vertitur: & tristitia, quæ in gaudium mutatur, gaudium inquam longum quod nemo tollet à nobis, gaudium multiplex, & gaudium plenum. Tribulatio namque probationem operatur, & ducit ad gloriam.

2. Gloriandum igitur est in tribulatione, in qua est spes gloriæ. Quinimodò in tribulatione gloria continetur, sicut spes fructus in semine. Illud enim tribulationis nostræ quod in præsentem momentaneum est & leue; in æterna gloria, magnum gratiarum pondus operatur in nobis. Nullus enim Sanctorum coronatus est sine flagello, vel certamine. Abel iustus, occiditur: Abraham, propter uxorem, vitam periclitatur amittere: & sic de aliis, qui aduersitates & flagella tribulationum perpassi sunt. Solus Salomon in delitiis fuit, & idè fortè corruit. Adiutrix enim virtutis est tribulatio. Quam tu benignissime Domine Deus, electis tuis das hinc in terrenis, ut eos remuneres, in supernis. Quia dum eos flagellas, ipsos eligis & erudis ad hereditatem æternam. Qui verò cum hominibus flagellari noluerit, cum dæmonibus flagellabitur.

3. O misericordissime Domine Deus meus, ego sceleratissimus peccator, omni nequitia plenus, consolationes terrenas semper desideravi, toto corde quæsiui, & totis viribus suscepi. Non peperci animæ meæ. Non peperci sanguini, qui pro me effusus est. Non timui horrendum animæ meæ periculum: neque ignem ei præparatum declinaui. Sed in delitiis permanere volui, in quibus castitas periclitatur: sicut veritas, in multiloquio, & charitas in hoc peruerso sæculo. Adiuet me, piissime Domine Deus meus, tua immensa misericordia, ut possim de præteritis poenitere, in præsentem gloriam obtinere, & futuram perpetuarum laudum tuarum gloriam magna cum fiducia præstolari. Non me retardet conscientia peccatorum. Quia ubi illa abundauerunt, superabundare potest gratia: non me terreat tua benigna tribulatio, quæ non est condigna ad præteritam culpam quæ à te remittitur, nec ad præsentem consolationis gratiam quæ à te immititur, nec ad futuram gloriam quæ à te gratis promittitur. Sed te miserante eam suscipiam patienter, & humili corde gratias agam: ut vitam te perenniter laudantium consequar sempiternam. Amen.

Quòd in tribulatione absconditur gloria.

I Atet benignissime Domine Deus meus, in tribulatione, gloria abscondita nobis, quia tu dixisti: *Cum ipso sum in tribulatione.* Quid igitur Domine Deus meus, aliud interim requiram quàm tribulationem? nam mihi, adhærere tibi, bonum est. Descendis namque ut propè efficiaris iis qui tribulato sunt corde: ut nobiscum sis in tribulatione nostra. Et hoc utique, quod in ipsa tribulatione sumus. Quis enim sustineret, quis subsisteret, & quis persisteret sine te? Bonum est mihi Domine tribulari, dummodò tu sis mecum. Melius est mihi in tribulatione amplecti te, & in camino tribulationis habere te mecum, quàm esse sine te.

2. Aurum probat fornax; & viros iustos tentatio tribulationis, ubi cum eis es, Domine. Sicut vnguenta redolere non solent nisi agitentur, & aromata fragrantiam suam emittere nisi incendantur: ita viri iusti virtutes, tribulationibus maximè innotescere solent. Ideò tribulationes & angustias patienter tolerant: & præsertim quia scripturè in hoc sæculo nihil aliud promittunt quàm tribulationes & angustias, pressuras & augmenta dolorum, & abundantiam tentationum. Ad ista namque nos preparare oportet, ne imparati deficiamus. Nam sine ferro aut flammis martyres esse possumus, si patientiam in animo veraciter conferuimus. Nec ille bonus esse præsumitur, quem malorum prauitas non probauit. Quis enim sanctorum, sine tribulatione coronam adeptus est? Nam ab incunabulis Ecclesiæ; non defecit premens iniquitas, & iustitia patiens. Nec omnes qui patiuntur, sunt principes patientiæ, sed qui passione rectè vtuntur, ij patientiæ munere coronantur.

3. O benignissime Domine Deus meus, ista sciui & scio: sed opere non compleui. Acedente enim ad me tribulatione: accessit illico impatientia, turbatio, ira, & indignatio, quæ sunt perditio animæ. Quia qui patientia caruerunt, perierunt. Sed tu misericors Domine, non confideres hanc impatientiam meam ad penam & punishmentem: sed ad vitæ emendationem, & misericordiam obtinendam. Patientiam in meis tribulationibus mihi tribuas: quia scio quod apud te infructuosa non erit. Et si sæuit contra me ignis tribulationis, tu mecum sis, ut misericordia tua me confortet & roborer, & in fine cum perpetuò laudantibus te vitam obtineam sempiternam. Amen.

Quod malignus nihil potest in eos qui patienter tribulantur.

Scio Domine Deus, quòd omnes qui volunt piè viuere in te, persecutiones patiuntur. Habet enim ille nequissimus inimicus laqueos &

iacula: utpote calidissimus venator hominum, sitiens sanguinem animarum. Alios enim appetit telis insidiosa suggestionis, quibus multos vulnerat, quorum tenuis est patientia: alios voluptatibus irretire laborat, quibus multitudinem copiosam concludit. Et ideo in tribulatione magna adesse gaudium oportet, in qua non habet malignus, unde nos deiciat. Nihil enim proficiet inimicus in eo, quem tribulatio comprehendit: dum tamen per impatientiam non deiciatur, sed potius in te validissime confortetur, & de sua tribulatione & aduersitate gaudeat & lateatur. Egro namque de quo desperatur, medicus concedit, ut cuncta quae concupiscit accipiat. Qui vero sanari posse creditur, cum à multis prohiber, quae appetit.

2. Gaudium autem & spem de aeterna hereditate suscipiunt, qui hinc tribulationibus flagellantur. Quia tu Domine Deus, quos saluandos in perpetuum cernis, sub disciplinae regimine astringis, & transitorio verberare affligis: ut ita ad aeternae hereditatis patriam praeparantur obtinendam. Sicut enim amatores huius mundi multa aduersa & diuersa patiuntur; ita neque seruis Dei omnia in hoc mundo prosperè succedunt; ut in die malorum memores sint bonorum, ne pusillanimes fiant & impatientes. Et contra in die bonorum, memores sint malorum, ne extollantur & dicant in abundantia sua: *Non mouebimur in aeternum*. Sicut enim saecularium prosperitas, stultum secularem occidit: sic & abundantia spiritualis, indoctum spirituales occidere potest.

3. O superbenedicte per saecula saeculorum Domine Deus meus, ego iniquissimus peccator, iudicio rationis abusus, prospera mundi potius concupiui & amaui, quam aduersa: & sic incommoquum meum, potius quam commodum, quaesui & dilexi. Succurre mihi misericorditer piissime pater, qui neminem vis perire, sed salutem desideras animatum. Fac me currere per viam mandatorum tuorum, illa obseruando animo diligenti. Sit mihi tua correctio ad salutem, non ad mortem; ad tuam gratiam obtinendam, non ad iram tuam incurrendam. Ut cum in regnum tuum venerim, te possim benefactorem & liberatorem meum, perenniter laudare & benedicere. Amen.

CAP V T XII

Quod Deus sanat percussiones quas infligit.

1. **M**isericordissime Domine Deus meus, tibi proprium est misereri & parcere. Quod si percutis, virga, non baculo, (nisi raro,) percutis. Et cum perculeris sanas; Paterna siquidem vox est haec: *Percutiam et ego sanabo*. Percutis enim ut emendes, non ut vindices, quia tanquam pater misericors, flagellas filium quem diligis. Sed in initio flagellatus, quod te patrem piuum esse ignoret, murmurare solet: & se innocentem, te autem crudelem pronuntiare. Quia vero bonitas tua ei subuenit, per flagellum potentiam vir-

utis tuæ sentit, & tuam sapientiam per intellectum capir: quia talis sapientia attingit fortiter per flagellum, & disponit suauiter per intellectum: dum ei inspiras quod gaudeat in tribulationibus, & sciat quoniam *patientiam tribulatio operatur, patientia probationem, probatio verò spem, spes autem non confundit.* Et tunc se non quasi seruum puniri, sed quasi filium per flagella erudiri cognoscit, ut hæreditatem accipiat.

2. Nequaquam igitur contemnenda est tribulatio: quæ cordis est sanitas, & via recta ad vitam; quæ item magnum quoddam bonum est, & datum optimum, quia elationem deprimit, lasciuia refrenat, intemperantiam edomat, & denique omnes illicitos motus mentis & corporis suffocat & elidit; ceruicem submittit, deponit supercilia, componit vultum, ligat oculos, linguam frenat, iram sedat, incellum format, & dirigit in viam pacis, erudit ad scientiam, exercet ad timorem, ut coronet ad gloriam. Tribulatio namque, contra carnis concupiscentiam, dat continentiam: contra oculorum concupiscentiam, constantiam: & contra ambitionem sæculi, humilitatem.

3. O benignissime Domine Deus meus, quanta mentis cæcitate fui percussus, qui tribulationes mihi viles esse non cognoui? quia mole huius mortalis corporis aggravatus eram, terrenis intricatus curis, carnalium voluptatum fæce infectus, peccatis inuolutus, consuetudine praua induratus, multis criminibus irretitus, in omni bono opere frigidus, in diuersis malis prostratus & induratus, procliuis ferè ad quæcumque vitia, & ineptus ad honesta. Propter quæ nefandissima peccata, mihi tribulationes dedisti, ut tantæ pestes in me sanarentur. Quare gratias tibi ago Domine Deus meus, qui me sic dignatus es visitare ad emendationem vitæ meæ. Tu verò dona mihi veram & firmam patientiam, ut ab omnibus vitiis emundatus, consolari in te misericorditer valeam in æternum. Amen.

CAPVT XIII.

In tribulationibus esse gaudendum.

1. Inter alia debita mea, benignissime Domine Deus meus, ad quorum solutionem astringor & obligatum me sentio, est pœna. Ad quod debitum, primi parentes me obligauerunt, propter peccatum contra te commissum. Quare si mihi affuisset vera cognitio mentis, gaudere semper debebam, dum pœnæ tribulationis me premebant, & affligebant: quia tunc sustinendo patienter tribulationem, debitum meum solvebam. De quo misericors Deus, gratias tibi agere debebam: quia scio quod talem solutionem debiti, si patienter eam suscepissem, compensasses ex largiflua gratia tua, in acquisitione gloriæ sempiternæ, ad quam misericorditer me creaturam tuam vocasti.

2. Tribulatio etiam mihi iuste debebatur, propter vitia & peccata innumerabilia quæ commisi, quia qui peccat, debitor est pœnæ, & pœnam luere

debet. Et idè si oculos mentis apertos habuissem: non molestè tulissem, sed patienter omnes tribulationes & aduersitates mihi datas per te, Domine Deus meus, quoniam in præsenti me affligebas, & satisfactionem de peccatis recipere volebas centuplo minorem quàm sit futura pœna. Tribulatio namque quæ cum patientia toleratur, attrahit te ad tribulatum: quia oculo misericordiæ tuæ respicis hominem tribulatum, desolatum & afflictum, vt ipsum recrees, soleris & liberes ab incendio afflictionis, sicut de te scribitur: *Vidi afflictionem populi mei, & clamorem eius audiui: & descendi vt liberarem eum.* Sic igitur piissime Domine Deus meus, oculo tuæ dulcissimæ pietatis respicis hominem, præ mundi afflictionibus, infirmitatibus, & tribulationibus languentem: Qui si cum patientia omnia toleret, fiduciam, virtutem, & constantiam ei tribuis, dolorèque tribulationum eius temperas & extinguis, & eum ad sanitatem, & prosperitatem perpetuam, misericorditer adducis.

3. O clementissime Domine Deus meus, scio quòd iustissime me affligis, multiplicando in me tribulationes. Hoc autem facis, vt sic ad te redeam, qui propter infinita peccata nequiter perpetrata, recesseram à te. Presta mihi veram firmamque patientiam, & vt tibi gratias corde contrito incessanter agam, & tua gratuita beneficia mihi misericorditer à te collata & multiplicata, mente assidua recolam: vt sic debitum peccatorum exoluam, & de ipsis quantum in me erit, satisfaciam: vt ab illo debito tua misericordia liberatus, & tuæ gratiæ restitutus, ad tibi perpetuò seruiendum, tuam gloriam obtineam sempiternam. Amen.

CAPVT XIV.

Quod varij sunt afflictionum & tribulationum modi.

1. **M**isericors & miserator Domine, dum desidero iudicia tua quæ incomprehensibilia sunt, & vias tuas quæ inuestigabiles existunt; timor & tremor concutunt mentem meam, quæ nullo ignorantia obsecrata, non discernit ad quem finem tribulationes tuæ tendant. Aliquos namque affligis & tribulas, probando sicut Iob & Tobiam, qui cum probi sanctique essent, fuerunt tamen afflicti. Alios affligis & purgas, sicut Nabuchodonosorem, qui flagellis & tribulationibus relipuit. Alios affligis & damnas, sicut Pharaonem, qui post flagella magis induratus perstitit. Alios affligis vt tu glorificeris: sicut accidit in cæco nato, qui captus oculis natus fuerat, non propter peccata sua, aut suorum, sed vt manifestarentur opera tua in illo. Alios affligis & tribulas, & desperati moriuntur: vt hic incipientes infernum suum, de tormento transeant ad tormentum, sicut legitur de Antiocho, qui post acerbis afflictiones, in doloribus mortuus est, & damnatus, de quo & similibus dixisti: *Dorsum & non faciem ostendam eis in die perditionis ipsorum.*

2. O misericordissime Domine, de quorum numero sum ego miser tribulatus

DE VERA PATIENTIA. 181

latus ignoro: & in hoc tabescit anima mea, cor meum turbatur, mens languet, & viscera cruciantur. Tibi soli notum est, qui das tribulationes, quando, & quantum vis: nec audet quisquam quærere cur hoc facis. Sed ad infinitam misericordiam tuam corde contrito, & humilitato recurro: vt qui mihi tribulationes donas, si eas mihi ad probationem, quia talibus dignus non sum, date nolis, saltem non des eas mihi ad damnationem, sed ad emendationem, vt scilicet per eas emendem miserabilem vitam meam. Scio quòd sicut in medicamentis, illa communiter sunt vtiliora quæ amara sunt: sic mundi attritio, correptio, & tribulatio, quamuis sensualitati & carni sit medicina amara, tamen animæ & spiritui est vtilis & proficua, medicinalis & fructuosa: quia scilicet retrahit hominem à peccato, & facit vt contemnat presentia, & acceleret ad futura, sicut scriptum est: *Conuersi sunt à peccatis suis, propter afflictionem suam amaram.* 3. Reg. 2.

3. Tribue igitur mihi clementissime, & misericordissime Domine Deus meus, virtutem patientiæ in tribulationibus meis: vt peccata relinquam, me emendem, & per veram satisfactionem ad te accelerem. Vt hinc me recipias in tua gratia, & in futurum ad te iugiter laudandum, honorandum, & glorificandum, in tua gloria sempiterna. Amen.

CAPVT XV.

Quod tribulationes appellant nos ad regnum cælorum.

1. Scio mitissime Domine Deus meus, quòd per multas tribulationes oportet nos intrare in regnum tuum. Nam sicut naus per mare transiens, multis ventorum impulsibus, multis aquarum fluctibus, multis denique piratarum insultibus subiicitur, nec vnquam antequam ad portum venerit, tuta aut secura iudicatur: sic homo quamdiu nauigat per mare istius amara & periculosa vitæ, semper de vna tribulatione in aliam ducitur: cumque iam euasisse se crediderit, subito tribulationes nouas sentit. Et ita tribulationes huius miserabilis mundi nunquam euadit, quousque ad terminum mortis perueniat. Vnde scribitur: *In sex tribulationibus liberabit te, & in septima non tanget te malum.* Sex tribulationes quibus in hoc mundo affligimur, sunt, dolor, labor, esuries, timor, infirmitates, casus. Septima, est mors, in qua malum temporale huius miseræ vitæ non amplius nos tangit. Iob 3.

2. Benignissime Domine Deus meus, ex piissima dispensatione misericordiæ tuæ, in presenti sæculo tribulamur, vt scilicet dum inter presentis vitæ plenum tribulationibus inuenerimus, per ipsas tribulationes compulsi, ab iniquitatibus & peccatis recedamus, & per bona opera ad cælestem patriam properemus, & æternæ vitæ terminum totis viribus affectemus. Et ideo propria humanæ conditionis ratio est, mundi miseriis subiacere, & tribulationes sustinere, quas etiam oportuit pati Christum, & ita intrare in gloriam suam. Tribulationes namque præsentis, sunt tributum ad quod soluendum natura est obligata. Sunt onus, ad quod portandum est.

Aa

subiugata. Sunt iugum, ad quod trahendum est ordinata. Et ideo debe-
mus eas benigne portare, & humiliter sustinere.

3. Sed ego miserabilis peccator ista sciui & scio, & effectum ipso didici,
& memoria tenui: sed ad effectum non perdux: quia licet ita in veritate
esse scirem, tamen illi scientia uti nolui, sed ad magnas impatientias ani-
mum meum laxavi: ac si tribulationes & aduersitates ipsas iniustissime su-
stinerem. Parce misericors Deus, parce tantæ ingratitudini & iniquitati
meæ. Noli respicere peccata mea ad ultionem & vindictam: sed immensa
bonitas tuæ misericordiæ ea deleat & remittat: ut tuæ pietatis suffultus au-
xilium, cum patientia hinc viam: & in fine, non amplius tibi inutilis, in vi-
tam tibi perenniter seruiam sempiternam. Amen.

CAPVT XVI.

Quod tribulationes corporis sanant vulnera mentis.

1. **D**omine Deus meus, quotidie tribelamur & affligimur per mentis
inconstantiam, per carnis molestiam, per rerum temporalium amif-
sionem, amicorum perditionem, aduersariorum detractionem, iram, inui-
diam, vindictæ cupiditatem, & animi turbationem. Ideo talis tribulatio,
medicinalis est animæ, & ad salutem plurimum operatur, si cum patientia
& vitæ emendatione sustineatur. Dolor enim infertur infirmis, ut conse-
quantur sanitatem, discipuli, ut assequantur sagacitatem, paruulis, ut obliui-
scantur lactis dulcedinem & voluptatem.

2. Sic autem est de tribulatione dicendum, quia dolor tribulationis &
afflictionis, facit ut vulnera peccatorum sanentur, virtutes & boni mores
discant, & lac mundanæ dulcedinis obliuioni mandetur. Et sic est utilis
medicina homini. Quia quamuis primo desolationem afferat, præstat ta-
men postea multiplicem consolationem, sicut scribitur: *Secundum multitu-*
dinem dolorum meorum in corde meo, consolationes tuæ lætificauerunt animam
meam.

3. Benignissime Domine Deus meus, tribulationes sunt sagittæ tuæ qui-
bus nos vulneras, & affligis. Nam sicut sagitta infixæ corpori, dolorem in-
fert, & remedium quærere compellit: sic tribulatio dolorem affert cordi
nostro, & nos mouet & impellit, ut in re alia solatium requiramus, scilicet
Psal. 73. in cogitatione boni æterni: ideo scribitur: Sagittæ tuæ infixæ sunt, & con-
firmauisti super me manum tuam.

4. O clementissime Rex, & Pater misericordiarum, ac totius consolatio-
nis; quanta dementia premor, quanta duritia cordis astringor, & quanta
distantia à te elongor; Tu motus magna misericordia super me peccatore,
me afflixisti diuersis tribulationibus, ut mundum & mundana contemne-
rem, hostes debellarem, de peccatis dolerem, mentem meam ad te eleua-
rem. Sed ego miser & omni miseria plenus, tribulationes impatienter tuli,
nec propter illas mundana contempsi, sed meis hostibus consensum præbui,
& mentem meam ad terrena prostravi, & sic post flagella effectus sum dur-

rior. O creator meus, non despicias creaturam tuam, non consideres delicta mea; sed aperi exuberantem bonitatem tuam, quæ me peccatorem nefandissimum iustificet; immundissimum mundet, prostratum erigat, inconstantem corroboraret, ut sic tribulationes tuas patienter sustineam, quod tibi semper seruando, & nunquam posthac inobediendo, ad consolationem perueniam sempiternam. Amen.

CAPVT XVII.

Quod diuina virtus, in tribulationibus nostris agnoscitur potentior.

1. **D**ilectio cordium Domine Deus meus, animarum suauitas, & gloria te diligentium: aufer à me cor lapideum, & da mihi cor carneum, cor humile & contritum, ut agnoscam tribulationes tuas mihi tam utiles & salubres, qui hætenus eas impatienter ferendo, damnosæ esse reputaui. Et quis benignissime Domine Iesu Christe, miseriam & tribulationem, inter dona tua non computet? cum tu dicas Apostolo: *Sufficit tibi gratia mea, & Virtus mea infirmitate perficitur.* Vnde idem Apostolus dicit: *Cum infirmor tunc fortior sum, & magis potens.*

2. Sed ego miser, sapientia huius mundi suffultus, quæ stultitia est apud te, id tribulationem esse putabam, quod consolatio est iis qui recto iunt corde. Vnde idem Apostolus dicit: *Nihil pro me, nisi in infirmitatibus meis gloriabor.* Nam quod impatientia supplicium reputat, id humiliter patienti ad solatium cedit: quia cum patientiæ fructus, oculo piæ mentis consideratur & pensatur, alleuatur onus, dulcescit afflictio, & in ipsorum pressura grauaminum, futuræ consolationis primitiæ iam prægustantur. Ideo sancto viro afflictione corporis, & substantiæ temporalis amissione tribulatio, dicitur: *Qui afflictus est, erit in gloria.*

3. O misericordissime Domine Deus meus, quia secundum duritiam cordis mei & impenitentiam, hætenus thesaurizavi mihi iram in die tremendi tui iudicii, tu piissime mecum agens, iram tuam conuertisti in gratiam. Nam tribulari me voluisti, ne grauius tribularer. Ideo si tuam piissimam bonitatem mente humili cognoscerem, pura animi voluntate velle deberem, quod corpus meum iciunia frangerent, cilicia constringerent, labores grauarent, vigilia exsiccarent, insurgerent in me tribulationes, me frigus incuruaret, conscientia mea contra me murmuraret, caput doleret, pectus arderet, stomachus inflaretur, vultus palleret, & vita mea in dolore deficeret, & anni mei in gemitibus, sicque crucem tuam portando deficerem.

4. O Domine Deus meus, ingrediatur putredo in ossibus meis, & subter me scateat, ut in tua laude requiescam in die tribulationis. Scio namque quod post culturam sequeretur vindemia, & post afflictionem lætitia, cedentque contumeliæ te miserante ad coronam, quam mihi in fine dierum meorum, ad gloriam & honorem tui sanctissimi nominis misericorditer concedere digneris per infinita sæculorum sæcula. Amen.

Aa ij

Quod Deus tribulatos extrinsecus, consolatur intrinsecus.

1. **T**V misericordissime Domine Deus meus, visitas hominem dilecto, & subito probas illum. Visitas & probas, vt sic spiritum eius à spiritu maligno custodias, vt postea tibi dicat: *Visitatio tua custodit spiritum meum.* Nam flagello tuo piissimo pulvis excutitur, quem ad deformitatem animæ, iniquitas assidua congescit: & exteriori vulnere sanatur plaga interior. Sic enim irasceris, vt manfuecas, affligis vt parcas; prosternis, vt erigas. Nam sicut in nobis passionēs tuæ abundant, ita per te consolatio nostra abundat. Plena namque est miserationibus ira tua: & iudicia animaduersionis, quam temporaliter exeres in tuos, certa sunt tuæ pietatis indicia. Ideo inter delicias & dolores ira, & misericordia tua in flagellis sapienter agnoscunt. Et quamuis in presenti omnis correptio amara sit; tamen in futuro reddet fructum pacatissimum. Ideo bonum est tribulari, vt *Psal. 65.* internos cruciatus absorbeat vexatio temporalis: quia scriptum est, *Transiimus per ignem & aquam: & eduxisti nos in refrigerium.*

2. O benignissime Domine Deus meus, scio, & verè quidem scio, quod maior est culpa mea quæ præcessit, quàm tribulatio quæ me premit. Donum tuum gratuitum est, quod tribulor: Tua gratia est, quod affligor. Non enim semper medicus dulcia ministrat ægrotis, sed frequenter amaras porrigit potiones. Infirmitas siquidem cui cibus delicatior causam præbuit, poculo amaro purgatur. Et apostemata quæ ex otio & crapula succreuerunt, adustione sanantur, & incensione purgantur.

3. Sed clementissime Domine Deus meus, spero in tua infinita & immensa misericordia, quod in me non confurget duplex tribulatio, neque iudicabis me bis in idipsum. Fac mecum misericordiam tuam, vt presentes tribulationes patienter & æquanimiter sustineam. Quia spero quod hæc tribulatio, ex tuæ miserationis dono, redimet tribulationem æternam. Patior namque pro iniquitatibus meis. Sed vtinam datum mihi esset de super, pro iustitia pati, quia, *Beati qui patiuntur propter iustitiam.* Verùm quia pro peccatis meis tribulationem patior, sufficit mihi si patientiam mihi dones, ne deficiat præ pusillanimitate spiritus, & præ tempestate, caro debilis & toties flagellata: Vt cum finis vitæ meæ aduenerit, regnum laudis tuæ obtineam sempiternum. Amen.

Quod tribulatio sine patientia, caret fructu.

1. **I**N labore & ærumna, protraho vitam meam miseram, clementissime Domine Deus meus. Datus sum in opprobrium & derisum iis qui sunt in circuitu meo. Equanimiter tolerare non valco, quod afflictio super

DE VERA PATIENTIA. 185

tribulationem vulnerum mentis meae additur, & per diuersa flagella assidue multiplicatur. Nimirum impatientia, Domine Deus meus, frangor, non considerans quod omnis cordis & corporis afflictio, citra profectum & fructum salutis est, sine patientia condimento.

2. Tu enim piissime Domine nequaquam obliuisceris misereri, neque contineres in ira misericordias tuas, sed iratus, misericordiae semper recordaris. Nam qui flagellum tuum cum aequanimitate & bona patientia sustinet, ei indubitanter ira tua cedit in gratiam, & tribulatio in consolationem: quia saepius temporaliter punis, ut aeternae mortis ardores, poena redimat temporalis. Scriptum namque est, *Quod in aedificio templi, omnes lapides prius malleis tundebantur*. Sic & viui lapides qui ponendi sunt in illa caelesti Hierusalem, quae aedificatur ut ciuitas, variis infortuniis & concussionibus prius poliuntur, quam in aedificio caelestis habitaculi collocentur, Sicut neque in horreum reponitur granum, antequam flagellis aut triturantium pedibus sit excussum.

3. Omittissime Domine Deus meus, ego miserabilis peccator datus fui quodammodo in reprobum sensum, quia praedicta agnoui, & quid agere deberem inspirasti: sed tuas inspirationes salutiferas longe a meipso proieci, & erigendo ceruicem meam durissimam, maxima impatientia & animi turbatio sic mentem meam concussit, ut tua benigna flagella mihi vtilia esse non cogitarem, sed damnosa. Succurrere mihi digneris, piissime Domine Deus meus, & compati miseriae meae. Ignosceas mihi, quia misericors es & benignus. Sentiam bonitatem tuam, non feneritatem. Non appareant peccata mea ante conspectum diuinae maiestatis tuae ad vindictam sumendam de ipsis; sed potius ad tuam misericordiam obtinendam. Desque mihi gratiam hinc bene viuendi, ut sic gratiam te in perpetuum laudandi & benedicendi, possideam sempiternam. Amen.

CAPVT XX.

Quod cum tribulationem sentimus, tunc maxime de Dei miseratione considendum est.

1. **O** Pro ne irascaris mihi pater misericordiarum, ea ira qua corripis deuium, & non ea qua errantem in viam salutis & vitae reducis. Nam non cum nescio, sed cum sentio te iratum, tunc maxime confido te esse propitium. Quia cum iratus fueris, misericordiae recordaberis. Damnandis & reprobis, tribulatio parit pusillanimitatem, pusillanimitas perturbationem, perturbatione desperationem, quae interimat. Concedat ergo mihi tua benignissima pietas: ne perturber pusillanimitate spiritus. Ad hoc enim, quantum potest, laborat aduersarius meus, ut holocaustum meum deuotionis pinguedine vacuetur: ut & minus acceptum sit tibi, & conscientia mea in spirituali gaudio minus exhilaretur, sicque ex pusillanimitate tolerantiae,

A a iij

etiam conscientiae, pusillanimitas generetur. Non perturber, sed cum patientia tolerem, si transitoria mihi auferantur, si conuitia ingerantur, si supplicia irrogentur. Ostende mihi cui irasci debeam, & fac ut ei irascar.

2. Irasci namque debeo ei, quod solum mihi nocere potest; quod solum potest facere, ut omnia alia mihi obsint. Sed quidnam illud est? Certè Domine Deus meus, iniquitas propria. Pone inimicitias inter me & ipsam, ut eam à me expellam, neque ei consentiam, sed forti animo resistam. Fac ut irascar ei ne appropinquet mihi, sed fugiat à me: imò ab ea fugiam, cum mortem æternam animæ meæ ipsa desideret, & te cupiat separare à me. Illi irascere Domine, & malignos ac pestiferos motus ipsius reprime, ne mihi valeat vllatenus dominari.

3. Scio Domine, & mihi notum fecisti, quod mihi nulla nocebit aduersitas, si mihi nulla dominata fuerit iniquitas. Qui huic irascitur, ceteris non mouebitur, sed ei aderit consolatio de spe salutis æternæ: in quam translatis peccatis quæ separabant ipsum & te Deum & Dominum, per tuam gratiam erigetur, & exhilarabitur. Aduuare igitur mihi digneris benignissime Domine Deus meus, ut cum patientia eas aduersitates sustinere valeam, quæ non destruant, sed potius erudiant, auferant iniquitates, & inserant virtutes, quibus tibi placeam, tibi seruiam, à te non separet, sed obtineam à misericordia tua vitam tecum in tuo seruitio sempiternam. Amen.

CAPVT XXI.

Quod sit signum firmæ mansionis in Deo.

1. **S**ignum euidentissimum est, Domine Deus meus, quod homo in te firmiter manet, quando per aliquas passionēs & tribulationes, quantumcumque difficiles & graues, non separatur à te nec à tua dilectione. Sed quando magis affligitur, tantò minus à te diuiditur, sed fortiùs coniungitur. Talis autem fuit superbenedictus filius tuus, qui mortem sustinuit acerbissimam cum summa patientia, tibi patri suo perfectissimè obediendo. Cuius imitator fuit Paulus, clementissime Domine, dum dicebat: *Certus sum quod tribulatio, angustia, fames, nuditas, periculum, persecutio, & gladius, non poterunt nos separare à charitate Dei.* Ambulauit etiam Domine superbenedictus filius tuus, vias duras pœnarum, tribulationum, & afflictionum, cum summa patientia: sicut agnus coram rudente se obmutescens, & non aperiens os suum.

2. Qui igitur, Domine Deus meus, desiderat tecum manere debet ambulare vias duras tribulationum & afflictionum cum latitia cordis & patientia: alioqui non apparebit filius tuus, sed seruus. Scribitur namque. *Quod seruus non manet in domo in æternum, filius autem manet.* Non seruus offendens Dominum, non flagellatur, sed de domo expellitur, & odio habet Dominum suum, eumque quantum potest, fugit. Et ideo dicitur, *Quod seruus Eccl. 14. non manet in domo in æternum.* Filius autem, patrem offendens, flagellatur à

patre, sed è domo non expellitur. nec habet patrem suum odio neque ab eo fugit, & idcirco dicitur: *Quod filius manet in domo in aeternum.* Qui ergo Domine propter flagella & tribulationes huius mundi separatur à te, non est filius tuus, sed seruus. Qui autem est filius tuus, quantumcumque flagellatus, non separatur à te, neque à domo tua, sed magis diligit te, quia per flagellum cognoscit se magis diligi à te. Purgantur etiam Domine palmités in vite, ut fructus plus afferant. Sic tu Domine Deus meus, purgas in electis tuis peccata, per afflictiones & flagella: ut fructus virtutum, & tuarum gratiarum plus afferat, quemadmodum apparuit in sanctis Iob & Tobia, & multis alijs.

3. O benignissime Domine Deus meus, tuam misericordiam supplex imploro, ut in hac parte non sim seruus sed filius: tua flagella & tribulationes suscipiendo patienter, ut numquam à te separari valeam, sed in domo tua semper tibi obediendo, tecum maneam per infinita sæculorum sæcula. Amen.

CONTEMPLATIONES IDIOTÆ de Morte.

CAPVT I.

Quid sit Mors.

1. **M**ors, dulcissime Domine Iesu Christe, nihil aliud est quam finis, & defectus vitæ, quando scilicet anima desinit corpus viuificare. Mors namque, Domine, non est aliquid propositum, sed priuatiuum. Tu enim Domine mortem non fecisti, nec lætaris in perditione viuorum. Verum sicut cætera omnia quæ sunt hic, naturaliter corruptioni obnoxia sunt, ut patet in animalibus, arboribus, & fructibus; (Hoc autem facit contrarietas quatuor elementorum, quorum vnum continuè agit in alterum, & proinde necesse est, quod corruptio sequatur, & quod res deficiant: quia scriptum est: *Opus corruptibile in fine deficiet*:) ita nos quoque, quia elementis contrarijs constitamur, idcirco varietati & mutabilitati subiecti sumus. Vanitati namque subiecta est omnis creatura.

2. Hinc est, quod necesse est, omnes homines per mortem corrumpi & deficere, & multiplici subiaceere miseræ. Sicut enim, Domine Iesu Christe, omnes stellæ quæ ab oriente veniunt, quamuis sint magnæ claritatis & virtutis, tendunt tamen ad occasum, & ibi secundum diuersos circu-

lios, alia tardiùs, alia ociùs, sese à nostris aspectibus abscondunt: sic etiã homines vniuersi, qui ab oriente, id est per natiuitatem intrant in mundum, quamuis ibi aliquamdiu rutilent & clarescant, necesse tamen est quoddam tandem ad occasum mortis, alij tardiùs, alij citiùs, secundum cursum durationis quem à te acceperunt, veniant, decidantque: & à mundi aspectibus sese subtrahant & recedant. In Adam namque, Domine, id est in peccato Adam, omnes moriuntur, nisi tu qui omnia potes, aliter ordines.

3. O misericordissime Domine Iesu Christe, scio quoddam mortem naturalem non possum euadere. Cuius memoriam etsi quandoque habeam in mente, & me moriturum veraciter credam; quia tamen eam tanquam fatuus, imò tanquam demens, quasi procul sit considero, vitam meam miseram emendare negligo, & conuersionem meam differo; ac in voluptatibus & delectationibus corporalibus, peccatisque variis & diuersis, tempus meum miserabiliter expendo & consumo; vix de anima mea ac tuo beneplacito aliquantulum cogitando. Adiuvet me tua misericordia, Domine Iesu Christe, & secundum peccata mea non retribuas mihi; sed ignoscere mihi digneris: Vt anima mea, cum mors eam à corpore separabit, te adiuvante ad regnum tuum, vbi tua sola voluntas fit, & tuum beneplacitum, perueniat sempiternam. Amen.

CAPVT II.

De origine mortis.

1. **P**eccatum precessit, Domine Deus meus, & sequuta est mors. Quod sanè si cauisset homo, in æternum mortem non gustasset. Peccando itaque vitam amisit, & mortem inuenit, quoniam tu Domine ita prædixeras. Et iustum quidem erat, vt si peccaret homo, moreretur. Tu siquidem Domine, vita es anima, sicut anima est vita corporis. Peccando igitur voluntariè, nolens desit viuere, & sponte repulit vitam, cum voluit viuere. Noluit regi à te Domine, idè per se regere corpus non potest: & quia non paruit tibi suo superiori, suo inferiori imperare non valet. Tu namque omnium conditor, tuam inuenisti creaturam tibi rebellem: & idè anima eius inuenit pedesque suam, id est carnem sibi rebellem. Quia verò non potuit diuidi à te Domine, anima, nisi peccando, neque corpus ab ipsa anima moriendo; nihil profectò congruentius est, quam vt mors operata sit mortem: Spiritualem, corporalem, culpalem, pœnalem, & voluntariam, necessariam.

2. Cum igitur benignissime Domine Iesu Christe, hac gemina morte, secundum naturam vtramque, homo damnatus esset; altera quidem spirituali, culpali, & voluntaria; altera verò corporali, pœnali & necessaria: vtrique tu Deus homo, vna tua corporali, pœnali, ac voluntaria, benignè ac potenter occurristi; & per tuam mortem, nostram destruxisti. Sed ego impulsus & sceleratissimus peccator, tuam gratiam & clementiam non agnoscendo, neque tibi pro tanto beneficio redemptionis, gratias humiliter agendo;

agendo i peccata multa enormia & nefanda, frequenter & voluntarie commisi, ob quæ vtraque mors iustè & dignè mihi debetur & merui vt corpus, vermibus, & anima ignibus deputetur.

3. Verùm denignissime Domine Iesu Christe, in tua immensa misericordia confido, quæ longè maior est quàm iniquitas mea, & quæ humiliter rogo, vt mihi digneris misericorditer ignoscere, peccata elementer remittere, & gratiam benè hinc viuendi concedere. Vt anima mea à morte, tua misericordia, & magno tuæ mortis beneficio, preseruetur æterna. Amen.

CAPVT III.

Quòd necessarium est mori.

1. Statutum est, piissime Domine Iesu Christe, omnibus hominibus semel mori. Statutum quidem in pœnam grauissimam, propter peccatum pri morum parentum. Ista namque, Domine, est lex ligans hominem; quæ numquam habuit, nec habitura est, saltè quantum ad cursum communem, in aliquo exceptionem. Iam enim mortalitatem, id est moriendi necessitatem, transfuderunt priui parentes in posteros, quia peccauerunt. Sicuti è diuerso immortalitatem transfudissent, si non peccassent. Mortis autem modus, est subitus & imperceptibilis; nihilque certius est morre; hõra autem mortis, ac loco, & modo nihil incertius. Nescit enim Domine Deus meus homo finem suum: nec quantum ad tempus, nec quantum ad locum, nec quantum ad modum. Quis enim benignissime Domine potest scire quando morietur, vel vbi, vel qualiter, vtrum scilicet benè an malè? Certè Domine Iesu Christe, nemo. Ideo scribitur: *Non verearis iustificari usque ad mortem.* A manè enim usque ad vespèram, mutabitur tempus. Tempus quidem viuendi, & tempus moriendi, tempus merendi, & tempus mercedem recipiendi.

2. Viuens ergo & sanus Domine debet homo confiteri tibi, & conuerteri ad te, & non expectare usque ad horam mortis: quia subitò veniet mors, cuius morsus est rapidus, & incurabilis: Quia homo cum mortuus fuerit, hæreditabit bestias, serpentes & vermes. Bestiæ namque deuorabunt corpus: serpentes verò & vermes ipsum corrodent, & in ipso requiescent. O peccati stipendium! O naturæ debitum! O inuitabile iudicium! *Omnes morimur, & quasi aqua dilabimur in terram, quæ non reuertuntur.* Omnes enim homines vadunt ad mortem, & subter terram manent, & nullus inde reuertitur super terram.

3. O misericordissime Domine Iesu Christe, casus iste naturæ, qui est mors, valdè horribilis est, plenusque omni calamitate & miseria. Hunc casum inuitabilem, Domine, ego miserabilis peccator, non præuidi: imò, vt verius loquar, præuidere non curavi, abstinendo à vitiis & peccatis, & inhærendo bonis operibus & virtutibus, & disponendo me ad suscipiendum hunc casum cum innocentia & æquitate mentis. Succurre igitur mihi

clementissime Domine Iesu Christe, & parce mihi, quia nihil sunt dies mei. Concede mihi gratiam vt continuè, viuendo, & moriendo, te verum Deum agnoscam; & te agnoscendo, laudando, & glorificando, vitam mihi acquiram sempiternam. Amen.

CAPVT IV.

Ad quid profit memoria mortis.

1. **A** Sidua memoria mortis, benignissime Domine Iesu Christe, prodest ad hominis humiliationem. Vnde antiqui, volentes se humiliare, ponebant cineres super capita sua in memoriam mortis, & quòd in cinerem *Gen. 3.* redigerentur, sicut scribitur: *Memento homo quia cinis es, & in cinerem reuerteris.* Et alibi: *Quid superbis terra & cinis?* Prodest etiam Domine Iesu Christe memoria mortis ad fugienda peccata. Nihil enim tam reuocat à peccato quàm frequens mortis cogitatio, sicut scribitur: *In omnibus operibus tuis memorare nouissima tua, & in aeternum non peccabis.* Qui enim recolit mortem, cogitare debet quòd peccatum causa est mortis: quia sententia data fuit Adà, quòd quacumque die de fructu vetito comederet, moreretur, Et alibi: *Sordes eius in pedibus eius, quia non est recordata finis sui.*
2. Prodest insuper, Domine Iesu Christe, ad deprimenda carnalia desideria, & ad abigendas tentationes varias & diuersas, quæ separant animam à te. Nihil enim tantum valet ad domanda desideria, quantum cogitare qualis sit ipsa futura mors. Prodest etiam, Domine Iesu Christe, ad erogationem elemosynarum. Non enim sunt, Domine bona hominis, quæ secum ferre non potest. Sola namque misericordia, comes est defunctorum, Sed ad quid prætereà, piissime Domine Iesu Christe, prodest? Certè ad prouocandum & inducendum peccatorem ad veram pœnitentiam. Nam cùm audisset Ezechias rex, quòd mori deberet, fleuit amarè. Et tunc tu, Domine, mortis sententiam prorogasti, & alias gratias ei fecisti. Rex etiam Niniur audiens quòd ciuitas subueri debebat, induit se sacco, & egit pœnitentiam: & tunc Domine sententiam subuersionis reuocasti.
3. Quantò igitur, Domine, homo magis morti appropinquat, tantò magis debet bona agere, & de peccatis commissis humiliter pœnitere. Sed ego induratus peccator hoc sciens, pœnitere non curo, sed in peccatis perseuero, de quibus non doleo. Compellas igitur piissime Domine Iesu Christe, cor meum durum, ad veram pœnitentiam: & ignoscere mihi clementer digneris: vt memoriam mortis semper habendo à vitiis cessem, & pro tui nominis gloria bona agam: vt te iuvante mortem non sentiam sempiternam, sed vitam in laude tua numquàm morituram obtineam. Amen.

Quòd mors debet prauideri.

1. **P**rauidenda est & consideranda clementissime Domine Iesu Christe, mors propria, ne praecipuemur. Bonorum, vt ad bonum animemur. Malorum, vt in nostris affectibus temperemur. Est namque, Domine Iesu Christe, consideratio mortis nostrae utilis ad nostram praemunitiorem, quia iacula prauisa minus feriunt. Et ideo si mortem cogitando prauiderimus, minus sua percussio, cum ipsa venerit, nos grauabit. Talis enim consideratio inducit humilitatem, & causat securitatem. Quia si mors continuè prauideatur, securius expectatur, sicut scribitur: *Effice tibi mortem cogitatione familiarem, vt si tua fors tulerit, possis obuiam ei exire.* Est namque magna sapientia, frequenter cogitare de morte.

2. Consideratio mortis bonorum, Domine Iesu Christe, est utilis ad nostram animationem: quia boni qui mortui sunt, in te sperauerunt, & contra hostes animae fortiter dimicarunt: & ideo talium exempla, nos ad similia animare debent, & similibus de causis consolari, vt sic quilibet possit cum sibi similibus dicere: Vadamus, & moriamur cum eo. Consideratio etiā mortis malorum, Domine Iesu Christe, est utilis ad nostram cautionem: vt desistamus à concupiscentiis, ne vt & illi, praecipuemur vinculis mortis. Et ideo, Domine Iesu Christe, mors tam nostra quam aliena, praecogitari & memoria mandari debet: quia scriptum est. *Memores esto, quoniam mors non tardabit.* Eccl. 7.

3. O misericordissime Domine Iesu Christe, quanta miseria & iniquitate plenus sum ego pessimus peccator, qui cogitationes & considerationes meas non habui circa mortem propriam, neque circa alienam; sed potius circa mundana & vana, circa voluptates & delectationes corporales, circa otiositates & negligentias, & circa vitia & peccata enormia. In his enim tempus vitae meae miserabiliter consumpsi. Aduuare ergo me digneris, piissime Domine Iesu Christe, & concedere mihi gratiam, vt de peccatis commissis doleam, & totis viribus satisfaciam, & ad tuum beneplacitum semper viuam studiosè operando: vt mortem prauidendo temporalem, ad laudes tuas curram in vitam sempiternam. Amen.

Quid operetur bona mors.

1. **V**erum est mori, clementissime Domine Iesu Christe, homini qui bona morte moritur. Nam per bonam mortem, commutat homo timorem in securitatem, & ideo scribitur: *Melius est mihi mori, quam vt gloriam meam quis euacuet.* 1. Cor. 9. Gloria cuiuslibet hominis, Domine, est sanctitas vitae: quae citò in hac vita fragili perdi potest, vt pote per vnum consensum peccati morta-

lis. Quamdiu igitur Domine Iesu Christe homo viuit, quantumcumque sit sanctus, in periculo est vt euacuetur gloria sua; id est vt perdat sanctitatem suam: sed per bonam mortem euadit omne periculum amittendi gratiam tuam. Mutat itaque Domine timorem in securitatem. Et propter hanc commutationem Helias petiit animæ suæ vt moreretur: Etat enim in timore maximo, fugiens Iezabelem.

2. Mutat etiam piissime Domine Iesu Christe, homo, per bonam mortem, laborem in tranquillitatem: quia scriptum est; *Melius est mors* (scilicet bona) *quàm vita amara, & requies sempiterna, quàm languor perseverans.* Heu Domine Iesu Christe, tota vita præsens & misera, amaritudinibus resperfa est, laboribus inquieta, sollicitudinibus turbulenta, & languoribus plena. Ergo Domine melius est benè mori, & benè moriendo statim euolare, vel saltem appropinquare, intrandi securitatem habere, ad locum refrigerij lucis, & pacis, & sempiternæ quietis: quàm in hac vita, in qua ista mala sunt, diutius esse. Propter istam namque commutationem, sanctus ille Ionas quando erat in labore & sudore, dicebat: *Melius est mihi mori, quàm viuere.*

3. O benignissime Domine Iesu Christe, fac sentiam ego miser peccator suauitatem tui dulcissimi amoris, & remitte mihi misericorditer peccata mea quæ commisi. Concede mihi ex benignitate tua benè viuere, vt benè moriar, & mors sit mihi lucrum, non damnum: vt te auxiliante, à secunda morte non lædar, sed in vita æterna tibi gratias agam, te laudem, te glorificem in sempiternum. Amen.

CAPVT VII.

Rursum quid operetur bona mors.

1. O Clementissime Domine Iesu Christe, te miserante & iuuante commutat homo per bonam mortem, inopiam in satietatem: quia scriptum est, *Melius est mori, quàm indigere.* Sed heu piissime Domine Iesu Christe, quantis indigentis bonorum tam spiritualium, quàm corporalium, seu temporalium, viator subiicitur: cui nihil, quantacunque sit excellentiæ in honoribus, affluentia in diuitiis & opibus, & complacentia in delectationibus, potest sufficere, & eius desiderium quietare: Ergo Domine, melius est eas commutare, & benè moriendo illuc intrare, vbi est omnis excellentia honorum, & omnis superabundantia bonorum; vbi erunt delectationes in dextera tua vsque in finem; id est sine fine, vbi tua diuinitas videbitur, amabitur, & perpetuò tenebitur. Propter hanc commutationem, Domine, scilicet egestatis in satietatem, dicebat sanctus ille Tobias in maxima paupertate constitutus: *Expediit mihi magis mori, quàm viuere.*

2. Commutat etiam, Domine Iesu, bene moriendo, tristitiam in iucunditatem, sicut scriptum est: *Melius est nobis mori in bello, quàm videre mala gentis*

noſtre & Sanctorum. Heu Domine, quot mala ſunt in mundo: Eccleſia eſt diminuta, Chriſtianitas conturbata; & quæ erat longè latèſque per orbem diſſuſa, nunc eſt ferè ad vnum occidentalem angulum redacta. Impij dominantur, boni tribulantur, & mala ſine numero multiplicantur. Melius eſt ergo commutare ſtatum benè moriendo, & tranſire ſtatim ad locum ubi propter ſublinitatem & æquitatem iudicis, nihil erit conſuſum, nihilque turbulentum, aut quod poſſit aliquam triſtitiā ingerere, quàm eſſe diutiùs in hoc mundo. Propter hanc commutationem, ſcilicet triſtitiæ in iucunditatem, Domine, dicebat Apoſtolus, quòd cupiebat diſſolui, & eſſe tecum.

3. Ergo etſi mors corpus ſit, quantum eſt de ſe, multum formidabilis, tamen bona mors propter iſtas commutationes eſt multum optabilis. Quia per ipſum tanquam per ianuam, intratur ad vitam. Idcirco, ô miſiſſime Domine Ieſu Chriſte: ex tua exuberanti miſericordia tribue mihi gratiam bene moriendi, vt ad vitam indeficiente, te authorem in tua laude perenni perueniam. Amen.

CAPVT VIII.

Quod mors debet cum patientia ſuſtineri.

1. **H**omo moriturus, benigniſſime Domine Ieſu Chriſte, non magis contriſtari aut conqueri debet, ſi ad mortem peruenit, quàm nauigans ſi ad portum ad quem nauigabat, celerius quàm credit, perringit. Eſt enim Domine Ieſu Chriſte mors, portus ad quem continuè nauigamus, & idè ſi ventus & caſus fortuitus, ſubitò & ex inſperato ad illum portum perducit, dolere non debet homo, ſed potiùs cum patientia tolerare.

2. O clementiſſime Domine Ieſu Chriſte, erubeſcentia conſundor in me ipſo, dum conſidero quòd cum patientia mortem ſuſtinere non poſſum, prout frequenti cogitatione mente reuolui. Dum enim ſactas Scripturas lego, & exempla multorum, grauiùs in animo cogitationem meam impatientem fero. Lego Eleazarum, propter obſeruationem legis antiquæ, magis glorioſam mortem, quàm debilem vitam amplectentem, voluntariè uiſſe ad ſupplicium. Lego Socratem condemnatum ad mortem, quia inſcitiam aliorum carpebat: qui licet pro pecunia liberari potuiſſet, maluit talem mortem ſuſtinere, & de morte, vſque ad mortem, cum diſcipulis diſputauit. Multi quoque alij Philoſophi, mortem patienter ſuſtinuerunt, vitam præſentem & miſerabilem contemnendo. Sancti etiam in nouo Teſtamento, & præcipuè Martyres, pro honore nominis tui, Domine Ieſu Chriſte, mortem patientiſſimè ſuſtinuerunt, & cum gaudio ac libenti animo receperunt. Multi denique alij quotidie moriuntur, qui mortem cum patientia ſuſcipiunt, conſiderantes quòd quicquid futurum neceſſariò eſt, hilari animo ferri debet.

3. O piſſime Domine Ieſu Chriſte, ſi multi & diuerſi innocentes, mor-

Bb iij

rem cum patientia tolerant, quid de me iniquissimo peccatore fiet, qui non sum innocens, sed multis & variis peccatis ac vitiis inuolutus? Certè cum magna patientia mortem expectare deberem: quia mors propter peccatum mihi debetur: & sic, si possibile esset, non vna morte, sed pluribus esset dignus. Adjuua me igitur, misericordissime Domine Iesu Christe, & respice me, non secundum peccata mea, sed cum infinita misericordia tua, mihi peccata remittendo clementer, vt sic vitam meam ordinando, disponendo, & emendando transigam, vt in fine mortem patienter sustinendo, vitam in choro te perenniter laudantium consequar sempiternam. Amen.

CAPVT IX.

Quod mors debet per fortitudinem non timeri.

1. **M**ors non est timenda viro iusto, mitissime Domine Iesu Christe, tum quia certa est & necessaria, tum quia brevis est & transitoria, tum quia utilis est & meritoria. Certa est mors, Domine, sicut scriptum est: *Rom. 5. Omnes in Adam moriuntur.* Est etiam brevis & transitoria, quæ timenda esset, si nobiscum semper esse posset. Sed necesse est, aut quod non veniat, aut quod veniat & transeat. Est insuper, Domine Iesu Christe, utilis ac meritoria: qua mors nihil aliud est quàm carceris finis, & laboris consummatio, ad portum applicatio, peregrinationis adimpletio, oneris grauissimi depositio, de equo furioso descensio, de domo ruinosa liberatio, omnium ægitudinum terminatio, omnium periculorum euasio, omnium malorum consumptio & disruptio, debiti naturæ solutio, reditus in patriam, ingressus in gloriam. Ideò scriptum est, *Melior est dies mortis, die natiuitatis.* Quare noli metuiere iudicium mortis.

2. Sed benignissime Domine Iesu Christe, loquitur scriptura de viris iustis, non de iniustis, de quorum numero ego miserabilis peccator sum: qui mortem meritò timere debeo, cum ignorem ad quem locum per ipsam iturus sim. Ideò illi dicere possum, Domine Iesu Christe: O mors quàm amara est memoria tua homini iniusto. Amara namque est, Domine, & terribilis, abundantibus iniquitate, affluentibus prosperitate, deficientibus bonitate, carentibus aduersitate, & non languentibus infirmitate.

3. O piissime Domine Iesu Christe, quanta cordis amaritudine repleri debeo, qui abundo iniquitate, affluo terrena prosperitate, careo bonitate & ferè aduersitate, nec diuturna affligor infirmitate: Nōne sic amaram & terribilem mortem timere debeo? Sed misericordissime Domine Iesu Christe, bonitatem & clementiam tuam humiliter oro, & vtinam exorem, vt ignoscere mihi digneris, & compati fragilitati meæ. Dirige me in beneplacito tuo; vt exemplo formicarum inductus, quæ colligendo grana, præcauent sibi contra futuram hyemem: sic præcaueam mihi contra futuram mortem, virtutes, & gratias, ac etiam bona opera te adiuvante aggregando, vt mortem, cum venerit, non timeam; sed ad tuam gloriam misericorditer perueniam sempiternam. Amen.

DE MORTE.

195

CAPVT X.

De presentia ineuitabilis mortis.

1. **Q**Vocumque se vertat homo, mitissime Domine Iesu Christe, semper habet mortem presentem. Mors ubique nos expectat, ubique nos inuadit. Nostrum viuere, est mori. Nam prima die natiuitatis nostrae, vita nostra longior est quam vnquam postea futura sit: Quotidie enim, singulis horis demitur aliquid de illa longitudine cursus nostri. Et hinc est, Domine Iesu Christe, quod quanto plus viuimus, tanto magis vita nostra minuitur. Quotidie namque morimur, & vnum diem de vita nostra, mors subtrahit nobis & furatur, & ideo Domine dum crescimus, vita nostra decrescit. Infantiam amisimus, deinde pueritiam, postea adolescentiam: Sed & hunc ipsum quem agimus diem, cum morte diuidimus.

2. Ecce, benignissime Domine Iesu Christe, quanta sit nobiscum presentia mortis, cum qua etiam quotidie vitam nostram partimur. Mors enim Domine, vitam nostram dilabi velut aquam, facit. Sicut enim aqua congelata propter feruorem solis, liquefieri solet, & in terram & lutum dissolui: sic utique, Domine Iesu Christe, nostra fragilis & aquea conditio, quae nihil aliud est quam carnea quadam moles, aliquantulum coagulata, quando feruore mortis percutitur & vrgetur, & necessario diffluit, & in terram decidit & mutatur, vt dicere queat vnusquisque: *Sicut aqua effusus sum, & dispersa sunt omnia ossa mea.* De terra enim facta sunt haec omnia, & in terram pariter reuertentur. Et sicut aqua dilabens in terram à terra absorbetur, ita quod amplius non videtur: sic homo in terram per mortem cadens, ita consumitur & destruitur, quod nunquam amplius in hac mortalis sortis conditione inuenitur. Et quis est homo, Domine Iesu Christe, qui viuit, & non videbit mortem? Certè nullus. Nam à muliere initium factum est peccati, & propter ipsum, omnes morimur. Psal. 21.

3. O piissime Domine Iesu Christe, respicere oculo pietatis & misericordiae me nefandissimum peccatorem, & compati mihi dignare: quia licet mortem & eius presentiam frequenter cogitauerim, & te etiam iustum iudicem esse non ignorauerim, tamen ob id nolui desistere à vitiis & peccatis, sed in ipsis miserabiliter corruendo perseveraui. Et idcirco misere mei clementissime Domine Iesu Christe, secundum magnam misericordiam tuam: vt te miserante, mortem euadam sempiternam, & vitam inueniam in tuo seruitio perpetuam. Amen.

CAPVT XI.

Quod mors est timenda tanquam dubia.

1. **N**emo scit, benignissime Domine Iesu Christe, vtrum odio an amore dignus sit. Ideo mors est timenda tanquam dubia. Nam si mihi

certò constaret Domine, quòd in puncto mortis crediturus essem in te, id est habiturus essem fidem viam, & formatam charitate, ac operantem per dilectionem; non dubitarem quin mors mea, futura esset bona, & felix transitus ad vitam æternam. Sed mihi non constat certò, quòd habeam aut habiturus sim tunc fidem viam, formatam charitate, ac operantem per dilectionem. Quamuis mihi certò constet, quòd fidem habeo per quam credo. Nemini autem, nec de se, nec de alio, certò constat, quòd fidem habeat per quam credat in te, formatam charitate; sine qua mors homini bona esse non potest: quia nemini certum est, se aut alium charitatem habere.

2. Et ideo Domine, quamuis homo de se & de alio quòd talem habeat fidem, per multa signa verisimiliter coniectare possit; nullam tamen de illa certitudinem habere potest, nisi per te misericorditer ei reueletur. Et sic Domine, cuilibet homini mors sua & cuiuslibet alterius dubia est: quia nullam habet certitudinem de fide prædicta; quamuis de bonitate hominis probabiles coniecturas habere possit. Quapropter mors hominis, est multum timenda.

3. Sed heu miser & miserabilis ego peccator quid faciam Domine Iesu Christe; quia non solum coniecturas, sed etiam certitudinem habeo, me non habere charitatem aut fidem viam, formatam charitate, sed multa & innumerabilia peccata, non leuia quidem illa, sed graua, imò grauissima, in quibus vixi, & persteti per totam ferè vitam meam, saltem ex quo mihi intellectum tribuisti, & cognitionem discernendi inter bonum & malum, vitam & mortem, Auxiliari igitur mihi digneris tu auxiliator misericordissime, ignoscendo & remittendo peccata mea nefandissima quæ commisi. Vitam & exitum ab hac vita bonum mihi concede, vt tecum per charitatem formatam, viam per infinita sæculorum sæcula. Amen.

CAPVT XII.

Quòd mors simpliciter est timenda.

1. **T**V benignissime Domine, dum morti propinquus fuisti, cepisti paucere & cadere, & dixisti: *Tristis est anima mea usque ad mortem.* Timuisti igitur dulcissime Domine Iesu Christe, & tristis fuisti quodam timore & tristitia quadam naturali, quæ tantum fuit in appetitu sensitivo, nec in aliquo tetigit appetitum rationalem, secundum quem conformabas te voluntati Patris, dicens: *Non quod ego volo, sed quod tu.* Si igitur piissime Domine Iesu Christe, timuisti mortem, eo modo quo dilexi, quæ erat Patri tuo gratissima, & generi humano fructuosissima, ego miserrimus & sceleratissimus peccator, mortem valde timere debeo, præsertim quia nescio in quo statu & quomodo moriar.

2. Nam Domine Iesu Christe, in articulo mortis, nisi tu auxilieris, diabolus quam maxime potest, homini insidiatur, tentans eum super omnia,
de

de veritate fidei, & suadens ei infidelitatem & desperationem. Is enim etiam B. Martino, in exitu eius astitisse legitur. Cui beatus Martinus dixit: *Quid hic astas cruenta bestia? nihil in me funestum reperiēs, sed finis Abrahae me recipiet.* Imò verò, quod maius est, te patiente in cruce, idem astitit, credens aliquid de suo in tua beatissima anima reperire, sicut scribitur: *Venit princeps mundi huius, et in me non inuenit quicquam.* O misericordissime Domine Iesu Christe, dum ista lego, dum ista cogito, & mente sapius reuoluo, magna timoris anxietate quatior. Timeo namque illum diem, expauesco horam, horresco insidiatoris dolosi praesentiam, qui quaerit animam meam, ut eam secum perducatur in damnationem aeternam. Amen.

3. O clementissime Domine & Redemptor, quam ex immensitate misericordiae tuae, tuo pretiosissimo sanguine redemisti; eam custodi assidue, & praesertim in illo puncto mortis per tuam maximam pietatem, ne inimicus in ipsa aliquid valeat usurpare; sed merita tuae sacratissimae passionis, defectus eius suppleant, ut tua sancta protectione, cum aeterna laude, gloriam tuam possideat sempiternam. Amen.

CAPVT XIII.

De potentia mortis.

1. **I**nsuperabilis est potentia mortis, piissime Domine Iesu Christe, quia non vnum solum, sed omnes superat; scilicet fortes & debiles, laetos & tristes, egenos & diuites, incolas & aduenas, iuuenes & senes, bonos & malos, viros & mulieres. Et ut omnia flumina intrant mare, sic quotquot in hanc fluctuosam vitam veniunt, mare, id est amaritudinem mortis necessario subintrant. Mors enim, est omnium poena, omnium tributum, omnium carcer, omnium domina, omnium receptaculum. Et sicut mare est hospitium, omnium fluuiorum, sic mors est finalis repositio omnium mortalium, & ideo scribitur: *Scio quod morti trades me, ubi constituta est domus omnium viventium.* Iob 30.

2. Hanc autem mortem benignissime Domine Iesu Christe, nec potentia fortiores, nec scientia doctiores, nec pecunia ditiores, nec eminentia digniores superare valent: quia moritur robustus & sanus, doctus pariter & indoctus, diues & egenus: sic quod nulla aetas, nullus sexus, nulla conditio, mortem euadere queat, quae incessanter quotidie homines deuorat, & suis legibus subjugat. Nec iuuare potest hominem amicorum turba, non familia multitudo, non auri vel argenti plenitudo, non vindemiarum vbertas non densitas segetum, non iucunditas pratorum, non aliud quicquam. Non enim mors inopiae parcat, non diuitias reueretur, non defert generi cuiusquam, non moribus, non ipsi denique aetati. Vbiq; enim senibus est in ianuis, iuuenibus in insidiis.

3. O misericordissime Domine Iesu Christe, nulla arte mundi, hanc mortem naturalem euadere possum, sed me semper sequitur, & insidias

Cc

mihi parat quocumque vadam; & quicquid cogitem, dicam, aut faciam, mihi minatur, propinquum aduentum suum mihi ostendit, per multiplici-
tatem diuersorum signorum. Succurre mihi misericorditer, benignissime Domine Iesu Christe, parcendo peccatis meis. Concede mihi, vt peccata praterita toto corde desicam & expurgem: & à futuris abstineam corde & opere. Vitam præsta puram, iter paratutum, vt cum naturalis mors adue-
nerit, cum magna patientia eam suscipiam, & te semper agnoscam. A de-
ceptione spirituum malignorum me defende; vt anima separata à corpo-
re, ad tuum regnum cum perenni laude perueniat sempiternum. Amen.

CAPVT XIV.

Quæ sint incerta in morte.

1. Incertus est status hominis in morte, piissime Domine Iesu Christe. Nescit enim homo in quo statu moritur, scilicet bono an malo. Et qua-
lem mors inuenit hominem, talem homo inuenit mortem. *Nescit quoque homo utrum amore an odio dignus sit, sed omnia in futurum reseruantur in-
certa.* Incertus est etiam locus mortis: quia nescit homo, quo in loco mo-
rietur: quia mors insidiatur homini in omni loco, & in omni loco homi-
nem expectat. Incertum est item Domine genus mortis; vtrum scilicet, gladio, igni, aqua, an alio mortis genere quis moriatur. *Nescit enim homo finem suum, sed quemadmodum capiuntur pisces hamo, sic capiuntur homines in tempore malo.* Hora denique ipsius mortis, incerta est.

2. Et ideo præcipis Domine vigilare, dicens: *Vigilate vtrique, quia nesci-
tis diem neque horam, scilicet mortis.* Nam ventus est vita nostra, quia inui-
sibiliter & incessanter, & sine reditu transiit; & comparatur umbræ quæ
semper sequitur corpus. *Dies enim hominis, sicut umbra declinant.* Nec est
aliud vita præfens, quàm cursus ad mortem. Et quamuis homines laborent
vt diu viuant, & ne ad terminum vitæ perueniant: nihil tamen est Domine
vivere, nisi ad finem currere. Quare ipsi ambulant quò peruenire nolunt:
& currunt voluntarij, ad terminum, quem refugunt. Incerta sunt igitur,
benignissime Domine Iesu Christe in morte omnia: quæ festina festinanter
inuadit, neque pro quacunque re, inducias vnus hora facit.

3. O clementissime Domine Iesu Christe: quanta fatuitate sum plenus,
imò dementia ego sceleratissimus peccator; peccator inquam corde, ore,
opere, & omissione: qui mortem ante oculos non posui, sed retro, & me-
moriæ ipsius in obliuionem commutavi; incertitudinem aduentus eius
non timui, neque ob id peccare desij, sed voluptatibus illecebrosis animum
meum subdidi. Heu, piissime Domine Iesu Christe, adiuua me, secundum
multitudinem misericordiæ tuæ: ne sic à morte rapiar improuisus, sed te
miserante vitam meam miserabilem emendem, & incerta mortis me non
terreant, neque mihi noceant: sed amor tuus, & laus tua sint mihi vitæ &
gloria sempiterna. Amen.

DE MORTE.

199

CAPVT XV.

De morte iustorum.

1. **P**retiosa est mors iustorum in conspectu tuo, Domine Iesu Christe. Imò nihil pretiosius est illa morte, per quam fit ut delicta omnia dimittantur, & gratia cumulatiùs augeantur. Si tamen dicenda sit mors, quæ tibi mortuum sociat, & in lucrum cedit morientis. Ista est tanquam finis laborum, tanquam victoriæ consummatio, tanquam vitæ ianua & perfectæ securitatis ingressus, ac initium retributionis. Vnde fit, ut vir iustus viuatur, quia bene moritur. Non enim dici debet mortuus simpliciter & omninò.

2. Triplex namque est vita, benignissime Domine Iesu Christe, cui triplex mors opponitur scilicet vita naturæ, cui opponitur mors corporalis, quæ nihil aliud est Domine, quam animationis cessatio, & recessus animæ à corpore. Vita gratiæ, cui opponitur mors spiritualis, quæ est peccatum mortale, per quod anima priuatur gratia quæ est vita eius. Est etiam vita gloriæ, cui opponitur mors gehennæ seu inferni, quæ est principaliter carentia diuinæ visionis; quam comitatur in adultis pœna sensualis, & animæ tormentum. Quare reuera, dulcissime Domine Iesu Christe, qui moritur corporaliter, non moritur, te miserante & adiuuante, simpliciter & omninò; nisi mortem illam mors spiritualis comitetur, & gehenna sequatur. Vnde, Domine Iesu Christe, quando aliquis moritur corporaliter, cuius vitam comitatur vita gratiæ, & sequitur vita gloriæ, saltem in re vel in spe firmissima, quæ nullo modo confundit sperantem; nullo modo potest dici simpliciter & omninò mortuus. Beati namque sunt Domine, qui in te moriuntur.

3. **O** misericordissime Domine Iesu Christe, scio me veraciter mortuum fuisse morte spirituali, & sic perdidisse vitam gratiæ: quia tempore vitæ naturæ innumerabilia ferè peccata commisi, scienter, deliberatè, consensu, & opere. Succurta ergo mihi, clementissime Domine Iesu Christe, misericordia tua: ut à morte spirituali in præsentem resurgam, & viuam vitam gratiæ: & concede mihi ex immensitate tuæ pietatis, ut finita vita naturæ per mortem corporalem, viuam vitam gloriæ in tua perenni laude in æternum. Amen.

CAPVT XVI.

De morte criminali.

1. **N**ihil aliud est, dulcissime Domine Iesu Christe, mors criminalis, quam mors peccati, quæ animam occidit, & hominem peccatorem mortuum reddit. Quia sicut mortuus opera sensuum non exercet, sic certè peccator ad gloriam sempiternam obtinendam non mouetur per bonam operationem; nec per laudis confessionem, quia mortui non laudabunt te

Cc ij

Domine. Nam per peccatum, Domine, anima separatur à te, & sic mortua reputatur. Quia sicut corpus variis modis interficitur, sic anima per diuersa peccata necatur & occiditur.

2. Habet autem, benignissime Domine Iesu Christe, diabolus hostis antiquus, multos modos quibus ipsam animam interficit, & spiritualiter necat. Quosdam namque per superbiæ suspendium interficit. Suspendit namque illos alre, per elationem, & honorum pariter & diuitiarum ambitionem. Qui ideo instabiles & vani sunt, quia sicut res quæ suspensa est, instabilis & vaga est, & ad flatum venti facile mouetur: sic superbi ad flatum venti diabolicæ suggestionis, quocumque velit malignus, facillimè impelluntur. Quosdam, per incendium auaritiæ perdit, quæ profectò est ignis, qui nunquam dicit, sufficit. Nonnullos, gladio inuidiæ perimit. Inuidia enim, est gladius Goliæ qui proprium magistrum occidit. Quia inuidi antequam alios interficiant, gladio inuidiæ torquentur; vt de eis dicatur: *Psal. 36. Gladius eorum, intret in corda ipsorum.* Alios veneno luxuriæ interficit. Istud autem est venenum aspidis, inducens hominem ad dormiendum, quem postea dormientem enecat. Sic enim luxuria, primò hominem dormire facit per delectationem, quem tandem per consensum occidit. Alios, sagittis iracundiæ & vindictæ quibus eos vulnerat, interficit. Alios, per submersionem gulæ, aquis deliciarum corporalium suffocat. Alios, per oppressionem acediae interimit, quia eos torporis oneribus opprimit. Ita enim oneribus pigritiæ onerati sunt & grauati, quòd se ad aliquod bonum nequeunt erigere.

3. O misericordissime Domine Iesu Christe, ista reuera est mors, quæ etiam viuentem hominem, peccatorum mole constringit: Quia quamuis viuere videatur, sceleribus tamen suis iam addictus morti videtur. Ista morte mortuus fui frequenter Domine Iesu Christe, ex iniquitate mea maxima. Et ideo còd fuscitare me digneris piissime Domine per tuam exuberantem clementiam: vt presenti sæculo viuam per gratiam, & in futuro per tuam laudem, & gloriam sempiternam. Amen.

CAP V T XVII.

De morte spiritali & vitali.

1. **S**ummè appetenda est, benignissime Domine Iesu Christe, mors siue smortificatio sui ipsius, quæ nihil aliud est homini, quàm sui ipsius deictio & maceratio, & ad humilitatem vel patientiam reductio. Vir enim iustus & perfectus, Domine Iesu Christe, dicitur sibi mortuus: Quia sicut mortuus ad voluntatem portantis legitur, nec se mouet, nec sentit, nec clamat, sed omnia quæ sibi sunt sustinet: sic vir bonus, & iustus, & sibi ipsi mortuus, ad voluntatem alterius permittit se regi per obedientiam sine rebellionē, & per sacras Scripturas. Omnia quoque sustinet cum patientia & tolerantia, vt de eo verè dici possit: *Rom. 6. Qui mortuus est peccato, iustificatus est à peccato.*

2. Tales namque, Domine, dicuntur mori, quia non dicuntur viuere mundo, sed tibi Domine. Et de istorum morte, potest etiam dictum tuum intelligi benignissime Domine Iesu Christe, *Nisi granum frumenti, cadens in terram mareum fuerit, ipsum solum manet: si autem mortuum fuerit, multum fructum affert.* Tales enim dicuntur granum frumenti, propter interiorem perfectionem. Dicuntur verò mortui, propter interiorem deiectionem, & multum fructum afferre, propter vberiore vitam suam spiritualis conditionem: Quia carnem suam mortificant & affligunt; prompti & obedientes, deuoti & compatientes, docti & erudientes. Et reuera dulcissime Domine Iesu Christe, tales viri in hoc mundo habentur pro mortuis, & pro vilibus, & despectis, & sunt de quibus scribitur: *Visi sunt oculis insipientium, mori.* Sed non sic est, Domine, sed prout tibi sequitur: *Illi autem sunt in pace.* Idè tibi Domine Iesu Christe possunt dicere: *Propter te mortificamur tota die, estimati sumus sicut oves occisionis.* Rom. 6.
Sap. 3.
Psal. 43.

3. O misericordissime Domine Iesu Christe, dum prædicta lego, & mente reuoluo, non sentio me tali morte mortuum; sed viuo huic misero mundo, & idè per peccatum tibi mortuus sum. Succurrat igitur mihi bonitas tua, & parce peccatis meis ex tua infinita misericordia. Vt tibi in confessione misericordiarum & tanti beneficii tui, viuam in æternum. Amen.

CAPVT XVIII.

De morte peccatoris.

1. **M**ors peccatorum, pessima est, Domine Iesu Christe. Mala siquidem est, in amissione mundi. Peior, in separatione carnis: & pessima, vermis & ignis contritione duplici. Habebit namque peccator, horrorem in exitu: dolorem, in transitu: pudorem, in conspectu tuo: & pauorem nimium: cum dimissis omnibus (quorum erat illi præsentia iucunda, gratus aspectus, cohabitatio familiaris,) de nota patria egrediens, ad incognitam penitus veniet regionem, cui etiam occurrent teterrimæ creaturæ, horridæque larum hostium antiquorum. O benignissime Domine Iesu Christe, quis iuuabit peccatorem in die tantæ necessitatis? Quis tuebitur eum à rugientibus præparatis ad escam? quis consolabitur? Opus namque suum quale fuerit, ignis probabit. Ibi enim aurum vertetur in scoriam, & peccatoris impuritas reuelabitur. Ibi omnes iustitiæ eius, quasi pannus menstruatus reputabuntur.

2. O Domine Iesu Christe, qualis pudor erit, & qualis confusio, post tanta beneficia à te misericorditer peccatori præstita, eundem tam tepidum, tam imperfectum, tamque vacuum apparere ante faciem tuam? Nihil enim ferè, nisi peccata portabit, ut cum ipsis condemnatur morte æterna: quia stipendia peccati, mors, & cum mors sit omnium pœnarum maxima, congruè per mortem illa intelligitur pœna quæ est æterna & summa, in qua peccator luctum habebit inconsolebilem, ignem inextinguibilem, & mortem interminabilem. Quia de peccatoribus scribitur: *Veniat mors super illos, & descendant in infernum viuentes.* Psal. 54.

Sc ij

3. O piissime Domine Iesu Christe; qui non vis mortem peccatoris, sed ut conuertatur & uiuat; respice me iniquissimum peccatorem oculo pietatis & clementiae, & concede mihi gratiam, ut peccata quae contra te nequiter perpetraui, hic agnoscam, & de ipsis te iuuante ad tuum beneplacitum satisfaciam. Libera me misericorditer à morte pessima & aeterna, ut cum mors naturalis miserum & fragile corpus meum te ordinante resolverit, anima mea à morte aeterna exclusa, ad te solum, qui vita es uiuentium, magnificandum, & glorificandum, in gloriam tuam perueniat sempiternam. Amen.

C A P V T XIX.

Item de morte peccatoris.

1. **Q**uid faciet in morte corporali, benignissime Domine Iesu Christe, miserabilis peccator multis & diuersis peccatorum fordibus inquinatus? Qui mundari non curauit dum uiueret, fletibus contritionis & doloris, iustificationis gratiam impetrando, sed in fordibus iacendo continuè, amplius forduiti. Veniet piissime Domine Iesu Christe, mors, & non tardabit: inuadètque corpus tam acriter, tantaque angustia & dolore illud afficiet, quod poenam maiorem non potuit unquam aliquis in hoc mundo seu in hac vita sentire. Incomparabilis enim erit dolor ille, cum separabitur anima à corpore: adeo ut non poterit tunc peccator aliud cogitare, quam quod tunc in corpore sentiet, maximum videlicet & grauissimum dolorem. Nullum enim erit membrum quantumcumque modicum, neque vlla paucula in toto corpore peccatoris, quae non illo dolore inexplicabili inuoluatur. Idèd Domine scribitur, *Quod non est in morte, qui memor sit tui.*

Psal. 6.

2. Anima etiam ipsius peccatoris, piissime Domine Iesu Christe, multis doloribus & anxietatibus illo tempore subiacebit. Quia cum egredietur, occurrent ei opera quae fecit, siue bona fuerint, siue mala: Et illa velit nolit, aspiciet oculis interioribus suis: & iudicabit in se mala quae fecit: & tormenta sibi praeputata, anxietate nimia cogitabit, quae sibi videbit è proximo miserabiliter imminere. Videbit insuper tunc misera anima ad augmentum sui doloris; angelos tartareos promptos & paratos ad ipsam rapiendam: ut separatam à corpore, deducant ad perpetuos cruciatus.

3. O misericordissime Domine Iesu Christe, fac me confugere ante horam illam tam terribilem & horrificam, ad tuam immensam clementiam & misericordiam: ut de tantis peccatis meis doleam magna contritione cordis, illa cum magna mentis humilitate confitear, cum firmo proposito non redeundi ad ipsa perpetranda, ac de ipsis satisfaciam secundum piissimam voluntatem tuam. Ut cum à tua misericordia veniam de ipsis & remissionem obtinuero, inter laudatores tuos adscribi merear, in vitam sempiternam. Amen.

Qua debeat facere homo in morte.

1. **M**ors, benignissime Domine Iesu Christe, est sine discretionē, quæ ex præuocatione emerfit. Est crudelis, quæ ex antiqui serpentis fallacia prodiit. Est etiam fatua, quæ ex mulieris insipientia venit. Est iniqua, quam iniquitas peperit. Est inconsiderata, quam seductio adduxit. Procedit, Domine Iesu Christe, festinanter: frequenter ex flagellis præsentibus, ex doloris vehementia, ex corporis corruptione, & ex pœna peccati. Illam, piissime Domine Iesu Christe, de die in diem, imò de momento in momentum, expecto. Illam me oportet necessariò sustinere. Non potest eius terribilis aduentus tardari, quia ad ianuam pulsatur. Non possum ei resistere, sed continuè magis appropinquat.


2. Idcirco misericordissime Domine Iesu Christe, ad te tanquam ad refugium tutissimum venio, & tuam immensam clementiam suppliciter oro, ut digneris mihi ante mortis aduentum, concedere veram de omnibus peccatis meis pœnitentiam, per veram confessionem, & iustum dolorem. Sit illa pœnitentia, Domine, cum lachrymis, sicut fuit illius mulieris, quæ stans retro secus pedes tuos, lacrymis cœpit rigare ipsos. Concede mihi, dulcissime Domine Iesu Christe, in illa hora præcipuè, gratiam remittendi ex corde iniurias & damna mihi illata per alios, sicut tu fecisti tuis crucifixoribus in hora mortis tuæ, dum dixisti; *Pater dimitte illis.*

3. Concede mihi etiam, mitissime Domine Iesu Christe, in illa hora deuotam Eucharistiæ perceptionem, ut audire possim cum tuis fidelibus, hanc tuam dulcissimam vocem; *Ecce prandium meum paravi vobis, venite ad nuptias.* Ad nuptias inquam Ecclesiæ militantis, pro perceptione ipsius prandij, id est altissimi sacramenti corporis & sanguinis tui, & ad nuptias etiam Ecclesiæ triumphantis: ad quas, quia grandis restat via, cibis iste viaticum est potentissimum, in cuius virtute ambulat Christianus vsque ad montem Dei, id est vsque ad cælum. Sicut per figuram huius ambulauit Helias vsque ad montem Dei Oreb. Habet enim istud viaticum omne delectamentum, & omnis spiritualis saporis suauitatem. Cuius quidem perceptione, confortetur cor meum Domine Iesu Christe, te id misericorditer donante, ut securè de hoc mundo ad tuum transire valeam regnum, & ad tuum seruitium sempiternum. Amen!

Mat. 22

CONTEMPLATIONES IDIOTÆ
de Virgine Maria.

P R O L O G V S.

1.  HOMO, quicumque es; probationem vitæ ingressus, misericordia Domini nostri Iesu Christi indiges, sine qua saluari non potes. Accede igitur per deuotam mentis contemplationem ad gloriosissimam Virginem Mariam matrem eius: quia per ipsam, & in ipsa, & cum ipsa, & ab ipsa, habet mundus & habiturus est omne bonum: scilicet super benedictum filium eius, Dominum nostrum Iesum Christum, qui est omne bonum, & summè bonum, & sine quo nihil est bonum, cum solus bonus sit. Inuenta itaque Virgine Maria, inuenitur omne bonum.

2. Ipsa namque diligit diligentes se; imò sibi seruientibus seruit. Ipsa, superbenedito filio suo irato, potentissimè reconciliat seruos & amatores suos. Tanta quoque est eius benignitas, quòd nulli formidandum est ad eam accedere: Tantæque misericordia, quòd ab ea nemo repellitur. Imò donis & charismatibus ædificat seruos, vt superbenediti filij sui & spiritus sancti digna fiant habitatio. Ipsa preces & sacrificia seruorum suorum, & maximè quæ sibi exhibentur, repræsentat in conspectu diuinæ maiestatis: quia est aduocata nostra apud filium, sicut filius apud patrem. Imò apud patrem & filium, procurat negotia & petitiones nostras, & sæpè quos iustitia filij potest damnare, matris misericordia liberat. Quia thesaurus Domini est, & thesauraria gratiarum ipsius, donis spiritualibus, ditat copiosissimè seruientes sibi, & potentissimè protegit eos à triplici aduersario: mundo, carne, & diabolo; quia salus nostra in manu illius est. Post filium suum, Domina est vniuersæ creaturæ, & in futuro sæculo glorificabit seruientes sibi, si eam honorificauerint in præsentia.

3. Et idè iuxta consilium cuiusdam deuoti serui eius, *Mariam semper cogita, Mariam semper inuoca, non recedat ab ore, non recedat à corde. Et vt impetres eius orationis suffragium, non deseras conuersationis exemplum.* Ceteri enim sancti, iure quodam patrocini, pro sibi specialiter commissis, plus possunt prodesse in curia Altissimi quam pro alienis. Beatissima verò virgo Maria, sicut est omnium regina, sic & omnium patrona & aduocata, & cura est illi de omnibus. Longe enim positos illuminat radiis misericordiæ suæ. Sibi propinquos per specialem deuotionem, consolationis suauitate; præsentibus sibi in patria excellentia gloriæ. Et sic non est qui se abscondat à calore eius, id est à charitate & dilectione ipsius. Vt autem à tua memoria non recedat, sequuntur aliquot contemplationes, quas deuotè legas, prout deuotio tibi à Domino suggeretur.

CAPVT

DE VIRGINE MARIA.

105

CAPVT I.

Quomodo Virgo Maria nos attrahit.

1. **T**rahe me post te, ô benedicta Virgo Maria, benedicta ante ortum, in ortu, & post ortum, ante sæculum, in sæculo, & post sæculum, Trahe me post te, vt curram in odorem vnguentorum tuorum. Trahe me post te, quia retinet me peccatorum ponderositas. Trahe me post te, quia me colligat carnalis concupiscentiæ voluptas. Trahe me post te, quia decipit me hostium peruerforum magna calliditas. Trahe me post te, vt perueniendi ad te augeatur mihi celeritas. Sicut enim nemo venit ad tuum filium super benedictum nisi pater traxerit eum, sic etiam quodammodò ausim dicere, quòd nemo venit ad filium tuum gloriosissimum, nisi tuis sanctissimis subditiis traxeris eum.

2. Trahe igitur me torpentem, vt me reddas currentem. Trahe me peccantem, vt me reddas poenitentem. Trahe me ignorantem, vt me reddas scientem: vt curram in odorem vnguentorum tuorum: id est in fragrantiam sanctarum virtutum tuarum, quæ velut vnguenta redolent & fragrant, dolores mitigant, & vulnera sanant. Tua vnguenta fragrantissima sunt; scilicet cœlestis sapientia, spiritualis gratia, & immarcellibilis gloria. Verbis enim tuis & exemplis doces veram sapientiam, quia doctrix es sapientiæ Dei. Peccatoribus impetras gratiam, quia aduocata es miserorum: & honorantibus te promittis gloriam, quia thesauraria gratiarum existis.

3. Impetra, tuis assiduis postulationibus, vt te laudem, te glorificem, te benedicam, tuas virtutes enarrem, tua mirabilia nuntiem, tuam exemplarem & Deificam vitam prædicem, scripta de te elucidem, vt habeam in laudibus tuis vitam æternam; imò in vita æterna, laudes tuas & super benedicti filij tui concinam; quia scriptum est: *Qui elucidant me, vitam æternam habebunt.* Quòd si de filio tuo, qui est Dei sapientia, id dictum est; de te etiam, quæ es eius superexaltata & super benedicta mater, id negandum non est. Ecl. 24.

CAPVT II.

De pulchritudine Virginis Mariae.

1. **T**ota pulchra es, ô plusquam gloriosa Virgo Maria. Tota pulchra es, & *Cant. 4.* *macula non est in te.* Tota pulchra es in anima, per virtutum & charismatum omnium perfectam plenitudinem. Tota pulchra es in tua conceptione, ad hoc solum effecta, vt templum esses Dei altissimi. Tota pulchra ex generatione verbi diuini, qui est splendor paternæ gloriæ, qui est candor lucis æternæ, & speculum sine macula, in quem desiderant Angeli prospicere, cuius pulchritudinem sol & luna mirantur. Tuæ gloriøsæ animæ,
D d

nihil vnquam affuit turpitudinis, vitij aut peccati: & nihil defuit spiritualis pulchritudinis, gratiæ & virtutis. Tot enim habuisti pulchritudines, tot virtutes, & singulas in altiori gradu, quàm concessum fuerit post filium tuum superbenedictum, puræ creaturæ. In his namque similem non habuisti, nec es habitura sequentem.

2. In te omnes virtutes tam actiue quàm contemplatiue conuenerunt; & præ cunctis creaturis, te admirabilem reddiderunt. Per virtutes actiuas, habuisti voluntatem mundissimam: per contemplatiuas, mentem purgatissimam. Non defuit tibi puritas Angelorum, non fides Patriarcharum, non scientia Prophetarum, non zelus Apostolorum, non patientia Martyrum, non sobrietas Confessorum, non innocentia aut humilitas Virginum. In summa, nullo genere vacasti virtutum, o virgo plusquàm beata. Quodcumque donum alicui sanctorum vnquam datum fuit, tibi non fuit negatum, sed omnium Sanctorum priuilegia omnia habes in te congeſta.

3. Nemo æqualis est tibi: nemo maior te, nisi Deus. Quia Spiritus Sanctus superueniens in te, & virtus Altissimi obumbrans tibi, quæ eras omni virtutum ornamento prædecorata, pulchritudinem, puritatem, sapientiam & omnium virtutum gratiam adauxit & splendorem. Miranda illa obumbratio Spiritus Sancti, quæ te vno momento templum Dei irradiauit, & decorem tuum manifestauit & auxit, sicut sol in semper ornatum thalamum incidens, gloriam eius occultatam, repente nobis ostendit & illustriorem facit.

4. Tota igitur pulchra es virgo gloriosissima, non in parte, sed in toto: & macula peccati, siue mortalis, siue venialis, siue originalis, non est in te, nec vnquam fuit, nec erit: sed adest tibi omnis gratia naturalium bonorum, spiritualium charismatum, & cælestium donorum. Quantum enim distat inter odorem & gustum aromaticæ speciei; tanta est inter contemplationem tuam & aliorum sanctorum distantiam. Sicut enim singularem actiuam à Christo cepisti vitam, videlicet eius humanam sed diuinissimam naturam portare, lactare, lauare, pannis inuoluere, fouere, nutrire, lenire, amplecti, osculari, cæteraque eidem humanitatis officia exhibere: sic & dulcedinem suæ diuinitatis tibi singulariter degustandam indulsit. Quia tota pulchra eras, & macula non erat in te.

5. Sed, o pulcherrima mulierum, qua temeritate audeo venire ad te. Ego turpis cogitatione & opere, ad te mundam; ego immundus, ad te immaculatam; ego maculatus, & non solum maculatus, sed & vulneratus; imò non solum vulneratus; sed etiam in conspectu tuo, & benedicti filij tui, mortuus propter innumerabilia peccata, quæ cogitatione, consensu, & opere longis temporum spatiis contraxi: & ita animam meam per susceptionem sacri lauacri purificatam, multipliciter fœdaui, & sordibus vitiorum inquinavi; adeò vt abominabilis facta sit, & tibi & filio tuo, superbenedicto.

6. In tua autem pietate confidens, o præbenedicta, cum benedicta, & postbenedicta Virgo Maria, te supplici corde precor, vt animæ meæ pio compatiendo affectu, apud misericordissimum filium tuum intercedere di-

gneris, quo eam immundam mundet: & sicut ipsam puram fecit per beatissimum, ita rursus hoc tempore puram reddat per poenitentiam & reconciliationis gratiam, ut tandem cum electis tuis vitam, ad te & super benedictum filium tuum laudandum, obtineam sempiternam. Amen.

CAPV T III.

Per quæ designatur speciositas Mariæ.

1. Speciositas tua, beatissima Virgo Maria, designatur per septuplicem speciem, quæ in sacra scriptura inuenitur. Est namque species oliuæ de qua scribitur: *Quasi oliua speciosa in campis*. Est species columbæ, de qua canitur, *Vidi speciosam, sicut columbam*. Est species Libani, de qua dicitur; *Species eius ut Libani*. Est species cæli, de qua legitur: *Species cæli in visione gloria*. Est species ignis in nocte, de qua scribitur; *Operiebat tabernaculum, quasi species ignis*. Est species arcus, de qua scribitur: *Vide arcum, & benedic ei qui fecit illum: Valde enim speciosus est*. Est etiam species Solis, de qua scribitur; *Est enim speciosior sole*. Ecd. 14.
2. Species oliuæ, consistit inter cetera in viroris amœnitate. Sic tua species, ô beatissima Virgo Maria, consistit inter alia, in fidei sinceritate. Et sicut viror paciferæ oliuæ delectat oculum corporis, sic fides tua, quæ pacem inter Deum & hominem reperit, delectat oculum mentis.
3. Species columbæ consistit in simplicitate, pulchritudine oculorum, colorum mutatione, & varietate circa collum. Sic, ô beatissima Virgo Maria, species tua consistit in humilitate, pulchritudine sanctorum cogitatum, & doctrinæ veritate. Quæ in collo intelligitur, quia doctrix fuisti doctorum, & magistra Apostolorum. Vnde & beatus Lucas, cui inter ceteros Euangelistas descriptio Dominicæ incarnationis attribuitur, Euangelij seriem à te Virgine Maria didicisse traditur.
4. Species Libani, consistit in continua virgultorum fecunditate, & delectabilium florum candore, & significat, ô gloriosissima Virgo Maria, candorem tuæ fecundæ virginitatis: quia tu es de qua dicitur; *Egredietur virga de radice Iesse, & flos de radice eius ascendet, & requiescet super eum spiritus Domini*. De tua autem supereminenti virginitate iuste dici potest, quod scribitur: *Pulchritudinem candoris eius admirabitur oculus*. Isaie. 11. Ecd. 43.
5. Species cæli, est in visione gloriæ, & significat in te sanctissima Virgo Maria, contemplationis sublimitatem, de qua scribitur; *Species mulieris exhilarat faciem viri*. Per quod intelligere quis possit, altitudinem contemplationis, acceptam esse & placentem in conspectu diuinæ pulchritudinis. Ecd. 36
6. Species ignis consistit in ardore & splendore. In te autem, ô beatissima Virgo Maria, fuit ignis charitatis ardens & splendens ante Deum, & nos miseros peccatores protegens. Et sicut tu regina virginum nominaris, sic charitas illa tua, regina virtutum appellatur: quia virtus nomen amittit, quæ charitati non famulatur.

Dd ij

7. Arcus cœlestis fit ex radiis Solis, in humida nube, & significat incarnationem filij tui superbenedicti in te. Tunc enim Sol iustitiæ, qui est splendor patris, ingressus in mundum: ascendit super nubem leuem, id est sibi vniuit mundissimam carnem sine pondere peccati, quod factum est de tua carne in tuo virginali utero, & sic facta est visibilis imago Solis iustitiæ cum profusionis gratiarum plenitudine: vt sit visibilis imago Solis cum sit arcus, sed non nisi in die profusionis pluuiæ.

8. Species solis consistit in splendentium radiorum emissionem: & significat in te aduocata nostra Virgine Maria, largam gratiarum effusionem in omnes qui ad te se conuertunt, quæ es Sole speciosior, & emissionem gratiarum fecundior.

9. Tua ergo species Virgo Maria, fuit, in corporis castitate, in conscientiæ puritate, in exteriori conuersatione, & in diuinorum contemplatione. Munda igitur cor meum immundum & inquinatum, ô piissima Virgo Maria: & tuis precibus mihi obtine speciem spiritualem, per quam in seruitio tuo & superbenedicti filij tui, placeam tibi in vitam sempiternam. Amen.

CAPVT IV.

Quod Maria sit templum Dei absolutissimum.

1. Inter omnia opera æterni opificis, post operationem illam qua naturæ nostræ vnitus est filius tuus, speciale opus fuisti, obeatissima Virgo Maria: qui Deus ad hoc te fecit, vt quod de primo opificio fuerat deformatum, per te reformaretur. Hic enim summus opifex, primò condiderat Angelicam naturam, quæ in parte ceciderat, & humanam, quæ corrupta erat; & corpoream inferiorem, quæ peccato hominis fuerat deterior effecta. Sed ad hæc omnia fecit te Deus, Virgo Maria, sanctissima, vt ex tuo superbenedicto fructu, Angelica natura repararetur, humana renouaretur, inferior à seruitute liberaretur.

2. Edificauit ergo Angelis te Reginam, hominibus medicinam, creaturæ inferiori libertatem. Sed prius edificauit Angelis cælum: & hæc est domus gloriæ: Dæmonibus & damnatis hominibus, Infernum: & hæc est domus iustitiæ: hominibus lapsis mundum; & hic est carcer miseriæ; quia emisit Dominus Adam de Paradiso voluptatis, vt operaretur terram, de qua sumptus est. Idem autem carcer, patria fuit bestiarum. Pisces posuit in aquis, aues in aëre, & stellas in firmamento. Et qui prius ceterorum hospitibus intenderat, nunc suo proprio intendit hospitio. Ideò dicitur: *Sapientia edificabit sibi domum*, id est, te Virginem Mariam: vt in te habitaret per humanæ naturæ assumptionem.

Prou. 9.

3. Et non solum sibi ipsi soli te fecit, sed te Angelis dedit in instaurationem, hominibus & nostræ naturæ in reparationem, inferiori creaturæ in liberationem: sibi in matrem, dæmonibus in hostem, detentis in limbo in ereptionem. Nam in principio cum ceciderant Angeli, natura erat corrupta,

DE VIRGINE MARIA. 109

Deus offensus & diabolus victor. Sed per te, ô superbenedicta Virgo Maria, innocentia reparatur, vita angelica reducitur, Deus homini pacificatur & vnitur, diabolus vincitur & conteritur; quia de te scribitur; *Ipsa conteret caput tuum.*

4. Sapientia igitur te ædificauit in domum. Si quidem amissæ erant animæ, quæ ob nihil aliud factæ erant, nisi vt esset in eis habitatio sapientiæ & hoc, si permanissent sanctæ. Sed quia corruptæ erant omnes, & peccando vacillauerant, idè te gloriosissimam Virginem Mariam, ædificauit in domum solidam & fortem, quæ nullo modo vacillare posset. Idè excidit columnas septem, ad te fortiter & sublimiter sustentandam. Septena columnæ quibus firma semper stetisti, sunt septem dona Spiritus sancti quæ requieuerunt in te, & nunquam te deseruerunt: per quæ stetisti firmiter & perseueranter in omnigratia & virtute.

4. Sed, benignissima Virgo Maria, licet superbenedictus Filius tuus, animam meam in domum elegisset ad habitandum in ea per gratiam; tamen ego proditor & facilis hospes, ipsum ignominiosè eieci per peccatum. Adiuua me ergo, piissima Virgo Maria, vt tuis precibus mundetur hæc misera domus ab omni peccato, & ora illum vt in ea habiter; hic per gratiam, & in futuro sæculo per suam præsentiam, ad gloriam suam sempiternam. Amen.

CAPVT V.

De Nomine Virginis Mariæ.

1. **V**ocabitur tibi nomen tuum, ô beatissima Virgo Maria, quod os Domini, scilicet, Filius Dei, qui est os Patris, per Angelum nominauit, videlicet, *gratia plena*. Postea verò nomen Mariæ expressit, dicens: *Ne times, Maria.* Dedit enim tibi Virgini Mariæ tota supersancta Trinitas nomen, quod post nomen superbenedicti Filij tui, est super omne nomen; ut in nomine tuo omne genu flectatur; vt manifestè patet, *caelestium, terrestrium & infernorum: & omnis lingua confiteatur*, huius sanctissimi nominis gratiam, gloriam & virtutem. Non enim est in yllo alio nomine, post nomen superbenedicti Filij tui, tam potens adiutorium: *nec est vllum aliud nomen datum sub cælo hominibus*, post dulce nomen Iesu, ex quo tanta salus hominibus refundatur. Quia super omnia Sanctorum nomina, reficit lassos, sanat languidos, illuminat cæcos, penetrat duos, recreat fessos, vngit agonistas, & iugum diaboli extrudit. Isa. 62. Phil. 2. Act. 4.

2. Fama tui Sanctissimi nominis, clarissima Virgo Maria, prius clausa fuit, quamdiu in mûdo morata fuisti. Sed post Assumptionem tuam in cælum, diuulgata fuit per omnia mundi climata. Nam in prædicatione Apostolorum, in omnem terram exiit sonus tui sanctissimi nominis, & manifestum toti mundo factum est. Tantæ virtutis & excellentiæ est tuum Sanctissimum Nomen, Beatissima Virgo, quòd ad inuocationem ipsius, cælum ridet, terra lætatur, Angeli congaudent, dæmones contremiscunt,

Dd iij

Teo. 10 & infernus conturbatur. Tanta est virtus tui Sanctissimi Nominis, o semper benedicta Virgo Maria, quod mirabiliter emollit & penetrat duritiam cordis humani. Ideo scribitur: *Lucerna Domini spiraculum hominis, quae inuestigat omnia secreta mentis.* Sic etiam dicere tibi possumus, *Lucerna Domine*, id est, Mariae quae doctrix & magistra maris interpretaris, spiraculum hominis: quia peccator per te respirat in spe veniae & gratiae, quae inuestigat, id est, inuestigare facit, *omnia secreta mentis*, id est, abscondita cordis.

3. O misericordissima Virgo Maria, ego sceleratissimus peccator talis sum, & talem me feci, quod nomen meum praefusione non ausim nominare. Quia nomen Christiani habebam: sed nunc peccatoris. Idcirco adiuuare me digneris, piissima Virgo Maria, ut Christianus re & nomine euadam; & sic perseverando, gratiam te & tuum Filium Regem aeternum laudandi, obtineam in vitam aeternam.

CAPVT VI.

Quod Maria sit apud Deum gratiarum inuentrix.

1. **I**nuenisti gratiam apud Deum, o dulcissima Virgo Maria; Gratiam, inquam, corporalem, quia fuisti vas innocentiae purissimae sine macula & labe, & virginitatis primipila, sine corruptione fecunda, sine fastidio grauida, & sine dolore puerpera. Inuenisti Virgo Maria gratiam spiritualem; quia fuerunt in tua mente, deuotio humilitatis, reuerentia pudoris, magnitudo credulitatis, & martyrium cordis. Inuenisti Virgo Maria gratiam caelestem, quia fuerunt in te ab originis labe praeservatio, Angelica salutatio, Spiritus sancti superuentio, & Filij Dei conceptio.

2. Sed qualiter, o felicissima Virgo Maria, istas gratias inuenisti? Certè, o superbenedicta Virgo Maria, sicut Eua gratiam amisit per superbiam, inobedientiam & curiositatem vanam; sic tu è diuerso, gratiam inuenisti quam nunquam amisisti, quae futura eras omnium humilium obedientissima, & in Dei scientia solidissima. De tua humilitate scribitur: *Quia respexit humilitatem ancilla suae. Ecce enim ex hoc, beatam me dicent omnes generationes.* De tua obedientia: *Ecce ancilla Domini, fiat mihi secundum verbum tuum.* Et tam solidae eras sapientiae: ut Deum solum magnificares, & in eo solo exultares; sicut de te in tuo cantico scriptum est: *Magnificat anima mea Dominum. Et exultauit spiritus meus in Deo salutari meo.*


3. Has autem gratias humillima Virgo Maria, non tantum propter te habuisti, sed etiam propter nos, ut multipliciter nos adiuuares. Et ideò, adiuuas in vita praesentem tam bonos quam malos. Bonos, eos in gratia conseruando; Unde de te canimus: *Maria mater gratiae*; Malos, eos ad misericordiam reducendo: Ideò dicitur: *Mater misericordiae*. Adiuuas etiam in morte, ab insidijs diaboli protegendo; Ideò subditur: *Tu nos ab hoste prorege.* Adiuuas quoque post mortem animas suscipiendo, & eas in caelum

DE VIRGINE MARIA. III

deducendo ; & ideo subinfertur ; *& hora mortis suscipe*. Adjuuas tribulatos, dando eis patientiam : tentatos, dando eis victoriam : & in Dei amore famelicos, dando eis refectiorem internam.

4. O benignissima Virgo Maria, ego peruersus & iniquus peccator me tentatum sentio, & prostratum ab inimicis, quibus in multis peccatis consensum præbui, & eundem opere compleui. Adjuua ergo me, clementissima Virgo Maria, perditæ gratiæ reparatrix ; & da mihi patientiam in tribulationibus, victoriam in tentationibus, & pœnitentiam de commissis. Impetra veniam de præteritis, tribue in præsentibus cautionem, præsta in futuris aduersus omne malum fortissimam resistentiam : vt sic reliquum vitæ meæ in præsentis sæculo transigam, quod tandem adipiscar tuas, & superlaudabilis filij tui perpetuas laudes in vitam æternam, Cui cum Patre & Spiritu sancto æqualis honor, immensa potestas, & interminata gloria in sæcula sæculorum. Amen.







IDIOTÆ
SIVE
RAYMUNDI
IORDANI,

CANONICI REGVLARIS
ORDINIS S. AVGVSTINI.

OPVS PLENVM DE B. VIRGINE

Scriptum anno 1380.

THEOPHILVS
RAYNALDVS
EX SOCIETATE IESV,

Lectori, ornamentorum magnæ Matris studioſo.

NUPER ad oculum mysticum huius ipsius Autho-
ris, Raymundi Iordani, qui hactenus IDIOTÆ
nomen pretulit, de eius nomine, atate, muneribus, &
quomodo ad horum omnium cognitionem peruenire li-
cuisset, præfari meminimus; firmatis & comprobatis
coniecturis illis circa hunc authorem, in quibus antea, citra omne
extremum adminiculum, exercueramus ingenium.

Nunc quoad tractationem eiusdem Authoris de B. Virgine, mo-
nendum videtur, tamen si edita iam pridem est lucubratiuncula huius

Ec

Authoris de B. Virgine; eius tamen & istius quam nunc damus, non aliam institui posse comparationem, quam fragmenti exigui, ad plenum opus. Continet antiqua illa lucubratiuncula, senarium dumtaxat Contemplationum, quæ omnes in hoc perfecto & integro Mariano opere reperiuntur. Prima, cuius initium, Trahe me post te, est inuocatio Deiparæ, præfixa primæ parti totius operis. Secunda habetur parte secunda operis, estque ibi Contemplatio tertia. Quæ verò ibidem est quarta, tertiam in fragmento sedem occupat. Quarta eiusdem fragmenti Contemplatio, est prima tertiæ partis, in opere perfecto. Quinta est prima partis quartæ. Sexta est prima partis quintæ. Ultra has sex Contemplationes, è quibus antiqua de B. Virgine lucubratiuncula Idiotæ nomine prænotata, compingebatur; exhibentur hoc pleno opere sectiones siue partes septemdecim, quarum pleræque numerosissime sunt; ita ut aliqua ultra quinquagenam, aliæ ultra vicesimarum Contemplationum excrescant: omnes summam ducentenarum quadraginta quatuor Contemplationum conficiant. Itaque verè, opus perfectum pro mutilo & admodum imperfecto exhibemus.

Quis verò hoc opus ita detruncavit, & promesse plena, paucas illas spicas appenderit, haud facile dixerim. Potuit Author ipse, quod diffusius secundis curis expandendum censuit, angusto prius orbe finire, & sibi ipsi in exiguo opere præludere; iuxta S. Ambrosij monitum 1. offic. cap. 10. Qui nauem in mari regere gubernaculis studet, vel remis ducere, prius in fluuiio præludat. Idque scriptoribus in usu esse, ut veluti quandam lingue calamiue rubiginem abstergant S. Hieronym. testatur, initio commentarij de vita Malchi captiui. Eundem esse Dei in plantandis conferendisque virtutibus, agendi modum, obseruat pulchrè S. Gregor. 22. Moral. cap. 22. & Petrus Dam. serm. de S. Alexio. Nec aliter egisse, ac etiamnum agere in natura ordine, pereleganter prosequitur S. Ambrosius epist. 12. respondens Symmacho, & Tertull. lib. de velandis Virginibus cap. 1.

Non secus igitur Authori contingere potuit, in scriptione de Deiparæ laudibus. Fortassis etiam Iacobus Faber Stapulensis, qui Idiotam, aut prim^o, aut inter primos prælo subiecit, ut aliis plerisque lucubrationibus, quas ante annos aliquot ipsi vulgauimus, hunc Authorem pro arbitrio truncavit; (non enim plures quinque publico dederat,) ita vnâ ex eo quinario tractationem, truncam exhibuit, & pro opere integro, specimen exiguum protulit. An ut commodo Lectoris seruiret, exiguitate voluminis; an quia pro fastidio illo præconiorum Deiparæ, quod solemne

est Hereticis, inter quos tandem Faber vixit, eiurato Neraci apud Aquitanos Catholicismo, opus luculentum & copiosum de laudibus magnæ Matris quæ cunctas hæreses sola interemit in vniuerso mundo; imitatus patrem diabolum calcaneo mulieris fortis insidiantem, non ausus planè recidere, quod fecisse in editione Germanica spurios Lutheranos, expostularunt iampridem alij; at truncare, & Specie compendij dispensium facere, consultius est arbitratus?

Ut ut sit, libellum hæcenus de B. Virgine ab Idiota habuit Lector, nunc opus exhibemus plenum, & de pietate cæteris Idiota lucubrationibus nulla ex parte concedens. Eius editio debetur humanitati V. Cl. Ludouici de Caseneufue, Turonensis Medici, è cuius M. S. C. opus istud exscriptum est, diligentia optimi æquæ ac eximie eruditi Patris Gilberti Ionini nostri, ob cuius præcocem obitum res literaria meritissimò mœret. Contulimus & nos symbolam nostram. Omnia quippe recognouimus, emaculamus, atque distinximus. Notationes verò quæ aliquibus locis opportune videri poterant, ac nominatim ad Christi ex vtero Matris semine agnoscit, tametsi prima destinatione nostra operi erant subtexenda; tamen secundis cogitationibus dimisse in præsentia sunt, quòd supplere earum defectum abundè possit opus nostrum, simul cum hoc ipso edendum cui titulus Diptycha Mariana, de cribrandis ementitis Deipare prerogatiuis, quæ nuperiscriptionibus, immanè quantum auctæ sunt augentur quæ ab alijs in dies.

Valc.



P R O O E M I V M

CONTEMPLATIONVM

Super vita & laudibus gloriosa Virginis Mariae.



PECCATOR, misericordiâ Domini nostri Iesu Christi indiges, sine qua saluari non potes. Attende igitur per deuotam mentis contemplationem ad gloriosam Virginem Mariam Matrem ipsius: quia per ipsam, & in ipsa, & cum ipsa habet mundus, habuit, & habiturus est omne bonum, scilicet eius benedictum Filium Iesum Christum: qui est omne bonum. Et inuentâ Virgine Mariâ, inuenitur omne bonum, ipsaque diligit diligentes se; imò seruit sibi seruientibus, ipsa benedictio Filio suo irato potentissimè reconciliat seruos & amatores suos. Et tanta est eius benignitas, quòd nulli formidandum est accedere ad eam: & tanta eius est misericordia, quòd ab ea nullus repellitur. Imò donis & charismatibus aedificat seruos suos; vt benedicti Filij sui, & Spiritus sancti digna fiat habitatio: ipsa preces & seruitia seruorum suorum, & sacrificia, & maxime quæ ei exhibentur, offert in conspectu diuinæ maiestatis. Quia ipsa est Aduocata nostra ad Filium, sicut Filius ad Patrem. Imò apud Patrem & Filium procurat negotia & petitiones nostras. Et sæpe, quos iustitia Filij potest damnare, Matris misericordia liberat: quia thesaurus Domini est, & thesauraria gratiarum ipsius; & donis spiritualibus ditat copiosissimè seruientes sibi: & potentissimè protegit eos à triplici aduersario, scilicet mundo, carne, & diabolo: quia salus nostra in manu ipsius est: & post Filium eius Domina est vniuersæ creaturæ: quæ glorificabitur in futuro seruientes sibi, si eam honorificent in præsentia. Et ideo, iuxta consilium B. Bernardi, *Mariam semper cogita; Mariam semper inuoca: non recedat ab ore; non recedat à corde: & ut impetres eius orationis suffragium, ne deferas conuersationis exemplum.* Ceteri enim sancti iure quodam patronatus sibi commissis specialiter plus possunt prodesse in curia Altissimi, quàm alienis: B. Virgo, sicut est omnium Regina, sic est omnium Patrona & Aduocata: & cura est sibi de omnibus. Longè enim positos illuminat radiis misericordiæ suæ, sibi propinquos per specialem deuotionem consolationis suauitates secum existentes in patria excellentiâ gloriæ. Et sic non est, qui se abscondat à ca-

fore eius, id est, à charitate & dilectione ipsius. Vt autem à memoria tua non recedat, subsequens tractatus describitur, vt in ipso assidue contemplando legas hinc inde, ne tua fragilitas in lectura vnius materiae fatigetur, prout deuotio tibi dictauerit; quia hoc tibi melius ostendet deuotio quam sermo, & melius gratia, quam scriptura. Et cum sacratissima Virgo Maria cor tuum illuminabit ad deuotionem, memento ex debito charitatis illam iugiter & deuotè exorare pro me miserabili peccatore, vt mihi indulgentiam obtineat peccatorum meorum: vt ne iste labor inutilis reputeretur, quem texui ex alienis filis; Matrem misericordiae, ad cuius honorem ista scripsi, humiliter deprecor, vt gratiam legenti impetret in praesenti, & in futuro gloriam aeternam. a D. Bernard. serm. 2. super Missus est.



Tractatus iste de Vita & Laudibus Gloriosae Virginis Mariae, procedit per Contemplationes breues ne legens in proluxa lectura valeat fatigari. Sed si ad eam Lector deuotè recurat, docebitur in paucis verbis multum contemplari. Et Tractatus iste diuiditur in decem & septem partem.

Pars I. consistit in viginti & vnâ Contemplationibus circa sacratissimæ Membra singulariter gloriosae Virginis Mariae.

Pars II. consistit in quinque Contemplationibus de Sanctificatione gloriosae Virginis Mariae.

Pars III. consistit in octo Contemplationibus de Natiuitate gloriosae Virginis Mariae.

Pars IV. consistit in septem Contemplationibus de Nomine gloriosae Virginis Mariae.

Pars V. consistit in octodecim Contemplationibus de Gratiis concessis gloriosae Virginis Mariae.

Pars VI. consistit in vigintiduabus Contemplationibus de virtutibus specialibus gloriosae Virginis Mariae.

Pars VII. consistit in septem Contemplationibus de Salutatione gloriosae Virginis Mariae.

Pars VIII. consistit in viginti & vnâ Contemplationibus de Conceptu & partu gloriosae Virginis Mariae.

Pars IX. consistit in tredecim Contemplationibus de Gaudijs gloriosae Virginis Mariae quae habuit in hoc mundo, & alijs quae nunc habet in caelo.

Pars X. consistit in decem Contemplationibus de septem verbis quae locuta est gloriosa Virgo Maria.

Pars XI. consistit in quatuor Contemplationibus de Charitate gloriosae Virginis Mariae ad Deum & proximum.

Pars XII. consistit in septem Contemplationibus de Tribulationibus & Doloribus gloriosae Virginis Mariae.

Pars XIII. consistit in duodecim Contemplationibus de Prærogatiuis gloriose Virginis Mariae.

Pars XIV. consistit in sexaginta & octo Contemplationibus de diuersis Vocabulis gloriose Virginis Mariae.

Pars XV. consistit in quatuordecim Contemplationibus de Bonis quæ habemus per gloriosam Virginem Mariam.

Pars XVI. consistit in decem Contemplationibus de iis quæ debemus gloriose Virg. Mariae.

Pars XVII. consistit in sex Contemplationibus qualis debet esse Seruus vel seruicius gloriose Virginis Mariae.





INCIPIVNT
CONTEMPLATIONES
IDIOTÆ
DE BEATA VIRGINE.

1. **T**RAHE me post te, Virgo Maria, trahe me post te, vt curram in odorem vnguentorum tuorum. Trahe me post te, quia retinet me peccatorum ponderositas. Trahe me post te, quia me ligat carnalis concupiscentia voluptas. Trahe me post te, quia decipit me hostium peruerforum maligna calliditas. Trahe me post te, vt perueniendi ad te augeatur celeritas: sicut enim nemo venit ad tuum Filium benedictum, nisi Pater traxerit illum; sic etiam quodammodo Possum dicere, nemo venit ad Filium tuum gloriosum, nisi tuis sanctissimis precibus traxeris eum. Trahe me igitur torpentem, vt me reddas currentem; trahe me peccantem, vt me reddas pœnitentem; trahe me ignorar tem, vt me reddas scientem. Cant. 7

2. *Vi curram in odorem vnguentorum tuorum, id est, in fragrantiam virtutum tuarum, quæ velut vnguentum redolent, & fragrant, dolores mitigant, vulnera sanant; tua vnguenta fragrantissima sunt, scilicet, cœlestis sapientia, spiritualis gratia, & immarcessibilis gloria; verbis enim tuis & exemplis doces veram sapientiam, quia doctrix es sapientiæ Dei; peccatoribus impetras gratiam, & honorantibus te promittis gloriam, impetra igitur tuis assiduis deprecationibus, vt te laudem, te glorificem, te benedicam, tuas virtutes enarrem, tua mirabilia nunciem, tuam sanctam & exemplarem vitam prædicem, scripta de te elucidem, vt habeam vitam æternam: quia scriptum est de te, qui elucidant me, vitam æternam habebunt.* Fecit.
84.21.

PRIMA PARS.

Contemplatio I.

De Capite Virginis Mariæ.

1. **C**APUT tuum ut Carmelus, a misericordissima Virgo Maria, quia Carmelus est mons altus & pinguis: unde caput tuum, id est, intellectus, qui consistit in capite, fuit altus propter eminentiam contemplationis; quia tuus intellectus semper fuit eleuatus ad Deum propter tuam contemplationem continuam: & limpidius contemplabaris præ omnibus alijs Sanctis Deum, cœlestia & æterna, quia cœlos attingebas stans in terra: & (ut à multis creditur piè) & iam viatrix beata anima tua, frequentius comprehendebat, & fruebatur. Et licet vitæ actiue omnia opera Filio tuo benedicto exhiberes: interius tamen à diuina contemplatione nullatenus recedebas, in hoc possidens Angelicam perfectionem. Nam Angeli, cum ad nos mittuntur, sic ministrant exterius, quod tamen interius à Dei contemplatione non recedunt.

2. Caput tuum benedictum humiliasti ad Deum; Caput tuum Carmelus, id est, propter largissimam pinguedinem gratiarum singulorum membrorum tuorum regimen præcedebat; sicuti per caput regitur totum corpus. Ex hoc multiplex fructus bonorum operum subsequutus fuit; quia ex tua substantia virginali Summus Pontifex assumpsit hostiam suæ carnis, quam in ara Crucis pro mundi salute eleuatis in Cruce manibus sacrificium obtulit vespertinum: cuius suauissimus odor delinuit iracundiam Dei Patris: & ex te traxit, non feruorem vulneris, sed materiam medicaminis.

3. Ego verò miserrimus peccator; & omni miseriâ plenus, omnique penâ dignus, præmissa non contemplando, neque aliquo modo gratias referendo non adhæsi capiti meo benignissimo Domino Iesu Christo, caput meum humiliando sibi, per deuotam contritionem, confessionem, & veram ac condignam satisfactionem; sed caput meum iniquum exere per superbiam de me præsumendo, tuum benedictum Filium & te non cognoscendo, gratias mihi datas vilipendendo, peccata plurima committendo, proximum lædendo, seu voluntatem nocendi habendo. Heu! clementissima Virgo Maria, compati mihi digneris misero, inclina caput tuum Filio tuo benedicto; & ora, ut caput meum superbum & ingratum, humiliare dignetur; ut ipsum, & te diligendo cognoscam, peccata emendem, proximum non lædam, sed diligam; in bonis operibus perseuerem: & cursu præsentis vitæ finito, cum gloriosissimo capite meo Iesu Christo requiescam per infinita seculorum sæcula. *Canonic. 7. 5.*

Contem-

Contemplatio II.

De Capillis Virginis Mariæ.

1. **C**Omæ tuæ, gloriosissima Virgo Maria, sicut elata palma. Per Comam Cant. 5
 seu Capillos, intelliguntur sanctæ cogitationes tuæ; quia, sicut ca- 11.
 pilli adherent capiti, sic cogitationes tuæ, Virgo benedicta, adherent ca-
 piti tuo, id est, Iesu Christo Filio tuo per amorem. Sunt elatæ sicut folia
 palmarum; quæ ideo dicuntur *Elatæ*, quia erectæ & sublimè tendentes, me-
 ditando iugiter de cœlestibus, parum autem, aut nihil de terrenis. Fuerunt
 etiam elatæ cogitationes tuæ per charitatem & pietatem, cogitando de
 salute humani generis: fuerunt acutæ sicut folia palmarum, propter cogi-
 tandi subtilitatem & libertatem; quia non molestabant te cogitationes
 phantasticæ. Cogitabas enim quidquid volebas, & nihil nisi quod volebas,
 sic igitur fuerunt tuæ cogitationes amplæ charitate, libertate dilatata,
 acutæ subtilitate, & sublimes rectitudine.

2. Capilli tui, id est cogitationes, fuerunt, molles pietate & benignitate;
 flexibiles obedientiâ & compassione; longi perseverantiâ longanimitate;
 insensibiles, patientiâ veritate; extenuati, voluntariâ paupertate; con-
 tinuè crescentes, iugi melioratione; subtiles, ineffabili Deitatis contem-
 platione; sæpius abluti, lacrymosâ & deuotâ Filij recordatione, maximè
 post Ascensionem in capite radicati, id est Christo, qui est caput nostrum,
 Fide, Spe, & Charitate: ipsi capiti adherentes, sincera dilectione; ab ipso
 capite incrementum recipientes, iugis gratiæ subministrati; ab ipsa
 capite inferiùs descendentes, verâ humiliatione; ipsum caput, à quo oriun-
 tur, calefacientes ab omni frigore infidelitatis; qui te etiam ab omni aestu
 cuiuslibet concupiscentiæ protegebant: & horum gratiâ ipsi Deo Trinitati,
 & sanctis Angelis amabilis, appetibilis, & admirabilis, eras: quia tu Virgo
 Mariæ, subtiliùs quàm vniuersi alij contemplatiui oculo summæ contem-
 plationis, Diuinitatis penetrabas arcana.

3. Sed heu, benedicta Virgo Maria, ego miserrimus peccator capillos
 non habeo; scilicet cogitationes bonas: sed habui caluitium, quod est
 carere huiusmodi cogitationibus sanctis: & sicut caluitium deturpat &
 dehonestat caput, sic carentia sanctarum cogitationum & meditationum
 deturpat & dehonestat caput animæ meæ, id est, mentem meam; quæ
 semper de cœlestibus vtilitatibus animæ cogitare debebat. Adiuuare me
 digneris, Domina, peccatorum Aduocata; non permittas me ampliùs
 decaluari, ne desint mihi capilli sanctarum cogitationum; vt terrenis affe-
 ctibus spretis, cœlestia cogitem, ad quæ perueniam, & illa possideam per
 infinita sæcula sæcula sæculorum. Amen.

F

Contemplatio III.

De Fronte Virginis Mariae.

1. Singulariter benedicta, & omni laude dignissima gloriosa Virgo Maria, frons tua designat in te verecundiam virginalem, & discretam simplicitatem, nam in frontis planicie & candore, qui superfunditur quasi quodam roseo rubore, designatur verecundia virginalis. Planicies scilicet ad simplicitatem habet, candor ad munditiam, rubor ad charitatem. Frons igitur tua verecundiam in te ostendebat, quæ est custos virginittis. Et ideo cum audisses Angelum te salutantem, præ verecundiâ turbata fuisti in sermone eius, tantâ rei nouitate suspensa, & ingenti admiratione permota.

2. Audiens autem nouam formam salutationis, ignorabas quod significare volebat Angelus, qualis esset ista salutio, perpendens: in hoc verbo *Aue*, nominis *Eua* conuersionem, & ipsius mutationis perscrutans Sacramentum: videlicet sicut *Eua* fuit causa maledictionis, sic tu esses causa benedictionis: quia enim Virgo eras, ad inopinatum euentum, ut verecunda, pauere cœpisti: sed quia Virgo prudentissima, subito pauore superari non potuisti; sed consilium regente Spiritu sancto, cogitabas qualis, id est, quàm noua, quàm inaudita, quàm perutilis, quàm admirabilis, quàm dulcis, & quàm suauis esset ista salutio. Audieras enim Angelos locutos mulieribus & viris; audieras etiam benedictiones legis, sed salutationem talem, & benedictionem, nunquam legeras, vel audiueras: ideo turbata fuisti, sed non locuta, in hoc imitando David dicentem, *Turbatus sum, & non sum locutus*, hæc enim turbatio Virginis, pudoris erat. Rubor igitur tuæ frontis verecundiam & pudorem ostendit, ne scilicet audires, sicut nec posses, præsertim post conceptum virgineum, cogitare, loqui, audire, vel facere aliquid inhonestum, aut nutu, aut signo, aut gestu, aut risu.

3. Sed, beatissima Virgo Maria, ego sceleratissimus peccator frontem meam durissimam erigendo, verecundiam postposui in peccando; nam peccare non erubui, sed de peccatis mei iactaui, & illa publicè frequenter commisi, præsumens ex iis humanas laudes exquirere; & sic ego miserabilis peccator, grauiora peccata feci illa committendo, & superbiendo de ipsis, & malum exemplum proximis ostendendo, & ad peccatum inducendo verbo, & opere. Auxiliari mihi digneris, dulcissima Virgo Maria, ut mollificetur & humilietur frons mea durissima, & superba, & offensiones nequissimè perpetratas agnoscam, & agnitas desileam & emendem, ut regnum æternum acquiram & possideam, per infinita sæculorum sæcula. Amen

Psal.
76. 5.

Contemplatio IV.


De Oculis Virginis Mariæ.

1. **E**CCE tu pulchra es, dulcissima Virgo Maria, *Ecce tu pulchra es; Cant. i.*
Oculi tui columbarum, per veram simplicitatem: quia Columba avis
 simplex est, sicut oculi tui, Virgo benedicta, simplices fuerunt, non sim-
 plicitate fictâ, quæ est hypocritarum, qui se componunt secundum extero-
 rem hominem in vultu, gestu, habitu, & vestibus, vt credantur boni: non
 simplicitate indiscretâ, quæ est stultorum; sed simplicitate verâ, & discretâ,
 quæ est iustorum: quam præcepit habere benedictus Filius tuus, dicens:
Estote simplices sicut Columbe. Hanc autem simplicitatem tu, Virgo, ha-
 buisti super omnes creaturas, per quam tria incommoda euasisti, quæ so-
 lent sequi simplicitatem. Primum est temeritas; quia de facili simplices de-
 ciuntur; sed tu, Virgo Maria, loco temeritatis, habuisti prudentiam spiri-
 tus in distinguendo Angelum, cui consentire debebas. Secundum est, de-
 bilitas; simplices enim de facili credunt, quia resistere nesciunt; tu verò,
 Virgo benedicta, sic prudens & fortis fuisti quod caput antiqui serpentis
 contriuisisti. Tertium est timiditas, quia simplices non audent ardua aggre-
 di: sed tu, Virgo felicissima, audacter aggressa es summè ardua, credendo
 Dei Filium de te incarnari, & respondendo, *Ecce ancilla Domini; fiat* *Luc. i.*
mihi secundum verbum tuum, quia oculus tuus, Virgo Maria, fuit simplex, *38.*
 totum corpus tuum fuit lucidum, non habens partem aliquam tene-
 brarum. *Luc. ii. 38.*

2. Oculi tui, Virgo Maria sacratissima, sunt sicut flamma ignis; quia il-
 luminant & calefaciunt, exterrent, & exurunt. Illuminant enim amato-
 res suos luce sapientiæ ad cognitionem veri, & eos inflammant amore iu-
 stitiæ, ad delectationem boni; aduersarios verò terrent ferocitate com-
 minationis, exurunt incendio damnationis. Et sicut oculi Domini super
 iustos; sic oculi tui, Virgo præclarissima, super peccatores: & sicut bonæ
 matris oculi sunt super puerum, ne cadat; vel, si ceciderit, vt eum re-
 leuet; sic oculi tui, Virgo præclarissima, misericordes sunt super seruos
 tuos, ne per peccatum cadant; &, si ceciderint, vt à peccatis resurgant.
 Ideo clamas seruis tuis: *In via, quâ gradieris, firmabo super te oculos meos.* *Ps. 31. 8.*
 3. O gloriosissima Virgo Maria, oculi tui benedicti in pauperem respi-
 ciant; ego enim sum pauper & inops, carens omni virtute, & abundans
 vitiis & peccatis oculos habeo fixos ad terram & terrena per concupis-
 centias malas, & iniquas. Respicere me dignèris, benignissima Virgo Ma-
 ria, oculis pietatis & misericordiæ, vt à peccatis resurgam, & oculos
 eleuem ad misericordiam tui Filij benedicti. Eya ergo, Aduocata nostra,
 illos tuos misericordes oculos ad nos conuertere. Impetra mihi miseri-

Ff ij

mo peccatori gratiam hinc bene viuendi, vt in fine huius erga stuli pos-
sim cernere oculo ad oculum tuum Filium benedictum, & frui gloria sua
per infinita secula seculorum. Amen.



Contemplatio V.

De Genis Virginis Mariae.

Ulchrae sunt genae tuae, sicut Turturis, sacratissima Virgo Maria. In
genis namque pulchritudo maxime notatur, ad quarum pulchritudi-
nem est necessarius candor, & rubor. Per candorem designatur puritas, &
per ruborem charitas; Tu, Virgo gloriosissima, candidissima fuisti per can-
dorem purissimae virginitatis; quia candor es lucis aeternae, quia per te vi-
debitur lux aeterna, id est, Filius tuus benedictus, quem tu peperisti lucem
veram, quae illuminat omnem hominem venientem in hunc mundum.
Fuit etiam in te rubor charitatis, & dilectionis; quia byssus & purpura in-
dumentum tuum: byssus candoris, & purpura charitatis: ideo sunt pulchrae
genae tuae per candorem, & ruborem.

1. Pulchrae sunt, sicut turturis; turtur enim castissima avis est, & sic de-
notat candorem puritatis; nec rostro, nec unguibus laedit etiam minimas
auiculas, & sic denotat innocentiam. Habet etiam rutilantiam plumarum
circa genas, & sic denotat ruborem charitatis: & ideo haec avis primo no-
minatur in Canticis; quia istae tuae virtutes, scilicet Castitas, Innocentia,
& Charitas, omne bonum inchoarunt & consummarunt. Istae namque vir-
tutes pulchricarunt, & pulchras genas, Virgo intemerata, tibi fecerunt,
vt bonum faceres, nullum laederes, Deum & proximum diligeres, Angelos
laetificares, vitia abhorreres, virtutes in te continue augeres, vitam & mori-
bus Deo placeres: & opera misericordiae exercerets, terrena despiceres, coe-
lestia cogitares, & appeteres, peccatores a peccatis reuocares, ac eis ve-
niam impetrares, daemones terres, ad te venientes conseruares, iram Dei
mitigares, pacem faceres, & per te iusti viuentes, adiuuares; vt per te be-
nedicerentur omnes gentes, pulchrae igitur sunt genae tuae.

3. In genis etiam denotatur masticatio ciborum: Tu verò, sanctissima
Virgo, masticasti cibum Euangelij Sanctis Apostolis, & Euangelistis, im-
mo & omnibus sequacibus eorum; cuius Euangelij veritatem Verba, &
ordinem conseruaueras in corde tuo. Pulchrae igitur sunt genae tuae, absque
eo quod intrinsecus lateret, soli Deo cognitum, nemini alteri manifestum;
nam quanta sit tua species, ille solus nouit, qui dedit.

4. Sed, Virgo sanctissima, audi, & exaudi me miserum peccatorem ge-
nas habentem, non candidas per puritatem, sed denigratas per crimina &
peccata; non innocentes, sed iniquitate plenas; in quibus rubor apparet,

non charitatis, sed vindictæ & malignitatis. Ora tuum Filium benedictum, ut genas meas faciat candidas per peccatorum recordationem, & condignam satisfactionem: conferat misericorditer ruborem perfectæ charitatis tui & proximi; ut illum, qui candor & charitas est, videre valeam placatum: facie ad faciem, per infinita sæcula sæculorum. Amen.



Contemplatio VI.

De Coloratione Virginis Mariae.

1. **N**ON est, nec fuit tibi similis, gloriosissima Virgo Maria, pulchritudine coloris. Filius tuus gloriosissimus bis coloravit te, bis decoloravit te, & bis recoloravit. Coloravit te in tua beatissima sanctificatione, gratiam conferendo; quia antè fuisti sancta, quam nata. Coloravit te in tua sancta & foelissima Conceptione, per infusionem gratiæ amplioris: Contulit enim tibi gratiam fecunditatis, & illibatum conservavit candorem virginitatis; & tunc amplius est in te decor ferventioris charitatis.

2. Decoloravit te in opinione hominum, qui videntes te gravidam, reputabant te corruptam; & tunc dicere poteras, *Nigra sum, sed formosa*. Nigra sum, iudicio hominum, qui reputant me corruptam; sed formosa, quia Virgo purissima. Nigra sum, id est, notata crimine adulterij mihi falso obiecto; sed formosa sum interiùs, quia carens omni maculâ & adornata omni virtute. Decoloravit te in sua acerbissima passione, quadam doloris nigredine, cum tuam animam gladius, id est passio filij tui, pertransiit: & idè dicere poteras, *Nigra sum, sed formosa*; nigra exteriùs, pressuris tribulationum; formosa interiùs, decore virtutum; nigra tribulatione, formosa charitate; nigra in terris, formosa in cælis; nigra in oculis insipientium, formosa intellectui sapientium; nigra corporalibus miserijs, sed formosa cœlestibus desiderijs.

3. Recoloravit te benedictus Filius tuus in sua gloriosa resurrectione, quando iterum ortus est Sol, qui oriens omnibus rebus reddidit proprios colores: quoniam gaudium, quod habuisti de resurrectione filij tui, absterxit ab anima tua nubilum totius tristitiæ. Recoloravit etiam te in Apostolorum prædicatione, quando ipsi, prædicantibus toti mundo innotuit Iesum Christum fuisse natum ex tuo utero virginali.

4. Sed purissima Virgo Maria, gloriosus Filius tuus me creaturam suam coloravit in susceptione lauacri sacri Fontis per infusionem gratiarum, & post etiam me coloravit diuersas gratias conferendo, & inspirationes salubres ad bene operandum largiendo; sed ego iniquissimus peccator me decoloravi, peccata nequissima multipliciter perpetrando, & in eis perseuerando: & licet benedictus Filius tuus frequenter me recolorarit per dolorem, & confessionem, ac satisfactionem de ipsis; tamen ego ingratis

Ff iij

per reuersionem ad peccata me iterum atque iterum decolorabam, & in ista decoloratione perseueraui & perseuero. Auxiliari mihi digneris, Virgo benignissima, tuâ clementiâ, orando Filium tuum benedictum, vt me dignetur in præfenti sic colorare, sordes peccatorum meorum abluendo, & animam meam bonis operibus colorando, vt mundata appareat in conspectu eius, & uiuat per gloriam sempiternam. Amen.

Contemplatio VII.

De Auribus Virginis Mariæ.

1. **B**EATISSIMA Virgo Maria, quis dignè tibi potest summa gratiarum & laudum præconia impendere, quæ per aures pijsimas tuas mundum lapsum subleuasti, & de morte ad vitam reduxisti? sicut enim mors per fenestras aurium intrauerat in orbem terrarum, sic per aures tuas humillimas vita intrauit; & auditu tuo simplici suscepisti ad nostram salutem nuntium Gabrielem. A tuo pijsimo auditu initium sumpsit reparatio nostra, vt inde intraret remedium, vnde morbus irrepserat: & eisdem vestigijs sequeretur vita mortem, lux tenebras, veritatis antidotum serpentis antiqui mendacium venenatum; & vitæ janua foret auditus, per quem intrauerat mors in mundum, & sic per auditum tuum benignissimum auditui meo gaudium & latitia promittuntur, audiuiisti & auribus intentis percepisti nuntium humilem Archangelum Gabrielem, noua toti mundo gaudia nuntiantem.

2. Tuæ benedictæ aures sunt intellectus & affectus: sensum retinendi & intelligendi habuisti, & affectum diligendi & promerendi ea, quæ tibi promittebantur; ille autem quodammodo auribus caret, qui de cælestibus donis, quæ sibi promittuntur, curam non habet. Sed tu, gloriosa Virgo Maria, non negligenter promissa per Angelum, auribus percepisti, sed intelligendo & credendo promissa, fideliter aures pias aperuisti; & ideò dicere poteras, *Domine Deus aperuisti mihi aurem; ego autem non contradixi, neque retrorsum abi.* Mansueta fuisti ad audiendum verbum, quia in mansuetudine suscepisti insitum verbum Dei; per te autem, gloriosa Virgo Maria, exaudit Filius tuus pauperes spiritu: & ideò dicitur tibi, *Præparationes cordis eorum* (scilicet humilium) *audiuit auris tua*, id est, tu, Virgo Maria, quia te mediante pauperes exauditi sunt, sicut homo audit mediante aure sua.

3. Sacratissima Virgo Maria, ego impijsimus obturaui aures meas more aspidis, nolens exaudire voces incantantium; id est, prædicantium, aut medici medicantis sapienter: sed eas aperui facibus verborum inutilium, detractoribus & detractionibus, mendacijs, iniquitatibus & peccatis: per ipsas enim mors intrauit in animam meam. O Virgo misericordissima, in-

clina aurem tuam ad me, & exaudi verba mea! Ora Filium tuum benedictum, ut det mihi purgatorium confessionis humilis, quo purgem aurem cordis mei, ut mundatus à facibus peccatorum, gloriam cœlestem assequar in æternum. Amen.

Contemplatio VIII.

De Naso Virginis Mariæ.

1. **N**ASVS tuus, speciosissima Virgo Maria, sicut *Turris Libani*, quæ respicit contra Damascum. Nasus tenet in facie eminentissimum locum, & significat discretionem. Tuâ igitur discretio, Virgo Maria gloriosa, est nobis turris Libani, quæ respicit contra Damascum, qui interpretatur sanguinem bibens; & figurat diabolum qui sitit iugiter bibens sanguinem animarum. Tua autem discretio præsentens diaboli malitiam, velut fœtorem quemdam, pro peccatoribus iugiter respicit contra ipsum, & pro ipsis te viriliter ei opponis, velut quædam turris: & virtuoso castitatis candore, quæ figuratur in Libano, qui interpretatur, *candidatio*, conteris carnalem concupiscentiam velut caput serpentis.

2. Ministerio nasi purgantur humores capitis: & adiutorio tuo, Virgo gloriosa, purgantur vitia, & pravi humores mentis, quæ est caput animæ. Nasus discernit inter fœtorem & odorem: & tu, Virgo benedicta, ad virginitatem te ipsam velut ad aromata conuertisti, & carnis corruptionem, velut fœtorem longè à te projecisti. In naso attenditur motus indignationis: & tu, Virgo sanctissima, quidquid vile est & sordidum, detestabaris, & omnem mundanam altitudinem extollentem se aduersus Deum, abominabaris. Per nasum attrahitur & emittitur spiritus: & tu, Virgo sanctissima, attrahis spiritum, & eundem ad alios emittis, exemplo Domini, qui in faciem hominis inspirauit spiraculum vitæ, & factus est homo in animam. *viventem. Insufflauit etiam, & dixit, Accipite Spiritum sanctum.* Sic, tu, dulcissima Virgo Maria, dicendo, monendo, consulendo, pro peccatoribus orando, inspiras spiraculum vitæ, quo reuiuiscant à morte peccati.

3. Tuus nasus non fuit paruus, quia non defuit tibi discretio: non fuit grandis, quia non adfuit tibi præsumptio; non fuit tortus, quia nulla occasione declinauit à recto; & ideo fuisti idonea ministrare Domino, ut dicere valeres, *In habitatione sancta coram ipso ministravi.* Nasus tuus fuit sicut turris Libani, propter fortitudinem constantiæ, & altitudinem virtutum, & candorem continentiæ: quia Libanus dicitur *Candor*. Non declinasti ad dexteram, per prospera, nec ad sinistram, per aduersa; sed in rectum, sicut turris, versus cælum protendebaris.

4. Ego verò nequissimus habui interdum, nasum quidem longum, per præsumptionem & superbiam, præsumendo de me, & actibus meis: quandoque habui nasum paruum, per defectum discretionis; quia circa gubernationem animæ meæ valde indiscretus fui: habui etiam quandoque nasum tortum, non incedendo per viam rectam mandatorum Dei, sed per viam indirectam vitiorum & errorum diuersorum. Ora benedictum Filium tuum, benignissima Virgo Maria, ut me à deuiis reuocet; ut per viam rectam incedam, discretionem teneam, & fortitudinem, ad resistendum peccatis, ut per viam virtutum incedendo, gloriam obtineam sempiternam. Amen.

Contemplatio I X.

De Labiis Virginis Mariae.

Can.
4.11.

Luc. 1.
38.
Psal.
44. 3.

1. **F**auus labia tua, *diffillans*, dulcissima Virgo Maria. Iuste comparantur fauo distillant labia tua gloriosa, propter dulcedinem mellis suam, in quibus Spiritus sanctus singulorum charismatum diffudit abundantiam. Labia tua, sanctissima Virgo Maria, benedicto Filio Dei & tuo, diuini fœderis & humani dulcia oscula propinarunt: habito enim respectu ad illud responsum dulcissimum & omni suauitate plenum, *Ecce ancilla Domini, fiat mihi secundum verbum tuum*: dictum est tibi in Psalmo, *Diffusa est gratia in labiis tuis*: id est, vniuersitas gratiarum diffusa est, totique mundo abundanter distributa per te. Diffusa est igitur in labiis tuis, hoc est, in responsione tua dulcissima & gratissima, quâ Deo Trinitati reconciliatus est mundus. Prius peruersi homines, ad Deum conuersi; & qui prius fordescebant, à peccatis mundantur: propterea benedixit te Deus, non sinistra, quâ temporalia, sed dexterâ, quâ dantur æterna; idè dixit, *in æternum*, id est, benedictione ducente ad æternitatem: longitudo enim dierum in dextera tua.

2. Labiis tuis, Virgo Maria Mater, sæpè osculata es gloriosissimum Filium tuum, quem tantum diligebas, & gloriosus Filius tuus sæpissimè osculatus est te matrem suam dilectissimam. O fœlicissima oscula! omni puritate plenissima, dilectione non vacua, omni pace & cōcordiâ abundanter repleta, omni suauitate redolentia! quæ noua fuerunt scilicet inter cœlum & terram, inter diuinam naturam & humanam, inter virginitatem & fœcunditatem, inter cor humanum & fidem, inter Deum & creaturam, inter Angelum & hominem: quæ omnia maximè discordabant, & sancto illo osculo, omnia sunt osculata. Idè appellaris columba, quæ inter omnes aues sola osculum nouit.

Can.
4.3.

3. Labia tua, Virgo Maria, dicuntur *virtus coccinea*, quia sicut per vitam restringuntur capilli sic per labia tua restringuntur capilli, id est, cogita-

cogitationes tuæ; quas vagari, fluere, dispersi, aut à Christo elongari non permittis. Dicuntur labia tua *coccinea*, quia habent colorem flammæ, quo ad amorem Dei & proximi inflammantur: quibus etiam labiis dulcissuas orationes tuas pro peccatoribus formas in conspectu Unigeniti tui. Labia tua *coccinea* per memoriam, & recordationem Passionis Filij tui, quæ docuerunt ipsius Passionem sanctos Euangelistas, & maxime S. Lucam. *Favus ergo distillans labia tua.*

4. Sed, Virgo piissima, labia mea iniqua, non distillant dulcedinem, sed amaritudinem; non utilia, sed inutilia; non bona, sed turpia; non colloquia decentia, sed prava & dolosa; non ad meritum, sed ad animæ damnum; non ad ædificationem proximi, sed ad destructionem. O piissima Virgo Maria, exora dulcissimum natum tuum, qui labia mea ab omni inquinamento mundet, ut eum & te laudem, & glorificem in æternum. Amen.

Contemplatio X.

De Dentibus Virginis Mariae.

DENTES tui *eburnei*, speciosissima Virgo Maria: quia ad oris pulchritudinem multum faciunt dentes mundi, candidi, & absconsi, moderatæ quantitatis, & quasi per gyrum ordinatè dispositi. Idèd, gloriosa Virgo Maria, dicuntur dentes tui *eburnei*: quia candidi & mundi. Tui candidissimi dentes masticarunt (ut pie creditur) paruulo tuo Filio Iesu Christo cibum suum, pro ut mos est nutricibus. Sensus autem tuus, & studiositas, quæ duo significantur per dentes, masticarunt, attriuerunt, manderunt, & animæ tuæ incorporarunt veluti viucentes herbas, diuinarum Scripturarum sententias: & postea ostendisti studentibus multa ambigua diuinæ sapientiæ in verbis tuis & gestis. Vnde promittis quod dicit Scriptura, Eccl. 24. 46. *doctrinam, quasi prophetiam, effundam, & relinquam illam querentibus sapientiam.*

2. Ad hanc igitur doctrinam, scilicet, Paupertatis, Humilitatis, & Castitatis, quasi prophetiam, id est, signum futuri addidisti. Doctrinam istam, Virgo Maria benedicta, effudisti abundantius quando Ordines fuerunt instituti ad honorem tuum, ubi docet doctrina virginitatis per votum, contra luxuriam; paupertatis, per abrenunciationem; proprietatis, contra auaritiam; humilitatis, per votum obedientiæ, contra superbiam. Effudisti igitur doctrinam, quasi prophetiam, id est, notitiam figurarum, quas reuelas per gratiam tuam, cui vis, & quantum vis: quasi prophetiam, id est, sine fallitate, & cum omni veritate: siquidem quia prius bibisti de fonte æternæ sapientiæ, reuelare potes, cui vis, arcana secretorum Dei, qui te cibauit pane vitæ & intellectus, & aqua sapientiæ salutis.

ris potuit te. Relinquis illam insuper quærentibus sapientiam; *Quærentibus* dicit, non *Inuenientibus*: id est, illis, qui sunt in studio quærendi, non in præsumptione habendi: quia *Deus superbis resistit*. Relinquis ergo quærentibus sapientiam, non mundi, sed Dei, quæ desursum est.

Iacob. 4.
6. 1. Petr.
5. 5.

3. Hanc ego miserabilis peccator non merui, nec mereor, propter innumerabilia peccata mea, & infinitas negligentias, & iniquitates meas, quas hæcenus commisi, & adhuc committere non desino. Sed tu, misericordissima & benignissima Virgo Maria, effunde cum effectu in me seruulo tuo hæc salubrem doctrinam, per quam peccata relinquam, virtutes acquiram, tuo benedicto Filio placeam, vitam meam miserabilem in bonam & tibi placentem commutem, vt labili vitâ istâ finitâ, vitam stabilem consequar sine fine. Amen.



Contemplatio XI.

De Lingua Virginis Mariae.

Ex. 6. 5. 1. **L**ingua tua, pretiosissima Virgo Maria, lingua est eucharis, id est, bene gratiosa: quia calamus fuit scribæ velociter scribentis, scilicet: *Ps. 44.*
2. Spiritus sancti: ipso namque scribâ mouente calamus, emisisti illud verbum bonum, & mellissimum, *Ecce Ancilla Domini, fiat mihi secundum verbum tuum.* Hoc autem verbo nectareo in tantum exhilarasti de salute humani generis sollicitum Regem cæli, quod quasi factus immemor injuriæ primorum parentum, à sede regali statim descenderet, velut deposito diademate gloriæ, & cælum diuina potentia dirumpens, exiliret eodem momento de sinu paterno in tuum vterum virginalem; vociferans illud, *Delicta mee esset cum filiis hominum.*
Luc. 1.
33.
Prov. 8.
35.

2. In isto etiam verbo fuit lingua tua, lingua curationis, lingua mitigationis, lingua misericordiæ: nam respondens humiliter & obedienter, curasti agnitum responsonis Euz. Lingua enim Euz diabolo sub dubio respondentis & gustum ligni vetiti viro suo suadentis, & peccatum suum serpenti attribuentis, totam progeniem ex se nascituram lethaliter vulnerauit, Paradisi portam cunctis clausit, & Dei iracundiam ad vindictam prouocauit. Lingua verò tua dulcissima & melliflua, Virgo intemerata, fuit lingua curationis & remedij; quia in ipsa sonuit humilitas, cum dixisti, *Ecce Ancilla Domini*, contra superbiam Euz: in tua benedicta lingua sonuit obedientia, cum subjunxisti, *Fiat mihi secundum verbum tuum*, contra inobedientiam Euz: & ideo tua gloriosa lingua fuit mitigationis & misericordiæ, quia Dei iracundiam mitigauit, & eius misericordiam humano generi impetrauit, infirmos curauit, portas Paradisi aperuit, & ad Paradisi gaudia genus humanum traxit.

3. O lingua saluifica, salutem humano generi afferens! lingua melliflua,

Iesum Christum ad terram trahens ! lingua Deifica, de cœlestibus loquens ! lingua benecvola, malum dicere nesciens ! lingua propitia, cuncta bona peccatoribus à Deo obtinens ! lingua veridica, omni mendacio carens !

4. Sed, humillima Virgo Maria, ego iniquitatibus plenus ; sub lingua mea misera labor & dolor : prompta est ad loquendum vana & otiosa, ad blasphemandum, detrahendum, mendacia proferenda pejerandum, discordias mouendum, adulandum, decipiendum, & alia multa dicenda. O Regina misericordiæ, dele iniquitatem linguæ meæ beatissima lingua apud gloriosum Filium tuum, ipsum humiliter exorando, vt linguam meam sibi & tibi placentem faciat, quæ ipsum & te laudet, & benedicat nunc & in perpetuum. Amen.

Contemplatio XII.

De Gutturæ Virginis Mariæ.

1. **G**uttur tuum sicut vinum optimum, singularissima Virgo Maria. Guttur tuum, id est, preces ex guttore procedentes, sicut vinum quod est optimum, quod consolatur & releuat dolores afflictorum. Guttur tuum, benedicta Virgo Maria, id est, verba de guttore procedentia, sicut vinum optimum Iesu Christo Filio tuo, scilicet per deuotionem sapida in precibus, & pungunt cor eius, vt inde miseris eliciant misericordiam : & sic ipsum inebriant, vt eum faciant obliuisci omnium delictorum. Guttur tuum, gloriosa Virgo Maria, id est, verba ex guttore procedentia, more optimi vini mentes multorum alienant à sensu carnali, suauiter pungunt & stimulant bene facere pigritantes, ad currendam viam mandatorum Dei, ad amandum, & orandum.

2. Guttur tuum, piissima Virgo Maria, id est, doctrina, quæ continetur in verbis tuis, est sicut vinum optimum ; quia deuotos delectant, & à sollicitudinibus mudanis elongant, & sic inebriant, vt sobrios reddant, non amentes faciant. Guttur tuum, benignissima Virgo Maria, id est, verba dulcissima ex guttore procedentia, sicut vinum optimum : quia sunt ipsa verba omni dulciora melle per intrinsecam consolationem, qua cor hominis latificat ; vt tibi, sicut Filio, dici possit, *quàm dulcia faucibus meis eloquia tua.* Psal. 118.

3. Guttur elcas dijudicat. bonas retinet, & euomit malas, hoc est, virtus discernendi spirituales preces quæ more optimi vini, suo calore facces expellit, vt remaneat vinum optimum, eliquatum, & defæcatum. Tu, Virgo prudentissima, discretionem habuisti in tuis precibus ; quia hoc solum perebas quod discretum erat, quod bonum, quod pium, & ab omni malo defæcatum. Et ideo, sicut vinum optimum sine difficultate, & cum delectatione bibitur, sic petitiones tuas cum omni facilitate & delectatione tuus benedictus Filius, admittebat, & admittit, & quia eius

Gg ij

quod bibitur, gustus citò præterit, eius verò quod amatur, diu remanet, ideo in petitionibus tuis perseverasti, ut sic alijs ostenderes, quòd non perfunctorià, sed longà & placidà dulcedine iustarum petitionum tuus benignissimus Filius delectatur.

4. O felicissima Virgo Maria, quid faciam ego iniquissimus peccator? qui discretionem habui à Deo mihi misericorditer datam discernendi inter bonum & malum; & tamen malitià meà, relicto bono, malum suscepi, peccata plurima committendo, & virtutes, & inspirationes bonas in me totaliter suffocando: adjuuet me, Virgo pijsima, tua sancta deprecatio, ut malum meum convertatur in bonum, & tristitia mentis meae in consolationem spiritalem, ut tandem consolari valeam per infinita saecula saeculorum. Amen.

Contemplatio XIII.

De Collo Virginis Mariae.

Cant. 7. 1. **C**OLLUM tuum, sicut turris eburnea, sacratissima Virgo Maria: & hoc propter constantiam & fortitudinem; quia Turris non agitur, nec circumfertur à vento; eburnea, propter refrigerium abstinèntiae, & candorem castitatis, & innocentiae. Ebur enim frigidum est & candidum. Tu, Virgo Maria, es collum Ecclesiae, propter conjunctionem diuinitatis quae per caput, & humanitatis, quae per corpus significatur: quia in utero tuo virginali facta est conjunctio diuinæ & humanæ naturæ, & vnitum genus humanum Christo capiti suo, ut in natura humana simus vnum cum eo.

2. Collum est rigidum, & rotundum, & caput supportat: sic tu, Virgo gloriosissima, nunquam inclinata fuisti per peccatum, sed semper recta; quia cælos attingebas stans in terra, per contemplationem cœlestium, & quasi rotunda, per æternorum desiderium; & nouem mensibus portasti tuo utero Christum caput nostrum. Collum conjungit caput corpori: sic tu, Virgo sanctissima, conjungis Christum, qui est caput, Ecclesiae, quæ est corpus; scilicet corporaliter Christum gignendo, & spiritualiter ipsum peccatoribus reconciliando: collum vniuersis membris post caput supereminet in corpore: & tu, Virgo dulcissima, post Christum, qui caput est nostrum, excellentissimum membrum es Ecclesiae.

3. Sicut per collum interior aër emittitur, exterior verò intus attrahitur; sic per te peccatorum deuotio Deo præsentatur, & ab ipso peccatoribus misericordia redonatur. Sicut saliuà ab ipso capite, mediante collo, in corpus trahitur, sic per te humano generi à Deo Trinitate gratia impetratur. Sicut collo mediante descendit in corpus quicquid est ei necessarium, cibi, potus, potiones, medicinæ, & huiusmodi, sic

per te, Virgo Maria, descendit Filius Dei, qui vera est medicina, cuius caro & sanguis verè est cibus & potus; quia per te Virgo Maria, manducauit homo panem Angelorum in Sacramento Altaris. Collo etiam verba proferuntur; & tu, Virgo benignissima, pro nobis bonum loqueris in conspectu Dei; quoniam nostra es Aduocata, & precibus tuis benè sonantibus disjunctos à Filio tuo benedicto per peccatum, quoties pœnitemus, reconjungis: nec fraudare te vult vnigenitus Filius tuus voluntate labiorum tuorum.

4. Sed, misericordissima Virgo Maria, ego piissimus peccator collum habeo, non constans, sed variabile; non forte, sed debile; non erectum ad cœlum, sed inclinatum ad terram, variatur quotidie per diuersas & noxias cogitationes, debilitatur per varias & diuersas tentationes, inclinatur per malas operationes. Flecte collum tuum, gloriosissima Virgo Maria, Filio tuo per humilitatem pro me misero peccatore, & ora eum, vt collum mentis meæ erigatur ad Deum assidue; vt exclusis inclinationibus & operationibus malis, regnum consequar sempiternum. Amen.



Contemplatio XIV.

De Humeris Virginis Maria.

1. **F**ortitudo humerorum tuorum, beatissima Virgo Maria, onus infirmitatis humanæ piissimè supportauit, & supportat quotidie, illud adimplendo, *Alter alterius onera portate, & sic adimplebitis legem Christi.* Gal. 6.2. Christus portauit in humeris suis Cruci affixis peccata nostra, id est, pœnam peccatorum nostrorum; & tu, Virgo Maria, peccata nostra super humeros tuos portas orando Filium tuum benedictum pro remissione peccatorum nostrorum. Christus ouem perditam & errantem super humeros suos portauit; & tu, Virgo sanctissima, onus custodiæ ouis, id est animæ, ne perdat, aut erret, super humeros tuos portas. Factus est principatus tuus super humerum tuum, in deprecando.

2. Super humeros tuos, benignissima Virgo Maria, suscepisti onus defensionis humani generis. Defendis etiam peccatores à multitudine & vehementia tentationum; quia in nobis non est tanta fortitudo, vt possimus huic multitudini resistere, quæ irruit super nos; sed cum ignoremus quid agere debeamus, hoc solum habemus residui, vt oculos nostros dirigamus ad te. Defendis etiam ab accusationibus dæmonum, qui bonum in malum conuercentes insidiantur, vt ponant malitiam. Sed quis, Virgo Maria, apud Filium tuum accusare audebit, cum te matrem viderit parrocinantem? & si tu pro nobis, quis contra nos? certè nullus. Et si tu, Virgo pia, iustificas coram Filio tuo benedicto, quis est, qui condemnet? verè nullus. Defendis etiam ab accusationibus detractorum, & conuentu malignantium, & ope-

Gg ij

rantium iniquitatem, & à corporalibus inimicis & manifestis, & à seductoribus animarum, idest, occultè insidiantibus, scilicet mundo, carne & demonibus; quorum primus pietatem, per auaritiam, secundus castitatem, per luxuriam; tertius humilitatem, per superbiam, conantur auferre. Isti sunt atrocissimi inimici, per quem omnes alij pugnant, & sine quo non prævalent, scilicet propria voluntas; sed tu, Virgo piissima, in fraude circumuenientium, ades nobis, humeris tuis portans onus totius defensionis.

3. Sed heu! ego miser peccator, humeros habeo debiles & fragiles ad sustinendum onus defensionis animæ meæ; sed illos flecto, deprimo, & sub iugo totaliter voluntati inimicorum meorum: imò, quod mihi damnable est, illos voluntariè offero ipsi ad eorum omnimodam voluntatem; & multis modis inuito, & occasionem præbeo, vt illos onerent vitiis & peccatis. Adjuua me, gloriosa Virgo Maria tuis sanctissimis deprecationibus ad deponendum talia onera damnable, & animæ meæ importabilia; tribue humeros fortes ad amorem diuinum, vt diuinâ gratiâ præueniente, opera virtutis hinc agam, quæ per vitam obtineam sempiternam. Amen.

Contemplatio XV.

De Brachiis Virginis Mariae.

Psal.
118. 15.
1. **O** Superlaudabilis & amabilis Virgo Maria, brachia tua gloriosissima longitudinem habent, fortitudinem, & flexibilitatem. Longa enim sunt ad trahendum peccatores ad confessionem & emendationem malæ vitæ, quia scriptum est, *Longè est à peccatoribus salus*: ideo sunt longa brachia tua, attingentia à fine vsque ad finem, vt peccatores elongatos trahas ad salutem. Tua brachia, Virgo Maria, habent fortitudinem ad defendendum peccatores contra impetus prauos & iniquos hostium antiquorū, qui assidue querunt quem deuorent. Sed tu, mitissima Virgo Maria, in brachio forti, & extenso defendis peccatores, inimicis viriliter resistendo, & eos in virtute & fortitudine brachij tui prosternendo. Et sic peccatores ipsi redeunt ad veniam, & adipiscuntur gratiam, & gloriam. Tua beata brachia flexibilitatem habent, vt prostratos & elisos brachiorum tuorum flexibilitate subleues, & subleuatos astringas, ne iterum cadant.

2. O misericordissima Virgo Maria, tu es fons pietatis erga miseros peccatores, ad quos fluunt miserationes tuæ. Tu pia, tu amabilis, tu nominari non potes, quin accendas corda nominantium, & audientium te nominari; nec potes recogitari, quin cogitantium affectus referes. Tu numquam sine dulcedine diuinitus tibi inita, memoriam hominum subin-

tras. Si enim vulnus oleo perungatur; oleum non permittit cicatricem obduci, donec sanies sit educta; sic tua benignitas, Virgo Maria, peccatores in te confidentes non permittis in peccati deficere morte; sed tuis brachiis humilibus astringis, donec Filio tuo benedicto eos reconcilies per veram poenitentiam; quia per te, & in te, & à te peccatores habent & habituri sunt omne bonum; & sic facta es omnibus omnia, ut omnes peccatores, quantum in te est, saluos facias.

1. Cor.

9.2.2.

3. Sed, beatissima Virgo Maria, ego sceleratissimus peccator brachia mentis meae habeo longa per internas cogitationes peccata de longè eductes, brachia fortia ad deducendum ad effectum peccata; brachia habeo flexibilia ad amplectendum peccata per perseverantiam ipsorum. Hæc fuit vita mea, hoc studium meum, in quo studui, in quo laboravi, in quo tempus meum expendi, non solum peccando, sed & multos alios inducendo ad peccandum. Intercessio tua assidua ad tuum benedictum Filium, Virgo Maria, non me relinquit; sed veniam impetret de commissis, & brachia fortia ad resistendum tribuens clementer, & gloriam mihi in fine æternam concedat. Amen.

Contemplatio XVI.

De Manibus Virginis Mariæ.

1. **M**ANUS tue distillauerunt myrrham, & digiti tui pleni sunt myrrha *Cant. 5.*
probatissima, beatissima Virgo Maria, per manus denotantur opera, & per digitos operum discretio. Myrrha est perfectissima carnis, & carnalium voluptatum mortificatio, quæ omnia ostendunt, Virgo gloriosa, impletum esse, quod tibi promiserat Angelus, dicens, *Spiritus sanctus superueniet in te.* Nam Spiritus sanctus superueniens in te, sic te vestiuit de- *Luc. 1.1*
 super, quod totum, quod erat in te carnale, absorptum est; & solus in te dominabatur spiritalis affectus: sic quod in te nihil carnalis concupiscentiæ vel mundanæ fuerit. *35.*

2. Manus tuæ, & digiti tui, id est, operatio tua, & opera tua, & operum tuorum discretio distincta, perfectæ mortificationis testimonium præferebat: *Ecc. 14*
 ideo, *Quasi myrrha electa dedisti suauitatem odoris.* Illa myrrha electa est, *10.*
 quæ sine vulnere & incisione corticis, manat ab arbore; quæ illam amarum carnis mortificationem designat, quam profert anima nullo peccati vulnere fauciata. Talem myrrham melliisti, sacratissima Virgo Maria, quia licet vulnus peccati non haberes, tamen te ipsam multipliciter mortificare curasti, & opera virtuosissima cæteris abundantius omni promptitudine & celeritate, faciebas, nec tamen à iustitiæ regula declinabas. Manus tuæ, gloriosa Virgo Maria, candidissimæ fuerunt, quibus diligenter & humiliter benedicto Filio tuo seruisti, & cum nutruisti. Fuerunt etiam can-

didissimæ, quia peccatum non fecerunt; sed apertæ & extensæ fuerunt ad opera misericordiæ; manum tuam aperuisti inopi, & palmas tuas extendisti ad pauperem.

Prouer.
31. 10.

3. Ad manuum tuarum pulchritudinem multum conferebat digitorum decens conjunctio seu iunctura; quia *digitus* dicitur, quasi *discenter iunctus*, & digitis designantur discreta opera. Fuerunt etiam recti, per intentionem, flexibiles, per compassionem, graciles, per mortificationem, candidi, per innocentiam, longi, per perseverantiam, articulariter distincti, per discretionem. Manus igitur fuerunt, Virgo benedicta, aureæ, per sapientiam & charitatem, quæ deaurant opera omnia & ea faciunt discreta & amabilia.

4. Sed, ô Virgo sanctissima, manus meæ non distillauerunt myrrham per mortificationem carnalium voluptatum, sed distillauerunt venenum peccati. Non sunt candidissimæ, sed fuerunt sordidissimæ fœcibus peccatorum; & apertæ ac extensæ ad malum committendum. Extende, Virgo benignissima, manum tuam mihi inopi & pauperi; & eleua me, quia sum prostratus in luto peccati. Teneat me manus tua, ne iterum damnablem cadam: sed, sicut manus Filij tui benedicti fecerunt me; sic dicam quod manus tuæ refecerunt me, per tuam deprecationem, ut hinc manus tuæ virtutes operando bonum efficiant, ut manus tua suscipiat me in tua gloria sempiterna. Amen.

Contemplatio XVII.

De Vberibus virginis Mariæ.

Cantic. 1. 1. **O** Præclarissima mulierum, beatissima Virgo Maria, super omnem creaturam post benedictum Filium tuum, honor, laus, & gloria tibi dignè debetur. Scriptum est de te, *Meliora sunt vbera tua vino, fragrantia vnguentis optimis*: Melioris enim, potentioris, & vtilioris efficaciam sunt vbera tua, sanctissima Virgo Maria, quam vinum. Nam vinum inebriare potest hominem, ut præteritarum sit immemor offensarum, & sit facilis ad condonandum & largus ad donandum. Vbera tua, dulcissima Virgo Maria, Deum quasi inebriare potuerunt: nam postquam de tuis sacris vberibus lac bibit, ac si cum lactis dulcedine dulcedinem potasset misericordiæ, projecit ab oculis suis peccata mea post tergum, & factus est largus ad dandam veniam peccatorum, largus ad dandam gratiam, & vberem iustitiam. Vbera tua, gloriosissima Virgo Maria, sunt *fragrantia vnguentis optimis*. Nara in beatissimis vberibus tuis, fragrat odor suauissimus lugentis vbera: qui delibutus vnguentis optimis, cum plenitudine charismatum & medicinalium gratiarum, venit ad animas peccatrices, ut eas ab omni lepra peccati sanaret, quas sacrâ sibi conjunctione copularet.

2. Vbera

2. Vbera tua, Virgo Maria, quoad Deum, sunt, intellectus ad ipsum cognoscendum, & affectus ad ipsum diligendum. Vbera tua, Virgo Maria, quoad proximum, sunt compassio, & gratulatio: quia flebas cum flentibus, & gaudebas cum gaudentibus: compatiebaris alienis malis & congratulabaris alienis bonis: sine istis vberibus paruula est anima; & vbera non habet; & ideo non est nubilus, & idonea Christo conjungi, nec potest habere lac efficacia doctrinae. Non minus, Virgo sanctissima, meruisti fundendo lac de vberibus tuis piissimis ad nutriendum tuum Filium benedictum, quam meruerunt Martyres fundendo sanguinem suum per martyrium. Omnium namque operum merces, secundum charitatis radicem pensatur.

3. Sed, beatissima Virgo Maria, vbera mentis meae lac dulcedinis non effundunt, sed venenum amaritudinis peccati. Ora igitur, piissima Virgo Maria, quem inenarrabili dulcedine lactis tuorum vberum inebriasti, ne recorderetur cum iustitia de cetero de peccatis meis, sed misericorditer condonet irrogatas sibi per me miserum injurias, & largiter mihi donet gratias & virtutes in praesenti, & in futuro gloriam sempiternam. Amen.



Contemplatio XVIII.

De Ventre Virginis Mariae.

2. **V**irgo Virginum sanctissima, *Venter tuus sicut aceruus tritici*, id est, *Cant.*
 plenus Filio Dei, qui se appellat *Granum frumenti*, Granum enim *2.*
 illud tritici, potentialiter erat aceruus tritici, de quo scilicet grano, spi- *Ioan. 12.*
 ritualis seges, fructificante Deo, multiplicata est, ex quo cecidit granum *24.*
 istud in terram fertilem & bene exultam exercitio Spiritus sancti, in quam
 nisi prius cecidisset per Incarnationem, & post in Cruce mortuum fuisset,
 ipsum solum mansisset: sed per ista duo, granum vnicum factus est aceruus
 magnus, *Vallatus Liliis*, ex omni parte scilicet mirabilem habens cando-
 rem; quia Virgo ante partum, Virgo in partu, & Virgo post partum, Vterus
 tuus, Virgo castissima, conseruat in se habuit triticum, quo nu-
 triebatur columba, id est, fidelis anima; quando, quem totus non capit
 orbis, in tua virginea se clausit viscera, factus homo: & vallabatur vnde-
 que liliis, id est, candore & redolentia munditiae virginalis.

2. In tuo vtero virginali, sanctissima Virgo Maria, Creator tuus sibi
 construxit pausatorium spiritale, vt dicere possis, *Qui creauit me, requieuit* *Ecd. 24*
in tabernaculo meo. Vterum tuum virginali, sanctus Spiritus sibi sacrauit *12.*
 sanctuarium singulare, in quod Dei Filius a regalibus sedibus veniens, ibi
 primam mansionem inter filios hominum praelegit: Ibi praeterea deco-
 rem induit, stola candida se cooperuit; id est, mundissima humanitate,
 cuius decor est immunis a peccato.

3. Venter tuus eburneus est, per virginitatem, quæ soror est Angelorum: In Angelis enim est Virginitas, & Virginitatis incorruptibilitas; quia in Angelis omnis motus diuinæ voluntati subiectus est. Hoc itaque decore multiplici signatus est venter tuus sanctissimus, & ab omni alio ventre puræ creaturæ distinctus. Nam in ventre tuo fuit Virginitas incorruptibilis; nullus fuit ibi motus, qui à Dei beneplacito discordaret. Venter tuus sacratissimus, sicut pyxis eburnea, in qua humano generi Deus Pater transfudit illud medicinale vnguentum, scilicet Vnigenitum tuum, qui curauit genus humanum.

4. Sed, beatissima Virgo Maria, venter meus miserrimus, non fuit sicut aceruus tritici, sed aceruus peccati. Non fuit eburneus per munditiam virginalem, sed fuit nigerrimus per malitiam, & iniquitatem: non fuit vallatus liliis per candorem, sed fuit vallatus spinis peccatorum, per fetorem, & errorem; qui me adduceret non ad Angelorum consortium, sed ad societatem miserabilem antiquorum hostium, nisi tua pietas me adiuuare dignetur, Virgo misericordissima, per tuam piissimam intercessionem. Aperi mihi viscera misericordiæ, orando tuum Filium benedictum, qui ventrem animæ meæ mundet à facibus peccatorum, & mundatum custodiat, vt in fine gaudium obtineam beatorum. Amen.

Contemplatio XIX.

De Cruribus & Tibiis Virginis Mariæ.

1. **D**A mihi virtutem, & fortitudinem, benignissima Virgo Maria, vt te laudem & magnificem, & scripta de te elucidem diuinâ gratiâ aspirante. *Crura tua, & tibia tua, sicut Columna marmorea, quæ fundata sunt super bases aureas*, pretiosissima Virgo Maria. Crura tua sunt, temperantia in prosperis, & patientia in aduersis; quæ duo totum edificium virtutum sustinent, & supportant. Ista duo, gloriosissima Virgo Maria, perfectissime habuisti. Temperantia namque in magna prosperitate tibi fuit. Licet enim in tota humani generis aduersitate singulariter ad hoc esses electa, vt fieres Angelorum Domina, cælorum Regina, hominum Aduocata, mundi Imperatrix, sæculi Dominatrix, Creatoris tui mater & Nutrix; tamen in hac sublimi prosperitate, te aliquantulum non extulisti, nec verba alta dixisti; sed solum te Dei Ancillam nominasti, quamuis eiusdem genitricem Domini fieri te videns. Habuisti etiam, Virgo, patientiam in aduersis; quia licet gladius doloris tuam animam pertransisset in Vnigeniti tui passione, tamen magnam patientiam ostendisti: ideo dixit Simeon, *Gladius pertransibit*, & non dixit, *manebit*; scilicet lucem rationis obnubilando, sed *pertransibit*, sicut rem immobiliter stantem, nec resistentem, aut in aliquo per impatientiam vacillantem.

Cant. 5.
15.

Luc. 2.
35.

2. Tibiæ autem, quæ fortes sunt veluti columnæ marmoreæ, & totam corporis compactionem portant, sunt fortitudo, & perseverantia; quæ omnium virtutum, & Sanctorum operum compagem portant, & sustentant. Tu, Virgo Maria, fortitudinem habuisti, resistendo inimicis viriliter, & perseverantiam in omnibus operibus virtuosis. Sed, ut Columnæ marmoreæ possint portare ædificium, oportet quod sint fundatæ super bases aureas, scilicet charitatem & sapientiam, quæ significantur auro: fortitudo enim debet fundari in sapientia, ne se præcipiter perseverantia in charitate alioqui deficiet, & non stabit.

3. O beatissima Virgo Maria, ædificium cordis mei non stetit, sed corruit; quia fundamentum firmum non habuit: nam in prosperitate me extuli, in adversitate impatiens fui; non habui fortitudinem in resistendo vitiis, sed debilitatem in consentiendo tentationibus quibuscunque; & in iis perseveravi, non in bonis, in quibus ad tempus credidi, & tempore tentationis cecidi; quia fundatur super bases aureas, scilicet super charitatem & sapientiam, non fui. Ideo ad tuam misericordiam, Virgo Maria piissima, humiliter venio, ut me peccatorem suscipias, veniam obtineas mihi de peccatis; ac crura & tibiæ cordis mei firmas & stables facias; ne ædificium animæ meæ corruat, neque ruinam minetur, sed solidum maneat per infinita sæcula sæculorum. Amen.



Contemplatio XX.

De Pedibus Virginis Mariæ.

1. IN sempiternum benedicta singulari benedictione Virgo Maria, quam pulchri sunt pedes tui, quibus stando, sedendo, & incedendo, conculcasti terram, id est, terrena, acceptâ corporis tui mediocri necessitate. Pedes mundissimi, significant affectus: quia affectibus accedit mens ad se, & ad Deum, & recedit à se, & à Deo, sed pedes tui fuerunt duo affectus. Nam pes tuus dexter, fuit desiderium tuum placendi Filio tuo, & sollicitudo quomodo ei placere posses: quia ipsum tantâ devotione, tanto studio fouisti, & nutriisti, ut amorem ipsius, ab amore tuo proprio, imò, omnis carnis, suspensa; necessitatibus vagientis, esurientis, lactentis, crescentis, & cuiusmodi, omnis cordis tui affectionem substerneret.

2. Pes tuus sinister fuit studium quo modo posses proficere proximis: quia lucem consolationis & gratiæ ministrabas in amaritudine constitutis: ubi enim erat miseria, ibi locum tua misericordia habebat. Nec mirum si de peccatoribus sollicita eras, cum pro illorum salute illum concepisses qui non venit vocare iustos, sed peccatores ad penitentiam. Tantus est iste pes affectionis, quod à te nullus repellitur, nullus excluditur, nullus,

H h ij

qui tibi seruiat, obliuioni traditur. Omnes, quantum in te est, colligis, omnes ad te confugientes recipis. Ij duo pedes te portauerunt in cœlum. Isti fuerunt pedes animæ tuæ, quibus iuisti non de loco ad locum, sed de virtute in virtutem: ambulat enim anima non pedibus, sed moribus: quia sicut pedes corporales portant exteriorem hominem, sic affectus interiorem.

3. Sed mei pedes nihil aliud fuerunt, nec sunt, quam proprius sensus, & propria voluntas, qui me portant & ducunt (nisi tu, pia Virgo, me adiuues) ad infernum. Pedes mei cordis, quandoque calore exuruntur, scilicet odio, irâ, inuidiâ: quandoque frigore dissoluntur, scilicet torpore negligentia: quandoque lapide colliduntur, scilicet fidei hæsitazione; licet scriptum sit, caue, *Ne offendas ad lapidem pedem tuum*: quandoque luto inquinantur, scilicet carnis voluptate, quæ lutum est, & cœnum: quandoque puluere sordidantur, scilicet vanâ gloriâ; & sic gloriosa Virgo Maria, non ambulo ad cœlum, sed ad infernum; non ad gloriam, sed ad pœnam, non ad Deum, sed ad inimicum: Adiuua me, benignissima Virgo Maria, tuis sanctis deprecationibus. Pedes mei stando in via recta transeant liberè per foramen acus, quod longum est & angustum: nihil enim magnum vel grossum potest transire per illud: nec sufficit in illud intrare, sed necesse est per illud transire; qui enim intrat & non transit, nihil proficit. Intrat, & transit, quisquis benè incipit, & melius consummat. Quisquis transire habet per ostium paruissimum, quanto magis se humiliat, & astringit, tanto facilius intrat. Fac me, pia Virgo, sic humiliare, vt transeundo per strictum foramen pœnitentiæ, ad gloriam perueniam sempiternam. Amen.

Psal. 90.
11.

Contemplatio XXI.


De Statura Virginis Mariae.

Cant. 9. 1. **S**tatura tua assimilata est palma, speciosissima Virgo Maria, statura namque tua, id est, rectitudo bonæ intentionis, & sanctæ operationis directio, assimilata est palmæ. Nam sicut palma, id est, arbor triumphalis Crucis dominicæ, terribilis est malignis spiritibus; sic tu, benedicta Virgo Maria, merito tuæ rectitudinis, malignos spiritus terres, & expellis. Idco appellaris, *Terribilis vt castrorum acies ordinata*. Non enim sic timent hostes visibiles quamlibet castrorum aciem ordinatam, sicut aëreæ potestates. tuum nomen, patrocinium, & exemplum; fluunt namque & pereunt, sicut cera à facie ignis, vbicumque inuenerint tui nominis crebram recordationem, deuotam inuocationem, & sollicitam imitationem. *Cant. 6.* 9. *Statura tua*, gloriosissima Virgo Maria, *assimilata est palma*: quia, sicut signum Crucis, quæ per palmam designatur, armatura spiritalis contra diabolum est; sic est etiam inuocatio tua benedicta.

2. *Statura tua*, Virgo Maria, id est, recta intentio tua ad cælum directæ, & bona operatio tua, *assimilata est palmæ*, quia ad terrena noluisti incuruari, sed in cœlestibus voluisti conuersari; & illud brauium obtinere affectasti, quod dat benedictus Filius tuus animæ vitiorum victrici; de quo scriptum est, *Vincenti dabo manna absconditum*: quia *Oculus non vidit, nec auris audiuit, nec in cor hominis ascendit*, quæ præparauit benedictus Filius tuus tibi, Virgo Maria. *Statura tua*, dulcissima Virgo Maria, *assimilata est palmæ*: nam, sicut fructus palmæ immensam dulcedinem in se habet, sic fructus vteri tui virginalis, scilicet benedictus Filius tuus, dulcis est in verbo, dulcis est in exemplo, dulcis est in promisso, dulcis in iugo imponendo, dulcis in operatione, dulcis in peccatorum remissione, dulcis in flagellatione filiorum, & tandem sentietur dulcissimus in præmij retributione; quando cibabit nos seipso, qui est manna absconditum; & potabit nos torrente voluptatis suæ. O quam magna multitudo dulcedinis ipsius, quam abscondit timentibus eum!

3. O benignissima Virgo Maria; quid dicam de statura mea? Zachæus sum staturâ pusillus; quia statura, id est, rectitudo bonæ intentionis, & sanctæ operationis directio, non fuerunt in me; nec sum assimilatus palmæ, quæ est arbor alta, sed sum staturâ pusillus, carens omni virtute se erigente ad cælum. Non est rectitudo in me, sicut est in palma, sed sum totus incuruatus pondere peccatorum. Erige me, Virgo piissima, tuis sanctis intercessionibus; vt rectam intentionem, & bonam operationem habeam; vt dulcedinem fructus ventris tui pretiosissimi sentiam, per infinita sæculorum sæcula. Amen.





P A R S II.

DE SANCTIFICATIONE GLORIOSÆ
VIRGINIS MARIE.

Contemplatio I.

De Sanctificatione Gloriosa Virginis Mariæ.

Ps. 45. 5.



Ecd. 24. 12.

ANCTIFICAVIT tabernaculum suum *Altissimus*, humilima Virgo Maria. Istud tabernaculum est uterus tuus virginalis, qui propriè *Tabernaculum* dicitur; sicut, benedicta Virgo Maria, dicit Sapiens in persona tui: *Qui creavit me, requievit in tabernaculo meo. Qui creavit me*, secundum quod Dei Filius, per quem omnia facta sunt, *requievit* secundum quod homo, *in tabernaculo meo*, id est, in corpore. *Requievit* ibi Virgo purissima; quia ibi non invenit, quod eum molestaret: nec enim erant ibi pravi motus; non fumus superbiæ, non stillicidium diabolicarum tentationum, neque caro concupiscens aduersus spiritum, nec è contrà: qui sanctificauerat *tabernaculum suum*, id est, uterus tuum, *Altissimus*.

2. Primò enim sanctificata fuisti, Virgo gloriosa, in utero matris tuæ, ita quòd non remansit in te fomes, etiam mansit quantum ad essentiam, saltem non quantum ad virtutem ad malum inclinantem: in nobis autem utroque modo remanet post Baptismum, in quo sanctificamur: unde hæc fuit visio magna, quàm vidit Moïses; scilicet quòd rubus ardebat, sed non comburebatur, sicut enim in rubo erat ignis secundum essentiam, non secundum virtutem combustiuam; sic in te, beatissima Virgo Maria, erat fomes secundum essentiam, non secundum virtutem ad peccatum inclinantem.

Exo. 3. 3.

3. In natiuitate, autem tua purgata fuisti à peccandi pronitate, per hostias legales pro te oblatas, saltem ut mortaliter peccare non posses. Speciatissimè autem Spiritus sancti obumbratione, & Filij Dei conceptione purgata fuisti ab omni possibilitate peccandi; & sic omninò sancta, & sanctificata fuisti; per quam sanctificationem quasi per canalem quemdam, fons diuinæ gratiæ ad vniuersitatem generis humani redundauit. Ideò ad

te recurrendum est, & ad te confugiendum, vt de plenitudine gratiarum tuarum in sanctificatione tua tibi concessarum, recurrens recreetur. Nec minuetur plenitudo, si aliquid defluerit. Talis enim naturæ est eiusmodi plenitudo, quod quanto amplius de illa effluerit, tanto amplius abundabit. Ex ista siquidem plenitudine, nobis venit pretium redemptionis, aqua ablu- tionis, panis refectionis, medicina curationis, armatura purgationis, & pretium remunerationis.

4. O benedicta Virgo Maria, fluat in me plenitudo tuæ gratiæ, qui non sum sanctificatus, sed multis peccatis contaminatus; emundet & san- ctificet me fons tuæ misericordiæ, & pietatis, vt vitiiis procul pulsus, & vir- tutibus intromissus, tibi placita faciam opera, per quæ obtineam gloriam & retributionem æternam. Amen.

Contemplatio II.

De mundissima Carne Virginis Mariæ.

1. Caro tua, pretiosissima Virgo Maria, dicitur à *Carendo*; quia mul- tiplex gloriosa carentia, seu gloriosus defectus fuit in carne tua; quoniam caruit fomite, & prauis motibus in charismatum infusione, quæ *sanctificauit tabernaculum suum Altissimus*. Caro tua benedicta caruit omni defectu, qui esset ad culpam in gratiæ adimpletione, quia dictum est tibi *Gratia plena*. Caro tua gloriosa caruit rebellionē aduersus spiritum, quia nec caro tua concupiuit aduersus spiritum, nec spiritus aduersus carnem. Caro tua pretiosa caruit opprobrio sterilitatis in Spiritu sancti superuen- tione; quia ad hoc venit in te, vt de carne tua (vt à multis creditur,) quam- dam particulam separaret, separatam amplius reliquis emundaret, perfe- ctissimè emundatam in corpus formaret, quod Dei Filius assumeret: ideo de Spiritu sancto diceris concepisse.

2. Caro tua benigna & speciosa, caruit pruritu, & inquinamento, & impregnatione: quia Spiritus sanctus obumbrabit tibi. Caro tua beata caruit fractura virginalis signaculi, concipiens absque defloratione; quia Iesus saluat, non violat; confracta solidat, non confringit solidata; se- cundum nomen eius, ita & opus. Caro tua benigna, caruit omni graue- dinis importunitate, quia virtus Altissimi obumbravit tibi; id est, vmbram in te accepit, hoc est carnem leuem, & à peccato immunem: peccatum enim pondus est: vmbra autem figuram habet corporis, sed non corruptio- nem, vel ponderositatem. Caro tua sancta caruit omnia molestia & dolo- re in parturitione: scriptum est enim, *Peperisti sine dolore, seculorum Do- minam*. Nec mirum si dolorem non intulit tibi, quia tollere veniebat do- lores totius mundi.


3. Caro tua munda caruit omni peccato totius vitæ præsentis conti-

Luce. 1.
28.
Galat. 5.
17.

Galat. 5.
17.

uatione, quia gratia sancti Spiritus plena fuisti. Non enim venit sanctus Spiritus virginem corrumpere, sed sanctificare; nescit Spiritus Sanctus munditiam virginis minuire, sed augere; nescit fœdare, sed fœcundare; nescit vilificare, sed glorificare. Et ideo caro tua dignissima fuit Filio Dei, & seruitio eius mancipata; quando quodlibet membrum tuum Iesu Christo Filio tuo famulabatur, pedes, supportando; crura, & tibiæ, sustinendo; venter, bajulando; mammillæ, lactando; manus, nutriendo; vlnæ, amplexando; labra, arridendo; os, deosculando; lingua colloquendo; nares, odorando; totum corpus, adorando; quia quem genuisti, adorasti.

4. Sed caro mea corruptissima, per multiplicationem criminum concupiscit aduersus Spiritum, & non subiicitur eius ditioni. Virgo piissima, constringe illam tuo auxilio, vt animæ meæ caro misera subiiciatur, vt anima illi dominetur; vt, te iuuante, opera virtuosa faciat, per quæ obtineat regnum sempiternum. Amen.



Contemplatio III.

De pulchritudine Animæ gloriosæ Virginis Mariæ.

Cant. 4.
7. **T**ota pulchra es, ô plusquam gloriosa Virgo Maria. *Tota pulchra es, & macula non est in te.* Tota pulchra es in anima, per virtutum & charismatum omnium perfectam plenitudinem. Tota pulchra es in tua conceptione, ad hoc solum effecta, vt templum esses Dei Altissimi. Tota pulchra es ex generatione Verbi diuini, qui est splendor paternæ gloriæ, qui est candor lucis æternæ, & speculum sine macula, in quem desiderant Angeli prospicere, cuius pulchritudinem sol & luna mirantur. Tuæ gloriæ animæ, nihil vnquam affuit turpitudinis, vitij aut peccati: & nihil defuit spiritalis pulchritudinis, gratiæ & virtutis. Tot enim habuisti pulchritudines, virtutes, & singulas in altiori gradu, quàm concessum fuerit post Filium tuum superbenedictum, puræ creaturæ. In his namque, similem primam non habuisti, nec es habitura sequentem.

2. In te omnes virtutes tam actiuæ quàm contemplatiuæ conuenerunt, & præ cunctis creaturis, te admirabilem reddiderunt. Per virtutes actiuas, habuisti voluntatem mundissimam: per contemplatiuas, mentem purgatissimam. Non defuit tibi puritas Angelorum, non fides Patriarcharum, non scientia Prophetarum, non zelus Apostolorum, non patientia Martyrum, non sobrietas Confessorum, non innocentia aut humilitas Virginum. In summa, nullo genere vacasti virtutum, ô Virgo plusquam beata. Quodcunque donum alicui Sanctorum vnquam datum fuit, tibi non fuit negatum, sed omnium Sanctorum priuilegia omnia habes in te congesta.

3. Nemo æqualis est tibi: nemo maior te, nisi Deus. Quia Spiritus sancti gratia superueniens in te, & virtus Altissimi obumbrans tibi, quæ eras omnium

nium virtutum ornamentis prædecorata; pulchritudinem, puritatem sapientiam & omnium virtutum gratiam adauxit & splendorem. Miranda illa obumbratio Spiritus Sancti, quæ te vno momento templum Dei irradiavit, & decorem tuum manifestavit & auxit, sicut sol in semper ornatum thalamum incidens, gloriam eius occultatam, repente nobis ostendit & illustriorem facit.

4. Tota igitur pulchra es, Virgo gloriosissima, non in parte, sed in toto: & macula peccati, siue mortalis, siue venialis, siue originalis, non est in te, nec vnquam fuit, nec erit: sed adest tibi omnis gratia naturalium bonorum, spiritualium charismatum, & cælestium donorum. Quantum enim distat inter odorem & gustum aromaticæ speciei; tanta est inter contemplationem tuam & aliorum Sanctorum distantia. Sicut enim singularem actiuam à Christo cepisti vitam, videlicet eius humanam, sed diuinissimam naturam portare, lactare, lauare, pannis inuoluere, fouere, nutrire, lenire, amplecti, osculari, cæteraque eidem humanitatis officia exhibere: sic & dulcedinem suæ diuinitatis tibi singulariter degustandam indulgit. Quia tota pulchra eras, & macula non erat in te.

5. Sed, ô pulcherrima mulierum, quâ temeritate audeo venire ad te? Ego turpis cogitatione & opere, ad te mundam; ego immundus, ad te immaculatam; ego maculatus, & non solum maculatus, sed & vulneratus; imò non solum vulneratus, sed etiam in conspectu tuo, & benedicti Filij tui, mortuus propter innumerabilia peccata, quæ cogitatione, consensu, & opere longis temporum spatiis contraxi: & ita animam meam per suspensione sacri lauari purificatam, multipliciter fœdaui, & sordibus vitiorum inquinavi, adeo vt abominabilis facta sit, & tibi & Filio tuo superbenedicto.

6. In tua autem pietate confidens, ô præbenedicta, conbenedicta, & postbenedicta Virgo Maria, te suplici corde precor, vt animæ meæ pio compatiendo affectu, apud misericordissimum Filium tuum intercedere digneris, quo eam immundam mundet: & sicut ipsam puram fecit per Baptismum, ita rursus hoc tempore puram reddat per pœnitentiæ & reconciliationis gratiam, vt tandem cum electis tuis vitam, ad te & superbenedictum Filium tuum laudandum, obtineam sempiternam. Amen.

Contemplatio I V.

De eadem pulchritudine gloriosæ Virginis Mariæ siue quibus rebus ea pulchritudo significetur.

1. Speciositas tua, beatissima Virgo Maria, designatur per septuplicem speciem quæ in sacra Scriptura inuenitur. Est namque species oliuæ, de qua scribitur: *Quasi oliua speciosa in campis.* Est species columbæ, de qua canitur *Vidi speciosam, sicut columbam.* Est species Libani, de qua dicitur:

Ecel. 24.

19.

Ecel. in

1. Reg.

Assump. Species eius ut Libani. Est species cœli, de qua legitur: *Species cœli in visione gloria.* Est species ignis in nocte, de qua scribitur, *Operiebat tabernaculum quasi species ignis.* Est species arcus, de qua scribitur: *Vide arcum, & benedic ei qui fecit illum: Valde enim speciosus est.* Est etiam species Solis, de qua scribitur: *Est enim speciosior Sole.*

Nu. 9. 16. 2. Species oliuæ consistit inter cœtera in viroris amœnitate. Sic tua species, ô beatissima Virgo Maria, consistit inter alia, in fidei sinceritate. Et sicut viror pacifera oliuæ delectat oculum corporis, sic fides tua, quæ pacem inter Deum & hominem reperit, delectat oculum mentis.

Ecd. 43. 3. Species columbæ consistit in simplicitate, pulchritudine oculorum, colorum mutatione, & varietate circa collum. Sic, ô beatissima Virgo Maria, species tua consistit in humilitate, pulchritudine sanctorum cogitatum, & doctrinæ veritate, quæ in collo intelligitur; quia doctrix fuisti Doctorum, & magistra Apostolorum. Vnde & beatus Lucas, cui inter cœteros Euangelistas descriptio Dominice Incarnationis attribuitur, Euangelij seriem à te Virgine Maria didicisse traditur.

Isa. 11. 1. 4. Species Libani consistit in continua virgultorum fecunditate, & delectabilem florum candore, & significat, ô gloriosissima Virgo Maria, candorem tuæ fecundæ virginitatis: quia tu es de qua dicitur; *Egreditur virga de radice Iesse, & flos de radice eius ascendet, & requiescet super eum spiritus Domini.* De tua autem supereminenti virginitate, iuste dici potest *Ecd. 43.* 5. quod scribitur: *Pulchritudinem candoris eius admirabitur oculus.*

Ecd. 36. 6. Species cœli est in visione gloriæ, & significat in te, sanctissima Virgo Maria, contemplationis sublimitatem, de qua scribitur; *Species mulieris exhilarat faciem viri.* Per quod intelligere quis possit altitudinem contemplationis acceptam esse & placentem in conspectu diuinæ pulchritudinis.

Ecd. 36. 7. Species ignis consistit in ardore & splendore. In te autem, ô beatissima Virgo Maria, fuit ignis charitatis ardens & splendens ante Deum, & nos miseros peccatores protegens. Et sicut tu Regina Virginum nominaris, sic charitas illa tua, Regina virtutum appellatur: quia virtus nomen amittit, quæ charitati non famulatur.

8. Arcus cœlestis fit ex radiis Solis, in humida nube, & significat Incarnationem Filij tui superbenedicti in te. Tunc enim Sol iustitiæ, qui est splendor Patris, ingressurus in mundum, ascendit super nubem leuem, id est, sibi vniuit mundissimam carnem sine pondere peccati, quod factum est de tua carne in tuo virginali vtero, & sic facta est visibilis imago Solis iustitiæ cum profusionis gratiarum plenitudine: ut sit visibilis imago Solis cum sit arcus, sed non nisi in die profusionis pluuiæ.

9. Species Solis consistit in splendentium radiorum emissionem: & significat in te, Aduocata nostra Virgine Maria, largam gratiarum effusionem in omnes qui ad te se conuertunt, quæ es Sole speciosior, & emissionem gratiarum fecundior.

10. Tua ergo species, Virgo Maria, fuit in corporis castitate, in conscientie puritate, in exteriori conuersatione, & in diuinorum contemplatione.

Munda igitur cor meum immundum & inquinatum, ô piissima Virgo Maria: & tuis precibus mihi obtine speciem spirituales, per quam in seruitio tuo & benedicti Filij tui, placeam tibi in vitam sempiternam. Amen.

Contemplatio V.

De eadem pulchritudine gloriosa Virginis Mariae.

1. Speciosa facta es, beatissima Virgo Maria, præ filiabus hominum, quæ speciosum formâ, non solum præ filiis hominum, sed etiam præ milibus Angelorum, tuæ carnis substantiâ vestiisti, Unigenitum Dei. Natura etiam, quæ per te reparanda erat in compaginando te, & colorando, studiosissima fuit; ad membrorum tuorum excellentiam singularem laudes humanas addere non est necesse, cum ex vita tua sanctissima totius virtutis forma resplendeat. Tua quippe in terris conuersatio, omnibus Sanctis imitanda proponitur, & etiam Angelis admittenda efficitur; quæ si quis eam aspiceret, non solum delectabatur illum, sed ad diuinos prouocabat affectus; quia Spiritus Sanctus, qui tuam beatam animam sui feruore caloris accenderat, membrorum tuorum officia in eandem habitudinem suspendebat. Vnde nihil aliud in tuis moribus resonabat nisi nectar diuinæ, & humanæ sapientie expressum de ineffabili suauitate maiestatis diuinæ essentia.

2. Ad huius puritatis excellentiam, nulla alicuius Sancti pertingit sanctimonialia, nisi tua, gloriosa Virgo Maria; quæ tantò summæ Diuinitati eras vicinior, quanto Spiritus Sancti muneribus eras ornatior. Membra enim tua sanctissima sic sanctitatis integritate custodiebas, vt nulli omnino subiacerent corruptioni; vnde tantus erat splendor tui vultus, quod Ioseph sponsus tuus te aspicere facie ad faciem non poterat.

3. Sed, sanctissima Virgo Maria, omnium, omnia membra mea, peccatorum sordibus foedauit; & quæ ad Dei seruitium erant ordinata ad perpetranda peccata inclinaui, & animam meam à bona & meritoria operatione retraxi; cum membra mea miserrima essent instrumenta animæ meæ ad bene operandum, & meritum sempiternum diuinâ assistente misericordiâ consequendum. Misereri mihi, piissima Virgo Maria, misereri mihi digneris. Dele tuis sanctissimis deprecationibus, iniquas operationes membrorum meorum, quæ miserabilem animam meam ad claustra infernalium deduxerunt, & potestati inimicorum subiugauerunt. Exora Filium tuum benedictum, vt à iugo tam iniquæ potestatis eam liberare dignetur, & omnia membra mea disponere ad eius seruitium; vt anima mea iugo miseræ seruitutis relicto, iugo gloriosi Filij tui, quod est suauis, & oneri eius, quod est leue, misericorditer subiiciatur: vt hæc opera laudabilia, & meritoria agendo, gloriam in futurum consequatur sempiternam. Amen.

Ii ij



P A R S III.

DE NATIVITATE GLORIOSÆ
VIRGINIS Mariæ.

Contemplatio I.

De Nativitate Gloriosæ Virginis Mariæ.

1.



INTER omnia opera æterni opificis, post operationem illam quâ naturæ nostræ unitus est Filius tuus, speciale opus fuisti, ô beatissima Virgo Maria: quia Deus ad hoc te fecit, ut quod de primo opificio fuerat deformatum, per te reformaretur.

Hic enim summus opifex primò condiderat Angelicam naturam, quæ in parte ceciderat; & humanam, quæ corrupta erat; & corpoream inferiorem, quæ peccato hominis fuerat deterior effecta. Sed ad hæc omnia fecit te Deus, Virgo Maria sanctissima, ut ex tuo superbenedicto fructu, Angelica natura repararetur, humana renouaretur, inferior à servitute liberaretur.

2. *Edificavit ergo Angelis te Reginam: hominibus Medicinam: creaturæ inferiori libertatem. Sed prius edificavit Angelis cælum: & hæc est domus gloriæ: Dæmonibus & damnatis hominibus, Infernum, & hæc est domus iustitiæ: hominibus lapsis mundum; & hic est carcer miseriæ; quia emisit Dominus Adam de Paradiso voluptatis, ut operaretur terram, de qua sumptus erat. Idem autem carcer, patria fuit bestiarum. Pisces posuit in aquis, aves in aëre, & stellas in firmamento. Et qui prius cæterorum hospitii intenderat, nunc suo proprio intendit hospitio. Ideò dicitur: *Sapientia edificavit sibi domum*; id est, te Virginem Mariam: ut in te habitaret per humanæ naturæ assumptionem.*

3. Et non solum sibi ipsi soli te fecit, sed te Angelis dedit in restaurationem; hominibus & nostræ naturæ, in reparationem; inferiori creaturæ, in liberationem: sibi in matrem; dæmonibus, in hostem; detentis in limbo, in ereptionem. Nam in principio cum ceciderant Angeli, natura erat corrupta, Deus offensus, & diabolus victor. Sed per te, ô superbenedicta Virgo Maria, innocentia reparatur, vita Angelica reducitur, Deus homini

pacificatur & vnitur, diabolus vincitur & conteritur; quia de te scribitur;
Ipsa conteret caput tuum.

4. Sapientia igitur te edificauit in domum. Siquidem amissæ erant ani-
 mæ, quæ ob nihil aliud factæ erant, nisi vt esset in eis habitatio Sapientiæ;
 & hoc, si permansissent sanctæ. Sed, quia corruptæ erant omnes, & pec-
 cando vacillauerant, idè te gloriosissimam Virginem Mariam, edificauit
 in domum solidam & fortem, quæ nullo modo vacillare posset. Idè ex-
 cidit columnas septem, ad te fortiter & sublimiter sustentandam. Septem
 columnæ quibus firma semper stetisti, sunt septem dona Spiritus Sancti
 quæ requieuerunt in te, & nunquam te deseruerunt: per quæ stetisti firmiter
 & perseueranter in omni gratia & virtute.

5. Sed benignissima Virgo Maria, licet superbenedictus Filius tuus, ani-
 mam meam in domum suam elegisset ad habitandum in ea per gratiam;
 tamen ego proditor & falsus hospes, ipsum ignominiosè eieci per pecca-
 tum. Adiua me ergo, piissima Virgo Maria, vt tuis precibus mundetur
 hæc misera domus ab omni peccato, & ora illum, vt in ea habitet: hic per
 gratiam, & in futuro sæculo per suam præsentiam, ad gloriam suam sem-
 piternam. Amen.

Contemplatio II.

De Eadem.

1. **V**inea facta es, electa à Domino, beatissima Virgo Maria, qui te pri-
 mò plantauit in radicibus, id est, in antiquis Patribus, virtutum ipso-
 rum imitatione; quia præceptum tibi fuerat à Domino, *In electis meis mitte* Eccl.
radices. In Abraham, Fides & Obedientia; in Isaac, Spes & Patientia; in
 Iacob, Charitas; & in Dauide, Humilitas; Iste fuerunt sanctissimæ radices
 tuæ, dilectissima Virgo Maria. Ex istis radicibus incepisti pullulare median-
 tibus parentibus tuis Annâ & Ioachim. Vinea à malis herbis & lapidibus
 purgatur; sic tu piissima Virgo Maria, purgata fuisti in tua sanctificatione
 ab omni fomite peccati, & titillatione; & inde fuisti nata ex procreatione
 ipsorum parentum, & tunc incepit tempus plenitudinis. Idè mense Sep-
 tembri nata fuisti, quando habetur fructuum plenitudo. Et sicut vinea
 crescit quotidianâ melioratione; sic tu, benedicta Virgo Maria, creuisti in
 vineam latiore & fructificasti in palmites, & emisisti propagines, id est,
 creuisti de virtute in virtutem, & de bono in melius, cum magna constan-
 tia & simplicitate.

2. Vinea vili discolori cortice tegitur; sic tu, Virgo Maria sacratissima,
 quia non habuisti in tui exterioris habitus qualitate, mutatoria pretiosa
 benè colorata: sed magis exemplo benedicti Filij tui fuisti pannosa, & na-
 tum tuum Filium inuoluisti vilibus panniculis; quod non fecisses, si præ-

tiosos habuisses. Spirituales cultores tui fuerunt inspiratio diuina, Patris potentia, Filij sapientia, Spiritus sancti disciplina, monitio Angelica, propria diligentia, & Patris ac Matris doctrina. Fuisti fossa veræ paupertatis, humilitatis dilectione: Humilitas enim profundauit mentem tuam, vt capax fieres totius bonitatis: Paupertatis amor exclusit à te appetitum totius terrenitatis, & vtraque virtus fecit te capaciore totius diuinæ largitatis.

Psal. 79.
15, 16.

Visitata fuisti in Angelica missione. Ideo orabas, *Respice de cælo, & visita vineam istam, & perfice eam, quam plantauit dextera tua.*

3. Tu, pijsissima Virgo Maria, extendisti, & extendis palmites tuos, id est, orationes, beneficia, & exempla vsque ad mare, id est, vsque ad existentes in qualibet amaritudine. Ego verò impijssimus peccator in amaritudine peccatorum sum. Adiuua me, dulcissima Virgo Maria, extende ad me palmites tuos, id est orationes & beneficia tua; vt ad illum perueniam, qui est vitis vera, in quo misericorditer fructum sempiternum reportem, per infinita sæcula sæculorum. Amen.

Contemplatio III.

De Eadem.

1. Inestimabilis est dilectio charitatis, quam Deus Pater misericordiarum, & Deus totius consolationis, humano generi exhibuit. Nam cum Deus propter nimiam charitatem, quæ dilexit nos, dederit nobis Vnigenitum suum, eadem charitate dedit nobis & te matrem ipsius benedicti Filij; quia sine te impossibile secundum legem ordinariam nobis erat habere Filium Dei incarnatum, quia tibi soli, Maria Virgo, tale priuilegium debebatur; & ideo de tua sanctissima Natiuitate longè antè dictum fuerat, *Egredietur virga de radice Iesse*: in quo designatur suprema humilitas tua, gloriosissima Virgo benedicta; quia non diceris egredi de stipite, sed de radice Iesse; quæ latet in humo, quia *Humilis* as dicitur quasi *Humi latens*. Nam sicut totum quod habet arbor, de radice procedit; sic, beatissima Virgo Maria, tota virtus tua, & excellentia, à tua humilitate processit, quam Deus respexit: *Respexit* namque *humilitatem Ancilla sua*, quasi radicem; ex hoc beatam te dicunt omnes generationes.

Isa. 11. 1.

Luc. 1.

Heb. 2.
16.

2. Tu, sanctissima Virgo, non fuisti Angelus, vt aliqui errando dixerunt; sed egressa fuisti de radice Iesse, cuius radix fuerunt Patres antiqui, de quibus Angelus natus non est; quia Christus *Angelos non apprehendit*, id est, naturam Angelicam, sed *semen Abrahæ apprehendit*, id est naturam humanam de semine Abrahæ in te V. Maria. Tu igitur, Virgo Maria, egressa es de radice Iesse, quod interpretatur *Incendium*, quia ignis radix

est incendij; & tu, sacratissima Virgo Maria, ex hoc, quod de incendio feruentissimæ charitatis, quam Deus Pater habuit ad genus humanum, data nobis fuit tua sacratissima Natiuitas ad saluationē, & ad exemplum. Ideo dicit Deus, *Gloriam meam alteri non dabo*. Gloriam meam, id est Filium meū, quia gloria Patris, est Filius sapiens, alteri non dabo, quā tibi Mariæ Virgini. De radice igitur Iesse processisti, clarissima & incomparabilis Virgo Maria, & sicut virga de radice egrediens, altior, rector, subtilior, humidior, flexibilior, viridior, pulchrior est, quā egrediens de stipite, vel de ramo: sic tu, virtuosissima Virgo Maria, altior fuisti, vitæ sanctitate, rector, charitate; subtilior, humilitate; humidior, pietate; flexibilior, obedientiā & compassione; viridior, fidelitate; pulchrior, castitate, & planior, simplicitate, omnibus aliis Sanctis.

3. Et, sicut tu, piissima Virgo Maria, excellis omnes in virtutibus; sic ego impiissimus excello omnes in peccatis. Sed per tuarū virtutum merita, te humiliter deprecor, vt tuis sanctis intercessionibus peccata mea deleas, gratiam tribuas, & ad æternam gloriam misericorditer me perducas. Amen.

Contemplatio I V.

De Eadem.

1. **D**ignissima omni laude, sacratissima Virgo Maria, de te possunt intelligi illa, quæ dicta sunt Noë à Deo; *Fac tibi arcam de lignis leuigatis; & bitumine lines intrinsecus & extrinsecus; & sic facies eam. 300 cubitorum erit longitudo arce. 50 cubitorum latitudo, & 30 cubitorum erit altitudo*. Tu, gloriosissima Virgo Maria, es illa arca, quam Deus Pater fieri ordinauit per Noë, id est, Filium tuum; quia Noë interpretatur *Requiescens*; per quem intelligitur benedictus Filius tuus, qui requieuit in vtero tuo virginali, & etiam in sepulchro. Fecit etiam te arcam, non solum sibi, sed etiam hominibus & Angelis, & toti Trinitati: quia omnibus omnia facta es: in qua fuerunt reconditi thesauri desiderabiles, & virtutum charismata; & fuisti omnium virtutum decore ornata.
2. Dignitas ortus tui ostenditur quantum ad progenitorum sanctitatem, cum dicitur, *De lignis leuigatis*, id est, politis & bituminatis. Fuerunt autem parentes, de quibus ortum habuisti, Virgo Maria, politi per honestatem conuersationis, quia nihil in eis fuit quod offenderet oculos intuentium, licet conuersarentur in medio nationis peruersæ, nam aspectu, auditu, opere, iusti erant: bituminati per feruorem charitatis. Mansiunculæ, fuerunt tres status, scilicet virginum, conjugatorum, & prælatorum, qui sunt in arca, id est, in Ecclesia. Sic etiam fuerunt in te, beata Virgo Maria; quia tu fuisti Virgo & conjunx, & habuisti quodammodò super benedictum Fi-

lium tuum quasi officium Prælati, & idcò de Filio tuo benedicto dicitur, *Et erat subditus illis.*

3. Fuisti linita bitumine intrinsecus & extrinsecus, scilicet quoad Deum & proximum, bitumine scilicet charitatis feruentissima, & indissolubilis. 300 cubitorum, id est, decor omnium virtutum fuit longitudo tua, & maxime fides, quæ dicitur longitudo dierum, id est, claritatis visionis diuinæ. Fuit in te latitudo charitatis, quæ extendebatur vsque ad inimicos; fuit etiam in te, beata Virgo Maria, altitudo, scilicet spes quæ vsque ad secreta Altissimi pertingebat: quia spes est certa expectatio beatitudinis futuræ, ex gratia & meritis præcedentibus proueniens.

4. O benignissima Virgo Maria, ob gaudium tuæ salutiferæ natiuitatis, quæ gaudium annuntiavit vniuerso mundo, impetra tuis sanctissimis orationibus à benedicto Filio tuo, pro me despicabili peccatore, gaudium cordis in præfenti, vt in futurum gaudium habeam sempiternum. Amen.

Contemplatio V.

De Eadem.

1. **A** B æterno, beatissima Virgo Maria, ordinata, prædestinata, & electa à Deo fuisti. Idcò de te canit sancta mater Ecclesia, *Ab initio & ante secula creata sum.* Fuisti significata à Sanctis Patribus quibusdam operibus. Præfigurata igitur fuisti in fenestra crystallina, quam Noë fecit in arca, quæ excluderat aquam in quantum fenestra; & illuminabat arcam in quantum crystallina, suscepta aliunde luce. Tu, beatissima Virgo Maria, fenestra fuisti, excludens aquam tribulationis generis humani, in qua erat ante ortum tuum, & illuminasti mundum tenebrosus luce inaccessibili, scilicet benedictio Filio tuo, qui est lux vera illuminans omnem hominem venientem in hunc mundum.
2. Fuisti à Sanctis Prophetis prænuntiata, *Egredietur virga de radice Iesse; & Consurget virga de Israël, & orietur stella ex Iacob.* Fuisti sanctissima Virgo Maria, à Patriarchis & Regibus generata: vnde de te canitur, *Natiuitas gloriosa Virginis Mariae ex semine Abrahæ, orta de tribu Iudæ,* quæ fuit dignior tribus vniuersis: de cuius stipite principes generati sunt. Fuisti benedicta Virgo Maria; in quibusdam sanctis mulieribus Testamenti veteris figurata: scilicet in virginitate Rebeccæ, de qua legitur quod erat *decora nimis, virgoque pulcherrima, & incognita viro,* & tibi Virgini Mariæ dicit David, *Concupiscet Rex decorem tuum,* id est virginitatem tuam. Fuisti, sanctissima Virgo, ad hoc, vt de te Christus carnem assumeret, à tota Trinitate præparata; oportebat enim vt Redemptor noster iustus esset cum Deo, mortalis cum hominibus; propterea decebat ipsum matrem habere

bere virginem, vt in matre mortali conciperetur mortalis, & in Virgine conciperetur iustus.

3. Fuisti etiam, pijsissima Virgo Maria, aquis Spiritus sancti ad fecunditatem irrigata: *Non enim pluerat Dominus Deus super terram; & homo non erat, qui operaretur terram, sed, sicut scribitur, fons ascendebat de terra, irrigans uniuersam superficiem terre.* Ita, Virgo Maria, fuisti ille fons, qui terram, id est, genus humanum aridum humore gratiæ irrigasti plenitudine gratiarum. Fuisti etiam, clementissima Virgo Maria, stella gratiæ orta; ideo de te scribitur, *Orietur stella.* Stella namque fuisti emittendo illum radium, qui totum mundum illuminauit. Illum, misericordissima Virgo Maria, exorare digneris, vt tenebras mentis meæ fugare dignetur, & eam illuminare gratiâ suâ, vt lumen æternum aspiciam per infinita sæcula sæculorum. Amen.

Contemplatio V I.

De Eadem.

Propheticum oraculum impletum est de te, singularissima Virgo Maria, videlicet, *orietur stella ex Iacob.* Tu, benignissima Virgo Maria, ^{Apo. 12. 16.} stella es, Fulgida, ratione puritatis; stella clara, ratione sanctitatis, & stella alta ratione dignitatis. Ideo de te ipsâ dicere potes, *ego sum stella splendida,* cuius sanctissimus ortus claruit ex operatione diuina, & operatione Angelica & operatione humana: claruit ex operatione diuina, quia per operationem Dei fuisti concepta: nam parentes tui, Ioachim & Anna ad senilem ætatem peruenerant, & per viginti annos simul steterant, nec prolem inde susceperant.

Tuus ortus claruit ex operatione Angelica; nam Angelus singulariter tuis parentibus te nuntiauit, & licet aliqui masculi fuerint parentibus per Angelos nuntiati, non tamen aliqua fœmina fuit nuntiata suis parentibus, nisi tu, gloriosissima Virgo Maria, quia Angelus apparens Patri tuo Ioachim, dixit: *Ego sum Angelus missus ad te, quia Anna uxor tua pariet tibi filiam, quam vocabis Mariam, ex qua nascetur Altissimi Filius.* Et sic sanctissimus ortus tuus claruit ex operatione Angelica. Claruit etiam ex operatione humana; & hoc ratione parentum, quia parentes tui, Virgo gloriosissima, fuerunt nobiles quoad mundum, quia descenderunt ex Regali genere Dauid. Propter quod cantat Ecclesia de te *Regali ex progenie Maria Natum.* ^{In festo B. Virg.} *exorta refulget.* Sacratissima Virgo Maria tui parentes fuerunt Sancti quoad Deum: legitur enim de Sanctis parentibus tuis, quod ambo erant iusti; & sine reprehensione in omnibus mandatis Dei, & ideo partus debebat esse iustus; quia *si radix sancta, & rami sancti.* Sic igitur claruit beatissimus ortus tuus ex operatione parentum; quia sunt nobiles quoad mundum, sancti quoad Deum. ^{Rom. II. 16.}

Kk

2. Sed, benignissima Virgo Maria, sicut tua sanctissima natiuitas gaudium attulit huic mundo, impetra mihi nefandissimo peccatori tuis sanctissimis deprecationibus, gaudium & remissionem omnium peccatorum meorum, & abundantiam gratiarum & bonorum operum; ut emundatus & purificatus ab omnibus vitiis & peccatis, lætus accedens ad regionem viuorum, gaudium obtineam sempiternum. Amen.



Contemplatio VII.

De Eadem.

1. **G**audium magnum attulit vniuerso mudo, gloriosissima Virgo Maria, tua sacratissima natiuitas, quia mundum iacentem erexisti tuâ immensâ bonitate, mundum illuminasti tuâ summâ claritate, & viam vitæ ostendisti, Solem iustitiæ modo singulari & mirabili patiando. Tu ex clara stirpe genita, humilitatem profundam in tuis moribus excellenter demonstrasti, & hoc tibi honorem tribuens, matrem Filij Dei te fecit; quia respexit Deus humilitatem tuam; tu maledictum legis non formidâs, Deo virginitatem prima vouisti, quam ante partum, in partu, & post partum mente & corpore inuiolabiliter obseruasti. Atque incepit dignitas virginis. Tu primitias tuæ sanctissimæ iuuentutis Deo obtulisti, quia triennio tuæ ætatis completo, Templum ascendisti; nec inde recessisti, sed ibi Deo crebris orationibus, contemplationibus, ieiuniis & vigiliis, indefesso animo seruiuisti. Per Euam cecidimus, & per te stamus; per Euam prostrati sumus; & per te erecti sumus. Per Euam seruituti dati sumus, & per te liberi facti sumus. Eua pœnam intulit nobis, & tu salutem nobis attulisti.

2. Tua sanctissima natiuitas fuit purissima, quia prius fuisti sancta quam nata. Hæc beata natiuitas tua fideles illustrauit, salutem credentibus dedit. Tu ornata culmine virtutum in tua sanctissima natiuitate modum debellandi hostes humani generis, virtuosè & exemplariter ostendisti, & homines docuisti. Fuisti insuper in tua beatissima natiuitate stella matutina, dirigens in huius mundi pelago viatores, illos ab erroris semitâ reuocando. Fuisti aurora splendida atque lucens, quia sicut aurora, quæ est media inter noctem & diem, fugat tenebras, & lumen demonstrat, sic tu, sacratissima Virgo Maria, in tua sanctissima natiuitate inter noctem vitiorum & diem virtutum fugando vitia; diem virtutum, scilicet Filium tuum benedictum de proximo in te venturum indicasti. O beata natiuitas, reliquarum festiuitatum origo, quæ enim cunctis solemnitatibus est antiquior tempore, nequaquam debet esse inferior dignitate. O natiuitas gloriosa, natiuitas pretiosa, natiuitas præcellas, natiuitas fulgida, natiuitas omni puritate nitens, & decora. Per te infirmi habeant Medicum salutis; elisi, subleuatores; ignari, Doctorem; pigri, sollicitatores; pauidi, confortatores; afflicti, consolatores; indigentes, auxiliores; somnolenti, excitatores; debiles, sustentatores.

rem: oppressi, defensorem; pauperes, protectorem; amici, delectatorem & peccatores intercessorem.

3. O beatissima Virgo Maria, hæc & multa alia mihi attulit in te & per te tua beatissima natiuitas. Digneris igitur mihi peccatori à beatissimo Filio tuo Domino nostro Iesu Christo impetrare, vt cum iucunditate eam recollam, cum deuotione ad memoriam eam reducam, cum humilitate eam in corde habeam, cum gratiarum actione, mente & ore eam referam; nec à memoria mea discedat, vt tuis piis intercessionibus mundatus ab omni crimine, nasci valeam in æternam gloriam, & tibi viuere per infinita sæcula sæculorum. Amen.

Contemplatio VIII.

De Eadem.

1. **E**xcellentia tuæ natiuitatis, beatissima Virgo Maria, causatur ex generis claritate, quia descendisti à personis clarissimis, scilicet à stirpe Patriarchali, nimirum Abraham; & ex stirpe Regali, nimirum David Regis; & idè de te, Virgo Maria, cantat Ecclesia, *Natiuitas Virginis In festo Maria ex semine Abrahæ, ora de tribu Iuda, clara ex stirpe David.* Descendisti etiam, Virgo Maria, ex stirpe Prophetali, id est, ex stirpe Sacerdotali, quia fuisti cognata Elizabeth vxoris Zachariæ, qui fuit de tribu Leui, & Elizabeth de filiabus Aaron. *In festo Natiuit. Virg. M.*

2. Causatur tua sanctissima natiuitas, clarissima Virgo Maria, ex omni virtute tam in morum compositione, quàm in virtutum possessione: in te namque velut in speculo refulgent mores & virtutes; à te recipi debet exemplum bonè viuendi; quia tu exemplares, & magistra probitatis, & bonitatis, & quid corrigere, quid effugere, & quid tenere & seruare quis debeat, tu gratiosè ostendis; de te enim scribitur: *in me est omnis gratia via & veritatis; in me est omnis spes vite & virtutis.* Præcipua autem tua virtus omnium virtutum fuit virginitas cum fecunditate, & fecunditas cum virginitate: præcedentem autem natiuitatem carnis coniunxisti cum claritate morum, & virtutum. Idè es super omnes, post benedictum Filium tuum, laudibus extollenda. Causatur etiam, Virgo Maria, tua Natiuitas ex diuinæ imaginis impressione; quia sacratissima Virgo Maria imaginem Dei in te illibatam seruasti; nec aliam imaginem superinduxisti; non iracundiæ quia fuisti mitissima; non superbiæ, quia fuisti humillima; nec luxuriæ, quia fuisti castissima; nec auaritiæ, quia fuisti pauperrima. Idè de te scribitur, *assitit Regina i dextris tuis in vestitu deaurato*, id est, in corpore glorificato nobilis, *circumdatus varietate*, id est virtutum multiplicitate. Idè sequitur, *concupiscet Rex decorem tuum*, id est, nobilitatem imaginis, quia tuum decorem Dominus plurimum concupiuit. *Eccl. 2. 4. 25. Psal. 44. 10. Ibid. 12.*

3. Sed heu! Virgo Maria hanc imaginem in me ipso corrumper per peccatum, & alienam imaginem superdixi. Succurre mihi; benignissima Virgo Maria, & intercede pro me apud tuum Filium benedictum; ut imaginem quam miserabiliter deformavi, in me reformet, & mihi vitam concedat æternam. Amen.



P A R S I V.

DE NOMINE GLORIOSÆ
VIRGINIS Mariæ.

Contemplatio I.

De Nomine Gloriosæ Virginis Mariæ.

1.



O C A B I T U R tibi nomen nouum, beatissima Virgo Maria, quod os Domini nominauit, scilicet Filius Dei, qui est os Patris; Per Angelum nominauit, scilicet, gratia plena. Postea verò nomen Mariæ expressit, dicens, ne timeas Maria.

Isa. 62.

2.

Luc. 1.

30.

Philip. 2.

10. 11.

Dedit namque tibi Virgini Mariæ tota sancta Trinitas, nomen, quod est super omne nomen, post nomen benedicti Filij tui; Ut in nomine tuo omne genus sicutatur, celestium, terrestrium & infernorum. Et omnis lingua confiteatur huius sanctissimi nominis gratiam, gloriam, & virtutem. Non enim est aliquid aliud nomen datum sub cælo hominibus, post dulce nomen Iesu, ex quo tanta salus hominibus refundatur. Quia plusquam omnia Sanctorum nomina, post sacratissimum nomen Filij tui, nomen tuum reficit lapidos, languidos sanat, illuminat cæcos, penetrat duos, recreat fessos, vngit agonistas & putrefacit iugum diaboli.

2. Fama tui sanctissimi nominis, clarissima Virgo Maria, prius clausa fuit, quandiu morata fuisti in mundo; sed post Assumptionem tuam ad cælum, diuulgata fuit per omnia mundi climata. Nam in prædicatione Apostolorum, in omnem terram exiuit sonus sanctissimi tui nominis, & manifestum fuit toti mundo. Tantæ virtutis & excellentiæ est tuum sanctissimum nomen, beatissima Virgo Maria, quod ad inuocationem ipsius cælum ridet, terra lætatur, Angeli congaudent, dæmones contremiscunt, & infernus turbatur. Tanta est virtus tui sanctissimi nominis, benedicta Virgo Maria, quod

mirabiliter emollit & penetrat duritiam cordis humani: idè scribitur, *lucerna Domini spiraculum hominis, quæ inuestigat omnia secreta ventris* sic *Prov. 20* etiam tibi possumus dicere, lucerna Domine, id est, Mariæ, quæ *illuminat* *17.* *trix & Domina* interpretatur, *spiraculum hominis*; quia peccator per te respicit in spe veniæ & gratiæ: quæ *inuestigat*, id est inuestigare facit *omnia secreta ventris*, id est, abscondita cordis.

3. O misericordissima Virgo Maria, ego sceleratissimus peccator, talis sum & talem me feci, quod nomen meum præ confusione non audeo nominare: quia nomen Christiani habebam, sed nunc habeo nomen peccatoris, quia opera Christiani non feci, sed potius opera peccatoris. Adiuuare me digneris, piissima Virgo Maria, ut nomen Christiani, re & nomine habeam; & sic perseverando, vitam obtineam sempiternam. Amen.

Contemplatio II.

De Eodem.

1. **O**leum effusum nomen tuum, sacratissima Virgo Maria, idè *adolescentula dilexerunt te nimis*. Oleum, id est tu, sacratissima Virgo Maria, quæ nominaris oleum, maxime propter misericordiam effusam extra vas tuum, cuius vas est ipse Christus; cuius plenitudinem accepisti, & nobis de tua plenitudine gratiam pro gratia refudisti. Nomen tuum, beatissima Virgo Maria, comparatur oleo propter viriditatem, quia memoria nominis tui, est in generationes sæculorum: Nam in virore, perseverantia & diuturnitas designatur. Deuota etiam huius nominis inuocatio & recordatio, ducit ad virorem gratiæ in præsentem, & ad virorem cælestis gloriæ in futuro.

2. Oleum est calidum ab effectu; sic deuota nominatio tui nominis, mirabiliter accendit ad amorem. Idè de te canitur, *ô magna, ô pia, ô multum amabilis Maria*. Tu ne quidem nominari potes quin accendas, nec recitari quin recrees affectus diligentium te. Tu nunquam sine dulcedine diuinitus tibi insitâ, piæ memoriæ portas ingrederis. Oleum pingue est: sic nomen tuum, Virgo Maria, subministrat deuotionis & gratiæ pinguedinem amanti tuo, ut dicere possit, *impinguiasti in oleo gratiæ & deuotionis caput meum*, id est, mentem meam. Oleum, liquor suavis est; sic nomen tuum, Virgo Maria benedicta, suaue est per benignitatem; quia nomen tuum muliebre est mansuetudinem proferens, & commendans. Oleum recreat, sic nomen tuum gloriosissima Virgo Maria, recreat fessos & laborantes: Idè dicis cum Filio tuo benedicto, *venite ad me, qui laboratis, & onerati estis & ego reficiam vos*. *Matth. 11. 28.*

3. Oleum pascit & impinguat: sic nomen tuum, amantissima Virgo Maria, mirabiliter pascit affectum, & impinguat per deuotionem; & quoties

eius recordamur, toties roboramur. Oleum medicatur; nam si vulnus oleo perungatur, oleum non permittit cicatricem obduci, donec sanies sit abducta: nec tua benignitas, in tuis amatoribus, conscientiam permittit putrificari, donec per confessionem putredo vitij sit eiecta. Tu siquidem es illud oleum misericordiae, quod verus Samaritanus, id est Iesus Christus, infudit vulneribus fauciari, id est, generis humani, per prauaricationem primae matris, de Ierusalem in Ierico descendentis.

4. O piissima Virgo Maria, vulneratus sum lethaliter vulneribus multis peccatorum: infunde oleum tuae misericordiae, vt sanie peccati educta aeternam obtineam sanitatem. Amen.

Contemplatio III.

De Eodem.

- Pro. 12. 1.* **M**elius est nomen bonum quam diuitiae multae, & quam pretiosa unguenta. *1.* Ista scripta sunt de te, pretiosissima Virgo Maria, quia sanctissimum nomen tuum, longè melius est quam diuitiae corporales; quia angustias releuat paupertatis, & dolori peccatorum medetur, *melius est quam unguenta pretiosa*: Nam, si quis pauper est, confugere debet ad beatissimum nomen tuum, & inueniet te pauperrimam, & si deuorè attendat, reperiet te de hac paupertate exaltatam etiam super Angelos, si peccator ad nomen tuum benedictum confugiat, ipsum solum sufficit ad medendum: Nulla enim pestis est tam efficax, & nulla sic hæret, quæ ad nomen tuum gloriosissimum non cedat continuo.
- Cant. 6. 3.* 2. Si quis iustificatus est, sed fortè tentatur acriter, & eò ampliùs tentatoris timet insidias: si recordatur, quod turris fortissima est nomen tuum, saluabitur, quia non solum potens es ad adiuuandum confugientes ad te turrim fortitudinis, sed ad oppugnandum hostes, nos insequentes, quia *terribilis es contra eos, vt castrorum acies ordinata*: & non ita metuunt hostes visibiles quamlibet castrorum multitudinem copiosam, sicut hostes inuisibiles tuum potentissimum nomen, vt præsentissimum auxilium extemplo namque cedunt, & pereunt *sicut cera à facie ignis*, vbicumque inuenerint tui sanctissimi nominis assiduâ recordationem, deuotam inuocationem, & sollicitam imitationem. Benedicta Virgo Maria, tui sanctissimi nominis excellentiam beatus Lucas reuerenter expressit, *Missus est* (inquit) *Gabriel Angelus ad Virginem, cui nomen Maria*. Non dixit sicut de aliis, sed tanquam diuinitus expectatum, tandem prout cum pondere: dicens, & *nomen Virginis, Maria*: ostendens, tuum nomen pretiosum multum habere eruditionis, & gratiae, & altius memoriae commendandum, & diligentius inuestigandum.
- Luc. 1. 26. 27.* 3. O gratissima Virgo Maria, nomen tuum saluificum inuocatum est super nos, ne derelinquas nos Domina, quia nomen tuum interpretatur *Domina*, sit nobiscum semper nomen tuum, & in ore, & in corde, & præcipue mecum,
- Ierem. 14. 9.*

DE BEATA VIRGINE. 259

quia nimis ab hostibus infestor. Expugna illos per virtutem tui nominis
sed & esto mihi *turris fortitudinis à facie inimici*, & vt hoc facilius concedere *Pf 60. 4*
digneris, nomen tuum benignissimum vt *memoriale in desiderio anime*, & *Isa. 26. 8*
iugi memoriâ teneam; & ore & corde ipsum laudem, & benedicam in sæ-
cula sæculorum. Amen.



Contemplatio I V.

De Eodem.

1. **T**anta est magnificentia & excellentia tui gloriosi nominis, Virgo
Maria, quòd in Canticis in persona Angelorum de te quæritur, *que Cant. 4.*
est ista? Non tantum, quia personæ mirarentur excellentiam, quæ nec pri- *9. 8. 5.*
mam similem visa est, nec habete sequentem, sed, forsitan quia dulce nomen
sibi desiderant responderi: sicut cum antiquis Patribus Isaac, & cæteris,
nomen Dei in desiderio erat, ita scilicet inter homines nomen tuum sanctis-
simum desiderabant nominari, & notitiam effundi vt non intra terræ ter-
minos clauderetur, sed etiam celebre haberetur in cælis. Vnde beatus Lu-
cas publicauit sanctissimum nomen tuum, dicens, *nomen Virginis Mariae*, *Luc. 1.*
Vnde antè immediatè jungitur tibi Mariæ virginitas, eo quòd non solum *27.*
nomine præferas, sed etiam alijs præbeas gratiam castitatis; ita etiam no-
mini tuo sanctissimo, virginitas & sanctitas, inseparabiliter sunt adjunctæ.
2. Quare cum agit beatus Lucas de pœnitentia Magdalene, propter no-
minis tui reuerentiam non ausus fuit eam nominare Mariam, sed mulie-
rem. Et paulò post cum dixit eam justificatam, Domino de suis facultati-
bus ministrare, vocat eam Mariam, & Sufannam, & Ioannam adjunxit,
quæ beatæ sunt, quia Domino de suis facultatibus ministrauerunt. At tu,
Virgo Maria, longè beator es. Quia tu sola, & prædictarum trium voca-
bula de te interpretantur, & eorum officium exercuisti, ibi Maria, hîc Maria,
Sufanna verò interpretatur *lilium*; & nulli alijs meliùs conuenit quàm tibi,
quæ præmium meruisti castitatis. Ioanna interpretatur *gratia Dei*; nulla au-
tem dignior hoc nomine quàm tu, quæ plena gratiâ fuisti. Illæ Domino de
terrenis facultatibus ministrauerunt; tu, Virgo Maria, illi ministraisti de car-
ne propriâ conceptum, & de proprio lacte virgineo nutritum, vnde
beatificauit te illa, quæ dicebat ad Dominum; *Beatus venter qui te portauit*, *Luc. 1.*
& *vbera quæ suxisti*. *27.*
3. Quòd si beatificabat te mulier, quæ adhuc carni & sanguini tuo com-
municare non meruit, longè magis à nobis beatificanda es, qui de tua carne
& sanguine reficimur in Altari. Caro enim, quæ ibi fumitur, de carne tua
est; de cuius carne assumpta est portiuncula (vt à multis dicitur) de qua
artificio Spiritus Sancti, formatum est corpus Christi, quem exorare di-
gneris, piûssima Virgo Maria, vt sicut illum per fidem hîc agnosco in via,
sic per speciem apprehendam in patria. Amen.

Contemplatio V.

De Eodem.

1. **S**icut beatissima Virgo, nomen benedicti Filij tui effunditur in diuersa nomina, quia vocatur nomen eius, *Admirabilis, Consiliarius, Deus fortis, Pater futuri saeculi; Princeps pacis*, sic & nomen tuum dulcissimum per suas interpretationes potest conuenienter effundi. Interpretatur enim Maria, *Domina, Mare amarum, Illuminata, Illuminatrix, & Illuminans*. Interpretatur *Domina*; & sic fuit in benedicti Filij tui oblatione, quando ipsum praesentasti in Templo, vbi totus conueniebat mundus, quasi totum mundum volens de ipso mittere in possessionem & saluam: quod etiam designat tua imago Filium tenens, quasi ad dandum; Tu *Domina*, quia Anna genuit te Mariam, id est, gratiae Dominam; Tu Virgo Maria, omnium creaturarum facta es *Domina*, Creatoris omnium Mater existens; Tu *Domina*, quia nos protegis, tamquam turris fortissima, & aduersarios nostros reprimis, & expugnas, velut castrorum acies ordinata. Nomen tuum benedictum, interpretatur *Mare amarum*, & hoc in gloriosissimi Filij tui passionem, quando animam tuam sanctissimam pertransiuit doloris gladius.

Luc. 2. Longe enim plusquam martyr es censenda; quia in te passionis sensum excessit compassionis affectus.

2. Nomen tuum sanctissimum interpretatur *Illuminata*, scilicet à *Patre luminum*, à quo descendit omne datum optimum ex cuius dono tot habuisti in te luminaria, quot virtutes; & ita hoc nomen tibi singulariter & excellenter conuenit, quia praeter omnibus post benedictum Filium tuum dona habuisti gratiarum. *Illuminata* etiam fuisti per gratiam Spiritus sancti, quando in utero sanctificata es, & quando idem Spiritus sanctus superuenit in te; fuisti etiam illuminata à Filio Dei vero Sole iustitiae, in illius conceptione, quem totum in corde, totum suscepisti & portasti in tuo utero virginali. Nec potuisti esse non *illuminata*, quia fontem luminis suscepas in te totum. Ideo *Mulier amicta Sole*, appellaris, & diceris *Luna*, quae totum lumen suum à Sole recipit; tu etiam operaris tamquam ex Sole, & respectu Diuinitatis, benedicta praedicaris à generationibus vniuersis, vnde dixisti quia respexit humilitatem ancilla sua: & sic à Sole *illuminata* es; & ex hoc beatam te dicunt omnes generationes, & in hoc est Lunae pulchritudo, & lumen.

3. O misericordissima, & benignissima Virgo Maria, ego iniquissimus peccator ad tuam pietatem venio; eam humiliter exoro, vt nomen tuum sanctissimum interpretetur in me; sis mihi *Domina*, comprimendo tentationes, & aduersarios meos compescendo; sis mihi *Mare amarum*, amarificando in me noxias mundi delicias: sis mihi *illuminata*, regendo me per vias periculosas huius mundi, vt claritatem interminabilem percipiam in aeternum. Amen.

CON-

Contemplatio V I.

De Eodem.

1. **B**eatissimum nomen tuum, sacratissima Virgo Maria, interpretatur *Illuminatrix*; quia postquam dicta fuisti *Pulchra ut luna*, etiam dicta fuisti, *electa ut Sol*, quia sicut Sol radijs suæ claritatis illuminat mundum, sic, sanctissima Virgo Maria, tuis virtutibus & exemplis populum irradias Christianum. Idèò dicis de te ipsà, *illuminabo omnes sperantes in Domino*, alios nequaquam. Tu enim, illuminas Ecclesiam militantem, significatam per arcam Noë, quam illuminabat fenestra crystallina figurans te, Virgo Maria. Illuminas etiam triumphantem, idèò dicis, *Ego feci ut in cælo ori- retur lumen indeficiens*; propter hoc de te canitur, *cujus vita inclya cunctas illustrat Ecclesias*, id est, militantem, & triumphantem. Tu es post benedictum Filium tuum vera lux, quæ illuminat omnem hominem venientem in hunc mundum: quia de te potest dici, *Aedi te in lucem gentium*; & ad hoc significandum, medià nocte peperisti lucem veram, ut mediante partu tuo gloriosissimo, illuminares populum in tenebris ambulantem.

2. Tu es lumen oculorum, & pax, & illuminatrix nostra, benedicto Filio tuo mediante, qui fecit lutum ex sputo, quo illuminavit cæcum natum; in quo latet maximum Sacramentum: Nam salua descendens de capite Iesu, Dei Sapientia est, quæ dicit, *ego ex ore Altissimi prodii*; ex hac salua & naturæ humanæ terra confectum est collyrium, quo illuminatum est genus humanum, designatum per cæcum illum, per fidem scilicet Verbi Incarnati, unde canitur. *Et caro nostra lutum. Verbi Sapientia sputum. Et genus humanum, tali medicamine sanum*. Tu purissima Virgo Maria, interpretaris *illuminans*; quia illuminas servitores, & amatores tuos documentis, meritis, & exemplis. Docuisti etiam Apostolos & Evangelistas, maxime beatum Lucam; quia Evangelium à te didicit, præsertim in principio. Impetras etiam peccatoribus tenebrosis à benedicto Filio tuo gratiam, per quam illuminantur ad excludendum vitia, & ad exercitium virtutum.

3. O beatissima Virgo Maria, mens mea est tenebrosa propter multitudinem peccatorum. Illumina eam igne charitatis, ut tuum Filium benedictum & te diligam; corde perugili & humili serviam; laudes, & gratiarum actiones, de beneficijs impensis referam; ut Lumen luminum videam per infinita sæcula sæculorum. Amen.

Contemplatio VII.

De Eodem.

1. **O** Admirabile, & superlaudabile nomen tuum, Virgo Maria, à Deo tibi impositum, & ab Angelo tuis Sanctis parentibus nuntiatum. Virgo Maria, ad nomen tuum ciues cœlestes lætantur, infernus tristatur, dæmones contremiscunt, mundus congaudet, & peccatores gloriantur. Virgo Maria, post Iesum, nomen tuum est *super omne nomen; ut in nomine tuo omne genua flectatur, cœlestium, terrestrium, & infernorum.* Virgo Maria nomen tuum *stella maris* nuncupatur, quia dirigis in hac misera peregrinatione peccatores; errantes per devia, reducis ad viam; & viarum discrimina ostendis, & defendis viatores. Virgo Maria, nomen tuum admirabile est in vniuersa terra. *Mare amarum* interpretatur, hoc est poenitentia quæ appropinquare facit ad regnum cœlorum; quia corpus extenuat, animam virtutibus impinguat, mores componit, peccata delet, virtutes ministrat, mundum despicit, cœlestia petit, seruitium Deo præparat, carnem spiritui subjungit, inimicos debellat, & vincit, diuitias temporales contemnit, spirituales amplectitur, mortem non timet, vitam futuram requirit. Nomen tuum, gloriosa Virgo Maria, prædicta significat. Sed quid amplius, Virgo præclarissima? dæmones effugat, aufert pericula, homines à malis præseruat futuris, dona homini plurima confert. O nomen excelsum! nomen in ore dulce in corde dulcius, & in opere dulcissimum, nomen suauis bonis, nomen asperum malis; nomen magni gaudij, & exultationis; nomen magnæ lætitiæ, & consolationis; nomen magnæ melodiciæ, & iucunditatis; nomen solatiij, & securitatis; nomen magni tripudij, & jubilationis; nomen magnæ gloriæ, & humilitatis, nomen gratiæ & contemplationis; nomen magni consilij, & meditationis; hoc nomen pretiosum & omni laude dignissimum, tibi & non alteri ita bene conuenit, Virgo salutarifera, tibi debetur, te decet, tibi adaptatur, tibi appropriatur; quia nomen debet esse consonans rei. In te namque est omnis virtus, omne bonum; & à te perpetua animæ nostræ salus dependet. Quos odisti, Deus odit; quos diligis, Deus diligit. Tibi arca diuinæ misericordiæ commissæ est: claudis & aperis, quando placet; thesauri misericordiæ dispensatrix es.
2. O nomen beatificum, non recedas à me: quamuis sim maximus peccator, sis semper laudabile in ore meo, in cogitatione, & in omni opere: dormiam aut vigilem, comedam aut jejunem, semper te laudem. Te magnificem semper, te extollam, & semper te benedicam, operetur in me misero peccatore tua magna patientia, gloriosa Virgo Maria, qui pollutus labijs nomen tuum benedictum nomino: Munda me tuis sanctis precibus, & meritis ab omnibus inquinamentis meis; ut te & nomen tuum gloriosissimum honorificem, hîc & in futuro, per infinita sæcula sæculorum. Amen.

P A R S V.

DE GRATIIS GLORIOSÆ
VIRGINIS Mariæ.

Contemplatio I.

De Gratia Virginis Mariæ.



INVENISTI gratiam apud Deum, dulcissima Virgo Maria, ^{Luc. ii 30.} gratiam, inquam, corporalem, quia fuisti virginitatis primiceria, sine corruptione fecunda, sine grauedine grauida, & sine dolore puerpera. Inuenisti gratiam mentalem, Virgo Maria, quia fuerunt in tua mente deuotio humilitatis, reuerentia pudoris, magnitudo credulitatis, & martyrium cordis. Inuenisti, Virgo Maria, gratiam cœlestem, quia fuerunt in te sanctificatio in matris utero, Angelica saluatio, Spiritus sancti superuentio, & Filij Dei Conceptio. Sed qualiter, Virgo præclarissima Maria, istas gratias inuenisti? certè benedicta Virgo Maria, sicut Eua gratiam amisit per superbiam, inobedientiam, curiositatem vanam, ita tu per oppositum gratiam inuenisti: per meritum humilitatis, quam habuisti quando *Ancillam* te nominasti: per meritum obedientiæ, quam Deo exhibuisti quando dixisti, *Ecce Ancilla Domini, fiat mihi secundum verbum tuum*, Nam Eua occidendo obfuit, sed tu, benedicta Virgo Maria, viuificando profuisti: quia pro inobedientia commutatur obsequium, & fides pro perfidia compensatur: per meritum etiam solitudinis reparatur curiositas. Non enim fuisti curiosa, sed Deo & tibi vacasti: vnde Angelus te non inuenit in foro, non in platea.

2. Has autem gratias, humillima Virgo Maria, non tantum propter te inuenisti, sed etiam propter nos, vt multipliciter nos iuuares, & ideo adiuuas in vita præsentis tam bonos quam malos; bonos in gratia conseruando, vnde cantamus *Maria Mater gratia*, malos ad misericordiam reducendo: ideo dicitur, *Mater misericordia*. Adiuuas etiam in morte, ab insidiis Diaboli protegendo, ideo subditur, *tu nos ab hoste protege*. Adiuuas quoque post mortem animas suscipiendo, & eas in cœlum deducendo, & ideo subidfertur, *Et hora mortis suscipe*. Adiuuas etiam tribulatos, dans eis

Eccl. in Hymno Memen. salutis. Ibid.

Ll ij

patientiam; tentatos, dans eis victoriam, & in Dei amore famelicos, dando eis refectionem aeternam.

3. O benignissima Virgo Maria, peruersum & iniquum peccatorem me sentio tentatum & prostratum ab inimicis meis, quibus in multis peccatis consensum præbui, & opere compleui. Adjuua me, clementissima Virgo; da patientiam in tribulationibus, victoriam in tentationibus, da penitentiam agere de commissis: impetra indulgentiam de præteritis, & præsentibus, & da fortitudinem resistendi in futurum, vt sic veniam in præsentibus, & gaudium obtineam sempiternum. Amen.



Contemplatio I I.

De Gratia Virginis Mariæ : sine alicujus contrarij admixtione.

Non sufficit per se cor humanum, gloriosissima Virgo Maria, cogitare tuam puram gratiam, quam habuisti sine alicujus contrarij admixtione. Sancti namque Viri in vita præsentibus, & si habebant gratiam, eam habuerunt cum admixtione, vel timoris, vel doloris, vel laboris. Timent enim an sint in gratia aut odio, aut ne cadât à gratia; quia scriptum est, *qui se existimat stare, videat ne cadat*. Tu verò gratissima Virgo Maria, non habuisti istam admixtionem timoris; quia certissima eras, te gratiam habere: quia Angelus, qui mentiri non potest, hoc tibi dixerat; *ave, inquit gratia plena*; sciebas etiam, Virgo Maria, te à gratia cadere non posse, ita vt dicere posses, *Vsq̃ue ad futurum seculum non desinam*.

2. Sancti etiam habuerunt hanc gratiam, cum admixtione laboris; quia oportet eos laborare multum ad sensualitatem domandam, & rationi subijciendam; prout Paulus dicebat, *castigo corpus meum, & in seruitutem redigo*. Sed tu, pretiosissima Virgo Maria, istam admixtionem laboris non habuisti, quia nullos motus rationi contrarios vnquam persensisti. Ictus impugnationis nunquam pertulisti; Imò caput serpentis contriuisisti. Sancti etiam habuerunt & habent gratiam cum admixtione doloris, quia vident se multos defectus habere. Et si aliquis se defectum habere non crederet, tunc ipse omnes haberet, nam omnia illi defunt, quando nihil sibi deesse putat, sed tu, speciosissima Virgo Maria, istam admixtionem doloris non habuisti; quia nullus defectus gratiæ in te fuit, sed omnes gratias, & omnes virtutes habuisti. Habuisti namque in ore, gratiam affabilitatis; in ventre, gratiam deitatis; in corde gratiam charitatis; in manu, siue in opere, gratiam misericordiæ, siue largitatis; & sicut in mari est plenitudo aquarum; quatum nec fundum potest aliquis inuenire, neque mensurare; sic, sanctissima Virgo Maria, in te est omnis plenitudo omnium gratiarum im-

mensurabilis, quam profundare non potest intellectus humanus.

3. O benignissima Virgo Maria, ego sceleratissimus peccator, abjeci à me frequenter gratiam mihi à Deo benignè concessam, & introduxi miserabiliter multa vitia & peccata; succurre mihi, pijsissima Virgo Maria; exora continuè gloriosissimum Filium tuum, pro me iniquissimo peccatore, ut meos reatus deleat, & gratiam mihi conferat, hinc benè viuendi, & in futuro gloriam sempiternam. Amen.



Contemplatio III.

De pulchritudine Gratiæ Virginis Mariae, sine defectu & diminutione.

1. Plenam gratiam sine aliquo defectu & diminutione habuisti, intempera-
ta Virgo Maria, quia omnibus gratijs vniuersaliter plena fuisti; Magnum quippe est habere potentiam receptiuam gratiæ, quam habent peccatores, dum sunt in mundo, sed eà carent damnati in inferno. Istud est illud magnum chaos, quod est inter nos & eos, scilicet impotentia ad gratiam recipiendam. Majus est habere guttam gratiæ sicut habent Boni, dum adhuc sunt imperfecti; & ista gutta gratiæ valet ad bonorum operum fecundationem, ad vitiorum refrigerationem, & ad sitis mundanæ extinctionem; quia qui biberit de fluuiio Paradisi, cujus gutta major est Oceano, restat ut in eo sitis hujus mundi penitus extincta sit.

2. Maximum est habere plenitudinem gratiæ, quam habuerunt & habent viri perfecti, de quibus dicitur, *Repleti sunt omnes Spiritu sancto*; & ista plenitudo gratiæ valet eis ad salutem acquirendam; ad fiduciam de Deo obtinendam, & ad consolationem mundanam obliuioni tradendam. Per maximum est habere fontem gratiæ, quam habuerunt & habent Sancti; & iste fons eos viuificat; *Quoniam apud te est fons vitæ*. Supermaximum est habere non tantum potentiam receptiuam gratiæ, non tantum habere guttam gratiæ, non tantum habere plenitudinem gratiæ, non tantum fontem gratiæ, sed etiam fluuium gratiarum omnium: Isto namque modo habuisti gratiam plenam; & ideo de te dici potest quod tu es *fons hortorum, puteus aquarum viventium*; in quantum peccatores mortuos viuificas à peccato. Tu es fluuius vadens cum impetu, in quantum lætificas Ciuitatem Dei.

3. O beatissima Virgo Maria, dum meipsum aspicio oculo mentali, vacuum me sentio gratiæ diuinæ, & hoc solum, quia ad eam recipiendam non me disposui; carnem meam miserabilem dominari permisi, mundum & eius oblectamenta secutus fui, hosti antiquo consensum præbui, & sic gratiam diuinam repuli, neque ei locum parauit. Auxiliari mihi digneris, mi-

Llij

fericordissima Virgo Maria, ex plenitudine gratiæ tuæ guttam super me effunde, orando tuum potentissimum Filium, ut delicta mea deleat, & gratiam mihi tribuat, & in fine gloriam sempiternam. Amen.



Contemplatio IV.

De Superplenitudine gratiæ Virginis Mariæ.

1. Sicut Sol super bonos & malos oritur indifferenter; sic tu sacratissima Virgo Maria, præterita merita non discutiens, clementissimam & exorabilem te exhibes, ac omnibus necessitatibus liberaliter subuenis; quia habuisti gratiam superplenam cum larga & plena diffusionem. Tuam namque gratiam sensit infernus, quia mediante te expoliatus fuit; sensit terra, quia mortuos reddidit; sensit cælum, quia sese aperuit; senserunt Angeli, quia fuerunt reparati, senserunt peccatores, qui fuerunt iustificati. Tantâ namque plenitudine gratiarum infusa fuisti, ut copiosissimè affluere circumquaque. In te namque Deus totius gratiæ plenitudinem posuit, ut si quid in nobis fuerit gratiæ vel salutis, à te redundare sciamus.

Luc. I.
20.

2. Tu enim, sanctissima Virgo Maria, habuisti gratiæ inuentionem; idè dicit tibi Angelus, *inuenisti gratiam apud Deum*. Sed, gloriosissima Virgo Maria, inuenisti gratiam, quam quærebas, inuenisti namque gratiam, quam ante te inuenire non potuit quisquam, videlicet gratiam apud Deum, Dei & hominum pacem, mortis destructionem, peccatoribus veniam, iustis gratiam, Angelis lætitiâ, tentatis fortitudinem, debilibus firmitatem, lapsis releuationem, periclitantibus adiutorium, & liberationem, exulibus patriam, ægris medelam, pusillis corde robur, & tribulatis consolationem.

3. O suauissima Virgo Maria, quantam gratiam inuenisti apud Deum! gratiam supereffluentem, gratiam singularem, gratiam generalem: gratiam singularem, quia sola hanc meruisti plenitudinem; generalem, quia de tua plenitudine accipiunt vniuersi. Singulariter quidem fructus benedicti ventris tui ad omnium mentes, te mediante peruenit. Possunt igitur peccatores, Virgo Maria, ad te recurrere, & securè dicere tibi; redde nobis gratiam, quam pro nobis inuenisti; quia nisi nos peccatores fuissetis, tu Mater Dei non fuissetis, & idè talem gratiam non inuenissetis. Tribue nobis miseris, & præcipuè mihi indignissimo peccatori, qui plus cæteris indigeo, Virgo Maria, tuam gratiam, & quanto plus dederis, tantò magis pleam eris; numquam enim tua gratia arescit, numquam decreuit: Imò est sicut amor, qui semper in suo fluxu crescit, & fluendo augetur; hanc mihi tribue, & tuum Filium benedictum exora, ut mihi concedat misericorditer indulgentiam omnium peccatorum. Amen.

Contemplatio V.

De Gratia Virginis Mariæ, quàm habuit repletam.

Dicta es *gratia plena*, beatissima Virgo Maria, de qua ortus est fons gratiæ, ex cuius plenitudine tu accepisti, & lucem virginitalis in carne, Luc. 1. 13.
 & oleum humilitatis in corde: ut sic ex tuo oleo redundante totus hauriat mundus; sic enim virgines acceperunt oleum in vasis cum lampadibus. Tu, prudentissima Virgo Maria, non tantum habuisti vnum vas oleo gratiæ repletum, quo lampadem tuam extingubilem nutries; sed aliud vas habuisti redundans & indeficiens, ex quo effuso oleo misericordiæ, omnium lampades illuminares, ut vas omnium usque ad summum repleres, & in eo nihil deficere inuenires. Prudens igitur, Virgo Maria, fuisti, ut tibi prouideres: nec timida fuisti, ut aliis subuenires; nec dixisti, *ne forte non sufficiat*, Matth. 24. 9.
 scilicet mihi & vobis: sed sciens quod sufficeret tibi & nobis, sufficienter retinuisti, & sufficienter tribuisti: ut ex illius plenitudine effunderetur, quo lampades nostræ extinctæ illuminarentur. Sic, gloriosa Virgo Maria repleta fuisti quod de terra carnis tuæ fons erupit, & manavit super omnem terram, & irrigauit aridam, & sterilem fecundauit.

2. O plenissima gratiarum, Virgo Maria, expediuit nobis miseris peccatoribus te fuisse repletam gratiâ; per quam, quasi per canalem, ille fons diuinæ gratiæ ad vniuersitatem humani generis redundaret. Vnde, si fidei animæ gratia defuerit, ad plenitudinem gratiæ tuæ corruere & confugere debet, quia tu, gloriosissima Virgo Maria, diceris *fons hortorum & puteus aquarum viuentium, quæ fluunt impetu de Libano*, & licet de tua plenitudine acceperint omnes, non minuetur: Imò quantò magis effluxit, tantò amplius abundat plenitudo. O pius fons hortorum; si aridum fuerit cor alicuius fidelis, rigari indigens, currat ad te fontem hortorum; qui omnes hortos irrigat; currat ad te puteum aquarum viuentium; nec timere debet laborem extrahendi; nam fluunt semper aquæ propter viuacitatem & fecunditatem; nec potest cor piscinarum exuri incendio.

3. O piissima Virgo Maria aridum est cor meum, deficcata est mens mea à gratia, propter multa & diuersa peccata, quæ commisi & committo. Succurre mihi misero, Virgo Maria, riga cor meum tuâ pietate, ut cum Deo fonte viuo maneam in æternum. Amen.

Contemplatio VI.

De Gratia Virginis Mariae, quam habuit cumulatam.

1. **I**cer alij Sancti, speciosissima Virgo Maria, habuerint gratiam cum admixtione venialium peccatorum; tamen tu, Virgo Maria, sic eam habuisti cumulatam, quod nulla peccati alicujus admixtio in te fuit. Ideo tibi dicitur, *pulchra es Amica mea, & macula non est in te*. Tu etiam fuisti pulchra, sine aliquo peccato: & ab hac gratia, Virgo Maria, nunquam cadere potuisti, ex eo quod diuina Sapientia septem columnis te munivit, id est, septem donis Spiritus sancti, quibus plena & cumulata fuisti; & quoniam Deus dat mensuram gloriae secundum quantitatem humilitatis & gratiae, ideo Deus immensitatem gloriae contulit tibi, gloriosissima Virgo Maria; quia in hoc mundo immensam humilitatem & gratiam habuisti.

Cant. 4.
7.

2. Quia igitur te profundè humiliasti, ideo exaltari promeruisti quantum ad locum & subjectum, & effectum. Nam quia tu recubuisti in nouissimo loco, ideo exaltari meruisti super Choros omnium Angelorum; quia etiam habuisti humilitatem interiùs in corde, & mansuetudinem exterius in corpore, ideo exaltari promeruisti, quantum ad totum tuum subjectum, scilicet corpus & animam; quia anima fuit glorificata, & corpus fuit veste immortalitatis indutum; quia te humiliasti habendo ancillae officium, gratia tantum fuit in te cumulata, quod officium fuit tibi commissum illuminandi Sanctos, qui sunt in via, & illos qui sunt in patria; vnde tuâ praesentia, Virgo Maria, totus illuminatur orbis; adeo ut ipsa caelestis patria clariùs rutilet, tuâ virgineâ lampadis illustrata fulgoribus.

3. Ergo, misericordissima Virgo Maria, tuâ pietatis cumulatam gratiam, quam apud Deum clementer inuenisti, notam fac mundo, obtinendo reis veniam, ægris medelam, afflictis consolationem, & praesertim mihi miserabili peccatori, pijsima Virgo Maria, qui multis diuersis peccatis affligor; in anima multis & diuersis hostibus tribulor; quotidie multas & diuersas tribulationes patior in corpore, multis necessitatibus inuoluor assidue: ad sis mihi, Virgo Maria, quæ das assenter tuam gratiam, & non improperas, ut tuo adiutorio suffragante, consolationem habeam sempiternam. Amen.

CON-

Contemplatio VII.

De Signis plenitudinis gratia Virginis Mariae.

1. **P**lenitudo alicuius rei, gratissima Virgo Maria, cognoscitur cum res non resonat, non appetit superfluum, multum ponderat. In te, sacratissima Virgo Maria, hæc signa inveniuntur, quæ manifestè ostendunt plenitudinem gratiæ tuæ. Tu namque non resonasti per impatientiam vel murmurationem aliquam, sed multas & diuersas tribulationes perpessa in hoc mundo, de omnibus gratias egisti. Tu enim in persecutionibus & afflictionibus fuisti hilari; in penuriis & indigentis, non querula, iniuriantibus grata, & non molesta, miseris & afflictis condolebas, & subuenire non pigrescebas. Non appetisti mundana; quia cor tuum repletum erat amore cælestium: nam despicit omnem amorem terrenorum qui cælestem dulcedinem degustauit. Gratiā etiam non cessas influere, sed tuæ gratiæ beneficia in nos semper fluunt. De tua namque plenitudine accipiunt vniuersi, quicumque indigent, & quotiescumque te humiliter inuocant: nec est qui se abscondat à calore gratiæ tuæ. Tu, dulcissima Virgo Maria, fuisti ponderosa præ nimia plenitudine gratiæ tuæ, quæ si in statera ponderetur, amplius ponderaret, quàm gratiæ aliorum Sanctorum: quia quoddam particulariter alij Sancti habuerunt, tu Virgo Maria, habuisti vniuersaliter.
2. Verè tibi potest dici, *in plenitudine Sanctorum detentio mea*. Vnde *Ecd. 24.* quæque gratia plena fuisti; quia in corde, & in corpore receperas totum ^{14.} fontem misericordiæ; qui etiam prius repleuit mentem tuam, quam ventrem: & cum nasceretur de corpore, ab anima non recessit. *O plena gratia* ^{Ecd. 26.} *super gratiam mulier sancta & pudorata*; quia in te inculcatæ erant gratiæ, & quælibet gratia te totum implebat & occupabat, & quasi propriam vendicabat. *Gratia* scilicet ventris, *super gratiam* scilicet cordis. Gratia fecunditatis, *super gratiam* virginitatis; *Gratia super gratiam*, id est, super omnem gratiam: quod enim Mater Dei effecta es, super omnem gratiam est. Gratia tua, Virgo Maria, sublimior est omnibus gratiis Angelorum, & hominum; *Gratia super gratiam*, quasi dupliciter gratiosa, quæ tibi & nobis gratiam acquisuisti.
3. O misericordissima Virgo Maria, ad te confugio ego prauissimus peccator; ad te venio, ad te clamo de profundo cordis mei, te humiliter exoro, vt gratiam tuam mihi benignè concedas, per quam valeam regnum acquirere sempiternum. Amen.

Contemplatio VIII.

Quibus Gratiis plena fuit Virgo Maria.

1. Singulariter plena fuisti, benedicta Virgo Maria, gratiâ bonorum naturalium, spiritualium, & cœlestium. Plena fuisti in mente, plena in ventre; plena dignitate, plena sanctitate. Habuisti, sacratissima Virgo Maria, plenitudinem sufficientiæ, plenitudinem excellentiæ, plenitudinem influentiæ: & tantam plenitudinem habuisti, quantam habere potest aliqua creatura non vnita Deo. Tu, gloriosissima Virgo Maria, habuisti plenitudinem ad vsum quoad te ipsam, plenitudinem ad cumulum quoad nos. Fuisti insuper quoad Deum plena gratiâ; quia fuisti grata Deo per humilitatem, Angelis per virginitatem, hominibus per fecunditatem: quia in te fuit fomitis extinctio, veritatis agnitio, virtutis dilectio; vt esses plena in effectu, & in intellectu, & in affectu. Tu clarissima Virgo Maria, ne gratiâ plena fuisti, quod in te fuit omnis formositatis, decoris & plenitudinis ornamentum; in te fuit omnis bonitatis, valoris, & plenitudinis complementum: in te fuit omnis dulcoris odoris, & gratitudinis oblectamentum. Nihil in te, speciosissima Virgo Maria, fuit quod posset offendere; quia tota pulcherrima fuisti: nihil in te, quod posset deficere, quia tota plena fuisti: nihil in te, quod posset inficere, quia tota gratissima fuisti. Tu, sanctissima Virgo Maria, gratiâ plena fuisti, plena omnis munditiei, & puritatis; plena omnis opulentiæ & fertilitatis; plena omnis suauitatis. In te nihil fuit offensuum, nihil defectuum, nihil infectuum, imò in te fuit omnis decentiæ pulchritudo, omnis affluentiae plenitudo, omnis redolentiæ & complacentiæ gratitudo: quia fuisti sine aliqua spurcitia, sine penuria, sine tristitia; imò fuisti, pretiosissima Virgo Maria, ornata, lumine, repleta numine, respersta flamine, luminosa cogitatione: speciosa incorruptione; copiosa sanctificatione.

3. Tu, Virgo Maria sanas tumorem superbiæ, exemplo tuæ humilitatis; purgas saniem luxuriæ, exemplo tuæ virginitatis. Dignare me sanare, Virgo Maria, quoniam infirmus sum, multis vulneribus peccatorum sauciatus. Ora tuum Filium benedictum, vt mihi indulgendo, clementer vitam concedat æternam. Amen.

P A R S VI.

DE VIRTVTIBVS SPECIALIBVS GLORIOSÆ
VIRGINIS MARIÆ.

Contemplatio I.

Quod Virgo Maria exclusa fuit ab omni miseria.

XCLUSA fuisti, benedicta Virgo Maria, à miseria inflata primis parentibus, quæ multiplex fuit. Prima maledictionis, quia dictum est Adæ, *maledicta terra in opere tuo*, scilicet peccato tuo. Tibi verò, gloriosa Virgo Maria, dictum est, *benedicta tu in mulieribus*. Fuit, corruptionis, quia Eva non concepit sine corruptione: sed tu purissima Virgo Maria, concepisti, & peperisti incorrupta; quia fuisti Virgo ante partum, Virgo in partu, Virgo post partum. Fuit subiectionis; quia dictum fuit Eux, *sub viri potestate eris*. Sed, Virgo Maria, benedictus Filius tuus subditus tibi fuit. Fuit doloris, vnde dictum est Eux, *in dolore paries filios*. Sed tu, sacratissima Virgo Maria, peperisti in gaudio, quia dictum est Pastoribus, *annuntio vobis gaudium magnum*. Fuit incinerationis, quia dictum est Adæ, *pulvis es, & in pulverem reverteris*. Sed tu, virtuosissima Virgo Maria, mortis nexibus deprimi non potuisti; qui sunt putrefactio, vermes, & incineratio.

Genes.
3.17.
Luc.1.
28.

Genes.3.
16.
Ibid.

Luc.2.
10.
Genes.3.
19.

2. Exclusa insuper fuisti, clementissima Virgo Maria, à triplici vā, scilicet vā mundi, vā carnis, vā diaboli. Primum euasisti per paupertatem, secundum per virginitatem, tertium per humilitatem. Immo fuisti absque omni vā alicuius peccati; quia de te scribitur, *tota pulchra es, amica mea*. & *macula non est in te*, tota pulchra es in opere, per simplicitatem; quia oculus tuus simplex est, & ideo corpus tuum lucidum. Tota pulchra es in corpore, per virginitatem. Tota pulchra in mente, per veram humilitatem: quod est esse sine macula. Tota pulchra es in aspectu conuersationis, tota pulchra in puritate cogitationis: & sic fuisti, gloriosissima Virgo Maria, ab omni vā exclusa, scilicet auaritiæ, in opere; luxuriæ, in corpore; superbix, in corde; & ab omni peccato.

Cant.4.
7.

3. Sed, misericordissima Virgo Maria, ego peccator miserrimus, inter illos adnumeratum me sentio, de quibus scribitur, *vā, vā, vā, habitantibus*

Apos.3.
13.

M ij

in terra: quia non sum exclusus à vitiis & peccatis, cogitationis, delectationis, consensus, locutionis, operationis, & omissionis, sed in iis perseueravi, & adhuc perseuero, & exclusum me sentio à virtutibus & bonis operibus. Aduua me, piissima Virgo Maria, ora tuum Filium benedictum, vt ab istis *ve* peccatorum liberet me, indulgentiam de omnibus concedendo, virtutes mihi misericorditer largiatur, vt gloriam obtineam sempiternam. Amen.

Contemplatio II.

De Illuminatione Virginis Mariæ.

- Apoc.* 1. **D**E te, benignissima Virgo Maria, potest dici, quòd tu es illa, de qua scribitur, *mulier amicta Sole, & Luna sub pedibus eius, & in capite eius corona stellarum duodecim, & in vtero habens.* Quia tu, Virgo Maria, illuminata es à parte superiori, quia habes in capite coronam stellarum duodecim: Nam istæ duodecim stellæ, sunt nouem Ordines Angelorum, & Ordines Beatorum, scilicet Martyrum, Confessorum, & Virginum; qui omnes te coronant, & venerantur, & laudant. Tu es etiam illuminata à parte inferiori, quia Luna sub tuis pedibus; per quam intelligitur militans Ecclesia, quæ adhuc mutabilitati subiicitur: quam tu, gloriosa Virgo Maria, sub pedibus habes, quia tu ipsam sub tua protectione & defensione tenes, donec ad pacem æternam deducas; & tunc omnis mutabilitas auferetur ab ea: scribitur enim, *orieiur in diebus eius iustitia, & abundantia pacis, donec auferatur Luna*; id est, mutabilitas, quæ per Lunam designatur.
- Matth.* 2. Fuiſti illuminata à parte interiori; quia dictum est, *in vtero habens,* scilicet splendorem niueum, & speculum immaculatum de quo scribitur, *candor est lucis æternæ, & speculum sine macula.* Si autem Iesus Christus Filius tuus est lux vera, quæ illuminat omnem hominem venientem in hunc mundum; illuminauit utique sanctissimam matrem suam; quia ex te verum corpus humanum assumpsit, & in tuo vtero virginali tandiu habitauit: *Sanctificauit enim tabernaculum suum* scilicet *Altissimas.* Fuiſti etiam illuminata à parte exteriori; quia amicta Sole, id est, immortalis corpore. Radius enim Solis, clarus est, & agilis, ita vt ab Oriente subito in Occidentem transeat. Est etiam subtilis, ita vt vitrum sine læsione subintret. Est etiam impassibilis, ita vt nullâ violentiâ lædi possit. Fuiſti etiam, gloriosa Virgo Maria, amicta Sole quia tuum sacratissimum corpus induit agilitatem: claritatem, subtilitatem, impassibilitatem: & sic fuiſti plenissimè illuminata.
3. Sed, clementissima Virgo Maria, ego nefandissimus peccator intenebris sedeo, exccæcatus multitudine peccatorum. Illuminare me digneris,

sacratissima Virgo Maria, & ora assiduâ deprecatione benedictum Filium tuum, vt lumine suæ gratiæ me illustret, tenebras peccatorum fugando, & ad lumen me perducatur misericorditer suæ gloriæ sempiternæ. Amen.



Contemplatio III.

De Humilitate Virginis Mariæ.

1. **O** Admirabilis Virgo Maria, respexit Dominus humilitatem tuam, *Luc. 1. 48.* quæ inter vniuersas & singulas tuas virtutes obtinere meruit principatum, quia custos fuit & quali magistra cæterarum virtutum tuarum: non enim didicisti à benedicto Filio tuo celos fabricare, non Angelos creare, non miracula deitatis insignia operari; sed tantum humiliari, cæteraque documenta virtutum intra custodiam humilitatis aggregare: & ideo diuinitatis propitiationem, quam humana natura in primis parentibus per superbiam perdidit, per humilitatem tuam recuperasti. Nam, quia in te Verbum Patris, carnis substantiam, quæ sibi vniret, assumpsit, quasi ad eam, quam prius abjecerat, naturam sublimandam, per misericordiam respexit.

2. Habuisti, Virgo Maria, humilitatem & humiliationem, humilitatem intus in virtute mentis, humiliationem foris in abiectione humanæ opinionis. Quantò enim fuisti virtutibus eminentior, tantò fuit in te humilitas mirabilior. Fuisti humilis in corde, & sensu, nihil de te sentiens, vel æstimans, aut cogitans magnum; filia & imitatrix Patris tui David, qui dicebat; *sc. non humiliter sentiebam.* Fuisti humilis in cogitatu, cogitationes humiles semper habens. Fuisti humilis in auditu juxta consilium *Psal. 130. 2.* Spiritus sancti, qui te docuit dicens, *inclina aurem tuam, id est, humiliter* *Psal. 44. 11.* audi nuntium Gabrielem. Fuisti humilis in sermone, & voce, vnde audita *Luc. 1. 38.* multitudine, & magnitudine promissorum, quæ tibi Angelus faciebat, respondisti, tanquam humillima mulierum, *Ecce Ancilla Domini.* Fuisti humilis in opere, ministrando Elizabeth cognatæ tuæ, minori te; & quia *Psal. 100. 7.* purgationem secundum legem non crubuisti, licet purgatione non indigeres, cum de viro non concepisses: noueras enim quòd, *qui facit superbiam, non habitabit in medio domus Dei.* Fuisti humilis in incessu, quia non ambulasti in magnis, neque in mirabilibus super te. Fuisti humilis in habitu; noueras enim prohibitionem illam, *in vestitu ne glories vnquam.* *130. 1.*

3. Sed humillima Virgo Maria, ego virtutibus vacuus, & vitijs plenus, *Ecd. 11. 4.* superbus sum, & extollens me ipsum, & gloriando in malitijs & peccatis. Humilia te ipsam, Virgo pijsissima, Filium tuum deprecando pro me misero & superbo, vt mei mihi cognitionem donet, quæ mediante peccata mea cognoscam, defleam, & emendem in spiritu humilitatis, & animo contrito; vt vitam immortalem obtineam misericorditer in æternum. Amen.

Mm iij

Contemplatio IV.

De Eadem.

- I** Virgo prudentissima, gloriosa Virgo Maria, Mater dignissima Filij Dei, regale fastigium, à quo processisti, & ornatum habuisti, contemnendo, humilitatis gradum supremum post benedictum Filium tuum in te ipsa ab ineunte ætate tua suscepisti; ex quo, & in quo, benedicto Filio Dei habitaculum præparasti; quia super humilem & quietum, & trementem sermones suos, pius Pater & Dominus quiescit. Tu sapientiâ dotata, excellam fabricam construere decreuisti, ubi thesaurum virtutum tuarum reponeres, quos nec ætugo, nec tinea consumeret, nec fures rapere possent. Et ideo ut ædificium perduraret, de magno & profundo fundamento cogitasti, & opere perfecisti: hoc autem ædificium tendit ad æternam gloriam; cuius fundamentum, sine quo ædificium stare non potest, profunda est humilitas, quæ quantò maior est & profundior, tantò altius ædificium eleuatur, firmumque & stabile perseverat. Hoc fundamentum docuit Filius tuus benedictus, dicens, *discite à me quia mitis sum & humilis corde.*
- 1.** Hæc sancta humilitas homines Angelos facit, hominem deificat, de terra ad cælum subleuat, gratiam confert, quia *Deus superbis resistit, humilibus autem dat gratiam.* Hæc sancta humilitas perituris rebus non dignatur intendere, sed æterna vult assidue cogitare. Malū cuiquam velle non potest, sed bonum velle augere. O humilitas sancta, à Christianis diligenter custodienda! quia Christiani dicuntur à Christo, cuius Euangelium, qui benè intuetur, inuenit eum Doctorem humilitatis, semper esse: o benignissima Domina similem non habuisti in tua suprema humilitate, quæ cælos inclinauit, vnde descendit benedictus Filius tuus in vterum tuum virginalem. Hæc est scala, per quam ascendisti ad cælestia regna, & super Choros Angelorum. Tua humilitas superbiam hostis antiqui superauit, & prostrauit. Tua humilitas vitiosam vitam deleuit, & virtutes ostendit. Per ipsam Deo placuisti; quia respexit humilitatem tuam, & ipsum inuenire meruisti. Ista te matrem virginem fecit, & Deo Patri per amorem coniunxit; ista fuit dos tua, cum qua desponsata fuisti, & cum sancto Spiritu, amicitiam contraxisti. Ista cor tuum reddidit speciosum, ista admirabilem te fecit, ista virtutes multiplices tibi acquisiuit, ista est via, quæ te duxit ad vitam, quæ non deprimetur, sed exaltabitur. Ista est, quæ peccatores facit sperare in te, ut ad te in suis necessitatibus veniant & recurrant.
- 3.** O gloriosa Domina singularissimæ humilitatis, ego superbus & Deo odibilis venio ad te, tuam humilitatem, & misericordiam deprecando; quilibet sim terra & cinis, putredo, & cibus vermium, nullam virtutem possidens, sed multa peccata committens, tamen me finxi magnum esse verbo, scientiâ, diuitiis, & honoribus; cunctos alios despexi, cupiui laudari

ab hominibus omnibus, & bonus volui prædicari, quamuis à bono essem alienus. Nolui vnquam subesse, sed inter meos pares, primas tamen volui inuadere, & maiorem gradum ascendere: &, quod meritis non poteram obtinere, adulando, & detrahendo putavi acquirere. Et sicut naui absque gubernatore iactatur fluctibus, sic leuis animus meus fuit instabilis per omnes actus suos: in peccatis iniquum suffragium excusationis perquisiui; vt talis humano iudicio reputarer qualis non eram, nec esse curabam, & talis non iudicaretur, qualis reuera eram, & esse volebam; ô misericordissima Domina, quamuis tardè veniam ad te, & tardè miseram vitam meâ recognoscam, & emendem, tamen tu eandem misericordiam semper habes, nec tempore diminuitur, nec augetur, quia perpetua est. Ad illam humiliter recurro, illam flebiliter imploro, illam contristato corde flagito, illam crebris singultibus deprecor, & exoro; vt apud tuum Filium benedictum pro me misero, & superbo humilitatem impetres, contritionem, & condignam satisfactionem, & remissionem omnium peccatorum obtineas, vt hîc viuendo per gratiam, in futuro viam per gloriam, per infinita sæculorum sæcula. Amen.



Contemplatio V.

De Virginitate Virginis Mariæ.


1. **O** Virgo Virginum excellentissima Virgo Maria, quis tuam laudabilem virginitatem inuestigare potest? quia nec mentem tuam cogitationes, nec carnem tuam libido aliquammodo maculauerunt. Dissimilis enim fuit virginitas Euz, & tua. Eua Virgo scilicet superba, Deo volens parificari in scientia, cupida, quia concessis sibi non contenta; inobediens præcepto Dei, incredula eius comminationi, diabolicæ acquiescens tentationi, & male credula verbis serpentinis, vna de numero virginum fatuarum imò omnium fatuissima. Tu verò, Maria Virgo, non superba, sed humillima, in omnibus te subdens Deo, paupertatis amatrix, diuinæ per omnia obediens voluntati, benè credula Angelicæ promissioni, vna de numero prudentum virginum, imò omnium prudentissima. Virginitas ergo Euz superba, virginitas tua humillima: illa cupida, tu pauperrima, illa vacillans, tu stabilis; illa de pauperata, tu ditata, quia gratia plena, illa humiliata, quia sub viri potestate, tu exaltata, quia Dominus tecum; illa portam Paradisi clausit, tu illam aperuisti; quia Paradisi porta per Euam cunctis clausa est, & per te Virgo Maria, iterum patefacta.

2. Superbia quandoque sequitur virginitatem; cupiditas honoris quandoque sequitur virginitatem, quia cum quis videt se immunem à delicto carnis, non attendit cocco bis tincto dilectionis; sterilitas sequitur virginitatē. Sed tu, mundissima Virgo Maria, cum virginitate habuisti fecunditatem, cum integritate habuisti feruidam charitatē, & cum incorruptione habuisti

fecunditatem. Tua virginitas fuit à Deo Patre benedicta, à Dei Filio desiderata, à Spiritu sancto virgineo cordi inspirata; Deo Trinitate in virginitate fuisti confirmata; vnde dicis, & sic in Sion firmata sum. Fuisti vas auri solidum, ornatum omni lapide pretioso. Oportebat enim vt Redemptor noster iustus esset cum Deo, & mortalis cum hominibus. Propter hoc decebat eum habere matrem virginem, vt in matre mortali conciperetur mortalis, & in virgine conciperetur iustus. Nullus autem peccator saluare poterat alium peccatorem cum in eadem damnatione esset cum eo, decebat etiam eum, vt non nasceretur, nisi de Virgine, decebat Virginem, vt non pareret, nisi Deum. Ad hoc autem totum necessariò præparabatur virginitas tua Virgo Maria, quia nulli alij virgini quàm tibi hoc priuilegium debebatur.

Ecd. 24.
15.
Ecd. 50.
10.

3. Sed, beatissima Virgo Maria, ego impiissimus peccator, corruptus sum, & abominabilis factus coram Deo, & coram te, cogitatione, consensu, & opere, innocentiam baptismalem violando, & inimicis, quorum pompis & operibus abrenunciaueram, scienter & voluntariè consentiendo. Adiuua me, Virgo piissima, ora tuum Filium benedictum, vt de immundo faciat mundum, vt me purget ab omni labe peccati, & talem mihi operationem tribuat, vt cum eo viuam in æternum. Amen.



Contemplatio VI.

De Eadem.

1. **O** Deo placens virginitas, & potens animas Deo præsentare, virginitas laudabilis, & Deo amabilis, socia Angelorum, æternam gloriam fecundans, quo sermone te potero explicare? qua laude te potero prosequi? quo digno præconio te potero extollere? quâ cordis puritate dignitatem tuam potero enarrare? quâ linguâ dignè te potero nominare? cum in carne mortali posita, angelicam vitam serues, & fructus tui, cæteros quoscumque in cælesti curia antecendant, & diuini consortij sublimitatem consequaris? Tu beatior es nuptias vitando, quam nuptias multiplicando, tu vberior es, fecundior, atque felicior, non ventre grauescendo, sed mente grandescendo, non lactescendo pectore, sed corde candescendo, non visceribus terram, sed cælum orationibus parturiendo. Tu flos lili, nuncuparis, sicut flos lilij, cæteros flores candore niuci nitoris præcellit, & odoris iucunditate præpoller, sic tu cæteras virtutes puritate præcedis, & redoles ante Deum, & sicut flores lilij à terra altè eleuantur & versùs cælum aperiantur, & ab intra rutilo flammescunt aspectu, sic tu ab infimis ad superna ascendens cor aperis coram Deo, & flammescis interiùs amore geminæ charitatis, & sicut inter spinas, lilij flores nasci reperiuntur, sic tu inter spinas tentationum carnalium constanti animo exoriris, & per hoc à Domino nostro Iesu Christo, amica inter filias appellaris.

Cant. 2.
2.

2. Nuac

2. Nunc ad te, gloriosissima Virgo Maria, cor meum conuerto; ne contemnas, si pollutis labiis, & linguâ impudicâ tuam sanctam virginitatem audeo nominare, & præsumo laudare; quia spero quod tua magna misericordia, leuius hoc & generosius supportabit, quàm si taciturnitate obmutescerem, aut silerem. Tu sanctam virginitatem super omnem puram creaturam cordis intentione purissimâ dilexisti; & perpetuò inuiolabiliter obseruasti: tu prima fuisti, ad seruandam eandem: & tantâ mentis dulcedine, vt legis maledictionem non timendo, eam puro corde Deo voueris. Et licet desponsata fueris Iosepho, viro iusto, nunquam tamen virginalem pudicitiam amisisti; sed integra, mente & integro corpore, Virgo fuisti ante partum, Virgo in partu, & Virgo post partum permanisti; aliam in hoc tibi similem non habuisti, nec in futurum habebis. Tantâ enim integritate, ipsam virginitatem mente, & opere conseruasti, quod nullius doni ambitus potuit tuum sincerum adulterare affectum. Per hanc placuisti sanctissimæ & inuiduæ Trinitati: & per dilectionem, eidem inseparabiliter coniuncta fuisti; vt puritati puritas vniretur, & candidissimum exemplum niquei pudoris maculam nesciens, ac, quantum eidem sanctæ Trinitati virginitas placeat ostenderetur rationabilibus creaturis. O Virgo Virginum, Virgo casta, Virgo sancta, Virgo pulchra, Virgo pudica, Virgo mente & opere intemerata, Virgo immaculata, Virgo virum nesciens, Virgo virili amplexu carens.

3. Virgo virginitate singularissimâ pollens, Virgo virginitatis principium, Virgo virginitatis exemplum: tu sequeris Agnum, quocumque ierit, Virgo sine exemplo, tuam laudabilem virginitatem nullus dignè valet extollere, nullus eam dignè potest laudare; deficit cor humanum, deficit lingua, deficiunt sensus, deficiunt vires, deficit memoria: non sufficit fragilitas humana in tantam laudem prorumpere; præsertim ego sceleratissimus peccator, qui virginitatem ore nomino, & virginitatem corde non seruo, sed peccata nefandissima commisi, & committo. Aduua me per tuam piissimam misericordiam, gloriosa Virgo Maria, peccatorum aduocata. Ora assidua deprecatione tuum Filium benedictum, vt quia virginitatem perdi, indulgere mihi dignetur; & gratiam mihi concedat, vt castitatem & continentiam obseruem, de peccatis doleam, & condignè satisfaciam; & de cætero ab istis abstineam firmo corde; & separatâ animâ meâ à corpore in gloria æterna eam suscipiat; vbi laudes & gratias referat per infinita sæculorum secula. Amen.

Contemplatio VII.

De Verecundia Virginis Mariae.

1. **P**lissima Virgo Maria, verecundia tua gratissima, virginittis tuæ fuit cultos, & paranympus, cum audisses Angelum te salutantem præ verecundia turbata fuisti in sermone illius; quod cum esses verecunda, expauiisti ad aduentum Angeli in viri specie apparentis, videns te in thalamo solam cum solo inclusam. Trepidare enim virginum est, & ad omnes viri ingressus pauere, omnesque viri affatus vereri. Verecunda fuisti, quia audiisti te laudari: qui enim est humilis, de suis laudibus erubescit; & cum ferè omnes solent lætari, tu turbata fuisti non exhilarata vel elata. Verecunda fuisti; quia, cum plena es omni spiritu prophético, & scires plenitudinem non esse manentem in lege, quia lex neminem ducit ad perfectum mirabaris verecundia, quomodo gratia plenam te dicebat Angelus. Verecunda fuisti; quia benedicta dicebaris inter mulieres, quæ inter Virgines benedici semper optabas. *Ideo cogitabas qualis esset illa saluatio.* quæ te mulierem dicebat, & benedictam.

Luc. 1.

29.

2. Verecunda fuisti; quia saluata ab Angelo, silentium tuum, quod valde amabas, respondendo infringere, vel orationes tuas interrompere cogebarris. Ideo antequam responderes; fuit Angelus bis locutus. Verecunda fuisti; quia timebas de thesauro tuo, id est, de virginitate: solent enim virgines timorata, etiam in tuto pertimescere; illud recolentes, quod scriptum est, *habemus thesaurum istum in vasis fictilibus*, quæ scilicet franguntur de facili, nec possunt reparari, & continentia carnis sine continentia mentis, & consensu voluntatis, nihil est ante Deum. Verecunda fuisti; & turbata pro dictorum incertitudine; quia nesciebas, si præteritum erat, aut futurum, quod dixerat Angelus, *Dominus tecum*, sed hæc tua turbatio non fuit iræ vel doloris, sed pudoris, pauoris, & admirationis, & erat pudor duplex, quia sola cum vno videbaris, & quia tantò præconio commendabar. Timor erat duplex, ex presentia angelica, quam horret fragilis natura, & ex ignorantia causa. Admiratio erat pro magnitudine eorum, quæ tibi annuntiabantur. Ideo ex verecundia expauiisti, ex prudentia nouam salutationis formam obstupuiisti.

Luc. 1.

28.

3. Sed ego, beatissima Virgo Maria, peccator iniquissimus sum, & inuerecundus ad peccandum, magis rubore confundor aliquantulum peccando propter mundum, quàm propter Deum. Ideo tu Virgo Maria, quæ pietate plena es, ora Filium tuum gloriosum, ut me ab ista verecundia liberet, scilicet ut non peccem, sed secundum suam voluntatem viuam, & in fine gloriæ percipiam sempiternam. Amen.

Contemplatio VIII.

De Spe Virginis Mariae.

1. **S**pes tua, benedicta Virgo Maria, spes est à iuuentute tua, & non fuit de hoc mundo, nec de felicitate qua homines excecantur, & obliuiscuntur Deum, & in rebus labentibus & transitoriis huius mundi inhiantes sperant. Sed spes tua, gloriosa Virgo Maria, in Deo fuit, in quo respirasti, & sperasti, quem timebas, & quem sperabas; in illo sperasti omni die, omni hora, omni tempore vitæ tuæ, quidquid agere cupiebas, in Deo sperabas; quidquid tibi accidebat, siue bonum esset, siue malum ex toto corde tuo, & ex tota mente tua in Deo sperabas, & non solum in eo sperabas sed etiam in eo spes tua erat. Habebas duas vitas, vnā, in qua eras, & aliam, quam non videbas, cum spe & desiderio expectabas; vna erat in labore, altera in requie; sperabas quoddam post nouissima quæ sunt in hoc sæculo metuenda, succederet tibi requies in altero, quæ finem non habet; non terrebatur te, quia elongabatur à te; quia licet, in abscondito esset promissio, in spe tamen tua perseverabat oratio, operum bonorum exercitatio, & virtutum augmentatio: quia dum spes in te constantiā firmabatur, gloria retributionis augebatur. Gloriosissimus & benedictus Filius tuus tua spes etiam fuit; quia in illo vidisti laborem tuum, & mercedem tuam, laborem in passione, mercedem in resurrectione.

2. Nihil de tuis viribus aut virtutibus confidebas, nec de ipsis præsumebas; sed Deo, à quo procedunt omnia bona, in eo sperando, attribuisti, ne alienum faciendo tuum, amitteres quod acceperisti. Spes tua in futurum extendebatur, ut quod hic certabas, tunc certasse gauderes, hic enim certamina tibi proposita, ut in futuro sæculo sperando certaminum præmia obtineres. Ab amore huius sæculi auocata fuisti, ut futurum sæculum sperando diligeres, & amares. Spem tantam in Deo habuisti, cogitans, quod sicut per charitatem tecum ipse fuit in terra, ita per eandem charitatem tecum esses in gloria; & sicut deorsum fuit compassione charitatis, sic & tu sursum esses spe charitatis, non sperasti in homine, *quia maledictus qui spem suam ponit in homine.* Non sperasti de Deo pecuniam, non honores caducos & perituros, neque aliud quodlibet præter ipsum Deum, Imò contemptis aliis, pergebas in illum, obliuiscens alia, delectabaris in illo & non in alio; quia nihil est tam inimicum spei, quam retrò respicere, id est, in iis rebus, quæ retrò labuntur & transeunt, spem suam ponere.

3. Sed gloriosissima Virgo Maria, spem meam posui in hominibus, & in mundo, imò etiam in meipso, ac in rebus transitoriis & caducis, & si quando in Deo speravi, non propter hoc peccare desij: sed in peccatis perseveravi, & sic in spe frustratus fui culpā meā; quia sperando pecca-

N n ij

Jerem.
17. 5.

bam, & peccando sperabam; sed si tua misericordia velit me seruare, sicut spero, per tuam intercessionem, spes mea, quasi mortua, reuiuifcet; quia in benedicto Filio tuo est portio mea, caro & sanguis; & ubi portio mea regnat, ibi me tuo auxilio regnare spero, ubi caro mea glorificatur, gloriosum me tuo adiutorio spero; ubi sanguis meus dominatur, tuo suffragio dominari me confido, & spero. Et si peccata mea prohibent, substantia mea requirit: & si propria delicta excludunt, naturæ communio non repellit. Non enim, sicut spero, immitis est Filius tuus benedictus, ut non diligat carnem suam. Desperare utique potuissem propter nimia peccata mea, quæ quotidie egi, corde, ore, opere, & omnibus modis, quibus humana fragilitas peccare potest; sed desperare non audeo; imò spero, quod suffragante tuâ pietate, beatus Filius tuus, per suam infinitam misericordiam tollet chirographum peccatorum meorum, ut per ipsum, & cum ipso, gloriam percipiam sempiternam. Amen.

Contemplatio IX.

De Oratione Virginis Mariae.

1. **G**enitrix Dei & semper Virgo, gratissima Virgo Maria, dum facta tua felicissima mente recolo & contemplor, singulos actus tuos considero, mente concipio, mente pertracto, laudes tuas tacere non debeo; licet *non sit speciosa laus in ore peccatoris*, qualis ego sum & vnus de maioribus, sed tua immensa misericordia, sic est ad miseros inclinata, ut omnibus aperias aures tuæ pietatis. Tu, Virgo Maria, benedicta, à primordiis tuæ iuuentutis sanctissimæ; & quamdiu in hac peregrinatione vitam duxisti, tantam dilectionem habuisti ad Deum, quod numquam ab eo, saltem mente & animo separari voluisti. Et ideo cum eo spiritus tuus sanctissimus per orationem continuè loquebatur; hæc enim sancta oratio tua, sic fuit continua in te, ut necessitate corporali parcissimè suscepta, & misericordiar operibus occupata, reliquum tempus impenderes in orationibus nocturnis pariter & diurnis. Dulce namque tibi erat, per orationem Deo loqui, & esse cum Deo, & non separari à Deo, sed à mundo.

2. Per hanc sanctam orationem tuam vniuersa desideria cordis tui in conspectu maiestatis diuinæ effundebas, cælos penetrabas, ut posses Dei aures attingere. Per hanc tuum spiritum recreabas, diuinum præsidium obtinebas, peccatoribus misericordiam impetrabas, iustos conseruabas, peccatores subleuabas, & elisos erigebas. Per hanc temetipsam in prosperis gubernabas. Per hanc habebas fiduciâ in aduersis. Hæc tibi in gaudiis iucunda erat, & in luctibus suauis. Per hanc lætitiâ percipiebas, & tristitiâ declinabas. Hæc fuit sedes tibi fidelis, in qua consolaberis. Hæc fuit tibi nauis tutissima, vniuersorum desideriorum tuorum mercibus onerata; quæ ad

omnipotentem Deum perueniebat cursu prospero & felici. Per hanc sanctam orationem, omnia timoris Domini ornamenta habebas, quidquid in te vera fides inchoauit, spes cumulauit, charitas decorauit, hæc sancta oratio seruauit: per hanc omnia tibi vtilia data fuerunt à Domino, & cuncta noxia effugata.

3. Sed heu! benignissima Domina, ego prauus & iniquus peccator non leuavi mentem meam per orationem deuotam ad Deum, sed eam inclinaui per sollicitudinem ad mundum, non ad virtutes, sed ad iniquitates, non ad gratiam, sed ad culpam; non ad Dei clementiam, sed ad mundi dementiam; non ad indulgentiam consequendam, sed ad maliciam perpetranda. Aduua me, piissima Domina, tuis sanctissimis orationibus; pone lacrymas meas in conspectu benedicti Filij tui, vt perueniat ad eum deprecatio mea. Adesto mihi peccatori, & subueni, atque in manibus tuis commendatum me ipsum suscipe, libera me de ore sauiissimi draconis, & de manu atrocissimi inferni; colloca me tuis deuotis & dignis deprecationibus in caulis tutissimis gregum omnium Sanctorum, quorum benignissimus Filius tuus est Pastor bonus, qui requirit, & reducit ouem perditam, tuetur & saluat inuentam, fouet & sanat languidam; qui confidentes & sperantes in se, non confundit, ^{Psal. 34.} requirerentes se, non respuit, sed exultando suscipit, Ora, vt dignè orem illum, & oratio mea in sinu meo conuertatur vt viuam, & gloriam cœlestem per infinita sæcula sæculorum. Amen. ^{13.}

Contemplatio X.

De Silentio Virginis Mariæ.

1. **V**æ tacentibus de te, beatissima Virgo Maria, quoniam multi muri facti sunt, tua sancta gesta & facta considerare aut contemplari volentes. Et quis potest perfectionem tuæ sanctissimæ vitæ narrare; aut quis exemplum doctrinæ tuæ dignè valet nuntiare? imò quis dignus est ista solummodo cogitare? Verè non est vsque ad vnum Virgo benedicta, nisi omnipotens Filius tuus de indigno potens dignum facere, & cor inquinatum mundare, quem humiliter deprecor, vt me mundare dignetur ab omnibus inquinamentis, siue iniquitatibus meis vt ipsomet & te valeam glorificare, & laudare nunc & in æternum.

2. Inter cetera tuæ sanctissimæ vitæ exempla salutaria, quæ ostendisti, & opere compleuisti, fuit, Virgo gloriosa, silentium tuum omni discretione, & summa prudentia temperatum, quia loquenda non tacuisti, nec tacenda protulisti, loquenda dixisti, & tacenda tacuisti; rara fuit tua locutio, sciens quod *in multiloquio non deest peccatum*. Semper de Deo, aut cum Deo, aut propter Deum tua verba dulcia proferebas. De Deo locuta es, respondendo ^{Prov. 10.} ^{4.}

Nn iij

sancto Anchangelo Gabrieli, *Ecce Ancilla Domini fiat mihi secundum verbum tuum*, Propter Deum loquebaris, Elizabeth humiliter salutando; cum Deo locutio tua fuit, dum dicebas humiliter, *Fili, quid fecisti nobis sic? ego, & pater tuus, dolentes querebamus te*: Et dum pietate & compassione mora, ad nuptias inuitata, gloriosissimo Filio tuo, voce charitativa dixisti, *vinum non habent*.

Ioan. 2.
3.

3. Nunquam ab ore tuo verbum otiosum, processit, non maleuolum, non blasphemum, non mendosum, non iracundum, non simulatum, sed utile, mansuetum, benignum, veridicum, & charitativum; & per huiusmodi verba, quæ sunt signa illarum rerum, quæ sunt in anima, tui dulcissimi cordis voluntatem ostendebas, & non solum voluntatem, sed etiam opera, quia, qui proximum loquendo ædificat, bonum opus operatur. Nullus unquam de te potuit malè ædificari, nullus potuit verba aut facta tua aliquo modo denigrare, nullus malè interpretari, nullus malè intelligere, quia Magister veritatis te docuit, tecum fuit, nec te vlllo tempore dereliquit.

Isa. 65.

4. Sed heu miser! qui à te exemplum recipere nolui, sed tibi contrarius semper fui, nam velox fui ad loquendum vana & otiosa, blasphemando, mentiendo, detrahendo, iniuriando, maledicendo. Sed, vix mihi iniquissimo peccatori, quia tacui, cum vir pollutus labiis ego sim, & in medio populi polluta labia habentis ego habitem. Iam filii à bonis, à laude Dei & tui, à verbis charitativis & meritoriis, à verbis utilibus & ædicatoriis. Succurre mihi, Virgo pia, audiat misericordia tua clamorem meum, subueniat necessitati meæ clementia tua. Exora Filium tuum benedictum, gloriosa Virgo Maria, vt extirpatis vitiis, & verbis vanis, & otiosis, dignum me faciat laude suâ & tuâ. Repleat os meum laude suâ, vt semper sit laus eius in ore meo, & in corde meo, vt illi & tibi seruire valeam laudabiliter & digne & regnum cœleste acquirere per infinita sæcula sæculorum. Amen.

Contemplatio XI.

De Actione Virginis Mariæ.

Psalm.
40. 1.

1. **M**isericordissima Virgo Maria, scriptum est quoddam beatus qui intelligit super egenum & pauperem. Et sic in extremo iudicio benedictus Filius tuus remunerabitur opera misericordiae exercentes, Quantâ gloriâ tu digna es, quæ opera misericordiae benedicto Filio tuo humiliter & diligenter exhibuisti? Hospes venit in hunc mundum, & tu, gloriosa Virgo Maria, collegisti eum, scilicet in tabernaculo vteri tui virginalem in quo novem mensibus habitavit, sed qualiter intrauit tuum uterum virginalem, nemo novit, & qualiter ingressus est, egressio sua sola cognovit, esurivit benedictus Filius tuus, & dedisti sibi, gloriosa Virgo Maria, munducare, & licet esses bonis temporalibus pauperissima, tamen acu & fuso acquirebas,

vnde ipsum & te pascebas, sitiuit, & dedisti sibi porum scilicet lactis virginici, quod ipse solus bibit, & de quo puer alius numquam bibit, Nec ipse Filius tuus gloriosus alia vbera suxit quam tua Virgo Maria Mater.

2. Infimus fuit, & visitasti eum, infirmabatur benedictus Filius tuus, susceptus in se pœnalitatibus humanæ naturæ, quæ sunt fames, sitis, calor, frigus, glacies, ægritudo, & mors, vt dicere posset, *infirmata est in paupertate* *Psalm.* *virtus mea.* Et sic infirmatura per infantiam, iacentem in cunabulis, tu, 30 II. pia Mater, non solum visitasti, sed etiam balneando, fouendo, & gestando sustentasti, atque humanitatis obsequia vniuersa, quibus indigebat assumpta natura, deuotissimè ministrasti. Infirmabatur etiam quando crucifigebatur pro salute populi, & *vulnerabatur propter iniquitates nostras, & atrebatur propter scelera nostra, & eius liuore id est, carne liuidâ doloribus* *Isa. 53.* passionis, *sanati sumus.* Et tunc, gloriosa Virgo Maria, ipsum visitasti itando iuxta crucem. In carcere fuit, & venisti ad eum, pia Virgo Maria, in carcere fuit scilicet in tuo vtero virginali, & inde exiens verus homo, ad ipsum puerulum veniebas, velut Mater ad Filium iacentem in cunabulis. Fuit etiam missus in carcerem, scilicet in sepulchrum, & licet non legatur, non tamen est dubitandum, quin ad eum veneris cum aliis mulieribus sanctis, quæ tantam curam habuerunt de Dominica sepultura.

3. Sed, piissima Virgo Maria, quid ego miserrimus faciam in tremendo iudicio benedicti Filij tui; quia non solum opera misericordiæ facere contempsisti, imò plurima nefandissima peccata commisti. Non restat aliud mihi, nisi contra me audire illam sententiam terribilem, *Ite maledicti in ignem æternum,* *Matth.* *nisi manus tua misericors, Virgo pia, me suscipiat, & protegat.* 25. 41. Exora tuum Filium benedictum, vt eius misericordia præueniat iudicium, suam gratiam mihi tribuendo, vt opera vitiosa relinquam, & opera misericordiæ exerceam; vt pro me sententiam illam audiam *venite benedicti* *Matth.* *Patris mei, percipite regnum æternum. Amen.* 25. 34.

Contemplatio XII.

De Paupertate Virginis Mariæ.

1. **O** Mulierum pauperrima, gloriosa Virgo Maria, paupertate voluntaria. Abdicasti namque temporalia vt spiritualia possideres, solâ acutendo, inde victum tibi & tuo benedicto Filio acquisuisti. Tanta enim fuit tua paupertas, quod in propria ciuitate tuâ, scilicet Bethleem, (quæ ex Patre tuo David quasi iure hæreditatio tibi debebatur,) Dei Filium paritura, hospitium non inuenisti, nec vnde conduceres habuisti; & ideo in stabulo Saluatorem peperisti; & vnde illum pellibus cooperires, tempore illo hyemali, non habuisti; sed solis panniculis inuoluisti; nec lectum, in quo illum poneret habuisti, sed illum in præsepio reclinasti: nec

in tua desponsatione dotem, aut magna iocalia habuisti, ideo fabro pauperissimo, (qui ubicumque certe pauperes sunt,) desponsata fuisti.

Prov. 31.
20.

2. In hac autem paupertate, largissima inuenta fuisti: quia licet fustum apprehenderis, ut inde victum quæreres; tamen manum tuam aperuisti inopi, & palmas tuas extendisti ad pauperes, non sollicita de craftino. Nam Magi beati Reges, qui Filium tuum Regem cæli & terræ Dominum cognouerunt, largè de suis thesauris, non de burfis obtulerunt munera, quæ in vsus pauperum & egenorum misericorditer expendisti; & cum Filium tuum in Templum inferres, Agnum anniculum, quo eum redimeres, non habuisti. Sanctæ mulieres benedictum Filium tuum sequentes; de suis facultatibus ei ministrabant: Sed tu, benedicta Virgo Maria, non habebas, vnde ministrares ei.

3. Merito ergo paupertatis lucrata es regnum cælorum. Mirabile enim Martyrij genus est voluntaria paupertas. Quid enim mirabilius, & quod Martyrium grauius, quàm inter epulas esurire, & inter pocula sitire, & inter vestes algere, inter diuitias premi paupertate? Quas diuitias ostendit mundus, offert malignus, desiderat noster appetitus. Sed hæc omnia habere potuisses, Virgo Maria, à Filio tuo, nihil tamen vnquam pro teipsa petere voluisti considerans in te ipsa, magnum esse, ignem tangere, & non vri; spinas colligere, & non pungi; lapides transferre, & non lædi: sunt enim diuitiæ ignis, spinæ, lapides.

4. O beatissima Virgo Maria, ego miser peccator, diuitias concupiui: non spirituales, sed temporales; non ad erogandum pauperibus, sed ad conseruandum, aut superbiendum, & illas inutiliter expendendum. Adiua me Virgo piissima, ne sic finiam miserabiliter vitam meam, sed ora assidue Filium tuum benedictum, qui diues est omnibus, qui inuocant eum, ut mihi suas tribuat diuitias spirituales, cum quibus, hic opera meritoria agam, & in fine diuitias gloriæ suæ possideam, per infinita sæcula sæculorum. Amen.

Contemplatio XIII.

De Diuitiis Virginis Mariæ.

1. **O** Virgo Maria, scriptum est de te, *multæ filia congregauerunt diuitias; tu supergressa es vniuersas*. Tuæ diuitiæ non fuerunt temporales, non carnales, non corruptibiles, non sæculares, sed fuerunt æternæ, spirituales, incorruptibiles, & cælestes. Multæ igitur filiæ, scilicet Virtutes angelicæ, & multæ aliæ Virgines congregauerunt diuitias, tu supergressa es vniuersas. Si enim virginitas in te fuit, qualis est Angelorum, tamen in corpore fragili fuit quod non Angelorum: vnde & omnium diuitias te supergressam, euidentius ostendit insigne cælestis originis; dum videmus à te & Angelicam

eam similitudinem in regione dissimilitudinis retineri, & gloriam cœlestis vitæ in terra à te exule possideri; Virgines supergressa es; quia illæ Virgines, tu Virgo Virginum es Regina Virginum. Deinceps omnes vocatæ à te, à te omnes aliæ exemplum recipiunt, tu à nulla. Et, si aliæ sunt humiles, tu humillima, in tantum quod nec primam ante te habuisti, nec in posterum similem habebis.

2. Si aliæ misericordes, tu Mater misericordiæ habens duo vbera, quæ debemus petere ad sugendum, sicut filij vbera matris suæ, hæc sunt, puritas carnis, contra luxuriam; & humilitas mentis, contra superbiam: unde petimus, *nos culpis solutos, mites fac & castos*, unde petimus, *vitam præsta pu- ram*. Sic aliæ commendantur de fide, tu maximè, quia ad primum verbum Angeli credidisti, quod in te possit adimpleri, quod numquam auditum fuerat, ut pateres manens Virgo. Si aliæ commendantur de eo quod angustiantur de aliorum peccatis, multò plùs tu commendanda es; quia in tantum compassa es mundo peccatori, quod libentissimè cum Filio tuo benedicto passa fuisses pro salute mundi. Si aliæ contemplatiuæ, tu multò plùs contemplatiua; si aliæ perfectæ, tu perfectissima.

*Ecel. in
Hymno
Aue ma-
ris stella*

3. Multæ igitur filiæ congregauerunt diuitias diuersarum virtutum, & operum meritoriorum, & præmiorum, tu verò, benedicta, supergressa es vniuersas, & hoc simpliciter per sanctificationem, quæ præseruata es ab omni petulantia terrenæ corruptionis; per cognitionis plenitudinem, quæ ab omni nubilo erroris; per summam contemplationem, quæ ab omni tumultu mundanæ actionis. Supergressa es igitur vniuersas merito, & præmio: quia cæteræ per partes habuerunt, & tu, Virgo pia plenitudinem habuisti omnium gratiarum, & virtutum.

4. Sed ego miserrimus peccator, spoliatus sum omni virtute & factus sum pauper & egenus, diuitias spirituales contemnens, & transitorias, & caducas desiderans, & amplectens. Communica mihi serualo tuo indigno, Virgo benignissima, tuarum virtutum portiunculam, quo benedicto Filio tuo, & tibi placeam, per operationem virtutum; ut te mediante & iuuante, gloriam cœlestem consequi valeam in æternum. Amen.

Contemplatio XIV.

De Largitate & Misericordia Virginis Mariæ.

1. **M**ater misericordiær, & totiùs consolationis es, clementissima Virgo Maria, quia cum sis summè diues, & summè liberalis; constat quod summè larga & misericors es. *Misereris omnium, quia omnia potes*, post benedictum Filium tuum, & *dissimulas peccata hominum propter pœnitentiam*. *Sap. ii. 24.* Speciosa est misericordia tua in tempore tribulationis, *sicut nubes pluuia in Eccl. 35. tempore siccitatis*; &, velut nubes, misericorditer abscondis peccatores ab *26.*

O o

ardore solis, id est, ab ira Filij tui; & quia obumbras eis, & ipsos refrigeras, id est, ab actu concupiscentiarum; & velut pluuiâ quadam, gratiâ tuâ fecundas eos ad bonè operandum. Tu non solum es de numero prudentum Virginum, sed omnium pudenterissima; habens oleum misericordiæ in omnibus vasis tuis; in vase cordis, per affectum; in vase manuum, per effectum; & in vase oris, per benignitatem orationum. Et quia misericordiam genuisti, nihil aliud est uterus tuus beatissimus, quàm ipse misericordiarum thesaurus.

2. Tu es fons misericordiæ: quia, sicut fons per subterraneos meatus semper recipit aquam, & refundit; sic tu, Virgo Maria, fons & puteus es aquarum viventium. Quæ à Christo ad te & à te ad ipsos peccatores fluunt, impetu benignitatis utriusque; ex magnitudine enim divini amoris data es, piissima, peccatoribus, quia occasione peccatorum habes gratiam, quam inuenisti apud Deum; quia facta fuisti Mater Dei propter peccatores: quia non fuisset necesse Filium Dei carnem assumere, si homo non peccasset. Idèò parata es expendere in peccatores gratiam, quam occasione peccatorum inuenisti apud Deum. Et idèò securè possunt accedere ad te peccatores, tanquam ad sibi datam. Tanta est tua largitas, misericordissima Domina, quòd ad diem usque iudicij non desines succurrere peccatoribus: Idèò de te ipsa dicis, usque ad futurum seculum non desinam.

3. Succurre igitur mihi iniquissimo peccatori, Virgo Maria, largitate & misericordiâ plenissima. Reginarum est largitas & liberalitas, pro sceleribus & maleficiis quempiam condemnatum, liberare. Non ætimo te Reginam cælorum, in regno Filij tui benedicti; minorem potentiam habere, minoribus privilegiis debere gaudere. Ego peccator maximus, reum mortis perpetuæ me scio propter scelera horribilia quæ commisi. Succurre mihi igitur, Virgo benignissima, *Monstra te esse Matrem*, & Reginam. Nosti languorem animæ meæ; præpara in dulcedine cibum. Nosti vulnera animæ meæ; nosti & medicinam præparare, venenum eiicere, spem & certitudinem vitæ, & longitudinem dierum dare. Hæc à tua misericordia depolco: hæc à tua largitate charitatiuè requiro; vt te suffragante, vitam obtineam sempiternam. Amen.

Contemplatio XV.

De Pietate & Compassione Virginis Mariæ.

1. **Q**uasi oliua speciosa in campis, facta es, benignissima Virgo Maria, Oliua speciosa; id est, omnimodâ speciositate spiritali repleta; per pietatem & compassionem, quæ sunt virtutum tuarum gloria. Sicut oliua fructus facit in hyeme, sic tu, Virgo Maria, fructum peperisti tempore hyemali, quo refrigerata erat charitas, & iniquitas abundabat. Oliua

humore olei plena est: sic tu, Virgo pia, humore gratiæ perfusa, huius vitæ tempore non aruisti, sed vitæ æternæ amœnitatem inter omnes Euz filias gloriosa suscepisti. Tu es *oliua*, plena pinguedine pietatis, & compassionis. Tu es *oliua speciosa in campis*, id est, in peccatoribus incultis, quibus gratiâ sanctissimis tuis precibus, exemplis, & meritis subministras, vt excolantur per fidem & pœnitentiam, & referant fructum. Tu es *oliua speciosa in campis*, id est, in illis, qui sequuntur latitudinem suæ prauæ voluntatis, & discunt per campos, velut equi infrenes, non retardati freno timoris, seu mundani pudoris, aut vinculis diuinorum præceptorum quando corde toto pœnitentes confugiunt ad te. Tu es *oliua speciosa in campis*, propter communitatem pietatis & compassionis tuæ, quantum est in te sine acceptione personarum.

2. Tu es oliua per affectum pietatis, speciosa per effectum. Effectus pietatis nihil valet, nisi sit ex affectu. Nam sicut ex oliua fructus, sic ex affectu meritorium opus. *Tu es illa mulier, quæ vasa vacua impleuit oleo ad præceptum Elisei*, id est, Christi, *vasa vacua*, sunt corda vacuata ab amore terrenorum, & ab immunditia peccati mortalis, lota & sincerata per veram confessionem, & lachymarum effusionem, clausa inferius per contemptum temporalium aperta superius per appetitum cœlestium. Capax, per profunditatem humilitatis, & latitudinem charitatis.

3. Sed, piissima Virgo Maria, vas cordis mei non est vacuum, sed plenum sordibus, & spurcijs peccatorum; non est capax ad recipiendum oleum gratiæ tuæ, nisi tua pietas & compassio dignetur illud euacuare dignis intercessionibus tuis ad tuum Filium benedictum, quem ora, Virgo pia, vt infectum & sordidum vas cordis mei, mundare dignetur, oleo pietatis, & misericordiæ adimplendo: vt oleum tuum indignationem Dei mitiget, vt cordis mei vas, oleo gratiarum suarum impleat, per quas hîc opera virtuosa faciendo, veniente sponso Christo cum prudentibus virginibus intrem ad nuptias gloriæ sempiternæ. Amen.

Contemplatio XVI.

De Misericordia Virginis Mariæ.

1. **O** Misericordissima Virgo Maria, quis potest dignè tibi impendere gratiarum actiones, quia *tuâ misericordia plena est terra*? Fons tuæ misericordiæ, irrigat aridam terram nostram; fons tuæ pietatis emittit riuulos tuos ad nos peccatores, quibus continuè recreamur. Fons tuæ clementiæ refrigerat peccatorum calorem; fons tuæ dulcedinis sitim nostram extinguit, & clamat quotidie misericorditer ad nos, *siientes venite ad aquas*, & bibite cum lætitia, fons tuæ misericordiæ viuus & indeficiens est,

O ij

numquam diminuitur, nec siccatur; omnibus portabilem se reddit, nulli clauditur, nec negatur; haurit ex eo bonus, haurit etiam malus; omnibus prodest, nemini nocet, omnes recreat, omnibus dulcis est, omnes iuuat, curat debiles, sanos confortat, miseros latificat, iustos prouehit, iniustos purificat, ægros subleuat, bellantes tuetur, anxios consolatur, peccatores iustificat, peregrinos roborat, inimicos deprimat, virtutes auget, peccata prosterit, pauperes refocillat, diuites in humilitate custodit, iracundos mitigat, pacem procurat, immundos abluit, dissolutos retrahit, charitatem multiplicat, corda diuisa vnit, mentes eleuat ad superna, opera misericordiae exercere facit, somnolentos excitat, ad bene operandum cunctos inducit. In periculis defendit, omnibus necessitatibus occurrit, indulgentiam peccatoribus obtinet, Deo illos per amorem coniungit, incipientes dirigit, proficientes illuminat, perfectos inflamat, & timidos fortificat.

2. Hæc & multa alia, Virgo piissima, fons tuæ misericordiae in nobis peccatoribus operatur; & quid, Virgo beatissima, peccator faceret, si tuam misericordiam retraheres ab eo? sicut tuâ misericordiâ iuuante peccator perire non potest, sic etiam te tuam misericordiam retrahente, impossibile est vt non pereat. Tua namque misericordia sustinet peccatorem, & Dei mitigat iram erga ipsum. Credo, & expertus sum, Virgo benedicta, quia nisi misericordia tua mihi subuenisset, indignatio & iudicium Dei super me venisset; quia in peccatis nefandissimis & horribilibus, teipsum miseræ vitæ consumpsi.

3. O Virgo piissima, mater consolationis, respice me miserum peccatorem tuâ misericordiâ indigentem, non recedat à me tua magna misericordia, tua pietas, tua clementia, tua bonitas, tuum adiutorium sit semper mecum, vt me adiuuet, me defendat, me protegat, & indulgentiam de peccatis meis obtineat; ita spero & ita confido in te gloriosa Virgo Maria, quia scio quod peccatorem ad te venientem non respicis, neque tuam misericordiam ab eo abstrahis, quia sic peccator periret, cuius saluationem tu desideras: desiderium tuum igitur imple in me, quia inter peccatores maiorem me esse cognosco, vt cum dies extrema vitæ adueniet, susceptâ indulgentiâ peccatorum ad gloriam perueniam sempiternam. Amen.

Contemplatio XVII.

De Dulcedine Virginis Mariae.

1. O Melliflua & amantissima, Virgo Maria, tu dulcis es spiritu, quia beatissimus spiritus tuus nihil habet amaritudinis: sed totum dulcedinis, quia omnis dulcedo, scilicet Filius tuus benedictus in ventre

tuo virginali, nouem mensibus requieuit, & licet ex tuo utero nasceretur, numquam à spiritu tuo vel mente recessit, spiritus tuus dulcis, quia spiritalis apotheca Spiritus sancti fuit, qui dulcedo Patris & Filij sæpè nominatur, & ideo dicis de te ipsa, *spiritus meus super mel dulcis*, qui transcendit omnem dulcedinem mundanam carnalium voluptatum; heu! Virgo Maria, dulcis es cogitatu, quia cogitas cogitationes pacis & non afflictionis; unde tu es illa princeps de qua dicitur, *princeps ea qua digna sunt principe cogitabit*. Tu dulcis es aspectu, unde oramus, *illos tuos misericordes oculos ad nos conuertere*; facies enim tua plena est gratiarum; quia aspectus tuus pietatis & misericordie dulcedine perfusus est.

Ecd. 24.

Jerem.

29. 11.

Isa. 32. 8.

In Ant.

Salue

Regini.

2. Tu dulcis es auditu; quia libentissimè audis preces peccatorum, ab ipsis fideliter inuocata, unde dicitur tibi, *preparationes cordis eorum audiuit auris tua*. Tu dulcis es gustu, quia dicis, *qui edunt me adhuc esuriunt*, tanquam cibum saporis peroptimi: Tu enim es manna, habens gustum similem cum melle; tu es manna absconditum, quod vincenti promittitur, omne delectamentum in se habens, & omnis saporis suauitatem. Tu dulcis es tactu, quia tenes Filium tuum, ne statim feriat peccatores, unde dicere potes, *tenui eum, nec dimittam*. Dulcis es linguâ, ideo scribitur, *mel & lac sub lingua tua*, id est, in verbis tuis est omnis dulcedo spiritalis transcendens mellis & lactis omnem dulcedinem corporalem. Tu dulcis es labiis in efficacia precum, nam à precibus tuis ostendis magnitudinem Filij tui, qui semper exauditur à Patre pro sua reuerentia. Unde in fauorè tanti Filij, tu Mater digna es exaudiri. Tu dulcis colloquio, ideo scribitur, *eloquium tuum dulce*, maximè cum pro peccatoribus Filium tuum interpellas. Tu dulcis es memoriâ; quia sicut mel delectat gustum comedentis quantum plus masticatur, tantò dulcius inuenitur; sic memoria tua, delectat loquentem, & quantum plus de te loquitur, tantò magis in tua memoria delectatur.

Psalm.

10. 17.

Ecd. 24.

29.

Apost. 2.

17.

Sap. 16.

20.

Cant. 3.

4.

Ibid. 4.

11.

Ib. 8. 13.

3. Sed, dulcissima Virgo Maria, ego iniquus peccator, cor habeo non dulce sed amarum, & omnes cogitationes meæ, & omnia mea, amaritudine plena sunt; quia inquinata sunt, & contaminata per multitudinem vitiorum. Adiua me tu, quæ es dulcedo vitæ, ora Filium tuum, ut amaritudinem meam in dulcedinem bonæ vitæ conuertat, ut hæreditatem dulcem de qua dicitur, *hæreditas mea super mel & fauam*, percipiam sine fine. Amen.

Ecd. 24

24. 27.

Contemplatio XVIII.

De Omnipotentia Virginis Mariæ.

1. **O**mnipotens Virgo Maria, sermo tuus plenus est pietate, quia quæcumque volueris facere, illa facis, consilium tuum stat voluntas tua impletur. Tu es quæ vitæ & mortis habes potestatem, & deducis ad

Matth.
28. 18.Apoc.
19. 10.Psalm.
88. 9.

portas mortis & reducis; omnia potes ex dono Filij tui à quo omnipotente, omnipotens es effecta, quia non est potestas nisi à Deo; vnde dicere potes, *data est mihi omnis potestas in cælo & in terra.* In cælo, imperandi Virtutibus angelicis & animabus Sanctis, faciendi ad beneplacitum tuum, & quosuis introducendi. Sicut Filius tuus dicitur, Rex Regum & Dominus Dominantium, sic tu, Virgo Mater Christi Regina es bene se regentium, & Domina eorum qui sibi dominantur: omnia subiecisti sub pedibus tuis, oves & boues, id est, simplices; pecora campi, id est, luxuriosos vagantes per campos; volucres cæli, id est, superbos; pisces maris, id est, cupidos.

2. Tua etiam omnipotentia manifestè ostenditur quia multos de sua damnatione iam certos, multos in aquis prefocatos, multos ex improviso mortuos, quia dum caderent tuo patrocínio se commendauerunt, liberaſti; multos etiam qui sine pœnitentia decesserant in peccato mortali, à Diaboli faucibus eripuisti, & ut possent agere pœnitentiam, ad vitam reduxisti. Ita namque ingeniosa es & subtilis ad saluationem peccatorum; sicut Diabolus ingeniosus est, & subtilis ad damnationem eorum. Quâ autem iustitiâ, aut quo iure, tu saluas damnabiles & sine pœnitentia defunctos in mortali, quis ad ista sufficit cogitanda? Constat autem, quia & tu ita facis, & quia saluâ iustitiâ facis integro tamen & illibato sigillo iustitiæ, sic ingeniosè scis facere misericordiam, quia non frangis iustitiâ.

3. O misericordissima Virgo Maria, ego prauissimus peccator non habui pœnitentiam contra hostes animæ meæ, sed fragilitatem magnam; & idèò voluntati eorum me submisi. Imò, ut verius loquar, potentiam & virtutem habui ad resistendum peruersis voluntatibus, & tentationibus illorum; sed ex mera malitia & iniquitate, postposui timorem diuinum & salutem animæ meæ miserabiliter tradendo voluntatibus inimicorum. Ostendè, Virgo benedicta in me tuam potentiam, deprecando tuum Filium benedictum. Credo, ô Domina piissima, quia te orante pro me peccatore ad tuum Filium omnes cæteri Sancti orabunt, & omnes iuuabunt. Te verò tacente, nullus orabit, nullus iuuabit. Ora ergo, clementissima Domina; non cesset deprecatio ad Filium tuum, ut talem potentiam donet quæ resistat cum effectu vitij & peccatis, & de peccatis dignè pœnitentiam agam, ut in fine obtineam gloriam sempiternam. Amen.

Contemplatio XIX.

De Fide Virginis Mariæ.

1. Fides tua te saluam fecit, Virgo Maria plenissima pietate, & non solùm te, sed etiam genus humanum, quod per fidem tuam restauratum est; per te viuunt, & lætatur, in te confidunt, & in te sperant; per te vincit, & per te à morte liberatur; per te iungitur Deo per te pacem habuit, per te

saluatur, per te regnat, per te veniam obtinet, per te gratis impletur, per te euadit pœnas, per te Angelis sociatur; hæc omnia & plura alia beneficia, per te à benedicto Filio tuo habemus & possidemus. Sed vnde hoc, vt tanta bona per te habuerimus? Ecce, Virgo Maria, hoc fecit fides tua; quia verbis Angelicis credidisti, hoc fuit principium totius boni nostri, nostræ redemptionis, & nostræ saluationis. Fides tua hoc fecit, gloriosa Virgo Maria, fides tua causam dedit, fides tua Filium Dei in tuo vtero virginali clausit. Fides tua sanctam Trinitatem inclinauit, vt Filius Dei carnem ex tuo purissimo sanguine assumeret, & Filius tuus fieret. Fides tua Spiritum sanctum cooperatorem huius sacratissimæ Incarnationis constituit. Fides tua te Matrem Virginem & Dei filiam fecit. Fides tua sanctam Diuinitatem cum humanitate coniunxit, fides tua Deum hominem fecit, & hominem deificauit, fides tua hominem Deo reconciliauit, fides tua inter Deum & hominem pacem fecit, & indignationem mitigauit, fides tua Deum humiliavit.

2. Sed quid, Virgo Maria, hæc nobis fides profuisset, nisi in ea firmissima permanisses? Fugit namque fides de cordibus hominum in crudelissima captione benedicti Filij tui, cum Discipuli relicto eo fugerunt; lumen fidei tunc extinctum fuit, cæcitas comprehendit omnes, in tenebris ambulauerunt, mortua in eis fuit fides: & omnes errauerunt & à sua credulitate totaliter recesserunt. Sed in te, Virgo fortissima, Virgo cordis firmissimi, tota fides remansit, in te lumen sanctæ fidei, absconsum fuit, te solam illuminauit, in te sola, fides sancta radios suos expandit; in te fides seipsam seruauit, & sic latens sub modio, super candelabrum exposita matris & vniuersalis Ecclesiæ, ipsam expandisti, vt luceret omnibus; mundum illuminasti, cæcitatem & tenebras fugasti, & errores omnes fudisti, & errantes ad viam fidei reduxisti. Quæ igitur laudum præconia, aut quales gratiarum actiones tibi referre potest dignè, fragilis conditio humani generis; quam sic dignata es, per fidem tuam à tenebris infidelitatis liberare? Ecce nemo ad hoc sufficit, quantacumque virtutum præfulgeat dignitate.

3. Sed tua clementia, Virgo benedicta, nostram fragilitatem patienter supportet, & præcipuè meam, qui fidem suscepi, & mortua in me fuit; quia bona opera non impleui; sed vita mea in peccatis semper fuit. Aduua me, Virgo gloriosa; renoua in me fidem viuam, ora filium tuum benedictum, vt sine errore fidem immaculatam sibi seruem, vt iuxta fidem digna opera præstem, vt fidem rectam, opere prauo non polluam; vt ipsum, quem in credendo confiteor, malè viuendo non abnegem; sed ipsum, quem strenuâ fide sequor, actu & negligentiz operibus non offendam, sed mortificatis vitiis per indulgentiam suam, gratiam mihi conferat in præsentem, per intercessionem tuam, & gloriam in futuro, per infinita sæcula sæculorum. Amen

Contemplatio XX.

De Sapientia Virginis Mariæ.

- 1.** **P**rudētissima omnium mulierum, beatissima Virgo Maria, de te scriptum est, *sapientiam omnium antiquorum exquisisti*. Quis enim non miretur opera tua diligenter considerans, & dicta tua, tantam sermonis constantiam, interrogationis prudentiam, fidei facilitatem? si quomodo locuta es Angelo, attendatur, nimirum quia datum est cordi tuo lumen intelligentiæ, per quod scientiam omnium antiquorum exquisisti, scilicet doctrinam Patriarcharum, & Prophetarum, & cognitionem cœlestium quam antiqui habuerunt, exquisisti, Virgo Maria, id est, ex corde quæsiuisti, & in illo cōseruasti; unde de te scribitur, quod *omnia in corde tuo conseruabas*, id est, in arca memoriæ reponebas omnia verba hæc, non mundana, sed Euangelica, scilicet omnia, quæ de Domino vel à Dño dicta, vel facta cognouisti, vel intellexisti: seu quæ nondum intelligere potuisti, omnia memoriæ commendasti, ut cum tempus prædicandæ seu scribendæ Incarnationis Filij tui aduenisset, sufficienter omnia prout essent gesta posset explicare quærentibus, & ita quatuor Euangelistis multa ostendisti, quæ scripserunt. Tacito igitur corde congruum tempus expectabas, quo Deus ea vellet diuulgari, & ideo de te dicitur, *sapiens tacebit usque ad tempus*.
- 2.** Sapiens etiam tu, Virgo Maria, fuisti, quantum ad cognitionem scripturarum: qui enim aperuit Apostolis sensum, ut intelligerent scripturas, multo fortius te matrem impleuit spiritu sapientiæ & intellectus, superueniente in te Spiritu sancto; imò descendente in te ipsâ Sapientiâ, id est, Filio Dei, qui scientiarum Dominus est, & qui tibi nouem mensibus Euangelizauit; priusquam aliis ciuitatibus, & incerta & occulta sapientiæ suæ manifestauit tibi: Noc solum nouem mensibus, imò & toto tempore, quo iuuenis habitabat tecum, manifestauit tibi secreta scripturarum sanctarum; unde potes dicere, *precessi sapientiâ omnes, qui fuerunt ante me; & anima mea contemplata est multa sapienter*. Ideo post Ascensionem gloriosam Filij tui facta fuisti Magistra sapiens Apostolorum, Euangelistarum, & Prædicatorum.
- 3.** Sed, sapientissima Virgo Maria, ego iniquus & peruersus aliquantulum sapiens fui, & hæc sapientia mundi fuit, quæ stultitia est apud Deum: sapiens enim fui in oculis meis, quos solum direxi ad mundana, & ad superbiam exterioris hominis. O benignissima Virgo Maria, esto mihi clemens, & propitia apud benedictum Filium tuum. Sapientia tua doceat me qualiter Filio tuo placeam; illumina mentem meam lumine sapientiæ tuæ, ut quæ agenda sunt videam, & opere adimpleam, ut cum Filio tuo, qui est Sapientia increata, perpetuo requiescam. Amen.

CON-

Contemplatio XXI.

De Patientia Virginis Mariæ.

1. **S**anctissima ac beatissima Virgo Maria, quibus laudibus efferam tuam admirabilem patientiam, de qua scribitur, *patientia pauperum non peribit in finem*: Nulla enim pura creatura à Deo creata, tibi fuit similis in paupertate spiritus; ideo patientia tua non peribit in finem; non quòd patientia sit ibi, ubi nunc cum tuo benedicto Filio gloriaris; cum ibi nulla sit aduersitas quæ molester, sed non peribit, quia infructuosa non est; cum fructum nunc percipias sempiternum. Patientia tua, multa in hoc mundo aduersa æquo animo supportauit: namque in hac lugubri vitâ multa aduersa tuum animum inuaserunt; Nam vita pauperrima tibi fuit, quia vnde viueres, non habuisti; nec vnde benedicto Filio tuo nato, in necessariis prouideres: nec vnde ipsum redimeres, in oblatione Templi, nisi solum pretium egenorum. Victum tuum cum aliunde non haberes, manu & arte quærebas.

2. Vita tua in tribulatione fuit: nisi quantum de Filio tuo, consolationes, & gaudia suscepisti. Ipso nato oportuit te, vt ipsum à manibus Herodis eriperes, fugere in Ægyptum; ipsius passionem, & mortem acerbissimam & crudelissimam, oculis propriis inspexisti: iniurias & contumelias, à Iudæis iniquissimis, contra benedictum Filium tuum & te, voce rabidâ, audiisti: Nulla enim prosperitas, nisi de Filio tuo in mundo tibi fuit: quia qui *piè volumus vivere in Christo, persecutiones patientiar.* Sed patienter omnia supportasti, & Deo laudes & gratias reddidisti. Hanc patientiam, in laboribus huius vitæ tolerasti, quia mitis eras corde, & mansueta moribus, & talibus deberur qui non resistunt voluntati diuinæ, cuius iugum leue est, & sarcina leuis; tu namque ex magna dilectione Dei Patris, non solum consolationes, sed etiam tanquam vera filia, flagella tolerabas, quia quæ non videbas, sperabas, & per patientiam expectabas. Nam mens iusta tantò est ad quæcumque fortior, quantò in ea est charitas Dei maior. Patientia namque amica est bonæ conscientiæ, non inimica veræ innocentie; & hanc in hoc mundo possedisti; quia intacta mentis constantiâ, nec doloribus, nec voluptatibus animum infirmum præbuiisti.

3. Sed ego miserrimus & iniquitate plenus, prospera mundi dilexi; & aduersa impatienter portau: ò peruersa, & Deo odibilis conditio mea! Nam cum Deus peccata mea per patientiam tolerabat, hoc acceptabile; & gratiosum mihi erat; sed cum me misericorditer propter peccata mea flagellabat, maximâ impatientiâ ad iracundiam prouocabar; & tantò supplicio dignior eram, quantò magis vitiis subdebam iustitiam virtutum. O benigna & gloriosa Dei genitrix Virgo Maria, refugium & spes misero-

Pp

rum; tibi nunquam sine spe misericordiae supplicatur. Exora Filium tuum benedictum & piissimum, pro me miserabili creaturâ suâ, ut non declinem ad dexteram prosperitatis, nec ad sinistram aduersitatis. Da mihi patientiam in afflictionibus & aduersitatibus meis: de quibus ipsum laudem, ipsum glorificem, & ipsum benedicam; quia in tribulationibus erudit, in lætitia consolatur, & non solum laudem eum voce, sed & opera cum voce concordent, ut vitâ præsentî cum patientia, & digna peccatorum emendatione finitâ gloriam obtineam misericorditer sempiternam. Amen.

Contemplatio XXII.

De Perseuerantia Virginis Mariæ.


1. **T**Vam admirabilem, singularem, & superlaudabilem vitam, gloriosissimam Virgo Maria, in corde non sufficio cogitare, quam semper vellem memoriter retinere, semper contemplari, semper prædicare, semper laudare, semper extollere, & in iis, quæ mea modica fragilitas facere potest, ipsam cupio imitari, ut tuo benignissimo Filio Domino, & Saluatori Iesu Christo, & tibi, possem vitam meam dissolutam emendando, toto animo complacere. Tu verò, sanctissima Virgo Maria, Sancti Spiritus lumine illuminata, gratiâ illustrata, ardore sui amoris incensa, & eius scientiâ mirificè docta fuisti, per quam sciisti, & memoriæ commendasti, & etiam opere confirmasti, quod omnes virtutes currunt, sed vna sola accipit brauium, scilicet perseuerantia. Multorum quidem incipere est, paucorum verò finire. Nam multi benè incipiunt, & in fine deficiunt, quia virtutem perseuerantiæ non habent; & nisi quisque perseuerauerit vsque in finem, de sua salute sperare non debet. Sicut enim humilis charitas est fundamentum virtutum, sic perseuerantia est gloriosus finis. Hæc sola coronam meretur quia non coronabitur, nisi qui legitimè certauerit.

2. Tim.
2. 5.

2. Perseuerantia gratum facit hominem Deo, aures eius demulcet, misericordiam obtinet, ostium aperit Paradisi: Istâ mediante Chanaanæ fuit exaudita, cæcus illuminatus, Publicanus indulgentiam obtinuit, Centurionis filius sanitatem, Magdalena absolutionem, & omnes Sancti perpetuam saluationem. Sed in te, Virgo sacratissima, tanta; & tam solida fuit perseuerantia, quod scintillam aliquam, quantumcûmque modicam aliquius Virtutis, doni, aut gratiæ non permisisti excidere à te ipsa, sed omnia tibi peculiariter, & vniuersaliter concessa, absque vlla diminutione perseueranter, & inuiolabiliter vsque ad finem conseruasti, & illa per tuæ sanctissimæ vitæ merita, augmentasti. O felix perseuerantia, & perseuerans felicitas! quæ in sexu fragili habitaculum Deo condidisti, imò dicam, & verius loquar, o felix sexus fragilis! qui tanta roboris fortitudine perseuerantiam inconcussâ mente, & indefesso animo obseruasti.

3. O felicissima Domina, grauer erubesco, dum præmissa in me ipso contemplan, non quia tu sic virtuosè perseuerasti; de quo nomen Dei laudo, benedico & glorifico; sed quia ex magna malitia mea, & iniquitate, in bonis & gratis à Deo gratuito dono mihi datis perseuerare nolui; sed inualida, & imbecilla mea mens, post diuinas aspirationes mihi datas, post bonorum principium, destiti perseuerare. Omnia imperfecta reliqui, perdurare nolui: ad tempus credidi & tempore tentationis recessi. O vtinam sic citò & absque mora finem imposuissem vitis in quibus continuè & constanti anima miserabiliter perseueraui! ex qua perseuerantia peccata peccatis coniunxi, & si sic vsque in finem perseuerauero, non saluus, sed damnatus ero. O misericordissima Virgo Maria, & omni pietate plenissima, adiste tuis assiduis intercessionibus & deprecationibus tuo gloriosissimo Filio, vt à me auferat istam miserabilem perseuerantiam vitiorum, & mihi dona, & Virtutes ad salutem animæ meæ misericorditer conferat, & in eis perseuerantem voluntatem, & animum mihi donet: iniquitates meas miserando repellat, animam meam sibi gratam faciat, & ipsam cum soluta carnis vinculo fuerit, in cælis suscipiat cum Sanctis omnibus regnaturam, per infinita sæcula sæculorum. Amen.





PARS VII.
DE SALVTATIONE
VIRGINIS MARIAE.

Contemplatio I.

De Salutatione Virginis Mariae.



D te salutandum, gloriosa Virgo Maria, principaliter me inuitat Archangeli Gabrielis exemplum, qui te primus legitur salutasse. Sed ad hoc faciendum me sentio indignissimum, benignissima Virgo Maria, quia non est speciosa laus & salu-

Eccl. 15. ratio tua in ore peccatoris, qualis ego sum. Sed à tua misericordia, piissima Virgo Maria, deuotâ mente & humili corde requiro, vt tuis sanctissimis deprecationibus, mihi misero peccatori misereri digneris, vt salutationem grater recipias, & hoc, beatissima Virgo Maria, faciens, à benedicto Filio tuo mihi impetres vitam Angelicam. Nam in Angelis est puritas; quia sicut à carne, sic à carnis illecebris penitus sunt immunes. In ipsis est charitas: quia coelestis participatio eius in idipsum; quia nullus suum aliquid ibi esse dicit; sed sunt ibi omnia communia. Nec inter eos maior opprimunt minorem; sed omnes in summa pace & quiete ac charitate consistunt. Est etiam in ipsis humilitas & obedientia in ministerio, in quo sine murmure, sine dilatione Domino obtemperant; & tanta est eorum humilitas, quod hominem, qui terra & cinis est, non dedignantur custodire, nec inde erubescunt.

Zuc. 1. 2. Hæc tria, beatissima Virgo Maria, inuenit in te Angelus, dum te humiliter salutauit, dum dicit *gratia plena*, quæ ad humilitatem refertur, quæ sola meretur gratiâ impleri; Nam Deus superbis resistit, & humilibus dat gratiam, & dum dicit, *Dominus tecum*, denotat charitatem, quia Deus charitas est; & qui manet in charitate, in Deo manet, & Deus in eo, quod dicit, *benedicta tu in mulieribus*, refertur ad puritatem, quæ perfectissima in te fuit.

1. Ioan. 4. 16. 3. O sacratissima Virgo Maria, crea in me cor mundum & purum tuis sanctissimis meritis & intercessionibus. Confer charitatem Dei & proximi, & veram cordis humilitatem, vt idoneus seruus tuus fiam, te laudem, te

benedicam, tibi gratiarum actiones referam sine intermissione; &, sicut Archangelus Gabriel non foris stetit, sed ad te fuit ingressus, sic mihi digneris impetrare à tuo gloriosissimo Filio, vt in conclave cæleste in quod tu assumpta fuisti, ad æthereum thalamum ingrediar, vt ipsum & te laudem in æternum. Amen.

Contemplatio II.

De primo verbo Salutationis.

1. **O** Sacratissima Virgo Maria, tres salutationes celebriores cæteris Euangelium ostendit. Prima fuit, Gabrielis Archangeli ad te. Secunda fuit, tua ad Elizabeth. Et tertia, Christi ad Apostolos post Resurrectionem. Virgo Maria, ante Incarnationem benedicti Filij tui, discordabat Deus ab homine propter peccatum primæ præuaricationis, quia homo à seruitio Dei recedens, alienæ se subiecerat potestati: Discordabat Angelus ab homine, qui primæ Apostasie, quæ facta fuerat in Angelis, ruinam reparare debebat & tamen in terram corruerat per peccatum, & cum seruus deberet esse in obsequio Dei, homo quasi sponte se subdiderat dominio Diaboli. Discordabat etiam homo ab homine, scilicet Iudæus à Gentili propter diuersarum legum æmulationem; quia Iudæus vnum Deum, Gentilis Idola adorabat: erat etiam discordia inter carnem, & spiritum, propter mutuam altercationem, quia caro carnalia, spiritus spiritualia appetebat, primò enim spiritus carnem corruperat, & nunc caro spiritum corrumpit.

2. Sed, beatissima Virgo Maria, per salutationem Angeli tibi factam, notatur concordia Angeli & hominis; quia per gloriosum partum tuum factus est homo conciuus Angelorum & domesticus Dei, & facti sunt homo & Angelus serui vnius Domini, scilicet Christi, & per ipsum Christum de hominibus reparata est Angelica ruina: Per salutationem tuam, Virgo Maria, ad Elizabeth, designatur concordia Iudæi & Gentilis, quia Christus lapis angularis, omnes in vnam Ecclesiam & fidem vnicam conuocauit; Ipse enim est pax nostra, qui fecit vtraque vnum, de quo scribitur, ego *sum in fundamentis Sion*, id est Ecclesiæ; *lapidem angularem*, id est, Christum; Per salutationem Christi ad Apostolos, designatur concordia Dei ad homines; quia Filius Dei factus est obediens vsque ad mortem, Deo Patri pro homine satisfecit, ideò nominatur Mediator Dei & hominum. Discordiam ergo, quæ erat inter carnem & spiritum, pacificauit Christus in se vtrumque assumens, & pacificè gerens, de quo dicitur, *simul in vnum diues & pauper*, id est, Spiritus & caro inter se concordēs in Christo.

3. Istæ igitur discordiæ per te gloriosam Virginem Mariam pacificatæ sunt, quia Christum nobis genuisti, in quo Deus erat mundum reconcili-

P iiij

lians sibi; per quem omnes creaturæ rationabiles per charitatem unitæ factæ sunt vnius spiritus participes, & regni vnius cohæredes. Dicat ergo tibi ipse Deus, dicat Angelus, dicat homo, *ave*, ô salutifera Virgo Maria. Ego iniquissimus peccator, discordias commouî inter Deum & me; quia per peccatum subiugavi me potestati hostis antiqui. Fiat pax in virtute tua, piissima Virgo Maria, inter Deum & me tuis deuotis orationibus, vt per me tuam salutationem benignè suscipias, & gloriam mihi impetres sempiternam. Amen.

Contemplatio III.

De secundo verbo Salutationis.

1. **G**ratia es plena, Virgo Maria, quoad Deum per humilitatem, quoad Angelos per virginitatem, quoad homines per fecunditatem. Gratia plena es quantum ad quatuor Cardinales Virtutes, *quibus nihil melius est in vita hominibus*. Habuisti namque ex temperantia carnis pudicitiam, sermonis modestiam, cordis munditiam; ex prudentia, siluisti turbata, intellexisti audita, respondisti sapienter ad proposita. Ex iustitia reddidisti omnibus quod debebas: ex fortitudine, propositum Virginitatis assumpsisti, assumptum tenuisti, rei tam immentæ fidem adhibuisti, & dixisti, *Fiat mihi secundum verbum tuum*.
2. Tu es gratia plena, Virgo Maria, de qua ortus est fons gratiæ, vt manaret super terram, & irrigaret aridam, & sterilem fecundaret; & ad vniuersitatem humani generis redundaret, cuius plenitudo talis fuit, & est, quod quanto plus de tuo fonte gratiæ effluerit, tanto amplius abundabit, sicut de amore fit: quia quanto quis alium amplius amat, tanto amplius abundat; & quanto amplius amabit, tanto amplius dilectione abundabit. Sic igitur & tu, Virgo Maria, gratia plena es, quia quanto amplius deriuas fontem gratiæ tuæ & amoris ad nos peccatores miseros, tanto amplius fluuii tuæ gratiæ superabundant.
3. Tu, benedicta Virgo Maria, fuisti gratia plena ante conceptum, superplena superadueniente Spiritu sancto; plusquam superplena per Filij Dei conceptum; qui sic te totam impleuit, vt nec venialis culpa in tua carne vel anima quantumcumque locum sibi potuerit vsurpare. Vnde & gratia plena fuisti, quia in corde & opere recepisti totum fontem gratiæ, & ipse fons gratiæ Christus Dominus, tantum de sua immensa plenitudine tibi contulit & repleuit quod nihil in te vacuum reliquit. Plenitudo igitur tuæ gratiæ, priuauit te omni vacuitate, vnde omnis alia creatura aliquid vacuitatis habuit, quia maiorem gratiam habere potuit; tu nihil vacuitatis habuisti, quia plus gratiæ habere non potuisti, nisi diuinitati fuisses unita, hoc est nisi tu fuisses Deus. Ista est igitur plenitudo, de qua dicit tibi specialiter

Angelus, *Aue gratia plena*, & tuum proprium nomen tacuit; sed hoc tibi quasi pro nomine posuit, ut *Gratia plena* deinceps nominareris.

4. O beatissima Virgo Maria, ego miser peccator non sum plenus gratia, sed malitia. Indignus sum ut tuam salutationem pollutis labiis referam. Dignare mihi succurrere, Virgo pia, ut te humiliter salutando, tibi placeam, & per te vitam obtineam sempiternam. Amen.

Contemplatio I V.


De tertio verbo Salutationis.

1. Inviolata Virgo Maria, postquam dicta fuisti *Gratia plena*, dictum tibi fuit per Archangelum Gabrielem, *Dominus tecum*, qui cum sanctis Angelis est per gratiam, & cum sanctis hominibus non solum per gratiam, sed etiam per naturam; ut possit homo dicere *Emmanuel*, id est, *nobiscum Deus*, *quod dicere non potest Angelus sicut scribitur, Nuscquam Angelos apprehendit*, quia Angelicam naturam non sibi vniuit, sed semet Abraham apprehendit, quando in te, Virgo Maria, orta de semine Abraham, naturam humanam assumpsit. Tecum autem, Virgo Maria, fuit non solum per gratiam & naturam, sed etiam per assumptam carnem tuam portionem, sine virilis admixtione seminis, ut dicatur tibi, *Dominus tecum*, excluso carnalis Patris consortio Dominus igitur tecum fuit Virgo Maria, longe excellentius quam cum ceteris Sanctis, cum quibus fuit tantum spiritu & in corde, sed tecum fuit spiritualiter in corde, & corporaliter in ventre tuo virgineo.

2. Fuit, Virgo Maria, *Dominus tecum* in eius Conceptione, quia tunc fuit celebratum coniugium inter diuinam naturam & humanam, & hoc in utero tuo virginali. Matrimonium enim consistit in duobus, scilicet in mutuo consensu, qui ibi fuit, quando tu respondisti, *Fiat mihi secundum verbum tuum*; & in coniunctione naturali, quod ibi fuit, quando *Verbum caro factum est*, & tunc, Virgo Maria, tu & diuina Sapientia, vnus spiritus & vna caro facti estis. Si enim Eva dicta est vna cum Adam, quia de vna costa eius formata est, ab eo tameneducta, & in nullo ab eo nutrita, multo melius dicitur caro Christi, esse vna cum carne tua, qui non de costa, sed de intimis visceribus, imò de tuis purissimis sanguinibus virgineis fuiteducta; & non extra, sed intra gloriosa viscera tua nouem mensibus educata; ex hoc enim vocatus est *Nomen eius Emmanuel*, id est, *nobiscum Deus*, Quia ex hac vnione tua & Dei, factus est Christus Filius tuus humanæ naturæ confors, factus est caro & frater noster, & in eodem labore & opere nostræ redemptionis, tu Mater misericordiæ, Patrem misericordiarum adiuvisti, in opere nostræ salutis cooperans.

3. O misericordissima Virgo Maria, considerata miserabili virgine mea, longo

peccatorum deuio protracta, Dominus mecum esse non deberet per gratiam, sed per iustitiam: sed exora illum tuis assiduis precibus, ut deleat peccata mea, & sic mecum per gratiam, quâ mediante sic in præsenti viuam, ut in futuro gloriam percipiam sempiternam. Amen.



Contemplatio V.

De quarto verbo Salutationis.

Luc. 1.
28.

1. **B**enedicta tu in mulieribus, sanctissima Virgo Maria, id est, *pre mulieribus*, quia tu sola habuisti excellentius, quidquid boni fuit in mulieribus. Triplex autem fuit status bonus in mulieribus, coniugalis, vidualis, & virginalis. Tu, Virgo Maria, statum virginalem habuisti ante desponsationem, coniugalem post desponsationem, vidualem post benedictam passionem Filij tui. Sic ergo tu sola habuisti, quidquid boni fuit in mulieribus. Ideo Dei Filius singulariter imò mirabiliter in te voluit operari. Ut quæ pretium vniuersitatis debebat parere, cum statu quolibet vniuersitatis haberet aliquid commune. Cum coniugatis quidem, habuisti partum proli, cum continentibus votum castitatis, & cum virginibus perseverantiam Virginitatis, & dum continentes, coniugatos & virgines partu tuo redimeres, simul tibi fructus trigessimus, sexagesimus, & centesimus proveniret, nec plus meruisti pariendo, quam virginitatem seruando.

2. Fuiſti, Virgo Maria, benedicta præ omnibus mulieribus, omnes enim alia coniugata, habuerunt fecunditatem cum corruptione præcedente, virgines castitatem cum sterilitate. Tu verò, Virgo Maria, separasti pretiosum à vili, quia habuisti statum coniugalem, & vidualem cum virginitate, & virginali cum fecunditate. Ideo benedicta fuiſti super omnes mulieres, quia nulla vquam accepit, quod tu habuisti; scilicet quòd Virgo peperisti, & quòd non tantum super omnes mulieres, sed super omnem naturam & omnem intellectum fuit, scilicet quòd Deum genuisti. Sic ergo, Virgo Maria, sola habuisti omne bonum quod in mulieribus omnibus fuit, sola non habuisti maledictionem, quam omnis alia mulier habuit, sola habuisti quod nunquam mulier habere potuit, propter quod de te dici potest, *Maria optimam partem elegit.*

Ibid. 10.
24.

3. Optimam partem elegisti quantitate, quia totum habuisti. Optimam qualitate, quia primitias & excellentiam habuisti. Optimam dignitate, quia dignior pars intelligi non potuit. Igitur optimam partem elegisti, quia inter omnes quæ partem vquam acceperunt, tu sola Virgo Maria, optimam partem elegisti, & habuisti: & sic benedicta fuiſti in mulieribus: id est præ omnibus mulieribus nam antequam tu, Virgo Maria, conciperes Salvatorem, opprobrium erat & ignominia esse mulierem, propter perditionem primæ matris; similiter esse hominem propter latrocinium & prodicionem.

Adx.

DE BEATA VIRGINE. 301

Adæ. Eramus enim filij proditoris & latronis. sed, Virgo Maria, opprobrium primorum parentum, per te à nobis ablatum est, & insuper adeò generosi factissimus, quod regis & reginæ cælorum effecti sumus fratres.

4. Exora illum, piissima Virgo Maria, pro me peccatore, quoniam propter perpetrata peccata mea, à vobis degeneravi, vt me tuis sanctissimis precibus sibi reconciliare dignetur, & sic vitam miseram emendare, vt vitam habeam sempiternam. Amen.

Contemplatio VI.

De quinto verbo Salutationis.

1. **B**enedictus fructus ventris tui, beatissima Virgo Maria, hoc est, benedictus Filius tuus, qui in tuo vtero virginali fuit flos, quia scriptum est, *Flos de radice eius ascendet.* In mundo fuit fructus optimus, sapidissimus, suauissimus, & iucundissimus. Sapi enim pro diuersitate gustantium, Aliis est manna, propter dulcedinem; aliis est panis, propter fortitudinem; alijs vinum, propter compunctionem; aliis oleum, propter consolationem. Iste fructus creuit in paradiso, id est, in vtero tuo virginali, de quo qui dignè comederit, mortem non gustabit in æternum. Fuit iste fructus, medicina, in cruce; panis, in Sacramento; vita in anima; beatitudo, in celo; quod attendens Elizabeth suppleuit quod Angelus non dixerat, scilicet, *Benedictus fructus ventris tui;* non quia tu benedicta, idè fit benedictus fructus ventris tui, in quo benedictæ sunt omnes gentes, & de cuius plenitudine tu, gloriosa Virgo Maria, cum cæteris, quamquam differentiùs à cæteris, accepisti; & per hoc benedicta es, Virgo Maria, in mulieribus; Ille verò sanctissimus fructus tui vteri virginalis, benedictus est non in hominibus, non inter Angelos, sed *ipse est per omnia Deus benedictus in secula.*
2. Iste suauissimus fructus tuus, benedicta Virgo Maria, semel dignè gustatus, magis excitat appetitum animarum esurientium, & sitientium iustitiam. Est enim esca & potus, & tanta est eius species, quod in eum desiderant Angeli prospicere; & eius pulchritudinem, sol, & luna mirantur. Nec est solum speciosus, quantum alij fructus, sed vt dicitur, *Speciosus forma præ filiis hominum,* sic dicendus est speciosus præ fructibus vniuersis; vnde sicut granum madefactum, ex propria substantia germen emittit, à quo est totus fructus, sine alterius contactu grani; sic tu, intemerata Virgo Maria, madefacta Spiritu sancto, sine contactu viri, ex te sola germinasti Christum, qui est fructus benedictus, & tu benedicta, vnde *non potest arbor bona fructus malos facere.* Iste benedictus fructus latuit sub flore virginittatis in Conceptione, apparuit in Natiuitate, maturus fuit in prædicatione, & collectus fuit in arbore Crucis, & hoc in Passione; dulcis est iste benedictus

fructus in ore, prædicantibus; dulcior in palato, meditantibus; sed dulcissimus in corde, gustantibus.

3. O misericordissima Virgo Maria! Ego peccator, efurio, iustifica me tuis sanctissimis orationibus, & da mihi hunc cibum, sitio, da mihi hunc potum; infirmor, da mihi hanc medicinam; tribulor, da mihi hanc consolationem; morior, da mihi vitam, quæ me misericorditer, decursis præsentis vitæ miserius, perducatur ad vitam æternam. Amen.



P A R S V I I I .

DE CONCEPTV VIRGINEO GLORIOSÆ VIRGINIS MARIE.

Contemplatio I.

De Conceptu Virginis Mariæ.

1.



MBRA refrigerans, sacratissima Virgo Maria, quæ virtus Altissimi obumbravit tibi, & per carnem à te assumptam, te in umbraculum Ecclesiæ præparavit, obumbrata, & obumbrans, merito dici possis. Tibi enim ab Angelo nuntiante Filium Dei dictum est, *Spiritus sanctus superueniet in te, & virtus Altissimi obumbrabit tibi*. Triplex enim vix inflicta fuerat cunctis filiabus Euz, ob demeritum transgressionis eius; donec Spiritus sanctus *superueniens*, hoc est, *superueniens*, à te totum illud vix abstulit, ut nec corruptio carnis, impuram; nec præuicatio mentis, ream; nec damnatio; te miseram constitueret. Antea verò in natura humana erat duplex infirmitas, vna procedens ex superabundantia humorum, id est, carnalium desideriorum; altera ex frigidityte, quæ erat desperatio cælestium promissorum. Has duas infirmitates sanauit Spiritus sanctus medicus suis contrariis, id est, calido, frigidum; & humidum, sicco. Calidum fuit in te, Virgo Maria, ardor & desiderium cælestium, quo curatum est frigidum desperationis, sicco fuit, propositum continentie, & virginitatis, quo curauit humidum totius concupiscentie carnalis. Ideò dicitur, *Virtus Altissimi obumbrabit tibi*, quia ab æstu carnalium desideriorum, quæ extinguet in te, præstabit refrigerium.

2. *Obumbrabit igitur tibi*: Nam omne corpus vmbrosum in natura rerum, suam vmbra iacit in illud, quod oppositum est ei, à quo claritas procedit.

A simili est, Virgo Maria, de tua obumbratione; quia res à qua claritas processit, fuit diuinitas Verbi, sed opposita fuit splendori, fragilitas nostræ mortalitatis: Christi verò humanitas in Conceptione vnita Verbo, suscepit splendorem diuinitatis: & sic diuinitati & nostræ fragilitati interposita, non solum tibi Virgo Maria, sed & toti mundo obumbravit, vt obumbratio intelligatur assumptæ carnis mediatio. Et sicut radius solaris lubaris, ad diuersa loca, oppositi sibi corporis vmbra transmittit, sic Christus Sol iustitiæ, suæ humanitatis obumbrationem, ad diuersas partes Ecclesiæ transmissit diuersis temporibus. Ad Orientem vmbra iecit, cum in sua Conceptione de cælo descendens, & formam serui assumens, dedit humilitatis exemplum. Ad Occasum, cum in Passione contulit remedium. Ad Aquilonem, cum descendens in Infernum, ipsum momordit. Ad Meridiem, cum ascendens: testes suæ gloriæ transuexit in cælum.

3. O Virgo Mater, ora illum, quem misericorditer accepisti, vt prauos conceptus mentis meæ restinguat & pios conceptus cum operibus subsecutis tribuat mihi, & gloriam sempiternam. Amen.

Contemplatio II.

De Eodem.

1. **O** Verbum dulcissimum, Verbum mellissimum, Verbum omni gaudio & exultatione plenum! dictum est tibi per Angelum, ô beatissima Virgo Maria, *Spiritus sanctus superueniet in te*. Venit namque per sanctificationem tui conceptus virginæ, *Et virtus Altissimi obumbrabit tibi*. Illa fuit virtus de qua dicitur, *Notam fecisti in populis virtutem tuam*, id est Christum, qui est Virtus Dei. Hæc Virtus obumbravit tibi; miscuit autem Dominus diuinitatem humanitati quando fulgorem diuinitatis nube humanitatis temperauit. Aliter tantum fulgorem humanus aspectus ferre non potuisset: nam claritate Solis æterni, nec tuus aspectus singularissima Virgo Maria, sustinere potuisset, nisi nubes carnis virginæ primitus obumbrasset. Tibi igitur Virgini Mariæ, obumbravit, contra omnem tribulationem protegendo; quia, sicut vmbaculo regitur quis à calore solis, ne ei noceat, sic gratia Spiritus sancti te virginem protexit ab omni mala infestatione. Obumbravit ergo tibi, non lædendo; sicut non lædit vmbra, neque grauat, sed refrigerium præstat.

2. Sed, beatissima Virgo Maria, quid est hoc, *Virtus Altissimi obumbrabit tibi*? Qui potest capere capiat, *Quis enim*, te excepta, hoc intellectu capere vel ratione discernere possit qualiter splendor ille inaccessibilis, tuis visceribus virginæ sese infuderit? soli datum est nosse, cui soli datum est experiri: Ergo Spiritus sanctus superueniet in te, qui vtiq; suâ potentia fecundaabit te, & virtus Altissimi obumbrabit tibi: hoc est illum modum, quo de Spiritu sancto concipies, Dei Virtus, & Dei Sapientia Christus sic in suo sacratissimo

Q 9 ij

consilio obumbrando contegit, & celat, quatenus notus habeatur sibi & tibi. Ac si Angelus respondeat ad te, Virgo Maria, quid à me requiris, quod in te mox experieris: scies, scies, & feliciter scies, sed illo doctore, quo & auctore. Ego autem missus sum virginalem nuntiare conceptum, non creare. Non potest doceri nisi à donante, non addisci, nisi à suscipiente; hanc namque secretam generationem te solà conscià operabitur, vt dicere possis post partum; *sum, quod eram* (id est Virgo) *nec eram, quod sum* (id est Mater) *modo dico verumque*; id est Mater & Virgo.

3. O clementissima Virgo Maria, per operationem tanti & tam sacratissimi mysterij, & per tam ineffabile gaudium, quod inde suscepisti, adiuuare me digneris tuis sanctissimis deprecationibus. Ora illum pro me miserrimo peccatore, quem miraculosè operante in te sancto Spiritu, in tuo utero virginali concepisti; vt qui carnem assumendo humanam, frater noster dignatus est fieri, purgatis meis vitiis & peccatis, gratiam mihi tribuat agendi gratias de tam salutifero dono, humano generi gratiosè concessio; vt soluto carnis vinculo, anima mea in cœlesti gloria colloceatur. Amen.

Contemplatio III.

De eodem.

1. **O** Salutifera, & in æternum benedicta, conceptus tuus virgineus, contrarius reperitur conceptui cuiuslibet alterius mulieris: quia in conceptu vitato omnium mulierum, interuenit carnalis operatio; sed, beatissima Virgo Maria, in sacratissimo conceptu tuo interuenit solum spiritualis operatio. Vnde, cum quæsis ab Angelo, *Quomodo fiet istud?* Respondit Angelus huic *quomodo*, dicens; *Spiritus sanctus superueniet in te, & virtus Altissimi obumbrabit tibi*. Igitur contra carnalem operationem, dicitur, *Spiritus*, id est, spiritualis operatio. In conceptu alterius mulieris, interuenit integritatis dissipatio. Sed, sacratissima Virgo Maria, nulla dissipatio tuæ virginæ integritatis fuit in te; quia opus fuit Spiritus sancti, qui non nouit virginem corrumpere, sed sanctificare; nescit pudicitiam minuere, sed augere; nescit fœdare, sed fœcundare; nescit vilificare, sed glorificare. Vnde te timentem de tuâ virginitate, asscurauit Archangelus Gabriel, dicens tibi: *Ecce concipies, & paries Filium, & vocabis nomen eius Iesum*, id est, *Saluatorem*; qui saluat, non violat; confracta solidat, non confringit solida; secundum nomen eius, ita & opus eius. Si igitur te matrem corrupisset in conceptu vel partu, iam non videretur Saluator, sed potius dissipator, quod ablit.

2. Igitur superuenit Spiritus sanctus duobus modis in te, & diuinæ potentie suæ efficaciam ostendit; quia & mentem tuam, quantum humana fragilitas patitur, ab inclinatione vitij castigauit, vt cœlesti cōsēs digna partu, &

in vtero tuo virginali illud sanctum ac venerabile Redemptoris nostri corpus, solâ sui operatione creauit, id est, nullo virili interueniente actu, carnem de intermerata carne virginea, sacro-sanctam, Dei Virtus formauit. Quem enim apertè prius *Spiritum sanctum* dixit, hunc ipsum denuò *virtutem Altissimi* nominauit. *Obumbrabit* autem tibi *virtus Altissimi*, quia cor tuum impleuit, & ab omni æstu concupiscentiæ temperauit, & emendauit à desideriis temporalibus, ac donis cœlestibus mentem tuam simul consecrauit & corpus. Virtus igitur, Virgo Maria benedicta, Altissimi obumbrabit tibi. Vmbra à lumine & corpore erecto solet formari: *Virtus* ergo *Altissimi obumbrabit tibi*, dum incorporea lux diuinitatis corpus in te suscipit humanitatis.

3. O purissima Virgo Maria, ora pro me impiissimo peccatore illum, qui tibi obumbravit, vt sub vmbra sua me recipiat, & à calore & feruore terrenorum & carnalium desideriorum me protegat, & defendat; & vmbra gratiæ mihi conferat; quâ mediante, miserabilem vitam meam emendem, de peccatis satisfaciam, nec ad illa vltà redeam; sed virtuosè cogitando, loquendo, & operando, in fine regnum apprehendam sempiternum. Amen.

Contemplatio I V.

De Eodem.

1. **C**oncepisti, sacratissima Virgo Maria, de Spiritu sancto, non quod de substantia Spiritus sancti semen partus acceperis, sed per amorem & operationem sancti Spiritus, ex carne tua virginea, partui diuino substantiam natura ministravit. Nam quia in corde tuo amor Spiritus sancti singulariter ardebat, idè in carne tua virtus Spiritus sancti mirabilia faciebat: & cuius dilectio in corde tuo non suscepit socium, id est, amorem alienum, eius operatio in tua carne virginea non habebat exemplum. Idè dictum est tibi, *Spiritus sanctus superueniet in te, & virtus Altissimi obumbrabit tibi*, vt substantiam carnis ministrans carnalis concupiscentia moreretur. Redemptio etiam mundi fuit ex benignitate. Benignitas autem attribuitur Spiritui sancto. Venturus igitur in mundum Filius Dei, de Spiritu sancto dicitur incarnandus. Superueniet namque Spiritus, quia venit & super, & super cor, super meritum, super cogitatum, super speratum, super desideratum, & super petatum. Non enim potuisses prometeri, non ausa fuisses cogitare, non sperare, non desiderare, non petere, vt Filius Dei incarnaretur in te. *Virtus* ergo *Altissimi obumbrabit tibi*, quia in te vmbra figuram habet corporis sine corruptione. Fuit etiam tibi Virgini gloriosæ, *Dominus in conceptione protector potentie per Spiritum sanctum, &*

Qq iij

propter hoc specialiter missus est ad te Gabriel, qui interpretatur *Fortitudo Dei*. Fuit etiam tibi Dominus in tegimen ardoris, in conceptu; quia concepisti sine culpa: nam per obumbrationem Spiritus sancti, extinctus est in te ignis totius fomitis, & ita sopitus, ut nullus in te posset excitari pruritus. Fuit etiam tibi fundamentum virtutis in partu; quia non laborasti pariendo, sed sine dolore peperisti Salvatorem omnium sæculorum. Superuenit igitur in te, humillima Virgo Maria, Spiritus sanctus, ut totum, quod carnale erat, absorberet in te, & te totam faceret spirituale.

3. Ad te recurro, Virgo Maria misericordissima, ad te humiliter recurro, ego iniquissimus, totus terrenis vitiis inuolutus, & nihil de spirituali, vel modicum ex magna malitia mea possidens. Exora illum, qui superuenit in te, & impetra mihi tuis sanctissimis deprecationibus, ut super me veniat gratia eius, & eius misericordia, quæ mentem meam eleuet à terrenis & carnalibus, quæ militant aduersus animam, & ad superna dirigat, ut in fine illum possideam per infinita sæculorum sæcula. Amen.

Contemplatio V.

De Eodem.

O Virtuosissima, & perfectissima Virgo Maria, dictum est tibi gratiosè ab Angelo, *Spiritus sanctus superueniet in te*, id est, de superno Patre luminum veniet in te: *Et virtus Altissimi obumbrabit tibi*: id est, ad honorem tuum, *Virtus Altissimi*, id est, Filius Dei Patris, in te vmbraculum faciet. Nam de carne carnem assumendo, diuinæ naturæ fecit vmbraculum; & sub vmbra carnis splendorem diuinitatis obtexit, ut præueniendo te in benedictionibus dulcedinis, suauitatem diuinæ voluptatis degustares; *Et virtus Altissimi obumbrabit tibi*; ut femina & Virgo pauida, contra annos teneræ ætatis, & contra fragilitatem sexus, thesauros sapientiæ & scientiæ in te recipi & recodi non timeres. *Spiritus sanctus superueniet in te*, ut eius fructificationem experireris, quod *Suauis est Dominus operi eius*, sed tibi super excellenter: & quod *Miserationes eius super omnia*, ut assumptæ carnis velamine interiecto, susceptrix diuinæ maiestatis efficereris.

2. *Spiritus sanctus superueniet in te*, ut prima, sub lege contra legis male dictum virginittis florem Deo voueres. Secundo, in te superueniet, ut sola omnium foeminarum, Virgo conciperes, & pareres Deum & hominem, & Virgo permaneres, *Virtus* quoque *Altissimi obumbrabit tibi*, ut omnem nitorem temporalis gloriæ, omnem fauorem blandientis fortunæ ab affectu & a spiritu tuo præ amore cælestium excluderes. *Obumbrabit tibi iterum, ut te ab omni incentiuo carnalis illecebræ non dico temperaret, sed super*

antecedentem statum, & supra humanum modum instar Angelicæ puritatis te insensibilem redderet. In superuentione ergo Spiritus sancti gustasti & vidisti quoniam suavis est Dominus, id est, Spiritus sanctus, de quo concipiebas. In obumbratione virtutis Altissimi, intellexisti Dei virtutem & sapientiam, id est, Christum Verbum, quod concipiebas; alioqui quomodo de Spiritu sancto corporaliter conciperes, nisi eiusdem amore spiritali prius & suauius tangereris? Aut quomodo Verbum in tuum uterum virginalem descenderet, nisi & tu, Virgo Maria, ad intelligentiam Verbi mente rapta fuisses? Prius ergo factum est tibi sapientia in mente quàm caro fieret in tuo utero virginali.

3. O benignissima Virgo Maria, adiuuare me digneris misericorditer, exorando illum assidue, quem in tuo utero virginali concepisti, ut mundare dignetur immundissimum cor meum, quo purificato ab omni labe peccati illum ibidem firmâ fide concipiam, & conceptum retineam, ut cum ipso viuam per infinita sæcula sæculorum. Amen.

Contemplatio VI.

De Eodem.

1. **O** Sacratissima Virgo Maria, *Sicut pluuia in vellus descendit*, ita in tuum uterum virginalem, gloriosissimus Filius tuus cooperante Spiritu sancto descendit. Namque, sicut pluuia cum summo silentio descendit in vellus sibi expositum, & illud perfundit & replet, sic Verbi diuinitas repleuit tuum corpus virgineum, & possedit tuam virgineam mentem, quando tu, beatissima Virgo Maria, te totam exponens dixisti, *Ecce Ancilla Domini, fiat mihi secundum verbum tuum*. Et, sicut pluuia perfundens vellus, illud integrum illibatūque conseruat, sic Deitas te integram illibatūque, gloriosissima Virgo Maria, conseruauit ad ingressum similiter & egressum. Sicut enim te integram inuenit, sic & integram nascendo reliquit. Remansit namque genitale secretum clausum & inuiolatum, nec concussa sunt tua materna viscera virginea; sicut nec vellus sædatur aut corrumpitur, cum impletur aut vacuatur à pluuia.

2. Et sicut stillicidia stillant super terram, & inebriant terram ac germinare eam faciunt, ita descendens in te virtus Altissimi, germinare te fecit germen vitæ; scilicet delectabile germen illud, & non aliud quàm quod ex carne tua per infusionem diuinæ virtutis erupit. Quid enim aliud, sanctissima Virgo Maria, fuerunt Spiritus sancti obumbratio, plenitudo gratiæ, feruor fidei, castitas virginalis, quàm stillicidia quædam gratiarum in te descendentium, ut tu benedicta terra produceres fructum tuum? Descendit igitur pluuia. Venit Dei Filius in te de sinu Patris, sicut pluuia in vellus placidè in placidam, secretè in secretam, benignè in benignam, iocundè in

Indic. 6.

37. 38.

1. salm.

71. 6.

Luc. 1.

38.

Isa. 55.

10.

iocundam, vtiliter in perutilem, & in fructiferam fructuosè. Descendit namque omnis plenitudo gratiæ & abundantia. Ideò sacratissima Incarnatio tui Filij benedicti, dicitur *Plenitudo*. Descendit Filius tuus in tuum vterum virginalem, vt satisfaceret petitioni Ecclesiæ dicentis, *Vtinam dirumperet cælos, & descenderet*, descendit, inquam, vt compassionem nobis, ostenderet, qua nobis compatiabatur; & vt nos liberaret de manibus Ægyptiorum, id est, dæmonum, descendit ad nos, quia non poteramus ascendere ad eum, sicut medicus venit ad decumbentem ægrotum. Ideò eius benedicta Incarnatio dicitur *Visitatio*, quia *visitauit nos oriens ex alto*.

Inc. 1.
78.

3. O benignissima Virgo Maria, ego miserabilis peccator infirmus sum, decumbens in lecto peccati & miseriæ: Ora illum misericorditer, vt descendere dignetur antequam moriar: visitet per suam piissimam gratiam infirmitatem meam gratissimam; sanet me ægrotum, ob meritum suæ sacratissimæ Incarnationis, vt saluus sim. Amen.

Contemplatio VII.

De Eodem.

1. **D**esiderium sanctorum Patrum impletum est in te, gloriosissima Virgo Maria, qui dicebant, *Rorate cæli desuper, & nubes pluant Iustum, aperiatur terra, & germinet Saluatorem*. In hoc namque desiderio, tria petebant sancti Patres; scilicet à cælis, rorem; à nubibus, pluuiam; & germen à terra. Per cælum, Angeli; per nubes, Prophetæ; & per terram, tu, gloriosa Virgo Maria, intelligi debes. Igitur *rorate cæli desuper*, id est, veniat Archangelus Gabriel, & *roret*, id est, rorem annuntiet, scilicet Dei Filium, qui est *ros Hermon*, quod interpretatur *lumen exaltatum*, quia Christus, qui est lumen, primò exaltatum fuit in candelabro Crucis in Passione; & secundò in cælo in Ascensione, *Qui descendit in montem Sion*, id est, in te, Virgo Maria, in Incarnatione, manente in te integritate virginittis, sicut ros descendit in lilium sine lilij corruptione. Sed qualiter descendit, non capit mens humana; quia *generationem eius quis enarrabit?* sed quòd in te, Virgo Maria, descendit, credo, & confiteor: & quòd ex eius aduentu magis incanduerit flos tuæ virginittis.

Psal. 131. 3.

Isa. 53. 8

2. *Nubes pluant Iustum*: Nubes tonant, pluunt, fulgurant; sed hîc petimus vt pluunt, non enim possumus sustinere fulgura & tonitrua. O nubes, Christum pluite, id est, pluuiam nuntiate, quæ leni icû percutit, & percutiendo rigat; *Nubes igitur pluant Iustum*, id est, veniat, qui iustitiam faciat de diabolo seductore; sicut fecit de homine seducto. Iustè enim tenebatur homo, sed iniustè tenebat eum diabolus, propter quod ei nocere deberet. *Aperiatur ergo terra, & germinet Saluatorem. Aperiatur terra,*

terra, id est, fias tu, Virgo Maria, porta cœli, *Inirent ut astra flebiles*; quæ Eccl̃s.
porta, clausa erat cunctis per Euam. *Aperiat igitur terra, id est, tu, Virgo* in Hym.
Maria, consentias nuntio Angelico. O glo-
riosa Domi-
na.

3. Sed cum tu, beatissima Virgo Maria, dicaris ter porta clausa, id est, ante partum, in partu, & post partum, quomodo dicitur *aperiat igitur terra*? O sanctissima Virgo Maria, tu aperuisti aures ad audiendum verbum Angeli, cor ad credendum & consentiendum, os ad consensum exprimendum, & orandum, ut fieret, quod tibi promittebatur. Bene dixisti, *Fiat mihi secundum verbum tuum*; & sic aperta fuit terra, id est, tu benedicta Virgo Maria, & *germinasti*, id est, concepisti Salvatorem, operatione Spiritus sancti; tamen fuisti clausa ad consentiendum, donec intellexisti, quod posses concipere, & parere manens Virgo: nec incarnatum in te fuisset Verbum Patris, nisi verbis Angelicis consensisses. Luc. 1. 38.

4. O misericordissima Virgo Maria, ob meritum tanti gaudij, & tanti mysterij, adiuuare me digneris, exorando illum, quem sic misericorditer concepisti, ut sic me ordinare, & disponere ad suum seruitium dignetur, quod ad gratias referendas, de tanto beneficio assidue assurgam, & in fine suum regnum mihi sempiternum concedat. Amen.

Contemplatio VIII.

De Eodem.

1. **O** Purissima Virgo Maria, *ros*, id est, Spiritus sanctus, superueniens in te, in Filij Dei Conceptione, fomitem in te penitus sic extinxit, quod nullo modo postea peccare potuisti. Iste *ros* ad benedictam prolem suscipiendam te fecundauit, de quo miraculose concepisti. Christus *ros* dicitur, ratione originis; quia de cœlo est. Vnde legitur, *Qui de cœlo venit*, Ioan. 3. 31. *super omnes est*. Dicitur etiam *ros* ratione proprietatis: Ros enim occulte & suauius descendit; & Filij tui benedicti Incarnatio, Virgo Maria, tam secreta fuit, quod multi Angeli nescierunt. Vnde admirabantur in eius Ascensione, dicentes, *Quis est iste, qui ascendit*? Ros ardorem temporis aut extinguit, aut temperat. Iesus Christus benedictus Filius tuus, Virgo Maria, obuians Diabolo venienti ab incendio gehennæ, ubi habitat, & ab ardore desiderij malè faciendi, vnde venit ad tentandum nos, ut secum comburat in fornace gehennæ; (accendit enim peccatores per culpam, ut secum eos comburat per penam;) humilem effecit eum; quia Christus patiens in Cruce, humiliavit calumniatorem. Vnde dicitur, *Tu humiliasti, sicut vulteneratum, superbum*; id est diabolum; & minoraasti potentiam eius. Psal. 88. 11.

2. Venit etiam in te, Virgo Maria, tuus Filius benedictus, ut *ros*, in sua Incarnatione, ut ardorem peccati, quo mundus flagrabat, extingueret. Nam ante eius aduentum, aestuabat totus mundus incendio peccati: ad hunc

R r

ardorem sedandum misit Dominus primò, inundationem diluuij; secundò, pluuiam, id est, Prophetarum prædicationem; & tertio rorem salutiferum, id est, semetipsum ad refrigerandum incendium vitiorum & humiliavit superbiam ipsius diaboli humilitate Passionis suæ; sed non sic potentiam tentandi depresso, quin adhuc posset tentare, quia totum cedit ad utilitatem hominis. Non enim Filius tuus benedictus, Virgo Maria, percussit inimicum superbum, per potentiam, ne ille posset conqueri de violentia; sed per prudentiam. Ros etiam suavis, & levis est, tunc enim lenitas, & suauitas Filij tui, benedicta Virgo Maria, fuit ostensa, quando *apparuit benignitas, & humanitas Saluatoris nostri Dei*, id est, benignus, & humanus Deus.

Ad Tit.
3.4.

3. O clementissima Virgo Maria, Dei Mater, per ista sancta nomina tua, *Virgo Mater*, te suppliciter exoro, ut tuis sanctissimis deprecationibus hunc rorem mihi mittere digneris, qui ardorem, & æstum concupiscentiarum, & vitiorum refrigeret in me, & compescat; mentem meam aridam irriget gratuitis donis, ut secundum placitum suum hinc viuendo, gloriam mihi tribuat sempiternam. Amen.



Contemplatio I X.

De Eodem.

1. Singularissima Virgo Maria, *Verbum caro factum est* in te, & de te; id est, Dei Filius benedictus caro factus est; ut caro fieret Deus. Ideo dicitur, *Quotquot autem eum receperunt dedit eis potestatem filios Dei fieri, his qui credunt in nomine eius.* Recipiendo enim Filium Dei per fidem, nos carnales, efficiamur Filij Dei. Gloriosissima Virgo Maria, Verbum caro factum est in te; nam, quia homo factus est ad imaginem & similitudinem Dei secundum animam, vnitus est Deus Filius Dei carni nostræ; ideo dicitur, *In similitudinem hominum factus, & habitu inuentus ut homo*; ut homo similis esset Creatori, tam in carne quàm in anima; & saluaretur in utroque. Beatissima Virgo Maria, Verbum caro factum est in te; quia imago Dei deformata erat, & deleta in homine per peccatum Adæ, qui cum in honore esset quia videlicet creatus ad imaginem & similitudinem Dei, & cuius paradisi, non intellexit, & ita comparatus est iumentis insipientibus, & similis factus est illis: Sed benedictus Filius tuus in te venit incarnari, ut hominem deformatum reformaret, mortuum suscitaret, deletum reficeret, & perditum restauraret. Et quia carnales sumus, & carnem diligimus, *Verbum caro factum est*, Virgo Maria, in tuo vtero virginali, quia quodlibet simile suum appetit simile; & factus est nobis similis secundum carnem, ut ipsum appeteremus, & diligeremus.

Ioan. i.
12.

Phil. 2.
7.

Psalme.
48.13.21

2. Sacratissima Virgo Maria, venit Filius Dei tectus nube carnis tuæ virginæ, vt videri possit à nobis, & agnosci; qualiter autem ingressus est in tuum vterum virginalem nemo nouit, nec qualiter egressus est. Egressio sola cognoscitur, absque veste Deus (vt ita dicam) ingreditur, qui (vt rectè dicam) carniæ vestitus egreditur: sicut Verbum semel venit ad nos, & *Verbum caro factum est, vt habitaret in nobis*; sic quotidie venit ad nos in spiritu, vt inhabitet in nobis. Habitauit enim in nobis, vt carnis opprobrium tolleretur, quia peccatum Adæ, factus fuerat omnis homo mendax; & etiam vt tolleretur omnem iniquitatem; quia *nemo bonus, nisi solus Deus*. Ideo dicitur *Verbum quasi verum bonum*, contra malitiam, & caro contra fragilitatem; & sicut cibus solidus masticatus à nutrice, reducitur in liquidam substantiam, vt transeat in nutrimentum pueri; sic tu, sanctissima Virgo Maria, nutrix nostrâ, tuum benedictum Filium emollisti nobis, & fecisti esibilem, & quasi decoxisti igne immensæ charitatis tuæ.

1. *Luc. 1.*
14.

2. *Luc. 48.*

3. *19. Mar.*

4. *10. 18.*

5. *Matth.*

6. *19. 17.*

3. O misericordissima Virgo Maria, ego iniquissimus peccator tuum benedictum Filium mihi durum & seuerum in mea delicta, cum iustitia & rigore, timeo, sed tua piissima intercessio reddat eum mihi mollem, & misericordem, vt peccata mea cum pietate dolendo, benigna eius dextera me recipiat in æternum. Amen.

Contemplatio X.

De Eodem.

1. **F**ecit tibi *magna qui potens est*, beatissima Virgo Maria, quia fuit in te aliquid, quod fuit secundum naturam; & aliquid, quod fuit contra naturam, & aliquid, quod fuit supra naturam. Contra naturam infirmitatis naturæ fuit, quod Virgo concepisti, secundum naturam fuit, quia in benedicto vtero tuo, fuit tuus Filius formatus & conceptus, & tandem secundum legitima nascendi tempora illum peperisti: supra naturam fuit non solum huius infirmitatis nostræ, sed etiam supra naturam primæ conditionis quod sine virili semine Virgo concepisti: puritatis namque fuit quia sine concupiscentia seminare potuisti. Honoris fuit, quod prolem à contagio peccati mundam effudisti, gloriæ fuit, quod non de viro, sed de Spiritu sancto concepisti.

1. *Luc. 1.*
49.

2. Sed, sacratissima Virgo Maria, quare gloriosissimus Filius tuus solum nasci voluit ex te, & non de utroque sexu, cum vtrumque ad mundam prolem seminandam mundare potuisset? Certè, Virgo Maria benedicta, si de utroque carnem assumpsisset, utique à proprietatis suæ similitudine longius recessisset, & ad nostram minùs appropinquasset. Proprietatis suæ fuisset dissimilis, si patrem & matrem habuisset in humanitate, qui solum patrem habebat in diuinitate. In hoc etiam dissimilior

R r ij

nobis fuisset, si duos, quod nos possumus, patres habuisset, sed & ratio hoc exigebat ut sic vnum principium esset in generis nostri reparatio-
ne: Oportuit ergo, Reparatorem generis nostri, aut de solo viro, aut de sola femina nasci. Sed si de viro sexum femineum assumpsisset, ordinem naturæ confudisset, qui femineum supra virilem extulisset; & ipse idem diceretur Filius ex diuinitate, & Filia ex humanitate. Et si virilis fuisset sexus quem assumpsisset, & virilis de quo assumpsisset, habuisset sanè vir, geminum pro hac parte honoris solatium, sed femina nullum. Et certè si de viro formari voluisset, materiam quidem de carnis nostræ substantia traxisset, sed in eius incarnatione naturæ operatio nihil habuisset; & sic à naturæ nostræ proprietate longius discessisset. Sed si muliebrem de muliebri sexu assumpsisset, ordinem, ut dictum est, naturæ confudisset; quia geminato in hoc muliebris solatio, virilis sexus singularis priuilegij nihil simile habuisset.

3. O beatissima Virgo Maria, qualis dignitas ista fuit tibi, ut Virgo & Mater esses! Mater non solum hominis, sed Dei & hominis, illum concepisti, illum peperisti, illum lactasti & nutriuisti, & cum eo permansisti & permanebis lætissima in æternum. Amen.

Contemplatio XI.

De Eodem.

Luc. 1.
27.

1. **B**eatus Venter tuus, beatissima Virgo Maria, qui Iesum Christum portauit; Non enim à ventre Filius, sed venter à Filio beatificationis honorem accepit. Beatus Venter igitur tuus, quia ibi Deus factus est homo; Verbum, infans; Æternus, temporalis; Immortalis, mortalis; Immen- sus, paruulus; Creator, creatura; & qui fecit ventrem, factus est in eodem ventre; qui venter majus aliquid seipso continuit, id est, Deum: quem totus non capit orbis: qui seipsum clausit in tuo vtero virginali, & in tuis visceribus virgineis gloriosissima Virgo Maria. Beatus fuit Venter tuus, quoad te, & quoad nos, quoad te; quia omne bonum tui pretiosissimi Ventris fuit integritas virginalis, fecunditas coniugalis, & continentia vidualis; quia tu Virgo Maria, inuiolata semper permansisti. Fuisti fecunda sine viro, fuisti vidua mortuo sponso, fuit etiam Venter tuus benedictus quoad nos, quia releuauit miseriam nostram, id est, nostræ seruitutis, quia contulit nobis thesaurum nostræ redemptionis, releuauit etiam miseriam nostræ infirmitatis, & necessitatis, quia fuit apotheca nostræ curationis.

2. Sanctissima Virgo Maria, beatus est Venter tuus, quia concepit cum integritate, portauit cum lenitate, & peperit cum suauitate, cum è contrario omnis mulier concipiat cum corruptione, portet cum grauamine,

& pariat cum dolore. Intemerata Virgo Maria, beatus est Venter tuus, quia à Spiritu sancto consecratus, & Filio Dei repletus est: & omne datum optimum, & omne donum perfectum, nobis inde fluxit: Ex eo namque exiuit fons vitæ, qui Christus est, tendens ad resurrectionem mortuorum, ad redemptionem perditorum, ad saluationem viuorum, ad erectionem lapsorum, ad ereptionem incarceratorum, ad destructionem inimicorum, ad restaurationem Angelorum.

3. Benignissima Virgo Maria, ex tuo vtero virginali processit benedictus Filius tuus medicamentum nostræ curationis, viaticum nostræ peregrinationis, pretium nostræ redemptionis, & præmium nostræ remunerationis. Et quia tu, misericordissima Virgo Maria, in tuo vtero virginali portas nos miseros per compassionem, & quantum in te est, omnibus communicas tuam gratiam per charitatem; ad tuam gratiam per charitatem; ad tuam pietatem ego nequam peccator recurro vt fructum virginitatis tui vteri mihi communices, me reconciliando sibi, vt illo misericorditer fatier in æternum. Amen.

Contemplatio XII.

De Eodem.

1. **G**ratiarum plena Virgo Maria, quamuis tibi non coniungeretur in vnitatem personæ diuina Sapientia. Tamen portionem carnis vel sanguinis tui purissimi in vnitatem personæ sibi sociavit ipsa diuina Sapientia, quando illud impletum est *simul in vnum diues & pauper*, & tunc de te ipsa dicere poterat, *Dum esset Rex in accubitu suo nardus mea dedit odorem suum. Dum esset Rex*, id est, Christus, qui regit omnia, *in accubitu suo*, id est, in sinu Patris nondum factus visibilis, *nardus mea*, id est, humilis virginitas, *dedit odorem suum*, id est, præcipuum vsque in accubitum paterni solij, qui odor suauissimus scilicet humilitas, & virginitas, Dei Filium illexit, & totum rapuit; qui illectus, & totus raptus de sinu Patris salit in tuum vterum virginalem, & à summo cælo egressio eius, quia de eo dicitur, *Omnipotens sermo tuus Domine, à regalibus sedibus venit.*

2. Non solum in tuo vtero virgineo odorem virginitatis, sed etiam in mente odorem humilitatis reperiens, & his odoribus odorem suæ diuinitatis admiscens, te de ancilla fecit sponsam, & de creatura genitricem. Sic nimirum tua humilitas virginalis Regem cæli traxit ad terram, & velut aquilam odore prædæ concupitæ illectam carni tuæ immaculatissimæ copulauit, & nimio peruolans desiderio præuenit nuntium suum ad te Virginem Mariam, quam elegerat, & quam amauerat, & cuius decorem concupierat. Et quasi vnicornis mansuetissimus in sinu tui vteri virginalis se recepit, depositâ iracundiæ ferocitate, quam propter peccatum primorum

R r iij

parentum in genus humanum usque tunc habuerat. Vnde sicut ante tecum fuit, velut cum ancilla; sic post tecum fuit, velut sponsus cum sponsa, & velut Filius cum Matre dilectissima; & tunc celebratum fuit coniugium inter humanam & diuinam naturam; & hoc in tuo vtero virginali, scilicet quando respondisti, *Fiat mihi secundum verbum tuum*; quia tunc coniunctio naturarum facta fuit, quando Verbum caro factum est, & tunc, beatissima Virgo Maria, facta fuisti cum diuina Sapientia vnus spiritus, & vna caro. Ideo scribitur, *erunt duo*, scilicet Christus & tu, *in carne vna*; scilicet virginali.

1. Cor. 6.
16.

3. Propter hanc conuenientiam & multiplicem vnionem inter te & diuinam Sapientiam, ferè omnia quæ dicuntur de diuina Sapientia, exponi possunt de te Virgine benedicta. Exora illum, piissima Virgo Maria, vt dirigat sic vitam meam, quod anima mea per veram dilectionem vnita secum viuat, & ab eo nunquam separetur. Amen.

Contemplatio XIII.

De Eodem.

1. **S**acratissima Virgo Maria, de te dici potest, *In pinguedine terra, & in rore cæli erit benedictio tua*. Nam per *rorem cæli* tua Virginitas intelligitur, & per *pinguedinem terra* fecunditas tui vteri virginalis. Ideo fuisti benedicta inter mulieres, id est, inter matres, & virgines; sicut enim lapis angularis in duobus consistit parietibus, sed nec totus in vno, nec totus in altero, sic tu, pretiosissima Virgo Maria, in numero matrum fuisti quoad fecunditatem, & in numero virginum quoad incorruptionem; sed nec omnino in pariete matrum, quia fuisti incorrupta, nec ex toto in pariete virginum, quia fuisti fecunda.

Gen. 27
39.

2. Talem quippe decebat esse Matrem Saluatoris, vt Mediatrix Mediatoris, & Lapis angularis, Lapidem pareres angularem. Christus Mediator Dei & hominum Lapis est angularis, in quem duæ concurrunt naturæ, diuina & humana; stans in vtroque pariete; quia Deus & homo, & Mediator Dei & hominum; iustus cum Deo, mortalis cum hominibus: quem de te Matre Virgine nasci decuit, vt in matre mortali conciperetur mortalis, & in virgine conciperetur iustus; necesse erat, vt quicumque per matris corruptionem conciperetur, in peccato originali conciperetur iniustus; nullus autem peccator saluare poterat alium peccatorem, cum in eadem damnatione esset cum reo. Ad hoc præparabatur tua Virginitas, quia nulli alij virgini, quàm tibi, hoc priuilegium debebatur; vt sicut primus Adam de terra virgine factus fuerat, ita secundus Adam de virgine fieret homo. Et, sicut per Euam virginem facta fuerat humani generis perditio, ita per te Virginem Mariam, fieret eiusdem reparatio. Vnde canitur, paradisi Porta per Euam

DE BEATA VIRGINE. 315

cunctis clausa est, & per te Virgo Maria, iterum patefacta est; & ut qui in cœlis habebat patrem sine matre, haberet in terris matrem sine patre; & sic quasi duobus testibus probaretur Christi diuinitas, in Matris virginitate, & Patris diuinitate.

3. Voluit itaque te esse virginem, ut de immaculata immaculatus procederet, omnium maculas purgaturus. Voluit etiam te esse humilem, ut mitis & humilis corde prodiret; harum in se virtutum necessarium hominibus, saluberrimumque exemplum ostensurus: O purissima Virgo Maria, huiusmodi exemplum ego maximus peccator non accepi, sed superbus sum, & corruptus, & abominabilis totus factus sum coram Deo & te. Sed, piissima Virgo Maria, compati mihi digneris exorando tuum Filium benedictum, qui mihi indulgere per suam misericordiam dignetur, & gloriam sempiternam concedere. Amen.



Contemplatio XIV.

De eodem.

1. **T**ota speciosa facta es sanctissima Virgo Maria, principaliter ex diuini Verbi generatione: quia est splendor paternæ gloriæ, candor lucis æternæ, speculum sine macula, in quem desiderant Angeli prospicere, cuius pulchritudinem sol & luna mirantur. Sicut enim beatissima Virgo Maria, ferrum ab igne extractum, non solum ignitum, imò totum est ignis, & sicut aër illustratur à sole, qui dum inflamat aërem imprimit ei suum calorem: & velut aquæ gutta dolio vini optimi infusa, tota transit in saporem, & odorem, colorem vini: & sicut vitrum candidum & purum illuminatum à sole, totum transit in splendorem solis: sic sanctissima anima tua Spiritu sancto repleta & maxime luce illâ cœlesti, id est, Filio Dei in te descendente, non solum iam diuina effecta; sed tota fuit deificata. Et sicut Filius Dei carnem assumpsit ex te, ita tu, benedicta Virgo Maria, quiddam diuinum & ineffabile ex Dei omnipotentia mutuasti. Vnde dicis, *Dilectus meus mihi, & ego illi*: *Dilectus meus mihi*, scilicet, *subditus* & obtemperans, sicut Filius Matri; *& ego illi*, scilicet, obediens & obtemperans, sicut Filia Patri, sicut Ancilla Domino, sicut creatura Creatori. Hebr. 1. 13. Sap. 7. 26. 1. Pet. 1. 12.
2. Si quis adhæret Deo, per fidem & dilectionem vnus est spiritus cum illo, vnitate scilicet amoris, & gratiæ, quare non magis beatissima anima tua, à qua nunquam recessit, & corpus, in quo nouem mensibus habitauit incarnata Sapientia, deificata sunt à benedicto Filio tuo qui ignis est, & tota facta sunt ignita. Sicut enim aqua in nuptiis Cana conuersa in vinum, vbi non accessit vinum nec recessit aqua, sed alterum factum est aliud, non successionis vice, sed immutationis origine; non rationis expositione, sed admirationis obtentu: sic, tu, clementissima Virgo Maria, quæ prius aqua

purissima fuisti, Spiritu sancto superueniente, in Filij Dei conceptione conuersa fuisti in vinum super omnia, post Christum lactificans cor hominis.

3. Lactifica me igitur, misericordissima Virgo Maria, & tuis piis intercessionibus, tribue mihi peccatori aquam lachrymarum penitentiae salutaris, & vinum laetitiae & consolationis, vt hic viuendo ad Dei ad tui beneplacitum, in fine gloriam percipiam sempiternam. Amen.



Contemplatio X V.

De Eodem.

1. **S**criptum est etiam de te, beatissima Virgo Maria, *Fœmina circumdabis virum. Fœmina* es, tu, Virgo Maria, *circumdabis* tegmine vteri tui virginalis, *virum*, id est, Christum qui in ipso momento suae conceptionis, fuit vir perfectus quoad sapientiam, & virtutem, & etiam quoad lineamenta, & organizationem membrorum. Tantam enim sapientiam, & tantam virtutem habuit conceptus, quantam adultus: quia *omnis sapientia à Domino Deo est: & cum illo fuit semper, & est ante eum. Circumdabas*, inquam, non aliunde, sed de te: quia de sola substantia tua, sine semine viri, sed sola operatione Spiritus sancti edificatum est corpus Christi. *Circumdabas virum*, non ab altero viro suscipiens non humana lege concipiens hominem, sed intra viscera intacta & integra, virum claudens, virum, inquam incomprehensibilem; quia, *Quem totus non capit orbis, in tua se clausit viscera factus homo. Qui* ad dictum fuit tibi per Angelum, benedicta Virgo Maria, *Spiritus sanctus superueniet in te, & virtus Altissimi obumbrabit tibi*; quia de Spiritu sancto concipies.

Jerem.
31. 22.
Ecd. 1. 1.
Ecd. in
Missis
votis
de Beat.
Euc. 1.
35.

2. Sicut Verbum Dei imago est Patris, sic anima Christi imago est Spiritus sancti. Nec loquor de illa imagine pro qua ad imaginem Dei homo factus esse dicitur. In rebus enim corporalibus, imago alicuius esse dicitur, quod expressam habet formam illius, cuius est imago. Sicut autem corporalia habent formas suas, ita & spiritualia. Forma autem Spiritus sancti, gratia septiformis est: non forma quæ sit in Spiritu sancto, sed quæ est de Spiritu sancto: sicut claritas, quæ est in pariete, dicitur *claritas solis*, non quæ sit in sole, sed quæ est de sole. Homo ergo Christus de Spiritu sancto conceptus est; quia formam Spiritus sancti excellentissimam accepit, hoc est gratiam septiformem. Christus ergo de Spiritu sancto conceptus est, non cui Spiritus sanctus materiam seminis attulerit: sed cui formam sanctitatis inter omnes creaturas elegantissimam impresserit. Venit igitur Spiritus sanctus ad te Virginē Mariam, per electionem, festinauit per sanctificationem, appropiauit per alloquutionem, & tandem superuenit per illam ineffabilem Incarnationis operationem. Incarnatus est igitur Unigenitus Dei

Dei secreto suo mysterio, quod ipse nouit: nostrum autem est credere, & illius est nosse.

3. Sed ego pessimus peccator Christianus veram fidem habens de præmissis, ingratus fui & sum; quia gratiarum actiones non retuli Deo, quia sic pro salute mea & totius generis humani humiliando se, dignatus est ad terram descendere, & in utero tuo virginali incarnari. O Virgo Mater, aufer à me misero tantam ingratitudinem tuis sanctissimis deprecationibus, ut me ipsum humilem cognoscendo, gratiarum actiones referam corde contrito & humiliato, ut in fine gloriam obtineam sempiternam. Amen.

Contemplatio XVI.

De Eodem.

1. **O** Felicissima super omnes, beatissima Virgo Maria, *Verbum caro factum est*, in te, & habitauit in nobis: Nascens sine dolore, & sine corruptione, Ex te *Verbum caro factum est*, scilicet de carne tua, quæ specialiter caro vocatur Verbi Dei: & dicitur, *Filius caro factus est*, nec dicitur, *Verbum homo factum*, sed *Verbum caro factum est*: ostendens æternam generationem Filij, quia Verbum cœternum est menti, & licet Verbum mentale ad hominum notitiam non perueniret, cum in vocem incorporari non posset, factum est caro: nomine autem *carnis* designatur humana natura, constans ex opere & anima. Et ideo potius dicitur *caro* quàm *homo*, ut significaretur quod Verbum totam ex carne vna naturam humanam assumpsit: ne si diceretur, Verbum factum homo, ex duplici carne sicut aliorum hominum, ipsius caro generata videretur. *Verbum igitur caro factum est*, constans ex corpore, & anima, & sic concurrerunt tria; scilicet, Verbum, anima, & caro. Sicut autem in illa summa Trinitate, Trinitas est personarum, & vnitas essentia; ita & in ista secunda Trinitate est Trinitas substantiarum, & vnitas personæ; & sicut Trinitas personarum, vnitatem non scindit essentia; nec vnitas essentia, pluralitatem minuit personarum: ita & hic nec pluralitas substantiarum, personæ diuidit vnitatem, nec vnitas personæ, substantiarum refecat pluralitatem.

2. Venit ergo Filius naturalis, ut filios adoptionis præpararet. Venit primus ad nouissimum, ut nouissimus exaltaretur ad primum, venit splendor gloriæ ad ymbra mortis, venit *figura substantia*, siue signaculum quod signauit Pater, ut reformaret similitudinis signaculum. Christus est *splendor Patris*, quia sicut splendor solis nascitur à sole, & ipsum demonstrat; sic Dei Filius à Patre nascitur, & eum demonstrat & notificat; est etiam Christus *figura substantia eius*, scilicet Patris; non tamen *figura eius*, sed *figura substantia eius*, id est, Patris est Filius, *speculum*, & imago Patris, quia

Filius in quo cognoscitur Pater, eadem substantia est cum Patre. Venit igitur *speculum sine macula*, ad formam peccati deformatam. Venit igitur ad illuminandum tenebras peccatorum; & totum hoc nobis datum est per te Genitricem Dei Mariam.

3. Sed tantum Sacramentum & Mysterium, ego peccator miserabilis non cogitavi, nec memoriâ tenui. Imò à memoria recedit; quia cor vagum & iniquum habui, & habeo ad terrena prostratum; peccatis & vitiis coinquinatum & sordidatum luto concupiscentiæ & iniquitatis. Ora, Virgo pia tuum natum, meum fratrem factum, ut indulgere dignetur; cor meum eleuet ad meditandum tantum & tam ineffabile Sacramentum, ut ipsum hic meditando fideliter, in fine ipsum placatum, æternaliter facie ad faciem videam. Amen.

Contemplatio XVII.

De Eodem.

1. **O** Arbor salutifera, & pretiosissima Virgo Maria, *fructus* vteri tui virginialis, scilicet benedictus Filius tuus, *dulcis gutturi meo*; quia est optimi coloris, & viuifici vigoris, odore alliciens, sapore reficiens, colore iucundans, & vigore corroborans, tactu lenis, aspectu delectabilis, gustu suavis, durabilitate perennis. Hunc appetit eliciens sine tormento, manducat sine fastidio, ipso satiatur sine superfluo, per eum sanatur sine receduo. Fructus optimus, & sapidissimus, & suauissimus, & iucundissimus, omne delectamentum in se habens, & omnis saporis suauitatem. Iste fructus suauissimus est, quia præuenit eum Deus Pater in benedictionibus dulcedinis.

2. Ista benedictio fuit immunitas peccati, & impotentia peccandi, caruit enim originali peccato, quod probat tua virginitas; & actuali, quod probat *1. Pet. 1.* Patris diuinitas, idè vocatur *Agnus immaculatus*. Fuit ista benedictio, consummata virtutum perfectio; licet enim in Baptismo infundantur virtutes in pueris, non tamen consummatæ sunt; quia non possunt adhuc eas consequi operando: sed benedictus fructus tuus, Iesus Christus habuit consummatas: & idè scribitur, *Apprehendent septem mulieres*, id est, omnes virtutes, *virum unum*, id est, Christum, qui in instanti suæ conceptionis fuit vir perfectus. Fuit ista benedictio, omnis sapientiæ, & scientiæ plenitudo. Virtus enim perficit affectum, sapientia intellectum: & benedictus fructus tuus, Virgo Maria, perfectus fuit in vtroque: eius enim sapientia vniformiter cognoscit præsentia, præterita, & futura. Fuit ista benedictio plenitudo fruitionis; quia ab instanti conceptionis suæ, Deo plenè fruebatur secundum mentem quæ deitati personaliter erat vnita, & immediate coniuncta; & mirabilius est quòd secundum eandem animæ partem, simul

patiebatur, & fruebatur. Fuit ista benedictio diuersarum naturarum vnio; quæ talis fuit, vt Deum faceret hominem, & hominem Deum. Fructus tuus, Virgo Maria Mater, fuit admirabilis, quia, cum esset diues, voluit pro nobis fieri pauper; cum esset semper in gaudio, voluit pro nobis pati, & mori; cum esset summus Pontifex, voluit iniustus reputari, & cum vno solo verbo posset saluare mundum, quia ipse dixit, & fecit tamen tot & tanta voluit sustinere.

3. O benedicta Virgo Maria Mater, intercede pro me nefandissimo peccatore, vt *ascendam ad palmam, & apprehendam fructus eius, ascendam ad palmam*, hoc est, eleuem mentem ad te, pia Virgo per deuotam orationem, vt tua vitæ, quantum humana mea fragilitas sufficiet, imitationem, & tuum fructum pretiosissimum hic apprehendam per veram fidem, & in gloria per veram cognitionem, & fruitionem, per infinita sæcula sæculorum. Amen.

Can. 7
8.

Contemplatio XVIII.

De Eodem.

1. O Dei & hominum benignissima Mediatrix, Virgo Maria, tu tantam gratiam inuenire meruisti quod extrema in infinitum distantia adunasti, naturam diuinam videlicet & humanam. Nam ante tuum felicem ortum, Virgo Maria, in tantum erant diuisæ, quod nullus quantumcunque perfectus, sub natura humana existens, poterat post mortem naturam diuinam intueri; quia natura diuina erat diuisa quam plurimum ab humana. Sed tu, gloriosissima Virgo Maria, per reparationem humani generis, per satisfactionem paterni sceleris, per destructionem æterni funeris, per reformationem supremi fœderis, has duas naturas, sic in infinitum diuisas, non in vno regno, castro, vel domo, sed in benedicto vtero tuo virginali adunasti, quæ vnio tam admirabilis fuit, quod à creatura non valet explicari.

2. Et sic, benedicta Virgo Maria, figurata fuisti per illam clementissimam Reginam Esther, quæ pacem reformauit inter Regem Assuerum, & populum Iudæorum, destruens pessimas Amani cogitationes, quas in mortem Iudæorum fuerat machinatus; vnde de te cantat Ecclesia, *Virgo Deum & hominem genuit, pacem Deus reddidit, in se reconcilians ima summis*. Tu, sanctissima Virgo Maria, duo extrema per naturam incompatibilia, copulasti. Constat namque quod Virginitas & Maternitas sunt incompatibilia per naturam, imò ex eodem supposito (sicut loquuntur) mutuo se expellunt, tanquam contraria: & tamen tu, pretiosissima Virgo Maria, ista in te adunasti, idcirco de te cantatur, *Te deprecor, ô clemens Domina, Per te testa sint mea crimina, De qua sola felici femina, Predicantur hæc duo nomina, Virgo Mater*. De te cantat etiam Ecclesia, *Genuit puerpera*.

Ecl. in
Missis
votiu
de Beat.

Ead in
Hymno
ex D.
Bernar.

Sf ij

Eadem in Laud dei Na. Christi. Psalm. 76.9. Psalm. 31.5. Genes. 2.17. Regem, cui nomen aeternum; & gaudia matris habens cum virginitalis honore, nec primam similem visa est, nec habere sequentem.

3. Tu, sacratissima Virgo Maria, duo extrema inter se discrepantia adunasti, scilicet misericordiam, & iustitiam, seu veritatem: dicebat namque misericordia, numquid in finem misericordiam suam abscindet, cum tamen misericordia Domini plena sit terra? contra iustitia dicebat, quod Adam peccauit, & mori debebat secundum iustitiam, quia scriptum est *In quantumque hora comederis, morte morieris*. Sed tu, benignissima Virgo Maria, has duas dominas in tuo sacratissimo utero adunasti, dum Deum Filium concepisti, & inter eas concordiam fecisti. O piissima Mediatrix, intercede pro me miserrimo peccatore ad tuum Filium benedictum, ut secum concordando ei obediam, & vitam habeam sempiternam. Amen.

Contemplatio XIX.

De Eodem.

1. **O** Benedicta Virgo Maria, te mediante gloriosissimus Filius tuus suam nimiam nobis charitatem ostendit, nobis, inquam, semini nequam, filiis sceleratis, & perditis. Cum enim adhuc inimici eius essemus, cum mors antiqua iniquum exerceret dominium, cui, omne semen Adam lege primordialis culpae erat obnoxium, recordatus est verberis misericordiae suae, & prospexit de sublimi habitationis suae in hanc vallem plorationis & miseriae. Vidit namque afflictionem populi sui, & tactus dolore cordis intrinsecus apposuit cogitare super nos cogitationes pacis, & redemptionis. Unde cum esset Filius Dei Deus verus, Deo Patri & sancto Spiritui coaeternus & consubstantialis, in luce habitans inaccessibili, portansque omnia verbo virtutis suae, non despexit in hoc nostrae mortalitatis ergastulum suam altitudinem inclinare ut nostram absorberet miseriam, nosque repararet ad gloriam: poterat namque gloriosissima Virgo Maria, si voluisset, ad consummandum opus nostrae salutis unum ex Angelis suis destinare, sed ipse ad nos venire dignatus est, per mandatum Patris, cuius nimiam charitatem experti sumus in eo.

2. Venit autem non locum mutando, sed praesentiam suam nobis per carnem exhibendo. Descendit à regali solio sublimis gloriae in te, humillimam Virginem Mariam, virginalis continentiae voto sigillatam, & in tuo sacro utero sola sancti Spiritus inenarrabilis virtus, & concipi ipsum fecit & nasci in vera humanitatis natura; ita ut nec maiestatem diuinitatis, nec integritatem virginitalis in te Matre benedicta, violaret natiuitatis occasio. O immaculata Virgo Maria, quam amanda & admiranda est ista dignatio! Deus immensa gloriae, vermis fieri voluit! Dominus omnium, conseruus conseruorum appellari non despexit! & Dominus vniuersorum, qui nullam

habet indigentiam, inter ipsa natiuitatis initia non horruit abiectionem paupertatis degustare incommoda! & quia, benignissima Virgo Maria, locum non habebas in diuersorio, neque cunabula, quæ teneritudinem tui benedicti Filij reciperent, in vili præsepio sordentis stabuli, eum humiliter Lhc. 2.
7. reclinasti, & panniculis inuoluisti.

3. O misericordissima Virgo Maria, illum digneris assiduâ prece exorare pro me nefandissimo peccatore, vt peccata mea misericorditer deleat, vitam virtuosam in præsentem mihi concedat, & in futuro suâ exuberanti clementiâ gloriam sempiternam. Amen.

Contemplatio XX.

De Eodem.

1. **V**nigenitus Dei Patris factus est Unigenitus Filius tuus, sacratissima Virgo Maria, illum Virgo concepisti, illum Virgo peperisti. Concepisti Virgo Maria, sine libidine, & peperisti clausa. Vir non transiit per te, sed Dominus Deus imprægnauit te. Ipse generans, ipse generatus est. Auctor fuit generationis nostræ, qui generatur. Ipse creans, ipse creatus, ipse genitor, ipse genitus, ipse factor, ipse factus. O miracula! O prodigia! Deus est, qui generat, Virgo es tu Maria, quæ concepisti, Virgo quæ peperisti: Tu vt mater paris illum, qui de nihilo cuncta creauit, sine viro peperisti hominem Deum. Nascitur de te femina homo sine viri semine Deus; & pro nobis efficitur paruulus dierum antiquus.

2. O admiranda dignatio! fit in tempore, qui est ante tempora; nascitur de femina qui creauit omnia; immensus, fit brevis, excelsus, humilis; factor, factura; & creator, creatura. Factus est creatura de matre nascendo, qui est æternus creator, vnum cum Patre & flamine sancto. Hunc peperisti, beatissima Virgo Maria, Virgo decora, Virgo speciosa: tota pulchra es, & tota decora, flos florum, pulchritudo virginum, sanctimonialium gemma, nuptiarum fiducia, viduarum gloria, regina mundi, domina cæli. O gloriosissima Virgo Maria, qualem nobis peperisti! Ille numquam principium habuit, qui cuncta principia fecit. Verumtamen in stabulo nascitur, & à te, beatissima & felicissima Mater, puellarum gloria, meorum delictorum venia, in præsepio reclinatur; quia non erat tibi cedrina domus, nec lectus eburneus, in quo pareres Creatorem & Redemptorem nostrum. Sed velut exul & peregrina in aliena domo mundi Dominum peperisti: & tanquam femina pauper, non sericis eum, sed pannis vilibus inuoluisti, & in præsepio collocasti: quem vt peperisti, statim vt Deum & Dominum adorasti.

3. O stabulum felix & præsepe beatum; in quo nascitur Christus, & reclinatur omnium Deus. Ibi sunt non obstetrices, sed Angelicæ potestates;

Sc ij

& pro solatio mulierum, fuit tibi Virgo Maria, solatium Angelorum, & decies centena millia exultantium. Ibi vagiebat Christus in stabulo, & fiebat lætitia magna in cælo: plorabat ipse in præsepio Christus, & tamen de ipso exultabat multitudo militiæ cælestis exercitus, resonans gloriam Deo in altissimis, & in terra pacem nuntians hominibus bonæ voluntatis.

Luc. 2.
14.

O sanctissima Virgo Maria, impetra à benedicto Filio tuo mihi miserabili peccatori, veniam & remissionem de peccatis, & gratiam in præsentem bene viuendi, ut æternam gloriam merear obtinere. Amen.

Contemplatio XXI.

De Eodem.

1. O Felix femina, inter cunctas fœminas benedicta gloriosa Virgo Maria! quia tuus sacratissimus uterus fuit reclinatorium Dei, templum Spiritus sancti, lectus eburneus Christi, thalamus Maiestatis diuinæ, triclinium regis felicitatis æternæ. Hic est omnium Saluator Iesus de te Virgine Maria natus; hic est omnium Dominus; hic est vita quæ nunquam moritur; hic gloria quæ nunquam finitur; & tamen, tu immaculata Virgo Maria, tantam magnificentiam, tantam excellentiam, auctorem gloriæ, doctorem vitæ, creatorem omnium, factorem cunctorum, Dominum vniuersorum, Deum altissimum, Deum, qui benefecit tibi, in stabulo, in pannis, & in præsepio concludis.

Luc. 2.
14.

2. O intemerata Virgo Maria, pacem annunciauit Angelus hominibus bonæ voluntatis; quia per te bonitas cæli nata est in terris: descendit in te pax vera de cælo, & inde Angeli gratulantes decantant, *Gloria in altissimis Deo*. Exultant Angeli, & tu Virgo Maria, contremiscis Mater Dei effecta. Gaudent Angeli de Christo tripudiantes securè, ante quem tu Mater stas cum magno tremore. Portas tu Matrem Christum, lactas tu Virgo Mater, Filium tuum, & cum timore exultas, & in exultatione timida perseueras. Tu portas portantem, lactas lactantem, pascis pascentem, & non solum te, sed omnia, in quibus est spiritus vitæ. O felicissima Virgo Maria, beatus est venter, de quo noster fortis sibi gladium fecit, & inimicum nostræ salutis peremit, populum suum à captiuitate perpetua liberauit. Tu tota pulchra Virgo Maria, tu tota delectabilis, tu tota formosa. Nullâ maculâ fuscari; omni decore vestiris, omnium sanctitate ditaris; super omnes Virgines pulchra in carne, super omnes Angelos & Archangelos sancta in mente, cunctas fœminas vincis pulchritudine carnis; superas omnes Angelos & Archangelos excellentiâ sanctitatis. Tu plena Deo, tu plena Spiritu sancto: illum in corde, illum in ventre, beata Virgo Maria portasti; illum portasti in vlnis, lactasti yberibus sacris totius amoris vinculo astrinxisti: in ipsius oscula toties irruisti, quoties voluisti.

3. O beata & verè beata! ô felix, & nimis felix! Christum in potestate habebas, & faciebas de eo, quidquid in animo tuo sedebat. Totus erat tuus, quia Filius tuus. Credo, propter quod & loquor, quod præ immensitate amoris de eo, osculis, & amplexibus saturari non poteras, & quid dicam Domina mea. Per Christum Filium tuum benedictum est tota spes mea, tota salus mea, tota vita mea, & dulcedo mea; sint mihi, Virgo Maria, ista omnia, te exorante, ad salutem corporis & animæ sempiternam. Amen.



P A R S I X.

DE GAUDIIS GLORIOSÆ


VIRGINIS MARIÆ,

QVÆ HABVIT IN HOC MVNDO

& aliis quæ nunc habet in Cælo.

Contemplatio I.

De Annuntiatione Virginis Mariæ.

1.  **P**VELLA virginea, non minùs mente quàm corpore speciosa: Virgo speciosa corpore, sed speciosior mente: flos redolens, & non deficiens, rosa sine spina peccati, fons aquæ salutaris exundans, arbor fructifera peccatores ab æstu tentationis obumbrans, speculum sine macula, virtutum semita, omni laude dignissima, sacratissima Virgo Maria, tibi congaudeo; gaudium tuum immensum ad memoriam reduco, ipsum refero, de ipso gratias ago Deo respexit enim humilitatem tuam nuntium tibi misit non terrenum, sed caelestem; non in vico, sed in cubiculo, non te vagante, sed orante; illum nempe sanctum Gabrielem iucunda noua, ac inaudita portantem, te concepturam Filium Dei non virili semine, sed sancto Spiritu operante.

2. O nouitas gaudiosa! ô celebris lætitia! ô immensa iucunditas! ô dulce

colloquium ! sanctum solatium ! verba consolatoria ! venit Angelus ad te Virginem de caelo ad terram, ut tu creatura tuum conciperes Creatorem; ut de filia fieres Mater, & in te esset virginitas & maternitas, humanitas & diuinitas, Deus homo; & in tuo beatissimo & virginali utero clauderetur quem totus mundus capere non potest. O charitas incomparabilis summi Patris ! ut seruum redimeres, Filium tuum carnem nostram luteam & mortalem sumere ordinasti ! O humilitas inestimabilis, quæ digna fuit in

Luc. 38. sacratis visceribus Dominum recipere dicendo fideliter, *Ecce Ancilla Domini, fiat mihi secundum verbum tuum !* O verba dulcissima ! verba melliflua, verba salutifera, verba omni suauitate repleta, omni gaudio plena, omni hilaritate aspersa ! humanis gressibus portabatur creatura deifica, & in angusto pudoris cubiculo eum, quem cali non capiunt, sancta Virgo gestabat inclusum ! caelestis propago germinabat in utero, & post in eximio partu de virgineo viscere coruscabat.

3. Mortali alio, Virgo sacrata, suscepisti hospitem immortalem, & in terrestri hospitio caelestem imperatorem, & vnde hoc tibi, Virgo beatissima ? vnde hæc tibi tanta credentia, ut Dei Filium conciperes, & post partum Virgo & Mater intacta permaneres ? Credidisti verbis Angelicis, & perfecta sunt in te tibi dicta ; venit super te Spiritus sanctus, & virtus Altissimi obumbravit te ; & factus est in te, qui fecit te, Deus homo, Filius hominis, Dei Filius, Creator creatura, immortalis mortalis, impassibilis passibilis, & non solum propter te Virgo benedicta, neque propter me, sed propter te & me & totum genus humanum. O beata nox, in qua tantum mysterium est celebratum, quam tu, Virgo benedicta, transiisti in somnem cum iucunditate indicibili. Grauidata fuisti hæc nocte Filio Dei ; Mater inuiolata meruisti fieri Saluatoris nostri, qui te principium nostræ redemptionis constituit. O Mater sancta Sanctorum, Mater vnica ; dic mihi quæso, quibus manibus vel diuinitatis articulò in utero tuo formatus est Filius, cuius Deus solus est Pater ? dic obsecro te per eum qui talem fecit te, ut ipse fieret in te ; dic mihi quid boni egisti, quantum pretium obtulisti ? quos patronos habuisti ? quæ suffragia præmisisti ? quo sensu, vel quâ cogitatione ad hoc, ut acciperes peruenisti ? ut virtus & sapientia Patris, qui attingit à fine vsque ad finem fortiter, & disponit omnia suauiter, totus vbique manens, & sine sui mutabilitate in uterum tuum veniens, ita castellum castum tui ventris incoleret, & ingrediens non læderet, & exiens incolumes custodiret ? dic mihi quando ad hoc peruenisti : certè respondere potes, quia munus oblatum sibi fuit virginitatis promissio, non à te tibi data, sed ab authore omnium concessa ; ac etiam vera humilitas, non enim aspexit in te tunicam auro eleuatam, non ornamentum pomposo cultu auri radiantis, sed solum respexit humilitatem tuam.

Sap. 8. 1.

Luc. 1. 48.

4. Sed quid faciam ego miser debitor, pluribus creditoribus obligatus ? Tibi enim, sancte Gabriel, obligatus fui, quia de caelo ad terram descendendo noua mirabilia redemptionis, & saluationis meæ gloriosæ Virgini Matri portasti, & humiliter nunciaisti. Tibi Virgo intemerata, debitor sum, quia

quia in verbis tuis fidelibus & sanctissimis, meam redemptionem in te suscepisti, & eius principium fuisti; sed quid tibi, dulcissime Iesu: qui propter me sic humiliari dignatus es, quod de sinu Patris descendens in vtero virginali incarnari voluisti? heu miser, & omni miseria miserior! quid dicam, aut quid faciam? cum sim tot debitis oneratus, & sim pauperrimus & omni inopia plenus, quod, ne dicam omnibus, imò nec vni satisfacere possim? quis mihi accommodabit, ut tantis creditoribus satisfaciam? à quibus non habui dilationem pretij, neque debiti remissionem. Imò quod longè plus damnosum est, gratias non retuli de prædictis, saltem eo modo, quo debebam: & sic me illis ampliùs obligavi. Sed scio quid faciam: venio ad te sancte Gabriel, cum rubore: creatura Dei sum, sicut tu; creatus sum ad ipsum laudandum, sicut tu; & si propter me orare non vis, quia non sum dignus; ora saltem propter Dei honorem, ne laus ipsius perdat in me. Tu verò gloriosa Virgo Maria, quæ Mater & Virgo es, Deum & hominem intra tua sacra viscera gestans, orare debes pro me, non propter merita mea, quæ nulla sunt: sed quia aduocata peccatorum existis. In quorum numero primatum teneo ego miser. Sed tu, benigne Iesu, carnem tuam odio non habeas, neque perdas in me pretium tuum; sed descendat super me misericordia tua, quæ ingratitudinem meam deleat, vitam meam emendet, & ad vitam æternam me perducatur. Amen.

Contemplatio II.

De Visitatione Virginis Mariae.

1. **O** Virgo Mater, Virgo Virginum, Mater intacta, Virgo virum nesciens, Virgo parem non habens, Mater singularis, gloriosissima Virgo Maria, tu tantâ dignitate meruisti decorari, ut Filium Dei conciperes, non ex virili semine, sed mystico spiramine. Hic benedictus Filius tuus, quem Spiritus sanctus, prout sibi placuit, compaginavit in tuo vtero virginali; subtiliter subtilem inimicum expugnare voluit: & quasi sub esca humanitatis hymnum celavit diuinitatis: ut ille, qui omnem carnem propter peccati debitum possidebat, carnem inueniret, quæ sibi prorsus nihil deberet, quam dum illicitè contingeret; meritò eam quam quodammodo licitè possidebat amitteret. Tantâ igitur, Virgo benedicta, dignitate dotata, honore sublimata, tanto gaudio repleta, tantâ virtute ornata, & tam benefico dono exaltata, profundam humilitatem seruasti, & charitatem mutuâ dilectione, corde & opere ostendisti. Tu festinanter viam ingrediens, in montana ascendisti, domum Zachariæ intraisti, Elizabeth sancto Ioanne Baptistâ fecundatam miraculosè, humiliter salutasti.

2. O sancta & charitativa visitatio humilitate repleta! venit puella ad

T

nonagenariam; sanctissima ad sanctam; Mater Dei, ad Matrem hominis; Mater incorrupta, ad Matrem corruptam; Mater sanctissimi Filij, ad Matrem peccatoris; Mater Domini ad Matrem serui; Mater Redemptoris, ad Matrem præcursoris; Mater complexum virilem ignorans, ad Matrem virum cognoscentem. Tu Mater sancto Spiritu omnipotente fecundata. Illa Mater virili semine gravidata, ambæ miraculosæ matres, & ambe sancto Spiritu repletæ, sed, Virgo benedicta, quid amplius tibi accidit ad gaudium, quia, *ex quo facta est vox salutationis tuæ in auribus Elizabeth, exultauit in gaudio infans in utero eius. Cognouit nondum natus, Filium tuum; benedictum esse suum Dominum, quem gestabas in utero tuo virginali; quem etiam prædixit postea esse venturum. Te matrem cum Filio Mater benedixit, & tu in lætitia cordis canticum Magnificat originaliter inuenisti. O domus sanctificata! sanctum colloquium! statio beata! verba dulcia! non solatium acediosum, sed consolatorium! Mansisti Virgo Mater, cum Matre tribus mensibus, orationibus & colloquiis diuinis vacando. Non turbatur sponsus tuus Ioseph de tanti mora temporis, sed gaudet & lætatur, sciens te Matrem virginem Dei Filium in tuo utero baiulantem.*

3. O gloriosa Domina, non sic est in me misero peccatore, non sic; quia mea uisitatio mundana fuit, non spiritualis, non humilis, sed superba; non ad sanctos, sed ad peccatores; non protuli verba utilia, sed otiosa; non meritoria, sed detractoria; non semper vera, sed quandoque mendosa; non spiritualia, sed carnalia; non in laudem Dei, sed in laudem hominis, & quandoque mei ipsius. Adiua me, piissima Virgo Maria, visita me tuis sanctis deprecationibus, sit mecum tua immensa misericordia tribus mensibus, id est, tempore triplici, sanitatis, infirmitatis, & mortis: ut anima mea intra corpus existens, gaudeat, & lætetur de gloriosissimo Filio tuo, ac ipsius infinita misericordia, quam sic in præsentī vita mihi concedat, ut in futura vita secum & tecum gaudeam; & exultem, & vobiscum maneam per infinita sæcula sæculorum. Amen.

Contemplatio III.

De Natiuitate Christi, seu partu Virginis Mariæ.

1. **O** Benedicta singulari benedictione Mater, Virgo genitrix Dei, Regina celi, ego miser superbus ad te venio, & tuum locum humilem mente visito: in quo summum gaudium habuisti de gloriosissimo Filio tuo Domino nostro Iesu Christo, quem mundo feliciter peperisti, & solus ex te natus est, quem sine virili amplexu non per concupiscentiam carnis, sed per obedientiam mentis feliciter concepisti, & in præsepio inter duo animalia reclinasti, & pannis pauperum intoluisti, & tuis sacratissimis

vberibus plenis lacte castissimo de cælo misso oblectasti. O admiranda novitas ! Deus factus est homo. Deus meus factus est frater meus. Virgo peperit, & post partum Virgo permansit. Genuit Virgo Filium, ancilla peperit Dominum suum, creatura peperit Creatorem fecundis visceribus, in vtero clauso genuit genitrix suum genitorem. O admirabilis & inenarrabilis charitas ! propter me superbum Deus voluit humiliari ! Pœnalitates carnis voluit portare, peccato & ignorantia exclusis. Voluit inuolui, & includi arcto vtero virginali.


2. O inestimabilis & stupenda humilitas, in stabulo & inter bruta animalia nasci voluit, qui totum mundum continet ! iacet in præsepio, qui in cælis regnat ! vbera fugit, qui Angelos pascit ! pannis inuoluitur, qui immortalitate nos vestit ! lactatur, qui adoratur ! Locum in diuersorio non inuenit, qui templum in cordibus credentium sibi fecit ! vt enim fortis fiat infirmitas, facta est infirma fortitudo. Factus est Rex seruus, Regni potestatem non amittens, neque serui passibilitatem : legi se submitit, qui legem cōdiderat : pauper effectus est Dominus omnium : minoratus est paulominus ab Angelis, qui Angelos creauerat : natus est temporaliter in terris, qui æternaliter nascebatur in cælis : in terris de Matre sine Patre, in cælis de Patre sine Matre. In cælis sine principio, & in terris initium habens : factus est obediens, cui totus mundus obedire debebat. Obligauit se morti qui mortem destruebat, fecundauit Matris vterum sine corruptione, & formatus inde exiens, Virginis integra viscera reseruauit. Hæc omnia fecisti, bone Iesu pro me misero, ex abundantia tuæ charitatis & humilitatis.

3. O Virgo Virginum, Virgo puerpera, quale fuit gaudium tuum in hac hora, quā talem Filium genuisti, & virginalē pudicitiam non amisisti ? gaudent & lætantur Angeli, voce sonora Deum laudant cantando, *Gloria Luc. 2. in Altissimis Deo, & in terra pax hominibus bonæ voluntatis.* Annuntiant sanctis Pastoribus tantam gaudij nouitatem, gaudent sancti Pastores, festinant vt videant nunciata. O quā beati fuistis sancti Pastores ! & quā beata fuit vobis ista nox, in qua talem Filium & talem Matrem meruistis videre ! O dulcissima Virgo Maria communica mihi istud gaudium, particeps efficiar ipsius, gaudeat & lætetur cor meum, euāescant noxia ex corde meo, recognoscā humiliter tantum beneficium, non solum tibi, sed etiam mihi datum.

4. Dominus tuus & meus, Filius tuus est, & Frater meus, de filia te Matrem fecit, & de seruo me Fratrem fecit. Morti temporali se subiugauit, vt tu & ego æternaliter viuere possemus. Fidē tibi & mihi dedit, Innumera- biles gratias tibi & mihi fecit, & in numero suorum te & me misericorditer aggregauit. Tu omnia suscepisti, & gratias reddidisti, & humilitatem seruasti : ego ingratus gratias reddidi, sed abiectā humilitate superbiui. Ideo in te sunt gratiæ augmentatæ, & in me iustæ & dignè diminutæ : Nolui enim benedictionem, & elongabitur à me. O pretiosa Virgo Maria Mater, ob meritum tanti gaudij exora tuum Filium benedictum, quem genuisti, pro me misero peccatore & ingrato : tu enim soror & aduocata mea es : ideo

T t ij

me audis: tu Mater istius benedicti Filij es; ideo exaudieris ab illo. O benedictæ Fili, audi, & exaudi piissimam Matrem tuam pro me misero fratre tuo. Voca me ad tuum præsepium, ut consoler de tua natiuitate sanctissima, & purissima: cuius merita me purificent, & mens mea à terrenis segregata, in cælis nascatur, & reclinetur, ut ibi tecum viuere, & lætari valeam per infinita sæcula sæculorum. Amen.



Contemplatio IV.

De Apparitione, seu Epiphania Christi.

1. **O** Intemerata puerpera Virgo Maria singularissima, Mater incorrupta, nesciens virum, Creatorem tuam creaturam factum tenens inter sacratissima brachia tua amplexarum, cælesti Angelorum exercitu sociatum; dies gaudij & lætitiæ, dies consolatiōis & exultationis tibi fuit, quando tres Reges Orientales, nouā stellā ducente, tuum benedictum Filium in tuo sancto gremio adorant, & in mysticis muneribus sibi oblatis illum esse verum Deum & hominem ostenderunt. O Virgo benedicta; te mediantē, ille qui prius in sinu Patris latebat, nunc manifestus mundo apparuit, qui prius per ora sacra Prophetarum se venturum prædixerat, cum humilitate se personali visione ostendit, qui prius Dominus erat, se pro nobis seruum constituit, cui debitores eramus, pro nobis soluere debitum venit, non auro nec argento corruptilibus, sed suo sanguine pretioso.

2. Gaude igitur Virgo Maria, gaude & lætare; quia quem in tuo vtero virginali meruisti portare, & tuo lacte virgineo lactare, hodie in carne mortali visibilis apparuit; tanti boni, tanti doni, tanti pretij tanti honoris, & tanti gaudij, tu, Virgo sacratissima, causa fuisti, & causam præbuiisti, quia verbis Angelicis humiliter credidisti, & maximam humilitatem habuisti. Sed quantas & quales gratias tuo Filio benedicto, aut tibi retulisti? Ecce, ut cum veritate loquar, nullas aut modicas, & indecenter, tuo Filio & tibi non placitas, propter immunditiam cordis mei: & cum cogito istos infideles, & Filij tui benedicti notitiam non habentes, qui ad solum aspectum vnus stellæ nouæ de longinquis partibus venientes, Filium tuum benedictum adorant, munera obtulerunt; & qualis erat, talem ipsum esse fideliter crediderunt: confundor ego miser rubore, qui te stellam splendidam cognoscens, dirigentem me ad tuum Filium gloriosum, non de longinquis partibus, (cum per fidem propè ipsum videam) ad eum recusaui venire. Viam ostendebas & ad alium me vertebam; viam clarificabas per miraculorum ostensionem, & oculos claudebam, ne lucem viderem; spiritum meum impellebas, & ego ipsum exinguebam.

3. O Virgo Virginum Mater pietatis & misericordiae, erubesco ad te venire, qui tuum Filium benedictum & te illusi, & contempsisti: sed in tua misericordia confido, tuam pietatem imploro, tuam clementiam deprecor, ut necessitatem meam aspicias, & aspiciendo subuenias. Duc me ad tuum Filium benedictum, ut ipsum adorando ei munera offeram, hoc est principaliter cor meum ab immundis cogitationibus & operibus, ac peccatis omnibus mundatum. Ora pro me misero iugiter illum, Virgo pia, ut hanc oblationem per ipsum misericorditer mundandam suscipiat, & mundata acceptabilis sibi fiat; ut non per viam peccatorum incedam sicut, pro dolor! consuevi; sed per aliam viam, scilicet virtutem; vadam, & in regionem tuam, in qua tuum Filium placatum videam, & te stellam fulgentem aspiciam, ut gaudio magno complear per infinita secula seculorum. Amen.



Contemplatio V.

De Purificatione Virginis, & Oblatione Christi.

1. Vnde hoc tibi gloriosissima Virgo Maria? unde hoc tibi; unde tibi tanta humilitas, ut nobilitate tui generis quodammodo spretâ, magnificentiam maternitatis, & culmine tuarum virtutum non consideratis, mulierem te ostenderes peccatricem, quæ peccatum non feceras? maculatam te esse demonstrasti, & peccatorum maculas non nouisti, sed macularum expiatorem in tuo utero virginali portasti: & tu ad Templum quadragesimo die post partum virgineum more mulierum purgandarum venisti, tuum Filium obtulisti, in sacris manibus iusti Simeonis posuisti, oblatione pauperum illum humiliter redemisti: unde hoc tibi, Virgo gloriosa Maria? quæ repleta Spiritu sancto, & sanctificata antequam nata, purgatione non indigebas. Vnde hoc tibi, ut Filium tuum benedictum redimeres, qui tamen venerat redimere totum mundum?

2. O profunda humilitas vtriusque! ô suprema & incomparabilis obedientia! venisti uterque non soluere, sed adimplere legem, exemplum cæteris indigentibus, purificandi vos dedistis, qui purificatione non indigebatis, sed puritate omnimodâ relucebatis. Tuus Filius benedictus, puritatis est auctor, & tu etiam totius puritatis es Mater. Tuus Filius benedictus, puritatem hominibus confert, & te mediante & suffragante, nobis puritas monstratur. Tuus Filius benedictus pietatem diligit & requirit; & quia tu Virgo Mater es purissima, te Filius diligit, & tu etiam cæteris bene vivere cupientibus puritatem ostendis. Nihil in te aliud est nisi purum, & fons tuæ puritatis ad nos riuulos suos fluens, & deriuans, nos peccatores purificat, & emundat, ut nihil in nobis sordidum remaneat, nisi quantum

T t iij

nostra maxima malitia & iniquitas retinet. Non stat per te, Virgo gloriosa, quin sordes in nobis abluantur; ad hoc vigilas, ad hoc tendis, ad hoc laboras. Non cesser tua supplicatio exorare tuum Filium gloriosum.

3. O Virgo purissima, ascendat ad me tua supplicatio pia, quia plus ceteris peccatoribus purificatione indigeo: nam interius & exterius, ex omni parte meum sum sordidatus, maculatus, & infectus. Recurro igitur ad laudum tuarum pietatis & clementiarum, ut intercedere digneris pro me misero iacente in luto vitiorum, apud tuum Filium benedictum, qui solus potest facere de immundo mundum, & me mundet & purificet à sordibus vitiorum, ut cum iusto Symeone psallere valeam canticum lætitiarum, & dicere spirituali consolatione repletus, *Nunc dimittis Domine seruum tuum in pace, quia viderunt oculi mei salutare tuum.* ut hinc per veram fidem ipsum, videndo, in futuro facie ad faciem ipsum placatum & beneuolum valeam intueri per infinita sæcula sæculorum. Amen.

Contemplatio VI.

De inuitatione Christi & Mariæ ad nuptias.

1. ^{Ioan. 2.1} **V**ocata ad nuptias in Cana Galilee, & inuitata, gloriosa Virgo Maria; cum benedicto Filio tuo, non renuisti domum pauperialem, & pauperum intrare dignata es; sedes Regina cæli & terrarum inter pauperes & abiectos, stas innocens inter peccatores, Mater Creatoris iater creaturarum, Mater Virgo inter matres corruptas, Virgo deifica inter mundanas mulieres. Sedes humilis humiliter, primos accubitus non querens: suscipis illa pauca, quæ tibi apponuntur cum gratiarum actione, & sine murmure aut querelâ contenta manes de appositis, nec alia ultra petis. Sed quid amplius, Virgo benedicta, egisti? etiam charitate mota pauperum inuitantium ignominiam cooperuisti: vinum deficit, & vnde plus habeant, hoc ignorant pauperes inuitantes; sed tu, gloriosa Virgo Maria, compatiendo eisdem, denuntias hoc secretè benedicto Filio tuo, rogans eum humiliter, ut providere dignetur ignominie pauperum inuitantium, & defectum supplere potentia virtutis suæ: qui tuam deprecationem benignè audiens & exaudiens iubet impleri hydrias aquâ, quæ mox in vinum conuerfa est, & pauperes inuitantes sunt ab ignominia liberati.

2. O Virgo beatissima, charitate plenissima; hoc tua pietas procurauit, tua bonitas promouit, & tua humilitas impetrauit. Tua namque misericordia tanta est, quod semper omnibus necessitatibus subuenis: omnibus occurras, omnibus prouides; nec alicui dees te humiliter & deuotè inuocanti, quæ semper manum porrigis adiutricem; imò sic affluens, & exuberans est tua immensa pietas, quod etiam non inuocanti te præbes, suæ indigentia misericorditer succurrendo.

3. Sed piissima Virgo Maria, ego miser & sceleratus ad tuam clementiam venio, verecundia totus plenus; & tibi querimoniam facio de meipso: vocatus & inuitatus sum ad nuptias; quia benedictus Filius tuus per lauacrum sacri Baptismatis, me misericorditer vocauit, & inuitauit ad nuptias paradisi; sed excusavi me miserabiliter quod villam emi; id est in magnam *Luc. 14* superbiam deueni, & iuga bouum emi, id est, in magnam auaritiam terre- *18. 19.* norum me prostituui; & vxorem duxi, id est, vitam lubricam me turpiter maculaui. Nihil amplius mihi restat, nisi vt voluntas inuitantis impleatur; id est, quod ad illas nuptias ulterius non inuitet, neque intrem; nisi tua magna misericordia, Virgo Maria, me durum & rebellem, & turpiter excusantem intrare compellat; sic igitur, beata Virgo Maria, mihi digneris tuis intercessionibus subuenire apud tuum Filium benedictum, qui me inuitauit vt sic me vocet, inuitet & dirigat, quod ad illas beatissimas, & perpetuas nuptias veniam, ibique maneam per infinita secula seculorum. Amen.

Contemplatio VII.

De Resurrectione Christi.

1. **Q**uis cogitare potest, quae lingua proferre valet, admirabile & inenarrabile gaudium tuum, beatissima Virgo Maria, nam more materno post cordiales gemitus & mærores, post suprema tui animi suspiria & dolores, post varios & internos mentis lingultus, & labores, post vberes fletus oculorum faciem tuam speciosam irrigantes, post gladium acerbæ tristitiæ animam tuam lamentabiliter & acriter perfodientem, quem de Filij tui passione in anima & corpore habuisti, huiusmodi gaudium successit tibi quando in die sacratissimo Paschæ, Filius tuus benedictus, resuscitatus tibi apparuit in corpore glorificato, & se ultra nihil passurum ostendit, & ad cumulum gaudij tibi fuit, quod mortem nostram moriendo destruxit, & resurgendo reparauit vitam nostram. In carne, quam ex te susceperat præbuit nobis exemplum passionis, & resurrectionis; passionis ad firmandam patientiam, resurrectionis ad excitandam spem; vt duas vitas nobis ostenderet in carne quam suscepit de vita nostra mortali; vitam laboriosam, alteram beatam; laboriosam quam tolerare debemus, & beatam quam sperare debemus.

2. Hæc dies magni gaudij tibi fuit, Virgo gloriosa, dies exultationis, dies lætitiæ, dies consolationis; hæc dies quam fecit Dominus tibi, & benedictus Filius tuus, exulta, & lætare in ea, beatissima Virgo Maria, quia post luctum tibi artisit iucunditas, post cruciatus te recreauit hilaritas, tristes metus fugauit placidum solatium; voces lugubres conuersæ sunt in dulce colloquium, radix tristitiæ emersa est e corde tuo, & magno iubilo repletum est torum. O Virgo amarissima, melos penitus extirpauit planctum oris tui. Discipuli in fugam conuersi propter crudelissimam captionem Filij tui

benedicti, ad te reuersi sunt lætantes, & absconsi præ timore tibi se præsentarunt; omnes tecum gaudent, & lætantur de gloriosissima resurrectione benedicti Filij tui; ô Virgo gaudens, & summo gaudio repleta perdideras Filiam ex inuidia Iudæorum; nunc recuperasti eam cum magno triumpho; quia inimicos debellauit, & victos perpetuò dereliquit, infernum spoliavit, & sanctorum Patrum animas ab eius faucibus liberauit. Lætare igitur Virgo, & summe lætare, quia quæ seminasti in lacrymis, in exultatione metis; Risus tuus dolore amplius non miscebitur, nec extrema gaudij tui luctus de cætero occupabit; sed lætitia sempiterna super caput tuum erit; gaudium & lætitiā perpetuò obtinebis.

3. In tanto igitur gaudio & exultatione, Virgo pia, posita, recipe me miserum peccatorem sub tua protectione, & ora pro me beatum & iucundum Filium tuum vt me dignetur ob meritum suæ sacratissimæ Resurrectionis de morte spiritali resuscitare ad vitam, & de culpa ad gratiam, & immensi gaudij suæ beatissimæ resurrectionis participem me faciat; vt in die tremendi iudicij resuscitem, & glorificatus cum beatissimis sanctis eius, viuam per infinita sæcula sæculorum. Amen.

Contemplatio VIII.

De Ascensione Christi.

1. **V**erba mea auribus percipe, gloriosissima Virgo Dei genitrix Maria, quia tibi exultanti cœxultare desidero, tibi gaudenti, congaudere affecto, lætus & lætè ad memoriam reduco ineffabile gaudium, quod de beatissima Ascensione gloriosissimi Filij tui, suscepisti in purissimo corde tuo. Reliquit terram, te vidente, & contemplante, benedictus Filius tuus, & cœlos petiuit, & penetrauit, dimisit mundum, & ascendit ad Patrem, ad eius dextram collocatus; non te derelinquens; quin fuit semper tecum. Ascendit cum magna iubilatione, Angelorum psallentium & lætantium exercitibus sociatus: ascendit in altum, cœlo patefacto, & mundo redempto, eleuatus candidâ nube, in voce tubæ cœlestis, ad thronum quietis: ubi sedet in gloria Patris: captiuam prædam Sanctorum suorum ab infernalibus claustris potenti virtute liberatam ad gloriam secum duxit, paternam perficiens voluntatem. Exierat à Patre, vt genus humanum perditum redimeret, & saluaret; & legatione sibi commissâ laudabiliter & salubriter completâ triumphali veste indutus, ad Patrem suum rediit, cum ipso perpetuò regnaturus. Pacem tibi, Virgo Maria, ac etiam fidelibus in eum credentibus & spirantibus piâ consolatione reliquit.

2. Sed quid amplius nobis fecit benedictus Filius tuus? Ecce portam Paradisi olim generi humano per peccatum primorum Parentum clausam aperuit, & viam veniendi ad eius perpetuam gloriam, misericorditer patefecit

Г. Годе

2. I.

Аѣтор.

10. 42

AEI. 2. 1.

2. 3. 4.

V. 11

in sui amorem roborauit, charitatem ad proximum ampliavit, corda à terrenis separauit, & ad cœlestia eleuauit.

2. O Virgo deifica, donis cœlestibus repleta, in terris manens corpore, & in cœlis mente. Hic uiuis solo corpore, sed Spiritu in cœlo iam habitas cum illo, qui te in mundo gubernat. Conuersatio tua tota in cœlis est: nihil tibi commune cum terra. Nunc te possidet, qui te obumbravit. Iam te tenet Spiritu in altissimo cœlo, quem tu genuisti in terris. In illo manes, quem tu in vtero tuo virginali baiulasti, Te nutrit gratis, quem sacro lacte tuo fouisti, Tibi custodem specialissimum misit, quem tu maximâ diligentia custodisti, gubernatorem assiduam tibi direxit, quem tu multiplici prouidentia gubernasti, defensorem tibi constituit, vt ab aduersis te illam præseruaret, quem tu diligenti custodia à malis imminuentibus præseruasti. O Virgo felicissima, & omni felicitate felicior, si benedictus Filius tuus cœlum ascendit, non propter hoc te dereliquit, sed etiam supremum consolatorem tibi misit, qui te numquam desereret, à te non separaretur, te continuè consolaretur, & à tuo seruitio non cessaret. O Virgo Maria, quàm plena es gaudiis & lætitiis, quàm præclara virtutibus! quàm redundans gratis! quàm referta donis, quàm dotata cœlestibus diuitiis! Non est tibi similis, nec fuit, nec erit in bonitate, in perfectione, in honore, & sæcunda virginitate, in humilitate, & in omni gratiarum affluentia receptione.

3. Sed ego, Virgo inclyta, propter sordes peccatorum meorum indignum me reddidi susceptione Spiritus sancti, quem indubitanter habuissem, si me ad recipiendum ordinassem. Non remansit in tuo Filio, gloriosa, quin eum miserit, sed in me misero, qui eum renui recipere, peccatis & vitiis me miserabiliter submitiendo. Sed Virgo pia, plena charitate, delictis spiritualibus affluens, extende super me gratiam tuam, & exora Filium tuum benedictum, vt sordes cordis mei misericorditer abluat, & gratiam sancti Spiritus super me infundat, vt de peccatis dolendo, conterendo, & satisfaciendo, viam hic per gratiam, & in futuro per gloriam per infinita sæcula sæculorum. Amen.

Contemplatio X.

De Vita Virginis Mariæ, post Ascensionem Christi,

1. **V**ita tua in hoc mundo post gloriosam Ascensionem Filij tui, benedicta & gloriosa Virgo Maria, fuit sanctissima vita, non terrena, sed cœlestis, non inclinata ad mundum, sed eleuata ad Deum: corpus quidem hic, sed Spiritu Deo viuebas, plus mentem quàm corpus, recreabas, corpus namque solummodò ne deficeret sustentabas, sed spiritum alimoniam spirituali replebas. Vita tua super Angelicam vitam fuit: quia Angeli spiritu, tu verò corpore, & spiritu Angelicam vitam duxisti, loca publica fugisti,

& in secreto cubiculo permanendo, Deo sine intermissione seruisti: turbas hominum more sanctarum Virginum expauiisti, non quòd de inclinatione peruersa dubitares, cum sanctificata sic fuisses, quòd inclinari non poteras ad peccatum, sed ut Deo cum maiori libertate seruires: Angelos tecum assidue habuisti comites & custodes, qui ex præcepto diuino consolationes multiplices tibi dabant. Verba tua non otiosa fuerunt, sed omnia ad laudem Dei, & proximi vtilitatem. Vita tua tota sic fuit exemplaris, & virtutum radio sic enitebat, quòd, solo aspectu tuo sancto à peccatis, & peruersis cogitationibus retrahebas peccatores, mens tua sancta, nunquam ab oratione, & contemplatione cessabat, quamuis corpus interdum operibus filii, & acus vacaret, ut sic de labore manuum tuarum viuendo, bene tibi esset, & proximis onerosa non esses. Vita tua tota in paupertate fuit, quia temporalia despexisti.

2. O Virgo illustrissima, ex clara stirpe procreata, regium statum spreuisti, & humilitatem, ac paupertatem dilexisti, nihil in te fuit sublime vel altum, nisi mens, quæ semper eleuata fuit ad Deum. De te ipsa nihil præsumpsisti, sed crescentibus spiritualibus bonis, etiam humilitas in te creuit. Laboribus indefessis tuum sanctum corpusculum, vigiliis, abstinentiis, & meditationibus macerasti, non ut carnem subiiceret spiritui, cum semper carni spiritus dominaretur, sed ut virtutes, & gratiæ diuini amoris in te augerentur, & Deo amplius complaceres, ad cuius dilectionem tuus animus ardebat: & ut etiam populum pretiosissimo sanguine Filij tui redemptum in eius beneplacito conseruares, & acceptabilis esses. Loca sacratissima Passionis, Resurrectionis, Ascensionis, & alia benedicti Filij tui Redemptoris nostri, in eius beneplacito, accessu deuotissimo frequentabas, ut ipso sublato, & eleuato in cælum ab oculis tuis, saltem ipsa loca, in quibus suam affluentem charitatem humano generi ostenderat, humiliter visitando, referre non cessares gratiarum actiones.

3. Sed, Virgo gloriola, *Tota die verecundia mea contra me est, & confusio faciei mee cooperuit me*, dum considero vitam tuam arctissimam, quæ ^{Psalm.} ^{43. 6.} arctatione non indigebas, cum esses sanctificata, quare, peccare non poteras, nec inclinari ad peccatum. Et ego miser peccator, qui continuo pecco, & peccata multiplico, duco vitam meam in corporis voluptatibus, omni pœnalitate, quantum in me est, exclusâ. Adiua me, Virgo piissima, tuis intercessionibus, deprecando tuum Filium benedictum, ut vita mea miserabilis emendetur, & in bonum commutetur: peccata mea deleantur, & diuina gratia infundatur, & decursis huius vitæ curriculis, gloria sempiterna misericorditer mihi detur. Amen.

Contemplatio XI.

De Assumptione Virginis Mariae.

1. **D**ignare me laudare te, Virgo sacra, non spernas me impiissimum peccatorem, non abhorreas me indignum tuis laudibus; nec claudas labia mea, quamvis multis modis polluta, quae te volunt laudare. Da mihi virtutem, ut non solum ore, sed & mente te laudem, te magnificem, te extollam, tecum gaudeam de tuis beatissimis gaudiis tibi generose à tuo benedicto Filio concessis. Inter cetera gaudia, maximum tibi gaudium fuit, tua sancta Assumptio; qua mundum immaundum reliquisti, mundum viciisti, de mundo triumphasti, & ipsum virtuosè superasti, & conculcasti, ipsum abiecisti, & in ipso fuisti sine mentis læsione, sine cordis violatione, sine periclitatione, & demum carnis debitum exoluendo sine dolore, cœlos penetraisti. Filius tuus benedictus tibi obuiam venit cum civibus cœlestibus, cum laudibus, & canticis in sinu suo te recepit. O beatum gaudium! exaltata es, Virgo beatissima, super choros Angelorum, & ad dexteram gloriosi Filij tui collocata es: Regina cœli effecta es. Te ciues cœlici post sanctam Trinitatem honorant, laudant & glorificant. Quidquid vis, quidquid peris à tuo Filio benedicto, totum habes, totum obtines; non habes repulsam, non tibi aliquid denegatur, sed in omnibus tua petitio exauditur. Tanta est tua charitas, tua compassio, tua dilectio ad peccatores, quod pro omnibus oras, omnibus intendis, omnibus subuenis; post Deum non est gloriæ tuæ similis.

2. O gaudium immensum! gaudium insuperabile! gaudium sempiternum! quo gaudes cum benedicto Filio tuo, sine aliqua temporis interpolatione. Nullus tibi invidet, nullus tuos actus depravat, nullus tibi iniuriatur, nullus tibi displicentiam facit; sed de te, & in te omnes gaudent & lætatur, serviunt & obediunt. Hoc est placens benedicto Filio, hoc delectabile, hoc consolabile, hac suauitate plenum, hoc miro odore redolens, hoc dulcedine non vacuum. O Virgo beatissima, gaude, & semper gaudio magno gaude: quia per tuam sanctissimam Assumptionem habes, quod querebas; possides quod volebas, tenes quod præstolabaris, Deo in cœlis iuncta es, quem in terris posita tota mentis intentione dilexisti, assumpta es, Virgo Maria, ad vitam perpetuam, ad gaudium indeficiens, ad pacis requiem, ad habitationem securam, ad delicias impassibiles, ad refecionem interminabilem, ad laudem inenarrabilem, ad diem non aduersascentem, ad gloriam inaccessibilem, ad Filium tuum vniuersitatis factorem.

3. O Virgo virginum, mater Regis Angelorum, assumpta es in cœlum, gaudent Angeli, laudantes benedicunt Dominum. Ego verò miser assumptus sum ad mundum, de quo gaudent inimici, quia propter peccata mea

seruituti illorum me subiugavi. Adiuua me, Domina mundi, aduocata peccatorum, charitate repleta, gaudium supremum, & ætænum possidens. Tua sancta deprecatio non me dimittat in luto aquarum multarum, sed subleuet mentem meam ad Deum, & ad te continuâ meditatione. Impetum meorum passionum cohibe, ferosque motus compesce: quoniam tu es veraciter Dei genitrix, vitæ dominatrix, & cunctorum Domina; ideoque te supplici prece deposco orbem terræ pacifica, fidemque corrobora; & memor tuæ beatæ consuetudinis, propitiatrix mihi semper esto apud tuum Filium gloriosissimum Saluatorem meum; vt animam meam cum corpore separata fuerit, in cælis recipiat, vbi secum & tecum permaneat per infinita sæcula sæculorum, Amen.

Contemplatio XII.

De Gaudijs quæ habet Virgo Maria in Cælo.

1. **B**eatam te dicunt, gloriosa Virgo Maria, omnes generationes in terra & in cælo. Te laudant, te benedicunt, & te glorificant; tua gaudia spiritualia recolentes. Tu enim in cælis Regina coronata, exaltata es super choros Angelorum: tu ad dexteram benedicti Filij tui sedes, & collocata existis. Tu super omnes cælicolas post sanctam Trinitatem honorata es, & tibi Reginalem reuerentiam illi impendunt. Tu tantum propitia es benedicto Filio tuo, & tam dilecta, quod quidquid petis, mox impetras ab eodem: nec vnquam repulsa tibi datur, nec aliquid denegatur. Tanta est dilectio gloriosi Filij ad te, quod inter placabilia sibi, qui te honorant & diligunt, placent sibi, & illos diligit singulari amore. Tu super omnes cælicius sanctæ Trinitati propinquior es, & super omnes sanctissimum Mysterium eius nosti, ac eius beatâ visione frui digna es.

2. Sed nonne est aliud, de quo, sanctissima Virgo, gaudeas? certè sic: quia certissima es quod huiusmodi gaudia nunquam deficient tibi, nunquam illa perdes, nunquam à te subtrahentur, nunquam à te poterunt separari, quin semper illis vtaris, illis fruaris, in illis delesteris, & tibi perpetuò durabunt: ò Virgo benedicta, gaude & semper gaude, semper gaudebis, quia gaudia habes, quibus perpetuò gaudere debes, omnis consolatio à te sublata est, quia gaudia perpetua inuenisti. Tua vita tota, gaudia sunt; nihil aliud habes; agere, nisi gaudere ac frui gaudijs sempiternis, & pro peccatoribus tuum benedictum Filium orare.

3. Ora igitur gaudens, Virgo Maria, pro me miserrimo peccatore: quia in hoc miserabili mundo non gaudeo, sed tristor, non consolor; sed desolatione sum plenus; non rideo, sed flere debeo calamitates & peccata meas; & si quando gaudeo, gaudium inane est, & velut fumus euanescebat, in lucum conuertitur & dolores: non cesses orare, piissima Virgo, tuum Filium.

Vu iij.

benedictum ut tristitia mea in gaudium conuertatur, & gaudium meum nemo tollat à me. Fac me deprecationibus tuis sanctissimis dignum, ut de tuis gaudiis sanctissimis gaudeam, & obtentâ veniâ peccatorum meorum, tuis beatissimis suffragantibus meritis, in cœlo gaudiis perpetuis misericorditer replear, ut tecum & cum omnibus Sanctis gaudeam, per infinita sæcula sæculorum. Amen.

Contemplatio XIII.

De Beatitudine Virginis.

1. **O** Inter & super omnes mulieres benedicta, sanctissima Virgo Maria, beatitudines tuas nullus mortalium dignè explicare valet, præsertim ego iniquus peccator, plenus vitijs & peccatis, quæ sensus meos occupant, & detinent miserabiliter alligatos. Sed tua immensa pietas exuberet in me, ut te laudare valeam, te semper in mente habeam, te diligam, te exorem, tuam misericordiam implorem, tuas beatitudines referam corde puro; à te non separe, me suscipias, me defendas, ab hoste maligno me protegas, me non desinas adiuuare. Tibi meipsum commendo, curam de salute animæ meæ & corporis habeas, & neminem trepidabo; Si exurgat aduersum me prælium, semper in te sperabo; In te est spes mea & fiducia mea, & in beatissimo Filio tuo: à vobis tota salus dependet, & licet tanto patrocinio non sim dignus, tua misericordia deprecans, & benedicti Filij tui misericordia exaudiens, supplebit defectus meos & meam miseriam, & fragilitatem iuuabunt.

Psalm.
46.3.

2. O benedicta, & beatitudinibus plena, gloriosa Virgo Maria, tuum Filium benedictum imitando pauper fuisti, non solum bonis temporalibus, sed etiam spiritu; & ideo iuxta sententiam Saluatoris tibi dignè debetur regnum cœlorum, Tu mitis in hac peregrinatione constituta fuisti, ut tibi daretur terræ possessio, de qua dicitur, *Portio mea Domine in terra uiuentium.* Tu iustitiam obseruasti, reddendo unicuique, quod suum erat, Deo & proximo dilectionem, & tibi ipsi dignam seruitutem, declinando à malo, & faciendo bonum: ideo saturari meruisti visione & fruitione diuinâ. Tu desolationes & mala nostra, pietate mota luxisti, & nunc consolatione beatificâ replesti. Tu semper misericors fuisti, & misericordiam consecuta es sempiternam. Tu munditiam non solum corporis, sed etiam animæ semper habuisti, dignè igitur tibi debetur, ut Deum semper facie ad faciem videas, & eius fruaris semper visione perpetuâ. Tu pacifica semper fuisti, & pacificos dilexisti, & ideo dignè Dei filia nuncuparis. Tu persecutiones ab iniquis Iudæis iniuste passa fuisti, & eas patienter recepisti, propter quod regnum cœlorum possides, & in æternum possidebis. Et si maledictiones aduersum te falsi Iudæi mactando dixerunt, gaude & exulta, gloriosa Virgo

Psalm.
141. 6.

Maria, quia merces tua copiosissima est in cœlis, quam nunc habes, nunc tenes, nunc possides, nec à te aliquo tempore potest auferri, sed tibi perpetuò perdurabit.

3. O Virgo læta & lætitia plena, si alij peculiariter beatitudines possident, quanta est lætitia, quanta est exultatio tua, gaudiū quantū tuum, quanta est consolatio tua? quia non solum particulariter, sed etiā vniuersaliter ipsas beatitudines obtinuisti, & obtinere meruisti. Nec mirum, Virgo beata, quia cæteris datæ sunt virtutes & gratiæ per partes, sed tu omnes generaliter habuisti; Quis enim, Virgo beata, inuestigare potest tuam gloriam, tuum præmium, tuam mercedem, tuum honorem, tuum decorem, tuam beatitudinem, & tuam gloriam immarcescibilem quā in cœlis coronata existis? Ad ista consideranda humana fragilitas attingere non potest quia, *Oculus non vidit, nec auris audiuit, nec in cor hominis ascendit, quod tibi benedictus* 1. Cor. 13. 9 & Isa. 64. 4.

Filius tuus donauit in cœlis.

4. Memento mei, piissima Virgo, quæ tantam gloriam meruisti obtinere. Memento mei in hac valle miseræ positi. Ora benignissimum Filium tuum, ut educat me de carcere peccatorum meorum, in quo carceratus & cælatus sum, per iniquissimos inimicos meos, & vinculatus teneor. Exora ipsum humiliter, ut me liberare dignetur remittendo & indulgendo, nec ulterius aduersum me præualeant inimici; sed ipsos deuincendo, sibi & tibi placitè seruiam hîc, & in futurum, per infinita sæcula sæculorum. Amen.

Contemplatio XIV.

De Officio Aduocate, quod habet Virgo Maria.

1. **V**irgo gloriosa, singulari virginitate, & salutari fecunditate præclara, quæ nec primam, nec vltimam similem habuisti, nec in futurum habebis; ad te venire audeo cum in factis meis tibi contrarium me cognoscam. Tu enim bona es, ego malus; tu humilis, ego superbus; tu Virgo, ego corruptus; tu pia, ego impius; tu Dei amica, ego propter peccata mea inimicus; tu misericordiâ plena, ego illâ vacuus; tu circumfusa virtutibus, ego omnibus vitiis cogitatione, consensu, & opere contaminatus; tu Deo obediens, ego inobediens, tu patiens, ego impatiens; tu Filium Dei mundo dedisti, ego ipsum abstuli mihi ipsi, tu ipsum glorificasti, ego ipsum blasphemauit, tu poenitentiam egisti, ego voluptatibus me dedi, tu paupertatem temporalium elegisti, ego temporales diuitias concupiui, per te porta Paradisi aperta est, ego mihi ipsi ingressum ipsius prohibui, tu mundum contempsisti, ego ipsum dilexi, tu mentem semper ad superna eleuasti, ego meam ad terram prostravi, tu Dei beneficia recognouisti, ego iniquè oblitus fui, tu charitate ferues, ego frigidus sum in ipsa, tu digna es

omni laude, ego omni opprobrio, tibi dignè gloria debetur, mihi dignè pœna æterna; tu Deum honorasti, ego ipsum contempni, tu laborasti, ut Deo placeres, ego laboravi, ut mundo placerem; tu innocentiam observasti, ego iniquitatem admisi; tu peccata abhorruisti, ego me illis immiscui mente prauâ, in te est omnis perfectio, ego sum in omnibus imperfectus; tu pro peccatoribus oras, ut non damnentur, ego me ipsum trado damnationi.

2. Ecce, Virgo Maria, qualis sum, nec meam qualitatem possum plenariè explicare. Quomodo confugiam ad te, cum sim tibi & tuis factis dissimilis & contrarius? quomodo diliges me, cum similis diligat suum similem? aut quomodo audies me loquentem tibi, si non diligis me? quia nec iuste diligere debes. Sed, Virgo benedicta, quamuis ex prædictis venire ad te non audeam, ex sequentibus tamen cordis fiduciam de tua pietate suscepi: Virgo es & Dei genitrix, & propter peccatores, effecta es Dei Mater, propter peccatores exaltata es super choros Angelorum, ad tantam gloriam ascendisti, ut pro peccatoribus intercederes; tu peccatorum aduocata existis, & onus huiusmodi officij in te benignè suscepisti; tu Regina cœlorum, & mundi effecta es, habens plenariam potestatem, & quicquid potest facere Filius tuus, tu illud potes ab ipso impetrare tuis precibus; tu dispensatrix es gratiarum diuinarum; nihil concedit nobis benedictus Filius tuus, quin pertransierit per manus tuas piissimas; à te dependet vita peccatorum; per te peccatores benedicto Filio tuo reconciliantur; tu misericordix es Mater; tu es tutissimum refugium peccatorum; à te nullus, quantumcumque magnus peccator despicitur, nullus repulsam patitur, nisi ex voluntaria malitia te deserat & fugiat, omnes peccatores ad te redeuntes manu piâ recipis, nec moram in hoc facis, nec dilationem concedis; sed sinum misericordix tuæ aperis omnibus, omnibus exaudibilem aurem præbes, viam vitæ ostendis peccatoribus, de quorum maioribus me cognosco.

3. Igitur audi me miserum peccatorem, Virgo pia; exerce tuum officium piissimum aduocationis ad Filium tuum benedictum; ipsum humiliter deprecando pro me miserabili peccatore, ut ipso piissimo officio suffragante, deleantur peccata mea, & gratia tui benedicti Filij hinc me præueniat, ut in futurum tecum viuam per infinita secula seculorum. Amen.


PARS

P A R S X.

DE SEPTEM VERBIS
 VIRGINIS MARIÆ,
 QUÆ REFERVNTVR AD SEPTEM DONA
 Spiritus Sancti.

Contemplatio I.

*Dè primo verbo, Quomodo fiet istud, quoniam
 virum non cognosco?*

1.  PIRITVS sanctus docuit te, benignissima Virgo Maria, & verba tua prudentissima in isto sermone ornauit, vt dicere possis, *Iusti sunt sermones mei, & non est in eis prauum quid*, *Prou. 31.* neque peruersum. Ideo primum verbum, quod locuta fuisti, s. fuit, *Quomodo fiet istud, quoniam virum non cognosco?* Et hoc verbum dictauit *Luc. 1.* Spiritus sapientiæ, qui te repleuerat, & fuit verbum fortitudinis & casti- 34. tatis. In quo primò requiris de voluntate Dei, nam audito virginittis periculo, quod Mater deberes fieri, nec modum reperires, quo hoc posset fieri saluo virginittis proposito; non de re dubitans, sed de modo, rupto recundiæ fræno quæsiuisti, *Quomodo fiet istud, quoniam virum non cognosco?* non enim dubitabas quin adimpleri deberet, quod ab Angelo audiueras; sed quo modo fieret non legeras, neque ab Angelo audieras quo ordine istud deberet adimpleri; & ideo quæsiuisti, quia hoc erat mysterium absconditum à sæculis, à Prophetis non prædictum, Angelo referuatum, ideo dixisti ad Angelum, *Quomodo fiet istud, quoniam virum non cognosco.*

2. In quo ostendisti, Virgo Maria, magnam constantiam tuæ mentis, quia constanter respondisti, *quoniam virum non cognosco*, & in hoc contraria fuisti Eux, quæ leuis fuit corde; quia citò credidit, & nec verbum, nec loquentem discutiens, facillè consensit; duplici funiculo trahebatur, quia promittebatur sublimitas, & suadebatur voluptas: ad quæ duo, homi-

X x

nes facile inclinatur, sed tu Virgo neutrum voluisti, quia humilis & Virgo fuisti, sed utilitatem non solum propriam, sed communem desiderans, prudenter quasiuisti, *quomodo fiet istud*, quod tu dicis, ut Virgo concipiam & pariam Filium? *quoniam virum non cognosco*, id est, *votum habeo non cognoscere*. O felix propositum tuum, Virgo beatissima, in quo firmitas conuenit puritati: & quia utrumque habuisti, id est, propositi puritatem, & consilij firmitatem, scribitur de te, *fortitudo & decor in dumentum eius*. Decor est in proposito continentiae, fortitudo in consilij firmitate.

3. Sed piissima V. Maria, ego fragilissimus peccator tuam doctrinam non fui secutus, sed doctrinam Eux. Promiseram enim in Baptismo seruire Deo, & ipsam habere in Dominum; sed ad modicum verbum temptationis hostis antiqui, credidi, more Eux; & Deo inobediens fui, & hostibus consentiendo multa peccata perpetraui iniquè. Succurre, Virgo piissima, succurre mihi in tantis periculis constituto; Ora benignissimum Filium tuum, ut abrenunciatis hostibus ad suam obedientiam me misericorditer trahat, ut sibi dignè seruiam, & vitam mihi concedat æternam. Amen.

Contemplatio II.

De secundo verbo, Ecce Ancilla Domini, fiat mihi secundum verbum tuum.

Lec. I.
38. 1. Clementissima Virgo Maria, secundum verbum, quod ore tuo virginico protulisti, fuit, *Ecce Ancilla Domini, fiat mihi secundum verbum tuum*. Nam intellecto quod posses concipere, & parere manens Virgo, respondisti, *Ecce Ancilla Domini, fiat mihi secundum verbum tuum*. Verbum est timoris, qui collacteneus est humilitatis. In hoc verbo, gloriosa Virgo Maria, ostendisti promptam obedientiam, quia aperuisti verbis Angelicis auditum, & ab auditu tuo initium sumpsit reparatio nostra; ut intraret remedium, vnde morbus irrepsit; & per eadem vestigia sequeretur vita mortem; lux tenebras, veritatis antidotum, serpentis venenum, & vitæ ianua, fieret auditus per quem intrayerat mors in mundum.

3. Inde per hæc verba, Virgo Maria, ostendisti promptam fidem & promptum consensum. *Ecce Ancilla Domini* non carnis, non mundi, non diaboli, sed Dei: Ideo, *fiat mihi secundum verbum tuum*, non secundum petitionem meam; quia non auderem petere, ut fierem Mater Dei. Nisi enim, Virgo benignissima, credidisses & sperasses posse fieri, ut futura esses, quod tibi promittebatur, non respondisses, *fiat mihi secundum verbum tuum*; sic fuit firmatum pactum reconciliationis humanæ, & matrimonium diuinæ & humanæ naturæ, quia in hoc verbo concepisti Filium Dei. Præcessit autem verbum humilitatis gloriam conceptionis.

Hæc est, Virgo gloriosissima, gloria tua singularis, & excellens prerogativa, quia Filium unum eundemque cum Deo Patre meruisti habere communem. Fiat igitur mihi secundum verbum tuum, id est, cum magna deuotione & humilitate promissum Angeli impleatur, & reconcilietur mundus in hoc verbo, beatissima Virgo Maria, instruimur humiliando nos coram Deo, eius gratiam postulare, quia scriptum est, *Indulgentiam illius* 14. 8.
fusus lacrymis postulamus & humiliemus illi animas nostras. 14.

3. Sed, benedicta Virgo Maria, licet instructus fuerim tuo exemplo petendi à Deo cum humilitate, tamen oratio mea non fuit humilis, nec cum humilitate processit, sed cum superbia & iactantia cordis & oris, & ingratitude operis. Ideo non merui exaudiri, tanquam alienus & separatus à Deo. Sed, Virgo piissima, affectus tuus misericordissimus, quem habes ad peccatores suppleat defectu, meos, & humilitas tua suppleas superbiam meam; ut tuo exemplo ductus humiliter coram Deo quem assidua oratione deprecari digneris, ut mihi flagitia commissa remittat, & indulgeat vitam humilem & tibi placitam mihi donet, per quam finaliter vitam etiam obtineam sempiternam. Amen.

Contemplatio III.

De tertio verbo; quando Virgo Maria salutauit Elizabeth.

Exurgens tu, humillima Virgo Maria, in montana cum festinatione Luc. 1.
 ascendisti, & intrando domum Zachariæ, salutasti Elizabeth, quasi 40.
 gratulans ei de dono, quod eam accepisse didiceras. Et hoc fuit tertium
 verbum, quod locuta fuisti, benedicta Virgo Maria; in quo ostenditur tua
 magna bonitas & beneuolentia: quia *salutare* idem est, quod *aliis salutem*
operare. Tu Virgo Maria, salutem desideras peccatoribus, salutem eis procura-
 ras, salutem effectas, pro eis salutem postulas ex abundantia gratiarum
 tuarum. Sicut enim mare non potest exhaustiri; omnes enim aquas recipit,
 & omnes aquas emittit, & semper plenum remanet; sic tu; Virgo Maria,
 recipis omnes aquas gratiarum, & plenitudinem vniuersorum bonorum, ut
 ea nobis distribuas sine diminutione plenitudinis tuæ: sicut guttæ pluuiæ
 dinumerari non possunt, sic neque tuæ gratiæ; maximè ex quo Filius Dei,
 sicut pluuia in vellus; descendit in uterum tuum virginalem. Et sicut aquæ
 maris salæ sunt, & potatæ magis sitim accendunt; sic aquæ gratiarum tua-
 rum, quas piissimè nobis distribuis, potatæ magis accendunt desiderium;
 sicut de re ipsa dicis, *Qui bibunt me, adhuc sitient.* Eccles. 24. 29.

2. Salutasti igitur, Virgo benignissima, Elizabeth, & est istud verbum
 intellectus, ad cuius prolationem intellexit Elizabeth te gloriosam

Luc. i. Virginem Mariā concepisse Dominum, vnde dixit, *Unde hoc mihi, vt veniat Mater Domini mei ad me?* Ad tuam etiam salutationem Ioannes clausus in vtero Dominum suum clausum in vtero virginali cognouit, & pro modulo suo gauisus est in occursum tuum. O benedicta Virgo Maria, in hoc verbo sancto tuo instruimur, quod proximis debemus optare salutem, & cum ipsis loqui de sua salute, quod est *salutare*; & de beneficiis iis impensis gratulari.

3. Sed ego miserrimus, & omni miseriā dignus contrarium confiteor me egisse, quia proximis meis salutem non optaui, sed dolorem; nec cum ipsis de eorum salute locutus fui, sed frequenter ad peccandum inuitaui; de bonis ipsorum non fui gauisus, sed potius de damno ipsorum, & hoc propter inuidiam; aut propter vindictam, & sic Deum offendi, & praecepta eius praeiui, non diligendo proximum, sicut meipsum. Et sicut egi cum ipsis, dignum & iustum est vt mecum agatur; sed quia salutem peccatoribus procuras, confidentiam & spem in te habeo, Virgo Maria, vt animae meae concedas salutem hinc, & in aeternum. Amen.

Contemplatio IV.

De quarto verbo, Magnificat anima mea Dominum.

Luc. i. **L**oquela tua manifestam te fecit, beatissima Virgo Maria, quia dum Elizabeth salutasses, & ipsa te magnificasset, & laudasset: tu, Virgo humillima, humilitatem ostendendo, & laudes humanas respuendo, Deum magis magnificare curasti, dicendo, *Magnificat anima mea Dominum*; & hoc fuit quartū verbum quod locuta es. Et fuit verbum sapientiae, & humilitatis, & gratiarū actionis: in quo docemur Deo gratias agere de perceptis eius beneficiis, & tribuere ei totum, quod est humilitatis; & magnificare potentiam eius; vnde dixisti, *quia fecit mihi magna qui potens est*, & sanctum nomen eius. Magnum enim fuit tibi, vt Dei Patris Verbum carne tuā indutum vtero gestares; magnum fuit, vt dum te ancillam confessa es, tu plasmatoris Mater fieres. Sed haec omnia, & si magna sunt, impossibilia non sunt ei, à quo facta sunt, scilicet, *ei qui potens est*. Haec enim sunt magna, vt tu creatura ederes Creatorem, tu famula gubernares Dominum, per te Deus redimeret mundum, & ad vitam mortuos reuocaret, vt per Virginem fieret Deus homo, fieret verbum caro, essetque dominator, subditus nascendo suae ancillae, quam ipse condiderat, sic quod tu ancilla, in subditum habebas Dominum, & Dominus ancillam in praelatum.

2. Fecit igitur tibi, Virgo Maria, magna; sed non dixisti qualia, quia cū Dei omnia opera humani sensus capacitatem exuperent, praecipue Sacramentū

redemptionis, & incarnationis Verbi mysterium super omnia ineffabile esse constat. Nihil enim vnquam magis mirum factum est, quam vt natura incomprehensibilis, corporis formam ita sibi vniret, vt nec minus in ea esset quod in se erat immensa nec minor se existeret, quia in illa fuerat tota. Hæc ergo sunt magna, & ineffabiliter magna quæ in te, Virgo Maria, facta sunt ad omnium salutem; & tibi facta sunt ad gloriam singularem; idcirco dixisti, *quia fecit mihi magna qui potens est*; absolute igitur dixisti, *potens*, quia omnia potest. Potentem ergo confessa es, tu, Virgo Maria, Dominum; nec amplius dixisti, quia credi potest eius potentia, quia est; sed quanta est, aut qualis, comprehendere omnino non potest. Idcirco solum confessa es potentiam, sed discutere non præsumpsisti, quia sciri non potest quanta est. Verissimè scitur quod immensa est; summè enim potens est, quia potest omne, quod possibile est; nec idcirco minus potest quia impossibilia non potest, quia impossibilia posse non est posse, sed non posse.

3. Sed beatissima Virgo Maria, Dominum non magnificauit ego, sed blasphemauit & beneficia mihi collata non sive gratiæ, sed meis meritis attribui, & de illis non fui humilis, sed superbus. Ora pro me, Virgo Maria, ora tu, quæ potens es, omnipotentem, vt suam omnipotentiam ostendat, & magnificet, mihi parcendo, & potentem me faciat contra hostes animæ meæ, vt ipsis deuictis, mihi tribuat misericordiam æternaliter salutarem. Amen.

Contemplatio V.

De quinto verbo, Fili vinum non habent.

1. O Charitate plenissima, gloriosissima Virgo Maria, benedicto Filio tuo quintum verbum locuta fuisti, dicens, *Fili vinum non habent*; & fuit verbum charitatis, pietatis, & compassionis; quia aliorum verecundiam tuam reputans, sustinere non potuisti nec dissimulare vini defectum: & licet increpata fueris à Filio tuo, quoniam dixit, *quid mihi & tibi mulier?* Tamen tu mitis & humilis corde, nihil respondisti, nec tamen desperasti, sed ministros monuisti dicendo, *omnia quaecumque dixerit vobis, facite*. Vnde, Virgo Maria, primò pro homine Filium exorasti, sic docemur ab eo petere id quo indigemus, qui est sufficientia omnis boni, quod autem respondit benedictus Filius, *quid mihi & tibi est mulier?* non negabat te Matrem suam, sed discernebat potentiam suam: quia non ex natura quam de te, benedicta Virgo Maria, acceperat; sed à potentia suæ diuinitatis habebat facere miracula.

Xx iij

2. Et tu futura prænoscens in spiritu, tanquam Mater Dei, & Dominicam prævidens voluntatem, sollicitè ministros monuisti, dicendo, *omnia quaecumque dixerit vobis, facite*: & tunc Filius pudorem tuæ increpationis releuans, & iam suam aperiens maiestatem expectantibus ministris dixit, *implete hydrias aquâ*; & tunc aquam mutauit in vinum: quia ab initio eam creauit in vineis, indurauit in glaciem, Ægyptijs vertit in sanguinem & Hebreis sitientibus manare præcepit de rupe arida, quâ multitudinem innumerorum populorum stillicidijs noui fontis vice maternorum vberum nutrebat. Sicut igitur, benignissima Virgo Maria, per te impetratum est vinum in nuptijs, sic impetras peccatoribus vinum gratiæ & deuotionis, & interioris consolationis; tenebras illuminas, vias nostras dirigis, tentationes comprimis, & ipsos aduersarios compescis, rectè viuere cupientes exemplis tuis dirigis, errantes reducis, & periclitantes ad portum salutis deducis.

3. O misericordissima Virgo Maria; ex vulueribus cordis mei defluit sanguis peccatorum, corrumpens & sordidans animam meam. Vinum non habeo, vino indigeo; sine illo curare non possum vulnera cordis mei. Impetra mihi, Virgo piissima, à benedicto Filio tuo istud vinum, scilicet penitentiae & compunctionis, quo mudentur & curentur ipsa vulnera; ut corde mundato sibi & tibi placidè seruire valeam, opera virtuosa exercendo, exempla salutaria proximis ostendendo, ut carnis miseræ onere deposito, anima mea ab omni malitia peccati mundata, in cælis collocetur regnatura cum Beatis. Amen.

Contemplatio VI.

De sexto verbo. Quodcumque dixerit vobis facite.

1. **Q** Vis cogitare potest, benignissima Virgo Maria, immensam pietatem tuam, quam non solum deprecantibus te, ostendis, sed etiam non petentibus, nec eam quærentibus, tribuis incessanter? Deficiente namque vino in nuptijs monuisti ministros, ut quaecumque eis diceret benedictus Filius tuus, facerent: & istud fuit sextum verbum, quod locuta fuisti: & est verbum consilij, quia Spiritus sanctus te repleuerat, quia quidquid locuta es, aut ad tui humiliationem, vel ad Dei laudem, vel ad ædificationem proximorum referebas. Ideo de verbis tuis potest dici, *Pro. 16. fons distillans verba composita*, quia sicut in fons est cera luminis instrumentum, & dulcedo mellis reficiens iustum; sic in verbis tuis erat scientia veritatis illuminans intellectum, & omnimoda veritas, & summa pietas reficientes affectum. Medicinalia etiam erant gratissima verba tua, &

conseruatiua more mellis: quia sanabant, & tollebant verecundiam ministrorum in nuptiis; sanabant etiam languores animarum, & præseruabant à peccato. Tu, Virgo Maria, corde benigna, id est, benè ignita igne pietatis & charitatis, opere misericors, sermone modesta, mente & corpore pudica, inuitabas ministros ad obediendum benedicto Filio tuo, vt scilicet facerent, quæcumque diceret eis.

2. In hoc verbo modestissimo, Virgo Maria, docemur ad diuinæ voluntatis impletionem alios quantum possumus inuitare; hoc est enim consilium Sanctorum, hoc est consilium tuum, Virgo Maria, quod in te ipsa prius ostendisti, voluntatem tuam diuinæ voluntati per omnia conformando. Nam tu, Virgo Maria, intelligens per Angelum quod Filius Dei de te volebat assumere carnem, statim respondisti obedienter, *ecce Ancilla Domini, fiat mihi secundum verbum tuum*. Hoc consilium alijs ostendisti, quia Luc. I. 38. misericors & piissima Virgo Maria, cupis salutem omnium: sæpe enim quos iustè damnaret tui benedicti Filij iustitia, elementer liberat tua misericordia. Ideò collocata es aduocata à dextris Filij tui, id est, in posterioribus bonis eius: quia peroptimè congruit cum Rege iustitiæ Regina misericordiæ.

3. Sed benignissima Virgo Maria, ego impiissimus peccator sum, quia Filio tuo benedicto & tibi non parui; consilia audiui, sed non cum affectu recepi. Imò illa inobedienter & proteruo animo respui; & consilia impiorum & inimicorum audiui corde peruigili, & secutus fui, & ex hoc merui malum & non bonum, pœnam & non gloriam, mortem & non vitam æternam; nisi tua pietas mihi succurrat, Virgo pia. Succurrat igitur mihi, vt consilium tuum semper faciam, tanquam bonus minister animæ meæ, & quidquid mihi præcepit benedictus Filius tuus; vt in fine vitam obtineam sempiternam. Amen.



Contemplatio VII.

De septimo verbo, Fili, quid fecisti nobis sic?

1. **M**ater intermerata, Virgo Maria, septimum verbū, quod secundum Euangelium fuisti locuta, fuit verbum dilectissimo Filio tuo dictum, quando dixisti, *Fili, quid fecisti nobis sic?* scilicet, vt remaneres nobis ignorantibus? *Ecce ego, & Pater tuus*, (scilicet putatiuus,) *dolentes*, scilicet Luc. 27. 48. de absentia tua, *quarebamus te*. Istud verbum est scientiæ, quod magis attribuitur diuinis rebus quàm humanis. Et in hoc quod præmisisti, *Fili*, notatur in correctione mansuetudo. Et quod ipsum in quantum Deū non ausa fuisset, Virgo benedicta, corripere; sed in quantum Filium tuum; ideo dixisti, *Fili*; præmisisti enim, Virgo piissima, *Fili, quid fecisti nobis sic?* hoc notatur,

Virgo Maria, tua magna discretio, quia statim non increpasti benedictum
 Es. 49. Filium tuum, sed tantum quæsiuisti, quare sic fecisset. In hoc etiam quod
 dixisti. *Pater tuus*, cum illum de Ioseph non concupisses, sed de Spiritu
 sancto, claudebas impiis Sacramentum Incarnationis diuinæ, quia
 si ipsum cognouissent, non eum crucifixissent, & ita non fuisset
 redempti. Vnde Filius tuus benedictus respondit humiliter, *quid est quod*
me quærebatis? in hoc enim non increpat, quia quæritur, sed indicat ubi
 potius quæri debet, scilicet in diuinis: vnde subdit, *in his quæ Patris mei*
sunt, oportet me esse.

Id. 51. 2. Sed tu, beatissima Virgo Maria, non intellexisti verbum, quod locutus
 est benedictus Filius tuus, quia adhuc non, capiebas mysteria. Et post descen-
 dit benedictus Filius tuus tecum, & venit Nazareth, vt sic exerceret
 illa quæ sunt Patris, tanquam Filius Dei & tanquam Filius tuus obedi-
 tiam tibi seruaret. Ideo sequitur, *Et erat subditus illis*: hoc singulariter,
 Virgo Maria, habuisti, vt videres tibi subditum, quem non solum humana,
 sed etiam angelica natura veneratur & adorat Altissimum. In his verbis
 sanctissimis, Virgo Maria, instruimur delinquentes filios corripere, cum
 tu corripueris non delinquentem; nec commendare coram eis si quid fe-
 cerint boni, sicut non legitur quod tu Filium commendaueris; ideo quia
 erat in his, quæ Patris sui erant. In hoc, gloriosa Virgo Maria, quod di-
 xisti, *dolentes quærebamus te*, doces & instruis nos quod qui vult benedi-
 ctum Filium tuum quærere, si ipsum perdiderit per peccatum, debet etiam
 quærere cum dolore.

3. Sed ego iniquissimus peccator frequenter perdiidi eum propter multa
 peccata quæ nequiter perpetravi, sed ipsum non quæsiui cum dolore de
 peccatis meis. Sed, misericordissima Virgo Maria, ora illum, vt mihi cle-
 menter concedat, quodcum dolore de peccatis meis ipsum quæram, &
 quærendo ipsum inueniam mihi misericordem, & inuentum ipsum custo-
 diam, & facie ad faciem ipso fruor per infinita sæcula sæculorum. Amen.

P A R S XI.

DE CHARITATE GLORIOSÆ
VIRGINIS Mariæ.

Contemplatio I.

De dilectione Virginis Mariæ ad Deum Trinitatem.

V, beatissima Virgo Maria, Deum dilexisti, sicut omnes scripturæ prædicant diligendum. Dilexisti etiam Deum ex toto corde, quia cor tuum ad nullius rei dilectionem fuit inclinatum amplius, quàm Dei; nec delectata fuisti in aliqua spe mundi amplius, quàm in Deo; omne bonum tibi existimans esse in Deo, ut præ omnibus his diligeres solum Deum: nihil enim dilexisti præter Deum, aut nisi propter Deum. Dilexisti Deum, Virgo Maria, ex tota anima tua, non solum ex toto corde, sed etiam ex tota anima tua, quia aliud est amor cordis, aliud est amor animæ: amor cordis, quodammodo carnalis est, ut etiam Deus carnaliter ametur, quod fieri non potest, nisi prius recedatur ab amore omnis mundialis rei; amor enim cordis non intelligitur, sed sentitur in corde: quia quodammodo carnalis est: amor autem animæ, non sentitur in corde, sed intelligitur; quia amor animæ iudicium est. Dilexisti, Virgo Maria, Deum ex tota mente tua; quia omnes sensus tui Deo vacabant; tuus intellectus Deo ministrabat, tua voluntas circa Deum versabatur, tua cogitatio, quæ Dei erant, pertractabat, tua memoria, ea, quæ sola bona erant, retinebat, ut diceret 1. Cor. 14. 15.

cum Apostolo, *Psallam spiritui, psallam & mente.*
2. Tu, Virgo Maria, dilexisti fortiter Patrem, cui attribuitur potestas; dilexisti sapienter Filium, cui attribuitur sapientia; dilexisti dulciter Spiritum sanctum, qui dulcedo est Patris & Filij; sicut enim est vna substantia in tribus personis: sic singularis & vnica fuit dilectio Virginis Mariæ in tribus proprietatibus supradictis; tua dilectio, Virgo Maria benedicta, ad Deum fuit inseparabilis, tanquam sponsa ad sponsum, dilectæ ad dilectum, matris ad Vnigenitum, ut dicere posses, *Tenui eum nec dimittam.* Cant. 3. 4. Tua dilectio, Virgo gloriosa, ad Deum fuit insatiabilis: quia erat sicut ignis, de quo

Y y

Ecc. 24. Scribitur, *Ignis verò numquam dicit sufficit*: Gustaueras enim quia suauis est
29. Dominus, qui dicit, *Qui edunt me, adhuc esurient*: Tua dilectio, pretiosa
Psalm. Virgo Maria, ad Deum fuit singularis; quia extra Deum nihili quæfuit,
26. 4. dicendo, *Unam peti à Domino hanc requiram in domo Domini*. Tua dilectio
Jerem. fuit incessabilis, id est, perseverans; idè dicebas, *In charitate perpetua*
31. 3. *dilexisti te*. Tua dilectio ad Deum, benedicta Virgo Maria, fuit intenta &
 intima; intenta, quia per amoris desiderium semper in Deum perrexit, intima
 non superficialis: quia ad exteriora non effluxit.

3. Sed, dilectione plena Virgo Maria, ego miser peccator Deum non
 dilexi, sed mundum & carnem, & circa complacentiam ipsorum laboravi,
 & tempus meum vsque nunc expendi, & pro istis, quæ modicum mihi du-
 rabunt, Deum reliqui, qui mihi perpetuò duraturus erat. Ora illum, Virgo
 piissima, vt ad eius dilectionem me trahat, & ad hoc meum rebellem animum
 compellat, vt cum hîc & in futuro diligam per infinita sæculorum sæcula.

Contemplatio II.

De dilectione Virginis Mariæ ad Vnigenitum suum.

1. **F**ilium tuum vnigenitum, Deum & hominem verum, beatissima Virgo
 Maria naturaliter dilexisti. Plus diligitur Filius ab illo parente, cuius
 virtus conceptiua superabundauit in conceptu eius, quàm ab alio. Idè tu,
 Virgo Maria Mater, naturaliter plus dilexisti vnigenitum Filium tuum be-
 nedictum, quàm aliqua alia mulier; quia totam suæ carnis materiam à
 carne tua materna traxit Christus.

2. Tu, benedicta Virgo Maria, Filium tuum vnigenitum carnaliter in
 bono sensu dilexisti; quia Christi carnem tantà deuotione, & tanto studio
 fouisti, & nutriuisti, vt amore carnis eius, ab amore carnis propriæ suspensa,
 omnes cordis tui affectiones prosterneres, & cum de carne propria admi-
 nistrasti conceptum, & de lacte proprio nutrimentum. Secundùm naturam
 assumptæ humanitatis esurientem pauisti, lacte virgineo sitientem potasti,
 infirmum pro infantia & iacentem, non solum visitasti, sed etiam balnean-
 do, fouendo, & gestando frequentasti; cæteraque ei omnia humanitatis
 obsequia exhibuisti tandem comprehenso, & crucifixo, quasi in carcere po-
 sito, affuisti.

3. Tu, gloriosa Virgo Mater, vnigenitum Filium tuum spiritualiter dilexi-
1. Cor. sti, quod est ex tota anima; quia *Spiritus est Deus, & qui adheret Deo, vnus*
4. 13. *spiritus est cum eo*, virtute scilicet, amoris & gratiæ. Hæc enim vnio, quæ
 fit per amorem, spiritualis est: quia amor ignis est, qui materiam sibi co-
 hærentem ignit, & in sui naturam conuertit: & quia tu, pretiosissima Virgo
Psalm. Maria, magis intimè quàm aliqua alia mater, Filio tuo vnigenito per amo-
26. 9. rem adhaesisti, dicens illi, *Adhaesit anima mea post te*, idè spiritualiter vnium
 cum ipso facta es. Vnde dixisti, *Adhaesit anima mea*, non caro.

4. Tu, gloriosa Virgo Maria, Filium tuum vnigenitum dilexisti charitatiue; quia tanta fuit dilectio tua ad peccatores, quod quasi gaudenter quodammodo sustinueris mortem Filij tui, & cum ipso desideraueris (si necesse fuisset) mori ob redemptionem generis humani. *Sicut enim Deus propter nimiam charitatem, quā dilexit nos, dedit vnigenitum suum pro scelere nostro; ita & tu, benedictum fructum ventris tui pro peccatis animarum nostrarum.* Vnde sicut *Deus sic dilexit mundum, vt Filium suum vnigenitum daret pro mundo;* sic tu, beatissima Virgo Maria dilexisti mundum, vt Filium tuum vnigenitum dares pro mundo. Ephes. 2. 4. Ioan. 3. 16.

5. Ego verò ingratiſſimus peccator, obliuioni dans beneficia recepta à benedicto Filio tuo, cum non dilexi, nec in factis, dictis, & cogitationibus ei volui complacere, sed potiùs mundo, & carni meæ. Sed tu, Virgo pia, compati digneris mihi, & quia charitatiue vnigenitum tuum Filium dilexisti, redde illum placatum mihi, vt eius misericordia meam ingratitudinem suppleat, & sic me disponat & ordinet, vt sibi placeam, & vitam assequar sempiternam. Amen.

Contemplatio III.

De dilectione Virginis Mariæ ad proximum.


1. **D**ilectione plena beatissima Virgo Maria, præceptum diuinum corde & opere obseruasti; quia proximum dilexisti, sicut teipsam, scilicet, ad seruiendum Deo, ad videndum Deum, & ad vitam æternam possidendam. Dilexisti, Virgo piissima, proximum gratis, non propter aliquam vtilitatem, quam inde consequi deberes; sed ipsum dilexisti cordialiter, sine spe alicuius emolumenti temporalis; quia bonorum meorum non eges, sed desiderabas vt tibi seruiatur, vt in nobis inuenias misericordiam, quam retribuere possis. Tu, gloriosissima Virgo Maria, proximum dilexisti, omne bonum aobis desiderando, pro nobis tuum Filium iugiter exorando, tam pro iustis ne pro cadant, quam peccatoribus vt resurgant.

2. Nihil facere posset peccator, benignissima Virgo Maria, neque viuere posset sine tuo adiutorio, sine dilectione tua, sine deprecatione tua; quia semper pro peccatoribus intercedis, & benedictum Filium tuum assiduè deprecatione oras: nam misericordiæ & beneficiis tuis pleni sunt cœli & terra; nec est qui se abscondat à calore tuæ dilectionis: quia quanto magis Deo, qui ignis est, fuisti proxima, tantò magis inflammata fuisti charitate & dilectione, quia ipse *Deus charitas est*; & quia plus omnibus dilexisti, singulari miraculum Deus Pater in te operatus fuit, vt dicere posses, *Anima mea liquefacta est*, scilicet per incendium charitatis & dilectionis ad proximum. Ignis enim charitatis & dilectionis suauiter ardet, sed non lædit; accendit, sed non consumit; & si consumit, hoc facit non ad læsionem sed ad pur-

Yy ij

gationem; culpam enim consumit, si inuenit, non naturam, sed eam purgat, fouet, & nutrit. Sicut è contrario, ignis concupiscentiæ nutrit & fouet culpam, & ex magna parte lædit & consumit naturam.

3. O beatissima Virgo Maria, da mihi miserabili peccatori ignem tuæ charitatis, & dilectionis; vt me calefaciat in amore Dei & proximi: quia frigidus sum glacie peccatorum; vt me illuminet ad incedendū per viam rectam veritatis: quia tenebrosus sum: vt in me consumat culpam, & eam purget. Dilige me, benignissima Virgo Maria, sicut teipsam, id est, eo quo teipsam, scilicet & charitatis affectu & effectu; & in quo teipsam, scilicet in Deo, & propter quod teipsam, id est ad gratiam in præsentī, & gloriam in futuro: quia qui sic proximum diligit, legem impleuit; vt sic per tuam veram dilectionem, hic gratiā inflammatus, gloriam obtineam misericorditer sempiternam. Amen.



Contemplatio IV.

De dilectione Virginis Maria ad Deum & proximum.

1. **P**Ræceptorum diuinorum magnifica obseruatric, amantissima Virgo Maria, tantā obedientiā Deo subiecta fuisti, & tantā cordis promptitudine eius voluntati parere & adherere voluisti, quod de præceptis ipsius nihil penitus detraxisti, sed omnia corde peruigili, opere continuo, absque vllā diminutione inuiolabiliter obseruasti; Deum super omnia diligendo, & proximum sicut teipsam. *In his duobus, tota Lex pendet & Propheta*, ista Deo placent, repellunt hostem antiquum, peccata abhorrent, virtutes diligunt, & acquirunt, mundum spernunt, cælum appetunt, carnis voluptatem reiciunt, cor mundant, animam exaltant, nulli nocent, omnibus profunt, iram Dei mitigant, bona spiritualia accumulunt, irasci nesciunt, ad misericordiam inclinant, legem implent, prosperis non vincuntur, in aduersis per patientiam consolantur, merita augent, iustitiam Dei placent, semper gaudent, & delectantur, non in sæculo, sed in Deo, non in bonis, sed in malis; non temporaliter, sed æternaliter.

2. Ista ducunt hominem per viam rectam ad ciuitatem cœlestem, ad quam recurrere quisque debet cum magno desiderio, & amore Dei & proximi. Nam amor per desiderium, de Deo, & cum Deo, & in Deum currere potest. De Deo currit, cum de Deo accipit, vnde eum diligit: cum Deo currit, cum eius voluntati in nullo contradicit: in Deum currit, cum in ipso requiescere appetit, hæc namque ad Deum pertinent, potest etiam amor per desiderium & de proximo, & cum proximo currere, sed in proximum non potest. De proximo, vt de eius salute & profectu gaudeat; cum proximo, vt cum in via Dei comitem itineris & securæ peruentiois habere concupiscat; sed in proximum non potest currere, vt in homine spem, & fiduciam

suam constituat. Hæc est ordinata charitas, & præter ipsam, omne quod agitur, non ordinata charitas est, sed inordinata cupiditas.

3. O beatissima Virgo Maria, omnia ista tibi nota fuerunt, & ea in libro purissimi cordis tui affectualiter obseruasti, quia incomparabilis amor tuus per desiderium tuum de Deo, cum Deo, & in Deum cucurrit, & de proximo, & cum proximo, sed non in proximum. Ista à flore tuæ sanctissimæ iuuentutis per obedientiam diuinam pro lege suscepisti, & ut facilius adimpleres, mundum, & ea quæ in eis sunt, totaliter reliquisti; dum in triennis ætatis tuæ complemento, domum propriam deserendo, templum intraisti, & Deo per amorem adhæcisti, à quo te postea, nullo tempore separasti; fiducialiter ad eum accedendo, constanter inhærendo, familiariter percunctando, & nihil aliud corde & animo cogitando nisi de eo, totam te tradidisti in amorem ipsius. Quidquid cogitabas, quidquid loquebaris, quidquid agebas, totum erat de Deo, totum in Deo, & totum cum Deo; nihil aliud tibi sapiebat, nihil aliud quærebas, nisi illum, quem misericorditer inuenisti. Proximum etiam toto animo & opere dilexisti, quia conexa sunt dilectio Dei & proximi, quia neque dilectio Dei potest esse in aliquo, qui non diligit proximum, nec dilectio proximi in eo, qui non diligit Deum. Ista dilectio est ab omni mundana dilectione remota, quia est spiritalis, & propria Sanctorum, & specialiter super omnia, tua fuit, & est, Virgo benedicta.

4. Heu! miser, quid dicam, aut quid faciam? quia miserabilis dulcedo huius seculi me separauit ab amore Dei & proximi, cum dilexi mundum, & ea quæ in mundo sunt, & ideo ab amore Dei, & proximi me voluntarie separaui. *Quia amicus huius seculi, inimicus Dei constituitur.* Hæc enim dilectio à Paradiso deliciarum, in hoc miserabile exilium Adam & Euam proiecit. Nisi Dei dilectio defecisset, numquam diligere cœpissent malè suadentis serpentis consiliū, in id nec credidissent; hos primos parentes fecuta est mala concupiscentia mea, quæ præcepta diuina, ne adimplerem, impediuit. Iacob. 44.

5. O clementissima Virgo Maria, impetra mihi tuis benignis deprecationibus ut benedictum Filium tuum amem & diligam, quantum volo, & quantum debeo. Imensus est, & sine mensura debet amari; ardeam totus igne sui amoris, dulcedine suā; desiderio suo, charitate suā, iucunditate & exultatione suā, pietate & suauitate suā, & totus sui amoris dulcedine plenus, totus flammā charitatis suæ vaporatus, diligam eum ex toto corde meo, ex tota anima mea, ex tota virtute mea, & omni intentione meā, cum multa cordis contritione, & lacrymarum effusione, & multā reuerentiā & tremore, habens semper eum in corde & ore, & præ oculis meis, semper & ubique: ut nullus in me adulterinis amoribus pateat locus, sed ipsum facie ad faciem, intuendo amem & diligam, per infinita sæcula sæculorum. Amen.

PARS XII.

DE TRIBVLATIONIBVS
& doloribus Gloriosæ Virginis
Mariæ.

Contemplatio I.

De desponsatione Virginis Mariæ.

Singularis Sponsa, singulari virginitate desponsata, beatissima Virgo Maria, quæ Deo ordinante desponsata fuisti Iosepho viro iusto, non lubricâ intentione, nec carnali concupiscentiâ, sed consensu virgineo, & vt conceptus gloriosus vteri tui virginalis diabolo celaretur; & impudicitiz infamia à te penitus tolleretur. Grauidata es, Virgo Maria sanctissima, sancto Spiritu operante; tumescit alius tua virginea, suspicatur semine Sponsus, vnde hoc processit: non vult te traducere, sed occultè dimittere: O gloriosa Virgo Maria, iam in tenera ætate posita, mundus incipit dare tibi quod suum est, scilicet temeraria, & mala iudicia; & tribulationes.

Math. 1.
20.

2. Sed Pater misericordiarum, & Deus totius consolationis qui semper tecum fuit, te non reliquit, tibi non defuit; sed mox tibi voluit subuenire, misit Angelum suum consolatorem, intra secreta cubiculi, Ioseph admonet, ita dicens, *Ioseph, fili David, noli timere accipere Mariam coniugem tuam; quod enim in ea natum est, de Spiritu sancto est.* Credit iustus verbis Angeli, mutat propositum, traducit te Virginem Sponsam, vnitur in Deo amorum animus virgineus; intentione sincerâ; vnus alteri mutuâ, & pudicâ ac incorruptâ dilectione deuincitur. O sancta coniunctio animarum! ô vera amicitia! ô dilectio virginalis! exaltaris Ioseph in tam deifica coniuge tibi data. O Virgo Virginum, intacta permanent viscera vteri tui virginalis, ornata conceptu mirabili: providentia diuina adest, ne de te sinistra suspicio oriatur, qui te fecit, & grauidauit, te mente & corpore præseruauit, vt Virgo perpetua permaneres.

3. O Sponsa mente, & corpore speciosa, vides Sponsam deformatam, scilicet animam meam, quod Sponsum suum, scilicet Filium tuum glorio-

siſſimum, dereliquit fornicando, & adulterando cum inimicis Sponſi benedicti; morte digna eſt, lapidari meruit, vltimum ſupplicium ſcilicet ignis infernalis ſibi iuſte debetur, non ſolum pro vno adulterio, ſed pro multis, non ſolum pro modico, ſed pro magnis. Sed, beatiffima Sponſa, ora Sponſum animæ meæ, vt ſibi indulgeat miſericorditer; & licet frequenter peccauerit, confido tamen in verbis ipſius Sponſi benedicti, qui dicit, non ſolum indulgendum peccatum vſque ſepties, ſed vſque ſeptuagies ſepties. Illum iugiter exorare ne dubita veniam peccatorum: ipſam Sponſam ſibi reconciliet, & in cubiculum æternæ gloriæ ipſam miſericorditer introducat, ſecum manſuram, per infinita ſæcula ſæculorum. Amen.

Ibid. 18.
21.

Contemplatio II.

De fuga in Egyptum.

1. **C**um te & facta tua aſpicio, glorioſa Virgo Maria, genitrix Dei puriſſima, me ipſum condemno, quia mundi proſpera diligentia animo perquiſui, & aduerſa fugi toto poſſe. Imò ne mihi aduenirent, cupiui, & dum ſe obtulerunt, illa impatientiſſimè portavi; proſpera etiam animum meum in ſuperbiam crexerunt, & aduerſa per impatientiam fregerunt; ſed te, benedicta Virgo Maria, proſpera humiliauerunt, & aduerſa patienter in Deo firmauerunt. Quantum namque in te proſperitatis fuit, cum Mater Dei effecta es, & propter hoc virginitatem non amiſiſti: ſed te ipſam in profundum humilitatis deieciſti. Quanta etiam in te aduerſitas fuit paſſiue, cum propter iniquum Herodem, qui tuum benedictum Filium quærebat ad perdendum, de nocte conſurgens, cum ipſo & Ioseph, in Egyptum fugiſti: ætati tuæ iuuenili non parcens, labores corporis, & timorem mentis, infatigabiliter ſuſtinuiſti; in terra remota, & inter ignotas diuitiis permaniſti, vbi tecum nihil præter Filium tuum benedictum & Ioseph, nec cum eis vnde viueres, habuiſti; imò nec tibi cum eis caput reclinare, inueniſti: & tamen omnia læto corde, & cum magna patientia ſuſcepiſti, & Deo gratias continuè reddidiſti.
2. O Regina mundi; regnum mundi deſpiciens, & contemnens, & paupertatem amplectens, non habens vnde viuas cum benedicto Filio tuo, qui totum mundum fecerat & creauerat, & ſub pagillo tenebat. Timebas Regem, quod interficeret Filium tuum benedictum, qui eſt Rex Regū, & Dominus Dominantium; vigilabas ſollicitè ſuper cuſtodiam ipſius, ne ab aliquo tolleretur. Intra domunculam & tugurium pauperrimū clauſa manes, nec prodis in publicum præ verecundia iuuenilis ætatis, ignota inter ignotos moram trahis, ſine adiutorio humano, & quaſi exulata à patria. Ex his tamen tuus animus non triſtatur, ſed gaudet; in afflictione Deum laudat & benedicit, & Filium tuum benedictum recommendat deuotè.

M. b. 2.
13.

3. Sed beatissima Virgo, & Mater Filij tui benedicti; ego miser in Agypto sum positus, hoc est in tenebris peccatorum, inimicis multipliciter vallatus, quia à patria propria, hoc est à gloria cælesti exul factus sum. Quærit & persequitur me Herodes infernalis, ad perdendum me: Sed tu, Virgo gloriosa, sis mihi auxiliatrix; resistat ei virtus patientiæ tuæ; educ me de tenebris peccatorum; adiuuet me tua sancta intercessio. Exora tuum Filium gloriosum, ut sua magna misericordia super me descendat, & me liberet à vinculis peccatorum; ut ab omnibus mundatus, placidè hinc sibi seruiam, & in fine gloriam obtineam sempiternam. Amen.

Contemplatio III.

De amissione Christi in Templo.

1. Virgo Dei genitrix mente & corpore purissima, legem adimplendo cum tuo benedicto Filio Domino nostro Iesu Christo, & iusto viro Ioseph Sponso tuo Hierosolymam ascendisti, Templum intraisti, festi solemnitate diebus statutis ibidem celebraisti, & exinde ad propria humiliter redeundo, Iesus Christus Filius tuus gloriosus, quem in comitatu vicinorum esse credebas, in Templo remansit. O Virgo benedicta, anxiosa & desolata facta es, quia tuum Filium benedictum non inuenis; post diem completum quæris diligenter, & non inuenis, petis ab omnibus, & non est qui te sciat informare de illo; tristatur cor tuum & dolet, anxietur mens tua, fundunt oculi tui riuulos lacrymarum; & quid agere debeas, hoc ignoras. Auxilium diuinum imploras; Deum Patrem crebris singultibus oras, ut Filium tuum præseruet à periculis, & cum incolumem tibi reddat. Festino gressu cum gemitibus retrocedis, Hierosolymam intras, Filium tuum quæris, Filium tuum petis, & illum non vales inuenire. Cum celatur in te dolor, tristitia augmentatur, languet corpus tuum, & mens suspirat.

2. Sed pius Pater misericordiarum, & Deus totius consolationis, qui tribulatos consolari non cessat, tibi compatitur, tuæ anxietati subuenit, tuam deprecationem audit, & exaudit. Intrās, Virgo pia, post triduum, Templum Dei, & illic reperis benedictum Filium tuum sedentem in medio Doctorum, audientem & interrogantem illos: & dixisti humiliter illi, *Fili, quid fecisti nobis sic? ego & Pater tuus, dolentes querebamus te.* O Virgo sanctissima, fuit hæc negligentia tua, ut sic Filium tuum relinqueres negligenter? Absit quod vnquam fueris negligens circa custodiam ipsius: sed ita voluit, & fieri permisit benedictus Filius tuus: ideo respondit tibi humiliter obedientiâ filiali, *Et quid est quod me querebatis? nesciebatis, quia in his, quæ Patris mei sunt, oportet me esse?* sed verba ipsius, Virgo Maria, tunc non intellexisti, sed omnia in corde tuo reseruasti.

3. O

3. O Virgo sanctissima, & omni pietate plenissima, quid faciam! ego miserrimus peccator perdidisti Filium tuum benedictum non solum ex negligentia mea, sed etiam ex iniquitate. Habebam eum in corde, & ipsum expuli per peccatum; & quod mihi grauius est, non quero illum ex duritia mea. Ora, Virgo pia, illum pro me peccatore: require eum ut veniat ad me; clementer impetra mihi triduum, scilicet contritionem, confessionem, & satisfactionem peccatorum meorum, quo ipsum in templo cordis mei sic valeam inuenire, & in futurum ipsum placatum & propositum mihi inueniam in æterna gloria, per infinita sæculorum sæcula. Amen.

Contemplatio IV.

De Morte Christi.

1. **Q**uis dabit capiti meo aquam, & oculis meis fontem lachrymarum, ut Ierem. 9. tecum, mæstissima Virgo Maria, plorem & doleam, & tunc tristitia compatiar, corde flebili & compuncto? fuisti namque plagâ crudelissimâ sic percussa in quacunque parte corporis tui, ut vix vitalis spiritus in te aliquatenus remaneret, nisi quia Deo Patri semper te humiliter commendabas, qui tibi semper in auxilium fuit. O Virgo desolata, dies ista tibi fuit dies tribulationis & angustia, dies aduersitatis & tristitia, dies calamitatis & miseria, dies desolationis & mæstia, dies malignitatis & inuidia, dies prodicionis & blasphemia, dies prauitatis & iniuria, dies rancoris & iracundia, dies peruersæ voluntatis & iniustitia. Talis tibi, Virgo Maria, fuit ista dies, cum Filium tuum benedictum perdidisti, qui de sinu Dei Patris aduenerat, & in virginelem uterum tuum intrauerat, carnem nostram mortalem assumendo.

2. O Virgo Maria, mente & corpore diris aculeis tribulationis cruciata & afflicta! quia vides tuum Filium olim gloriosum, nec ignominia plenum, olim accusatos excusantem, nunc per inuidiam accusatum; olim liberum, nunc inhumaniter captiuum & ligatum; olim speciosum præ filiis hominum, nunc sputis & lutis fætidissimis, ac alapis nequissimis in facie crudeliter deturpatum, sic quod totus leprosus apparebat; olim sanum, nunc ex multiplicatione flagellorum durissimorum infirmum; olim Dominum dominantium, nunc seruum seruorum; olim Regem Regum, nunc spinis acutissimis vsque ad cerebrum intrantibus coronatum, olim humiliter salutatum, nunc turpiter alapis & diris flagellis cæsum & salutatatum; olim fortem, nunc debilem; olim viuum, nunc quasi mortuum, præ multitudinæ tormentorum: olim honoratum ab hominibus, nunc reprobatum & vilificatum: olim iudicantem alios, nunc iniuste iudicatum. Vides eum crucem baiulantem, & ex debilitate in luto cadentem, iniuriatum contumelijs & opprobrijs, percussum pugnis, lapidibus, baculis & lu-

Zz

tis vilissimis deturpatum, sanguine cruentatum, ductum ad locum fortissimum tormentorum, spoliatum, nudum, crucifixum, clavis terribilibus conclauatum, felle & aceto potatum, ab omnibus derisum, & pro suis inimicis orantem, testamento Ioanni Euangelistæ te in matrem, & ipsum tibi in Filium dantem.

3. O Virgo Maria, omni tristitiâ plena, lamentabilis fuit tibi hæc mutatio, Filius Dei Filius tuus erat; nunc Filius tuus Filius est piscatoris, Deus homo, Filius tuus erat, nunc homo purus, Filius tuus est: innocens & sine peccato, Filius tuus erat, nunc Filius tuus, in peccato natus est: dator omnium tuus Filius erat, & datus ab eo, nunc Filius tuus est: Dominus omnium, Filius tuus erat, nunc seruus eius, tuus Filius est: consolator omnium Filius tuus erat, nunc desolatus Filius tuus est; mater Dei hominis eras, nunc es mater puri hominis. O Virgo Maria, dolore plena, anima tua in amaritudine est, doloris gladius cor tuum transfixit, viscera tua cruciantur, animus tuus repletur tristitia, fundant & emittunt oculi tui & irremediabiliter lacrymas, bullit cerebrum præ dolore, corpus tuum cruciatibus afflictum quasi exanimum iacet, dum hanc mutationem filialem consideras.

4. Vides insuper Filium tuum inter duos latrones in cruce pendentem, felle & aceto potatum, & proximum morti, & in omni parte sui corporis vulneratum, tuos sui sacratissimi sanguinis emittentem, latroni confitenti indulgentem, & omnia tormenta patienter portantem, qui Deo Patri suum spiritum commendans, & voce magnâ clamans, expirauit; vides etiam postea grauissimâ lanceâ latus eius crudeliter perforatum, vnde *continud exiuit sanguis & aqua.*

Isa. 53.
34.

5. O Virgo Maria Mater, & non Mater, Filium tuum perdidisti: te præsentem, sine causa interfectus est: mortuus est, iustus pro iniustis; non iustitiâ, sed iniuriâ, odio, & rancore: Vnicus tibi erat, nec alium habueras, neque habere poteras in futurum: in illo tota tua consolatio erat, totus amor, & tota spes tua. Diligenter nutriueras eum, & cum laboribus multis: semper quæ placita fuerunt illi fecisti; nunquam sibi displicuisti, semper cum toto corde dilexisti: nunquam eius mandatum præteristi, semper ei obediens fuisti: & ipse te dilexit super omnem creaturam; subditus tibi fuit: à malis te illæsam seruauit; multis donis & gratiis te dotauit: nunquam te irritauit, semper tibi pacem voluit; nunquam te turbauit, sed semper consolationes tibi dedit. Nunc ergo desolata, modico temporis spatio illum amisisti: nunc orbata es, vidua facta es, sola remansisti. Consolatio tua in desolationem conuersa est, & gaudium tuum in lætiam. Non est dolor similis sicut dolor tuus. Tristitia impleuit cor tuum: non est qui consoletur te: omnes amici tui spreuerunt te, omnes fugerunt; quia viderunt ignominiam tuam. Facta es in derisum omni populo, facta es eis in opprobrium. Vident te, & mouent capita sua, & dicunt: *Non est ei salus in Deo eius.* Sed, Virgo Maria, hoc futurum sciebas; hoc Filius tuus prædixerat. Releuans mentem tuam ad Deum Patrem, ipsum laudando & glorificando, & gratias referendo, quia illi placuit, ut sic per mortem benedicti Filij tui,

Psal. 33.

redemptio humani generis fieret; hostis antiquus debellaretur, & vince-
retur, & infernus sanctis Patribus spoliaretur. Virgo Maria voluntatem
tuam voluntati diuinæ adiungis: quod Deo placet, tibi placet: gaudeo de
redemptione humani generis, & de charitate ei impensâ per benedictum
Filium tuum.

6. Hunc ergo exora, piissima Virgo Maria, pro me misero peccatore, vt
per merita suæ sacratissimæ passionis, viuam hîc per gratiam, & in futuro
per gloriam sempiternam. Amen.

Contemplatio V.

De Eodem.

1. **G**loriosissima Virgo Maria, in vnigenitū Filij tui passione varias tribu-
tiones & dolores sustinuisti. Voluit namque benedictus Filius tuus, Luc. 2. 33.
vt vniuersam Sanctorum pulchritudinem excederes: & sicut *Virgo Virgi-
num* appellaris, ita & *Martyr Martyrum* deberes appellari; quia verò,
quidquid operatum fuit in te, totum nouum fuit, & singulare; ideo pla-
cuit benedicto Filio tuo, vt gloriosior Martyr existeres, & mirabilior ap-
pareres, & nouo & inaudito Martyrij genere esses decorata, & verè nouum
& inauditum fuit tuum Martyrium; quia cū alij Martyres passi fuerint
in corpore, tu, Virgo Maria, passa fuisti in anima, & in corde iuxta pro-
phetiam Simeonis dicentis, *Tuam ipsius animam pertransiuit gladius*. Non
enim potuisti videre Filium, sine affectu materni doloris: Gladius liqui-
dem passionis, qui pertransiuit corpus & membra Filij tui benedicti, id est,
perfectè transiuit, per compassionem pertransiuit animam tuam genitricis
Dei; & eius omnis plaga, fuit tribulatio, dolor & tristitia cordis tui. Alij
enim Martyres, etsi tormenta sentiebant in corpore, interiori tamen con-
solatione refrigerabantur in mente; etsi enim corpora pertransibant gladij
tormentorum pro Christo, tamen anima eorum delectabantur in Christo.
Filius tuus etiam simul patiebatur; quia fuit in via comprehensor. Sed be-
nedicta tua anima, Virgo Maria, torquebatur in Christo, & totam tuam
animam tribulationis & doloris vehementia possidebat.

2. Fuisti itaque, sacratissima Virgo Maria, plusquam Martyr; quia duplex
pertulisti Martyrium, dum mortem Filij tui benedicti vidisti & eius saluti-
fero exemplo tua membra sanctissima super terram mortificasti: quod ge-
nus Martyrij, alio illo, nimirum quo membra cæduntur ferro, horrore
quidem mitius, sed diuturnitate est molestius: & sicut non fuit dolor, si-
cut dolor ille, qui transiuit corpus & membra benedicti Filij tui, sicut ipse
dicit, *O vos omnes, qui transitis per viam, attendite & videte, si est dolor si-
milis, sicut dolor meus*, sic non fuit sicut dolor ille, qui tua viscera virginea,
Virgo Maria, per compassionem pertransiuit, Thren. 1. 12.

3. O benignissima Virgo Maria, sentiam ego durissimus peccator & lapideus hunc dolorem. Ora illum, qui pro me sustinuit tantum dolorem, ut de peccatis meis doleam, & ei ac tibi compatiar de his, quæ pro me ambo misericorditer sustinuistis, ut in fine vobiscum gaudere valeam in æternum. Amen.



Contemplatio VI.

De Eodem.

1. **C**ircumdatus varietate fuisti, Virgo Maria, scilicet varietate tribulationum & dolorum, & verè tot, quot benedictum Filium vidisti patientem, hinc enim vidisti caput ipsius spinis coronari, hinc genas euelli, hinc vultum conspuì, hinc os felle potari, hinc manus, & pedes configi, hinc latus post mortem lancea aperiri, caput expirantis in humeros inclinari. Verè beatissima Virgo Maria, circumdata fuisti varietate tribulationum & dolorum; & poteras dicere cum Susanna, *Angustia mihi sunt undique*, & cum David, *Undique angustia me premunt*.

Daniel.

13. 22.

Paralip.

21. 13.

In 1. resp.

1. noet.

Assumpt.

B. Virg.

Ecd. 24.

18.

2. Tunc etiam sicut canitur de te, *Circumdabunt te flores rosarum*, id est, infinita martyriorum genera, quæ figurantur in rosis; quarum rubor significat martyrium. Propter hoc appellaris *Rosa plantata in Ierico*; quia in te fuit summa perfectio amoris, & martyrium intensissimi doloris. Quànto enim diligebas ardentius, tanto es vulnerata profundius. Non enim fuit talis Filius nec fuit talis Mater; non fuit tanta charitas, sicut inter te sacratissimam Matrem, & benedictum Filium tuum. Non fuit tam indigna mors, non fuit dolor tantus. Sciebas namque tu, inviolata Mater, qualis erat tuus gloriosissimus Filius, & unde conceptus, & quomodo: & ideo, quàmto ipsum dilexisti tenerius, quàmto vulnerata fuisti profundius, nihil habens consolationis, sed totum habens tribulationis & doloris, nam absorpta sunt sacratissima viscera maternis doloribus, ultra quod homo vel Angelus perpendere posset; non tamen usque ad desperationem. Martyres namque passi sunt propter fidem, sed tu, piissima Virgo Maria, passa fuisti propter charitatem, ideo de te scribitur, *vulnerata charitate ego sum*; & sicut charitas maior est quàm fides, quia *maior horum est charitas*; sic tuum martyrium, patientissima Virgo Maria, excellit martyria Sanctorum. Alij martyres diuersis gladijs martyrizati sunt, tu, Virgo Maria, eodem gladio quo Filius tuus benedictus. Alij martyres diuersis ictibus, sed tu, beata Virgo Maria, eodem ictu, quo gloriosissimus Filius tuus.

Cant. 2.

5. secun-

dum

LXX.

1. Cor. 13.

13.

3. O beata Virgo Maria, pro me peccatore ista pertulit benedictus Filius tuus, & tu impetra mihi ab ipso tuis sanctissimis deprecationibus, ut gratias quàmto mea fragilitas patietur, referam sibi, & tibi; ut vobis in vita præfenti placeam, & post mortem vitam habeam sempiternam. Amen.

Contemplatio VII.

De Eodem.

1. **C**ompatiendō tibi, gloriosissima Virgo Maria, & tuæ tribulationi & dolori, benedictus Filius tuus fuit tibi vmbaculum meridiani: nam in meridie Sol feruet & claret; & Sol persecutionis in passione Filij tui fuit, quasi in meridie: quia nulla euidentior & grauior potuit esse persecutio tibi gloriosæ Virgini Mariæ, quam videre mortem Filij tui proprij benedicti, & maxime talis Filij, qui erat vnicus tibi, Virgo Maria, fuit namque tibi sanctissimæ Virgini Sol persecutionis in meridiano, quia Sol in meridiano exurit terram; sic enim Sol, id est, Christi persecutio exurit terram, id est, terrenos, scilicet Apostolos, qui erant terreni; quia percussio Pastore dispersa sunt oues gregis.

2. In te sola Virgo Maria, stetit Ecclesia nec te combussit feruor meridiani, & tibi Virgo Maria, fuit tunc Filius tuus benedictus vmbaculum meridiani. Vnde dicere potuisti benedicto Filio tuo suscitato, *secundum multitudinem dolorum meorum in corde meo*, Fili mi, *consolationes tuas latificauerunt animam meam*. Vnde sic stabas iuxta Crucem Filij tui, vt videres eum salutem hominum procurantem, morientem mundo, sed victurum Deo; non solum considerabas dolorem Filij tui benedicti, sed etiam salutem mundi expectabas, licet enim scires benedictum Filium tuum positum in statere Crucis, pretium esse sufficiens pro peccatis totius mundi; tamen si quis vellet calumniari pretium, hoc est, esse minus sufficiens dicere, præstod erat te ipsam impendere, dum tamen sic posses diuinæ voluntati te conformare. Numquam enim, ex quo Filium tuum benedictum concepisti, fuisti nisi in languore, tribulatione, & dolore, languisti enim timore à Natiuitate Filij tui benedicti vsque ad Passionem, cum semper vitam ipsius appeti infidiis cognosceres. Languisti dolore & tribulatione toto tempore Passionis, donec rediuium recepisti. Languisti etiam amore post Ascensionem quodammodo in desiderio, quia ascendentem in cælum non tenebas; propter quod dicebas, *Filia Ierusalem*, id est, vos virtutes Angelicæ, supernam Ierusalem inhabitantes, *nunciare dilecto meo*, id est, Filio meo, *quia amore langueo*. Psalmo.
93. 19.
Cant. 5.
3.

3. Nunc autem, felicissima Virgo Maria, cum ipso es, & cum ipso habitas sine dolore, sine tribulatione, & sine aliqua tristitia; sed cum magno gaudio, & exultatione, gloria & honore. Exora illum, misericordissima Virgo Maria, pro me tribulato peccatore, vt tristitiam & tribulationem meam conuertat in gaudium, quod nemo tollat à me in æternum. Amen.



P A R S XIII.
DE PRÆROGATIVA GLORIOSÆ
VIRGINIS Mariæ.

Contemplatio I.

Quod Virgo Maria fuit primiceria virginitatis.

PRÆROGATIVA I.

1. **P**RISSIMA Virgo Maria, 'cū primò factus est mundus per Creatorem, benedicta fuit fecunditas, vt multiplicarentur homines; postea, cū ab vno populo agnitus est Deus per legem, maledicta fuit sterilitas, vt multiplicarentur fideles postremò cū instabat tempus in quo nunc ab omnibus gentibus Deus colitur, benedicta fuit virginitas, vt ad vitam cœlibem relicto carnali opere cuncti prouocarentur; nec fecunditas carnis meritum, nec sterilitas dicitur esse culpa; nec per multitudinem filiorum, sed per merita virtutum, antiqui & moderni Domino placuerunt. Non ergo culpanda fuit i, Virgo Maria, nec accusanda de contemptu legis, in qua sterilitas maledicebatur. Imò sola singulariter es laudanda, quia prima legis verba non carnaliter sapienda considerans, elegisti, vt abiectio plebis in terra fieres, & opprobrium hominum, vt per munditiā integritatis in cœlo fieres socia Angelorum: & prima inter fœminas prae amore castitatis maledictum legis in carne tua sustinuisti, quæ illum ex carne tua paritura eras, qui ipse in carne sua maledictum legis pro nobis fuscipiens, nos à maledictione legis liberauit. Vnde tibi soli datum est, vt Filium Dei pateres, & Virgo permaneres: vt, quia prima fecunditati virginitatem prætulisti, nunc & fecunda esses in carne, & integra in virginitate.

2. Sed quare gloriosa Virgo Maria; post votum castitatis consensisti virum habere; cum propositum virginitatis nunquam mutaueris, nec in carnalem copulam consenseris? certè Virgo Maria, parentibus tuis nuptias tibi imperantibus inobediens noluisti esse, & ob hoc viro nubere consensisti spiritali, per Spiritum sanctum; qui te à principio, castitatis amore accen-

derat, fiduciâ confirmatâ & spe quam in Deum habebas, non dubia quòd tu diuina misericordia ita custodiret, vt posses voluntati parentum in matrimonio contrahendo obedientiam exhibere, & tamen nihil in eodem matrimonio inuentura esses, pro quo votum virginitatis frangere posses. Suscepisti ergo coniugium, sed non mutasti virginitatis propositum. Et quia castitatem dilexisti & obedientiam tenuisti, inuenta est in te, & sine detrimento virginitatis, coniugalis sanctitas & sine opprobrio sterilitatis fecunda virginitas: & sic veraciter nomen assumpsisti coniugis & perseueranter votum tenuisti virginitatis. O signifera & exemplar virginitatis! hæc est magna prærogatiua tibi concessa vt desponsata esses, & Virgo permaneres, & ne ex oblatione virginitatis remaneres in opprobrio sterilitatis, sicut tu nouum feceras in terra benedicendo virginitatem, sic in te nouum fecit Dominus super terram, quod nouum tota terra & totus mundus capere non poterat.

3. O beata Virgo Maria, ob meritum tantæ prærogatiuæ adiuuare me turpissimum peccatorem digneris, qui non in virtute, sed in peccatis prærogatiuam accepi. Ora illum qui sic est dignatus te eligere, vt mihi dignetur indulgere & vitam meam miserabilem in virtutem commutare, per quam venire valeam ad gloriam sempiternam. Amen.

Contemplatio I I.

Quòd fuit sine corruptione fecunda, & sine grauiamine grauida.

PRÆROGATIVA II.

1. **M**axima fuit illa prærogatiua, Virgo Maria, quia fuisti sine corruptione fecunda, & sine grauiamine grauida. Nam in tuæ conceptionis initio, quando cæteræ mulieres miserabilius affliguntur, tu intemerata Virgo, cum magna alacritate montana ascendisti cum festinatione, vt Elizabeth ministrares, quam ab Angelo audiueras concepisse. Ascendisti igitur cum festinatione, id est, non lento gradu, sicut mos est grauatorum aliquo onere; sed leuiter ascendisti, tu beatissima Virgo Maria, ostendendo quòd sine grauiamine portabas Filium tuum benedictum. In Bethleem ascendisti, & imminente iam sanctissimo partu tuo leuiter incedebas, portans in utero tuo virginali pretiosissimum depositum. Portabas namque illum in quantum erat homo, & te portabat, in quantum ipse erat, *Sub quo* Iob. 9. 13
curuantur, qui portant orbem: portatque omnia verbo virtutis sue. Heb. 1. 3

2. Non te grauauit, beatissima Virgo Maria, benedictus Filius tuus in tuo utero virginali existens; quia de ipso scribitur, quòd *onus eius leue est.* Matth. 11. 30
Nec mirum, gloriosa Virgo Maria, si te non grauauit quia vndæ maris pondus corporis sui sustinebant potentia virtutis, & tu ipsum solidius in tuo

Exech.

44. 2.

Apoc. 21

27.

utero virginali sine grauatamine portabas. Tu, Virgo Maria, illam portabas, & ille te regebat. O Virgo purissima, intrauit tuum uterum virginali sine corruptione, quia Spiritus sanctus ministravit substantiam: & tu, Virgo intemerata, non sensisti concupiscentiam; non suscepisti semen ex viro, sed fecundus fuit tuus venter germinans in Filio. Fuisti, Virgo Maria, electa ut Sol; quem ignis non comburit, nec aqua emollit, nec gladius scindit, nec scelerator corrumpit, nec vitium obstat: sic tu Virgo Maria, incorruptibilis fuisti. Tu porta clausa nominaris, quia semper fuisti clausa peccato cogitationis, peccato locutionis, & peccato operationis, & ideo scribitur, Virgo beata, *non intrabit in eam aliquid coinquinatum*. Hæc est igitur prerogatiua tua, pretiosissima Virgo Maria, ut esses fecunda sine corruptione, & grauidata sine grauatamine.

3. Sed benignissima Virgo Maria, ego miser & sceleratus fecundus sum multis corruptionibus peccatorum, & grauatus magno pondere vitiorum: ex his prostratus iaceo, vulneratus, & maculatus diuersis generibus delictorum. Adiua me, piissima Virgo Maria, ne sic moriar morte peccatorum, quæ est pessima. Ora tuum Filium benedictum, ut tollat à me grauamen, & pondus peccatorum per contritionem, confessionem, & emendationem: ut hic per gratiam, & in fine per gloriam eleuet ad eum, & cum ipso permaneam in æternum. Amen.

Contemplatio III.

Quod sine dolore peperit.

PRÆROGATIVA III.

1. O Virgo puerpera, benedicta Virgo Maria, quæ virum peperisti sine dolore, id est, sine naturalium læsione; virum, inquam, peperisti, scilicet Saluatorem omnium sæculorum, & hoc sine dolore; quia natum statim pannis inuoluisti & in præsepio reclinasti, cum tamen aliæ matres frequenter pereant in puerperio, aut vix remaneant semiuivæ. Idcirco Eva non peperit sine dolore, quia non concepit sine libidine: libido enim est causa doloris, & dolor effectus libidinis: ex effectu igitur causa inuenitur in eo quod dicitur, *in dolore paries filios*. E conuerso autem siue è contrario in conspectu tuo, Virgo Maria gloriosa, ex sublatione causæ perpenditur ipsius effectus sublatio; quia concepisti, Virgo, cum virginitate, & sic concepisti sine libidine; & quia concepisti sine libidine, portasti sine grauatamine, & consequenter peperisti sine dolore: unde dicitur:

Genes. 3.

16.

Ex Hym.

S. Amb.

de parv.

Virg. &

habetur

in Bren.

Cath.

Veni Redemptor gentium,
Ostende parvum Virginis,
Miretur omne seculum,
Talis decet parvus Deum.

Non

Non dicit, Virgo Maria, *ostende conceptum Virginis, sed partum*; qui tantus & talis est, vt Deum deceat, & quem omne sæculum debeat admirari. Ideo etiam dicit; *Ostende partum Virginis*: quia in partu Virginis plus aliquid declaratur quàm in conceptu. In conceptu namque tuo, Virgo Maria, fuisti sine coitu grauida, in partu verò tuo tota incorruptio fuit ostensa: quia Virgo ante partum, Virgo in partu, & Virgo post partum fuisti. Hinc ergo optatur, vt partus tuus ignorantibus ostendatur; quia, si tu Virgo Maria, peperisses in fordibus & dolore; nec Deum deceret talis partus, neque esset aliquid de quo mundus deberet admirari.

2. Liberè igitur egit, Virgo Maria, benedictus Filius tuus, qui Deus vltionum est, liberè egit; quia inter omnes liber fuit à culpa ideò liberè egit *Psalm. 91. 1.* in nascendo ex te, benedicta Virgo Maria, quia processit ex tuo vtero virginali tanquam sponsus alacer & exultans, & totus festiuus ad ducendam uxorem, id est; coniungendam sibi Ecclesiam in sua natiuitate processit de thalamo suo, scilicet de vtero tuo virginali, & propter hoc in hora, quæ natus est ex te, intemerata Virgo Maria, annunciatum est Pastoribus gaudium magnum ab Angelis, & cantatur, Gloria in excelsis Deo. Hæc igitur est, beatissima Virgo Maria, prærogatiua tua, vt sine dolore pareres Saluatorem ex tuo vtero virginali. *Luc. 2. 14.*

3. Sed ego nefandissimus peccator, peperì vitia & peccata, cogitationes fordidas quæ separauerunt animam meam à Deo, consensus prauos, & iniquos, opera maligna omni iniquitate plena. Succutere mihi, Virgo piissima, ob meritum tanti gaudij, quod in partu tuo habuisti. Ora partum tuum, vt mecum misericorditer agat, peccata remittendo, & virtutes conferendo, per quas ei & tibi placide feruiam, & in futuro gloriam percipiam sempiternam. Amen.

Contemplatio IV.

Quòd fuit Virgo & Mater Dei.

PRÆROGATIVA IV.

1. **N**on est talis mulier, tibi similis super terram, nec fuit, neque erit, sicut tu, beatissima Virgo Maria, quæ gaudia Matris cum virginitatis honore habuisti; quia Virgo & Mater Dei fuisti, & non alia. In hac enim prærogatiua dignitatis non communicat tibi homo, non Angelus, non aliqua creatura; sed sola cum Deo Patre dicere potes filio Dei Filius meus es tu sola potes de Christo homine; *Hoc nunc os ex ossibus meis, & caro de carne mea.* Filius autem tuus potest dicere tibi, *Pelle & carnibus vestisti me, ossibus & nervis compegisti me;* quod propriè fuit, cum tu, Virgo Maria, consensisti quòd Filius Dei caro fieret in te, & ex te, cum videlicet respondisti, *Fiat* *Psalm. 3. 7. Gen. 2. 23. Job. 10. 11. Luc. 1. 38.*

Aaa

Genes. 1. *mibi secundum verbum tuum.* Ideò dicitur, *Erunt duo in carne una*, duo, scilicet
24. Christus & tu in carne tua viginali; quia Mater & Filius in vna carne sunt.
Matth. Hæc, beatissima Virgo Maria, gloria tua singularis est, & excellens prærogati-
19. 1. 1. ua, quod Filium vnum eundemque cum Deo Patre habere meruisti com-
Cor. 6. munem; Deus namque Filium suum, quem solum de corde suo æqualem
16. sibi genitum, tamquam se, diligebat, dedit tibi & ex te fecit sibi Filium, non
 alium, sed eundem ipsum, ut naturaliter esset vnus idemque Filius Dei, & tuus.
 2. O Virgo Maria; quàm singulariter Virgo fuisti, & Mater Dei, & nulla
 alia; & si aliqua alia posset esse Virgo & Mater, adhuc tu, gloriosa Virgo
 Maria singularis remaneres, quia vnicum Dei Filium genuisti; quia sicut
 est vnicus vnico Patri, ita est vnicus Filius tuus; & ideò nulla alia, etiam si
 Virgo pariat, vel eundem, vel talem generabit: magnum igitur, Virgo
 Maria, tibi fuit fuisse virginem, sed maius & mirabilius in virginitate fuisse
 fecundam, & post euacuationem tui uteri viginalis, habuisse vterum sigil-
 latum, & hoc fuit *gratia super gratiam*: sed maximum tibi fuit, & ineffabile
 fuisse Matrem Dei. A sæculo enim non est auditum, quòd aliqua mulier, ex-
 ceptà te, gloriosa Virgo Maria, dicere Deo potuerit, *Filius meus es tu*.
 3. O benignissima Virgo Maria, non potes dicere quòd ego sum Filius
 tuus per gratiam; sed dicere potes quòd tuus sum inimicus per peccatum;
 quia offendi multipliciter Filium tuum benedictum & te; reconciliare me
 digneris, sacratissima Virgo Maria, apud gloriosissimum Filium tuum, ut
 dimittat, & deleat misericorditer, quæ iniquè, & dolosè commisisti, ut filius
 adoptionis efficiar, & hæreditatem acquiram sempiternam. Amen.

Contemplatio V.

Quod peccare non potuit, nec mortaliter, nec venialiter.

PRÆROGATIVA V.

Ecd. 24. 1. O Sacratissima Virgo Maria, quanta, & qualis, & quantum admirabi-
15. lis fuit illa prærogatiua, quòd peccare nequies mortaliter nec ve-
Luc. 1. nialiter, ex quo Filium Dei concepisti. Ideò de te scriptum est, *& sic in Sion*
38. *firmata sum.* Sed præmittit, *coram ipso ministraui.* Tu, beatissima Virgo
 Maria, ministrasti, quando nominando te ancillam, in ipso momento
 consensum præbuiisti, dicendo, *fiat mihi secundum verbum tuum*; concepto
 igitur Salvatore, dicere potuisti, *firmata sum*, id est, in bono confirmata; &
 hoc in *Sion*, id est, in militante Ecclesia adhuc posita; quod fuit speciale
 priuilegium, & prærogatiua maxima. Alij enim Sancti in hac vita non
 sic firmantur, ut de cætero peccare non possint, sed tantum in superna
 Hierusalem. At Spiritus sanctus superueniens in te, & virtus Altissimi
 obumbrans tibi, extinxit in te carnalem concupiscentiam, & abtulit cordis

ignorantiam; & sicut lumen ignis consumit tenebras, sic virtus Altissimi, scilicet idem Filius Dei obumbrans tibi, contra omne incentiuum peccati præstitit refrigerium, nam si lucida fuit nubes quæ obumbravit discipulos, quàm lucida fuit nubes gratiæ, quæ obumbravit te Matrem Christi? Et, si illud umbraculum quod fecit tibi Filius vel Spiritus sanctus, lucidum erat, ergo & lucem & umbram exhibebat: lucem ad pellendam ignorantiam; umbram, ad extinguendam concupiscentiam.

2. Mira igitur fuit illa obumbratio Spiritus sancti, quæ sub vno momento deterisit, & exterminavit à te, tam ignorantiam quàm concupiscentiam mali: & quod integrè in te concupiscentiæ fomes extinctus fuit, probat profectò quod cum virginitatis integritate postmodum concepisti & peperisti: & quàm profunda illuminatio fuit, probat, quod illud tantæ profunditatis sacramentum tam veraciter, & tam velociter credidisti, quod sapientibus huius mundi vix aliquando per tot & tanta miracula persuaderi potuit. Virgo Maria, sic plena fuisti Spiritu sancto, quod locum vacuum in te peccatum non inuenit. Spiritus sanctus non te dereliquit; & ita ad te accessum habere non potuit malignus spiritus, & ideo nihil inquinatum incurrere potuisti, quia impossibile erat quod de cætero posses peccare. Tu etiam, Virgo Maria, Gabrielem ad tui custodiam deputatum habuisti, qui interpretatur *Fortitudo Dei*, quo patrocinante nihil in te proficere poterat inimicus nec solum vnicum Angelum habuisti tecum, sed etiam infinitos. Ideò dicitur, *Angelis suis mandavit de te, ut custodiant te in omnibus vijs tuis*, scilicet cogitationibus, locutionibus, & omnibus actionibus. Psal. 90.11.

3. Sed, beatissima Virgo Maria, ego peccator prærogatiavam habui discernendi inter bonum & malum; & fortitudinem abstinendi à malo, & faciendi bonum, divinâ gratiâ iuvante; ut sic saltem præcaverem ab omni peccato mortali; sed sic fui miserabilis quod à bono opere abstinui, & ad peccandum me laxavi; & sic prærogatiavam mihi misericorditer à Deo datam non custodiui. Ora pro me, piissima Virgo Maria, ne cum malis operibus meis finiam vitam meam, sed ipsam emendem per meam operationem virtuosam ut vitam obtineam sempiternam. Amen.

Contemplatio VI.

Quod omnes virtutes & gratias habuit in superlativo gradu.

PRÆROGATIVA VI.

1. **O** Virtuosissima Virgo Maria, scriptum est de te, *Omnia poma nova & Cant. 2. vetera, dilecte mi, servavi tibi*. Virtutes, & opera virtutum appellantur *poma* propter refectionem, quia sunt cibus animarum propter sanitatem, cibus enim sunt infirmantium; propter odorem, quia delectant, Aaa ij

confortant & refouent, audientes curremus in odorem vnguentorum, id est, virtutum. Tu, preciosissima Virgo Mater, vniuersas & singulas virtutes & dona gratiarum habuisti in altiori gradu, sed alij sancti singuli singulas. Vnde Noë *Iustus* dicitur, Abraham fidelis, castus Ioseph, Moyses mansuetus, Iob patiens, Dauid humilis, Salomon sapiens, Elias zelator legis & huiusmodi. Vnde de quolibet sancto canitur illud, *non est inuentus similis illi*: quilibet illorum præcallebat alios. Sanctos sui temporis in aliqua speciali virtute. Sed tu, excellentissima Virgo Maria, supergressa es super omnes Sanctos veteris & noui Testamenti, non in quibusdam sed in singulis virtutibus.

2. Tu, benedicta Virgo Maria, affluens deliciis Angelorum, virtutes singulorum in te habuisti. Cum enim officium Angelorum sit ministrare, quodammodò in te Angelorum formam expressisti, dum Elizabeth ministrasti; tu, Virgo Maria, ministrasti minora cum Angelis, qui minora nunciant, cum dixisti ministris nuptiarum *Quodcumque dixerit vobis, facite*. Tu, Virgo Maria, maiora cum Archangelis ministrasti, cum Apostolis deficientibus in Passione Filij tui, imperterrita iuxta crucem stetisti, licet gladio Passionis fueris transfossa. Tu, Virgo Maria, Sanctos principatus exemplasti, cum per humilitatem, dæmonis superbiam deiecisti. Ideò dicitur quòd contriuiisti caput serpentis, quod est superbia. Tu, Virgo Maria, Potestates exemplasti, cum per paupertatem Spiritus, cupiditatem totius mundanæ potestatis contempsisti. Tu sanctas Dominationes exemplasti, cum per virginitatis pudicitiam, immunditiam voluptatis calcasti, quia in te spiritus dominabatur carni; & fomes extinctus erat. Tu Virgo Maria, Thronos in te decipherasti, cum sedes summi Regis facta fuisti, qui dixit tibi, *Veni electa mea, & ponam in te thronum meum*. Tu Virgo Maria, Cherubim qui interpretantur *plenitudo scientiæ*, rectè transformasti, cum illum in te receperis, in quo sunt omnes thesauri sapientiæ, & scientiæ absconditi. Tu, Virgo Maria, Seraphim, qui interpretantur *ardentes* exemplasti, quia cum desiderio ardenti Filium tuum prosecuta es ascendentem clamans, *trabe me post te*. Et cum visa es dixisse Angelis orando, *nunciare dilecto meo, quia amore*

3. Hæc est igitur, Virgo Maria, tua maxima prærogatiua, quòd in terra & in cælo omnes & singulos in virtutibus præuenisti. Sed ego præueni omnes peccatores in peccatis; & quæ alij particulariter commiserunt, ego miser vniuersaliter aut cogitatione, aut delectatione, aut consensu, aut opere commisi. Adiua me, virtuosissima Virgo Maria, vt merita tuarum virtutum, demerita peccatorum meorum & pœnas tollant, & auferant; vt virtuosè hîc viuendo, virtutem & sapientiam Dei misericorditer videam, per infinita sæcula sæculorum. Amen.

Contemplatio VII.

Quod Virginis Mariæ dignitas excellit dignitates omnium
Sanctorum & cœlestium virtutum.

PRÆROGATIVA VII.

Tua dignitas, dignissima Virgo Maria, excellit non solum dignitates omnium Sanctorum, sed etiam omnium Cœlestium virtutum; Tu, benedicta Virgo Maria, superior es Angelis in gloria, quia plus meruisti. Tu Virgo Maria, superior es in honore, quia Filius tuus super Choros Angelorum te collocavit. Tu, Virgo Maria, superior es virginitate, quia in carne fragili, quod non Angeli, sine carnis vitio vixisti. Tu, Virgo Maria, superior es reuelatione, quia Dominus secretum suæ Incarnationis prius tibi, quam alicui Angelorum reuelauit, excepto duntaxat Gabriele, qui utique tantæ inter suos inueniri potuit excellentiæ, ut tali & nomine dignus haberetur & nuncio. Tu, Virgo Maria, superior es contemplatione Dei, quia cum sis resuscitata, ut verè creditur, Regem gloriæ in decore suo vident oculi tui, non solum intellectuales, sed etiam corporales, quales Angeli non habent, qui oculis intellectualibus solummodo vident. Tu, Virgo Maria, superior es Angelis, quia Filius Dei nusquam Angelos apprehendit, id est, naturam Angelicam, sed semen Abraham apprehendit, in te, & ex te, ministerio sancti Spiritus. Tu, Virgo pia, superior es Angelis, quia nulli Angelorum dixit aliquando Pater, *Filius meus es tu*, sed hoc dicit Filio tuo in Baptismo, & in Transfiguratione. Tu, Virgo Maria, superior es Angelis, quia nulli Angelorum subiecit Pater orbem terrarum, sed Filio tuo benedicto de quo scribitur. *Omnia subiecisti sub pedibus eius; & quia omnia subiecit sub pedibus eius, nihil dimisit non subiectum ei.*

Hebr. 2.

17.

Ibid. 1. 5.

Ibid. 2. 8.

Sap. 8. 11.

2. Tota verò tua prærogatiua, Virgo Maria, ab excellentissima prærogatiua benedicti Filij tui deriuatur. Sed vnde hoc tibi, sanctissima Virgo Maria? vnde tibi tanta prærogatiua? certè, Virgo prudentissima, à Domino est, qui potens est; ideo tibi magna; magna scilicet in terris, exaltans te super omnes homines; magna in cælis, exaltans te super omnes Angelos, magna in infernis, subiiciens tibi vniuersas Potestates. Tuum imperium attingit à mari vsque ad mare, quod etiam ex dono Filij tui benedicti, attingit à fine vsque ad finem fortiter, & cum eo disponit omnia suauiter.

3. Sed, beatissima Virgo Maria, sicut locus tuus est celsior loco Angelorum, sic locus mihi debitus est inferior loco aliorum peccatorum, si iustitia mihi mera fiat, secundum peccata nefandissima quæ commisi. Subueniat mihi misero misericordia tua, Regina cælorum. Ora benedictum Filium tuum, ut ab illo inferiori loco me excipiat misericorditer, & sic ad benefaciendum me compellat, ut locum gloriæ obtineam sempiternæ. Amen.

Aaa iij.

Contemplatio VIII.

*Quod Filius Dei, beata Virgini similis fuit secundum
humanitatem.*

PRÆROGATIVA VIII.

1. **O** Copiosissima spiritualibus deliciis, beatissima Virgo Maria, tu conspicua bonitate, diserta sapientiâ, tremenda cunctis viuientibus potestate: genere illustris; formâ desiderabilis; immensitate incomprehensibilis, æternitate indeficiens. Tu Virgo existens, in Matrem Domini electa es, vt immensus de te, mundissimâ & purissimâ nasceretur; & vt, sicut in cælo patrem habebat immortalem, æternus, sic in terra Matrem haberet virginem incorruptam. Et quia in cælo qualis Pater, talis Filius; idè in terra qualis Mater, talis Filius, in cælo cum Patre æternus & immensus, in terra cum Matre Virgo & humilis, in cælo imago Patris, in terra imago Matris; & idè beatissima & gloriosissima, Virgo Maria, prærogatiua tua ex eo est, quòd Filius Dei secundum humanitatem dignatus est fieri tibi consimilis: & idè etiam te talem fecit Matrem suam, secundum quod Deus, qualis fieri voluit ex te Matre secundum quod homo. Propter hoc de te, Matre & benedicto filio tuo dicitur, *Vitis frondosa, simul fructus adaequatus est ei.* Vitis frondosa simul id est, tu, Virgo Maria, fructus, id est Christus, adaequatus est ei, propter hoc etiam dicitur de Christo, *Non est bonum esse hominem solum: faciamus ei adiutorium simile sibi.* Et vt præmissa fierent Virgo Maria, ab æterno prædestinata fuisti, & electa; quia scribitur, *Ab æterno ordinata sum, & ex antiquis.* Tu à sanctis Patriarchis & Regibus fuisti generata, vnde canitur, *Natiuitas tua ex semine Abrahe, orta de tribu Iuda, clara ex stirpe David.* Tu Virgo Maria, à perditionis massa separata es in vtero sanctificata, quia, *Sanctificauit Dominus tabernaculum suum.* Tu, Virgo Maria, fuisti cum charitate cumulata, ab vno de summis Archangelis officiosissime salutata, saluâ virginitate Mater effecta, virtute fidei omne bonum assecuta, loco summi magistri ad docendos Apostolos substituta, in morte temporali, mortis nexibus non depressa.
2. Hæc est, benedicta Virgo Maria, immensa prærogatiua tua, quam, dum benè contempler, in meipso confundor; quia multiplicatis magnis criminibus & peccatis, nec deuotè, nec vt deberem contemplari valeo. Sed auxiliatrix propicia esto mihi, benignissima Virgo Maria, deprecando Filium tuum benedictum, qui cor meum sic mundare dignetur, vt te & tuas beatissimas prærogatiuas contemplari valeam, vitamque meam emendem, vt gloriam adipiscar sempiternam. Amen.

Osæ 10.
1.
Genes. 2.
18.
Præuer.
2. 23.
Eccl. in
Officio
Natiu.
V. M.
Psalm.
45. 5.

Contemplatio I X.

Quod ab omnibus generationibus, Virgo Maria est benedicta.

PRÆROGATIVA IX.

1. **B**eatam te dicunt omnes generationes; benedicta Virgo Maria, quia ^{Luc. 1. 48.} omnibus generationibus vitam & gloriam genuisti; in te Angeli gloriam, iusti gratiam, peccatores veniam inueniunt in æternum. Merito in te respiciunt oculi totius creaturæ; quia in te, per te, & de te benigna manus omnipotentis, quicquid creauerat recreauit. Beatam igitur te dicunt omnes generationes, scilicet generationes cœli, id est, Angelorum, quia per te sunt redintegrati: generationes terræ beatam te dicunt, Virgo Maria, quæ te præcesserunt, scilicet Patriarchæ & Prophetæ, quia per te ab inferno sunt excitati; beatam te dicunt, Virgo Maria, generationes terræ, scilicet Apostoli & Sancti, qui tecum corporaliter conuersati sunt: quia per partum tuum sunt redempti, beatam te dicunt, Virgo Maria, generationes terræ omnes, quæ sequuntur, ut nos, quia sumus per te gratiâ illustrati. Beatam te dicunt omnes generationes, quæ perierant, prima sine patre & matre, ut in Adam; secunda de patre sine matre, ut in Eua; tertia de patre & matre, ut in Noë; quarta autem generatio de matre sine patre, quæ fuit in Christo, liberauit tres prædictas.

2. Beatam igitur te dicunt omnes generationes, scilicet generatio cordis, generatio oris, & generatio operis; quæ te beatam dicunt, & prædicant, ^{Psalme 144. 4.} ut tibi dicatur *Generatio & generatio laudabit opera tua, & potentiam tuam pronuntiant.* Generationes enim cordis, quæ sunt fides, spes, & charitas, humilitas, & obedientia, timor, & reuerentia. Respiciunt, Virgo Maria, ad tuam dilectionem generationes autem oris, quæ sunt laudatio, honorificentia, prædicatio, salutatio, & gratiarum actio, respiciunt ad tuam venerationem, Virgo benedicta; generationes operis, quæ sunt munditia, erogatio, pura manuum eleuatio, & bona operatio, respiciunt ad tuam imitationem, bonam operationem, & gloriam nominis tui; ut dicere ^{Psalms 102. 1.} *Omnia quæ intra me sunt, benedicunt nomen sanctum tuum.*

3. Sed, beatissima Virgo Maria, generationes cordis mei te non dilexerunt, sed carnem, & mundum, & peccata plurima dilexerunt; generatio oris mei te non honorauit sed potius honorauit, transitoria, & caduca huius mundi; generationes operis mei te imitari noluerunt per virtuosam operationem, sed ego eas miser dedicaui ad multorum vitiorum iniquam perpetrationem. Succurre mihi digneris, piissima Virgo Maria; exora Filium

tuum benedictum, qui me dignetur sic ab omni sorde mundare, vt omnes generationes meae, ipsum & te diligant corde, honorent sermone, & per bona opera quantum poterunt, imitentur, vt hic gratiam & in futuro gloriam percipiam sempiternam. Amen.



Contemplatio X.

De Assumptione Virginis Mariae.

PRÆROGATIVA X.

1. **O** Inenarrab ilis prærogatiua tua, beatissima Virgo Maria, de qua scriptum est, *Ingressa est Regina Saba in Hierusalem, cum comitatu multo.* Tu, gloriosa Virgo Maria, dicta es *Regina Saba*, quæ interpretatur, *conuersio* vel *intercessio*. Tu peccatores conuertis, & eorum affectus per charitatem incendis; ingressa es igitur in Hierusalem supernam, quæ est conuersio peccatoris, in qua facie ad faciem vides illum, qui est pax nostra, scilicet Christus Filius tuus benedictus, qui in effusione pretiosissimi Sanguinis sui, pacificauit nos Deo Patri. Ingressa es cum comitatu multo; quia cum fuisti assumpta ad cælum ad æthereum thalamum, tibi obuiam fuit tuus Filius benedictus, & Angeli, & Sancti. Tibi igitur obuiam venit benedictus Filius tuus, qui te præcesserat ad cælestia regna, vt tibi pararet, sicut Discipulis suis promiserat, in æthereis mansionibus, locum immortalitatis; vt Regina misericordiae cum Filio tuo Rege iustitiæ regnares in perpetuum. Et ideo de te in Assumptione tua canitur, *Quæ est ista, quæ ascendit de deserto, deliciis affluens, innixa super dilectum suum?* Non enim posset inniti dilecto, nisi præfens esset dilectus.

2. In tua insuper Assumptione interfunt Angeli, te Dominam, & sororem ipsorum suscepturi, quia vitam Angelicam, imò plusquam Angelicam duxisti in terris, in carne viuendo præter carnem. Et per tuum partum reintegratus est numerus Angelorum ex casu luciferi diminutus. Interfunt etiam sancti Patriarchæ, de quorum stirpe descendisti; quia *Natiuitas tua* partum extracti sunt de inferno & ad paradysum introducti; per te enim ipse Deus Rex noster ante sæcula, disposuit operari salutem in medio terræ, quæ dispositio sanctos non latuit Patriarchas. Interfuerunt etiam sancti, qui quod prædixerant de partu tuo glorioso & redemptione humani generis in te & per te gratulabantur impletum, gratias agentes, quia per te fideles inuenti sunt, sicut petierunt, dicentes, *Da mercedem, Domine, sustentibus te, vt Propheta tui fideles inueniantur.* *Da mercedem*, id est, te gloriosam Virginem Mariam; *sustinentibus te*, id est, expectantibus aduentum tuum; vt *Propheta tui*, qui hoc promiserunt; *fideles*, id est, veraces, *inueniantur*,

niantur scilicet impletâ eorû promissione. Interfuerunt etiâ Apostoli viuentes in carne, tuas exequias deuotis laudibus, obsequiosâ reuerentiâ celebrantes ad quorum etiam preces Filius tuus benedictus te, vt asseritur, à mortuis die tertiâ suscitauit. Interfuerunt etiam sancti Martyres, cum quibus tibi non defuit gloria martyrij; imò maior; quia in ea parte, quæ impassibilis est, scilicet in anima passa es; illi autem in corpore. Interfuerunt etiam Confessores, quorum temperantia, sobrietas, & contemplatio non defuit tibi, sed & Filij tui potentiam & impensam tibi multiplicem gratiam confessa es, dicens, *Fecit mihi magna, qui potens est*; & hæc fuit confessio laudis diuinæ. Interfuerunt etiam sanctæ Virgines, beatæ adolescentulæ, adherentes tibi familiaris, currentes in odoribus vnguentorum tuorum, & sequentes te quocumque ieris, sicut scriptum est, *Adducentur Regi Virgines post eam*.
 3. Hic est comitatus magnus, & multus, cum quo tu Regina cœlestis in supernam Hierusalem, intraisti. Sed mens mea, Virgo Maria, non ascendit ad supernam Ierusalem, sed potius descendit ad terrestrem, hoc est ad terræ vitia & peccata, quæ cogitauit, quibus consensit, ac quæ frequenter opere consummauit; sed tu, pia Virgo, ob meritum istius sanctissimæ prærogatiuæ, ora tuum Filium benedictum, vt hic sic me misericorditer ordinet & disponat, vt finito huius vitæ ergastulo, supernam Hierusalem introeam, ibi sine fine regnaturus. Amen.

Lue. 1.
49.
Psalm.
44. 16.

Contemplatio X I.

De eadem Prærogatiua Assumptionis.

1. Quantum in terris, gloriosa Virgo Maria, adepta es gratiæ præ ceteris, tantum in cœlis obtines gloriæ singularis; quia sicut *Oculus non vidit, nec auris audiuit, nec in cor hominis ascendit, quæ præparauit Deus diligentibus se*, ita contemplari non potest, nec inuestigare humanitûs, quid tibi genitrici & diligenti se præ omnibus præparauit. Si enim in domo Patris mansiones multæ sunt, tibi Matri in tua Assumptione, splendidiorem & sublimiorem locum tuus Filius benedictus concessit; quia dignum erat, & valde dignum per omnia, quodd, sicut meritis, sic & præmiis antecederes Sanctorum ordines vniuersos; vt dicere posses, *Introduxit me Rex in cellaria sua*: nam contentus est cellario suo quilibet ordo Sanctorum, id est, suâ mansionem. Sed tu, beatissima Virgo Maria, speciali priuilegio in omnia es introducta; quia sicut merita, ita & præmium omnium assecuta fuisti.
2. De tua namque gloriosissima Assumptione canitur, *Vidi speciosam, sicut Columbam, ascendentem de super riuos aquarum*. Aquæ namque istæ, sunt virtutes Angelicæ, & cœlestes populi, qui inuitantur quotidie ad laudes Creatoris sui, sicut scribitur, *Aquæ, quæ super cœlos sunt, laudent nomen Domini*. Riui aquarum sunt ordines Angelorum, scilicet Angeli, & Archangeli,

1. Cor.
2. 9.
1. 64. 4.
Cant. 1.
3.
Eccles.
in 1. ref.
Assum.
Psalm.
144. 4.

Bbb

Principatus, Virtutes, Potestates, Dominationes, Throni, Cherubim, & Seraphim, & ordines Sanctorum, scilicet Patriarcha, Prophetæ, Apostoli, Martyres, Confessores, Virgines, & omnes Iusti: propter enim priuilegium tuæ sanctissimæ Assumptionis gloriosior super ordines vniuersorum Sanctorum ascendisti, nec tantum super eos, sed in altiorem quemdam locum desuper ascendisti: Vnde *Ascendisti super Cherubim*, quod interpretatur *Plenitudo scientiæ*, quia nulla humana scientia attingere potest quantum ascendis, vel ad quam gloriam non determinat, quod, ascendisti, sed vnde: vsque eò enim te prosequi potuit, qui hoc dixit; & tunc quasi euanuisti ex oculis eius, vt quod ascenderes, capere non potuerit, vel dicere ei non licuerit.

Psalm.
17. 11.

3. *Ascendisti igitur super Cherubim, & volasti*, id est, velociter ascendisti: volasti namque ab humano intellectu, volasti super pennas ventorum, id est, in præsentem, volasti super virtutes & merita sanctarum animarum, quæ venti dicuntur, sicut scribitur, *Qui fecit ventis pondus*, id est, animabus corpus. Sed in tua beatissima Assumptione volasti super pennas Angelorum & Sanctorum: nunc audis cum gaudio, *Maria, ecce Filius tuus*: ecce, quem genuisti, quem in tanta vides maiestate fulgentem. Nam aliquando ab eodem audisti in statu longè alio tibi dici, *Mulier, ecce Filius tuus*. Sed hæc prima iam abierunt, id eò in tua benedicta Assumptione, cum multo sænore restituta es, & præsentia benedicti Filij tui gaudes, & gaudebis in æternum.

Iob. 12.
25.

Ioan.
19. 26.

4. Sed, misericordissima Virgo Maria, confiteor me indignum in cælum ascendere, ac benedicta Filij tui præsentia frui, cum iniquus peccator sim, omni descensu infernali dignus. Tu verò, piissima Virgo Maria, ad tantam gloriam assumpta, vt pro peccatoribus intercederes. Ora pro me tuum Filium gloriosum; qui per suam clementiam deleat in me pondus peccatorum meorum, vt ad suam gloriam liberè ascendere possim, ibique manere per infinita sæculorum sæcula. Amen.

Contemplatio XII.

De eadem Assumptionis Prærogatiua.

1. *Q*uanta admiratione de tua Assumptione, Virgo Maria, homo peccator admirari potest, cum Angeli de ipsa admirentur, dicentes, *Quæ est ista, quæ ascendit de deserto, delicias affluens, innixa super dilectum suum?* Non quærunt, *qualis est ista*, vel *quanta*, sed *quæ*, quia de qualitate & quantitate ipsius, quoad gloriam, ad quam ascendisti, Virgo Maria, ipse Iesus, à quo datum est illis te videre, eos certos effecit. Vnde mirando quærunt, non dubitando, *quæ est ista?* id est, quàm admirabilis, quàm delicata, quàm præcellens omnes creaturas, quàm magnis præconiis extollenda, quanta

Cant. 8.
5.

admiratione dignissima, quæ non solum totum mundum, sed totum cælum circumquaque suauitatis inæstimabilis odore perfundit. Ascendisti igitur, Virgo gloriosa, de gratia ad meritum, & de merito ad præmium; ascendisti de gratia benignitatis, ad gloriam genitricis, non cuiuslibet, sed Dei; ascendisti de humilitate ancillæ, ad dignitatem Reginæ: ascendisti de sterilitate virginitatis, ad fecunditatem genitricis, Virgo purissima permanens; ascendisti de mundo ad cælum, super choros Angelorum, usque ad dexteram benedicti Filij tui sedentis in throno: ascendisti de deserto, cuius contemnens concupiscentias & delectabilia, spiritualibus adhæristi deliciis.

2. Ideò dicitur, beatissima Virgo, quòd ascendisti *deliciis affluens*, id est, abundantia deliciarum, quæ sunt dona specialium charismatum, & principales Spiritus sancti consolationes, quibus, Virgo gloriosa, repleta fuisti, istæ etiam deliciae sunt priuilegiatæ misericordiæ opera, quibus refecisti benedictum Filium tuum, & ei exhibuisti de propria substantia tua; ascendisti, beatissima Virgo Maria, innixa super dilectum tuum, quasi superior dilecto tuo, ut sic te matrem reuerenter Filius tuus suscipere. Non enim euacuabitur in præsentia præceptum illud diuinum *Honora Patrem & Matrem*, sed perfectissimè adimplebitur, incepit enim Filius tuus facere & docere. Et tibi, Virgo, vices rependit: nam innixus tibi matri, descendit in terram in Incarnatione, & tu mater innixa Filio, ascendisti in cælum in tua Assumptione. Innixus fuit Filius tuus super te, quando assumpsit ex te carnem in utero tuo virginali formatus; & tu innixa fuisti super eum, dum ad dexteram eius ascendisti. Tu, Virgo gloriosissima, innixa fuisti super dilectum tuum, & ei attribuens quidquid boni habebas, ideò dicebas, *Fecit mihi magna qui potens est*. Prius, benedicta Virgo Maria, deliciis affluxisti, & postea innixa es super dilectum tuum; nam ne perderes delicias affluentes, non tuis meritis, sed ipsius innitebaris gratiæ, & in futurum præmium sperabas.

3. Sed, beatissima Virgo Maria, ego nefandissimus peccator non delicijs supernaturalibus sed corporalibus affluo, quæ animam meam miseram ad committendum multa peccata prouocant, & inclinant, & ad ipsorum consummationem me inducunt, & ideò indignum me fateor in cælum ascendere, sed potius descendere ad infernum; nisi tua misericordia per intercessionem assiduam adiuuare me dignetur, ut iram benedicti Filij tui mitiges, eius pietatem & clementiam mihi impetres, adiuuare me igitur digneris, orando ipsum assidue, ut peccata mea debeat, misericorditer gratiam tribuendo in præsentia, & gloriam in futuro æternam. Amen.



P A R S XIV.

DE CERTIS VOCABVLIS GLORIOSÆ
VIRGINIS MARIÆ.

Contemplatio I.

Beata Virgo, Mater.

1.



BEATISSIMA Virgo Maria, scriptum est de te, *Ego Mater pulchre dilectionis, & timoris, & agnitionis, & sancte spei.* Tu, Virgo Mater es dilectionis, id est, Christi, qui dicitur

Eccl. 24
24.

dilectio, quasi duo ligans quoad duas naturas, scilicet Deum homini, & hominem assumptum Deo in unitate personæ, cum Verbum caro factum est. Per dilectionem enim, quam habuit ad genus humanum, colligauit sibi naturam humanam, quia dilectio est diligentis & rei dilectæ, quasi quædam unio, potissimum in bonis; & naturaliter illud, quod amatur, in sui naturam suam conuertit amatorem; per dilectionem etiam, quam habet ad nos, colligat nos sibi ipsi: quia, *Qui adheret Deo, unus spiritus est cum eo.* Tu, gloriosa Virgo Maria, es etiam pulchre dilectionis; quia dilectores & amicos tuos, Christo Filio tuo, qui est pulcherimus, facis similes, similitudinem Filij in eis per gratiam refigurans, quam peccando amiserant. Tu Virgo Maria, *Mater es pulchre dilectionis*, id est, Christi, qui pulcher scilicet splendor gloriæ, & speciosus formæ, non solum præ filiis hominum, sed etiam præ millibus Angelorum: qui etiam solus pulchrè diligit; & à quo pulchra dilectio; quia charitas forma est deaurata, huc pulchritudo virtutum.

1. Cor. 6.
17.

Math.
10. 28.

2. Tu, benedicta Virgo Maria, Mater es timoris, id est, Christi, qui solus timendus est, ut ipsemet dicit: *Nolite timere eos qui occidunt corpus, sed illum time qui potest corpus & animam perdere in gehennam.* Timendus igitur est, ne peccando amittatur. Tu, Virgo Maria, Mater es timoris, docens fugere, quod fugiendum est; quia tu prima non solum peccatum, sed & occasiones peccatorum declinasti; quod patet per hoc, quod magnificata per conceptum Filij, te humiliasti, & obsequium Elizabethæ præbuiisti, illud adimplendo, *Quanto magnus es humilia te in omnibus.* Tu, Virgo Maria,

Eccl. 3.
20.

DE BEATA VIRGINE.

377

Mater es *timoris*, qui in te preparauit locum Creatori, & Spiritui sancto: *Luc. 1.*
quando expauiisti excellentiâ angelicæ salutationis: idè dictum est tibi, 39.
Ne timeas, Virgo Maria.

3. Tu Virgo *Mater es agnitionis*, id est, Christi, quia Christus dicitur Agnus, ab agnoscendo; quia cum immolaretur in cruce, agnouit Patrem obedientiâ, Matrem custodiâ, familiam misericordiâ; Patrem agnouit obedientiâ, dicens, *Non mea voluntas, sed tua fiat*, te Matrem agnouit custodiâ, assignans te Ioanni, & dicens *Mater ecce Filius tuus*, familiam agnouit misericordiâ, cuius peccata, id est, pœnam peccatorum, misericorditer pertulit in corpore suo super lignum, Tu Mater es, Virgo Maria, *agnitionis*, id est reuelationis fidei, quæ sola fidei reuelatio ad te, & in te, facta est: quia tu dedisti exemplum credendi, quod credendum est: & idè dictum est tibi, *Beata qua credidisti*. Tu es Luna exemplo fidei mundum tenebrum illuminans, tu es stella exemplo fidei Magos ad Christum adducens, tu es aurora, terminans noctem infidelitatis, & diem, id est, lucem fidei adducens; tu lucerna gratiæ & fidei posita super candelabrum. *Luc. 12. 45.*

4. Tu, Virgo Maria, Mater es sanctæ spei, quia exemplo tuæ spei docuisti quid sperandum: nostri enim quod vnum est necessarium, & quod primò querendum est regnum Dei, tu non solum fuisti exemplum spei, sed sanctæ spei, quod immobilis, cadentibus etiam stellis de cælo, id est, Discipulis à fide recedentibus, tu sola remansisti fixa in firmamento, id est, in Christo, non enim extincta fuit in nocte diuinæ Passionis, lucerna tua, id est, fides.

5. Ego verò miser peccator, non habui sanctam fidem, quia in iniquitate speraui, committens multa scelera, & confidens ex hoc de diuina indulgentia, & sic dupliciter peccabam. Deprecari digneris pro me peccatore, Virgo Maria, vt Filius tuus efficiar per gratiam, per quam hîc benè viam, & in futuro gloriam percipiam sempiternam. Amen.

Contemplatio II.

Beata Virgo Amica.

1. Omnium Dominus dilexit te, gloriosissima Virgo Maria, idè *Amica* nominaris; nam Deo seruisti, non in timore, sed in vinculo charitatis, nullum aliud emolumentum querens ex tua dilectione quàm ipsum dilectum. Tu, Virgo Maria, amica Dei es, quia voluntatem tuam diuinæ voluntati per omnia conformasti, & in hac conformatione seu conformitate, vera amicitia certissimè comprobatur, quia idem velle & idem nolle, vera amicitia est, vnde intelligens per Angelum, quod Filius Dei de te volebat carnem assumere, statim Angelo respondisti *Fiat mihi secundum verbum* *Luc. 1.*

Bbb iij 38.

Virgo Maria, Soror Christi es, quia Filius est Dei Patris per naturam, & tu specialis, imo specialissima Filia eiusdem Patris es, per gratiam. Ut tantò sis specialior Soror Christi, quoniam ambo vnus sanguis & vna caro effecti estis. Vnde dicitur, *erunt duo* (scilicet Christus & tu) *in carne vna* ^{Genes. 24.} virginali. Tu, Virgo Maria, Soror Christi es per castissimam, sinceram & feruentissimam dilectionem quæ solet esse inter fratrem & sororem. Tu etiam es per naturæ identitatem conformis & connaturalis ei, & hæreditatis æternæ comparticeps; summè etiam dilecta ab eo, quia *Nemo carnem suam odio habuit*; & simile à suo simili nescitur, & ab eo diligitur. ^{Ephes. 29.} Quanto igitur tu, Virgo Maria, naturæ mundioris es, ac moribus & virtutibus Christo es similior, tantò ampliùs ab eo dilecta es tanquam specialis soror.

2. Tu, benedicta Virgo Maria, Soror es populi Christiani per naturam, quæ summa gloria est populo Christiano; si esset qui aduerteret, habere scilicet Sororem Reginam Angelorum, & Hominum; imò, quod plus est, habere Sororem Sponsam Patris, Matrem Filij, Amicam Spiritus sancti, & Reginam cœlestis regni; vbi plenariam habes potestatem quoscumque volueris introducere, quidquid volueris impetrare, quidquid à benedicto Filio tuo petieris, obtinere. Ideò potes dicere cum benedicto Filio tuo ^{Matth. 28. 18.} *Data est mihi omnis potestas in cœlo & in terra; & in Hierusalem*, scilicet ^{Ezech. 24. 15.} *superna, potestas mea.*

3. Tu, gloriosa Virgo Maria, Soror es Angelorum; in carne enim præter carnem vixisti: quia tua vita fuit Angelica, non humana; vnde Angeli dicunt de te, *Quid sciamus Sorori nostræ in die, quando alloquenda est; in die scilicet illa, quando eam alloquetur Angelus Gabriel* Sed respondent statim dicentes, *Si murus est, ædificemus super eam.* Tu, Virgo Maria, murus es, ad mala fortiter repellenda à te & aliis. Tu murus es quantum ad virtutes, quibus malis resistitur, vt sunt patientia, fortitudo & magnanimitas. Tu murus es rursus, quia infamiam non admittis; Tu murus es nobis ad defensionem & conseruationem; Tu murus es propter firmitatem propositi conseruandæ virginitatis; Tu murus es super quo sancta Trinitas ædificauit.

4. Tu, benedicta Virgo Maria, Soror es Patriarcharum, & Prophetarum, ^{Cant. 8. 9.} qui dicunt de te, *Soror nostra paruula est, & vbera non habet.* Tu Virgo Maria, paruula es per humilitatem mentis, mundaque & pura tanquam iu-uencula, quæ vbera non habet. Sed ego iniquissimus peccator, qui licet frater tuus sum (quia ex ijsdem parentibus prioribus descendimus) tuus frater nominari non debeo; quia degeneraui immiscendo me miserabiliter diuersis iniquitatibus & peccatis: sed, Virgo piissima, compati mihi digneris indignissimo Filio tuo, & pro me iugiter Filium tuum exorare, vt sic vitam meam disponat, quòd tibi & sibi placeam, & tecum viuam in æternum. Amen.

Contemplatio IV.

Virgo Maria, Filia.

1. **S**piritus sanctus, dilectissima Virgo Maria, te familiariter instruens dicebat tibi, *Audi Filia, & vide, & inclina aurem tuam, & obliuiscere* *populum tuum, & domum Patris tui.* Tu, prudentissima Virgo Maria, audisti, ut posses credere ijs, quæ tibi dicenda erant ab Angelo; quia *fides ex auditu;* Audisti, Virgo Maria, non sicut Eua, quæ sibilum serpentis audiuit in Paradiso, & ideo in toto mundo pullulauit damnatio, sed audisti verbum Dei, quia *Beati, qui audiunt verbum Dei, & custodiunt illud.* Audisti, Virgo Maria, non linguam carnis, quæ suggerit delectabilia; non linguam mundi, quæ suggerit vana, non linguam diaboli, quæ suggerit iniqua, sed linguam Angeli Gabrielis, annuntiantis salutifera, & dicentis, *Aue gratia plena, Dominus tecum.* Audi igitur Filia nuntiationem Patris, quia *Benedicta Filia tu à Domino, & vide:* Vidisti namque fragilitatem tuam secundum naturam nostram humanam, & sic te ipsam humiliasti in oculis tuis, & Deum exaltasti; vidisti etiam scripturas Prophetarum, quæ in te complebantur. Vidisti præmia iustorum, & supplicia reproborum, & sic verbis admonita es, & exemplis instructa; igitur. *Inclina aurem tuam;* inclinasti etiam piissimam aurem tuam, ut humiliter obedires diuinæ voluntati; ut sic mediante obedientia conciperes Filium Dei per fidem dictorum: & ne de te ipsa præsumeres, dictum est tibi *Obliuiscere populum tuum, & domum Patris tui;* quia nec populum augere prolis multiplicatione, nec domui Patris relinquere curasti hæredem, sed quidquid honoris in populo, quidquid de paterna domo terrenarum rerum habere potuisses, omnia arbitrata es ut stercore, ut Christum lucri faceres; nec, gloriosa Virgo Maria, fefellit te intentio, quia Christum Filium tibi vendicasti, qui propositum tuæ pudicitie non violauit, ideo fuisti *Gratia plena,* quia gratiam virginittatis non perdidisti, & insuper fecunditatis gloriam acquiuiisti, & in his consistit maxime decor, de quo sequitur, *Concupiscet Rex decorem tuum,* id est, te decoram omni pulchritudine virtutum, quia tota pulchra es, & macula non est in te, & ideo subiungitur, *Omnis gloria filie Regis ab intus.* Tu, Virgo Maria, filia Regis fuisti secundum carnem, quia de te scribitur, *Regali ex progenie Maria,* Filia es etiam Regis Dei Patris per creationem & gratiam. *Omnis gloria eius ab intus,* scilicet, quando Christum gestabas in tuo vtero virginali. Gloria tua ab intus, id est, conscientia tua pura, si enim gloriam foris quæreret, intus gloriam, quam Rex concupisceret, non haberet. Gloria tua ab intus, Virgo Maria, quia tanquam Virgo prudens, gleum, id est, nitorem bonæ conscientie, pietatis; & misericordie, habuisti in

vale

vase triplici, scilicet cordis, oris, & operis, cum lampade integerrimæ virginitatis.

3. O Beata Virgo Maria, natus fui filius iræ, sed misericordiâ benedicti Filij tui per Baptismum factus fui Filius gratiæ, sed post ex gravitate & malitiâ meâ, iterum factus fui propter peccata, quæ commisi, filius iræ. Adiuvet me, Virgo pia, tua clementia, orando tuum Filium benedictum, ut me faciat de filio iræ, filium gratiæ, ut cohæres tecum efficiar in hereditate æternâ. Amen.

Contemplatio V.

Virgo Maria, Sponsa.

1. Virgo prudentissima, & singulari dignitate dotata, gloriosa Virgo Maria, vocat te benedictus Sponsus tuus dicens, *Veni de Libano, Sponsa mea.* Tu, benedicta Virgo Maria, Sponsa Deus; quia sicut Sponsus eligit Sponsam ut sibi placeat; sic Deus, Virgo purissima, te elegit, sicut canit Ecclesia dicens, *Elegit eam Deus, & precelegit eam:* quia sine exemplo placuisti Domino; & sicut Sponsa ornatur diuersis ornamentis, sic tu, Virgo Maria, ornata fuisti diuersis donis Spiritus sancti; & tunc concupivit Rex decorem tuum. Sicut Sponsa coniungitur viro, sic tu, speciosissima Virgo Maria, coniuncta es Iesu Christo per verba de præfati, cum dixisti; *Ecce Ancilla Domini, fiat mihi secundum verbum tuum.* Sicut etiam Sponsa in thalamum Sponsi introducitur, sic tu, benedicta Virgo Maria, introducta es in thalamum tui Sponsi Iesu Christi, in tua Assumptione. Tu, Virgo Maria, à tuo Sponso dotata fuisti duplici dote. Gratiâ primò, vnde dicta es *Gratiâ plena*, & tandem gloriâ in excelsis, quia *Gratiâ & gloriam dabit Dominus.*

Cant. 4.
8.

In Off.
B. V.

Luc. 1.
38.

Psalm.
83. 12.

2. Tu Virgo speciosa, Iesu Christo dotem etiam dedisti: scilicet de carne tua purissima & mundissima, carnem in qua passus fuit pro redemptione generis humani; Tu, Virgo Maria, Sponsa Iesu Christi, sponso tuo benedicto fidem seruasti, qui cum tempore Passionis suæ fides Apostolorum concussa vacillaret, tu velut Sponsa fidelis Sponso, sine fidei titubatione constanter adhæcisti; Tu, gloriosa Virgo Maria, Sponsa Dei es, non solum propter amoris affectionem, sed etiam propter dominium; nam sicut Sponsa post Sponsum, secundum locum habet in domo, sic tu Sponsa Virgo Maria, post Christum secundum locum habes in vniuerso; & in bonis Sponsi maiorem obtines portionem: sic namque te concupivit Sponsus tuus, & tu Virgo Sponsa eius desiderium induxisti, quod ad nostram infirmitatem est humiliatus omnipotens, & qui est vira viuientium, tradidit se ipsum sponte ad mortem. Tu, pretiosissima Virgo Maria, desponsata

Ccc

fuiſti fabro, vt per hoc innueretur te eſſe Sponſam illius artificis, *Qui fabricatus eſt auroram & ſolem.*

3. O beatiffima Virgo Maria, Sponſa Dei digniffima, animam habeo mihi datam à Deo, quæ per Baptiſmum Sponſa ipſius effecta eſt, ab omni labe peccati mundata, virtutibus dotata, diuerſis gratiis adornata, fidei annulo ſubarrhata; in Sponſi thalamum, id eſt, in Eccleſiam militan-tem, introducta. Sed ego ſceleratiſſimus peccator, iniquitate plenus, ipſam abſtuli Sponſo, & in adulteria proſtraui, diuerſa, & nefandiſſima peccata, & vitia committendo; & ex his ſeparata à Sponſo, eſt infidelis facta, vitiis deturpata, à Sponſi thalamo eiecta, & inimicis Sponſi ſpontaneè ſubiecta. O piiffima Virgo Maria, ora tuum benedictum Sponſum, vt animam meam ſibi & tibi reconciliet, & indulgeat, vt in eius thalamum ſic introducatur, vt perſeuerans ipſius thalamum conſequatur æternum. Amen.



Contemplatio VI.

Virgo Maria, Vidua

1. **T**V, glorioſiſſima Virgo Maria, *Vidua* nuncuparis atteſtante Euan-gelio per hoc quòd commendata fuiſti beato Ioanni Euangeliftæ, & ſic tunc Ioleph mortuus fuerat, cui priùs ſe, & te Matrem commiſerat Filius tuus: non enim grandem te dimiſiſſet, qui te iuuenulam conſeruauit. Tu, Virgo Maria, es illa Vidua designata per illam Viduam Euangelicam, quæ tantum duo minuta miſit in Gazophylacium, & plus cunctis diuitibus poſuit, iuxta Dominicam ſententiam. Virgo prudentiſſima Maria, vnum minutum, quod obtuliſti, fuit tua admirabilis humilitas, quæ in reputatione tui ipſius ſummè minutam te fecit. Aliud minutum, fuit tua fides, comparata grano ſinapis. Hæc duo minuta, dulciſſima Virgo Maria, poſuiſti: quia in Gazophylacio, id eſt, Chriſto, in quo ſunt omnes theſauri, ſapientie & ſcientie Dei, hæc abſcondiſti: primum minutum fuit cum dixiſti: *Ecce Ancilla Domini*: ſecundum minutum fuit, cum dixiſti, *Fiat mihi ſecundum verbum tuum*, & quia plus cæteris obtuliſti, benedicta fuiſti; nam omnibus aliis humilior & fidelior fuiſti; & idè plus meruiſti; Nam Dominus non conſiderat quantum datur ei, ſed ex quanto; plus enim attendit dantis charitatem, quàm muneris quantitatem; & ſecundum charitatis inten-tionem retribuit gloriam vel coronam.

2. Tu, benigniſſima Virgo Maria, designata es per illam Viduam; quæ vaſa vacua impleuit oleo ad præceptum Eliſei: Iſta vaſa vacua fuerunt cogitationes tuæ, & opera tuæ, quæ vacua fuerunt amore terrenorum, & immunditiâ mortalis, & venialis peccati. Iſta vaſa clauſa fuerunt inferiùs, per contemptum temporalium, aperta ſuperiùs per appetitum cæleſtium; hiantia per gratiæ deſiderium, & capacia per profunditatem humilitatis, &c.

latitudinem charitatis. Ista vasa, piissima Virgo Maria, implesti ad præceptum Elisæi, id est, Christi, oleo scilicet pietatis & misericordiarum, quod viuificat peccatorem. Istud oleum sanat à malo, & instruit in bono, & laxificat in vtroque. Tu, misericordissima Virgo Maria, sanas peccatores per oleum gratiarum, instruis incipientes per oleum sapientiarum, proficientes & perfectos per oleum latitudinis, quod est securitas conscientiarum.

3. O beatissima Virgo Maria, anima mea misera, Vidua effecta est per operum mortificationem; quia opera bona, quæ ipsam satiabant, Deo mortua sunt; quia frequenter in mortalibus peccatis ferebatur. Imò mea misera anima non solum est Vidua, sed etiam mortua per peccatum. Resuscita eam piissima Virgo Maria, tuis sanctissimis intercessionibus, quibus adiuantibus viuificetur, & Sponso suo Iesu Christo Filio tuo benedicto reconcilietur, & secum maneat per infinita sæcula sæculorum. Amen.

Contemplatio VII.

Virgo Maria, Mulier.

1. **B**enedicta es tu, pretiosissima Virgo Maria, inter omnes mulieres: quia Eua sic fuit infirma mulier, quod expauit Deum, & quasi durum fecit; & ille quasi oblitus fuit misericordiarum suarum erga naturam humanam. Sed tu, Virgo Maria, fuisti Mulier fortis; quia sic Deum emollisti & placasti, quod fere oblitus fuit punitionis & vindictæ erga hominem, quem ut ad eum, à quo per peccatum recesserat, Filius reduceret, ipsum Filium formauit, & creauit Deus Pater ex tuo vtero virginali seruum sibi. Verè Eua fuit mulier infirma, quæ statim infirmata fuit ad primum verbum diaboli; Sed tu, Virgo Maria, Mulier fortis fuisti, corroborata ad verbum Angeli, & quando ex te virgine formatus fuit Christus considerans humanam naturam etiam in vtroque sexu. Oportebat ut de muliere salus procederet; ut peccato responderet remedium ad honorem Dei & gloriam, & ut ubi abundauit delictum, superabundaret & gratia. Tu, Virgo Maria, illa Mulier es, de qua dictum est serpenti; *Ponam inimicitias inter te & mulierem*; quia contriuxisti caput serpentis; quod superbe erigebat, exultans de homine deiecto. Contriuxisti caput ipsius, id est, vitium capitale, quod est superbia, initium omnis peccati, pede tuæ humilitatis, & concupiscentiam carnalem pede virginitatis; & hi duo pedes portant animam fidelem in Paradisum. Rom. 5. 10. Genes. 3. 15. Eccl. 10. 14.

2. Tu es illa fortis mulier, quæ à Salomone quærebatur, dicente, *Mulierem fortem quis inueniet?* Sed, donec ventum est ad te, non inueniebatur. Tu enim fortis fuisti contra carnem per virginitatem, contra mundum per pauper tatem, contra diabolum per humilitatem, contra omne genus peccati per patientiam, quia aduersa omnia æquanimiter sustinuisti, &

Ccc ij

prospera omnia pro amore Sponsi tui, viriliter contempsisti: Tu, Virgo Maria, illa es vnica mulier Hebræa, quæ fecit confusionem in domo Nabuchodonosor; mulier scilicet vna, singularis dignitate, & pietate, charitate, & præsidio; es namque mulier *Hebræa*, id est, *transiens* ad maternitatem de virginitate; de Ancilla ad Reginam; de Filia Dei in Matrem; nec aliqua ita perfecte transit mundum transeuntem, & concupiscentiam ipsius. Tu, Virgo Mater, fecisti confusionem in domo Nabuchodonosor, hoc est, in inferno, cuius lymbum euacuasti per Filium, qui captiuus cælum aperuit. Tu es illa mulier Chananæa, egressa de finibus Tyri & Sidonis, id est de profundo secularis conuersationis, quæ quodidie clamas ad Dominum pro filia, id est, pro peccatrice anima, quam in te misericorditer transformas, dicens, *Miserere mei, Fili David.*

Indith.
14. 16.

Math.
16. 22.
Ecd. 36.
27.

3. O immaculata Mulier, & Mater incorrupta; scriptum est, *Vbi non est Mulier, ingemiscit egens*; nam vbi tu non es per gratiam, non potest esse nisi miseria, gemitus, & egestas. Anima mea, Virgo Maria, misera peccatrix est, multis & innumerabilibus peccatis obnoxia, in magna egestate constituta. Ora pro illa, & clama ad Filium tuum benedictum incessabili deprecatione, vt ab ipso misericorditer audire merearis, *O Mulier, magna est fides tua; fiat tibi sicut vis; vt sic te adiuuante, & deprecante, curari valeam à peccatis, & æternam gloriam obtinere. Amen.*

Contemplatio VIII.

Virgo Maria, Virgo.

1. O Virgo immaculata, & semper Virgo Maria, tu ferum contra nos Monocerotem seu Vnicornem mansuescere fecisti in tuo vtero virginali: sicut enim vnicornis est animal sæuissimum, & tantæ fortitudinis, quod nullâ arte venatorum capi potest, imò vnico cornu, quod gestat in fronte, quæque disrumpit obstantia; sed per virginem tantum mitescit, quod à venatoribus capi potest: Inest enim ei naturaliter quod visâ virgine in sinu illius se reclinat, & suæ ferocitatis oblitus cum mansuetudine requiescit. Sic Filius Dei Patris, cuius potestati, quæ per cornu designatur, nemo resistit, sæuus & indomitus videbatur, cum pro sola cogitatione superbiz, Luciferum cum suis de cælo; & pro morsu pomi, Adam & Euam expulit à Paradiso, mundum deleuit diluuiò. Sodomitæ igne & sulphure demersit in infernum. Sic in cælo & in terra, iste Vnicornis sæuebat; donec tu, gloriosa Virgo Maria, ipsum in huius mundi castellum intranssem, suscepisti in domum tuam, hoc est in gremium vteri tui virginalis, velut Vnicornem in sinu, & ipsum vestisti carne virgineâ, in qua incomprehensibilis secundum diuinitatem capi dignatus est à venatoribus Gentilibus, & Iudæis, & additus spontaneæ occisioni, se passus est crucifigi.

2. Tu, gloriosa Virgo Maria, fuisti Virgo disciplinata in cogitatu, in auditu, in respectu, in olfactu, in gustu, in visu, in loquela, in tactu, in incessu, & in omni motu, ut de te dicatur, *Disciplina tua donum Dei est.* Quae disciplina abscondita fuit non solum quoad homines, sed etiam quoad angelos. Quilibet sublimius & subtilius intelligant aliis creaturis, Dei sapientiam, & tuam dignitatem; non tamen plenè eam percipiunt: quia solus Christus dignitatem Matris suae plenarie comprehendit. Tu, Virgo Maria, fuisti Virgo constans, & in proposito animi perseverans, quia, sicut incepisti, sic semper in bono proposito perseverasti. Signata es per Annam Matrem Samuelis, cuius vultus non sunt in diuersa mutati. Tu, Virgo Maria, fuisti Virgo modesta, & tua modestia fuit nota omnibus hominibus, in superfluis relegendis per temperantiam, in sensibus refræ-
 17.
 1. Reg. 1.
 18.

3. Sed Virgo Virginum, benedicta Virgo Maria, ego peccator iniquissimus, non sum Virgo, sed corruptus in omnibus, indisciplinatus, inconstans in omni proposito boni; absque modestia quacumque, ad terrena totaliter inclinatus; & à celestibus mente & animo multipliciter elongatus. Adiuua me benignissima Virgo Maria, ut castus fiam tuis intercessionibus, & constans ac perseverans, ut benedictum Filium tuum placatum videam, & gloriam percipiam sempiternam. Amen.

Contemplatio I X.

Virgo Maria, Princeps.

1. **T**V, benedicta Virgo Maria, Princeps nominaris: Princeps namque es, quia Filia Principis, id est, Dei Patris. Tu, Virgo Maria, Princeps es, id est, Mater Principis, scilicet Christi, qui dicitur *Princeps Regum terrarum.* Tu, benignissima Virgo Maria, Princeps dicta es Ecclesiae à tota sancta Trinitate, per te Princeps huius mundi, id est, diabolus, qui dicitur Princeps, id est, Principium captiuitatis, eiicitur foras, scilicet à cordibus electorum. Iste enim Princeps primam mulierem captiuauit; sed à te, beata Virgine Mariâ Principe; captiuatus est: quia scriptum est de te, quod con-
 Apoc. 1.
 1.
 Gen. 3.
 15.
 Ioan. 8.
 25.
 Apoc. 1.
 17.
 Job. 10.
 11.

teres caput eius: & non solum semel, sed quotidie etiam id facis, quando tuo adiutorio diabolus expugnatur. Tu, Virgo Maria, Princeps es, quasi principium capiens, id est illum, qui dicit, *Ego sum principium, qui & loquor vobis.* Tu, Virgo Maria, es Princeps, id est, primum capiens, scilicet illum, qui dicit, *Ego sum primus & nouissimus.* Tu, Virgo Maria, Princeps, scilicet à principio; quia Christo dedisti principium essendi secundum naturam humanam, quam assumpsit ex te: Ideo tibi potest dicere, *Pelle & carnibus*

Ccc iij

2. Tu, gloriosa Virgo, Princeps es à principatu, quia cœlorum sedes Regina in tua sanctissima Assumptione, & sola cum Deo principatum tenes in cœlo, & in terra, in mari, & in omnibus abyssis. Tu, laudabilis Virgo
- 1f. 32. 3. Maria, es illa Princeps de qua scribitur: *Princeps ea, que digna sunt Principe, cogitat*, scilicet cogitationes pacis, & non afflictionis. Vnde, sicut Filius tuus benedictus est Princeps Regum terræ, sic etiam tu, Virgo Maria, nominaris *Princeps Regum terre*, quia ad tuum principatum sanctissimū pertinent illi, qui ut regnent in cœlo, regnant in terra, & benè regunt se & suos subditos.
3. O clementissima Virgo Maria, Princeps cœli & terræ, quid ego peccator sceleratissimus faciam? quia Princeps mei ipsius non fui ad benè operandum, nec ad virtuosa opera exercendum, sed Principi huius mundi me miserabiliter submisi, & subiugavi, diuersa & infinita peccata committendo, & ipsius prauas, & nequissimas, & tuo benedicto Filio, & tibi odibiles tentationes recipiendo, & executioni ipsas toto posse, cum magna diligentia mandando; nisi tu, piissima Virgo Maria, mihi miserabili peccatori succurras, promissionem mihi factam de æterna hæreditate consequi non potero, neque per iustitiam debebo. Sed adiuuare me digneris, misericorditer deprecando tuum Filium benedictum, ut mea flagitia deleat, & virtutes sic mihi tribuat, ut sub vtriusque vestrum principatu, hic in terra, & in futurum in cœlo, viuam per infinita sæculorum sæcula. Amen.

Contemplatio X.

Virgo Maria, Regina.

1. **O** Semper laudabilis, semper extollenda, semper glorificanda, semper magnificanda, semper veneranda, & semper timenda, beatissima Virgo Maria. Tu Regina mundi appellaris, propter Reginæ largitatem; largiris namque seruis tuis dona gratiarum, vestes virtutum, thesauros meritorum, & magnitudinem præmiorum: & ideo potes dicere, *Sunt mecum diuitiæ & gloria*. Tu, Virgo Maria, Regina es propter protectionem; protegis enim nos sub pallio virginitatis, & humilitatis: nam humilitas tua & virginitas, sunt alæ tuæ, latæ per vtriusque virtutis plenitudinem; & ideo tibi potest & debet dicere quicumque fidelis, *Sub umbra alarum tuarum protegeme, à facie impiorum, qui me affligerunt*, quia in umbra alarum tuarum sperabo, donec transeat iniquitas, in umbra virginitatis, contra incendium luxuriæ, protegar, & in umbra humilitatis contra ventum inanis gloriæ, seu tempestatem superbiæ.
2. O Regina cœli & terræ, regnum Dei in duobus consistit, scilicet in misericordia & iustitia. Filius tuus benedictus sibi quasi retinuit iustitiam, velut dimidiam partem regni; Tibi autem, Virgo piissima, concessit misericordiam, quasi aliam dimidiam partem regni. Et ideo benedictus Filius tuus

Prov. 8.
18.

Psalms.
16. 8.
Psalms.
56. 2.

dicatur *Sol iustitie*, & tu *Regina misericordia*: & hæc diuisio figurata fuit in Regina Esther, cui Rex Assuerus obtulit dimidiam partem regni sui. Sic etiam fecit tibi Rex Assuerus, id est, Christus, qui quamuis regnet in misericordia & iudicio, tamen ante te, clementissima Virgo Maria, non erat dimidiatum regnum, nec erat dimidiata misericordia cum iustitia, quia maior sentiebatur seueritas iustitie, quam clementia misericordie, nunc autem Virgo benignissima, dimidiaretur regnum, si æquali librâ iustitiam sentiremus, & misericordiam: sed quia plus exigit infirmitas, & diuinam atque tuam decet largitatem dare plusquam petatur, largitur gloriosissimus Filius tuus; & tu tuis precibus sanctissimis, regnum hîc dimidium, ut scilicet misericordia superexaltet iudicium.

3. O Regina pietatis: & misericordia, priuatum me sentio hîc viuendo prædicto regno, & in finem subiturus sum alteram partem regni, scilicet iudicium; & nisi pars tua ipsius regni scilicet misericordia me adiuuet, iudicium recipiam, non ad saluationem, sed ad damnationem, propter infinita scelera, quæ commisi. O dulcissima Virgo Maria, ora tuum benedictum natum, ut peccata mea in finem non referuet, sed hîc ipsa misericorditer deleat, pœnitere me, & emendare ipsa faciat, ut securus eius iudicium intrando, sententiam reportare valeam salutarem. Amen.

Contemplatio XI.

Virgo Maria, Cælum.

1. **E**Xcelsa supra sidera, Virgo Maria, de celsitudine tua loquitur benedictus Filius tuus, dicens, *Cælum & Terram ego impleo*. *Cælum*, id est, ^{Jeremi.} animam tuam per gratiam, & *Terram*, id est, ^{23.24.} corpus tuum per naturam. Nam *Dominus in cælo*, scilicet in tuo utero virginali. *Parauit sedem suam*, ^{Psal.} scilicet Spiritus sancti. Tu, Virgo Maria, *Cælum* nominaris à *cælando*, quia ^{102.19.} sicut in cælo arcana Dei cœlantur: sic in tua pudicitia virginali custodiens secreta Christi, quæ noueras, nulli diuulgare volebas, sed ipsum quando vellent diuulgare reuerenter expectabas. Tibi soli datum est scire, quæ tibi datum est experiri. Tu *Cælum* nominaris, quia sicut, ^{Gen.1.} *In principio creauit Deus Cælum & Terram*, sic tu, Virgo Maria, fuisti primatum opus ipsius, dignitate & præfiguratione.

2. Tu *Cælum* nominaris, quia sicut cælum est altissimum, sic tu, Virgo Maria, altissima fuisti per mundi contemptum; quia quidquid terrenum est, longè deseruisti, & bonis super cœlestibus sublimiter adhaesisti: ut dicere posses, *Cælum sursum, & Terra deorsum*. *Cælum sursum*, id est, anima tua, ^{Prou.25.} quæ carni dominabatur, & *Terra deorsum*, id est, caro tua, quæ animæ famulabatur. Tu Virgo Maria, *Cælum* nominaris, quia cælum calidissimum est, cum sit igneæ naturæ: sic tu, Virgo Maria, per vehementiam

charitatis, & abundantiam spiritus, tota facta es ignea; ex quo claufisti illum in vtero tuo virginali, qui ignis est illuminans, & calefaciens. Tu, Virgo Maria, *Cælum* nominaris: quia sicut cælum decoratum est, & ornatum vniuersitate luminarium; sic tu, Virgo Maria, decorata es & ornata vniuersitate gratiarum & virtutum, per quas illuminas intellectus Fidelium, & inflammas eorum affectus.

3. Tu, Virgo Maria, *Cælum* nominaris, quia sicut cælum est extensum & dilatatum, sic tu, Virgo Maria, extensa es & dilatata per misericordiae immensitatem, & beneficiorum largitionem: quia omnibus omnia facta es; vt, quantum in te est, lucrifacias vniuersos. Tu, Virgo Maria, *Cælum* nominaris: quia sicut cælum pacificum est, (sines namque eius posuit Deus pacem:) sic tu, Virgo Maria, pacifica fuisti & nullus motus sensualitatis repugnans rationi turbauit pacem tuam, & ideo *In pace factus est locus eius*. Et sicut cælum solidum est, sic tu, Virgo Maria, solida es per mentis constantiam & fidei firmitatem.

Psalm.
147.14.

Psalm.
75.2.

4. O beatissima Virgo Maria, ego impurissimus peccator non possum nominari *Cælum*, sed potius *Terra*, quia totus sum terrenus, & prostratus in terram, lambens terram, cupiens terram, amplexans terram, diligens terram, & ea quæ in ipsa sunt. Sic quod oculos mentis meæ non leuo ad cælum, nec ad ea, quæ ibi continentur. Adiuuare me digneris purissima Virgo Maria, tuis assiduis deprecationibus, vt relictis terrenis, ad cælestia mentem eleuem, ibi mentem meam teneam, illa diligam, ab illis nunquam me separem: sed sicut illa suffragante tuâ clementiâ hic per gratiam contemplantor, sic in futurum illa per gloriam possideam sine fine. Amen.

Contemplatio XII.

Virgo Maria, Firmamentum.

Gen. 1.6. 1. **I**mmaculata Virgo Maria, scriptum est de te, *Fiat Firmamentum in medio aquarum, & diuidat aquas ab aquis*. Tu, pretiosissima Virgo Maria, *Firmamentum* nominaris: quia sicut firmamentum in dispositione mundi nouissimum fuit, & supremum, sic tu, Virgo Maria, fuisti nouissima & vltima creaturarum Dei, in oculis tuis per humilitatem. Ideo suprema facta es, & præcellens omnes creaturas per exaltationem: quia, *Qui se humiliat, exaltabitur*. Tu, Virgo Maria, ad instar firmamenti, diuisti aquas ab aquis, per aquas intelliguntur deliciae: diuisti igitur aquas superiores, id est, delicias cælestes, quas semper habuisti super te per desiderium; aquas verò, id est, delicias terrenorum seu carnalium voluptatum, habuisti sub pedibus per contemptum; quia labiles sunt, nec vnquam permanent in eodem statu; & omnis humana felicitas multis amaritudinibus est respersa.

Matth.
23.12.
Gen. 1.6

2. Tu,

2. Tu, Virgo Maria, *Firmamentum* nominaris: quia tuis amatoribus diuidis aquas ab aquis, id est, illos, qui prius erant fluxibiles per peccata & vitia, eleuas à fluxu vitiorum ad desiderium æternorum: quando scilicet depulvere egenum, & pauperem de stercore eleuas, pauperem spiritu seu humilem, ut sedeat cum Principibus; id est, cum Angelis in cœlestibus. Unde licet Deus semper benedicatur ab omnibus; tamen specialiter in te benedicatur; sicut scriptum est, *Benedictus es Domine in firmamento cœli*, id est, in te Maria; cum enim eius opera omnia benedicant ei; quoniam nulla tam despecta creatura est, quæ non aliquo singulari beneficio laudem Dei videatur concinere; excellentius tamen benedictus est in firmamento cœli, id est, in te Maria, non solum quia tu cæteris creaturis singulariter præmines, verumetiam quia luminarium tuorum; id est, virtutum ornatu multiplici, instar firmamenti miram Dei potentiam in te mirabiliter ostendis: quæ luminaria producta sunt, non tantum ut nocte luceant, sed ut distinguant diem & noctem, id est, vitia & virtutes, & illuminent terram, id est, terrenos, sicut de firmamento dicitur.

3. Sed, gloriosissima Virgo Maria, in omni perfecto proposito & bona operatione firmata, ego nequissimus peccator firmamentum bonum non habui in bonis operibus continuandis, sed potius in vitiis & peccatis, in illis firmatus fui hæcenus, & sum usque ad diem præsentem. Succurrat mihi misericordia tua, Virgo Maria, ut firmamentum tuarum virtutum & misericordiarum, ac tuarum deprecationum me miserum peccatorem adiuuet; ut relicto firmamento malarum operationum & cogitationum, in bonis operibus me confirmet, & faciat perseveranter insistere: ut divinam misericordiam suffultus, supra firmamentum cœli ascendens, regnum gloriæ obtineam sempiternum. Amen.

Contemplatio XIII.

Virgo Maria, Sol.

1. Electa es ut Sol præclarissima Virgo Maria: quia sicut Sol cæteris sideribus claritate luminis & maiestate præfertur; sic tu, Virgo Maria, in cœlesti gloria Sanctis omnibus honore & gloriâ superposita es. Tu, Virgo Maria, *Electa es ut Sol*, id est, ut Solis Conditor: quia ille electus est in millibus hominum, tu, Virgo Maria, electa es in millibus fœminarum; Tu *Electa es ut Sol*, ad illuminandum, scilicet intellectum per veram cognitionem; & ad inflammandum affectum per veram dilectionem. Tu *Electa es à Deo sicut Sol*, quia sola sine exemplo placuisti Domino nostro Iesu Christo: *Electa es ut Sol*; in magnitudine & potestate, in utilitate, in claritate, & calore.

Ddd

n. c. i.
L3.

2. Tua magnitudo, Virgo Maria, tua est humilitas; quia in humilitate omnis animæ quantitas mensuratur; fides tua est, potestas tua; quia fides potestas animæ est; nam quantum habet quisque fidei, tantum habet potentiam. Si parum habet fidei, parum habet potentiam; si multum, multum; si omnem fidem, omnem potestatem. Potens igitur & viua fuit tua fides, Virgo Maria, quia vnico verbo operata fuisti illud, quod numquam auditum fuerat: neque in cælo, neque in terra, quando in Incarnatione benedicti Filij tui, respondisti Angelo, *Ecce Ancilla Domini: fiat mihi secundum verbum tuum.* Vtilitas tua, est misericordia tua, quâ post misericordiam tui Filij benedicti nihil est vtilius humanæ creaturæ. Claritas tua, est puritas tua: calor verò charitas, quia charitas est animæ caliditas.

Ecclef.
24. 14.

3. Tu, Virgo Maria, Sol nominaris, qui dicitur, quasi *sua omnibus largiens*; quia, tu, Virgo benedicta, quidquid habes, quantum in te est, communicas & bonis & malis. Malis enim veniam impetras, & gratiam iustis multiplicas & conseruas; &, sicut Sol fulgore suo totum illustrat orbem terrarum; sic tu, piissima Virgo Maria, fulgore miraculorum, totum illustras orbem terrarum, & illustrabis vsque ad diem iudicij: quia de te scriptum est, *Vsque ad futurum sæculum non desinam*: & sicut Sol est Rex siderum; sic tu, Virgo Maria, Regina Virginum, imò Sanctorum omnium. Sicut etiam Sol non crescit, nec decrescit: sic tu, Virgo Maria, non creuisti per elationem, nec vnquam decreuisti per pusillanimitatem. Fuisti etiam clara, velut Sol, per sapientiam; pura, per continentiam; fulgida, per famam, calida, per charitatem, & exaltata, per Christi conceptionem.

4. O benignissima Virgo Maria, clarifica me tenebrosam densitate peccatorum; calefacias me frigidam, liquefacias cor meum asperum & durum, munda me sordidum, ac multis vitiis & peccatis deturpatum, vt finito ergastulo huius vitæ, Solem iustitiæ videam, & illo frui valeam per infinita sæcula sæculorum. Amen.

Contemplatio XIV.

Virgo Maria, Luna.

Genes.
16.

1. **F**ecit Deus duo luminaria magna; *luminare maius*, scilicet Solem, id est, Christum, *vt praeesset diei*, id est, iustis; & *luminare minus*, scilicet Lunam, id est, te Virginem Mariam, *vt praeesset nocti* ad illuminandum peccatores. Ideo Filius tuus benedictus dicitur *Sol iustitiæ*; quia ab ipso est omnis iustitia; Tu, Virgo Maria, mater misericordiae diceris, impletâ à Deo misericordiâ erga peccatores, sicut mater erga filios misericors est. Deus autem peccatores non audit, sed tu, Virgo Maria, Mater Dei ipsos non repellis. In Sole enim, id est, in benedicto Filio tuo, est feruor, id est iustitia puniens; & splendor, id est, misericordia parcens; in Luna verò, id est,

in te, gloriosa Virgine Maria, est splendor misericordiæ, sine fervore severitatis; quia non offendis oculos infirmos te respicientes, sicut fervor Solis.

2. Tu, Virgo Maria, Luna nominaris; quia, sicut Luna crescit & decrecit; sic tu, Virgo Maria, creuisti & decreuisti; creuisti namque de virtute in virtutem; sed decreuisti per humilitatem in tua reputatione: quia quanto maior fuisti, tanto amplius te humiliasti; ut coram Deo gratiam inuenires. Vnde, sicut corporaliter crescebas, sic etiam spiritualiter decrescebas. De bono in melius, & de virtute in virtutem crescebas, & implebatur sanctificatio tua, & apparebas corniculata, sicut Luna nova: hæc cornua sunt humilitas mentis, & virginitas carnis; quibus, scilicet cornibus, id est, virtutibus, tam spiritualia quam corporalia ventilabas. Eras enim semilunium ante conceptum Saluatoris, illustrans alios radiis bonorum exemplorum, quando scilicet nutriebaris in Templo; tu verò fuisti Luna plena, quando vocata fuisti ab Angelo gratiâ plena, & maximè quando imprægnata facta es, *Pulchra ut Luna*, illuminata respectu diuinitatis, quo meruisti beatificari ab omnibus generationibus.

3. Tu, Virgo Maria, es *Pulchra ut Luna*, quæ quasi naturaliter est obscura, sed recepto in se solari splendore accenditur lumine alieno, & ideo dicitur *Luna quasi lux aliena*. Sic tu, Virgo Maria, adhuc in infirmitate corporis constituta, suscepto in te Spiritu sancto tanquam illius summæ maiestatis radio vero lumine, scilicet Dei Filio fecundata fuisti. Et sicut Luna Sole recedente, mundum illuminat; sic tu, Virgo Maria, Sole iustitiæ transeunte de mundo ad Patrem, per mortem corporalem, fide tuâ totam illustrasti Ecclesiam in triduo dominicæ sepulturæ.

4. O lucidissima Virgo Maria, in nocte tenebrosa ego miser constitutus sum obscuritate nimia peccatorum circumseptus; per viam caliginosam gradior, in qua quotidie inimico procurante cespitare cogor. Aduua me, Virgo Maria: illumina cor meum obscurum, duc me lumine claritatis tuæ per viam, in qua ambulo: ut insidiis antiqui hostis procul pulsus, per viam mandatorum dominicorum incedam, & ad felicissimum terminum veniam præstolarum. Amen.

Contemplatio X V.

Virgo Maria, Stella.

1. **S**Tella nominaris, pretiosissima Virgo Maria, Stella namque est fixa in firmamento cæli. Sic tu, Virgo Maria, fixa fuisti in firmamento arcæ scripturæ, per iugem meditationem legis diuinæ, & in bonis cælestibus per desiderium & amorem æternorum, tanquam vera Filia Gen. 28. Abraham, cui promissum erat, *Multiplicabo semen tuum, sicut stellas cæli*. Tu, 17.

Ddd ij

Virgo] Maria, stella es, quia clara & lucida sanctitatis exemplo, illuminas mundum multiplici virtutum radio: clara etiam per vitæ puritatem, non habens in te aliquam maculam. Tu, Virgo Maria, Stella es: quia tota ignea per charitatem, maximè ex quo illum concepisti, qui est ignis ardens. Tota etiam ignea es per virtutum vniuersitatem: nam virtutes igneae sunt naturæ, & ideo sursum trahunt; quia locus ignis, sursum est.

2. Tu, Virgo Maria, Stella es: quia sicut stella se paruum ostendit; sic tu, Virgo Maria, parua apparuisti per humilitatem, cum te obrulisti in ancillam, quæ postulata eras in Matrem. Et sicut stella tempore gelicidij lucet & scintillat clarissimè, sic tu, Virgo Maria, tempore gelicidij, id est, Passionis benedicti Filij tui, quando cæterorum charitas refriguit, tu sola, quasi de nocte totam Ecclesiam illustrasti; & per excellentissimam conuersationem semper corruscasti, & rutilasti, & sicut stella aspectum, & effectum habet ad terram. Sic tu, Virgo Maria, ad terram, id est, ad terrenos, quorum procuras negotia maximè seruorum & amatorum tuorum.

3. Tu, Virgo Maria, *Stella* nominaris; quia sicut stella habet motum continuum, sic tu, continuo motu fuisti de virtute ad virtutem, de vno bono ad aliud, de actiua vita ad contemplatiuam. Sicut stella firmamentum exornat; sic tu, Virgo Maria, totam Ecclesiam tanquam pulcherrimo lumine exornas, siquidem tota pulchra es, & ex omni tui parte lucida; quia de te scribitur, *Tota pulchra es Amica mea, & macula non est in te.* Non enim habuisti maculam, neque rugam; sed pulcherrima fuisti à planta pedis vsque ad verticem capitis. Pulchra namque in tua Sanctificatione, pulchrior in tui benedicti Filij Conceptione, & pulcherrima in beatissima Assumptione. Tu, Virgo Maria, *Stella* nominaris, quia sicut stella illuminat noctem, sic tu, clarissima Virgo Maria, noctem illam solitariam, nec laude dignam, quæ ab Eva fluxerat, vsque ad te, illuminasti: nam in gloriosissimo ortu tuo, omnia, meliorari inceperunt; quia tu repleta gratiâ Septiformi, replesti nos, plenitudinem gratiæ refundendo, nisi steterit per nos.

4. O stella clarissima Virgo Maria, inclina ad me miserum peccatorem humilitatem tuam, & charitatem abundantem. Immitte radium tuæ lucis, qui noctem cordis mei illuminet, peccatorum tenebras effugando, vt lumen inaccessibile & æternum, facie ad faciem aspiciam, per infinita sæcula sæculorum. Amen.

Contemplatio XVI.

Virgo Maria, Stella matutina.

1. **O** Stella matutina, Virgo Maria splendidissima, lucens antequam die-
cat; quia ortus tuus præcessit ortum Iesu Christi, benedicti Filij tui,
qui lux est, & dies. Tu, benedicta Virgo Maria, es illa stella, quæ vincenti
promittitur in præmium, scripturâ attestante, *Vincenti dabo stellam matu-* *Apoc. 2.*
tinam, in cuius ortu, scilicet quando gratia & dilectio tua oriuntur in corde
iusti, fugantur fures, id est, demones, quibus tu, Virgo Maria, es *Terribilis Cant. 6.*
vt castrorum acies ordinata, & ideo vigiles sunt alacriores, & quicunque de
sua salute est sollicitus.

2. Tu, Virgo Maria, *Stella nominaris matutina*: quia semper fuisti in
mane oriens, & nunquam tetendisti ad occasum peccati; sed semper
splendida Stella fuisti illuminando populum, qui ambulabat & ambulat
in tenebris peccatorum, & licet Luna & omnes stellæ superueniente Solis
lumine non appareant, sed absorbeantur à splendore Solis, tamen tu,
Virgo Maria, Stella matutina lucebas, & lucas cum Sole, nec ad lumen
Solis propriam claritatem amisisti. Sed tu, Virgo Maria, quæ peperisti So-
lem, lucas cum Sole, id est, benedicto Filio tuo: & quæ maiori digni-
tate rutilat Filius tuus benedictus, tanto maiori dignitate splendes tu
Mater, & licet longè sis minor Filio; sicut stella minor Sole, hoc
tamen gaudes privilegio, quòd omnis anima Deo comparata suam
reprimat claritatem; sed quia honor Filij honor est Matris, in excel-
lentia Filij tui benedicti lucet excellentia tua; quia Mater es, quæ tantum
Filius meruisti generare.

3. Tu, Virgo Maria pretiosissima, *Stella nominaris matutina*: nam stella
materia incorrupta est; quia cuncta corpora citra luminaria subiacent cor-
ruptioni: sed sola natura stellarum mundo manente non potest corrumpi.
Sic Virgo, materia tua incorrupta permanet, de qua natus est secundum
carnem ille cuius animam Deus non reliquit in inferno, nec dedit Sanctum *Psalm.*
suum videre corruptionem. Tu etiam secundum carnem penitus expers *15. 10.*
corruptionis fideliter es credenda, quæ incorrupta virginitate de te genuisti *Act. 2.*
eum, qui omnis incorruptionis est causa: & sicut stellæ incorruptibiles sunt *27.*
de natura, sic tu, sacratissima Virgo Maria, incorruptibilis es de gratia: &
etiam sine corruptione putredinis & incinerationis in corpore de mundo,
vt pie creditur, assumpta fuisti.

4. Aue *Stella matutina*, Stella mirabilis, Stella laudabilis, Stella desi-
derabilis: trahere me corruptum ad te incorruptam, me gratiâ vacuum ad te
plenam, vt de plenitudine repleatur anima mea. Trahe me imperfectum,
Ddd iij

ad te perfectam, ut cum venerit, quod perfectum est, per te euacuetur quod ex parte est. Trahe me paruum, ad te magnam, ut per te in eo crescam, cuius magnitudinis non est finis. Trahe me debilem ad te virtuosam; ut cum ceciderim, non collidar; sed tu, Mater diuinae pietatis, supponas manum tuam nunc & in perpetuum. Amen.



Contemplatio XVII.

Virgo Maria, Stella maris.

1. **A** Vdi me miserum peccatorem, clementissima Virgo Maria, audi me miserum ad te clamantem. Tempore tuae primae ac salutiferae salutationis nominata es *Stella maris*: quando in caelis nulli homines erant beati, & in mundo nulli aut paucissimi iusti; sed omnes aut fere omnes in mari, id est, in amaritudine peccatorum, ignorantiae tenebris inuoluti: & ideo stella maris, id est, miserorum, nuncupata es, quod ad hoc ordinata es ab aeterno, ut per te Dominus, in quantum in ipso est, omnium miseretur, & omnes miseri fluctuantes in amaritudine criminum in te refugium inuenirent, quae lucem genuisti fluctuantibus in hoc mari.

2. *Stella maris* nominaris, quod sicut stella, in mari nauigantibus est rectae viae indicium; sic tu, benignissima Virgo Maria, in hoc mundo fluctuoso viuentibus, aliis rectam viam humilitatis, aliis castitatis, aliis bonae operationis, aliis contemplationis, seu cuiuslibet virtutis, ostendis. Tu, gloriosa Virgo Maria, *Stella maris* nuncuparis, quia nauigantes mare mundi spatiofum, ubi sunt reptilia absque numero, & animalia pusilla cum magnis, te veram *Stellam maris* inter omnes stellas, id est, Sanctos, praecipue cognoscunt, ad te frequentius spiritualibus oculis respiciunt, te perditam sollicitius requirunt, secundum te, iter suum dirigunt. Tu namque, Virgo piissima, recte viuere cupientes, exemplis tuis diriges, errantes reducis, & periclitantes ad portum salutis deducis.

3. Tu vera *Stella maris*, stellis ceteris praeminens altitudine, quia vniuersis caelis & creaturis altior es: Nam ceteri Sancti migrantes à corpore, recipiuntur inter Choros Angelorum; sed tu, Virgo Maria, quadam excellenti maiestate gloriae exaltata es super omnes Choros Angelorum, & super omnes ordines beatorum. Tu Virgo Maria, es *Stella maris* ceteris praeminens immobilitate, quoniam quasi in centro firmamenti constituta, ceteris vario motu modò ad Ortum Solis, modò ad Occasum tendentibus, tu immobilis persistis: Videmus namque filios hominum, de quorum numero ego miserabilis sum, suam mobilitate quotidie corrumpi: sed tu immobilis & immutata permanes: ideo castellum nominaris, fundatum supra firmam petram, quae est Christus.

4. Adiuvā me, benignissima Virgo Maria, quia in hoc mari æstuoso, fluctuo totā die, & per devia incedendo magnis & infinitis periculis quatuor. Illumina me radio claritatis, dirige me per rectam semitam; ut ad portum salutis valeam pervenire. Defende me ab omni periculo mentis & corporis; ut securē veniam ad iudicium, auditurus misericorditer à piissimo Iudice sententiam salutarem. Amen.

Contemplatio XVIII.

Virgo Maria, Aurora.

1. **R**esplendens *Aurora* es, pretiosissima Virgo Maria, *Aurora* es alba *Cant. 6.*
 Rab albedine dicta, quia tota candida es, & fuisti interiùs, & exteriùs per sanctimoniam carnis, & spiritus. Tu *Aurora* ab *auro* dicta; quia fuisti aurum mundum virgineæ puritatis, aurum ignitum ferventissimæ charitatis, & aurum optimum sapientiæ & bonitatis. Tu, Virgo Maria, *Aurora* es, id est, *auræ hora*, quia adduxisti ætatem auream, id est, tempus misericordiæ. Tu, Virgo Maria, *Aurora* nominaris, quasi *aurorans*; nam precibus & meritis tuis sanctissimis, percipimus auroram, id est, refrigerium & rorem gratiæ, contra incentivum vitiorum. Tu, Virgo Maria, *Aurora* es, quasi *aurorans*: quia in conceptu tuo descendit in te Filius Dei, *Iudith. 6. 38.* quasi ros. Tu es illa concha quam Gedeon, id est, Christus implevit rore expresso de vellere, & de illa plenitudine, quam contulit, omnes accepimus gratiam pro gratia. *Ioan. 1. 16.* Ad hæc enim non cessas ipsa cordis concava per humilitatem rore gratiæ adimplere, & Christus, qui dicitur ros, venit per te in humanum cor.

2. Tu, Virgo Maria, *Aurora* es quasi *avium hora*, quia sicut tunc aves incipiunt garrere & modulari, sic etiam per te incipiunt fideles & tibi devoti cantare laudes Deo, & tibi, facis etiam obmutescere aves nocturnas, id est, demones, & malos ac obstinatos peccatores; quia per te obstructum est os loquentium iniqua. Tu, Virgo Maria, es *Aurora*, quæ noctem finit, & diem inchoat: sic tu fuisti finis legis, & inchoatio gratiæ. Nox quidem longa fluxerat ab Eva usque ad te, quam finisti in beatissimo ortu tuo: nam per Evam nox præcessit, quia à muliere factum est initium peccati; & per te *Ecel. 25. 33.* dies appropinquavit. Ante te, Virgo Maria, erat nox ignorantie, & nox culpæ; sed, tu inchoasti lucem novi Testamenti contra noctem legis, & illum peperisti, qui manifestavit veritatem contra noctem, & lucem gratiæ contra noctem culpæ, & sic per te, populus, qui ambulabat in tenebris, *Isa. 9. 2.* vidit lucem magnam. Vnde sicut impossibile est de tenebris noctis venire ad lucem diei, nisi mediante aurorâ, sic impossibile est de tenebris vitiorum venire ad lucem gratiæ nisi mediante intercessione tuâ.

3. O clementissima Virgo Maria, intercede pro me miserabili peccatore, tenebris peccatorum detento. Educ me de istis tenebris, vt venire possim ad lucem gratiæ, vt luce inaccessibili fruatur per infinita sæculorum sæcula. Amen.

Contemplatio XIX.

Virgo Maria, Lux.

O Lucidissima Virgo Maria, de te intelligi possunt, quæ dicta sunt à Deo, *Fiat lux, & facta est lux*. Tu, Virgo Maria, Lux es propter speciositatem tuam: quia nulla creatura post Filium tuum vnquam fuit, nec erit, pulchrior te; quia speciosior es Sole, & super omnem dispositionem stellarum, luci comparata inueniris prior. Nam nihil purius luce reperitur, in qua tua simplicitas & innocentia denotatur: nihil luce iucundius, in qua operum tuorum munditia demonstratur: nihil luce clarius, in qua lumen exemplorum tuorum ostenditur; & nihil humanæ vitæ iucundius luce, in qua doctrina & sapientia verborum tuorum notantur: vt munditia ad virginitatem, claritas ad opinionem, gratia ad sermonem referatur.

2. Tu, Virgo Maria, lux es propter claritatis diffusionem absque tui diminutione, quia peperisti Christum sine corruptione. Tu, Virgo Maria, lux es propter tuam incorruptibilem puritatem, quia inquinari non potes; nihil enim inquinatum incurrat in te. Tu, Virgo Maria, lux es, quia visibilia facis ea, quæ prius non apparebant, ante faciem Filij tui misericorditer statuens illos, qui prius longe stabant ab eo. Et sicut lux angustissima foramina illustratione suâ manifestat in domo existentibus; sic tu, Virgo Maria, minima peccata, tuæ gratiæ infusione facis perceptibilia iis, qui conuertuntur ad tuum Filium benedictum. Et sicut lux illuminat oculos; sic tu, Virgo Maria, oculos, id est intellectum & affectum, qui sunt oculi animæ, videlicet intellectum cognitione Dei, & tui, & affectum dilectione Dei & proximi. Vnde *Vidi Deus lucem, quod esset bona; & diuisit lucem à tenebris*: sicut enim nullus bonus nisi Deus solus, sic nulla femina tibi comparata inuenitur perfecta. Nam sicut Deus est super omnia benedictus, sic tu, Virgo Maria, super omnes mulieres es benedicta.

3. Tu, Virgo Maria, figurata es per illam lucem primariam quæ creata creditur ibi, vbi Sol oritur; de qua factum est corpus Solis: sic de tua substantia formatum est corpus Filij tui benedicti, qui est lux vera illuminans omnem hominem venientem in hunc mundum. Tu Virgo Maria, es illa lux, quæ Iudæis oriri visa est. Emitte Lucem tuam, Virgo clarissima, quæ me tenebrosam peccatorem illuminet, & clarum me reddat ante aspectum Filij tui benedicti, vt stolâ immortalitatis indui merear per infinita sæcula sæculorum. Amen.

CON-

Contemplatio XX.

Virgo Maria, Dies.

1. **A**ppellauit *Deus lucem diem*, beatissima Virgo Maria, quoniam scilicet placuit ei quod, te Mariâ Virgine nascente, inciperet mundo diescere tenebroso; vt per diem de die, id est, Filium tuum benedictum de te matre incorruptâ & intactâ, illuminaret omnem hominem venientem in hunc mundum. Vnde sicut quasi per trium horarum spatia, scilicet mane, meridie, & vespere, dies completur: sic quibusdam gradibus meritum, quasi quibusdam spatiis horarum, completa est perfectio claritatis & sanctitatis tuæ: vt de te dicatur, *Vespere, mane, & meridio narrabo & annuntiabo.*

Gen. 1.

Isa. 1.

9.

Psalm.

14. 18.

2. Huius diei mane, quando celebriq; inter homines fieri solet saluatio, designatum est, quando dictum est tibi *Aue*, & ab ista salutatione quasi inchoauit aurora huius diei coruscare, & incepisti mundo diescere. Quinque millia annorum ambulauerant in tenebris & caligine peccatorum, & ignorantia, pro delicto primorum parentum: & interea respexit Dominus humilitatem tuam, & tanquam domesticam & familiarem, quasi ex parte sua te fecit ab Angelo salutari. Tunc enim Dominus mandauit salutes Iacob, id est, tibi Virgini gloriosa, quæ simul & semel vitia omnia supplantasti. Quasi meridies fuit huius diei quando dicta es *plena gratia*: quia sicut meridies plenitudinem caloris habet & lucis, sic tu, gloriosissima Virgo Maria, tunc te ostendisti recepisse omnem plenitudinem charismatum, quæ animam tuam illuminauit per cognitionem, & calefecit per amorem. Vespere fuit huius diei quando dictum est tibi, *Dominus tecum*, qui à primis parentibus recesserat per peccatum, & tu, Virgo Maria, dixisti, *Eccce Ancilla Domini, fiat mihi secundum verbum tuum*: & sic, Virgo Maria, per fidem concepisti. Vnde sicut ad vespere Sol terris propinquior efficitur: sic in verbis prædictis ventris tui virginici hospitio Deus miraculose illabitur.

Psalm.

43. 5.

Luc. 1.

28.

Ibid. 38.

3. Et sic factum est *vespere & mane dies vnus*, id est, singularis: vespere in refrigerio carnis Christi, mane in illuminatione Spiritus sancti, vespere in fine veteris Testamenti, mane in initio noui, dies vnus, id est, singularis & solus in quo Creator hominis factus est Filius hominis, assumendo nubilum nostræ carnis. Duo dies in die vna, sicut duo in carne vna, tu Christo carnem offerens; Christus carnem induens. Et sic in te sine exemplo virginitas fuit, & in Filio singularis & vnica humilitas. Huius diei sunt horæ duodecim, per quinque & septem diuisæ: quinque pertinent ad sensus tui corporis virginalis, & septem ad mentem tuam virginalem, propter septem animæ tuæ gratias, quæ de fonte Spiritus septiformis præcesserunt riuulo vni formi. *Eccce*

Gen. 1. 3

4. Fac me tuis deprecationibus, Virgo Maria piissima, discere per gratiam, ne ulterius nocte caliginosa detinear vitiorum, sed ad diem perueniam non vesperscentem; & cum eo maneam per infinita seculorum secula. Amen.

Contemplatio XXI.

Virgo Maria, Nubes.

Psal.
104. 39.

1. **C**aritate plenissima, Virgo Maria, de te scriptum est, *Expandit nubem in protectionem eorum, & ignem ut luceret eis per noctem.* Tu, benignissima Virgo Maria, es illa *Nubes* à Deo facta & ordinata, ut peccatores protegeres, & defenderes: duo enim officia à Deo tibi data sunt: quia sicut *Nubes* protegit nos, & defendit à fervore Solis: sic tu, piissima Virgo Maria, tanquam *Nubes* protegis nos à fervore iræ, & vindictæ Solis iustitiæ: & idèò tanquam suspensa inter Terram & Solem, nos illuminas tuis beatissimis orationibus & exemplis tanquam ignis; quoniam tu es lux ostendens lucem virtutum. Et etiam nos protegis contra diabolum, quasi igneus murus, & contra vitia & peccata.

Luc. 1.
28.

2. Tu, Virgo Maria, es illa *Nubes* aquosa per gratiarum & omnium charismatum abundantiam: idèò dicta es *plena gratiâ*. Tu, Virgo Maria, es illa *Nubes*, quæ vento ducitur & agitur, id est, gratiâ Spiritus sancti, quæ te traxit, reduxit, circumduxit, docuit & custodiuit; onerata aquis sapientiæ salutaris, nam Spiritus sapientiæ docuit te Angelo respondentem, Spiritus pietatis traxit te ad Elizabeth, Spiritus intellectus docuit te, & te duxit cum benedicto Filio tuo descendere in Ægyptum. Tu, Virgo Maria, es illa *Nubes* humectans, & fecundans fructus terræ, id est, refrigerans ardorem concupiscentiarum, & fecundans homines ad bene operandum. Ardorem etiam Solis iustitiæ, id est, iram & indignationem, tuis sanctissimis precibus modificas & refrigeras; ne peccantes illicò feriat. Tu, Virgo Maria, *Nubes* lucida es per gratiæ illustrationem, & sanctæ conuersationis exemplum. Tu *Nubes* rubicunda per pulchritudinem naturalem, & veritatem virginalem, ferventissimam charitatem, & patientiam singularem. Tu, Virgo Maria, es *Nubes* nigra per humilitatem; quæ dicitur quasi *humilata*: & etiam *Nubes* nigra, id est, obscurata tribulatione, & denigrata ex compassione, & doloribus Filij tui benedicti patientis: quando Filij Dei, & tui, non erat species, neque decor.

3. Ego verò, sacratissima Virgo Maria, ardorem nimium sentio in cogitatione & opere, ardorem, scilicet non amoris, sed peccati: ad quem me quotidie inflammat perfidus & antiquus hostis. Aduva me, gloriosissima Virgo Maria; obumbra me & refrigera gratiâ tuâ ab æstu tanti ardoris, & impetra mihi tuis deprecationibus, ardorem tui amoris, ut sub ymbra utriusque hinc vivendo, terram possideam viventium in æternum. Amen.

Contemplatio XXII.

Virgo Maria, Terra.

1. **F**ructifera & benedicta *Terra* tu es, beatissima Virgo Maria, quia tu es illa *Terra* de qua formatus est homo, scilicet nouus Adam Iesus Christus Filius tuus benedictus. Tu es illa *Terra* fluens melle virginitatis, & lacte fecunditatis. Tu es illa *Terra* promissionis, promissa Iudeis, reddita Christianis. Tu es illa *Terra*, in qua qui seminat, centuplum accipiet: qui enim ibi seminat, scilicet orationes, & exempla salutaria in presenti vita, multam retributionem recipiet: quia tu, benignissima Virgo Maria, cōuertis quosdam ab errore viæ suæ, quosdam pacificas benedicto Filio tuo, quibusdam das gratiam continendi; facis quosdam humiles, quosdam largos, quosdam misericordes, quosdam pacificos; quibusdam largiris vestimenta virtutum, & quosdam sapientes constituis. Ista est, Virgo Maria, centuplatio eorum, qui seminant in tali terra, qualis tu es.
2. Hanc *Terram* solus Deus inhabitauit, solus eam coluit, & ipsius Filium ceu *Terra* benedicta, fructificasti; vt de te dicatur, *Terra dedit fructum suum*. Et benè suum; quia nec *Terra* alia digna extitit portare talem fructum; nec talis fructus *Terræ* alij competebar: Ideò dicitur, *fructum suum*, id est, sibi congruum: quia tibi soli Virgini congruebat parere Deum, & soli Deo Matrem habere Virginem. Et sicut terra maledicta in opere Adam, fructus dedit maledictionis, sic è conuerso, tu *Terra* benedicta dedisti fructum benedictum. Tu igitur *Terra* benedicta dedisti fructum; sed non vendidisti, quia non habebamus pretium. Dedisti namque fructum in tempore suo, id est, in tempore gratiæ. Nec solum, piissima Virgo Maria, semel dedisti fructum, sed iugiter das ipsum peccatoribus remedium.
3. Tu es illa *Terra*, de qua dicitur, *Domini est Terra*, scilicet illius propria, & plenitudo eius, id est, virtutes, & dona gratiarum: quia dicere potes, *Gratiâ Dei sum id, quod sum*. Tu es illa *Terra*, de qua est orta veritas, scilicet humanæ carnis, quam sibi vniuit benedictus Filius tuus, dante Deo benignitatem nostræ redemptionis. Tu, Virgo Maria, es *Terra* plena per mansuetudinem & iustitiam, & montuosa per summam excellentiam, & conuallosa per duplicem humilitatem. Tu, Virgo Maria, *Terra* es, in qua omne ædificium fundatur, quia quidquid boni facere volumus, in te fundare debemus per fidem Incarnationis, cuius ministra fuisti. Et sicut ferè quidquid viuit, viuit de Terra; sic, quidquid viuit per gratiam, viuit per te Virginem Mariam, quæ genuisti vitam.
4. Adiua me, gloriosissima Virgo Maria, vt omnes cogitationes, locutiones, & actus mei fundentur in te, vt hic viuendo per gratiam, in futuro vitam in *Terra* viucentium. Amen.

Ecc ij

Contemplatio XXIII.

Virgo Maria, Mons.

- Psalm.* 1. **M**ons es dicta, beatissima Virgo Maria, ab eminentia omnium charismatum, & virtutum, *Mons*, inquam, in quo beneplacitum fuit Deo habitare in eo nouem mensibus corporaliter, & in quo, secundum quod Deus, *habitabit in sinem*, id est, sine fine, sine termino, & sine mensura. Tu, Virgo Maria, es *Mons coagulatus* per integritatem virginitatis, *Mons pinguis* pinguedine charitatis, adipe deuotionis, vbertate fecunditatis, oleo misericordiae, & pietatis, & melle contemplationis. Tu es *Mons*, in quo debent adorare veri Adoratores. Tu, Virgo Maria, es ille *Ioan. 4. 20. Isai. 2. 2.* *Mons domus Domini, eleuatus super omnes colles*, id est, Sanctos; quos omnes dignitate transcendis, & qui omnes inferiores te sunt. Tu, Virgo Maria, es *Mons preparatus in nouissimis diebus, mons domus Domini in vertice montium*, scilicet eleuatus super omnia, ad quem fluunt omnes Gentes.
2. Tu, Virgo Maria, es *Mons* latus in pede per humilitatem, quae est fundamentum tuum, latius & profundius quam omnium Sanctorum. Tu, Virgo Maria, es *Mons* angustus in cacumine propter Filij Natiuitatem, cuius modus incomprehensibilis est, & sine exemplo singularis. Sicut *Mons* exaltatur super terram, sic tu, Virgo Maria, exaltata fuisti super omnes puras creaturas in impragnatione benedicti Filij tui, per quem fuisti Virgo Mater. Sicut enim *Mons* quidquid venit de sursum, prius suscipit, & inde descendit ad valles propinquas; sic tu, gloriosissima Virgo Maria, in Incarnatione benedicti Filij tui, suscepisti prior omne datum optimum, & de plenitudine tua accipiunt humiles propinquiore tibi per veram dilectionem. *Mons* namque est receptaculum ferarum: quia, *Psalm. 103. 1.* *Montes excelsi ceruis, petra refugium*. Sic tu, piissima Virgo Maria, es tutissimum refugium illorum, qui fugiunt a facie arcus, id est, diuini iudicii; & illorum, qui mundum fugiunt; quia de mundo non sunt; quos mundus exagitat detractionibus, & maledictis. Tu, Virgo, es *Mons Oliueti*, sic dictus propter copiam oliuarum: sic tu, Virgo Maria, copiosissima es in misericordia copiosa; quia Deus te cumulauit plenitudine gratiarum, & fecit te Matrem misericordiae.
- Matth. 2. 38.* 3. Tu, Virgo Maria, es ille *Mons*, de quo *sine manibus*, id est, opere virili, abscissus est ille lapis, id est, Christus Iesus Filius tuus benedictus, quem sacratissima Virgo Maria, exora deuotis precibus pro me miserrimo peccatore qui non sum mons per eleuationem mentis ad Deum, sed potius sum vallis per inclinationem ad mundum, & ad ea, quae in mundo sunt: vt suffragantibus tuis precibus, & meritis, ad *Montem* qui est Christus, valeam peruenire. Amen.

Contemplatio XXIV.

Virgo Maria, Fons.

1. **F**ons patens es, benignissima Virgo Maria, patens amicis & pœnitentibus per misericordiam & charitatem, & subministrans plenitudinem gratiarum. Tu es ille fons, *Qui ascendebat de terra irrigans superficiem terre.* Sicut enim fons ille est abyssus aquarum multarum, ex qua fontes & flumina oriuntur: sic tu, benignissima Virgo Maria, es abyssus multarum gratiarum, ex qua peccatores hauriunt gratiam incessanter. Tu, Virgo Maria, es *Fons signatus* à tota Trinitate; *Fons signatus*, quia Christum ita signasti quod diabolum, & multos Angelos latuit eius miraculosa Incarnatio. Tu, Virgo Maria, es ille *Fons Siloe, cuius aqua fluunt cum silentio*, id est, intermissiue; quia tua beneficia non iugiter fluunt ad quemlibet; sed quando vis & quantum vis. Et sicut fons quantum descendit, tantum ascendere potest: sic tu, humillima Virgo Maria, inferius omni creaturâ descendisti per humilitatem; & exaltata fuisti in conspectu Dei in tua Assumptione beatissima super omnem creaturam puram post benedictum Filium tuum.
2. Tu, misericordissima Virgo Maria, es fons scaturiens, ab imò sursum lapillos eleuans, sed non grandes lapides; lapillos eleuans, scilicet humiles peccatores, quos eleuas de profundo peccatorum ad statum gratiæ, sed non eleuas grandes lapides, id est, obstinatos peccatores, & grandes superbos in oculis suis: & idè de te dici potest, *Esurientes gratiam conuersationis, Reple bonis, & diuites*, qui non credunt se gratiâ indigere, *dimittis inanes.* Et sicut fons modicus longo fluente innotescit: sic tu, clementissima Virgo Maria, modica es per exuberantem humilitatem, sed longa fluente tui fontis sunt maxima copia beneficiorum, quæ deriuas & exhibes omnibus creaturis inuocantibus te deuotè. *Fons aquam prius latentem in terra manifestat*, sic dulcissima Virgo Maria, per te apparuit nobis benignitas & humanitas Saluatoris mundi, qui est terra uiuentium, & nobis erat Deus absconditus. Tu, Virgo Maria, pietate plenissima, fons nominaris, quia sicut fons habet temperatam aquam quolibet tempore; sic, piissima Virgo Maria, temperatam gratiam habes, quâ feruorem refrigeras uitiatorum, & calefacis corda peccatorum congelata, & spem ueniæ tribuis desperatis. Ex te beatissimo fonte emanant riui gratiarum, recreantes quoscumque ex eis haurire humiliter aquam gratiæ cupientes.
3. O fons pietatis & misericordiæ, fons dulcedinis ac clementiæ, irriga terram aridam & siccam cordis mei: fluant riui gratiarum ad me immundissimum peccatorem, abluantur sordes animæ meæ; ut omnibus mundatis, fontem uiuum & indeficientem perenniter apprehendam.

Amen.

Ecc iij

Contemplatio XXV.

Virgo Maria, Puteus.

Cant. 4. 1. **M**isericordissima Virgo Maria, *Puteus aquarum viuientium* potes
15. appellari: quia à potatione *Puteus* dicitur; & de te scribitur; *Qui*
Ecc. 24 *biberit me adhuc sitiet.* Puteus namque es, Virgo Maria, aquarum viuientium,
29. id est, gratiarum & doctrinarum; quæ vitam præstant hîc per gratiam,
 & per gloriam in futuro. Puteus profundus est: sic tu, prudentissima Virgo
 Maria, profunda es per sapientiam inattingibilem, & per gratiarum mi-
 ram profunditatem, quam fragilitas humanæ conditionis non attingit.
 Puteus obscurus est: sic tu beatissima Virgo Maria, obscura es, quia nec
 oculus vidit, nec auris audiuit, nec in cor hominis ascendit, nec lingua
 hominis effari potuit, quantum gratiæ, quantum charitatis, quantum
 pietatis largitus est Deus gloriôsæ Virgini Mariæ.

2. Puteus formatur lapidibus ab imo vsque ad summam: Isti lapides in te
 sunt, Virgo Maria, virtutum vniuersitas, bitumine charitatis, & cemento
 humilitatis indissolubiliter colligata: quibus virtutibus, tu Virgo Maria,
 eras confirmata in omni bono. Hunc puteum foderunt multipliciter Pa-
 tres antiqui, tuam historiam sub figuris & ænigmatibus reuelando: inter
 quæ omnia maximè profundum est mysterium Incarnationis. Tu, bene-
 dicta Virgo Maria, *Puteus* altus es, super quem requieuit & quasi humiliatus
Isa. 4. *g. 11.* refedit Iesus Christus Filius tuus benedictus, fatigatus ex itinere nostræ re-
 demptionis. Puteus in viscera terræ descendit; sic tu, gloriosa Virgo Maria,
 profundius omni creaturâ descendisti per humilitatem: ideo copiosius
 plena fuisti à Spiritu sancto, plenitudine gratiarum.

3. O clementissima Maria, quomoddò ego miserabilis peccator extrahere
 potero aquam à tali Puteo: scio quòd *Puteus* altus est, id est, profundus; ad
 quam profunditatem, humanæ conditionis fragilitas non attingit. Sed
 quid faciam ego iniquissimus peccator, gloriosissima Virgo Maria: quia
 sitio, & aquâ istâ, id est gratiâ, indigeo, & non habeo, cum quo hauriam
 istam aquam, da mihi piissima Virgo Maria, situlam seu hydriam, cum
 qua hanc aquam haurire valeam de isto beatissimo Puteo, hydriam seu situ-
Psalm. *41. 3.* lam coacauam humilitate, quæ capax est gratiæ, & sola meretur impleri:
 vt tibi, Virgo Maria, dicam per humile cordis mei desiderium, *Situi in te*
anima mea, quæ es fons & *Puteus* aquæ viuæ. Da mihi hydriam humilitatis,
 vt possim recogitare omnes annos meos in amaritudine animæ meæ, &
 loqui ad te, licet sim puluis, id est, imbecillis; & cinis, id est, consumptus
 peccatis; vt hîc istâ aquâ repletus, aquam vitæ habeam in æternum. Amen.

Contemplatio XXVI.

Virgo Maria, Flumen.

1. **T**V flumen es, beatissima Virgo Maria, de quo dicitur, *Fluminis impetus lætificauit Ciuitatem Dei*. Tu, Virgo Maria, lætificas Ciuitatem Dei, id est, utramque Ecclesiam & Fidelem animam. Et sicut flumen loca vicina fecundat; sic tu, bonorum largissima Virgo Maria, fecundas conscientias tibi per amorem adherentes. Fecundas namque eas verbis sanctarum Scripturarum, cogitationum & meditationum, floribus honestorum desideriorum, foliis sanctorum verborum, fructibus bonorum operum, virore vernantium exemplorum. Et sine isto flumine omnia arescunt, & sicut flumen nutrit pisces, & maximè squamosos; sic tu, Virgo Maria, nutris viros iustos, habentes squamas & pinulas virtutum: in hoc sanctissimo *Flumine*, scilicet in te natus est ille *Piscis* vnicus, & sempiternus Iesus Christus Filius tuus benedictus; qui quasi piscis, captus est in aquis generis humani, hamo nostræ mortalitatis, vt vitam nobis conferret sempiternam. In quo inuentus est stater redemptionis nostræ. *Piscis* enim dicitur à *pascendo*; quia caro eius noster est cibus. Flumen existens in naui vehit: sic etiam, tu Virgo Maria purissima, existens in naui Ecclesiæ sanctæ Catholicæ per fidem veram, vehis ad portum salutis æternæ.

2. Tu, Virgo Maria, *Flumen* es Phison, habens ortum à Paradiso & in arenis eius gemmæ pretiosæ inueniuntur: sic tu, sacratissima Virgo, ortum habes ab eo, qui est Paradisus deliciarum, & in te gemmæ pretiosæ inueniuntur, & dona gratiarum, per quarum opera præmia æterna donantur. Flumen in suo ortu paruum est, sed postea multum augmentatur: sic tu, inuiolata Virgo Maria, parua fuisti in principio per humilitatem; sed tandem supergressa es Angelicam dignitatem. Nec ex augmento alueum, qui est misericordia, vnquam mutasti: sed iugiter defluis: quia in gratia sancti Spiritus perseverans, continuò nos irrigas: Tu, incontaminata Virgo Maria, es illud *Flumen Iordanis*, in quo Naaman septies se lauando curatus fuit à lepra, quia peccatores à lepra peccati curantur, si septies in te lauentur; primò scilicet tibi obsequium impendendo, secundò nomen tuum magnificando, tertio totam spem in te ponendo post Deum, quarto amicorum tuorum defectus supplendo, quinto per orationem deuotam se tibi humiliter ostendendo, sexto sua negotia tibi commendando, septimo omnes virtutes optando.

3. O misericordissima Virgo Maria, tuis deprecationibus laua me à lepra peccati, in tuo sanctissimo *Flumine*; & mundatum me representa tuo Filio benedicto, vt gloriam possideam sempiternam.

Contemplatio XXVII.

Virgo Maria, Aquæ-ductus.

^{Ecol. 14.} ^{41.} **T**V, sacratissima Virgo Maria, omni pietate plenissima, es quasi *Aqua ductus exiens à Paradiso*. Tu, namque, Virgo Maria, exiisti de duplici Paradiso. Nam tamquam aquæ-ductus à Patre, qui est Paradisus cælestis, exiisti; per creationem, à quo nobis attulisti aquam viam, id est Iesum Christum Filium tuum benedictum Deum & hominem. Exiisti, Virgo Maria, à Paradiso terrestri, hoc est ab Ecclesia militante per mortem corporis directæ in cælum; velut quidam *Aqua-ductus* aquas miseriarum & tribulationum totius generis humani illuc ducens, benedicto Filio tuo exponens, & pro eis intercedens.

2. Tu, benedicta Virgo Maria, es *Aqua-ductus* longissimus, excellentiâ meritorum: Nam vehementis desiderij feruore, deuotionis puritate, & orationis assiduitate *Fontem* attingis tam sublimem, cuius plenitudinem tamquam *Aqua-ductus* de corde Patris excipiens, nobis dedisti illum non prout est, sed prout capere poteramus. Verè longissimus *Aqua-ductus* fuisti, cuius summitate aquarum quæ super cælos sunt, *Fontem* potuisti attingere, vt haurires super Angelos, & refunderes hominibus aquam viam, id est, fluentia gratiarum; quarum nondum norant homines *Aqua-ductum*.

^{Ecol. 15.} ^{2.} 3. Tu, gloriosissima Virgo Maria, es *Aqua-ductus* integerrimus, per inuiolatam fidem; mundissimus, per integritatem & omnimodam castitatem occultus per solitudinis dilectionem; concavus per veram humilitatem, fecundus, id est, abundans aquis, per gratiarum plenitudinem; iocundus per æternitatis desiderium & amorem, non plumbeus, sed magis aureus, per Regiam nobilitatem & eximiam charitatem. Per hunc *Aqua-ductum* venit ad nos Christus occultus in tuo utero virginali; vt mysterium diabolo celaret. Ad hoc venit, vt nos mundaret, reficeret, & potaret aquâ sapientiæ salutaris, sicut per occultum aquæ-ductum deducitur aqua ad necessaria ciuitatis; per hunc etiam aquæ-ductum, quod de fonte superno hauris Virgo Maria, assidue influis vinum compunctionis, lætitiæ & deuotionis in cellarium nostræ mentis. Tu, clementissima Virgo Maria, es ille aquæ-ductus, quem præcepit Holofernes incidi; quia per illum influabat fons quidam in ciuitatem Bethulæ, qui interpretatur *Domus doloris*. Tu igitur, Virgo Maria, pretiosissima fuisti velut aquæ-ductus in Ecclesiam & Fidelem animam deriuans dona gratiarum, quæ diabolus incidere conatur cum tuum auxilium nobis auferre nititur. Inuidet autem non quoad te solum, sed quoad nos, & hoc maxime, quia es aquæ-ductus superior, quia per te deriuatur ad nos gratia à Deo.

4. Ego

DE BEATA VIRGINE.

405

4. Ego verò, benignissima Virgo Maria, sum domus doloris, propter multitudinem peccatorum meorum, propter quæ aruit cor meum. Fluat igitur ad me miserimum tua gratia, Virgo pia, quæ fecundetur cor meum & irrigetur, ut fontem viuum æternaliter apprehendam. Amen.

Contemplatio XXVIII.

Virgo Maria, Piscina.

1. **P**iscina, quæ est aquarum collectio, tu es, excellentissima Virgo Maria, quia sicut *Piscina* est collectio aquarum sine piscibus, sic tu, splendidissima Virgo Maria, es velut *Piscina*; quia in te fuit congregatio omnium aquarum, id est, gratiarum, & scientiarum sine piscibus mundanarum curiositatum. Tu, speciosissima Virgo Maria, es illa *Piscina* probatica, in quam *Angelus Domini* descendebat secundum tempus, & mouebatur aqua, *104. 5. 3.* & sanabatur unus. Tempore enim Incarnationis, descendit *Angelus* magni consilij in te, Virgo Maria, & *mota est aqua*: quoniam ad nouam salutationem turbata fuisti, Virgo Maria, & *sanatus est unus*, id est, quotquot crediderunt Deum trinum & vnum, & *uni*, id est, Christo, adhæserunt per fidem suæ Incarnationis. Et idem de te cantatur intemerata Virgine Maria;

*Tu piscina puritatis,
Rore plena pietatis,
In quam Deus maiestatis,
Voluit descendere.
In quam reus est conuersus,
Si contritus est reuersus,
Se disponat eris tesus,
A peccati vulnere.*

*Ecl. in
Nyman*

2. Tu, purissima Virgo Maria, Piscina es quinque porticus habens, id est, quinque principalia genera misericordiarum; primum, quod conuertis errantes in via; secundum, quod illuminas in tenebris ambulantes, cum sis *Stella* & *Luna*; tertium, quod viuificas mortuos, cum sis *vena vitæ*, id est, dilectionis; quartum, quod spem infundis desperatis; idem dicis, *In me est omnis spes vitæ*; quintum, quod multis, quorum lata erat sententia, impetrasti ab altissimo Filio tuo spatium pœnitendi. O misericordissima Virgo Maria, in iis quinque porticibus iacebat multitudo languentium, cæcorum, claudorum qui dirigi, aridorum qui humectari desiderabant, & expectabant aquæ motum, id est, motum tuæ misericordiæ, ut sanarentur à languoribus suorum peccatorum. *Ecl. 2. 4. 24. 25.*

3. Sed, benignissima Virgo Maria, ego infirmus sum non solum triginta octo annos habens in infirmitate mea, imò etiam quinquaginta: & hæc

Fff

infirmas ad mortem est. Sum namque cæcus, viam salutis nolens aspice-
re: sum claudus, nolens per viam mandatorum Dei incedere, & sum ati-
dus, non habens humorem alicuius deuotionis aut contritionis. Multis
infirmis subiacco peccatorum; & in hoc corruptissimo meo corpore
iacet languens misera anima mea. Non inuenio qui me languentem mittat
in *Piscinam*, vt sanari possim: & vt veriùs loquar, tantæ indurationis &
rebellionis sum, quòd frequentius & inuitatus vt intrarem, intrare distuli,
malens hanc miserabilem infirmitatem & periculosam sustinere. Adiua
me, clementissima Virgo Maria, tuis sanctissimis intercessionibus, vt
Piscinam intrem & sanitatem recipiam ab istis periculosis infirmitatibus
peccatorum; moueatur aqua, id est, tua misericordia, & veniat super me
miserum, vt me sic dignetur curare, vt viuere valeam in æternum. Amen.

Contemplatio. XXIX.

Virgo Maria, Arca.

- I**ncod. 1. *Virgo Maria, tu Arca es fœderis Domini*, quia fœderasti nos Tri-
nitati. Nam Patri attribuitur maiestas, Filio sapientia, Spiritui
1. 10. sancto benignitas sive bonitas. Patrem offenderamus per superbiam, Fi-
Num. lium per insipientiam, Spiritum sanctum per malitiam: quæ omnia in pri-
10. 33. mo peccato concurrerunt; scilicet superbia, quæ Adam voluit esse sicut
Deus; insipientia, quæ credidit fieri sicut Deus; malitia, quæ contradixit
ei quod præceperat Deus, vel consensit ei, quod prohibuerat Deus. Sed tu,
beatissima Virgo Maria, *Arca fœderis* fuisti: nam per humilitatem reconci-
liasti nos Patri, quoniam ipse respexit humilitatem ancillæ suæ. Filio nos
vniuisti, & ianxisti, quoniam credendo ipsum concepisti, & per te Spiritu
Inc. 1. sancto nos repleuit, qui te impleuit, vt de plenitudine tua omnes accipe-
43. remus gratiam pro gratia. Sic, gloriosissima Virgo Maria, *Arca fœderis*
es, quia per te Dei fœdus ad nos firmatum est: nam antequam fieret hæc
Arca, id est tu, Virgo Maria, eramus inimici, & firmatum erat Chaos ma-
gnum inter nos, & Deum; vt, qui vellent hinc transire ad eum non pos-
sent, & ideo per te Virginem Mariam venit Dei Filius ad nos; factus est
Inc. 16. *Emmanuel*, id est, *nobiscum Deus*, vt tam Filius quàm tu, Mater inuiolata
26. reduceres nos ad Patrem, & reduxisti, & sic fœdus sempiternum concla-
Matth. matum est, scilicet pax hominibus bonæ voluntatis: quia *Christus est pax*
1. 32. *nostra, qui fecit vtraque vnum*, id est, & quæ in cælis, & quæ in terris: in se
Ephes. 2. reconcilians ima summis.
14.
2. Cor. 2. Tu, piissima Virgo Maria, es *Arca propitiationis*: quia Mater es &
1. 3. Regina misericordiæ: Mater illius, & Filia, qui est Pater misericordiarum,
1. Ioh. 2. & Deus totius consolationis, & qui est propitiatio pro peccatis nostris.
1. Tu es, Virgo Maria, *Arca propitiationis*: quia tuis precibus, meritis, &

intercessionibus propitiatur Dominus omnibus iniquitatibus nostris; cū enim pro peccatoribus tuo benedicto Filio te semper opponas, nihil tibi potest negare tuus benedictus Filius, aut enim iubet nato, aut oras Patrem, & semper exaudiri mereris pro tua reuerentia.

3. Tu, sancta Virgo Maria, es *Arca Testamenti*, de qua scribitur. *Aper-* *Apoc. 11.*
tum est Templum Domini in Cælo, & visa est Arca Testamenti eius in Templo 19.
eius. Et sicut *Arca* dicitur ab *arcano*; sic tu, Virgo Maria, es *Arca*, id est, secretum Dei: qui te Arcam clausit; clausit, & nemo aperit. In hac *Arca*, id est, in te Virgine Maria Iesus Christus custoditus & celatus fuit diabolo, *1. Cor. 2.*
& seculi principibus: quia, *Si eum cognouissent, nunquam Dominum gloriæ 3.*
crucifixissent. Tu, Virgo Maria, es illa *Arca*, in qua sunt omnes thesauri *Coloss. 3.*
sapientiæ & scientiæ Dei absconditi: idē de te canitur,

Anc dices Arca Christi,

Qua thesaurum effudi

Quo distantur omnia. 1. 1. 1.

4. O clementissima *Arca*, pauper & egenus sum: communica mihi illum thesaurum indeficientem, ut anima mea dicatur in æterna. Amen.

Contemplatio XXX.

Virgo Maria, Thronus.

1. **O** Dilectissima Virgo Maria, gloriosissimus Filius tuus te humiliter vocauit, dicens: *Veni Amica mea, & ponam in te Thronum meum.* Tu, benedicta Virgo Maria; *Thronus* nominaris: quia, sicut thronus firmiter & apte est compactus, sic tu, Virgo Maria, indissolubili internarum virtutum concatenatione compacta fuisti, quæ connexæ mutuo se roborabant. Hæ sunt Virginitas, Simplicitas, Sollicitudo, & omnes Cardinales & Theologicæ Virtutes. In hoc *Throno*, Virgo Maria, Regem æternum, qui cū in forma Dei esset, exinaniuit semetipsam, in carne humiliatum per Incarnationem beatissima suscepisti, & in te hominis formam assumpsit, in qua iudiciariam potestatem suscepit.

2. Tu, gloriosa Virgo Maria, es ille Thronus grandis, quem sibi fecit Salomon de ebore; ebur est os sine carne: sic tu, Virgo Maria, fuisti sine carne, id est, sine vitiositate aut concupiscentia carnali. Nam in carne, præter carnem vixisti. Ebur os est sine pelle: sic tu, Virgo Maria, fuisti sine pelle, quia numquam gloriata fuisti in pellibus, id est, in exterioribus: nam gloriam mundi spreuisti cum suis oblectationibus. Ebur est os sine pilis; sic tu, Virgo piissima, fuisti sine pilis, id est, sine superfluitatibus, per quos signantur fatui respectus, risus indiscreti, verba otiosa, tactus illiciti, discursus erronei; fuisti etiam sine pilis, id est, superfluitate corporali: quia

Fff ij

fuiſti pauperriſſima; Ebur eſt ſiccum: ſic tu, virtuoſiſſima Virgo Maria, fuiſti ſicca: quia in tua ſanctificatione, & Spiritus ſancti ſuperuentione, qui ignis eſt, nihil relictum eſt humoris noxi, nihil caloris aduſti; nec de ſemine viri, ſed myſtico ſpiramine concepſti. Ebur eſt os durum: ſic tu, conſtan- tiſſima Virgo Maria, dura fuiſti, quia es impenetrabilis omnibus iaculis inimici, & faciem tuam poſuiſti vt petram duriffimam ad verbera quæ par- tiebaris in benediſto Filio tuo flagellato. Ebur eſt os candidum: ſic tu, pre- tioſiſſima Virgo Maria, fuiſti candida interiùs per humilitatem, innocen- tiam, & puritatem; & exteriùs per perfectam caſtitem; Tu *Thronus* es Salomonis, ſanctiſſima Virgo Maria, qui interpretatur pacificus: quia ille Rex pacificus nouem menſibus in te *Throno* beatiſſimo requieuit. Ided di- citur *Thronus eius ſicut dies cæli*, qui æterni ſunt; & qui incircumſcripſibilis erat ſecundum diuinitatem, in te ſedit, & circumſcriptus euasiſt.

3. Accedam igitur ego miſerabilis peccator, non ad Tribunal Iudicis, ſed ad *Thronum gratiæ*; id eſt, ad te Virginem Mariam plenam gratiæ, vt gra- tiam inueniam in auxilio opportuno: hic te miſerante ac intercedente gratiam inueniam, & remiſſionem omnium peccatorum, & in futuro in- ueniam te adiuuante gloriam ſempiternam. Amen.

Contemplatio XXXI.

Virgo Maria, Thalamus.

1. **T**halamus, qui eſt locus nuptiarum, nominaris tu, ſacraſſima Vir- go Maria, quia in vtero tuo virginali, Dei Filius humanæ naturæ tanquam Sponſus Sponſæ abſque ſorditate & immunditiâ copulatus eſt. *Thalamus* tuus interior, Virgo Maria, eſt mens tua virginalis, quam tota ſancta Trinitas inhabitauit. *Thalamus* tuus exterior eſt tuus vterus imma- culatus, per quem venit Deus in mundum. *Thalamus* tuus ſuperior eſt vita beata, in qua amplexata à Sponſo tuo benediſto, reſides æternaliter. Tu, Virgo Maria, es *Thalamus* pulchrè diſpoſitus, in quo ſunt duo parietes ſeſe è regione reſpicientes, ſcilicet Virginitas, & Maternitas. Hic *Thalamus* habet profundum humilitatis, longum fidei, altum ſpēs, & latum chari- tatis. Habet etiam oſtium ab Oriente, per quod ingreſſus eſt verus Oriens, qui nos viſitauit ex alto. Fuit clauſus ab Aquilone, à quo panditur omne malum: quia nihil coinquinatum aut nociuum in te potuit intrare. Fuit grandis ad ſuſcipiendum eum, qui replet cælum & terram. Fuit excelſus: quia ab omni terrenitate remotiſſimus, & cælo propinquiſſimus, multoque decore venuſtus: *Non enim fuit tale opus factum in vniuerſis regnis*. Tale, id eſt, ſimilis, ſubtilitatis, ſimilis admirationis, ſimilis ſpecioſitatis, ſimilis famoſitatis, ſimilis fortitudinis, & ſimilis ſanctitatis, gloriæ, & ho- noris.


DE B. VIRGINE.

407

2. Fuit etiam hic Thalamus clausus & munitus tam fortiter, quod Leo rugiens ei nocere non potuit. Nec vnam quidem rimulam inuenire potuit, quæ posset introspicere subtilis astutia inimici. Fuit iste *Thalamus* admirabilis ratione eorum, quæ facta sunt in eo. Ibi enim facta est illa beatissima copula diuinæ naturæ & humanæ. Factus est Leo, Agnus; Deus, Homo; Æternus, Temporalis; Antiquus dierum, Puer; Verbum, Infans; Immortalis, Mortalis; Imensus, Paruulus; Creator, Creatura; qui fecit hoc, quod factus est; & qui primò fecerat hunc *Thalamum*, postea factus est in eodem *Thalamo*: quia homo natus est in te, & ipse fundauit te Altissimus, & processit ex te, tanquam Sponsus de *Thalamo* suo: Fuit insuper mundus iste *Thalamus*, virginitatis decore, adornatus virtutibus diuersis; quietus, quia nihil ibi fuit contradictionis inter carnem & spiritum: nihil rebellionis inter rationem & sensualitatem. Fuit aromaticus, quia repletus omnibus aromaticis speciebus, id est, donis & virtutibus; vt toti Trinitati esset odoriferus.

Psa. 86.
1.
Psalm.
13. 6.

3. O salutifera Virgo Maria, erubescio loqui de te, quia thalamum cordis habeo corruptissimum, & fœdissimum ob multitudinem peccatorum meorum: non sum dignus te nominare, de te loqui, aut cogitare. Sed compati mihi digneris orando pro me illum quem in sanctissimo tuo thalamo potasti, vt sic thalamum mentis meæ purgare à peccatis, & ornare virtutibus dignetur, vt vitam ingrediar sempiternam. Amen.



Contemplatio XXXII.

Virgo Maria, Domus.

1. **D**omus es, sumptuosissima Virgo Maria, *Domus* inquam, quam sibi fecit verus Salomon, id est, Christus Rex pacificus; quia *Sapientia* Prov. 9.
edificauit sibi Domum. Cuius fundamentum fuit suprema paupertas; quadratura fuit, timor; quia dictum fuit tibi; *Ne timeas Maria*: desiderium, quia dixisti, *Fiat mihi secundum verbum tuum*: dolor in Filij tui Passione, vnde dictum est tibi; *Tuam ipsius animam pertransibit gladius*: gaudium de tui benedicti Filij Resurrectione. Paries Orientalis, fuit spes æternæ beatitudinis, Occidentalis, fuit memoria mortis, Meridionalis, temperantia in prosperis; Aquilonaris, patientia in aduersis. Profundum Domus, fuit humilitas, longum, fidei perseverans firmitas, latum, charitas, altum spei proceritas, & excessus contemplationis. Tectum, patientia contra aëris intemperiem, & sicut domus est defensio à caumatibus, ita tu protegis à tentationibus diaboli inuisibilibus, & à pluuiis, id est, à tentationibus carnis ferè continuò spiritum impugnantibus. Ab his enim defendimur, quasi sub tegmine huius *Domus* tuæ. Ostium huius *Domus*, Virgo piissima,

F iij

fuit mentis obedientia. Per hoc ostium intrauit ille verus Rex Salomon Iesus Christus benedictus Filius tuus in te.

2. Tu, beatissima Virgo Maria, es *Domus* orationis, de qua dicit benedictus Filius tuus, *Domus mea*, scilicet tu, Virgo, *Domus orationis* es; quia tu, benignissima Virgo Maria, assidue oras pro populo Christiano. Tu, sanctissima Virgo Maria, es *Domus* continens medicinam, id est, Christum contra morbos peccatorum, & arma virtutum contra carnem, mundum & diabolum: continens ergo arma humilitatis, contra superbum diabolum; arma paupertatis, contra cupidum mundum; & arma virginittatis, contra lubricam carnem. Tu, Virgo Maria, es *Domus* speciosissima carentia omnis mali, & ornatu omnis boni, & etiam ornatu omnis virtutis interioris, & omnis bonæ operationis exterioris.

3. O beatissima Virgo Maria! miserabilis domus mentis meæ ruinatur; quia quotidie per inimicos debellatur. Plena est spurcitiis diversorum vitiorum, ignis validus ibi accensus est cupiditatis & lubricitatis. Sed, piissima Virgo Maria, confido & firmiter spero, quod in multitudinem misericordiae tuæ introibo in *Domum* tuam, per veram fidem & dilectionem ad tuum Filium & ad te. Maxima siquidem misericordia est Dei, infundere gratiam diligendi te, Matrem suam. Sic exoro, vt te diligam, & *Domum* cælestem possideam in æternum. Amen.

Contemplatio XXXIII

Virgo Maria, Porta.

Exech.
40. 22.

Ezech. 25.
33.

In Hym.
O gloria
risa.

1. O Felix cæli porta, felicissima Virgo Maria, tu es illa *Porta* quæ respiciebat ad Orientem; quæ erat clausa, & antequam tu, Virgo Maria, porta fieres, eras quasi murus continuus diuidens inter nos & Deum: & ideo pauca aut nulla commercia celebrabantur Angelorum & hominum. Sed postquam tu, Virgo Maria, fuisti facta *Porta*, factum est admirabile commercium & deinceps terrena fuerunt cælestibus sociata. Eua fuit *Porta* Occidentalis, quæ fuit principium ortus nostri ad occasum & mortem; quia à muliere initium peccati factum est, & per illam omnes moriuntur. Sed tu, superlaudabilis Virgo Maria, *Porta* fuisti Orientalis; quia per te ingressus est in mundum verus Oriens, id est, Christus; & per te nobis oritur gratia, & patet accessus ad verum Orientem, qui ortus est ex te. Tu etiam es principium ortus nostri ad vitam. Tu *Porta* cæli, quia per te cæli Rex venit in mundum: Ideo canitur de te, *Tu Regis alii ianua*.

2. Tu, clarissima Virgo Maria, *Porta* lucis es; quia per te verus Sol iustitiæ terram, id est, Ecclesiam illustravit, & fidelem animam radiis gratiarum. Vnde dicitur de te, *Porta lucis fulgida*. Eua siquidem fuit *Porta* tenebrarum: quia per eam intrauerunt tenebræ culpæ & pœnæ, & totius

418

*Aue lucis ianua,
Portarum precipua,
Patens Regis gloria;
Qui seruauit veniens,
Non confregit exiens,
Portas pudicitia.*

AET 3. 6

4. O largissima Virgo Maria! per portam Euz frequenter ingressus sum, & ingredior omni die, tenebris vitiorum me inuoluens, & sic te portam lucis & misericordiae mihi clausi, & eius ingressum mihi ipse prohibui. Nunc misericordie extra ciuitatem, & pluuia expositum, & luporum dentibus lacerandum. Adiua me, piissima Virgo Maria; aperi mihi ianuam pietatis & misericordiae; vt introductus in eam ab omni malo perpetuo sum securus. Amen.

Virgo Maria, Fenestra.

Ecel. in
Hymno.
O glo-
riosa.

2. Tu, Virgo Maria, figurata es per fenestram crystallinam, quam fecit sibi Noë in Arca; quia sicut crystallus rore humectata & Soli subiecta incorrupta parit igniculum: sic tu, gloriosissima Virgo Maria, rore Spiritus sancti madefacta saluo flore virginaitatis peperisti Christum lumen Ecclesiar. Ideo canitur de te,

Ead. in
Prosa.

*Sic crystallus sit humecta,
Atque soli sic subiecta,
Scintillat igniculum.
Nec crystallus soluitur;
Nec in partu frangitur
Pudoris signaculum.*

Per hanc fenestram transitum habuit Columba, quæ cessationem indicauit diluuij; & tu cunctis Ecclesiæ fidelibus, quæ *Arca* est, attulisti spem salutis. Tu, benedicta Virgo Maria, vitrea *Fenestra* es, illuminans totam Ecclesiam exemplo tuæ puritatis, quæ notatur in vitro: quia ad instar *Fenestræ* vitreæ, sine tuæ læsione integritatis, suscepisti in conceptu; & emisisti in partu solem iustitiæ: de quo canitur,

*Ut solis radius intrat innoxius
Fenestram vitream: sic Dei filius,
Imò subtilius, aulam virginæam.*

3. Tu beatissima Virgo Maria, figurata es per *Fenestras Templi obliquas*, id est arcuatas desuper; quarum exterioritas erat angustior propter temperatum repulsionem, & inferioritas diffusior propter luminis illustrationem. De te, benignissima Virgo Maria, canit Sancta Mater Ecclesiæ,

Genes.
2. 8.

*Intrent ut astra flebiles,
Cæli fenestra facta es.*

4. O clementissima Virgo Maria, ego miserabilis peccator, non audeo pulsare ad ostium, quod est Filius tuus benedictus, & eius ianitor est iustitia: sed ad te *Fenestram* piissimam clamo, & ut inde, eleemosynam accipiam, paupertatem meam notifico. Nuda est omnibus virtutibus anima mea, famelica cibi spiritualis, infirma & laesiata vulneribus peccatorum, ac spoliata armis spiritualibus. Sic enim nuda, famelica, infirma, laesiata, spoliata iacet, inimicis vallata; ad te *Fenestram* clamo: porrige eleemosynam; & si non de ferculis, saltem de micis, quæ cadunt de mensa Domini: id est tribue aliqua fragmenta gratiarum, ut taliter viuens per gratiam, ad conuiuium cæleste valeam peruenire. Amen.

Contemplatio XXXV.

Virgo Maria, Scala.

1. **I**lla Scala tu es, gratissima Virgo Maria, quam vidit Iacob; quæ stabat super terram, & cacumen eius tangebatur cælos: & Angeli descendebant & ascendebant per eam, & Deus erat innixus super scalam. Tu, gloriosissima

riofissima Virgo Maria, fuisti *Scala*; cuius pes fuit paupertas, quia contem-
pisti omnia carnalia, & mundana: cacumen fuit excelsa contemplatio
vsque ad cœlum, non solum aëreum, sed etiam sydereum & empyreum;
scilicet vsque ad sedentem in throno diuinæ Maiestatis; latera sunt virgi-
nitas & maternitas, quæ non facerent *scalam*, nisi coniungerentur sca-
lones, siue gradus; qui fuerunt fides, spes, charitas, puritas, voti firmitas,
humilitas, obedientia, prudentia, modestia, misericordia, compassio, pie-
tas, benignitas: & cæteræ virtutes. Vnde, sicut mediante *scalâ* de alto def-
cenditur ad imum, & ab imo ascenditur ad summum; sic te mediante, Dei
Filius benedictus descendit ad nos illectus humilitate tuâ, & ideo de te dicit
sancta Mater Ecclesia, *Facta es Maria Scala cœlestis, per quam Deus descen-* *Eccles.*
dit ad terram. Per te autem, pijsima Virgo Maria, nos misericorditer af-
cendimus in cœlum; qui per Euam cecidimus in miseriam huius mundi.

2. Tu, purissima Virgo Maria, *Scala cœlestis es*, tangens cœlum, & per
tuas sanctissimas orationes hauris aquam viam superius de fonte vitæ,
qui apud Deum est; & inde refunditur inferius misericorditer nobis mi-
seris. Sicut illa *Scala*, scilicet Iacob, stans super terram, tangebatur cœlum;
sic te mediante, terrena cœlestibus vniuntur. Per *scalam*, Virgo benedi-
cta, ascendebant & descendebant Angeli, id est, propter *scalam*. Angelus
enim descendit ad te visitandum, & noua nuntiandum; quia *Missus est*
Angelus Gabriel à Deo in Civitatem Galilee, Angeli etiam ascendebant, *Luce. 1.*
sancta tua desideria, sanctas orationes, & pias locutiones Domino nun-
tiantes, quod est officium Angelorum. Per hanc *Scalam*, id est, per tuas
preces & intercessionem piissimas, merita, & exempla, ascendunt con-
templando, & descendunt strenuè operando. Et sicut tu; Virgo Maria
beatissima, innixa fuisti super dilectum tuum in Annuntiatione; sic & ip-
se in Incarnatione innixus fuit tibi. Et qui imitantur te in præsentem, in
morte ruunt ad amplexandum eum, qui erat innixus *Scale*, quasi tenens
eis *Scalam* per gratiam, ne à seruitio vel dilectione tuâ impulsu vel ten-
tatione aliquâ corruant & sicut ianuas seruientes tibi: sic negligentes, &
parui pendentes seruitium tuum, de quorum numero me esse sentio, per-
mittis cadere prius in peccatum, deinde in infernum.

3. Sed, Virgo pijsima, sicut necesse est ascendentes *Scalam* se tenere
manibus, & pedibus: sic fac me tenere pedibus, id est, affectibus, vt te
diligam: & manibus, id est, operibus, vt quamdiu vixero, operer tibi
placita, & per te *Scalam* ascendam in cœlum, ibique maneam in æternum.
Amen.

Ggg

Contemplatio XXXVI.

Virgo Maria, Ciuitas.

- O** Quam Gloriosa dicta sunt de te *Ciuitas Dei*. Tu, sanctissima Virgo Maria, es *Ciuitas*, quam beatam dicunt omnes generationes, quam nominaris *Ciuitas* quasi *Ciuium unitas*, id est sensualitatis & rationis plena concordia. Ciues huius Ciuitatis sunt sanctae cogitationes, deuotae affectiones, feruentia desideria; & huiusmodi Ciues regebantur consilio Spiritus sancti, quia Ciues sunt consilio regendi, & aduersarii fugandi, & fugiendi. Fuit igitur in te, sacratissima Virgo Maria, *Ciuium unitas*; quia caro non concupiscebat aduersus spiritum, nec spiritus aduersus carnem; nec aliquid rebellionis aut contradictionis fuit in corpore tuo, vel animas; & ideo summus habitator in te pacifice est hospitatus, & ibi factus est in pace locus eius; & sic tu, Virgo sacratissima, *Ciuitas* sancta digna fuisti tanto Rege, tanto Pontifice, tanto fundatore, & tanto habitatore.
2. Fundamenta huius Ciuitatis in montibus sanctis fuerunt, id est, in Patriarchis, Prophetis, & Regibus: de quibus, Virgo Maria sanctissima, originem traxisti. Fundamentum etiam, Virgo Maria, fuit ipse Christus, qui est lapis angularis: qui te sustentauit in gratia & virtute. Murus Ciuitatis, fuit prudentia contra luxuriam, sobrietas contra gulam, paupertas contra auaritiam, fortitudo contra acediam, benignitas contra iram, charitas contra inuidiam, & humilitas contra superbiam. Fuit murus defensionis tibi Christus, quia si Dominus in circuitu populi sui, multo fortius in circuitu Matris suae. Murus fuit Angelicae custoditionis; quia Angelis suis mandauit de te, ut custodiant te. Fuit murus omnimodae virtutis, quia virtutes muri sunt custodientes animam, & munientes eam.
3. Fossatum fuit profundum, paupertate, timore, & humilitate; vacuum prosperitate mundana, dilatatum charitate, superius latum desiderij extensione, Ciuitatem circuiens forti defensione. Nam tale fossatum non timet incurSIONES diaboli. O *Ciuitas* sanctissima, *Ciuitas* securitas, virtus, lux, honestas, gaudium, laetitia, dulcedo, amor, concordia; & nulla indigentia: & Sicut letantium omnium habitatio est in te. O iucunda *Ciuitas* supra montem posita, ad illuminandum nos. Qui te respicit oculo interiori, cognoscit mundi vanitatem, suam vilitatem, Dei bonitatem.
4. Sed ego impiissimus peccator haecenus non inspexi te, sed miseros oculos cordis mei clausi, ne viderem Dei bonitatem, & meam fragilitatem: sed bene corde peruigili aspexi mundi vanitatem. O beatissima *Ciuitas*, *Ciuitas* refugij, suscipe me errantem, custodi me tremantem, salua me ad te redeuntem: ut ad Ciuitatem supremam Hierusalem perueniam, tuis meritis & intercessionibus benedictis. Amen.

Contemplatio XXXVII.

Virgo Maria, Turris.

1. **E**sto mihi, potentissima Virgo Maria, *Turris fortitudinis à facie inimici*: quia tu benignissima Virgo Maria, *Turris* nominaris propter altitudinem: quia sicut *Turris* altissima est, sic tu altissima fuisti & eminentis propter contemplationem cælestium & eminentiam scientiæ de æternis, nam in cælo mente conuersabaris cum Angelis, & cælos attingebas stans in terra. *Turris* etiam rectitudinem habet; & tu, dignissima Virgo Maria, rectitudinem & dilectionem intentionis ad Deum semper habuisti, & rectitudinem iustitiæ; quia nunquam ad sinistram per aduersa, & nunquam ad dexteram per prospera declinasti; nunquā retrō reflexa fuisti ad mundana, & nunquam aliquā tentatione inflexa. *Turris* habet fortitudinem; & tu, sanctissima Virgo Maria, fortis mulier fuisti, & tibi tota innititur Ecclesia militans, & per fortitudinem fidei, spei, & charitatis, totam sustentas Ecclesiam; & tuis sanctis deprecationibus das lapso virtutem & robur multiplicas, sicut *Turris* munit & roborat existentes in ea.

2. *Turris* habet quadraturam, & aliquando rotunditatem: sic tu, benignissima Virgo Maria, quadraturam habuisti, quæ fides fuit integra, spes firma, charitas feruens, & vna operatio perseverans. Et ista latera æqualia sunt: quia quantum quis credit, tantum sperat, quantum sperat, tantum diligit, quantum diligit, tantum operatur. Habuisti etiam rotunditatem: quia quemadmodum cælestia corpora sunt rotunda, sicut est cælum, Sol, Luna, & Stellæ, per quæ figuratur æternitas principio carens & fine, cuius appetitum & desiderium rotunditas figurat: huiusmodi appetitum & desiderium tu, dilectissima Virgo Maria, habuisti p̄ omnibus creaturis.

3. *Turris* est præsidium, & est defensio habitantium in Ciuitate: sic tu, prudentissima Virgo Maria, es præsidium & defensio peccatorum, qui in cunctis necessitatibus & angustiis necesse habent ad *Turrim* inexpugnabilem confugere & dicere. *Sub tuum præsidium confugimus sancta Dei genitrix*. Tu es, piissima Virgo Maria, *Turris*, defendens pauperes, humiles, & amatores pacis & concordie. Tu, humillima Virgo Maria, es illa *Turris*, quam edificauit Dominus in medio vineæ suæ, id est, ad defensionem totius Ecclesiæ Catholicæ, ne diriperentur Racemi eius, id est, Fideles vel fructus bonorum operum.

4. Sed, clementissima Virgo Maria, ego prauissimus peccator, dissipatus sum, & fructus operum meorum reductus est ad nihilum: quia in peccatis existens, operatus sum ea, & frequenter non rectâ intentione. Suscipe, Virgo pia, & introduce me in *Turrim*, hoc est in memoriam deprecationum tuarum, vt protectus à te, gloriam percipiam sempiternam, Amen.

Ggg ij

Contemplatio XXXVIII.

Beata Virgo, Murus.

^{Cap. 2.}
^{10.} 1. **M** Vro tuo inexpugnabili circuncinge me, gloriosissima Virgo Maria, quia *Murus* nominaris. Murus namque dicitur, quia munit & tuetur interiora ciuitatis, ne ab hostibus diripiantur. Tu, sacratissima Virgo Maria, es Murus muniens ciuitatem Dei, id est, Ecclesiam Catholicam, ne bona interna eius, scilicet opera bona, gratia, & virtutis diripiantur à dæmonibus, vel vitijs; & ne fideles Ecclesiæ ducantur à diabolo captiui in peccatum, vel infernum; aut ne spolientur armis, & vestimentis virtutum. Tu, benedicta Virgo Maria, es *Murus* inexpugnabilis, qui non potest suffodi, perfodi, aut transcendere; non potest suffodi, quia fundatus est super firmam petram, id est, Christum; non super arenam in terra, per amorem terrenorum. Tu, beatissima Virgo Maria, *Murus* inexpugnabilis non potes perfodi, propter patientiæ firmitatem, quam ostendisti in Passione benedicti Filij tui; nec etiam potest transcendere, propter humilitatis altitudinem cælos attingentem; ideo inexpugnabilis *Murus* nominaris.

2. Tu, piissima Virgo Maria, es *Murus* firmissimus propter propositi seruandæ virginitatis firmitatem. Tu, *Murus* quantum ad virtutes quibus malis resistitur, *Murus* ad mala fortiter repellenda à te, & alijs, per fortitudinem & magnanimitatem. Tu *Murus*, deorsum infima non admittens. Tu *Murus*, vt sis alijs in defensionem & conseruationem. Tu *Murus* tantæ defensionis & firmitatis, quod super te ædificauit tota sancta Trinitas. Tu, speciosissima sancta Maria, es ille igneus *Murus* in circuitu Hierusalem, id est, Ecclesiæ, de quo tu dicis cum Filio tuo benedicto, *Ero Murus igneus in circuitu eius*; quia tu ignis appellaris, illuminans cæcos, calefaciens frigidos, incuruans duos, desiccans humidos in terrenis, & restringens fluidos ad peccandum.

^{Zachar.}
^{1. 5.} 3. Tu, amantissima Virgo Maria, es ille *Murus* aqueus propter abundantiam gratiarum, quando filijs Israël transcurrentibus mare rubrum, aquæ erant pro muris à dextris & à sinistris. Per has aquas significantur gratia, quas habemus per te, quæ veros Israëlitas, id est, veros Christianos, videntes benedictum Flum tuum & te, fide & dilectione duplici muro custodis contra Egyptios, id est, dæmones & peccata, & ipsos Egyptios interficis, & submergis.

^{Exod.}
^{14. 29.} 4. Sed, piissima Virgo Maria, vilipendendo te, *Murum* fortissimum me exposui ipsis Egyptiis dæmonibus, ipsorum tentationes recipiendo voluntarie, & ad effectum perducendo. Pœnitet me, Virgo pia, sic egisse,

sed non pœnitet, vt debet. Adiuua me per tuam misericordiam, eruen-
do me à faucibus eorum, & muni me tuo *Muro* inexpugnabili, in quo tutus
ab hostibus maneam in æternum. Amen.

Contemplatio XXXIX.

Virgo Maria, Nauis.

1. **I**N miserabilibus fluctibus & periculis maris huius mundi constituti
sumus, beatissima Virgo Maria: impugnamur quotidie principaliter
à quatuor ventis tentationum. Ab Oriente insufflat ventus superbiæ, qui
non permittit, vt originem & nauitatem nostram videamus. Ab Occi-
dente impugnat nos ventus negligentia, vt mortem nostram nobis pro-
pinquam, & incertam non cogitemus; neque vitam nostram, quæ ventus
& fumus est, emendemus. Ab austro flat ventus prosperitatis, desiderio-
rum mundanorum, & carnalium, longæuam vitam nobis promitten-
tium, vt de salute animæ ac de cœlestibus non cogitemus, neque de pec-
catis pœnitentiam agamus. Ab Aquilone insufflat ventus aduersitatis, nos
inducens ad impatientiam, tristitiam, & desperationem, ad blasphemiam
Dei, & ad vindictam proximi. Inde insurgunt dæmones ventos diuerfos
vndique adducentes diuersarum tentationum, malarum cogitationum, &
consensuum, ac prauarum operationum. Et sic hinc inde agitati in hoc
tempestuoso mari miserabiliter submergimur.

2. Sed tu, gloriosissima Virgo Maria, facta es Nauis, per quam possu-
mus scilicet nauigare per hoc mare, vne de te scribitur, Sapiens *Facta*
est quasi Nauis institutoris de longè portans panem suum. Tu, Virgo Maria, *Na-*
uis facta es à diuina Trinitate compaginata omnium virtutum firmitate,
ac plenitudine omnium gratiarum, & omnium bonorum operum. Insti-
tor fuit Spiritus sanctus, qui te gubernauit, & ornauit virtutibus pretiosis,
scilicet auro sapientiæ, argento eloquentiæ, pomis odoriferis sanctæ opi-
nionis, cibarijs omnium scripturarum, & mandatorum Dei, carnibus
agni immaculati, oleo misericordiæ & pietatis, sale discretionis, lacte be-
nignitatis & doctrinæ, speciebus aromaticis omnium virtutum, igne di-
mini amoris, opere tamen humilitatis cinere, lignis bonæ operationis. Et
ad istas merces custodiendas fuit in te cor humile, spiritus mansuetus,
mens tranquilla, verecunda frons, demissa supercilia, oculi columbini,
auditus obediens, os taciturnum, labia sine morfu, lingua veridica, gu-
stus moderatus, tactus promptus ad bona opera, modestus incessus, pedes
prohibiti ab omni via mala, & sensualitas ex toto subiecta rationi; Tu,
Virgo Maria, *Nauis*, portasti Panem de longè: quia de cælo venit Panis
Angelorum, & fuit coctus in clibano tui vteri virginis igne Spiritus
sancti, & secundo fuit coctus in ara Crucis, vbi induruit per ignem Passio-
nis.

Ggg iij

nis: & sic fuit bis coctus, qui competit nauigantibus.

3. O Nauis tutissima, sine qua nullus poteit euadere pericula huius maris, suscipe me, ne submergar impulsu tantorum ventorum, qui vndique me concutiunt & impellunt; & velut arundinem agitant hinc & inde. Fac me in te per deuotionem & dilectionem intrare, vt tutè nauigando per hoc mare, cum tranquillitate ad portum perueniam salutis. Amen.

Contemplatio XL.

Virgo Maria, Hortus conclusus.

- Cant. 4. 1.* **H**ortus conclusus es, beatissima Virgo Maria, conclusus namque & firmatus illâ clauē veri David; qui claudit, & nemo aperit. Hac clauē firmavit cor tuum contra omnem concupiscentiam, quando inspirauit tibi votum & desiderium perpetuæ virginitatis: aperuit etiam tibi intellectum ad credendum, & affectum ad diligendum. Aperuit autem tibi quando verba Angelica audiisti, & prudenter cogitasti qualis esset ista salutatio, id est, quàm noua, dulcis, & admirabilis: aperuit etiam cor tuum ad credendum verbis Angelicis: aperuit etiam cor tuum ad consensum exprimendum, & humiliter exorandum, vt fieret, quod tibi promittebatur, & ad gratias agendum de beneficijs perceptis, & ad totum attribuendum datori quando dixisti. *Fecit mihi magna qui potens est.* Tu, pretiosa Virgo Maria, Hortus es plantatus: nam Deus Pater plantauit in te lignum vitæ, id est, Christum in incarnatione, secus decursus aquarum nostræ mortalitatis, vt in te operaretur fecunditatem, & custodiret illâsam virginitatem.
- Id. 49.* 2. Tu, gloriosa V. Maria, es Hortus planus, & æqualis, vt facilius irrigari possis imbribus gratiarum. Planus etiam per mansuetudinem, humilitatem, simplicitatem, & benignitatem; quarum virtutum merito, fluentis omnium gratiarum es irrigata, & infusa. Tu, piissima Virgo Maria, es Hortus aromaticus; & flante Austro iugiter fluunt ad nos aromata tua. Austrum, est spiratio Spiritus sancti, quo perflante huiusmodi Hortum, defluunt ad nos aromata tuorum beneficiorum. Tu, piissima Virgo Maria, es Hortus humidus, humectatus & madefactus, omnium liquoribus gratiarum; quasi lignum transplantatum super aquas, quod ad humorem mittit radices suas, & non timebit, cum venerit æstus.
3. Tu, speciosa Virgo Maria, es Hortus umbrosus: ad hoc enim obumbravit tibi virtus Altissimi, in Filij Conceptione, vt tuis precibus, meritis, & exemplis obumbrares peccatoribus contra feruorem diuinæ iracundiæ, & æstum cuiuslibet prauæ concupiscentiæ. Tu, excellentissima Virgo Maria, Hortus es mirabilis super omnes, quia Virgo peperisti Deum. Fuisti mirabilis in flore, quæ retinuisti florem, fructum proferendo, nec propter fructum florem amisisti. Fuisti in fructu mirabilis; cuius fructus fuit Iesus

Christus, qui ex te sola, & in te sola Matre conceptus est sine pruritu, & fœtore coitus.

4. Tu, sacratissima Virgo Maria, es *Hortus* securus, qui non patet malignantibus, id est, dæmonibus & vitijs; vt inde violenter possint extrahere eos, qui ad te confugiunt: non enim est, qui de manu tua possit erueri. Custodi me igitur, misericordissima Virgo Maria, à laqueis dæmonum, & vitiorum: vt in te & per te *Hortum* bonorum operum, ad illum perueniam lætus, qui tribuit misericorditer gaudia sempiterna. Amen.

Contemplatio XLI.

Virgo Maria, Flos.

1. **F**los florum, speciosissima Virgo Maria: tu Flos mundissimus & odoriferus in virginitate quoad carnem, in humilitate & deuotione quoad animam, & in vtroque quoad Diuinitatis inhabitationem. Tu Flos tenuis in triplici substantia, scilicet corporali, per abstinentiam & carnis macerationem; spiritali scilicet in anima, per summam humilitatem; terrenâ, per voluntariam paupertatem. Tu Flos teres per mansuetudinem, per peccatorum compassionem, per dilectionem præcipuam. Tu Flos speciosus, id est, omnimodâ speciositate plenus, qua superlatiue participas pulchritudinem omnium florum, quia quidquid pulchritudinis habent ceteri Sancti in parte, habes tu, pretiosissima Virgo Maria, in toto. Tu Flos concauus per humilitatem: in hac autem concauitate, id est, merito humilitatis tuæ, quam respexit Deus, attulisti nobis mel diuinitatis: per humilitatem enim, & virginitatem placuisti Domino, sed per fidem concepisti: nam per aurem concepisti, id est, per fidem auditorum à te; quia *fides* Rof. 10.
ex auditu. Idèd mel & lac sub lingua tua. 17.

2. Tu es Flos vernalis, & concepisti Florem in tempore florum, hoc est in vere. Vnde ad te concepturam Dei Filiam dirigitur sermo, *Surge, prope- ra Amica mea, & veni: iam enim hyems transiit: Flores apparuerunt in terra nostra: Ostende mihi faciem tuam, sonet vox tua in auribus meis.* Post hanc mem namque, id est, niuem, beatissima Virgo Maria, concepisti benedictum Filium tuum; & ostendisti faciem tuam, cum in voce Angeli verendata fuisti, & turbata. Sonuit vox tua in auribus Domini, cum dixisti, *Ecl. in Laud.*
Ece Ancilla Domini: fiat mihi secundum verbum tuum. Et in hoc verbo concepisti: in hac autem responsione melliflua, inæstimabiliter delectatus fuit Dominus; & idèd sequitur, *Vox enim tua dulcis.* Conceptus etiam fuit Flos iste, & nutritus in Nazareth, quæ interpretatur *Flos.* Congruum enim fuit, Florem in Flore concipi, de flore nasci, & in Flore nutriri, & in tempore florum, hoc est in vere nunciari. Cant. 4. 11. Cant. 3. 10. 11. 12. 14. Luc. 1. 38. Ecl. in Laud. Fest. Nat. tis. B. M. V.

3. Tu, sanctissima Virgo Maria, es Flos lenis & suauis ad tangendû, lenitate & mansuetudine; quæ maxime patet in aduocatione peccantiû. Reuocas

enim dulciter auersos à te, suscipis hilariter reuertentes ad te; & semper pro peccatoribus oras libenter; & tibi supplicantibus das gratiam affluentem. Tu Flos leuis peccati immunitate: fuisti namque sine pondere peccati, quod animam deprimit in gehennam. Fuisti etiam leuis obedientie adimplerone. Tu es Flos tempora venustans; quia de te canitur, *Cuius vita incluyra cunctas illustrat Ecclesias*; scilicet militantem & triumphantem. Tu, Virgo Maria, sicut Flos es, qui non visus spargit odorem; & licet tu non videaris in presenti intuitu corporali, spargis tamen odorem gratiarum, & virtutum tuarum super nos.

4. O piissima Virgo Maria, sparge super me misero peccatore odorem gratiarum tuarum, quo recreari valeam in æternum. Amen.

Contemplatio XLII.

Virgo Maria, Lilium.

Mundissima Virgo Maria, benedictus Filius tuus de te dixit; *Sicut Lilium inter spinas, sic amica mea inter filias*. Lilio te comparatione candoris, qui significat innocentiam, & peccati immunitatem. Et sicut lilium spinis, inter quas nascitur, præstantius est absque comparatione; sic tu, Virgo Maria, Iudæis, de quibus nata es. Et ideo de te canitur, *Sicut spina rosam, genuit Iudæa Mariam*. Imò in tua comparatione spinæ reputantur animæ sanctæ, & virtutes Angelicæ. Et sicut lilium candorem suum retinet inter spinas; & quanto magis ab illis pungitur, meliorem emittit odoris fragrantiam: sic, candidissima Virgo Maria, dum à nequam Iudæis in Filio tuo benedicto pungebaris, semper retinuisti mentis innocentiam, & animi puritatem; non reddens malum pro malo, nec pro maledicto retribuens maledictum. Imò cum tuam mentem pertransisset gladius Passionis, & tota perpuncta fuisti, ut diceres *Angustia sunt mihi undique*; tunc visa es dixisse, *Cum esset Rex in accubitu suo*, id est, in humiliatione Crucis, *Nardus mea dedit odorem suum*, scilicet patientiæ & virtutum; & compassio tui cordis pro summo martyrio tibi reputatur. Et hoc secundum illa verba, *Sicut Lilium inter spinas, sic Amica mea inter filias*: quasi dicat Filius tuus benedictus; sicut ego, qui sum Lilium innocens inter spinas, id est, inter Iudæos, qui circumdederunt me sicut apes, & exarserunt igne iræ & odij aduersum me, sicut ignis in spinis: sic Amica mea, id est, tu, Virgo Maria, inter Filias, id est, inter Synagogam & Gentilitatem, quæ me crucifixerunt; & animam Matris meæ confixerunt, dilacerauerunt, & compunxerunt.

2. Sicut Lilium totum quod habet odoris, fructus, & amœnitatis transmittit ad summum, & collocat in capite suo; sic tu, sanctissima Virgo Maria, diuinæ Trinitati, quidquid boni habuisti, attribuisti, dicens, *Fecit mihi*

mibi magna qui potens est. Sicut Liliū dolores mitigat, & ardores extinguit: sic tu, clementissima Virgo Maria, precibus tuis & exemplis nobis peccatoribus & miseris seruis tuis, noxias refrenas & extinguis concupiscentias, & mitigas dolores animæ, consolationes transfundendo in eam; ut tibi verissime dici possit, *Secundum multitudinem dolorum meorum in corde meo, consolationes tuæ, pijsima Virgo Maria, latificauerunt animam meam.* Psal. 93.
19

3. Sic igitur, Virgo Maria, à te peto, sic flagito, sic humiliter exoro, corde flebili deosco, ut me amaritudine dolorum & peccatorum plenum, consolari digneris, tuum Filium deprecando, ut peccata remittat, virtutes mihi tribuat, & in fine gloriam æternam. Amen.

Contemplatio XLIII.

Virgo Maria, Rosa.

1. **T**V Rosa aromatica es, purissima Virgo Maria, propter odorem vnguentorum tuorum, id est, tuarum virtutum. Tu Rosa rubicunda, per verecundiam virginalem, & per pulchritudinem naturalem; quia *Tota pulchra es, & macula non est in te.* De spina nascitur Rosa non spinosa; & tu, sanctissima Virgo Maria, nata es de Iudæis incredulis bene credula. Tu, Virgo Maria, Rosa es rubicunda per Dei & proximi charitatem: nam igneus color designat charitatem. Rosa frigida est: & tu, beatissima Virgo Maria, frigida es per exclusionem prauī amoris; & quia omnibus tuis exemplis & meritis malarum concupiscentiarum feruorem refrigeras, maxime in seruitoribus tuis. Rosa in grānis est crocea; sic & tu, Virgo Maria, affectu intimæ charitatis, quia tibi cura est de omnibus; quia dicis, *Testis est mihi Deus, quomodo vos omnes cupiam in visceribus Christi Filij mei benedicti.* Rosa restringit; & tu, Virgo Maria, restringis tuis orationibus fluxum cuiuslibet vitij, maxime in amatoribus tuis. Rosa est capitis confortatiua: sic tu, Virgo Maria, confortas caput, id est, mentes peccatorum, qui ad te deuotē, & ad tuam misericordiam recurrunt. Rosa est oculorum clarificatiua: sic tu, Virgo Maria, clarificas oculum mentis meæ dirigendo nos in viam mandatorum Dei. Cant. 4.
7.
Phil. 1. 8.

2. Rosa est Regina omnium florum, quia purpurei coloris est, & purpurea Regibus conuenit: sic tu pijsima Virgo Maria, es Regina Virginum, & decus Mulierum, sicut Rosa florum: & ideo de te dicitur, *Ostende mihi faciem tuam, quia facies tua decora:* Rosa est omnium florum suauissima: sic tu, Virgo Maria, omnium mulierum & hominum es suauissima. Ideo de te scribitur, *Quid ad Mariam trepidet accedere humana fragilitas? nihil austerum in ea, nihil terribile: tota suavis est omnibus.* Rosa est omnium florum Cant. 2.
14.
D. Bern.
serm. in
Signum
magnū.

Hhh

*Ecclesia
in laud.
officij B.
M. in
Sabbato*

rum delicatissima ad olfaciendum: sic tu, Virgo Maria, quia dicitur de te, *Speciosa facta es*, scilicet ad intueundum; *Et suavis*, scilicet ad tangendum & olfaciendum. Rosa spinis adhæret, licet omnino dissimilis: & tu, gloriosa Virgo Maria, peccatoribus, qui sunt spinæ, adhæres pietate, & compassione, licet omnino à peccato sis immunis. Rosa prius clausa, ad solis radium aperitur: sic etiam tu, beatissima Virgo Maria, nam cum vouendo virginitatem consensum omni conceptioni clausisses, & generationi; Soli tamen iustitiæ aperuisti, cum intellexisti quod Filium Dei posses concipere & parere, manens Virgo. Rosa antequam marcescat, carpitur: & tu, benignissima Virgo Maria, antequam benedicta caro tua putredine marcesceret, ad vtriusque stolæ immortalitatem de mundo assumpta, ut pie creditur, fuisti.

3. O misericordissima Virgo Maria, Rosa fragrantissima; sentiam ego putridus & infectus odorem tuarum orationum, per quas mundari valeam ab omni infectione peccati, & fragrantiam virtutum redoleam, in præsentem per gratiam tuam, & in futuro gloriam obtineam sempiternam. Amen.

Contemplatio XLIV.

Virgo Maria, Viola.

Cant. L.

1. **F**los campi tu nominaris, beatissima V. M. flos namque campi, qui propriè est Viola, miri odoris dicitur. Tu verò, gloriosissima Virgo Maria, redoles & fragras propter multitudinem vnguentorum tuorum, id est, virtutum, & gratiarum tuarum, & charismatum, quæ redolent inter vniuersos fideles Christianos; & maximè inter tuos seruitores deuotos. Viola ante omnes florens apparens, serenitatem temporis venientem designat, quia nascitur incipiente tempore vernali de terra inculta: similiter tu, beatissima Virgo Maria, prima votum emisisti perpetuæ virginitatis, & quasi in principio nascentis Ecclesiæ apparuisti in tempore vernali; quando omnia è terra nascentia quodammodò renouantur: nam à te incipit reparatio mundi. Viola est flos paruulus & inclinis: sic tu, perpetua Virgo Maria, paruula fuisti per humilitatem, & inclinis per obedientiam. Viola terræ adhæret; sic tu, dulcissima Virgo Maria, terræ adhæres, id est, terrenis peccatoribus per compassionem, pietatem, & affectum misericordie.

2. Viola subtilis & suavis odoris est: similiter tu, amœnissima Virgo Maria, subtilis & suavis es per suauem & redolentem opinionem Deum & Angelos, & homines delectantem. Viola temperatæ proprietatis est: sic tu, sanctissima Virgo Maria, temperatæ complexionis fuisti, per omnimodam modestiam: quia regebaris cum moderatione rationis. Viola ardoris febrium refrigerat: sic tu, benignissima Virgo Maria, ardores vitiorum & quarumcumque tentationum hostiliū refrigeras; incentiua fomitibus domas;

calorem iracundiæ, avaritiæ ac cæterorum vitiorum, tollis, & auferis de cordibus tibi deuotè famulantium.

3. Viola noxiis & corruptos purgat humores: sic tu, Virgo Maria, malos humores, scilicet peccata, quæ corrumpunt animam, tuis sanctis orationibus & exemplis purgas & euellis à mentibus spiritualiter languentium infirmorum. Viola membra deficcata & arida humectat: sic tu, piissima Virgo Maria, corda & membra arida, & frigida, tepore, pigritiâ & desidiâ, ad bene operandum humectas, & emollis ad exercitium bonorum operum; & deuotionis & charitatis pinguedinem subministras. Viola solidam radicem habet, & nihil aliud habet durum; radix solida tua, Virgo Maria, fuit fides, cuius solidissima constantia apparuit in Passione benedicti Filij tui. Ex Viola fit & componitur syrupus violaceus, qui singulis ægitudinibus est medicinalis, ac summum & inestimabile pretij medicamentum. Tu, misericordissima Virgo Maria, ægros sanas, debiles iuuas, sanos conseruas, & ab omni infirmitate liberas.

4. Liberare me digneris, ô piissima Virgo Maria, quoniam infirmus sum; & anima mea propinqua est morti. Sana eam ut tuo pio interuentu, hic & in æternum uiuat. Amen.

Contemplatio XLV.

Virgo Maria, Cedrus.

1. **T**V, excellentissima Virgo Maria, Cedrus appellaris: quia de te ipsa ^{Ecd. 14.} ^{17.} dicis, *Quasi cedrus exaltata sum*. Nam cedrus arbor est procera, & eminentissima super omnes arbores, & dicitur *Rex arborum*. Tuæ dignitati hoc competit, laudabilis Virgo Maria, quia Mater Dei facta fuisti, nec prius similem habuisti, nec in futurum habebis. Hæc est singularis gloria tua, & excellens prærogatiua. Cedrus est arbor annosa: sic etiam tu, benedicta Virgo Maria, quæ licet in exordio noui Testamenti; & in conceptu benedicti Filij tui fueris iuuenula, tamen in figuris veteris Testamenti, & Prophetijs, quasi senex eras & annosa. Cedrus arbor est medullosa: similiter tu, Virgo Maria, per pinguedinem charitatis, & ubertatem pietatis. Cedrus fuit materia Templi constructi; sic tu, purissima V. Maria, materia Templi fuisti, scilicet corporis Dominici, de purissimo sanguine tuo fabricati manu Sapientiæ Dei, & operatione Spiritus sancti: in quo scilicet Templo habitauit Diuinitatis plenitudo corporaliter: idè dicis, *quasi Cedrus*, id est quasi Christi Mater. ^{Coloss. 2. 9. 1}

2. Sed quia *Domum Dei decet sanctitudo*, oportuit quod sine corruptione conciperes; quod competit cedro, quæ est imputribilis: idè excellis omnes mulieres, sicut Cedros omnes arbores. Cedrus magnas & profundas habet radices, & profundissime radicatur. Sic tu, magnifica Virgo Maria, ^{Psal. 92.} ^{25.}

Hhh ij

magnas radices habuisti, id est, parentes, de quibus orta es secundum carnem, scilicet Abraham, Iesse, & ceteros, qui magni fuerunt in Populo & coram Deo. Radices tuæ spirituales fuerunt excellentissimæ virtutes, quas omnes habuisti in superlatiuo. Radix enim humilitatis tuæ sic in profundo radicata est; quod in immensum creuerit, scilicet usque ad conceptionem Filij Dei, qui erat in sinu Patris.

3. Cedrus est præcipui odoris; similiter & tu, odorifera Virgo Maria, nam tui odoris suauitas non solum mundum circumquaque perfundit, sed etiam totam supernam Ciuitatem aspergit usque ad nares Domini perueniens; usque ad illum, qui in sinu Patris expectauerat & desiderauerat hunc odorem; quia in aliquo Angelorum talem non poterat inuenire. Cedrus odore & succo, fugat & extinguit serpentes: sic odor & succus tuarum virtutum, gratiarum & orationum, salutifera Virgo Maria, fugant demones & prædam auferunt ab eis, id est, peccatores, quos ducunt captiuos peccatis & vitij. Succus etiam est pietas tua, Virgo Maria, quam nobis tribuis omni die.

4. Erue me, misericordissima Virgo Maria, ex manibus hostium, qui me multis peccatis ligatum conantur deducere ad infernum. Sentiam suauitatem odoris, scilicet gratiarum tuarum, quibus hinc protectus, in fine ad gloriam perueniam sempiternam. Amen.

Contemplatio XLVI.

Virgo Maria, Palma.

Eccl. 24. 1.
13.

DE te ipsa dicis, altissima Virgo Maria, *Quasi Palma exaltata sum.* Nam plenitudo sanctitatis in duobus consistit: vnum est rei mutabilis contemptus, aliud est rei immutabilis affectus. Per ista duo, Virgo Maria sanctissima, meruisti sicut palma exaltari; quia corporalia perfecte contempsisti, & Deum perfecte amasti: quia sicut Palma in altum creuisti per altissimam contemplationem, & dilectionem. Palma figuram habet aspersorij aquæ benedictæ. Tu, Virgo Maria beatissima, aspersorium fuisti repletum aquis gratiæ Spiritus sancti. Hoc aspersorium apprehendit, id est te, Iesus Christus Sacerdos secundum ordinem Melchisedech; quia in te semen Abrahæ apprehendit; & prædictâ aquâ aspersorium implens, populum vndique aspergit; sicut promiserat, *Effundam super vos aquam mundam*, quia de plenitudine eius omnes accepimus. Palma amarissima est in radice, sed dulcissima est in fructu: similiter tu, gloriosissima Virgo Maria, amarissima fuisti in radice Iudeorum, quæ Deo tuo erit gens amarissima, sed fructus tui yteri virginalis, scilicet benedictus Filius tuus, fuit nobis dulcissimus in amaritudinibus peccatorum nostrorum dulcorandis.

Ezech.
36. 25.

2. Palma est arbor victoriosa, & designat victoriam: similiter tu, potentissima Virgo Maria, victoriosissima fuisti; quia mundum paupertate, carnem virginitate, & diabolum vicisti humilitate. Pro nobis etiam pugnas quotidie contra hostes invisibiles, & tuo adiutorio de ipsis triumphamus: nam ante te numquam apparuit victoria: sed omnes tanquam devicti in carcerem trudebantur. Tuas etiam vterus virginalis fuit arbor victoriæ, ex quo processit propugnator noster ad saluandum. Palma inferius est aspera, & contemptibilis, & rugosa: sic tu, Virgo Maria, in hoc mundo fuisti humillima, & aspera in abstinentia vitæ, & multas sustinuisti asperitates, & misérias, tribulationes, & contemptus, præsertim in benedicti Filii tui acerbissima Passione. Palma inferius angustatur, & superius dilatatur: sic etiam, deifica Virgo Maria, angusta fuisti inferius, & stricta circa pœnas corporis, & contemptum mundanorum; sed superius dilatata & ampliata fuisti, in his quæ pertinent ad animam, & ad dilectionem Dei & proximi. Tuus intellectus dilatatur æterna cogitando, affectus enamando; & de bonis proximi congaudendo, & de malis compatiendo, dicendo semper, *Meditatio cordis mei in conspectu Domini, & omne desiderium meum ante eum.* Psal. 18. 15. Psal. 37. 10.

3. Sed, clementissima Virgo Maria, ego nefandissimus peccator diffusum, & largus inferius per inclinationem & appetitum inordinatum, & voluntarium ad terrena, & carnalia, & restrictus sum superius de celestibus ac salute animæ meæ modicè cogitâdo. Adiuuare me digneris, piissima Virgo Maria, ut oppositum operando, cor meum ab inferis suspensum dilatetur, & eleuetur ad superna, quæ in fine possideat per infinita sæculorum. Amen.

Contemplatio XLVII.

Virgo Maria, Cypressus.

1. *Quasi Cypressus in monte Sion*, beatissima Virgo Maria, nominaris. Eccles. 24. 17. Cypressus namque arbor medicinalis est, & medetur corporibus; similiter tu, piissima Virgo Maria, medicinalis es: quia genuisti salutem animarum fidelium, scilicet Iesum Christum Filium tuum benedictum, qui est Medicus vulnerum nostrorum; quia ipse intimâ charitate motus languores nostros tulit super lignum Crucis. Cypressus proprietatis est calidæ, sic tu, gloriosissima Virgo Maria, es complexione calida per dilectionem, quia Filium tuum benedictum cordialiter diligis, & creaturas propter eum, Cypressus est arbor recta: sic tu, benignissima Virgo Maria, recta fuisti, non declinando ad dexteram prosperitatis, neque ad sinistram aduersitatis. Recta etiam fuisti, quia numquam inclinata fuisti per amorem mundanum, vel aliquod peccatum. Recta insuper fuisti per paupertatem, quæ

H h iij

est rectitudo animæ, quia diuitiæ faciunt hominera tortuosum.

Ecl. in
Festo B.
M. ad
Nives.

2. Cypressus membra mollia indurat & confirmat: sic tu, dulcissima Virgo Maria, corda mollia ad peccandum, induras, & confortas, ne peccent: ideo clamaamus quotidie ad te, *Succurre miseris; iuna pusillanimes*. Cypressus nullo impulsu, nullâ vetustate comam deponit. Sic tu, prudentissima Virgo Maria, nullo impulsu alicuius tentationis, comam quæ ornat caput, id est, virtutes ornantes animam, deposuisti, sed totum Christo capiti tuo attribuisti: quia te non extulit felicitas, nec depressit afflictio. Cypressus durum habet fructum: sic fructus tui vteri virginis, sacratissima V. Maria, est durus in Sacramento indignè recipientibus; quia tales ipsum sumunt ad iudicium & condemnationem. Cypressus ramos suos colligit per rotundum, & eleuat sursum: sic tu, benedicta Virgo Maria, ramos tuarum virtutum & gratiarum non dispergis hinc inde per vanitatem, sed ad tuum sublime, quod est Deus, semper colligere voluisti. Cypressus fluxum sanguinis restringit: sic tu, beatissima Virgo Maria, fluxum vitiorum & peccatorum clementer restrinxisti, & restringis quotidie intercessionibus & orationibus tuis sanctissimis.

3. Cypressus est arbor altissima, omnibus supportandis; quia infrangibilis est, & numquam oneribus cedit: sic tu, potentissima Virgo Maria, numquam cessisti oneribus tribulationum, quas patiebaris in te, & in Filio tuo benedicto: sed per charitatem eximiam patienter sustinuisti, & infatigabiliter & quasi infrangibiliter nostræ humanæ infirmitatis onera sustines & supportas. Supportare igitur digneris, misericordissima Virgo Maria, infirmitates animæ meæ, quas patior; & tuis sanctissimis precibus eas sana, vt sanitatem animæ & corporis obtineam sempiternam. Amen.

Contemplatio XLVIII.

Virgo Maria, Balsamum.

Ecl. in
Festo B.
M. ad
Nives.

1. *Balsamum aromatizans*, nominaris tu, odorifera Virgo Maria, per quod intelligitur charitas tua. Nam sicut odor Balsami omnes excedit odores; sic tua charitas, piissima Virgo Maria, excedit omnium Sanctorum virtutes vniuersas. More Balsami, tuæ charitatis odorem longè diffudisti, ad superna scilicet per perfectum desiderium, & ad inferiora per perfectam misericordiam & compassionem peccatorum. Tua perfecta charitas omnes excedit odores, sicut Balsamum aromatizans; vnde, cum sit armarium singularum & vniuersarum virtutum, & habeas ignem feruentissimæ charitatis, necesse habes odorem tuum procul diffundere, & ideo charitas tua dicitur *Balsamum aromatizans*: odorem enim dedisti, sed non vendidisti; volens vt omnes gustent gratis odorem tuæ charitatis, & currant in odorem vnguentorum tuorum, quæ sunt super omnia aromata. Et sicut

odor Balsami excedit odorem omnium vnguentorum, siue aromatatum: sic tu odores excedis omnium Angelorum, & Sanctorum. Nam per te, & in te facta est conclusio totius maledictionis, quam Eua induxit in mundum; sed per te & in te, Virgo Maria, venit plenitudo totius benedictionis. de qua omnes accepimus: & si non accipimus, non stat per te, sed per nos.

2. Igitur odor tuus, id est, delectabilis & iucunda opinio sanctitatis tuæ, comparatur *Balsamo non mixto*, sed purissimo. Miscetur enim Balsamum, *Ibid. 27.* & corrumpitur cum oleo cyprino vel melle: sic vita nostra miserabilis corrumpitur, cum geritur pro oleo laudis humanæ. Sed tu, piissima Virgo Maria, dixisti, & dicere potuisti, *Oleum peccatoris non impinguet caput meum.* Sicut Balsamum facit corpus mortuum, si inde vngitur, videri quasi viuum, *Psal. 40.* & nullâ purreddine permittit illud corrumpi; sic odor misericordiæ, & virtutum, & exemplorum tuorum, beatissima Virgo Maria, facit per peccatum mortuos in spe veniæ respirare, & quamcumque virtutem habet Balsamum purum & merum ad conseruandum corpus, habet odor virtutum tuarum ad viuificandam animam, & conseruandam à putredine vitiatorum. Perducis etiam amatores & seruitores tuos ad gloriam resurrectionis, quæ incorruptibilitatem veram tribuit corporibus mortuis.

3. O misericordissima Virgo Maria, ego peccator sum corruptus, & quasi mortuus; viuifica me, & salua me tuis sanctissimis precibus & meritis. Conserua me à putredine peccatorum, nec me deserat odor gratiarum tuarum, vt gloriam resurrectionis percipiam sempiternam. Amen.

Contemplatio XLIX.

Virgo Maria, Arbor.

1. **A**Rbor illa tu es, beatissima Virgo Maria, de qua scribitur, *Quia erat Arbor in medio terre, & eius altitudo nimia; magna Arbor, & fortis; D. m. 4.* & proceritas eius contingens cælum: aspectus eius usque ad vniuersos terminos terre; folia eius pulcherrima, & fructus eius nimius: & esca vniuersorum in ea: *7. & 17.* subtus eam habitabant animalia & bestie; & in ramis eius conuersabantur volucres cæli & ex ea vescebatur omnis caro. Tu sanctissima Virgo Maria, es Arbor in medio terre, id est, in medio Ecclesiæ, omnibus communis, sine personarum acceptione: Tu es namque lignum vitæ in medio Paradisi. Altitudo tua fuit humilitas nimia: nam altū cōmune est ad sursum & deorsū: ideo dicitur *Pateus altus*, id est, *profundus*. Altitudo igitur, siue profunditas, est tua humilitas nimia: profundè enim eras radicata, & inde humorem gratiæ plus habebas, & firmitus stabas. Tu es *Arbor magna & fortis*, magna, meritis; fortis, operibus bonis; alta, fide & humilitate; magna, charitate; fortis, patientiâ, alta, spe. Tu es *Arbor cuius proceritas tangit cælum*, spe videlicet, & cælesti conuersatione; quia in corpore humano Angelicam ducebas vitam.

2. Tu es *Arbor*, cuius aspectus usque ad terminos uniuersae terrae: quia oculi tuae miserationis etiam ultimos peccatores non despiciunt, sed eos benignè respiciunt; etiam usque ad terminos uniuersae terrae, id est, in quibus finita & terminata est omnis terrenitas, ut in sanctis & pauperibus spiritu. Tu es *Arbor*, cuius folia sunt pulcherrima, id est, verba tua irreprehensibilia, in quibus non fuit aliquid prauum, neque peruersum. Pulchritudo igitur foliorum, fuit discretio verborum tuorum, quae operabantur salutem peccatoribus.

Eccl. 1. in Missa de B. V. Psal. 77 25. 3. Tu es *Arbor*, cuius fructus nimius: quia Virgo Maria, *Quem totus non capit orbis, in tua se clausit viscera factus homo.* Tu es *Arbor*, in qua est *esca* uniuersorum, id est, Angelorum, & hominum: quia per te homo manducauit panem Angelorum. *Esca* est etiam magna scientia tua, & abundans doctrina. Tu es, *Arbor* subter quam habitabant animalia & bestiae; quia quantumcumque animalis & bestialis per peccatum quis fuerit, si ad te toto corde confugerit, ipsum protegis ab aestu Solis, id est ab ira benedicti Filij tui, & incendio gehennae, & feruore concupiscentiarum carnalium & delictorum saecularium. Tu es *Arbor*, in cuius ramis conuersabantur volucres caeli, id est, spirituales viri, quorum conuersatio in caelis est. Rami etiam sunt virtutes & exempla tua. Tu es *Arbor*, ex qua pascebatur omnis caro: quia, scilicet sanctissimis uerbis tuis nutritus est ille, qui dat escam omni carni: imò ille, qui dedit se escam timentibus se.

Psal. 135. 25. Psal. 110 5. 4. O beatissima Virgo Maria, fac me miserum peccatorem requiescere subter te *Arborem* pulcherrimam, ut ibi refrigerari valeam ab incendio vitiorum, quae animam meam urunt & inducunt ad gehennam perpetuam. Da mihi, Virgo Maria purissima, refrigerium: ut exclusus vitijs, sub tua pietate quiescam, & te miserante opera miritoria agam, per quae obtinendam vitam aeternam. Amen.

Contemplatio L.

Virgo Maria, Lignum.

Exch. 17 Gen. 2. 9 Exod. 15. 25. 1. **B**enedictus Filius tuus, sacratissima Virgo Maria, sic loquitur de te; *Exaltaui Lignum humile*, id est, te Virginem Mariam in Matrem suam, & Reginam Paradisi. Et hoc merito tuae humilitatis; *Sicut humiliasti Lignum sublime*; id est, diabolum, qui superbiendo voluit exaltari. Tu es, gloriosissima Virgo Maria, *Lignum vite*, quod viridius erat ceteris lignis: sic tu sanctior es ceteris Sanctis; quia viror designat sanctitatem. Non enim data est ad mensuram tibi gratia, sed superexcellenter datum est tibi à Filio tuo quidquid dari potuit purae creaturae. Tu, benedicta Virgo Maria, es *Lignum*, quo dulcorata est aqua amara, id est, multiplex miseria, vel

vel tribulatio; quâ totum mundum respergit prima Mater: sed tu, Virgo piissima, amaritudinem nostræ perditionis conuertis in dulcedinem salutis æternæ, Filio tuo benedicto mediante.

2. Tu, benedicta Virgo Maria, es *Lignum plantatum secus decursus aquarum*, id est, secus peccatores fluxibiles; quasi aquæ, penes quos firmiter radicata es affectu compassionis, & misericordiæ. *Lignum* esse diceris propter soliditatem constantiæ, plantatum per stabilitatem secus decursus aquarum, per sapientiam & gratiam: scriptura siquidem nomen *aque* luminis pro sapientiæ magnitudine, pro gratiarum multitudine, pro scripturarum diuersitate. Tu igitur *Lignum* fructiferum dedisti, *Pomum* salutiferum, id est, Christum contra pomum intoxicatum toxico inobedientiæ, de quo dictum fuerat Adæ, *In quacumque die comederis morte morieris*. Sed in tuo gloriosissimo *Pomo*, inuenta est theriaca, quâ toxicum illud effugatum est. Istud benedictum *Pomum* est pulcherrimum visu, delectabile tactu, suauissimum olfactu, sanum gustu, & sanatiuum effectû. Tu, Virgo Maria purissima, hoc *Pomum* benedictum obedientiâ fidei concepisti, quo sublatum est de medio nocumentum pomi illius noxiatis. Psal. 135.

3. Tu, sanctissima Virgo Maria, huiusmodi fructum benedictum produxisti iuxta genus suum, id est, benedictum. Tu enim eras benedicta in mulieribus, & idèd digna fuisti illi fructificare, qui est super omnia benedictus in sæcula. Produxisti igitur illud, tu pulchra, pulcherrimum; tota dulcis dulcissimum, tota suavis, suauissimum; tota delicata, delicatissimum; tota colorata, coloratissimum; tota viuifica, viuificentissimum; & tota sapida, sapidissimum. Ora igitur illum, clementissima Virgo Maria, tuis assiduâ intercessionibus, ut à me mortiferum venenum peccati auferat, & illo *Fructu* benedicto frui merear per infinita sæcula sæculorum. Amen. Rom. 9.

Contemplatio L I.

Virgo Maria, Virga.

1. **T**V Virga, beatissima V. Maria, à *Viriditate* seu virore dicta es. Nam egrediens à *Virga* viriditatem sanctitatis & munditiem habuisti; quia sanctificata in utero fuisti; & idèd nata fuisti tota sancta; nec postea inclinata per peccatum vel amorem terrenorum. Virga de terra modicum occupat, sic tu, Virgo Maria, modicam terram occupasti; quia in paupertate semper vixisti. Virga tenuissimo cortice tegitur: sic, gloriosissima Virgo Maria, tecta fuisti subtiliter per amorem secretæ & solitariæ vitæ; designata per Saram uxorem Abrahæ latitantem in tabernaculo. Virga semper tremula est: sic tu, sanctissima Virgo, tremula fuisti, id est, Deum timuisti filialiter, & castè: idèd de te scribitur, *Mulier timens Deum ipsa laudabitur*. Prov. 31.

Timuisti enim audiens salutationem Angelicam ; ideò dictum tibi fuit,
Luc. 30. Verimeas Maria.

2. Virga levis est & sursum erecta : sic tu , Virgo Maria , levis fuisti per contemptum temporalium : omnis enim res quantò magis terrenorum quantitatem participat , tantò ad terram facilius se inclinat : & ideò amor terrenorum reddit ponderosum : sed quantò minùs terrenus est , tantò facilius se in altum leuat , amor enim Dei , *ignis* appellatur , qui naturaliter tendit sursum : sed mundanus amor , velut terrenus amor , trahit deorsum ; propter hoc iustissima Virgo Maria , levis eras , & ad ea quæ sursum sunt , iugiter te erigebas per dilectionem Dei & proximi . Virga , ex quo crescere incipit , iugiter crescit , donec perueniat ad perfectum crementum : similiter tu , benedicta Virgo Maria , semper creuisti de virtute in virtutem ex multitudine charismatum & gratiarum : & ideò dicta es *Gratiâ plena* . Numquam tamen crescere defines , quoad reuerentiam , laudem , & amorem ex memoria beneficiorum tuorum . Virga leui statu auræ mouetur , & agitur : sic tu , gloriosissima Virgo Maria , leui aurâ deuotæ orationis flecteris , & leui tactu bonæ operationis ad nos miseros peccatores . Virga florida , si deorsum flectatur , secum inclinat florem suum : sic tu , benedictissima Virgo Maria , inclinas te ad orationes nostras , & tecum flectis *Florem* tuum , scilicet vnigenitum tuum , orando vt nobis miseris indulgeat , & misereatur .

3. Virga quasi Mediatrix est inter radicem & fructum : sic tu , benedicta Virgo Maria , Mediatrix es inter nos & Filium tuum : quia sicut Filius tuus est Mediator Dei & hominum ; scilicet inter nos & Patrem : sic tu inter nos & Vnigenitum tuum . Tu Mater Regis , tu Mater serui , tu Mater Dei , tu Mater hominis , tu Mater rei , tu Mater iudicis , sic Mater vtriusque , scilicet Dei & hominis ; per gratiam ; & ego miser peccator ne discordiam habeam cum Filio tuo propter inobedientiam , pacifica mihi illum tuis precibus , vt vitam æternam acquiram . Amen .

Contemplatio L II.

Virgo Maria, Myrrha.


1. **Q**uasi *Myrrha electa* odorem dedisti *suauitatis* , gloriosissima Virgo Maria . Nam arbor *Myrrha* designat Iudæam propter amaritudinem peccatorum . Ab ista arbore effluxit gutta Myrrhæ , scilicet tu , gloriosissima Virgo Maria : vt possis dicere , *Sicut Myrrha dedi odorem suauitatis* : quia *Myrrha* præcipui odoris est . Tu , beatissima Virgo Maria , *Myrrha* es electa . Illa enim *Myrrha* dicitur *electa* : quæ sine vulnere manat ab arbore , & illam amaram carnis mortificationem designat , quæ præfert anima nullo peccati vulnere sauciata . Talem *Myrrham* distillasti tu , odorifera V. Maria ,

quæ licet peccati vulnus non haberes, tēmet ipsam tamen multipliciter mortificare voluisti. *Myrrha* corpora peruncta seruat à corruptione: sic tu, sanctissima Virgo Maria, per gratiam meritum & exemplorum, & orationum tuarum, seruitores tuos, & alios tibi deuotos à corruptione vitiorum.

2. *Myrrha* restringit humores à capite affluentes, similiter tu, beatissima Virgo Maria, cogitationes & tentationes, quæ sunt caput peccati, per assiduas deprecationes euellis & restringis. *Myrrha* consumit putredinem vulnerum: sic tu, piissima Virgo Maria, animas peccatorum putrefactas iteratione multiplici vitiorum, sanas, & in eis consumis putredinem & fetorem tuis sanctissimis orationibus, & exemplis, & à recidiuis defendis; *Myrrha* spinæ est similis: & per spinas intelliguntur peccatores: tu verò, gloriosissima Virgo Maria, apparuisti quasi spina, quando legem totam de mulieribus, quæ de viris conceperant, & consuetudinem obseruasti; *Myrrha* est arbor in Arabia, quæ interpretatur *Vespera*, & *Myrrha* interpretatur *Amaritudo*. Tu, benedicta Virgo Maria, interpretaris *Mare* Luc. 2.
22. 23.
18. *amarum*, propter multas amaritudines quas sustinuisti in Filio, & fuisti Arbor *Myrrha* in vespera sacratissimæ Passionis benedicti Filij tui.

3. *Myrrha* est arbor quinque cubitorum, quæ crescit in altum: sic tu, pretiosissima Virgo Maria, per quinque cubitos creuisti in altum. Primus cubitus fuit sanctificatio tua in vtero materno; secundus fuit tua Natiuitas beatissima; tertius fuit gloriosa Annunciatio tibi facta per Gabrielem Archangelum, quod benedictum Filium Dei conciperes in vtero tuo virginali operante Spiritu sancto; quartus fuit quando more purgandarum mulierum post partum ad Templum accessisti, & benedictum Filium tuum obtulisti, & in manibus sancti Simeonis tradidisti; quintus fuit quando denictis hostibus transitoria huius miseri mundi reliquisti; & ad cælum ascendidisti. Isti quinque cubiti te leuauerunt, & ad dexteram tui benedicti Filij collocauerunt.

4. O *Myrrha* electa, da mihi Myrrham amaritudinis, vt de commissis doleam, & pœnitentiam agam. & anima mea à putrefactione peccatorum conseruetur. Da mihi odorem suauitatis gratiarum & misericordiarum, & piarum orationum tuarum; quæ me in altum per contemplationem eleuent, & finaliter mihi regnum tribuant sempiternum. Amen.



Contemplatio LIII.

Virgo Maria, Lectulus.

1. Designata & figurata es, beatissima Virgo Maria, per lectulum Salomonis, quem *Sexaginta fortes* ambiebant *ex fortissimis Israel*, Cant. 3.
7. *tenentes gladios, qui erant ad bella doctissimi, vniuscuiusque ensis super femur suum propter timores nocturnos.* Lectulus Salomonis, id est, veri, & pacifici Iesu

I ii ij

Virgo
ritudi-
a, glo-
auia-
rrha es
rbore,
nullo
Maria,

Christi tu es, sanctissima Virgo Maria, quia in te deitatis inclinatio capite Dei Filius requieuit velut in lectulo. Cum autem omnes spiritus cœlestes sint administratorij & mittantur in ministerium propter eos, qui hereditatem capiunt salutis; & non solum ad ministerium hominum minores mittantur, sed etiam superiores de ordine Seraphim, qui propter charitatis ardorem dicuntur, *Flamma ignis, vel ignis urens*: ostendis tu, Virgo Maria, quod ad tui custodiam & obsequium, non inferioris, sed superioris dignitatis Angeli deputati sunt; cum lectulum, id est te, ambiant *Sexaginta fortes de fortissimis Israel* diligenti custodiâ, & obsequiosâ reuerentiâ: Angelici nempe spiritus, fortes inter fortissimos spirituum, qui pro eo quod alliduâ contemplatione Deum intuentur, Israël nomine designantur. Quorum fortitudo, prudentia, & obsequij promptitudo demonstratur: cum dicitur, *Omnes tenentes gladios*: in quibus significatur potestas debellandi spiritus malignos. Et cum dicitur, *ad bella doctissimi*; ostenditur eorum prudentia ad obuiandum contra omnes insultus dæmonum: & sic per ministerium Angelorum repulsa est à te, Virgo Maria, omnis tentatio inimicorum.

2. *Lectulus tuus*, id est, uterus tuus virginalis, sacratissima Virgo Maria, floridus est per intemeratam virginitatem; in quo benedictus Sponsus beatissimam copulam celebravit, quâ humanæ naturæ dignatus est misericorditer copulari. Tu es, Virgo Maria, *Lectulus* non *Lectus*, propter humilitatem. Floridus fuisti *Lectulus* omnium florum, id est, virtutū varietate: ibi rosa excellentissimæ charitatis, ibi lilium singularissimæ castitatis, ibi viola omnimodæ humilitatis. In hoc sanctissimo *Lectulo* Iesus Christus gloriosissimus requieuit sine strepitu prauorum motuum, aut aliquarum malarum cogitationum. Tu, benignissima Virgo Maria, es *Lectulus* sacratissimus, quoad nos: quia sicut in *Lectulo* quiescimus; ita per te ad virtutes attingimus, in quibus anima requiescit, quæ prius in via laborabat.

3. O misericordissima Virgo Maria, audi me miserum peccatorem. *Lectulum* meum, id est, animam meam ex diuina ordinatione fortes Angeli custodiebant: sed ex mea malitia, ipsos, quantum fuit in me, eieci; & inimicos capitales intromisi, qui circumdederunt animam meam; & non permittunt me quiescere, sed urgent aduersus commodam animæ laborare. Adiuua me, clementissima Virgo Maria; expelle illos à me vi tuarum deprecationum, & introduce mihi ordinatos à Deo, quibus suffragantibus anima mea in virtutibus requiescens, in æterna æterni Regis tabernacula finaliter collocetur. Amen.

Contemplatio LIV.

Virgo Maria, Vena aquarum viventium.

1. **V**ena es aquarum viventium, sanctissima Virgo Maria; quia quid-
quid venit beatitudinis ab illo magno mari, id est, ab illa infinita Jerem.
17.13
Dei bonitate Trinitatis, ad genus humanum, totum per hanc *Venam*, id
est te, beatissimam Virginem Mariam, defluxit, & defluit omni die. Tu,
benignissima Virgo Maria, es *Vena vite*, sicut est sanguis; quia, sicut vita
carnis occultè decurrit per venam: sic benedictus Filius tuus, qui est vita
animarum nostrarum, occultè venit ad nos per te Virginem Mariam. Ideo
de te ipsa dicis: *In me est omnis spes vite & virtutis*; in te est namque spes vi-
tæ; quia per te speramus habere vitam, in te est omnis *Spes vite* habendæ, & Eccles. 2.4.
25.
continuandæ. In te est spes nostra, *Spes scilicet vite & virtutis*, per fidu-
ciam impetrandæ: quia tu es Arcus in nubibus in signum iustificationis:
quia iustificati ascendunt per te ad æternam gloriam. In te est omnis *Spes*
& antiquorum, & nostra, nec in aliquo alio ponenda est spes, nisi in bene-
dicto Filio tuo, & te; quia *Maledictus homo qui Spem suam ponit in homine*.
Tu es, *Spes vite æternæ* habendæ, & *virtutis* ijs, qui pugnant contra vitia,
In te est ille per carnis assumptionem à quo est *Spes vite* triplicis, vitæ na-
turæ, vitæ gratiæ, & vitæ gloriæ.
2. *Spes* etiam es *virtutis*; quia ipse, qui dat lapso virtutem, & ijs, qui non
habent fortitudinem, robur multiplicat, etiam dedit tibi omnes virtutes Gru. 9.
13.
Theologicas & Cardinales: quas etiam virtutes sperantibus in te submini-
stras tuis orationibus & exemplis. Et sicut Adam & Eva fuerunt vena mor-
tis: sic, gloriosissima Virgo Maria, fuisti & es *Vena vite*, id est, ad obtin-
dam nobis vitam sempiternam. Tu, benedicta Virgo Maria, es *Vena oc-
cultæ* per sacratissimam conversationem: unde in thalamo clausa inuenta
fuisti à Gabriele Angelo. Tu, benignissima Virgo, *Vena* es tenuis per vo-
luntariam paupertatem; *Vena* concava per veram cordis humilitatem,
Vena subtilis ad declarandas nobis fallaces astutias inimici: quia tanta est
pietas tua & amor ad salutem nostram, quod semper vigilas ad custodiam
populi Christiani, quem tuis sanctissimis precibus & exemplis defendis.
Per te enim *Venam* misericordiæ venit ille *Fons æternus* ad nos abluendum
à peccatis, irrigandum virtutibus, & fecundandum bonis operibus &
exemplis.
3. *O Vena vite*, pietatis, & misericordiæ, aridum est cor meum: riga il-
lud aquâ illius æterni *Fontis*, cuius aquæ non deficiunt. Durum est cor
meum; mollifica illud liquore gratiæ filius sacratissimi *Fontis*. Sterile &
infertile est cor meum: fecunda illud floribus sanctarum cogitationum, &

fructibus bonorum operum; ut per te *Venam aqua vite* perueniam ad *Fontem vitium*, à quo recipiam perpetuam aquam salutarem. Amen.

Contemplatio LV.

Virgo Maria, Castellum.

Luc. 10. 1.
38.

TV, *Castellum* nominaris, sacratissima Virgo Maria, propter humilitatem; quia *Castellum* dicitur à *Castro* diminutiue, in quo humilitas designatur. Et licet tu, beatissima Virgo Maria, *Castrum* esse dicaris: magis tamen *Castellum* appellaris propter humilitatem: quia virtus humilitatis tui tibi specialissimum, potentissimum, & fortissimum munimentum. Tu, beatissima Virgo Maria, *Castellum* nominaris à fortitudine: ratione maxima charitatis, quæ in te fuit: Ideo scribitur, *Quod fortis est, ut mors*, *dilectio*. Tu, sanctissima Virgo Maria, *Castellum* es; quia casta & humilis, & in charitate fundata, & firmata. Tu benedicta Virgo Maria, *Castellum* es propter uteri virginalis diuersorum angustissimum contra impetum inimici tyranni: munitissimum, & fundatum super firmam petram, quæ est Christus. Tu, dilectissima Virgo Maria, *Castellum* es, quoad te, & *Castrum* quoad nos: quia omnibus impugnat à triplici concupiscentia, vel ab hoste multiplici, fidele & inexpugnabile refugium es, si ad te refugitur sapienter.

Cant. 8.
6.

2. *Castellum* etiam fuisti ipsi Christo, in quo ipse se recepit propugnator veniens ad saluandum nos, & ad debellandum hostem, qui custodiebat atrium suum. Rogauerat autem genus humanum propugnatorem celestem, dicens, *Apprehende arma & scutum, & exurge in adiutorium meum*: & exaudita est oratio ipsius. In ingressu huius *Castelli* apprehendit etiam tunc arma, & scutum, id est, animam & carnem, ut contra diabolum exurgeret nobis in adiutorium: carnem & animam, ad hoc ut se à diabolo vindicaret. Retribuit enim indignationem, & vicem reddidit pro vice. Nam sicut diabolus indignatus, quod homo locum haberet à quo ceciderat, duxit eum in perditionem: sic Dominus indignatus, quod homo locum haberet, ad quem ceciderat diabolus, ipsum reduxit à perditione ad salutem. Vicem quoque pro vice reddidit; quia deprædatus fuit diabolum, de potestate eius hominem eripiendo; sicut diabolus ipsum fuerat deprædatus.

Psal. 34.
2.

3. Tu, pretiosa Virgo Maria, es *Castellum*, quia *Castellum* dicitur qualibet turris, & murus in circuitu eius, quæ duo ad inuicem se defendunt, ita ut hostes per murum ab arce, & à muro per arcem arceantur. Tale igitur *Castellum* fuisti tu, potentissima Virgo Maria, quia virginitas mentis & corporis quasi murus ita te vallauit vndique, ut nullus vnquam esset libidini accessus, nec sensus tuus aliquam carnis corrumperetur illecebrâ.

4. O benignissima Virgo Maria, grauissimè impugnor ab hostibus, di-

uersis tentationum telis: non valeo eis resistere propter eorum nimiam importunitatem: nescio quò fugiam; quia vñdecumque me sequuntur & aduersantur. Ad te confugio, Virgo Maria, refugium miserorum. Introduc me in domum misericordiae tuae; vt ibi saluer: & inimici mihi non noceant, sed in gratia benedicti Filij tui & tua viuens, gloriam obtineam sempiternam. Amen.

Contemplatio LVI.

Virgo Maria, Virgula fumi.

1. Comparata es, beatissima Virgo Maria, *Virgula fumi ex aromatibus*: quia, sicut *Virgula fumi* gracilis est; sic tu, benedicta Virgo Maria, *Cant. 3.* gracilis fuisti per paupertatem, quia omnia corporalia contempsisti; vel, *6.* si ea aliquando habuisti, largiter erogasti. Gracilis fuisti per carnis extenuationem: quia licet numquam peccaueris, semper in poenitentia permansisti. Gracilis fuisti, quia coelestibus extenuata disciplinis & subtilis vitâ contemplatiuâ fuisti; vt sine obstaculo transires per arctam viam; & intrares portam angustam, quæ ducit ad vitam. *Virgula fumi* liberè alta petit: sicut tu, pretiosissima Virgo Maria, alta peristi per subtilitatem contemplationis, & rectitudinem intentionis. *Virgula* agilis est: sic tu, gloriosissima Virgo Maria, agilis fuisti; leui enim cursu, & leui saltu omnes victorum spinas & foueas transiliisti. *Virgula* leuis est: sic tu, sanctissima V. Maria, leuis fuisti, id est, sine ponderositate peccati, & idèò continuò ferebaris desiderio æternorum. *Virgula* flexibilis est: sicut tu, humillima Virgo Maria, flexibilis fuisti per humilitatem, quoad te, per obedientiam, quoad Deum; & per compassionem & pietatem: quoad proximum.
2. *Virgula fumi* obscura est: sic tu, benignissima Virgo Maria, obscura fuisti per tribulationum multitudinem, quas passa fuisti amore benedicti Filij tui, & idèò dicebas, *Nolite me considerare quòd fusca sum, quia decolorauit me Sol*, id est, gloriosissimus Filius meus. Tu, dulcissima Virgo Maria, es *Virgula fumi ex aromatibus*, scilicet per bonam operationem & deuotionem Dei & proximi: vnde *Virgula fumi* de igne procedit, quia desiderium ex amore venit. Tu enim ardore Spiritus sancti accensa, sic ascendendo profecisti in gratia, sic ascendisti in gloria, quòd velut euanesceus, omnem humanam cogitationem excedisti: idèò dicta fuisti *Virgula fumi*, quæ naturaliter ascendit, & quasi occultè: quia visibiliter ascendens dispareret in momento. Similiter & tu, Virgo Maria, disparuisti; quia quantum ascenderis, ratio humana non capit: Modus enim ascendendi occultus fuit, quia vtrum in sola anima, an in anima simul & corpore ascenderis, præelegit Ecclesia plus nescire, quàm temerè definire: tamen piè creditur quòd in corpore & anima glorificata ad dexterâ benedicti Filij tui collocata existis. *Math. 7. 14.* *Cant. 1.*

3. O misericordissima, V. Maria, fumus vitiorum excæcavit oculos mentis meæ, fumus tribulationum spiritalium & corporalium lachrymosum reddiderunt cor meum: ne cognoscerem me ipsum, & in quibus deficio vel proficio. Adiua me, pijsima Virgo Maria: tolle & aufer à me huiusmodi fumum; vt videam quæ agenda sunt, & illa opere compleam, ad laudem & honorem tui benedicti Filij, ac vtilitatem animæ meæ sempiternam. Amen.

Contemplatio L.VII.

Virgo Maria, Vas.

Vas admirabile, & nouum es, sacratissima Virgo Maria; quia nunquam tale inuentum est: in quo fuerunt multa mirabilia, & multæ nouitates. Tu, Virgo beatissima, es *Vas* eximium, propter continentiam, quia tu continebas tuum continens: & licet nullum aliud Vas possit se maius continere. Tu, tamen, Virgo Maria, continuisti illum, quem totus non capit orbis, & à quo tu ipsa continebaris. Tu *Vas admirabile* propter continendi modum: quia cum Deus sit in omni creatura per essentiam, & in solis iustis per gratiam, his duobus modis in te fuit, & nouo & mirabili modo per vnionem. Tu es, Virgo Maria, *Vas admirabile*, propter operositatem, quæ superat materiam. Fuerunt namque in te omnes varietates virtutum & donorum, omnes sculpturæ desideriorum sanctorum, & omnes picturæ sanctarum cogitationum. Tu, Virgo Maria, es *Vas admirabile*, propter recipiendi & emittendi modum ineffabilem & singularem: quia contra morem aliorum vasorum, nec fractum, nec apertum est in recipiendo vel emittendo: recepisti enim & emisisti cum integritate, vt stella radium, & flos odorem. Tu, Virgo Maria, es *Vas admirabile*, opus *Excelsi*, in quo bene fabricando studuit excelsus Dominus.

Eccle. 43

2.

Psalm. 73

14.


2. Tu es *Vas* illius artificis, qui fabricatus est auroram & Solem: opus excogitatum ante secula, consummatum in fine seculorum. *Vas* profundissimum, per humilitatem; solidissimum, per patientiam; integerrimum, per virginitatem; amplissimum, per charitatem; purissimum, per omnimodam puritatem; capacissimum, per desiderium: & ideo balsamum diuinæ gratiæ dignum & congruum est continere. *Vas* capax gratiæ adeo, & maxime per humilitatem, quod sola meruisti impleri, vt tibi & toti mundo sufficeret copiose. Vas quod seipsa impleuit operata Dei sapientia, & ob ysis inæstimabilem pulchritudinem, in te nouem mensibus corporaliter habitauit. Vas, (inquam) de quo dicitur, *A Domino factum est istud, & est mirabile in oculis nostris* quia in te fuit consors contrarietas contrariorum, scilicet mortalitatis & immortalitatis, virginitatis & fecunditatis: & quod mirum fuit, rationis & fidei. Tu, benedicta Virgo Maria, *Vas esse admirabile*.

Psalm. 117

23.

admirabile, quod celestis auri faber, qui sapientiâ suâ de luto aurum fecit, formauit de luto humanæ naturæ, non tamen luteum, sed verè aureum: de quo etiam vase manente integro, ineffabiliter formauit postea Vas corporis sui, & in hoc opere sapientia Dei vicit malitiam diaboli, qui in primis parentibus aurum humanæ naturæ redegerat in lutum.

3. *OVas misericordie*, ad te recurro ego vas contumeliæ, plenum luto fœtidissimo diuerforum vitiorum: sed pijsima Virgo Maria, scio te habere tantam misericordiam, ex qua qui plus haurit, plus de ea in te inueniet. Digneris mihi eam dare, per quam mundare possim vas meum immundum; vt de vase contumeliæ, fiat vas gratiæ, & in fine cum omnibus Sanctis gloriam obtineam sempiternam. Amen.




P A R S X V.

DE BONIS QUÆ HABEBIMVS PER
gloriosam Virginem Mariam.

Contemplatio I.

De primo Bono quod habebimus per Virginem Mariam.

1.  ER te, clementissima Virgo Maria, eligimur & inuitamur & intramus ad cœnam magnam illius celestis Patris-familias, de quo scribitur, *Homo quidam fecit cœnam magnam. Luc. 14*. Homo iste singularis est, qui veram carnem de te assumpsit. 17.

Singularis, quia solus Deus & homo, quia solus sine peccato, solus sine lœsione maternæ virginitatis conceptus, solus sine grauiamine matetni ventris portatus, solus natus ex vtero Matris absque dolore patientis; quia solus morte suâ genus humanum potuit redimere, solus morte suâ, mortem potuit occidere, solus ab inferis electos suos subtrahere, solus in sepulchro corruptionem non videre, solus inter mortuos esse liber, solus semetipsum à mortuis suscitare, solus virtute propriâ corporaliter in cœlum ascendere, soli datum est à Patre ad Patris dexteram residere.

2. Ibi etiam suis electis cœnam parauit. Nam sicut cœna est refectio vespertina circa finem diei; sic cœna beatitudinis æternæ, plenariè dabitur electis post iudicium quod erit in fine mundi. In illa cœna electi mandu-

K K K

3. p. 16. cabunt panem, qui de celo descendit; & habet in se omne delectamen-
 20. tum, & omnis saporis suauitatem: & est manna absconditum, quod Deus
 Apoc. 2. electis suis re-promiserat. In illo delectabitur sensus inferior in contempla-
 27. tione deitatis, & sensus exterior in visione humanitatis. Vinum huius cœ-
 Deut. 32. nœ erit illud, de quo scribitur: *Sanguinem vœ biberent meracissimum*. Nam
 14. vœ Christus est, quæ nata est ex beatissima vite, id est, ex te gloriosissima
 Eccl. 23. Virgine Maria, quæ dicis, *Ego quasi viris*. Hæc vœ pressata fuit in torcula-
 24. ri crucis, & inde eliquatum est mustum nostræ redemptionis; de quo Da-
 Psal. 22. uid dicebat. *Calix meus inebrians quàm præclarus est*: quod scilicet mu-
 5. 5. stum vel sanguinem vœ meracissimum, modò sumimus in Sacramento,
 Cant. 5. & tunc sumemus ineffabili modo; quoniam dicitur cuius, *Bibite & ineb-*
 1. *riamini*: fructus huius cœnæ erit ille benedictus fructus, de quo Elizabeth
 Luc. 1. dixit tibi, beatissimæ Virgini Mariæ, *Benedictus fructus ventris tui*. Hic
 47. fructus modò emendus est pretio bonorum operum, vt ibi carius & deli-
 catus comedatur; vt tunc animæ bonæ negotiatici dicatur, *Date illi de*
 Prov. 31. *fructu manuum suarum*, id est, bonorum operum.

3. O benignissima Virgo Maria, laborem tuum vacuum reddidi, quia
 ad hanc cœnam vocare me fecisti ad quam venire possem, si vellem, gratiâ
 Dei adiuuante: sed propter peccata mea, ingressum in ipsam mihi prohi-
 bui. Adiuuare me digneris, purissima Virgo Maria, ora tuum Filium glo-
 riosissimum, vt mihi peccatori miserabili indulgere dignetur, meam vitam
 emendando, peccata remittendo, virtutes tribuendo misericorditer, per
 quas virtuosè operando, regnum consequi valeam sempiternum. Amen.

Contemplatio II.

De secundo Bono.

1. P Otentissima Virgo Maria, te mediante, in illa cœna cœlesti finitæ
 erunt miseriæ omnium. Vnde scribitur, *Auferet Deus omnem lacry-*
 mam ab omni facie, id est, omnem causam lacrymationis, *auferet etiam*
 Isa. 25. 8. *opprobrium populi sui*, id est, seruitutem diaboli, tunc enim finientur pec-
 cata, & claudentur in inferno velut in proprio loco, & ibi continuaban-
 tur cum operarijs suis. Ibi finientur dolores, sicut scribitur de Beatis, *Non*
 Apoc. 7. *cadet super illos Sol, neque ullus æstus*. Finietur memoria impiorum, quia
 16. nomen impiorum delebitur, de quo scribitur *Nomen eorum deleti in æternum*
 Psal. 9. 6. *& in sæculum sæculi*. Finietur omne maledictum: quia *Maledictum non erit*
 Apoc. 22. *amplius*. Tunc etiam Sancti confirmabuntur in bono, sicut Angeli post
 3. casum Luciferi: quia de cætero non peccabunt, nec volent, nec valebunt
 peccare.

1 Cor. 13. 2. Tunc erit ibi plenitudo omnium gaudiorum: quia tunc veniet quod
 10. perfectum est, & euacuabitur quod ex parte est. Ideo dicit Dominus

fidelibus vniuersis, *Gaudete & exultate, quoniam merces vestra copiosa est* Math. 5. *in celis.* Tunc replebitur in bonis desiderium electorum, quibus Deus ostendet omne bonum, sicut promisit Moyse & Abraham: & tantum bonum, quod oculus non vidit, nec auris audiuit, nec in cor hominis ascendit, nec propter immensitatem potest comprehendi, nec propter pretiositatem potest aestimari, nec propter pluralitatem potest dinumerari, nec propter ponderositatem potest ponderari, nec propter aeternitatem potest finire. Venier namque Beatis gaudium à superiori de aeterni Dei visione ab inferiori de corporis glorificatione, à posteriori de fine omnis miserie, ab anteriori de aeterna illius gaudij durabilitate, à dextris & à sinistris de iucunda societate, de qua cantabunt, *Ecce quam bonum & quam iucundum habitare fratres in unum.* Tanta namque erit ibi plenitudo gaudij, quod homines vndique circundabit & cinget. Sed nunc fide non attingitur, spe non comprehenditur, charitate non capitur, desideria & vota transgreditur, acquiri potest, aestimari non potest.

3. O benignissima Virgo Maria, ego iniquissimus peccator, priuatum me sentio plenitudinem tanti gaudij propter infinitas iniquitates meas & delicta innumerabilia, quæ commisi, quæ me tanto gaudio reddiderunt indignum. Deprecare ergo pro me peccatore, Virgo piissima, tuum Filium benedictum, vt, sicut hoc gaudium fidelibus tuis procurasti, sic tuis sanctissimis deprecationibus, finitâ huius vitæ miseriâ, ad illud ineffabile gaudium me introducat misericorditer, vbi viuam & maneam sine fine. Amen.

Contemplatio III.

De tertio Bono.

O Mne bonum per te, sacratissima Virgo Maria, habemus; & habere perpetuo speramus: si enim in hoc mundo ad senium veniamus, tamen in futuro saeculo te mediante, senectus nostra in iuuentutem conuerteretur; quia ibi non erit senectus, neque senectutis miseria; sed omnes occurrent in virum perfectum, in mensuram ætatis plenitudinis Christi; hoc est in ætate quasi triginta annorum: erit tunc *Mensura hominis quæ est Angelus Dei*, qui apparet in ætate & specie iuuenis, non senis aut pueri. Tunc erit ibi vita sine morte; quia *Iusti in perpetuum uiuent*, & mors ultra non erit: quia *portes hoc corruptibile induere immortalitatem*; vnde promittit Dominus suis Electis, *Ego uiuam, & vos uiuetis: & secundum dies ligni*, vitæ scilicet, *erunt dies populi mei*; quia in ætate, quâ Christus resurrexit, resurgemus omnes. Et tunc erit requies sine labore: ideo scribitur, *A modo iam discis spiritus ut requiescant à laboribus suis Spiritus*, id est, tota Trinitas beatificata dicit suis Electis, vt requiescant a modo, id est, a de præ beatitudine gloriosâ, *à laboribus suis*, id est, non alienis: quia sacratissima V. Maria, labor meus

Kkk ij

Sap. 3. 19 habebit me, quia *honorum laborum gloriosus est finis*; id est, benè laboranti. Ideo promittitur fidei animæ, *Requiem dabit tibi Dominus Deus tuus semper, & implebit in splendoribus animam tuam.*

Isa. 3. 11. 2. Cum hoc obtinebit electus, habebit ibi securitatem sine timore & perturbatione. Dominus enim dexterâ suâ tenet Electos suos, & brachio sancto suo defendit illos, ut requiescant, nec sit qui exterreat eos. Per te, beatissima Virgo Maria, gaudium etiam habebunt sine tristitia, sine interruptione, & sine diminutione. Propter hoc dicitur, *Sicut lachrymationem omnium habitatio est in te*, o superna Hierusalem: & quia delectatio huius gaudij non potest sufficienter exprimi, ideo dicitur, *Sicut lachrymationem omnium.* Et scio, Virgo Maria, quod principaliter concipietur illud gaudium de visione Dei; unde scribitur, *Videbo vos, & gaudebit cor vestrum.*

Sap. 5. 12. 3. O beatissima Virgo Maria, immenso dolore tristari deberet cor meum; quia tanta beneficia per te obtenta, propter peccata mea, si iustitia mihi fiat, perdidit. Ad laudes tibi referendas non surrexi. Indulgere mihi digneris, purissima Virgo Maria, exora Filium tuum benedictum, qui tantum bonum præparavit diligentibus se, ut mihi remittere dignetur delicta mea, de quibus poenitentiam agam, & condignè, eius misericordiâ adiuuante, satisfaciam; & sic vitam meam in virtutem commutem, ut illa gaudia electis suis promissa consequar in æternum. Amen.

Psal. 86. 7.
Ioan. 16. 22.

Contemplatio IV.

De quarto Bono.

1. **P**Acem inrer Deum & homines in mundo reformati tu, Virgo Maria misericordissima: quam etiam in futuro electi obtinent, & perpetuò obtinebunt sine discordia & perturbatione quacumque. Nam ibi nihil aduersi quisquam; vel à se, vel ab alio patietur; sed omnes delectabuntur in multitudine pacis, quæ erit perpetua; quia regnum Dic regnum est sempiternum, & potestas eius potestas æterna; & misericordia eius in miserationibus non in meritis nostris. Non erit ibi amplius sol ad lucendum per diem; sed erit electis Dominus in lucem sempiternam: hæc ultra erit ibi nox; quando autem damnatis æternaliter aduersperascet, tunc æternaliter orietur Sol iustitiæ, qui non deficiet eis: ideo scribitur, *Qui sequitur me non ambulat in tenebris, sed habebit lumen vite*; qui est Deus Rex; cuius splendidissimâ contemplatione *Fulgebunt iusti, sicut Sol, in regno Patris eorum.* Deus enim lux est, quam non capit oculus; odor, quem non spargit flatus; cibus, quem non diminuit edacitas; amplexus, quem non diuellit satietas. Est namque perenne solatium, lumen meridianum, temperies vernalis, venustas æstivalis, abundantia autumnalis, quies & terminatio hyemalis. Ibi etiam erit pulchri-

Ioan. 8.

12.

Math.

13. 43.

rudo sine deformitate: quia iusti splendent, sicut splendor firmamenti, & quod modo refulget diuersis luminibus, tunc lucebit diuersis remunerationibus.

2. Tunc, id est, post iudicium, *Fulgebunt iusti sicut Sol*; cuius splendor nescit defectum: quia Christus est Sol, cui iusti configurabuntur: & ideo *Philip. 2. 1.* *Saluatorem expectamus Dominum nostrum Iesum Christum, qui re-* *formabit corpus humilitatis nostre configuratum corpori claritatis sue.* Sed quid amplius, sanctissima Virgo Maria, erit tibi? corpus glorificatum cuiuslibet electi non detinebitur propria grauitate, vel alterius corporis oppositione; sed ubi volet Spiritus, ibi statim erit corpus; anima siquidem mouebit corpus suum, vbicumque voluerit in instanti ab Oriente in Occidentem; non propter indigentiam, sed ad suæ nobilitatis ostensionem. Motus etiam corporis tunc erit, sicut nunc motus animi. Tanta enim erit Sanctorum agilitas, & libertas, quod omnia elementa erunt eis peruia, & penetrabilia; nec ipsos aliqua creatura poterit retinere. Sicut corpus Dominicum post Resurrectionem, nec sepulchrum potuit retinere, nec lapis superpositus obistere, quin exiret. Erit enim tunc corpus iusti leue, sicut coruscatio: nec pedes ibit, sed more solaris radij, qui in momento ab Oriente patet in Occidentem.

3. Hæc & multa alia habebimus per te, gloriosissima Virgo Maria, sed nisi tuis sanctissimis orationibus me adiuues, à tanto bono ero alienus. Exora pietatem & misericordiam tui benedicti Filij, qui pondus peccatorum meorum auferat, vt ad illum locum beatificum velociter ascendam, & ibi quiescam per infinita secula seculorum. Amen.

Contemplatio V.

De quinto Bono.

1. **O** Dulcissima Virgo Maria, tu plenam & perfectam Dei dilectionem nobis procurasti in superna Ierusalem. Nam amouebitur multiplex impedimentum, quod modò est in dilectione nostra; Nam ibi erit illa perfecta dilectio sine velamine, sine dilecti auolatione, cum dilecti & optati securâ possessione, cum delectabili eiusdem fruitione, cum omnimodâ securitate: cum illa perfecta Dei dilectione erit sempiterna ipsius laudatio, quia, *Beati qui habitant in domo tua Domine, in secula seculorum laudabunt te. Exultationes Dei in gutture eorum.* Erit namque laus *Psal. 83.* ista in ore iustorum sine labore & tædio, sine fictione & fastidio. *Psal. 149.*

2. Erit ibi ista perfecta dilectio expressissima dilecti Dei assimilatio. Vnde scribitur, *Scimus quod cum Christus apparuerit, similes ei erimus.* Erit autem hæc assimilatio, exterior quoad corpus; quia ipse *Reformabit corpus* *1. Io. 3. 2.*

Kkk iij

Philip. 3. *humilitatis nostre, configuratum corpori claritatis sue.* Erit etiam hæc affi-
 milatio interior quoad animam; vnde scribitur, *Nam quos preceperit, & præ-*
 Rom. 8. *destinavit conformes fieri imagini Filij sui.* Ex ista perfectissima dilectione,
 29. *resultabit etiam dulcedo absque amaritudine, iuxta illud, Quam magna mul-*
 Psal. 30. *titudo dulcedinis tue Domine, quam abscondisti timentibus te!* De qua scribi-
 20. *tur: Non erit ultra domni Israel offendiculum amaritudinis & spina dolorem*
 Exech. *inferens undique per circuitum, & scient quod ego Dominus Deus.* Erit etiam
 23. 24. *ibi æterna benedictio absque maledictione: vnde dicitur supernæ Ierusa-*
 Psal. 47. *lem, Confortauit Dominus portas tuas, benedixit filijs tuis in te:*
 13. *& mandauit Dominus benedictionem & vitam usque in sæculum: & omne ma-*
 Psal. 132 *ledictum non erit amplius. Quia sicut fons semper scaturit aquas nouas, sic*
 3. *ille fons dulcissimus pietatis & misericordiæ, nouas dilectiones, benedi-*
 Apoc. *ctiones, & consolationes electis suis iugiter subministrat. Vnde electi mi-*
 22. 3. *rantur, nec deficiunt in illum quem prospiciunt, fruuntur nec fastidiunt,*
quo frui magis sitiunt.

3. O benignissima Virgo Maria, vnde hoc mihi, vt sic fuerim corde du-
 rus, oculo cæcus, mente prostratus, memoriâ hebetatus, & circa salutem
 animæ sic remissus quod tanta bona non cogitauerim, tanta dona mente
 non conceperim, tot, caelestes delectationes electis promissas non fuerim
 contemplatus, nec ad illas cogitatione & operatione aduolauerim toto
 corde, nec pro ipsis habendis laborauerim toto posse? Heu! piissima virgo
 Maria, expauesco: quia promissa in obliuionem dando, miserabilem vi-
 tam duxi. Et animum meum solum ad terrena & diuersa peccata totaliter
 inclinaui: succurre tantæ necessitati meæ, Virgo Maria, exorando pretio-
 sissimum Filium tuum qui me eleuet de terrenis, & ad superna perueniat;
 atque soluto miseræ carnis vinculo misericorditer me perducatur. Amen.

Contemplatio VI.

De sexto Bono.

1. **I** Neffabile & inæstimabile gaudium per te nobis datum est, pretiosissi-
 ma Virgo Maria, de Filij tui visione, cuius decorem diuinitatis, vide-
 bunt animi, & oculi glorificationem humanitatis. Hæc autem visio erit
 Ioan. 17. *intellectualis, primaria & comprehensua: quia Hæc est vita æterna, vt co-*
 31. *gnoscant te verè Deum & Iesum Christum.* Tunc enim cognosceret, quomodo
 Filius in Patre, & quomodo Pater in Filio; & quomodo Spiritus in vtro-
 que. Cognosceretur Trinitas personarum, & vnitas substantiæ, quidquid
 autem deliciarum fuit in hoc mundo à principio eius vsque in finem, est ad
 illas delicias, & ad illud gaudium, quasi gutta aquæ, respectu totius maris.
 Tanta namque est illa species visionis diuinæ, gloriosissima Virgo Maria;
 quam nobis obtinuisti; quod damnari mallent, si fieri posset, esse in om-
 nibus pœnis inferni, & videre faciem Dei; quam omnibus pœnis carere,

DE BEATA VIRGINE.

443

& eius speciem non videre. Absorberet enim delectatio illius visionis, omnem etiam summam miseriā, quæ excogitari posset. Et ideo grauius erit damnatis audire dicentem, *Ite à me maledicti in ignem æternum.* Tanta enim erit delectatio videre faciem Dei; quod si quis staret ante faciem eius, & ipsum videret, non reflecteret oculos ad alia intuendum per momentum: & eius visio mille annorum, videtur visio vnius horæ. Math. 25. 41.

2. O sanctissima Virgo Maria, si posset quis in hoc seculo per mille millia annorum, gaudere in iuuentute, quæ non senesceret, & in pulchritudine, quæ non marcesceret; in fortitudine, quæ non decreveret; in agilitate, quæ non pigresceret; in subtilitate, quæ non grossesceret; in amicitia, quæ non tepesceret; in abundantia, quæ non deficeret: tantò minus esset hoc gaudium, momentaneo gaudio de visione Dei, quantò minor vna guttula ro-
ris toto mari. Erit enim illa beatissima visio sine omni impedimento, sine obliuione, sine errore, sine ignorantia, sine caligine, sine discontinuatione, sine medio. Ista visio Dei est salus animarum, vita animarum, pastus animarum, gaudium cordis, diuinæ laudis materia, & illuminatio Beatorum, quia splendidissima contemplatione *Fulgebunt iusti sicut Sol, in regno Patris.* Ibid. 13.

3. O felicissima procuratrix, Virgo Maria, quæ tanta gaudia nobis procurasti; & adhuc non desinis quotie procurare; ora tuum Filium benedictum, vt me miserrimum peccatorem, eiec- tum & separatum à tantis gaudijs cælestibus reconciliare dignetur, & misericorditer reducere ad illum beatissimum locum, quem propter mea peccata perdidisti: vt illi & tibi seruiam per infinita secula seculorum. Amen.

Contemplatio VII.

De septimo Bono.

1. **S**Cio, purissima Virgo Maria, quod tuā humilitate & fide mediantibus gaudium electorum prouenit à iucundissima visione glorificatæ humanitatis Christi. Perfectissimum namque & omnimodā suauitate & dulcedine plenum erit illud gaudium, videre hominem hominis conditorem. Tunc enim cognoscent electi; quomodo tu, intemerata Virgo Maria, facta fuisti Mater, manens Virgo quomodo sine corruptione fecunda fuisti, & sine grauiamine grauida; & sine dolore puerpera. Proueniet insuper, V. Maria, illud inenarrabile gaudium à cōsideratione vnionis humanæ naturæ ad diuinam: quia tunc electi cognoscent quod frater eorum secundum carnem, Deus est. Tanta etiam erit vnitas capitis & membrorum, quod membra honorem sui capitis, proprium reputabunt, & multiplicabitur huiusmodi immensitas gaudij ex iucundā societate; & hæc societas constabit ex hominibus & Angelis.

2. O gloriosissima Virgo Maria, quale gaudium erit te videre Matrem Domini, choris comitatam virginis, & exaltatam super Choros Angelorum. Ibi enim tunc tanta erit charitas inter electos, quod gaudia singulorum, vniuersi & singuli, propria reputabunt. Et illa celestis hereditas omnibus erit vna, & singulis erit tota: quia regnum caeleste quanto à pluribus participatur, tanto vberius possidetur. Nam illa beatorum ciuium supernorum societas, & admirabilis charitas eorum, facit vt nemo Angelorum, nemo Archangelorum, siue aliorum Sanctorum, alicuius Sancti inuideat gloria: sed totum in alio possidet vnusquisque, quod gratis praestatur omnibus. Vt honorificetur Deus in omnibus, adoretur ab omnibus, & ab omnibus glorificetur. Nam non sexus, non aetas, non dignitas generis, sed sola discernitur qualitas meritorum.

3. O sanctissima Virgo Maria, augmentabitur istud ineffabile gaudium ex corporis glorificatione cum suis dotibus; quae erunt claritas, subtilitas, agilitas, & impassibilitas. Claritas erit in corpore respectu eius quod erit iuxta se: vt scilicet alia corpora clarificata in eius aspectu delectentur; quia fulgebunt sicut Sol. Subtilitas erit respectu eius, quod erit infra se, vt scilicet corpora inferiora cedant corpori glorificato: quia corpus glorificatum illud non diuidit, per quod transit, nec ab illo diuiditur: sicut nec Sol materialis. Agilitas erit respectu eius; quod erit supra se, vt spiritum suum perfectam habeat obedientiam: ex hinc caro non concupiscet aduersum spiritum, nec spiritus aduersus carnem, sicut modò. Impassibilitas erit respectu eius, quod erit contra se; ne scilicet ab aliquo possit laedi: ideo dicitur, *Non esurient, neque sitient amplius, & non cadet super illos Sol, neque ullus astus; & mors ultra non erit.*

4. O misericordissima Virgo Maria, fac me tuis sanctissimis meritis & deprecationibus participem tantorum bonorum, vt hic iustificatus per gratiam, in iudicio glorificatus appaream & gloriam possideam sempiternam. Amen.

Contemplatio VIII.

De octauo Bono.

1. Quid amplius ad cumulum gaudij sacratissima Virgo Maria, electis fecisti, vt perpetuo gaudeant, & gaudium eorum nemo tollat ab eis? Ecce, Virgo Maria, gaudium electorum augmentatur ex eo quod vident se euasisse poenas infernales: ideo dicitur, *Eruiisti animam meam ex inferno inferiori: & quia vident hostes suos ibi cruciari, vnde scribitur, Letabitur iustus, cum viderit vindictam.* Ex eo etiam, quia peccatum, quod maximè modò nocet hominibus, tunc clausum erit in inferno, quasi in proprio

DE B. VIRGINE.

445

proprio loco suo: non enim post iudicium poterit peccatum remanere in cœlo, vel in terra; sed cum damnatis descendet ad infernum. Omne enim ponderosum tendit ad centrum, & infernus est centrum peccati. Ideo scribitur, *Conterentur cum delinquente delicta.*

Ecd. 27

2. Adhuc, beatissima Virgo Maria, te adiuvante, electorum gaudium ^{3.} augetur, ex eo quod à mundi miseria tunc erunt liberati. Nam transisse à morte ad vitam, vitæ gaudium duplicat, & hoc gaudium inueniebat ille, qui cum fletu & gemitu dicebat. *Hei mihi! quia incolatus meus prolongatus est.* Ideo sunt mihi *lachryma mea panes die ac nocte.* Quando veniam, & apparebo ante faciem Domini. Non eorum minuetur gaudium, sed augmentabitur ex eo quod à mundi naufragio liberati sunt. Si enim naufragantes in pelago corporaliter, tantum gaudent ex euasione sua; electi in infinitum plus gauisuri sunt, tam corporis quam animæ periculum euadentes.

Psal. 119.5.

Psal. 41.4.

Ibid. 3.

3. O clementissima Virgo Maria, periculum probat transeuntium raritas, & pereuntium multitudo. Electorum etiam cumulat gaudium ex hoc, quod cum tantæ infirmitatis essent, tamen de fortissimo & terribili hoste triumpharunt, sicut est inimicus humani generis, scilicet diabolus, de quo scribitur, *Non est potest. as super terram, qua comparetur ei; qui factus est ut nullum timeret.* Nos enim sumus ut locusta, & hostes nostri ut gigantes: & ideo quia, virtuosè prævaluerunt contra eos, ad maximum gaudium cedit eis: quia quantò maius periculum est in prælio, tantò maius gaudium est in triumpho.

Iob. 41.

24.

4. O benignissima Virgo Maria, non sic est de me misero peccatore. Adhuc inter meos hostes habito, à quibus me poteram defendere gratiâ benedicti Filij tui & tuâ intercessione succurrentibus: sed nolui intelligere, ut benè agerem, & me defenderem: sed eorum voluntariis frequenter me submisi: & sic gaudium per te mihi procuratum perdidici. Adiuvam me, piissima Virgo Maria, redde me strenuum & virtuosum contra aduersarios meos, ut eos vincendo, te suffragante, gaudium sempiternum possideam cum Beatis. Amen.

Contemplatio IX.

De nono Bono.

1. **Q**uanta felicitas est, clementissima Virgo Maria, in regno cœlorum, te adiuvante nobis parata! ubi nullum erit malum, nullum aberit bonum. Vacabitur Dei laudibus, qui omnia erit in omnibus: nulla erit ibi desidia, nulla indigentia. Ibi vera gloria erit; ubi nec laudantis ^{1. Cor. 15} errore quisquam, nec adulatione laudabitur. Erit ibi verus honor, qui ^{28.} nulli negabitur digno, nulli deferetur indigno; sed nec illum ambiet quisquam indignus. Ibi erit vera pax; ubi nihil aduersi quisquam vel à se, vel

LII

ab alio patietur. Præmium virtutis erit ipse, qui virtutem dedit: & qui seipsum, quo melius & maius nihil esse potest, promissit. Ipse finis erit desideriorum nostrorum, qui sine fine videbitur, sine fastidio amabitur, sine fatigatione laudabitur. Ibi erit tanta requies, & tanta tranquillitas pacis, tantæque charitas & dilectio, quod nulli superiori nullus inferior inuidebit: sicut non inuident Archangelis Angeli ceteri: sicut vnum membrum modò non inuidet alij gloriam suam, vel honorem. Ibi vacabimus, & videbimus; videbimus, & amabimus, amabimus, & laudabimus.

2. Ecce quod erit in fine sine fine. Nam quid aliud est noster finis, nisi peruenire ad regnum, cuius nullus est finis: Illud gaudium à præsentis differt, quia hic non est perfectum gaudium, sed ibi erit plenum & perfectum. *Ioan. 16. 24.* Ideò scribitur, *Petite & accipietis, ut gaudium vestrum plenum sit*; præsens gaudium non est securum, sed futurum securum erit, quia summum gaudium tale debet esse quod non amittat homo inuitus. Nemo quippe potest confidere de tali gaudio, quod sibi eripi posse sentit, etiam si retinere illud, amplectique voluerit. *Proh. 14. 13.* Quisquis autem non confidit de gaudio, quo fruitur, in tanto timore amittendi beatus esse non potest, sicut est de gaudio præsentis, cuius usus dolore miscetur, & eius extrema luctus occupat. *Ioan. 14. 19.* Visio igitur Dei quâ videbit electos, & videbitur ab electis, summum & perfectum, & æternum gaudium est. Ideò dicitur, *Et videbitis me; quia ego vivo, & vos vivetis, & videbo vos, & gaudebit cor vestrum* & quia Deus æternus est, & eius visio æterna, & gaudium erit æternum. Ideò scribitur, *Ioan. 16. 22.* *& gaudium vestrum nemo tollet à vobis.*

3. O misericordissima & piissima Virgo Maria, fac me gaudere tuis sanctissimis deprecationibus suffragantibus. Ora illud supremum & sempiternum *Gaudium*, quod in tuo virginali utero humiliter portasti, ut mihi talem gratiam hic viuendi concedere dignetur misericorditer, ut eo frui valeam per infinita sæcula sæculorum. Amen.

Contemplatio X.

De decimo Bono.

1. **C**Loriosissima Virgo Maria, quis humanitus cogitare potest, quantæ Gerit vnio & concordia electis in æterna gloria, quam te operante & auxiliante, videbimus? Ibi namque tanta erit tunc concordia electorum, quanta nunc est in oculis nostris: quod enim vnus oculus respicit, mox & illuc alius oculus necessario intendit, & quod se vertit vnus, statim flectitur alius. Sic credo esse, piissima Virgo Maria, in gloria celesti. Quidquid enim vult Deus, volunt homo & Angelus: quidquid vult Angelus, volunt homo & Deus: quidquid vult homo, volunt Deus & Angelus: Tanto siquidem amore adhærent beati Creatori suo, & tanta est ibi vnio volunta-

tum, quod si Pater videret Filium in tormentis, vel è conuerso; vel vir uxorem, vel è conuerso, non tamen dolebunt, sed gaudebunt, & grates referent Iustitiæ diuinæ: Si enim vel ad modicum dolere possent, iam non esset gaudium consummatum. Propterea scribitur electis, *Confortamini, & nolite timere: ecce Deus vester ultionem adducet retributionis.* *Is. 35. 4.*

2. Ibi etiam erit mutua electorum cognitio, sicut apparuit in Transfiguratione Domini, quando Petrus, Iacobus & Ioannes sine alicuius indicio cognouerunt facies Moysis & Heliae, quos nunquam antea viderant. Vniuersi & singuli Iusti caterorum Iustorum cognoscent nomina, gratiam, & merita: quasi cum illis semper habitassent. Cognoscent etiam damnatos in tormentis, & propter quod demeritum damnati sunt: & tam clausis oculis quàm apertis, cæteros electos, Angelos, & seipsos contemplabuntur, facies singulorum, omnia quæ erunt in nouo cælo & in noua terra, delectabiliter aspicient; Nihil enim opertum, quod non reueletur, nihil absconditum, quod tunc non sciatur, & nihil clausum quod tunc non aperiat. Mali etiam cognoscent tam bonos quàm malos; & tam expressa cognitione, vt ipsorum etiam merita nouerint, & nomina, sicut diues epulo cognouit Abraham & Lazarum in sinu eius. Post iudicium reprobi non videbunt bonos in gloria secundum illud, *Tollatur impius, ne videat gloriam Dei.* Vnde de mutua cognitione electorum scribitur, *Omnes qui viderint eos, cognoscent illos: quia isti sunt semen cui benedixit Dominus, & de cognitione etiam Dei scribitur: Omnes cognoscent me, à minimo vsque ad maximum, ait Dominus, quia propitiabar iniquitatibus eorum; & peccatis eorum non ero memor amplius: & in illa die cognoscetis, quia ego sum in Patre meo, & vos in me, & ego in vobis.* *Matth. 17. 1. 23.*
Matth. 10. 26.
Luc. 16. 23.
Is. 61. 9.
Ierem. 31. 34.
Ioan. 14. 20.

3. O sanctissima Virgo Maria, exora illum tuis deuotis & humilibus deprecationibus, vt mihi donare dignetur per suam misericordiam, gratiam cognoscendi hic omnia peccata mea, & ea emendandi, vt in æterna gloria, ipsum placatum mihi videam, & sicuti est, cognoscam. Amen.

Contemplatio XI.

De vndecimo Bono.

1. **D**Vm ad memoriam reduco, corde concipio, & mente contemplan, beatissima Virgo Maria, qualiter gloriosissimus Filius tuus, gloriam suam intrauit, & suos electos intrare fecit: dolore æstuo, & quasi deficio in meipso: quia occultâ fide me video eius viam quodammodo abhorre. Intrauit namque beatissimus Filius tuus gloriam suam, ignominiam crucis & tormento amarissimæ Passionis: quia scriptum est, *Oportebat Christum pati: & ita intrare in gloriam suam.* Sic etiam, benedicta Virgo Maria, electi per multas passiones, tribulationes, & angustias beatificum ipsius regnum intrauerunt, Petrus & Andreas crucis suspensio intrauerunt, Paulus

LII ij

capitis truncatione, Bartholomæus sui corporis excoriatione, Laurentius craticulâ; Vincentius equuleo, Blasius chardis ferreis, Ioannes Baptista capitis resectione, cæterique Martyres diuerso supplicio tormentorum: alij contemptu rerum temporalium, alij afflictionibus, abstinentiis, & diuersis pœnitentiis corporum.

2. Si purissima Virgo Maria, sacratissimus Filius tuus promittit talia operantibus, gloriam suam; quid igitur faciam ego, Virgo Maria? aut qualem spem habere possum de intrando gloriam sempiternam? cum nullum genus martyrij in me suscipiam, animi voluntate, nullam pœnam corporalem, nullam rerum temporalium abiectionem, vix aliquam mentis ad cœlestia eleuationem: sed semper habeo prostratam ad mundana & ad peccata diuersa: illa appeto, illa requiro, & ad habendum laborare non desino: illa amplector, & in illis delector; complacentiam & delectationem corporalem perquiro, & eam totis viribus concupiscendo, suscipio, & susceptam pro posse, ad effectum perduco. Vnde hîc delictijs temporalibus & in futuro spiritualibus frui cupio.

3. O piissima Virgo Maria, quanta est fatuitas mea! imò, vt veriùs loquar, dementia mea! vita mea miseria est, ignominiâ & stultitiâ plena, tota criminibus non virtutibus exposita; desperationi, non consolationi; quia non in via, sed per deuia ambulauî vsque nunc. Reduc me misericordissimâ Virgo Maria; ad viam directam, quæ ducit ad gloriam æternam. Amen.

Contemplatio XII.

De duodecimo Bono.

1. **S**alutifera Virgo Maria, electi in æterna gloria sine vestibus ornati apparebunt, quem ornatum à Deo pro meritis recipient: non enim vestiti erunt, sed erunt nudi; sed omni decore fulgebunt: nec plus de genitalibus membris, quàm nunc de gloriosis oculis erubescant. Vniuersi enim & singuli amicieatur lumine, sicut vestimento; virtutes etiam electorum, & operum merita erunt eorum indumenta. Vnde ratione virtutum dicitur Lucifero, habito respectu ad creationem eius, *Omnis lapis pretiosus, operimentum tuum*. Ratione etiam operum ipsius, & aliorum similium, dicitur, *Telas aranea texuerunt: Tela eorum non eis erunt in vestimentum, nec operientur operibus suis*, videlicet sicut iusti, sed potius operientur sicut diploide confusione suâ. Salus etiam & iustitia erunt electorum vestimenta: sicut scribitur, *Induit me Dominus vestimento salutis; & indumento iustitiæ circumdedit me*. Induentur enim corpora eorum vestimento salutis, & animæ indumentis iustitiæ. Et sicut hic diuersa est gratia, sic erit ibi diuersa gloria.

Ezech.
28. 13.
Isa. 59.
1. 6.
Psalm.
108. 29.
Isa. 61.
6.

in corporibus electorum. Et alium colorem habebunt Martyres, alium Confessores, alium Virgines, alium Pœnitentes, & alium Continentes.

2. Et hoc est quod eis promittit benedictus Filius tuus, Virgo Maria, dicens, *Venient, & videbunt gloriam meam, & ponam in eis signum.* Habebunt etiam Martyres, coronas rosas; casti & continentēs, liliaceas, humiles, violaceas, contemplatores, hyacinthinas; & qui sibi & aliis profunt, purpureas. Vniuersi enim & singuli coronabuntur in Reges, ex quo congregati erunt ad Christum, & ex quo conuenerint in vnum: & singulis erit ipse corona. Vnde scribitur, *In die illa erit Dominus exercituum corona gloriæ, & sertum exultationis residuo populi sui, erit etiam Corona gloriæ in manu Domini, & diadema regni in domo Domini.* Ibid. 66. 12.

3. Sed, Virgo Maria, scio quod tunc non coronabitur, nisi qui legitime certauerit: à quorum numero, Virgo Maria misericordissima, me sentio alienum: quia contra hostes & aduersarios animæ meæ non certavi legitime, sed frequenter ex mea malitia succubui, & eorum peruersis voluntatibus me exposui: & sic nudus apparebo. Succurre mihi, piissima Virgo Maria, exora tuum Filium benedictum, qui vestimentis virtutum me exornet, vt sibi exoptabilis fiam in gloria sempiterna. Amen. Ibid. 28. 6. Ibid. 62. 3. 2. Tim. 2. 5.

Contemplatio XIII.

De decimotertio Bono.

TE mediante, beatissima Virgo Maria, vulnera mentis meæ hñc sanantur & in futuro perfecta sanitas sine ægritudine aliqua præparatur. Ibi enim non caligabunt oculi videntium, sed salus erit sempiterna. Tunc aperientur oculi cœcorum, & aures surdorum patebunt: & sanabitur in nobis plaga septuplex, quæ est fames, sitis, frigus, cauma, labor, ægritudo, & mors. Tunc erit lætitia sine tristitia: ideo scribitur, *Adimplebis me lætitiâ*, Virgo Maria, cum vultu tuo, id est, cum Filio tuo benedicto. Isa. 38. 5. Quoniam scilicet *videbo eum sicuti est: & cognoscam, sicut & cognitus sum.* Psal. 15. 11. Nec dicitur *in vultu*, sed *cum vultu*. Angelos enim implebit, sed homines adimplebis: cum vultu propter conformitatem hominis ad Christum ex parte animæ, & ex parte corporis. 1. Ioan. 3. 2. 1. Cor. 13. 12.

2. Non erimus tantum pleni, sed impleti, & adimpleti: pleni enim erimus lætitiâ pro gloriâ proximorum, impleti pro gloria nostra, adimpleti pro gloria Christi. Ibi namque erit abundantia absque indigentia: quia ibi nihil deest, nihil obest, nihil superfluit, nihil defluit; nihil exterius, quod appetatur, nihil interius, quod fastidiatur, nam ibi erunt æternales diuitiæ absque vlla inopia, quas Dominus promittit amatoribus suis, dicens: *Mec sunt diuitiæ & gloria*, id est, diuitiæ gloriolæ, quæ possessores suos faciunt gloriosos: quæ bene operando in præfati acquiruntur, vt æter-

LII iij

Math.
25. 21.

naliter habeantur in futuro. Ista autem diuitia, maxime per contemptum temporalium & largam erogationem acquiruntur: & erit omnium bonorum remuneratio largiflua, quam Dominus promittit dicens: *Euge serue bone, & fidelis: quia super pauca fuisti fidelis, supra multa te constituam.*

Isa. 66.
13.

3. Hæc est æterna remuneratio, scilicet in tribus quoad animam, quia videbimus, amabimus, & laudabimus: & hæc tria sunt perfectiorum virtutum animæ. Ex parte verò corporis erunt claritas, agilitas, subtilitas, impassibilitas, libertas, voluptas & longanimitas: & tunc erit ibi æterna consolatio: quia scribitur, *Sicut Mater consolatur filios suos, ita consolabor vos, dicit Dominus, & in Ierusalem scilicet cœlesti, consolabimini, & videbitis, & gaudebit cor vestrum.*

4. O misericordissima Virgo Maria, quis tibi hic, quacumque perfectione fulgeat, gratiarum actiones referre potest de tantis bonis nobis præparatis? Ego ingratus tibi fui, & sum, piissima Virgo Maria, quia non solum tibi gratias non retuli, sed tibi displicere curavi per vitam peruersam, quam longo tempore duxi. Auxiliari mihi dignetur, Virgo Maria, tua immensa pietas, & exora illi, cuius misericordiâ plena est terra, ut reatus meos diluat, virtutes tribuat, & ad tanta bona cœlestia me sua benignitate perducat. Amen.

Contemplatio XIV.

De decimo quarto Bono.

Math.
25. 34.
41.

Psal. 111.
7.

Psal. 90.
3.

Exod.
15. 1. 2.

Psal. 47.
9.

Psal. 132. 1.
15. 30.
29.

Apo. 9. 9. 12.

1. **I**nuitati sumus, speciosissima Virgo Maria, ad nuptias cœlestes per gloriosissimum Filium tuum, qui voce suâ dulcissimâ vocat electos suos dicens, *Venite benedicti Patris mei, percipite regnum quod vobis paratum est ab origine mundi.* Et finito hoc, subiungit secundum verbum terribile reprobis dicens, *Ite maledicti in ignem æternum:* & hæc erit mala auditio & verbum asperum, sed ex post, tu, beatissima Virgo Maria, cum sanctis Virginibus quasi in recessu à iudicio, cantabis istud Canticum, *Cantemus Domino: gloriosè enim honorificatus est; equum, id est, cœtum damnatorum, & ascensorem diabolum, proiecit in mare, id est, in profundissimam amaritudinem æternæ miseriæ.* In istis sanctissimis nuptiis cantabit generalis Ecclesia, *Fortitudo mea & laus mea Dominus, & factus est mihi in salutem. Iste Deus meus, & glorificabo eum: Deus Patris mei, & exaltabo eum.*

2. Contemplatâ autem ciuitate tantarum nuptiarum cantabunt omnes Sancti, *Sicut audiuimus, sic vidimus in ciuitate Dei nostri. Deus fundauit eam in æternum.* Et, *Ecce quàm bonum & quàm iucundum habitare fratres in unum!* & tunc implebitur quod Dominus promittit electis suis dicens, *Cum eritis vobis, sicut nox sanctificata solemnitatis, & letitia cordis.* Alij cantabunt, *Dignus es Domine aperire librum, & soluere signacula eius, quia occisus*

es, & redemisti nos Deo in sanguine tuo, ex omni tribu & lingua, & populo, & natione: & fecisti nos Deo nostro regnum. De Cantico Angelorum dicitur, Vidi, & audiui vocem Angelorum multorum dicentium voce magna, dignus est Agnus qui occisus est, accipere virtutem, & diuinitatem, & sapientiam, & fortitudinem, & honorem, & gloriam, & benedictionem. De Cantico Innocentium dicitur, Agnus stabat super montem Sion, & cum eo centum quadraginta quatuor millia, habentes nomen Patris eius scriptum in frontibus suis, & cantabant quasi Canticum nouum ante sedem Dei. *Ibid. 14.*


3. O benignissima Virgo Maria, quomodo ad istas beatissimas nuptias potero inuitari, ego pauper & inops omni bonitate; qui non habeo vestem nuptialem alicuius virtutis, sed, si iustitia fiat mihi, dicitur, *Euicite eum foras, Matth. 23. 30.* & mittite in tenebras exteriores: ubi erit fletus & stridor dentium. Adiua me, pretiosissima Virgo Maria, exora benignissimum Filium tuum, vt mihi misericorditer donet vestes nuptiales virtutum, cum quibus ad ipsius beatissimas & celestes nuptias intrem, & cantando, ipsum laudem per secula sempiterna. Amen.

P A R S XIV.

DE HIS QUÆ DEBEMVS GLORIOSÆ
Virgini Mariæ, & primò,

Contemplatio I.

Quòd Beata Virgini debemus fidem.

I.  EBITORES tui sumus, fidelissima Virgo Maria, quia tibi debemus fidem, signiferam omnium virtutum; quia speciale Dei opus es in vtero Matris sanctificata, nata tota sancta, ex qua immaculatam & sine peccato vitam duxisti in mundo, purificata à Sapientia Dei, quæ non intrat in animam maleuolam, nec habitat in corpore subdito peccatis. Te namque velut pupillam oculi *Sap. 1. 4.* semper ab omni nociuo, Deus Trinitas custodiuit. Tu virginittis primiceria extitisti, sine corruptione fecunda, sine graamine grauida, sine dolore puerpera: sola Virgo & Mater Dei, & non alia; quia tibi soli hoc privilegium debebatur, nec peccasti, nec peccare potuisti, ex quo Filium Dei concepisti.

Rom. 8.
19.

2. In te & per te forma diuina sponte venit in hominem sponte deformatum, gratia gratis ad gratia ingratum, medicina non rogata vltro venit ad aegrotum, virtus ad infirmum, sapientia ad fatuum, sanctificatio ad immundum, veritas ad mendacem, pietas ad immisericordem, pax ad rebellem, misericordia ad impium, charitas ad inimicum, iustitia ad iniustum: non vt eum secundum iustitiam iudicaret & damneret, sed vt eum à sua iniustitia iustificaret, & secundum se formaret, vt formatum secundum se, tandem glorificaret in se. Ad id enim forma Dei venit in carnem, vt prius in spiritu, post etiam in carne illos sibi conformaret, quos præsciuit, & prædestinavit Deus Pater conformes fieri imagini Filij sui. Hæc igitur forma tam formosa, ex pietate sola se vnjuit materiæ tam informi, nec modò informi, sed & deformi, nec modò deformi, sed & deformatæ, non quidem ex vlla necessitate, sed ex sola propriæ voluntatis voluntaria peruersitate. De te insuper, sanctissima Virgo Maria, credi debet, quidquid boni, & honoris cogitari, credi, aut dici potest de pura creatura post Filium tuum benedictum: quòd omnia in te perfectissime sunt, quorum multa excedunt intellectum humanum.

3. O benignissima Virgo Maria, licet hanc fidem de te habuerim, & habeam, tamen fides mortua fuit propter defectum bonorum operum, & multiplicationem vitiorum, quæ iniquè à iuuentute mea vsque nunc perpetravi, nec adhuc desino perpetrare: de quibus non dolui, neque condignam penitentiam egi. Adiua me; benignissima Virgo Maria, sanctissimis tuis deprecationibus; vt fides prædicta non moriatur in me per praua opera, sed potiùs viuificetur per exercitium bonorum operum: vt quod hic de te fideliter credo, in cœlesti gloria misericorditer apprehendam. Amen.

Contemplatio I I.

Quòd Beata Virgini debemus dilectionem.

Sap. 7.
10. 11.

1. **D**iligenda es à nobis, amantissima Virgo Maria, præcipuè, quia diligentes te diligis. Tua namque dilectio, cunctorum est singula, & singulorum tota: quæ neque participatione decrescit, nec vsu deficit, nec tempore veterascit: est enim affectu desiderabilis, experientiâ dulcis, fructu æterna, iucunditate plena, reficiens & satians, nec vnquam fastidium generans. Idcirco quisque fidelis te diligere debet, & dicere cum Sapiente, *Super salutem & speciem dilexi eam, & proposui pro luce habere illam: quia inextinguibile est lumen illius: venerunt mihi omnia bona pariter cum illa, & innumerabilis honestas per manus illius. Super salutem, scilicet corporis, & speciem, scilicet cuiuslibet rei temporalis dilexi eam, scilicet te, gloriosam Virginem Mariam. Nam omnis istorum temporalium dilectio deficit hominè*

mini in necessitate extrema, sed tu, beatissima Virgo Maria, nec in vita, nec in morte deficis amatoribus & seruatoribus tuis. Imò frequenter ipsorum animas de corporibus exeuntes, suscipis, & protegis ab incursum malignorum spirituum: quia *inextinguibile est lumen tuum*: quo scilicet lumine, tu, piissima Virgo Maria, illuminas tuos amatores & imitatores; dicens cum Filio tuo benedicto, *Qui sequitur me, non ambulat in tenebris, sed habebit lumen vite*, quod est *inextinguibile*. Venerunt igitur mihi omnia bona pariter cum illa. Omnia ergo bona scilicet gratuita, venerunt, scilicet à Deo bonorum omnium largitore, qui quidquid boni dat creaturis suis, per manus tuas, sacratissima Virgo Maria, vult quòd transeat: vnde sequitur, *& innumerabilis honestas per manus illius*. Nam te aperiente manum tuam, implemur omni benedictione, id est, bona ratione.

2. O benignissima Virgo Maria, qui te perfectè cognosceret, perfectè te diligeret, & amator tuus fieret, & te mediante, omne bonum necessarium in præfenti reciperet à tuo Filio benedicto, & vitam æternam in futuro: cuius arthæ sunt gratiæ & virtutes. Vnde de te loquens Sapiens dicebat, *Hanc amavi, & exquisivi à iuventute mea: & quæsiui eam mihi Sponsam assumere, & amator factus sum forme illius*. Hanc igitur, id est, Virginem Mariam, dicit Sapiens, *amavi*, scilicet toto corde, *& exquisivi*, id est, ex toto quæsiui, studendo in scripturis, quæ de te loquuntur, inuestigando diligenter magnalia tua, de te meditando, te iugiter exorando, ad honorem tui operando. *Et quæsiui sponsam mihi eam assumere*, id est, te amore casto & fructuoso & indiuiduo mihi copulare, & talis dilectio spiritalis est, non carnalis. Vnde *Amator factus sum forme illius*, id est illius, cui dictum est per Sponsum, *Tota pulchra es, Amica mea, & macula non est in te*.

3. O gloriosissima Virgo Maria, frigidus fui, & sum in amore tuo; quia ad diligendum mundum & carnem me cum affectu disposui, & in hoc perseveravi. Sed auxiliari mihi digneris, piissima Virgo Maria, aufer à me amorem mundanum, & carnis, & impetra mihi vt tuum benedictum Filium, & te, diligam & timeam, patitèrque vtrique puro corde seruiam, vt in præfenti gratiam, & in futuro gloriam obtineam sempiternam. Amen.

Contemplatio III.

Quòd Beata Virgini debemus obedientiam.

1. **T**ibi obedire tenetur omnis fidelis Christianus, potentissima Virgo Maria, propter reuerentiam virginalem, & propter periculum nostrum, qui inter demones & alios hostes habitamus, & viuimus in peccatis. Qui enim iustus est, tibi obediendo debet ad te confugere, vt dicere

M m m

Cant. possit: *Sub umbra uiuus, quam æquaueram sedi* & sic erit securus per
2.3. auxilium tuum. Si peccator est, ad te confugere debet: quia tu es ciuitas
 refugij, vt saluos facias peccatores tibi obedientes, reuertendo ad te, qui-
 bus tu, piissima Virgo Maria, humiliter & benignè dicis, *Qui audit me,*
Eccl. 24. *non confundetur.* *Qui audit,* id est, obedit, vel audit me in paupere voci-
30. ferante; vel prædicatore docente: vel *audit,* id est, deuotè auscultat
Eccl. 21. sermonem meum: vel *audit me,* id est, acquiescit consilio meo; de quo
16. scribitur, *Consilium eius, quasi fons vite permanet,* id est, quasi fons
Matth. viuus semper scaturiens. *Qui* igitur, benedicta Virgo Maria, *audit te,*
25. 41. id est, obedit tibi, non confundetur per auditum illius verbi asperi, *Ite*
22. *maledicti in ignem æternum:* vel *non confundetur,* id est, non patietur re-
 pullam, nec confusionem: sed per te semper exaudietur, & pro illo sem-
 per orabis, vel *non confundetur,* scilicet malà confusione, qua soli impij
 confundentur in iudicio tui Filij benedicti, sed adstabis pro eo. Nam obe-
 dientibus tibi Matri Virgini, dicturus est Filius tuus benedictus in iudicio,
Venite benedicti Patris mei.

2. *Qui* igitur audit te, tua opera, & exemplum recipiendo, tanquam
 verum fundamentum vitæ cælestis, *non confundetur:* vnde vt tibi obediat,
 sicut tu Archangelo Gabrieli obediisti, dicendo sibi, *Ecce Ancilla Do-*
mini; vt etiam fugiat strepitum mundi, sicut tu eum fugisti, quia in cella
 orabas tota solitaria, quando Angelus ingressus est ad te; vt etiam vereamur
 magis, quàm exultemus, quando laudamur: & cogitemus, vtrum
 dignè, sicut tu cogitabas qualis esset salutatio illa angelica; vt constanter
Ier. 1. 38 persistat quisque in statu suæ professionis, sicut tu post votum virginittatis
34. constanter respondisti, *Quomodo fiet istud, quoniam virum non cognosco?*
 Vt etiam voluntatem suam quisque conformet voluntati diuinæ, sicut tu
 fecisti respondendo, *Ecce Ancilla Domini;* cuius est velle, quod vult Domi-
 nus eius: vt spretis terrenis appetat cælestia, sicut tu fecisti quando con-
 cepto Filio Dei in montana ascendisti; & etiam se minoribus seruiat, &
 ministret, sicut tu humiliter ministrasti Elizabethæ. Sic igitur, sacratissima
 Virgo Maria, obediendum est verbis tuis, consiliis tuis, & exemplis tuis.

3. Sed ego prauissimus peccator, corde durus tibi nolui obedire: sed te
Prou. 1. contemphi. Ideo dignum est, vt mihi dicas, *Despexisti omne consilium meum,*
25. 26. *& ego in interitu tuo ridebo.* Non sic, piissima Virgo Maria, sed oculis
 pietatis & misericordiæ me aspicias; & Filium tuum misericordem, tuis
 intercessionibus inclines, vt mihi indulgeat, & vitam largiatur æternam.
 Amen.

Contemplatio IV.

Quòd Beata Virgini debemus reuerentiam & timorem.

1. **E**xcellentissima super omnes Mulieres, pretiosissima Virgo Maria, tibi timor & reuerentia debetur; ne coram oculis tuis aliquid indecens cogitare, desiderare, consentire, aut facere aliquis audeat: ne illos misericordes oculos, qui non possunt respicere iniquitatem, auertas à nobis. De quibus scribitur, *Mundi sunt oculi tui, ne videas malum.* & *Habac.* *respicere ad iniquitatem non potes.* Ideò de te, quæ verè es mulier fortis, scribitur, *Considerauit semitas domus sue.* *Semitas*, id est, sanctas cogitationes conscientiarum. *Domus sue*, id est, familiæ suæ: peruersæ enim cogitationes separant hominem à te, & benedicto Filio tuo. Quales cogitationes sunt superbiorum, inuidiorum, auarorum, luxuriosorum, & aliorum peccatorum qui impediunt aduentum gratiæ, & fugant à corde gratiam iam acceptam. Nec est præsumendum de mitissima humilitate tua, & pietate, quin te timere debeamus, & summæ dignitati tuæ timor & reuerentia debeatur. Quamuis enim tu dixeris, *Ecce Ancilla Domini.* Tu etiam Regem gloriæ & Dominum maiestatis sic allocuta fuisti, *Fili, quid fecisti nobis* *Luc. 1.* sic? Tu namque, Virgo Maria, es speciale sacrarium Domini. Vnde sicut *38.* *Oculi Domini super metuentes eum: sic oculi tui*, id est, respectus misericordiæ, *super timentes te*, id est, super humiles, qui timent & cauent offendere te, sed quia timor solus sine spe non est bonus, ideò sequitur, *& in eis, qui sperant super misericordia eius.* *Luc. 2.* *48.*

2. Sed quid timendum, & sperandum sit de te Virgine Maria, sequitur, *ut eruat à morte*, scilicet culpæ præsentis, & pœnæ æternæ, *animas eorum.* *Psal. 32.* non solum corpora à pœna præsentis, & *alat eos in fame*, scilicet verbi Dei, *18. 19.* vel inopiâ famis æternæ, sicut scribitur, *Ecce serui mei comedent.* & *vos* *Is. 65. 13.* *esuriatis*; Timentes te, purissima Virgo Maria, protegis potenter ab omni aduersitate: das eis potentiam ad benè agendum, & declinandum à malo: das etiam firmamentum in virtutibus, quas eis tuis orationibus impetras à benedicto Filio tuo; & misericorditer in eis refrigeras concupiscentias, quas diabolica suggestio inflamat: & insuper deprecabilis es super offensione ipsorum, & pro ipsis tuum benedictum Filium exoras; vt ipsos præseruet, ne cadant in peccatum, vel infernum; & si fortè ceciderint in peccatum, erigis, eos, & illuminas oculos mentium ipsorum, ad cognoscendum & diligendum Deum, te, & proximum.

3. Obenignissima Virgo Maria, aperi mihi oculos mentis: quibus habenas clausis, te non timui, neque in te reuerentiam habui, vt te videam, diligam, & timeam: & tibi contrito & humili corde seruiam, & vitam mihi impetres sempiternam. Amen.

M m m

Contemplatio V.

*Quod Beate Virgini debemus continuam memoriam.*Ecd. 24.
28. 29.

1. Scriptum est de te, beatissima Virgo Maria, *Memoria mea in generatione Sanctorum*, id est, hominum, quorum una est generatio. Si enim memoria iusti cum laudibus, quanto magis memoria tui, Virgo Maria, per quam nobis factus est Christus iustitia? ideo *Memoriam abundantia* *psal.* *144.* 7. *suauitatis tue eructabunt.* Debet namque, gloriosissima Virgo Maria, cor meum te assidue cogitare, & meditari: quia cor tuum assidue & effectualiter meditatur & cogitat de misericordia, pace, & salute. De cogitatione enim tua, quā cogitas nobis bonum, scriptum est: *A mari abundat cogitatio tua*: quæ cogitas nobis bona, non potest à sensu humano comprehendere, sicut nec mare potest exhaustiri: & *consilium tuum*, quo saluti humanæ prouides, *in abyssu magna*: quia inuestigari non potest. Quis enim inuestigare potest efficaciam verbi tui, quo prouidisti nobis infirmis salubriter, quando omnium medicinam verbo concepisti mirabiliter? *A mari* igitur, id est, plusquam mare *cogitatio tua*: quia, sicut impossibile est humano sensui cogitare vel dinumerare guttas maris, vel videre totum mare: sic impossibile est & longè amplius humano capere intellectu, charitatem, pietatem, humilitatem, & cætera quæ pertinent ad te: & facilius posset mari exhaustiri, quam tua bonitas perfectè cogitari.

Ioan. 2.
4.

2. Memoria igitur & cogitatio, quæ est de te maior, melior, & excellentior est omni cogitatione, aut memoriâ. Quis enim sufficit cogitare, & ad memoriam reducere, profunditatem humilitatis tuæ, quæ cum Dei Mater esses nominata, te Ancillam nominasti? & quis apprehendere valeat excellentiam charitatis tuæ, quæ cum à benedicto Filio tuo increpata fuisset, *Quid mihi & tibi mulier?* tamen verecundiæ ministrorum compatiens, eis consulisti dicens, *Quaecumque dixerit vobis facite?* Quis æstimare posset immensitatem pietatis tuæ, cum Filium crucifigi videres, nec reclamasti, sciens Passionem benedicti Filij tui ad humani generis salutem operari? & ideo, benedicta Virgo Maria, quisquis fidelis quantum permittit humana fragilitas, debet frequenter & assidue de te cogitare, & cogitatu pertractare, de his quæ pertinent ad tuam gloriam, & honorem; & sicut scribitur, *In omnibus viis tuis cogita illum*, scilicet Deum, *qui dirigit tuos gressus*, id est, reget opera. Hoc idem debet dici de te, piissima Virgo Maria, quia scribitur, quod *Immortalis est memoria tua.*

Prov. 3.
6.
Sap. 4. 1.

3. O misericordissima Virgo Maria, tua memoria non fuit semper in corde meo, sed cogitatio sordida & infecta diuersorum vitiorum. Respice me, piissima Virgo Maria, & imprime teipsam in mente mea; ut exclusis noxiis cogitationibus, te semper cogitem, tua beneficia memoriâ teneam, gratias de ipsis tibi referam, ut vitam consequar sempiternam. Amen.

Contemplatio VI.

Quod Beatæ Virgini debemus dilectionem.

1. Sicut benignissimum & piissimum cor tuum, beatissima Virgo Maria, gaudet & exultat de nostra commendatione: sic cor meum congratulari tibi assidue debet de gratia, quam inuenisti apud Deum; & de omnibus bonis, quæ data sunt tibi per eum. Vnde designata es per Saram, quæ dixit, *Risum fecit mihi Dominus, & quicumque audierit, corridebit mihi.* Gen. 21: 5.
O beatissima Virgo Maria, risum fecit tibi Dominus, in salutifera Conceptione benedicti Filij tui Saluatoris nostri, qui tibi & in te arrisit; & tam tibi, quàm nobis miseris peccatoribus, dedit ridendi & gaudendi materiam. Vnde in virgineo partu tuo dixit Angelus ad Pastores *Annuntio vobis gaudium magnum, quod erit omni populo.* Luc. 2: 10.

2. O benignissima Virgo Maria, tribue nobis indignis seruitoribus tuis, & impetra tuis sanctissimis deprecationibus apud gloriosissimum Filium tuum, vt congratulatio tuæ beatitudinis semper sit apud nos; & compassio miseriæ nostræ sit apud te: de te & in te semper gaudere debemus: quia de Ancilla, facta es Regina: Mater, de Filia: recreatrix, de creatura: de Virgine, genitrix, manens Virgo. Per te enim, Virgo misericordissima, multa beneficia à benedicto Filio tuo accepimus, & speramus multò maiora percipere. Ideò in te & de te gaudere debemus, & cantando dicere cum Psalmista, *In te cantatio mea semper. In te, non in me, non in mundo, non in vitiis; non enim in me, quia non inuenio in me peccatore vnde gaudendum neque cantandum, sed potius vnde lugendum, iustum enim est, & verè dignum, vt in me dolorem & poenam inueniam; quia relicto hæcenus vero gaudio, gaudium triste & miserabile in meipso quærebam, & de meipso ac transitoriis huius mundi habebam.* Psalm. 70. 6.

3. Ad te igitur, beatissima Virgo Maria, accedo cum fletu & gemitu cordis mei: ad te suspiro gemens & flens: gaudio vacuus & mœrore plenus; non hilaris, sed tristis; non exultans, sed eiulans: non lætus, sed dolens propter iniquissimam vitam meam, quam vsque nunc protraxi in vitiis & peccatis. Adiuvare me digneris, clementissima Virgo Maria, tuis piissimis intercessionibus apud tuum Filium misericordem, qui dignetur convertere luctum meum in gaudium: vt de ipso, & de te, ac operibus vtriusque gaudeam, & nunquam gaudium à me auferatur. Amen.

Contemplatio VII.

Quod Beata Virgini debemus orationem.

1. **T**V, misericordissima Virgo Maria, es fratrum amatrix, & populi Israël, id est, Christianorum videntium Deum per fidem. Tu, piissima, Virgo Maria, es illa, quæ multum oras pro populo, & vniuersa ciuitate sancta Ierusalem, id est, Ecclesia militante. Designata namque es, gloriosissima Virgo Maria, per illam Bersabée quæ impetrauit suis precibus à Dauide regnum Israël pro filio suo. Sic tu, Virgo Maria, impetras tuis sanctissimis precibus à vero Dauide, id est, à Deo, pro filiis, id est imitatoribus tuis, Israël regnum, scilicet visionis diuinæ. Tu es illa, quæ in nouo Testamento, primò pro homine benedictum Filium tuum exorasti. Tu esurienti frangis panem tuum: quoniam particulariter distribuis gratiam cor hominis confortantem. Inducis egenos & vagos in domum tuam, scilicet in Paradisum: nudos operis vestimentis virtutum, & carne tuâ purissimâ vestisti Filium tuum benedictum.

2. Tu benedicta Virgo Maria, designata es per Templum Salomonis, de quo loquitur Deus, *Oculi mei erunt aperti, & aures me erigete ad orationem eius, qui in loco isto orauerit: elegi enim & sanctificauit locum istum.* Tu facile impetras, Virgo Maria, quidquid petis à benedicto Filio tuo: ideò de te potest dici, *Ora pro nobis, quoniam mulier sancta es, & timens Deum,* figurata per illam Reginam Esther, cui dicebatur, *Inuoca Dominum, & loquere pro nobis Regi, & libera nos de morte.* Tu enim, Virgo Maria, detines iram Dei, ne statim vindicet in nos: vnde dicis, *Tenui eum & non dimittam.* Conquererebatur enim Deus antequam, Virgo Maria, tu esses nata, dicens, *Non est qui surgat, & teneat me.* Sed tu facta es aduocata nostra, & allegas pro nobis fideliter omnia benedicto Filio tuo. Sicut igitur, clementissima Domina Virgo Maria, assidue non cessas orare pro nobis: sic etiam assidue debemus tibi sacrificium puræ & deuotæ orationis: vt de te matre dicatur, sicut dicitur de benedicto Filio tuo, qui *Reminiscimini Dominum, ne taceatis, & ne detis silentium ei, & sine intermissione orate.* Ideò de te cantauit Ecclesia,

*Omnis homo omni horâ,
Ipsam ora, & implora
Eius patrocinium.*

3. O benedicta Virgo Maria, mutus fui; quia te non orauit, aut si orauit, hoc solum feci ore, non corde. Adiua me, Virgo Maria, ostende pietatem tuam: ne reddas mihi vicem pro vice; sed ora pro me iugiter Filium tuum benedictum, vt mihi dimittat, quod conscientia metuit, & adiciat quod oratio non presumat, vt ipsum, & te, laudem in æternum. Amen.

Contemplatio VIII.

Quod Beata Maria debemus benedictionem.

1. **Q**uam humana fragilitas potest, te, benedicta Virgo Maria, benedicere debemus: quamvis humana fragilitas nostra dignè non valeat, non desinet te benedicere. Nam per virginalem partum tuum, maledictio Eux in benedictionem conuersa est. Quando dictum est tibi, *Aue* ^{Luc. 1.} *gratia plena*. Sic igitur incessanter corde & voce te benedicere debemus, ^{28.} ut benedicendo benedici mereamur à Domino. Si enim Abraham dictum est à Domino, *Benedicam benedicientibus tibi, & maledicam maledicentibus te;* ^{Gen. 12.} & si dictum est Iacob, *Qui maledixerit tibi, sit maledictus, & qui benedixerit tibi, benedictionibus repleatur,* multò fortius est tibi dictum, Virgini ^{Ibid. 27.} Maria, istud: quia filia es Abraham & benè designata per Iacob, qui inter- ^{29.} pretatur *Supplantator*: quia tu, gloriosa Virgo Maria, simul & semel omnia vitia supplantasti.
2. Benedicentes ergo tibi, habitabunt terram viuentium: maledicentes autem tibi disperibunt; id est, in diuersas partes peribunt; scilicet in corpore & anima, quales sunt Infideles, & iniqui Christiani, & blasphemii. Voluntas namque tui benedicti Filij est, ut te benedictam Matrem suam, & Dominam nostram dignissimam benedicamus in omni tempore, scilicet nocte, & die, in prosperis, & aduersis: ut laus tua semper versetur in ore & corde nostro; de te continuò meditando, te laudando, propter te operando, benedicendo, tibi gratias agendo, tua magnalia prædicando, vitam tuam nuntiando, scripturas de te elucidando; ut laus tua sit quasi frænum in maxillis nostris nos refrænans à vitijs linguæ. Vnde, Virgo Maria sanctissima, tu promissisti cum benedicto Filio tuo, laudatori, quod scribitur, *Laude meâ infrenabo te, ne intereas:* & omnia quæ intra me sunt benedicant nomen sanctum tuum in sæculum sæculi. ^{1/a. 48.}
3. Sed, quid faciam, ô benignissima Virgo Maria, ego sceleratissimus ^{9.} peccator, qui te non benedixi, sed blasphemavi, non solum te, sed etiam ^{Psalm. 102. 1.} benedictum Filium tuum: opera vtriusque non feci, sed opera nequissimi ^{144.} hostis. Succurrat mihi pietas tua, Virgo Maria, exora Filium gloriosissimum, ut vitam meam miserabilem emendare dignetur, peccata misericorditer indulgendo, & virtutes tribuendo, quibus mediantibus ipsum & te assidue laudem, & benedicam per infinita sæcula sæculorum. Amen.

Contemplatio I X.

Quod Beatæ Virgini debemus prædicationem.

- 1.** *S*acratissima Virgo Maria, de te scriptum est; *Surrexerunt Filij eius, & beatissimam prædicauerunt.* Tu, Virgo Maria, es beata propter carentiam omnis mali; tu es beator propter abundantiam omnis boni, quia cum securitate possides omne bonum, *Surrexerunt* igitur *Filij*, id est, omnes Fideles Ecclesiæ Catholicæ ad prædicandum te, & tua opera miraculosa, & virtutes. Sed primò *Surrexerunt*; quia, qui dignè vult prædicare te, aut tibi seruire, prius debet surgere à peccato per pœnitentiam: quia *Non est speciosa laus in ore peccatoris*; idè prius dicitur, *Surrexerunt.* Nec dignus est, qui in peccato mortali est, vocari Filius tuus.
- 2.** *Surrexerunt* igitur *Filij*, id est, imitatores, maxime in castitate, largitate & humilitate; Filius enim esse probatur, qui facit Patris opera: quia, qui Genitoris non facit opera, negat genus. Filij ergo tui, Virgo Maria, id est, imitatores esse probantur, si sint mansueti, benigni, humiles, casti, misericordes, & huiusmodi. Et si sic fuerint Filij in præfenti, in futuro erunt hæredes: quia scriptum est, *Si Filij & hæredes.* Vnde tibi loquens Deus dixit, *Effundam Spiritum meum super semen tuum, & benedictionem meam super stirpem tuam.*
- 3.** Sed, benignissima Virgo Maria, dum in mente mea contemplor te, quæ es Soror Dei, Amica Dei, Electa Dei, Mater Dei, ab Angelo salutata, Dei gratiâ repleta, à Domino comitata, in mulieribus benedicta, benedicto fructu fecundata, à Magis & Pastoribus cum Filio adorata, Ioseph Virgini commendata, in throno Filij super Angelicas Virtutes exaltata: dum etiam considero, quòd beatus Ioseph Sponsus tuus Vir iustus, paucens grauidationem tuam voluit te occultè dimittere, & Elizabeth se se indignam iudicans aduentu tuo dixit, *Vnde hoc mihi ut veniat Mater Domini mei ad me?* quomodò ego miserrimus peccator cinis & pulvis, indignissimus laude tuâ, audebo te prædicare? quin potius vociferando clamem cum suspirio & gemitu coadis, *Exi à me, ô Domina, quia homo peccator sum.* Sed, misericordissima Domina, de tua immensa pietate confusus venio ad te, supplicans, vt non abhorreas me peccatorem quæ aduocata peccatorum existis. Sed ora Filium tuum benedictum, vt peccata mea deleat, vitam meam miserabilem emendet, virtutes tribuat; vt resurgam virtuosè à peccatis, & ipsum & te laudem & glorificem, vtriusque dicta & facta contempler, & quantum humana fragilitas patietur, mutari possim, & mutatus prædicare te & exaltare valeam, vt in fine obtineam gloriam sempiternam. Amen.

CON-

Contemplatio X.

Quòd Beatæ Virgini debemus gratiarum actiones.

1. **Q**uid faciam tibi, ô Custos hominum, id est, ô tu, sacratissima Virgo ^{Iob. 7.}
 Maria, quæ custodis omnes Fideles Christianos? Quid faciam tibi? ^{10.}
 id est, quid retribuam tibi pro omnibus beneficiis tuis? bonorum meorum
 non eges. Quid ergo faciam tibi? cum nihil boni ex me possim facere, & si
 quid facio, quod videatur bonum, nihil est coram te, & verè nihil respectu
 bonorum, quæ iugiter facis mihi. Sed fac, misericordissima Virgo Maria, ^{Phil. 4.}
 non solum mihi, sed etiam omnibus Fidelibus tuis, vt in omni oratione & 6.
 obsecratione, cum gratiarum actione de beneficiis iam perceptis, petiti-
 ones nostræ apud te innotescant. Omnimodas enim gratias debemus tibi
 reddere: quia in te & per te, factus est Deus homo, vnde accreuit nobis
 prærogatiua maxima honoris & dignitatis, amoris & fortitudinis: propter
 quos Filius Dei minoratus est paulò minùs ab Angelis quoad conditionem
 naturæ: quæ non sunt carnei, nec mori possunt, sed Verbum caro factum
 est, & immortalis mortalis.

2. Magnificet te igitur omnis anima, & gratias tibi referat, ô Mater
 dulcedinis, vnde salus nostra profluxit. Collaudet te omnis lingua piorum
 in sæcula sæculorum: quia per te reducti sumus de tenebris, ad lucem, de
 inuio, ad viam, de morte, ad vitam, de corruptione, ad integritatem: de
 luctu, ad risum, de mœrore, ad gaudium, de terra, ad cælum, de carcere,
 ad regnum, de seruitute, ad libertatem, de pœna, ad gloriam, & de ore
 saeuissimi draconis, ad sinum piissimi Patris. Idcirco gratiarum actio non ^{Ecel. 14.}
 debet cessare: sicut etiam non cessas nobis benefacere, vt ad locum, vnde ^{7.}
 exeunt, flumina reuertantur, vt iterum fluant. In hymnis & confessioni- ^{Luc. 1.}
 bus laudent Deum, qui magna fecit in Israël, id est, in te Virgine Maria, ^{49.}
 sicut tu dicis, *Fecit mihi magna qui potens est.* Et etiam per te magna fecit
 in Israël, id est, in Populo Christiano.

3. O piissima Virgo Maria, ego prauissimus peccator, ingrattissimus fui
 tibi: quia de immensis beneficiis tuis, quæ iam suscepi, & iugiter suscipio,
 gratias tibi non retuli, neque tibi complacere volui: sed potius displicui
 propter innumerabilia peccata quæ commisi, & adhuc non desino com-
 mittere. Succurre mihi, clementissima Virgo Maria, indulgendo mihi, &
 orando tuum Filium benedictum, vt ingratitude in istam auferat; & me
 effectualiter disponat ad seruendum vtrique, vt regnum in fine obtineam
 sempiternum. Amen.

P A R S XVII.

QUALIS DEBET ESSE SERVVS
Gloriosæ Virginis Mariæ.

Contemplatio I.

Qualis debet esse Servus Beate Virginis Mariæ.

1. **M**UNDISSIMA Virgo Maria, mundi & immaculati debent esse Servi & laudatores tui, quia tu es hortus conclusus, & fons signatus. In hortum floridum & deliciosum non est intrandum pedibus immundis: aqua purissimi fontis non est haurienda sordidis manibus. Ad tibi igitur serviendum & te laudandum non est accedendum, nisi puro corde, & purificatis cogitationibus; ut tecum dicere valeat, *In habitatione sancta coram ipso*, id est, Filio tuo benedicto; vel *coram te*, Virgine Maria, *ministravi*. Sancta enim habitatio idem est quod munda, à terra eleuata, & firma conuersatio.
2. Ministris & servis tuis, qui dignè, & placitè cupiunt tibi seruire sunt hæc necessaria; ut tibi ministrent & seruiant in munditia & abiectione voluptatum, in contemptu temporalium, in patientia aduersorum, & in desiderio æternorum, simpliciter, humiliter, & perseveranter. Ut dicere valeant, *Serviamus illi in sanctitate & iustitia coram ipso omnibus diebus nostris*. In sanctitate, id est, in munditia: quia scribitur, *Ambulans in via immaculata, hic mihi ministrabat*: & in iustitia; ut non credat tibi serviens dare gratuitum, sed reddere debitum. Debet igitur serviens seruire tibi *omnibus diebus*, id est, perseveranter; ut non sit serviens tuus alteri Domino obligatus; quia *Nemo potest duobus Dominis seruire*. Non sit obligatus mundo, qui serviensem sibi non remunerat, imò in discessu totaliter spoliat: non diabolo, quia quanto affectuosius ei seruiunt, tanto contra tales gravius exacerbatur: non carni, quæ de servitio, quod ei fit, non reddit nisi feces. Idcirco, purissima Virgo Maria, tibi serviendum est in munditia carnis, voluntatis & cordis. Carnis quidem; abstinendo ab omni immunditia exteriori voluntatis, ab omni illicito consensu; cordis, abstinendo ab illicitis cogitationibus, & peruersis, quæ sicut separant à Deo, ita etiam à te.

Cant.
4. 12.Ecel. 24.
14.Luc. 1.
75.
Psal.
100. 6.Mat. h.
6. 24.

Sap. 1. 3.

3. O beatissima Virgo Maria, ego miser seruus tuus, immundus fui & sum, hostibus meis obligatus, quibus voluntarie seruiui, cum displicentia tua, & benedicti Filij tui, multa peccata committendo. Aduua me, piissima Virgo Maria, vt seruitio hostium meorum renunciem cum effectu, & tuo benedicto Filio, & tibi, seruam mundo corde, & corpore, nunc & in perpetuum. Amen.

Contemplatio I I.

De eodem.

1. **V**irtuosissima Virgo Maria, necesse est seruienti tibi, vt sit aromaticus per fragrantiam bonæ opinionis, & per exemplum castitatis, pietatis, & humilitatis. Nam quanto es purior, tanto magis foetet tibi luxuriosus, quia cum tu comparata sis api, fugaris factose. Cum sis mater pietatis, amplius foetet tibi impius & auarus. Cum sis exemplar humilitatis, plus displicet tibi superbus, & sic potest dici tibi de cæteris abominationibus viti-
Ecd. 39.
 19. flores, sicut lilium: date odorem, & frondete in gratiam: & date nomen eius magnificentiæ.

2. Et sic allicis seruientes tibi, primò ad redolentiam & fragrantiam virtutum, & postea ad te laudandum & magnificandum; & hanc fragrantiam debet habere tibi seruens dignè, in corde contra factorem prauorum desideriorum, sordidarum cogitationum & recordationum & imaginationum. Debet etiam habere hanc fragrantiam virtutum in ore, laudes tuas, quæ sunt aromaticæ species, assidue ruminando, & ab omni impudico & detrahitorio sermone sollicitè abstinendo. Debet etiam habere hanc redolentiam virtutum in opere & sensibus, vt pro honore tuo, & vtilitate ipsius abstinere ab omni opere polluto, & sensus suos, & omnia membra sua sollicitè custodiat ab omni actu illicito: scilicet oculos, ne defigat eos in aliquam vanitatem; aures, ne pro posse suo audiat linguam nequam; nares, ne delectentur odoribus meretriciis, os, ne gustet quod gustatum affert mortem: tactum similiter & incessum à voluptatibus illicitis custodiat.
Iob. 6. 6.

3. O gloriosissima Virgo Maria, ego infelicitissimus peccator omnia prædicta noui & sciui, & in corde meo habui; & multos seruientes tibi sic dispositos vidi tibi seruire: & ad tibi simili modo seruendum inspirationes frequenter habui, sed sic durus, & lapideus ac ingratus fui, quòd ad seruendum tibi, dare operam nolui, sed in magna pigrizia, peccata tamen plurima committendo, mansi. Respice me, piissima Virgo Maria, oculo misericordiæ, & compassionis; & ora tuum natum, cui benignè, dignè, & humiliter seruiisti, vt delendo peccata mea, virtutibus me exornet, per quas vtrique seruam deuoto & humili corde, vt in fine gloriam assequar sempiternam. Amen.

Nnn 17

Contemplatio III.

De eodem.

1. **T**E glorioſam Virginem multi laudant, & benedicunt, cū benefa-
cis eis, alij vt benefacias eis: quorum laus etſi tendat ad te, tamen
reſcuratur ad ipſos de quibus ſcribitur, *ſemina eorum incuruata ſunt eis*, &
reflexa ad eos, id eſt ad ſuum commodum reſcurata. Non ſic Virgo Maria,
non ſic, ſed ſeruientes tibi debent eſſe recti, & eorum intentio ad te pro-
pter te eſt dirigenda; quæ non debet incuruari ad amorem terrenorum:
quia fecit Dominus hominem rectum.

2. Spiritum rectum innoua in viſceribus meis, ſuauiſſima Virgo Maria,
vt per rectam intentionem queram quæ ſuſum ſunt, non quæ ſuper terram;
Nam querere & meditari quæ ſunt ſuper terram, curioſitas eſt animæ, &
quia tu recta es, debet etiam rectus eſſe ſeruient tibi: & ſicut rectus Redem-
ptor eſt, ita debet eſſe rectus redemptus. *Videbunt te* namque *recti & laeta-
buntur*. Videbunt te, inquam, recti: id eſt qui per deſiderium ad cæleſtia
eriguntur, & ad terrena per amorem non incuruantur: & tales ſeruunt
tibi dignè, qui non exæcantur puluere mundanorum, nec ſæcibus pecca-
torum, nec porrigunt ſe antè, vt bona præſentia concupiſcant, nec retrò,
vt ante acta mala per delectationem reſpiciant: non dextrorſum, vt in pro-
ſperis per inſolentiam ſe effundant: non ſiniſtorſum, vt in aduerſis
per impatientiam ſe contrahant: ſed ſuſum proferunt incrementum, &
ſuſum habent cor, vbi Chriſtus eſt in dextera Dei ſedens. Tales igitur,
Virgo Maria, tibi dignè & deuotè ſeruunt, & te dignè magnificant &
laudant: & non ſoli ipſi, ſed cum alijs, dicendo, *Magnificate Dominum*,
id eſt, te, *meum, & exaltemus nomen eius in idipſum*.

3. O miſericordiſſima Virgo Maria, audi me miſerum peccatorem. To-
tus fui & ſum incuruatus ad conſentiendum temptationibus inimicorum
meorum, & ad perpetrandum & multiplicandum vitia & peccata. Non
ſeruiaſt tibi debite, vt debebam, neque dignè ad rectitudinem: ſed, ſi quan-
do ſeruiaſt tibi, hoc feci, non propter te, ſed propter me, vt benefaceres
mihi: & cū mihi benefeciſti, te laudare, & tibi gratias referre non curavi,
& ſic vitam meam miſerabilem perduxī. Auxiliari mihi digneris piſſima
Virgo Maria, & de curuo facias me rectum, meam intentionem ſuſum
continue erigendo ad te laudandum, & dignè tibi ſeruendum, vt regnum
æternum valeam poſſidere. Amen.

Contemplatio IV.

De eodem.

1. **O** Humillima & omni humilitate plena, clementissima Virgo Maria, qui tibi placide desiderat seruire, debet humilitate ornari, & cum aliqua laudabilia fecerit, ad laudem, gloriam, & honorem nominis tui, dicat, *seruus tuus inuiliis sum*. nam *minister* dicitur *minor statu*: *Ministrare*, *Luc. 17.* idem quod *minorem stare*: in quo notatur humilitas, vel *minister* quasi *minis territus*, scilicet per timorem, qui est frater humilitatis. Cum enim sumus pauperes, & egeni, & abiecti, de natura nostra, necesse est ut paupertatem & humilitatem pro benedicto Filio tuo & te Virgine Maria, voluntarie assumamus: maxime cum delectabiliter sit amplectendum, quod naturæ est consonum, & hæc naturæ nostræ sunt valde consona: quia pauperes & viles nascimur, & morimur, exemplo benedicti Filij tui; qui cum diues esset, factus est pauper; & cum esset Dominus omnium voluit seruire vniuersis.

2. O sanctissima Virgo Maria, tibi seruiens necesse est sibi habeat cum humilitate deuotionem; qui est pius & humilis affectus ad benedictum Filium tuum & ad te, ex contritione generatus. Est etiam teneritudo cordis, & mentis, quæ quis de facili resoluitur in lacrymas: hæc est medulla holocaustorum; unde scribitur, *holocausta medullata offeram tibi*: & quia, *Psalm. 69.* benedicta Virgo, sæpe per vehementiam feruoris, amittitur virtus discretionis, ideo *honor regis iudicium diligit*, id est discretionem. Sed expedit *Psalm. 98.* seruienti tibi habere discretionem, ut in omni sacrificio, quod tibi voluerit beneplacitum offerre, sal discretionis studeat apponere, ne quid nimis sit, vel parum: sed rationabile sit obsequium impendendum tibi.

3. Optissima Virgo Maria, succurre mihi misero infelici; qui non habui, nec habeo humilitatem, sed superbiam, non deuotionem, sed mundi lasciuiam: non discretionem, sed fatuitatem in omnibus actibus meis. Ideo seruitium meum non debuit tibi placere, nec mihi proficere. Sed exora Filium tuum gloriosissimum, ut misericorditer mecum agat, delicta mea omnia cum pietate remittendo, & ad suum seruitium atque tuum me ordinando, ut cum vera humilitate, prompta deuotione, & debita discretionem, utrique perseveranter seruiam nunc, & in perpetuum. Amen.

Contemplatio V.

De Eodem.

1. **Q**uia tu, pretiosissima Virgo Maria, mater es veritatis: quia *Veritas de terra orta est*, id est benedictus Filius tuus, qui est Via, Veritas, & Vita; *de terra*, id est de te Virgine Maria natus est: & tu fallere non intendis, neque falli potes. Ideo necesse est ut seruientes tibi habeant veritatem: quia viri mendaces non erunt apud te, & viri veraces inueniuntur in te, quibus necessarium est, si tibi dignè & placidè volunt seruire, ut habeant veritatem cordis & veritatē oris, & veritatem operis, debent namq; habere veritatem cordis, sine duplicitate: quia scriptum est, *Vir duplex animo, inconstans est in omnibus viis suis*, id est, actionibus suis. Debent habere veritatem oris, sine falsitate: quia, *os, quod mentitur, occidit animam*. Tales enim vitam gratiæ perdunt in presenti, & vitam gloriæ in futuro. Debent etiam habere veritatem operis, sine vanitate, ut non in laudibus hominum delectentur hīc, sed aliam retributionem expectent à Deo, non sicutii de quibus dicitur, *Amen dico vobis, receperunt mercedem suam*. Qui enim propter humanum fauorem bonum facit, tacente populo mercedem amittit.
2. Nec confidant tibi seruientes in multiloquio, sed debent esse taciturni: quia, *in multiloquio non deest peccatum*. A te gloriosa Virgine Maria, debent lumere exemplum, & te pro posse imitari in taciturnitate: qui secundum Euangelium septies solummodò locuta fuisti: idè à seruientibus tibi exoranda es assidue; ut quisque dicat tibi cum deuotione, & humilitate cordis, *Pope, mea dulcissima Domina, custodiam ori meo, & os meum circumstantie labiis meis, ut non declinet cormecum*, id est, non permittas illud inclinari à rectitudine virtutū, *in verba malitia, ad excusandas excusationes in peccatis*.
3. O virtuosissima Virgo, ego peccator mendax & iniquus non habui veritatem in ore meo, nec in corde, nec in opere, sed in vitiis & peccatis habui multiloquium; imò praua opera assidue: & sic tibi non seruiui placidè, ut debuissim. Parce mihi, purissima Virgo Maria, parce mihi & exora Filium benedictum, ut mihi indulgeat, & peccata remittat, seruum placitum sibi & tibi me faciat hīc, & in sempiternum. Amen.

Contemplatio VI.

De eodem.

1. **S**icut tu, misericordissima Virgo Maria, seruans es ad saluandum nos, sic etiam seruire debemus, ut tibi assidue & humiliter seruiamus, ser-

uientes namque debent esse seruientes tibi, & non pigri, nec tepidi, & negligentes; ne eis dici possit, *Vinam frigidus esses aut calidus: sed, quia tepidus es, incipiam te euomere ex ore meo.* Calidi enim sunt spiritualibus feruentis desiderijs, frigidi horrore peccatorum suorum & aeternae damnationis contriti, & istae affectiones optabiles, & acceptabiles sunt benedicto Filio tuo. Tepidi autem sunt vtriusque huius affectionis expertes; & ideo dicitur, *Incipiam te euomere ex ore meo:* id est, à societate fidelium, qui sunt os Domini, separare turpiter: sicut, quod euomitur, turpiter eiicitur. Sed, beatissima Virgo Maria, mirabilis est tui gloriosissimi Filij patientia, qui multoties vomitum resumit per misericordiam, cum de cibo euomito nullus hoc facere dignaretur. Ideo dicit, *Incipiam te euomere* sed non plenè vomit, nisi in morte: & in hoc quod dicit *Incipiam*, quodammodo praemonet timidum, vt praecauet sibi; quae est misericordia magna.

2. Necesse etiam est tuo seruienti quoddam sit pius: quia, sicut tu, Virgo Maria, es Mater pietatis & misericordiae: sic seruiens tibi necesse habet, vt & ipse sit pius & misericors, cum tu sis refugium misericordium, & auertas illos tuos misericordes oculos ab eo, quem vides immisericordem, cum tibi sit omnino dissimilis. Debet insuper seruiens tibi esse patiens ad contumelias verborum, vt honore tuo patienter toleret sublationes impiorum; & bibat, exemplo Iobi, sublationem sicut aquam, nec respondeat contumeliosis, sed sit mansuetus ad omnia; etiam patiens ad damnationem rerum temporalium, vt dicat cum Iobo: *Dominus dedit, Dominus abstulit.* Sit etiam patiens ad laesionem membrorum, & haec patientia perfectior est duabus primis. Hanc exhibuit benedictus Filius tuus, dicens, *Corpus meum dedi percutientibus.*

3. Istis omnibus carui, & adhuc careo, piissima Virgo Maria, ideo seruus inutilis tibi fui, & sum indignus te nominare. Sed fac mecum misericordiam, Mater misericordiae, deprecando tuum gloriosissimum Filium, vt defectus meos misericorditer emendet, vt tibi & sibi placeam, fideliter seruiam, & in bonis operibus virtuosè perseuerem, & vitam sempiternam acquiram. Amen.

Contemplatio VII.

De eodem.

LAudo, glorifico, & magnifico nomen tuum in aeternum, piissima Virgo Maria, quia te mediante sublatum est iugum captiuitatis antiquae; pacificata est ira indignationis diuinæ, & deleta est nota iniquitatis humanae, quia homo, qui captius tenebatur, liberatus est; & qui offensam Dei incurrerat, reconciliatus est. O dulcissima Virgo Maria, nihil dulcius libertate post captiuitatem, iustificatione post impietatem, reconciliatione post offensam.

Idcirco tota iustorum vita, deuota desideria, sanctæ meditationes, iustæ operationes, crebræ gratiarum actiones, & cetera huiusmodi cogitari, & operari debent, vt ex his omnibus præcipuè, post beatam Trinitatem, honoris præ cæteris Sanctis omnibus: quia causam æternæ salutis operata es in nobis. Igitur lætifica animam serui tui lætitiâ & spiritali gaudio, Virgo Maria, vt laudes, quas tibi indignus obtuli, acceptabiles sint semper in conspectu tuo, vt à gratiarum actionibus pro beneficiis tuis vniuersis nunquam cesset cor meum: vt in ipsis perseverando, ad gloriam perueniam sempiternam. Amen.

*Expliciunt Contemplationes deuota super vita & laudibus Gloriosa
Virginis Maria.*





PARALIPOMENA.

INCIPIVNT LAVDES BREVES

& singulares Gloriosæ Virginis Mariæ,
quotidie dicendæ cum deuotione:
& primò dicatur hæc Oratio.

Oratio.

IRGES cor meum, & linguam meam, Domine Iesu Christe,
ad laudandum gloriosam Virginem Mariam Matrem tuam:
vt vtrique dignè & placitè seruiendo, laudare te valeam in
æternum. Qui viuis, &c.

Deinde dicatur ad eius conceptionem & sanctificationem, ad quamli-
bet, Aue Maria,

Oratio.

TVæ misericordiæ opem fer nobis, Mater misericordiæ, vt qui tuæ
conceptionis & sanctificationis memoriam recolimus, tuâ piâ misera-
tione præueniamur Per Christum Dominum nostrum. Amen.

Ad tres potentias animæ, ad quamlibet dicatur, Aue Maria,

Oratio.

Benedicta Virgo Maria, animæ tuæ potentiæ potentes nos faciant: vt
partes iustitiæ adimplendo, gloriosi Filij tui potentiâ misericorditer
protegatur. Qui vinit & regnat.

Ad Natiuitatem, Aue Maria.

Oratio.

Natiuitas tua, gloriosa Virgo Maria, gaudium attulit vniuerso mundo:
fac vt tuis sanctissimis precibus gaudium obtineamus sempiternum,
Per Christum, &c.

Ad nomen eius dicantur quinque Psalmi, pro qualibet litera nominis dica-
tur vnus Psalmus, scilicet Magnificat, Ad Dominum, Retribue, In con-
uerendo, Ad te leuavi, & in fine cuiuslibet dicatur, Aue Maria.

Ooo

Oratio.

Propter nomen tuum, Virgo Maria, quæ Stella maris nominaris, dirige nos in hac via, vt tecum habitemus in patria. Per Christum.
Ad quinque sensus corporis, pro quolibet, Aue Maria.

Oratio.

Guberna sensus nostros, Virgo singularis, & sicut tuos sensus ad Dei beneplacitum ordinasti, sic nostros, tuâ pietate fauente, ad eius seruitium continuè præparemus. Per Christum.

Ad omnia membra eius singulariter dicatur, Aue Maria.

Oratio.

Laudamus & benedicimus pia membra sacri corporis tui, Virgo Maria intemerata: vt sicut piè credimus ea in cœlis glorificata; sic te propitiantem nostra perenniter glorificentur. Per Christum.

Pro septem donis Spiritus sancti, quibus dotata fuit, pro quolibet, Aue Maria.

Oratio.

Intercede pro nobis, Virgo Maria, vt dona sancti Spiritus tibi à Deo concessa, nostris cordibus infundantur, per quæ hîc bonis operibus insistentes, cœlestem gloriam consequamur. Per Christum.

Pro septem virtutibus, quibus ornata fuit, contra septem vitia criminalia, dicatur, Aue Maria.

Oratio.

Gratias tibi referimus, Virgo benedicta, quæ ornata septem virtutibus septem vitia criminalia abiecisti: exora quæsumus Filium tuum benedictum, vt vitiis expulsis nobis virtutes inferat, & ad æternam gloriam nos perducatur. Per Christum.

Pro tribus virtutibus Theologicis, & quatuor Cardinalibus, pro quolibet, Aue Maria.

Oratio.

Beatam te dicunt omnes generationes, Virgo Maria, quæ virtutibus Theologicis, & Cardinalibus illuminata fuisti, easdem in nobis tua pietate imprime, vt ad tuam gloriam peruenire mereamur. Per Christum Dominum.

Pro articulis fidei, pro quolibet, Aue Maria.

Oratio.

Precibus assiduis exora tuum Filium, gloriosa Virgo Maria, vt articulos fidei, quibus ornata fuisti, credamus firmiter corde & opere, in vita & morte, vt vitam æternam consequamur. Per Christum.

Pro præceptis diuinis, pro quolibet, Aue Maria.

Oratio.

Obedientiam, quam circa præceptorum diuinorum obseruationem, Virgo Maria, habuisti, fac nos tuâ interuentione tenere, vt sub obedientia Filij tui perpetuò collocemur. Qui viuât.

Pro septem operibus misericordie spiritualibus, pro quolibet, Aue Maria.

Oratio.

Spiritualia misericordiae opera, quibus exuberat, Virgo benedicta, ex-
tende ad nos miseros peccatores, ut ipsis adiuti, mentis & corporis
salute fruamur. Per Christum.

Pro septem operibus corporalibus misericordiae, pro quolibet, Aue Maria.

Oratio.

Exora Filium tuum, Virgo gloriosa, ut insistendo operibus misericordiae
quae operata esset tam sententiam ad dexteram eius collocati in tre-
mendo iudicio reportemus. Qui vivit.

Pro septem Sacramentis Ecclesiae, pro quolibet, Aue Maria.

Oratio.

Subueniat nobis misericordia tua, Regina caelorum, ut Sacramenta Ec-
clesiae credendo firmiter & tenendo, nunquam à benedicto Filio tuo
separemur. Qui vivit.

Pro septem gaudiis quae hic habuit de Filio suo, pro quolibet, Aue Maria.

Oratio.

Perfice in cordibus nostris, Virgo Maria, per gaudia quae hic de Filio
tuo suscepisti aeternaliter, ut tecum gaudere perpetuo valeamus. Qui.

Pro dotibus animae, pro quolibet, Aue Maria.

Oratio.

Virgo gloriosa, inuoca Filium tuum, qui diues est omnibus qui inuo-
cant illum, ut animas nostras propter peccata suis dotibus priuatas
restituatur, & diuites faciat misericorditer in aeternum. Qui vivit.

Pro dotibus corporis eius, pro quolibet, Aue Maria.

Oratio.

Vt hic viuendo in presenti mundo gloriosis dotibus corporis in futuro
non priuemur: Virgo Maria, exora assiduam precem tuam Filium be-
nedictum. Qui vivit.

De beatitudinibus eius, pro quolibet, Aue Maria.

Oratio.

Non cesset deprecatio tua ad Filium tuum, Virgo Maria, ut tuarum
beatitudinum participes efficiamur. Qui vivit.

De septem gaudiis, quae habet in gloria, pro quolibet, Aue Maria.

Oratio.

Vira nostra à Filio tuo sic dirigatur, te adiuvante, Virgo Maria, ut tecum
de tuis celestibus gaudiis aeternaliter gratulemur. Qui vivit.

Conclusio laudum.

Oratio.

Quamuis nequissimum peccatorem me sciam, Virgo Maria, preces
meas non abhorreas, quae misericordia plena es, & aduocata pecca-
torum existis, sed laudes, quas indignus tibi obtuli, placide suscipias, ad
laudem & gloriam tui Filij benedicti, cum quo viuis & regnas, per omnia
saecula saeculorum. Amen.

Ooo ij

Expliciant laudes breues & singulares glorioſe Virginis Mariae.

Oratio poſt Aue Maria de Serò.

Salutationem Angelicam hac horâ, trinâ prolatione oblatam glorioſe Virgini Mariâ, ſuſcipe Trinitas benediâta; vt tribus inimicis, te adiuuante, deuictis, triplicis Hierarchiâ gloriâ conſequamur. Per Chriſtum Dominum noſtrum.

Oratio poſt Aue Maria de Manè.

Pacem in præſenti oratione, ac ſalutatione Angelicâ nunc petitam, tribue nobis Saluator mundi: vt in beneplacito tuo hîc viuentes, pacem perpetuam tuâ miſericordiâ conſequamur. Qui viuis.

FINIS.





IDIOTÆ

DE RELIGIOSORVM STATV ET CONDITIOE.

LIBER PRIMVS.

Contemplatio de ingressu religionis.

CAPVT I.

1. **R**ATIAM tuam in vacuum confiteor me recepisse, Domine Iesu Christe: quia licet in susceptione lauacri sacri fontis gratiam tuam receperim, tamen ad maiorem & perfectiorem gratiam obtinendam, religiosum me fecisti: & sic primò per baptismum tibi ligatus ad fidei tuæ cognitionem, postremò tibi religatus fui & obligatus per habitus sacre religionis susceptionem, ad maiorem morum & virtutum perfectionem, & votorum obligationem, vt contra hostium malignorum astutias animo constanti me defendam.

2. Nam sicut illi qui in castello, vel ciuitate, tuti & securi non sunt, ad turrim pro securitate confugiunt: sic infirmi & imbecilles, qui in mundo timent hostium peruersorum bellicosas astutias, ad turrim religionis accedunt & confugiunt, vbi concursus hostium à longè speculantur, vbi tutius & cum maiori securitate viuunt, & in plenitudine tranquillitatis & pacis habitent, quia ibidem recedunt à mundo, & accedunt ad te. Exeunt de tenebris, & veniunt ad lucem, & de labore ad requiem: quia suscipiunt arma sanctimonie, exercitium diuinæ militiæ, studium disciplinæ, capacissimum fructum iustitiæ, primitias felicitatis æternæ, & quicquid extra claustrum religionis est, plenum est anxietate, inquietudine, amaritudine, formidine, sollicitudine, & dolore. Ibi vt anima eleuetur in te, caro deprimitur in ciborum parçitate, vestimentorum asperitate, obedientiæ

Ooo iij

iugo, censura silentij, regularitate morum, in vigilijs, in confessionibus, in disciplinis, in psalmis, in charitate, & cæteris quibus fructus vitæ seminatur in terris.

3. O benignissime Domine Iesu Christe, tantam gratiam mihi contulisti, ut omnium virtutum prædictarum participem me faceres. Sed ego miserabilis peccator, & ingratus tibi hanc maximam gratiam in vacuum recepi, non sequendo consilium Apostoli, sed irritum faciendo, habitum religionis duntaxat suscepi, sed mores sæcularium non mutavi, imò deterior sum effectus: & vnde mereri debebam, pœnam cumulaui. Adiuua me, misericordissime Domine, ne sic delusus moriar: sed sicut cogitationem horum mihi dedisti, sic effectum medendi mihi tribue, ut tuam gloriam percipiam sempiternam. Amen.

Quid operetur deuotus ingressus religionis.

CAPV T II.

1. **P**ER deuotum & humilem ingressum sacrae religionis, clementissime Domine Iesu Christe, constat interiorem hominem renouari de die in diem: quia intentio prius terrenis incuruata curis, postea de imis paulatim per virtutum exercitia ad superna resurgit, & affectio circa desideria carnis languens, sensim in amorem spiritus conualefcit, & memoria veterum operum torpedine sordens, nouis, bonisque actibus candidata, in dies lætitia hilarescit. In iis scilicet tribus, voluntate rectissima intentionis, puritate optima affectionis, & recordatione bonæ operationis, per quam bene sibi conscia memoria enitescit, ipse religionis humilis ac deuotus ingressus operatur, in quo interior renouatio consistit.

2. Verum cum certum sit hoc diuino spiritu in ipso religioso agi, tua Domine munera sunt: quia verò cum eius voluntatis consensu fiunt, eius ex tua acceptatione efficiuntur merita. Tu ergo benignissime Domine Iesu Christe, autor es meriti, qui & voluntatem applicas operi, & opus explicas voluntati. Alioqui si secus appellentur illa religiosi deuoti merita, spei sunt quædam seminaria, charitatis incentiua, occultæ prædestinationis indicia, futura felicitatis præsagia, via regni, vel regnandi causa. Denique Domine Deus meus, quos iustificasti, non quos iustos inuenisti, hos & magnificasti.

3. O misericordissime Iesu Christe, in maximo periculo sum constitutus ego iniquissimus religiosus: quia per ingressum religionis meus interior homo ex magna malitia mea non fuit renouatus: quia mea praua intentio in rebus mundanis & transitorijs prostrata iacet, vix ad superna resurgens: mea verò perversa affectio, intenta desideriis carnalibus, non permittit animum eleuari ad te, sed infecta remanet in desideriis suis. Memoria autem ad vitia & peccata oculos figens, delectatur in eis, & sic in me homo interior non renouatur: sed potius inueterascit in peccatis, & languet in ipsis. Adiuua me, piissime Domine, & renoua spiritum rectum in visceri-

bus meis: vt mea intentio fiat in oculis tuis recta, & affectio pura, memoria munda, & ad te eleuetur per continuam tuorum beneficiorum meditationem, & gratiarum perpetuam actionem. Amen.

De celeri conuersione ad Deum.

CAPVT III.

Remedia conuersionis ad te, misericordissime Domine Iesu Christe, nullis sunt dilationibus differenda, ne tempus pereat tepiditate: quia illa peccati poena iustissima est: vt cum quis recte facere possit, nolit, & amittat posse, cum velit. Vnde satis à fide alienus videtur esse religiosus, qui ad agendum poenitentiam tempus senectutis expectat. Timendum namque est, ne sperans misericordiam incidat in iudicium: quia dissoluta est cogitatio de conuersione, cogitare crastinam, & negligere hodiernam. Et sic multos negligentes religiosos remissa conuersio in pristinos reducit errores: quia solent inter conuersionis primordia, arctius insurgere prauæ cogitationis tentatio, & ignita iacula diaboli, quæ vix possunt extinguï. Nam ex recordatione operum præcedentium, ipsi miseri religiosi post conuersionem etiam nolentes, motus diuersorum vitiorum sustinent. Sed tu piissime Domine, ex tua infinita bonitate sine dubio ad probationem hoc das: vt sic semper habeant hostem pro excutienda inertia, cui resistent, & non consentiant, sed quia labor eorum non est in præsentî, sed in futuram differtur remunerationem: ideo dum eorum laborem mercedis retributio non statim sequitur, sæpe remissio dissoluta languescit: vnde magnam gloriam illis præparas, Domine Iesu Christe, qui bonæ conuersionis principia augmento solidato consummant.

2. Felix est ille religiosus Domine, & tua benedictione dignus, quem senectus occupat tibi deuotè & humiliter seruientem, & quem extrema hora inuenerit tibi placidè militantem: quia talis non confunderetur cum loqueretur inimicis suis in porta: cui diceretur in ipso introitu alterius vitæ: Recepisti mala in vita tua, nunc latere. O benignissime Domine Iesu Christe, miserere mei digneris secundum magnam misericordiam tuam: quia non sum talis religiosus quem senectus occuper tibi seruientem, sed potiùs iuuentutis & senectutis tempora in peccatis & diuersis vitiis occupavi, meaque conuersio tarda & remissa fuit: sed tua immanis pietas festinet vt conuertar dignè ad te, derelinquens vias iniquas, & tecum tua sola gratia viuam misericorditer in æternum. Amen.

De conuersione interiori & exteriori.

CAPVT IV.

1. **C**onuersione sola corporis nulla est, Domine Iesu Christe, nisi affuerit etiam cordis. Hanc autem conuersionem corporis recipit miser religiosus, qui totus pergens in ea quæ foris sunt, & ignarus interiorum suorum, putat se aliquid esse cum nihil sit, & seipsum seducit: quia exteriorum superficiem intuens, salua sibi esse omnia suspicatur, non sentiens veracem occultum qui intima corrodit. Talis igitur sic palliatus, seducens etiam semetipsum, solas manus mouet interdum ad opera mandatorum corde penitus arido, sic ductus consuetudine quadam. Talis namque miser religiosus, in corde suo seruus est propriæ voluntatis, cultor auaritiæ, gloriæ cupidus, ambitiosus amator. Hæc omnia etiam singula vitia intus fouens, mentitur iniquitas sibi, quia non irridetur Deus.

2. Talis miserabilis religiosus, sub habitu religionis gerit animum sæcularem, & sub pannis conuersionis, cor peruersum. Et ideo si salutem animæ suæ desideraret, deberet sollicitè considerare quid diligeret, quid timeret, vnde gauderet aut vnde contristaretur: quia totum cor hominis in ijs quatuor affectionibus consistit. Amor enim debet esse tui, Domine Deus meus, aut propter te. Timor autem peruersus est, nisi fuerit tui, aut propter te. Gaudium autem & tristitia æque conuerti debent ad te: vt non gaudeat cum malè fecerit; nec in rebus pessimis lætetur. Non tristetur de ijs quæ secundum carnem sunt, sed de proprio, aut de proximi peccato: quia hæc tristitia ad salutem animæ est. Debet etiam in dilectione tuâ, fraternis congaudere prosperitatibus, & aduersitatibus condolare.

3. O benignissime Domine Iesu Christe, confundor in conspectu tuo, dum me cogito religiosum peruersum, & mutatum habitu corporali non cordiali, & sub illo habitu plurima & nefandissima peccata commisi, gerens lupum sub veste agni, & sic dupliciter peccaui. Respice me Domine, oculo pietatis & misericordiæ, & conuerte cor meum ad te, & sicut in corpore, sic & in mente digneris me mutare, vt sic conuersum ad tuum seruitium, dignè meipsum emendes, tibi placidè hic seruiam, vt seruitium tuum consequar in vitam sempiternam. Amen.

De gradibus ambulandi ad Deum.

CAPVT V.

1. **S**unt multi religiosi, clementissime Domine Iesu Christe, qui in carne ambulant, & in hoc omnem suam sollicitudinem ponunt, quomodo molestias euitent: & licet interdum virtutes præbeant, dum tamen molestias

illas carnis omnino euitare volunt, concupiscentiis eius plurimis nequeunt resistere. Duæ autem viæ à te, Domine, ante eorum oculos proponuntur. Vna vitæ, alia mortis. Vna salutis, alia perditionis. Via vitæ & salutis, tu dux es; viæ mortis & perditionis, diabolus. Tu illos ad vitam vocas, ille eos ad mortem trahit; tu ad salutem, ille ad perditionem. Quem namque ducem sequi debeant, vel cuius voluntati parere, nemo sanæ mentis ignorat.

2. In via tua, Domine Iesu Christe, duo gradus sunt, superior & inferior; in inferiori gradu, ambulat religiosus suo spiritu; In superiori gradu, ambulat tuo spiritu. In inferiori gradu ambulat religiosus, quando reuersus ad cor, circa affectiones suas sollicitus, in se reprehendit quod virtuti esse contrarium cognoscit. In hoc sequitur consilium Apostoli dicentis: Spiritu ambulate, id est, sollicitudinem vestram molestiarum carnis deponite. In hoc gradu, Domine Deus meus, sacrificium contribulati spiritus, & cordis humiliati per compunctionem, tibi religiosus offert. De hoc gradu ad superiorem ascendens, incipit cogitare beneficia tua, & conuersus ad gratiarum actiones, offert tibi per humilitatem, & deuotionem mentis, sacrificium laudis.

3. O gloriosissime Domine Iesu Christe pietati & bonitati tuæ confiteor, me fuisse vnum ex illis religiosis qui in carne ambulant, quia licet posui, & adhuc pono omnem diligentiam quam possum, vt molestias, id est, affectus carnis, euitem; sequor tamen iniquas concupiscentias cordis mei, & post eas ambulo summis viribus, viâ tuâ derelictâ, viam aduersarij mei elegi, & per illam incedo, & illâ gradior. Nec ad tuam meo sensu, neque tuo spiritu redeo, vt deberem, quamuis à tua pietate fuerim frequenter vocatus, & inspiratus. Misere mihi digneris, misericordissime Domine Iesu Christe: & remitte mihi omnia peccata mea Reuoca me errantem & deuiantem ad viam salutis, in qua tibi seruiam, & gratias agam, & per quam te donante, veniam ad gloriam tuam sempiternam. Amen.

De subiectione ad Deum.

CAPVT VI.

1. **S**Cio benignissime Domine Iesu Christe, omnem creaturam, velis nolit, tibi esse subiectam: sed magis subiectus est tibi religiosus, qui non solum per fidem in baptismo susceptam tibi ligatus, sed etiam per suspensionem habitus religionis tibi religatus est, & amplius quam ceteri subiectus, à quo voluntariam subiectionem queris, vt voluntarie sacrificet tibi: vt quod certum est te velle, velit & ipse omnino, & quod certum est te nolle, similiter excretur & ipse. Quod autem incertum est, vtrum velis aut nolis: ille non debet velle ex toto, neque penitus non velle. In hoc autem medio totum periculum est religiosi, dum infeliciter blanditur sibi, & palps seducit seipsum: & hunc accidit, vt simul et tuam querere volun-

PPP

tatem, dum & suam facere vult, & aliquam ignorantie pratendere excitationem: nullus enim tam infelix religiosus est, qui id nolle audeat, quod certum est te velle, aut quod certum est, te nolle, id velle presumat, sed in medio periculum est.

2. Illa, quæ in scripturis manifestè apparent tibi placere, indubitanter debet appetere, & approbare, vt est charitas, humilitas, castitas, obedientia, & similia. Sic & ea omnibus modis odio habere, de quibus certum est, quod tu illa odio habes, vt est apostasia, fornicatio, iniquitas, detractio, superbia, gulositas, impatientia, & similia. In iis verò rebus de quibus nihil certum religiosus inuenire potest, nihil certum eius voluntas definiat, sed pendeat inter vtrumque, aut saltem neutri parti nimis adhæreat; cogitans semper ne fortè altera pars magis placeat tibi, & paratus sit voluntatem tuam sequi, in quamcumque partem eam cognouerit inclinari per inspirationes infusas, aut doctrinæ informationem.

3. O misericordissime Domine Iesu Christe, qualiter tibi fuerim subiectus ego prauissimus religiosus, vita mea miserabilis lacrymabiliter mihi demonstrat, quam sic duxi damnablem, vt quæ tibi placebant, mihi omnino displicerent, & quæ tibi displicebant, mihi placerent, & ad ea exercenda operam dabam: dubia verò pro libito voluntatis determinabam, temerariè maiorum meorum consilio neglecto. O piissime Domine, non ponderes iniquitatem meam, sed misericordiam tuam, eam ad me extendendo, parce mihi, & remitte benignè peccata quæ commisi, vt te iuuante sic tibi subiectus sim cum effectu, vt regnum tuum in perpetua obedientia consequar sempiternum. Amen.

De fiducia habenda ad Deum.

C A P V T VII.

1. **C**Rede te Deo, tu qui in religione viuere cupis, & committe te illi: nam tibi ipsi fidere, non fidei, sed perfidiæ est, nec confidentiæ, sed diffidentiæ magis est, in te ipso habere fiduciam. Ille vero fidelis est, qui nec sibi credit, nec in se sperat factus sibi tanquam vas perditum, & sic perdens animam suam; vt in vitam æternam custodiat eam. Cum id cognoscas, si non vis cadere, non confidas tibi, sed innitaris Deo. Et si te tardio, acedia, vel tepore, in studio spirituali affici sentis, noli propterea diffidere, aut desistere à studio spirituali, sed iuuantis require manum cum confidentia obsecrans te trahi, donec denuò suscitante gratia factus sis promptior, & curas alacrior. Sic autem quamdiu est gratia, delectare in ea, vt non te existimes donum Dei iure hereditario possidere, ita videlicet securus de eo, quasi nunquam perdere possis; ne subito cum fortè retraxerit manum, & subtraxerit donum, tu animo concidas, & tristior fias, quam oportet. Curabis potius pro consilio Sapientis, in die malorum non immemor esse bonorum; atque in die bonorum: non immemor esse malorum.

2. Ergo in die virtutis tuæ noli esse securus, sed clama ad Deum, & dic: Cum defecerit virtus mea, ne derelinquas me. In tempore verò tentationis, conolare: & dic. Trahe me post te. Et sic non te deseret spes in tempore malo, nec in bono providentia deerit, erisque inter aduersa & prospera teneas inuiolabilem & inconcussam constantis animæ æqualitatem, benedicens Dominum in omni tempore, proice te in eum cum fiducia magna, & non subtrahet se ut tu cadas. Et quantum cresces in gratia, tantum in fiducia dilataberis, semper confidens, quod ille magnus, potens in opere & sermone, de excelso monte descendens, visitare dignatus est te, qui es pulvis & cinis: Magna igitur tibi debet esse fiducia apud Deum, Deus homo: & tibi verè pœnitentia debet esse magna spes, quod aduocatus tuus factus est iudex tuus.

3. O misericordissime Domine Iesu Christe, aduocate & iudex mi, ad te clamorem meum dirigo, ut me exaudias, & ne despicias. Religiosus sum, sed peruersus & iniquus, quia dum in religione existerem, totam fiduciam meam in te cordialiter ponere debebam, sed in transitoriis & caducis illam posui, immò frequenter in meipso. Sed indulgere mihi digneris piissime Domine, & remitte clementer peccata mea, ut totam fiduciam meam in te ponendo, gloriam tuam cum illa tandem intrem sempiternam. Amen.

De custodia suiipsius.

C A P V T VIII.

1. **R**eligiose qui in tua religione Deo placere intendis & fratribus tuis, non contendes supergredi fratres tuos: quia si ipsos supergredi velis, multas inuenies difficultates, multos patieris æmulos, multos contradictores. Nihil tamen facilius tibi erit, quam humiliari, & cognoscere, ac obseruare teipsum. Considera igitur teipsum, & inuestigare cures conscientiam tuam: & si fortè in aliqua re tibi aliqua gratia collata videtur, qua alius frater careat, si tu in bonis bonus æmulator fueris, poteris te cognoscere in multis bonis te esse fratre illo inferiorem. Quid enim tibi si laborare, aut ieiunare plus illo potes, & ille patientia te superat, humilitate præcedat, superemineat charitate? Non enim tota die versari debes in insipienti cogitatione circa hoc quod videris habere: sed magis esto sollicitus, ut scias quid desit tibi: hoc enim cogita, & ora instanter, ut obtineas quæ tibi desunt, ab illo qui dat omnibus affluentem, & non impropere.

2. Et si interdum ad memoriam reducis gratias tibi datas, hoc facias, ut gratiarum actiones agere possis illi, qui tibi illas gratis benignè concessit, & te cognoscas debitorem illi qui dedit. Si gratiam consolationis ad memoriam reducas, cum id necesse videris, ne ex aliqua causa tristior fias, attende semper quæ alius frater habet, & tu non habes: & hæc cogitatio te in humilitate custodiet, & à descensu repiditatis elongabit, & accendet &

Ppp ij

inflammabit cor tuum desiderio proficiendi. Si autem multa te habere cogitare cupias quæ fratrem existimas non habere; eleuaberis in superbiam, dum te præpones alteri. Et exinde alterum negliges, dum te magnum esse arbitraberis. Et tunc incipies deficere, dum tibi nimis videberis egisse alterius comparatione: & sic in tepiditatem venies, & incipies remissius agere.

3. O misericordissime Domine Iesu Christe, ego religiosus peccator, & reus ad te venio, confitendo reatum meum. Nam sic de meipso præsumptuose præsumpsi, quod cæteros fratres meos vilipendi, & me eis superbe præposui. Donare mihi digneris Domine, vt meipsum cognoscam, & emendem, vt tandem te cognoscendo tibi placeam per infinita sæculorum. sæcula. Amen.

Quæ sunt in religione seruanda.

C A P V T I X.

1. O bservantiâ regularis, Domine Iesu Christe, habet præcepta, & remedia; subiectionem, & stabilitatem. Præceptis namque instituitur vita religiosi contra peccatum. Remediis restituitur innocentia post peccatum. Subiectio, studiosum religiosum facit, & stabilitas fortem. Religiosus namque cum in aliquo fortè mandatorum regularium deliquerit, sed ad remedium quod regulare confugerit, licet conuincatur transgressor mandati, non tamen pacti præuicator.

2. Ille frangit votum, violat propositum, pactum præuicator, qui & præceptum contemnit & remedium. Ille autem securus est qui etsi interdum obedientiæ limitem præterierit, consilium tamen non respuit penitentiae, quia censuram disciplinarum, quæ ex regula non est, subterfugit. Pars siquidem regulæ est, regularis correctio: & in ea inuenitur non solum bonæ operationis instructio, sed etiam emendatio prauæ. Inueniuntur igitur in ea & præcepta obedientiæ, & inobedientiæ remedia, vt ne peccando quidem à regula recedatur. Subiectio insuper & stabilitas in loco per religiosum obseruari debent: ita quod neutrum præpediat alterum, nec alterutrum sibi præiudicat. Vnde religiosus sic stabilis debet esse in loco, vt superiori suo subiaci non contemnat. Et sic subiectus, superiori suo obediatur, vt stabilitatem non amittat.

3. O misericordissime Domine Iesu Christe, inclina ad me aures tuas pietatis, & audi clementer me miserum religiosum: ex mea superbia & malitia, præcepta & mandata non seruavi, neque post transgressionem præceptorum & mandatorum, remedia salubria suscepi, saltem in corde subiectus esse nolui, & si quandoque fui, hoc fui exterius & non interiùs, non amore, sed timore: immò quandoque non exterius, sed rebellis & inobediens fui. Et si contra voluntatem meam aliquid factum fuit, statim loci stabilitatem animo declinaui, cupiens transferri aliò, & non manere in

vocatione in qua vocatus eram. Adiua me, Domine piissime Iesu Christe, & reforma in me suauē iugum religionis, vt præcepta & remedia teneam, subiectionem & stabilitatem firmiter conseruem: vt ad tuum placitum hinc viuendo subiectus & stabilis, in tuo regno vitam obtineam sempiternam. Amen.

De communitate seruanda.

C A P V T X.

Secundum doctrinam Apostolicam, erant Apostolis omnia communia: & illam vitam semper præponebant, & diligebant, & ad eorum exemplum sunt religiosi instituti: qui contemptis mundi huius illecebris, in commune vitam sanctissimam & castissimam agere debent, congregati simul, viuentes in orationibus, locutionibus & dispositionibus: parum namque timer diabolus disgregatos ieiunantes, vigilantes, continentes, quia de istis multos trahit in laqueum auaritiæ: sed concorditer viuentes, & vnanimiter in domo Domini coniuncti Deo & sibi per vinculum charitatis, hi dolore, hi timorem, hi liuorem diabolo ingerunt.

2. Debet enim religiosus viuere ordinatè, socialiter, & humiliter. Ordinatè sibi, vt in omni conuersatione sua sollicitus sit seruare vias Domine, & in conspectu tuo cauere à peccato, & in conspectu proximi cauere à scandalo. Socialiter, vt studeat amari & amare, blandum & amabilem se exhibere, & libenter supportare infirmitates fratrum, tam morum quàm corporum. Humiliter, vt hæc omnia cum fecerit, spiritum vanitatis studeat exsufflare, qui ex huiusmodi nasci solet, & quantumcumque illum sentierit, omnino negare consensum. Sic igitur si tu bonus religiosus vis esse, vitam communem debes seruare non partialem, quæ semper habet non nihil de hypocrisi & vana gloria immistum: at communis, cuique perfecto satis est arcta, & cuique infirmo satis est congrua. Nam abundans est pauperi, sufficiens mediocri, est tolerabilis diuiti, infirmis larga, delicatis compatiens, fortioribus viuifica, pœnitentibus misericors, peruersis seuera, & bonis optima.

3. O misericors Deus, vitam partialem, & non communem in religione, in victu, in gestu, in habitu, seruauī, & ferè in omnibus actibus meis à communitate fratrum totaliter deuiaui. Aliud cantabam, & aliud cogitabam, in choro eram corpore, & in foro mente: nunc intus, nunc extra, nunc mente vagus, nunc corpore dissolutus: semper tamen inconstans in omnibus viis meis: Adiua me, misericordissime Domine Iesu Christe, non permittat tua bonitas, vt sic finiam miserabiliter dies meos, sed præueniat eos tua clementia, & remitte mihi quæ nequiter perpetravi. Fac me currere ad veram pœnitentiam, & emendationem vitæ, vitam vnanimem & concordem, omni superstitione sublata teneam, & in fine vitam in communitate perpetuò laudantium mihi concede sempiternam. Amen.

Ppp iij

Licet simplicissima & inuariabilis naturæ sis, tu Domine Deus meus: tamen religiosus secundum diuersas affectiones suæ animæ diuersis nominibus te nominat, sicut etiam scriptura testatur, licet tu idem ipse sis, & anni tui non deficiant: vocaris tamen pater familias, Dominus, magister, pater, sponsus. Cum autem religiosus secularem & mercenariam habet intentionem, ideo tibi seruit, vt à te terrena suscipiat, & nullo aut exiguo desiderio æternorum, quæ à tua sola sunt gratia, mouetur: cum autem timet carcerem, & metuit ne æternis poenis subiiciatur: tunc viuit sub te tanquam seruus sub Domino, qui semper timet incarcerationi, aut aliis poenis affligi: & hic status est quidam exitus à sæculo, & ingressus ad vitam, si in statum virtutum commutatur. Nam cum paruulum se sentit in virtutibus, & concupiscit lac doctrinæ, prouidens te Deum in conspectu suo semper tunc viuit sub te tanquam paruulus sub magistro & pedagogo quia non feruenter timet supplicia, sed tanquam paruulus metuit plagas virgarum, apprehendens tuam magistri disciplinam, nequando irascaris, & pereat de via iusta: & ne deuotionis gratia subtrahatur, & ne molesta omnia fiant, laborat tædio quodam quasi verberetur intus in anima, in amaritudine scilicet cogitationum.

2. Hæc enim verbera quibus illum religiosum castigas, iu Domine, in primordiis & quasi in infanti ætate immittis, vt sic vicissim sibi succedat timor tui Domini, & disciplina tui magisterij. Cum autem lacte iam non potatur, sed vescitur cibo solido, scilicet oblitus quæ retrò sunt, in quibus vt seruus in amaritudine morabatur, & præsentia non considerans, nec prauas consolationes captans, magis extendens se in anteriora ad palmam supernæ vocationis, & introitum futuræ beatitudinis, expectans beatam spem, & aduentum gloriæ tuæ: tunc euacuat quæ erant paruuli, & proficit in virum perfectum: tunc viuit sub te tanquam filius sub patre, cupiens esse in iis quæ tui vt patris sunt, suspirans ad hereditatem tuam paternam quam toto affectu expetit & affectat. Cum autem ad tam sublimem gradum attingere potest, vt castificato corde nihil aliud eius anima desideret, nihil aliud quærat quàm te, non seipsam, neque aliquid suum, non felicitatem terrenam, non doctrinam, non gloriam suam, non honorem, non ingentem auri copiam, non belluinam corporis voluptatem, non denique aliud quicquam tanquam suipsius priuato amore, pergit in te vt introducas eam in cubiculum tuum, tunc viuit tanquam sponsa cum sponso.

3. O benignissime Domine Iesu Christe, adiuua me per tuam misericordiam: quia infelix religiosus sum tãquam mercenarius in religione viuens, fac me ex tua bonitate viuere sub timore, & disciplina tua, vt filius tuus esse valeam, possidendo tandem per tuam gratiam, tuam paternam hereditatem per infinita sæcula sæculorum. Amen.

De solitudine.

CAPVT XII.

1. **S**I cupis tu religiose, viuere religiose; considera ad quid factus es religiosus, ad Deum laudandum, & ei toto mentis affectu seruiendum. Sed ad hoc te disponere oportet, vt non quaras vanam & transitoriam lætitiā. Sicut enim ignis deficientibus lignis deficit: sic transit lætitiā vana, mundus, & concupiscentia eius. Non affectes præsentia, sed despicias, quæ ferè omnes desiderant. Temporibus & horis ad hoc congruis & opportunis, fuge multitudinem, fuge paucitatem, fuge vnum. Solus esto; vt illi soli te serues, quem tibi solum ex omnibus elegisti, dimitte omnia, & vaca bonæ menti: quia nemo ad eam peruenit, aliis rebus occupatus. Nimia enim turba vitiorum sine certamine vincitur, cum solitudo gratiæ suffragatur.

2. Recede ad teipsum quantum potes, horis ad hoc ordinatis: quia non est tunc quid timeas: non operam perdis, si te tibi ipsi dedisti. Secede interdum ab amicis & intimis: & si non corpore, saltem mente, intentione, & deuotione. Obluiscere populum tuum, & domum patris tui, & concupiscet rex decorem tuum. Auarior namque redditur, ambitiosior, crudelior, & inhumanius, qui continuè inter hominum multitudinem versatur. Solus igitur esto corde: quia illud potius requirit Deus, quam corporis solitudinem, quanquam corpore interdum non sit otiosum separari præsertim tempore orationis. In quantacumque hominum fueris frequentia, caue alienæ conuersationis esse aut curiosus explorator, aut temerarius iudex, etiam si actum malum deprehendas. Excusa saltem intentionem, si opus non potes, scilicet ignorantiam, subreptionem, casum, aut vehementem tentationem.

3. O misericordissime Domine Iesu Christe, quanta iniquitate sum plenus ego miserrimus religiosus, qui ore loquor & corde taceo: scio quod prædicta facere deberem: sed incipere renuo; solitudinem fugi, & carteruas hominum dilexi, in quibus ad muta iniqua declinaui, & frantum linguæ laxaui. Miserere mihi dignare, benignissime Iesu Christe, & benignè concede vt ad meipsum redeam, plangendo quæ commisi, & seruiendo tibi, vt tibi placeam in æternum. Amen.

De societate bonorum.

CAPVT XIII.

1. **P**roprium est cuiuslibet religiosi, benignissime Iesu Christe, in sua religione, vt qualis ipse fuerit, tales sibi coniungi affectet: sed valde periculosum est iis, qui malè viuunt, sociari, quorum melius est odium,

quàm consortium, quia nihil tam sanctum est, quod peruersi domestici non deprauent. Vnde qui bonus religiosus esse cupit, socios bonos sibi coniungere studeat: quia si fuerit socius conuersationis, etiam eius erit peruersitatis. Nulla namque res magis animos honestate induit, deuosque & ad prauum inclinatos reuocat ad rectum, quàm hominum bonorum conuersatio. Et ideo tu vir religioso, si te paupertas angit, si luctus mortificat, si dolor corporis inquietat, si vlla calamitas vexat, adiungere tibi debes homines, qui non solum gaudere cum gaudentibus, sed flere cum flentibus, & salubriter alloqui & colloqui sciant: per quos plurimum illa aspera leniantur, graua releuentur, & tristitia superentur.

2. Si enim vis adire paradisum, non debes cum illis ire qui tendunt in infernum, quia non sunt in recta via. Ideo scribitur, ne delecteris in semitis impiorum, nec tibi placeat malorum via. Qui enim non vult esse leprosus, debet vitare consortium leproforum. Nam sana poma, sociata putridis, citius putrescunt: & sani cum infirmis, citius infirmantur: & amicus stultorum similis illis efficitur: & modicum fermentum totam massam corrumpit. Sic vnus peruersus, totam congregationem: & qui communicauerit cum superbo, induet superbiam: quia cum peruerso peruertetur. Vnde Ioseph, relicto pallio in manu feminae, fugit. Quærenda est igitur per te religiosum qui in religione cum aliis religiosis habes conuersari, bona & honesta meliorum societas, & cum illis bonis religiosis debes adiungi & copulari: quia etiam si tu fueris peruersus, cum illis efficeris bonus. Sicut fuerunt Saul & serui eius, persequentes Dauid in malo proposito, qui venientes ad cuneum prophetarum, ceperunt simul prophetare, & conditionem propriam alterare, & tunc Saul mutatus fuit in virum alterum.

3. Omitissime Domine Iesu Christe, ego prauissimus religiosus in magnam dementiam deueni, quantum ad gubernationem animæ meæ: quia in religione viuendo, malis & peruersis religiosis me adiunxi, & ideo de malo fui deterior effectus, & non contentus de ipso, multos alios ad similem vitam criminose perduxì. Indulgere mihi digneris Domine, vt tuam consolationem in solo cætu bonorum & sanctorum, perenniter tibi seruans recipiam sempiternam. Amen.

De discretione in omnibus obseruanda.

CAPVT XIV.

1. **V**era discretio, benignissime Iesu Christe, non nisi vera humilitate acquiritur: cuius humilitatis probatio est, si vniuersa non solum quæ agenda sunt, sed etiam quæ cogitantur, maiorum & seniorum examini verus religiosus referuet, vt non confidat in propria discretione, nec aliquâ suo iudicio credat: sed potius illorum definitionibus per omnia acquiescat: & quid bonum vel malum debeat iudicare, eorum traditione cognoscat: & sic

& sic per veram discretionis viam, religiosus recto tramite incedet, & à cunctis fraudibus & insidiis inimici seruabitur illæsus.

2. Discretio namque non tam virtus est, quàm moderatrix & auriga virtutum, ordinatrix affectuum, morum doctrix, & consummatoria perfectionum, & sine qua virtus vitium est. Ad vnum namque finem nimietas ieiunij, ac voracitas peruenit. Eodem denique dispendio vigiliarum immoderata continuatio religiosum, quo somni grauissimi torpor inuoluit. Nam per excessum continentia religiosam debilitatam, ad illum statum reuocari necesse est, in quo negligens quisque per incuriam detinetur: ita vt frequenter quem gulosis decipere non potuit, immoderatio ieiunij deiciat; & quem somnus superare non potuit, vigilia & pernoctationes irrationabiles deiciant: & idè iuxta doctrinam Apostoli, Per arma iustitia quæ à dextris sunt & sinistris, recto moderamine transendum est: & ita inter vtrasque nimietates discretionem moderante gradiendum est, vt à tradito continentia tramite non recedat, nec immoderatione noxia abducatur. In omnibus igitur actionibus, discretionem, matrem omnium virtutum sequi debet verus religiosus: quæ idcirco mater earum dicitur: quia nisi eas vt filias, mater nutriet, statim cuncta virtutum soboles interibit. Discretio namque omni virtuti ponit ordinem, ordo verò, modum tribuit & decorem. Hanc autem discretionem tollit propria voluntas, subuertens corda religiosorum, & rationis oculos claudens; docet namque naturæ non parcere, rationi non acquiescere, nec obtemperare seniorum consilio vel exemplo, nec obedire Prælato.

3. O misericordissime Domine Iesu Christe, respiciat tua clementia me miserum religiosum, qui discretionem carens, extrema vitiosa secutus fui: & viam mediam contempni, succurre mihi misericorditer peccata remittendo & concede mihi veram discretionem, qua mediante tibi placeam, & seruam nunc & in æternum. Amen.

De multiplici voluntate religiosi.

C A P V T X V.

1. **H**Abent, Domine Iesu Christe, religiosi animas vitiosas, habent & bonas. Vitiosas dico, non omnes quibus inest vitium, sed qui vitio ex voluntate consentiunt, nec resistunt, quantum possunt. Bonas dico animas, non solum perfectas, sed etiam incipientes, quæ licet vitium habeant, non tamen consentiunt, sed repugnant. Tales animæ licet ex infirmitate, vel ignorantia sæpe cadant, tamen per voluntatem quam habent bonam, resurgunt, hæc est enim quæ bonam facit animam: quia cum multa sint animæ bona naturaliter insita, sicut ingenium bonum, memoria capax, vigilatio, & cætera animæ bona: sola tamen voluntas si fuerit bona, bonam facit animam, si fuerit vitiosa, vitiosam. Sed quia nunquam homo in eodem statu permanet: aut enim deficit, aut proficit, proficiendum est

in hac voluntate : quia scriptum est, Hæc est via, ambulate in ea.

2. Primus gradus huius viæ, est recta voluntas. Secundus, valida. Tertius, deuota. Quartus, plena voluntas. In primo, anima, Domine, legi tuæ consentit, sed carne repugnante, bonum quod diligit perficere non inuenit, sed sæpe malum quod odit, per infirmitatem facit. In hoc tamen recta est eius voluntas, quod aduersario suo consentiens, in se odit quod ille reprehendit. In secundo gradu, anima non solum malum quod odit, non agit: sed etiam bonum quod diligit, licet ægrè, fortiter tamen perficit. In tertio gradu, iam dilatato corde, currit viam mandatorum, & delectatur in eis, sicut in omnibus diuitiis. In quarto gradu sunt angeli, qui eadem facilitate qua semper volunt bonum plenariè perficiunt. Hunc gradum quidem desiderare potest anima, ascendere autem non potest, ob hoc quod corpore aggrauatur. Religiosum, qui numquam habet rectam voluntatem, impedit carnalis affectio: qui habet rectam & non validam, impedit eum praua consuetudo: qui habet deuotam & non plenam, impedit eum terrena habitatio. Cuius adhuc voluntas vitiosa est: oret & dicat, Fiat voluntas tua sicut in cælo & in terra, se intelligens terram, illum autem qui rectam habet voluntatem; cælum: quia quantum cælum distat à terra, tantum distat recta voluntas à vitiosa.

3. Sed misericordissime Domine Iesu Christe: quid dicam ego nequam religiosus de voluntate mea qualis fuerit? Certè non in eodem statu permanens, sed de vitio in vitium incedens; non fuit recta, sed curua; non valida, sed fragilis, non deuota, sed iniqua, non plena, sed bono affectu vacua. Succurre mihi Domine misericorditer, vt voluntas mea semper voluntati tuæ iungatur, & pareat in æternum. Amen.

De conscientia.

C A P V T XVI.

Nihil in hac luce clarius, Domine Iesu Christe, nihil gloriosius testimonio puræ conscientie, scilicet cum veritas in mente fulget, & mens in veritate se videt, scilicet pudicam, verecundam, pauidam, & circumspiciendam: nil penitus admittentem quod euacuet gloriam conscientie attestantis se in nullo consciam sibi, quo erubescat præsentiam tuam. Illa enim vera est & sincera conscientia, quæ credit se remissionem peccatorum habere non posse, nisi per indulgentiam tuam: credit deinde nihil posse habere boni operis, nisi tua bonitas hæc dederit: & quod vitam æternam nullis potest operibus promereri, nisi tu Domine gratis eam dederis: quia nullus potest facere mundum de immundo conceptum semine, nisi tu qui solus mundus es. De operibus quoque bonis certum omnino est, quod nemo illa habet à se, sed à te: nam si stare non potuit humana natura adhuc integra, multo minus potest per seipsam resurgere iam corrupta. Certum est enim ad suam originem vniuersa, quantum in eis est, tendere, & in

eam partem semper esse procliuiora: & sic cum de nihilo creati sumus: constat quod si nobis ipsis relinquimur, in peccatum semper, quod nihil est, declinamus.

2. De vita aeterna etiam scimus, quia non sunt condignae passionibus temporis huius, ad futuram gloriam, etiam si unus omnes sustineat: neque talia sunt nostra merita, ut propter ea vita aeterna iure debeatur, sicut tu, Domine, aliquam iniuriam faceres, nisi eam donares. Ideo si tu religiose, credis peccata non posse deleri nisi ab eo cui soli peccasti, & in quem peccatum non cadit, conscientiam veram habes, addendo, ut si de peccatis tuis corde contrito & humiliato debito modo satisfacis: tibi à Deo donantur & remittuntur. Conscientiam namque bonam parant poenitentia, & abstinentia: quando scilicet per poenitentiam peccata punimus, & per abstinentiam deinceps puniendi non committimus.

3. Licet namque benignissime Iesu Christe, unusquisque fidelis purificatam conscientiam tuæ gratiæ dono habere debeat: tamen longè magis puram eam deberet habere religiosus, qui assidue tibi humiliter & puro corde seruire tenetur & ad seruendum tibi specialiter est obligatus. Qualis sum ego qui loquor, qui à iuuentute mea, ut tibi arctius seruirem, religiosus factus fui: sed conscientiam meam mucrone peccatorum multipliciter vulneraui, & sic vulneratam diutius seruauim, & vulneribus vulnera addidi, per quæ animam corrumptam, & usque ad mortem aeternam deduxi, & tibi debito modo non seruui. Sed tu misericors Domine, dele iniquitatem meam: sana vulnera mea misericorditer, ut tibi placidè seruire valeam in aeternum. Amen.

De consideratione animæ religiosi.

C A P V T XVII.

1. **N**ihil verius possum, Domine Iesu Christe, ego miser religiosus de anima mea sentire, quàm ad nihilum eam esse redactam: quia onerata est peccatis, obfuscata est tenebris, pruriens concupiscentiis, obnoxia passionibus, impleta illusionibus, prona semper in malum, in vitium omne procliuas, prostrato totius confutionis & ignominiae plena. Facile est mihi Domine, si vniuersa inuestigem, sine dissimulatione libere proclamare: Qui se putat aliquid esse cum nihil sit, ipse se seducit. Quid est homo, Domine Iesu Christe, quia magnificas eum? aut quid apponis erga eum cor tuum? Sine dubio vanitati similis factus est homo, & ad nihilum redactus est homo, nihil est homo. Quomodo tamen penitus nihil est, quem tu Domine magnificas? Quomodo nihil, erga quem apponis cor tuum?

2. Respirare debet homo etsi nihil sit in corde suo: quia potest aliquid esse in corde tuo. Qui vocas ea quæ non sunt, sicut ea quæ sunt: qui dicis, & facta sunt. O miserorum Pater, qui apponis erga eos cor tuum, scio quod ubi est thesaurus tuus, ibi est & cor tuum. Quomodo ergo nihil sumus si

Qqq ij

thesaurus tuus sumus? Omnes gentes quasi non sunt, sic sunt ante te, & tanquam nihilum & inane reputabuntur: sic quidem ante te, sed non sic intra te, sic in iudicio veritatis tuæ, sed non sic in affectu pietatis tuæ. Quia iuxta Apostolum tuum, non ex operibus, sed ex te vocante. Sic nimirum in pietate tua quem in veritate tua humiliasti: vt manifestè dilaretur in tuis, qui merito angustiantur in visceribus suis.

3. O Pater misericordiarum, Pater pietatis & veniarum, nihil sum in conspectu tuæ maiestatis, nihil in veritate tua, nihil in iudicio tuo: quia cum aliquid essem per gratiam tuam, nihil me feci per peccatum meum: cum tuus essem per electionem, extraneum me feci per deiectionem. Adiuuet me clementia tua; succurrat mihi bonitas tua: vt per tuam immensam pietatem, de nihilo ad aliquid me reformes, de ingratis ad gratiam, de peccatis ad iustificationem me reuoces, vt mundatus à delictis omnibus, ad te reformatorem meum laudandum, in tuam gloriam venire valeam sempiternam. Amen.

De cognitione sui.

C A P V T XVIII.

1. Ignorans ignorabitur, Domine Iesu Christe, idè quisque seipsum cognoscere debet, & consideratio illa à seipso inchoari debet. Qui enim plenissimè cognoscere petit qualis est, nimirum respicere debet qualis ipse non est, scilicet attendat se meliores: vt ex ipsorum meliorum forma se metiatur, ex aliorum pulchritudine, suam deformitatem aspiciat, & quàm sit ipse deformis. Lucè enim respicere debet, qui vult iudicare de tenebris: & quantò minus quisque se videt, tantò sibi minus displicet: & quantò maioris gratiæ lumen percipit, tantò amplius se esse reprehensibilem cognoscit. Et quantò in cognitione sui proficit, tantò ad cognitionem tuam accedit. Nec potest aliquis saluari absque sui cognitione: qui tamen ætatem & facultatem habeat se cognoscendi.

2. O miser religiose & omni miseria dignè, qui teipsum non cognoscis! venisti enim de periculo mundi ad tranquillitatem religionis, de labore, ad quietem; de multis miseriis & anxietatibus maximis, ad vitæ dulcedinem. Nihil tibi deest, victum & vestitum habes, & sine sudore & labore, quod in sæculo remanens nequaquam habuisses. vbi semper cum labore, & dolore, cum tribulatione & angustia vixisses. Sed nunc in religione viuendo, illas amaritudines mundi non sentis, & in magna libertate viuis. Deo duntaxat seruiendo. Quare igitur teipsum ignoras? melior & laudabilior esses, si teipsum cognosceres, quàm si te neglecto, cognosceres cursus siderum, vires herbarum, complexiones & naturas hominum & animalium, & haberes omnium terrestrium & cœlestium scientiam. Redde ergo te tibi, & si non semper, sæpe tamen, vel saltem interdum.

3. Sed Domine Iesu Christe, cui religioso nunc loquor? Certè non oportet quod alteri religioso loquar, nisi mihi ipsi: penitus ignoro meipsum. Non consideraui quid sum, cur natus sum, ad quem finem genitus, quare sum factus, qua conditione, ad quam rem sum in sæculo procreatus, ad quid religionem intraui, quid ibi facio, aut feci. Vitia aliorum discutere volui, & mea non aspexi. In maximis criminibus vixi, quæ non considero: & minima fratrum peccata inspicio & condemno. Adiuua me Domine Iesu Christe, vt sic te & meipsum cognoscam, vt ex hac cognitione laudem & gratiarum actionem agam tibi sempiternam. Amen.

De cogitione culpa.

CAPVT XIX.

1. PRIMUS gradus perfectionis, Domine Iesu Christe, est cognitio propriæ infirmitatis: & nemo insanabilior est illo, qui sibi sanus esse videtur: & ille solus de flagello murmurat, qui causam percussione ignorat. Citò enim corrigitur culpa, quæ citò cognoscitur. O benignissime Domine Iesu Christe, tu non requiris in seruis tuis ciliciorum pondus, nec concludi eos vis inter angustias cellulæ, nec in obscuris antris ac tenebrosis sedem iubes habere: hoc solum est quod exposcis à nobis, vt semper recordemur, & ad animum reuocemus nostra mala, & conscientiam gestorum nostrorum in memoria habeamus, vt pro iis à te veniam suppliciter exoremus.

2. Et quamuis per pœnitentiam fiat nostrorum apud te propitiatio peccatorum, non tamen sine metu homo debet esse: quia pœnitentiæ satisfactio, tuo tantum non humano pensatur iudicio. Et quia misratio tua occulta est, sine intermissione necesse est dolere, nec vnquam oportet pœnitentem de peccatis habere securitatem: nam securitas negligentiam parit, negligentia verò semper incautum ad vitia transacta reducit. Et ideo sapiens religiosus, si epuletur, si cogitet, si oret aut deprecetur, ante oculos eius semper sunt peccata propria ponenda, vt momentis omnibus pœniteat, pulset conscientiam, nec quiescere, nec obliuisci seipsam sinat: quia nullum inuenitur tale delictorum remedium, sicut eorum continuata memoria: magna que virtus boni, est agnoscere malum, & firma tutela salutis, est scire quæ fugias.

3. O misericordissime Domine Iesu Christe, ego miserabilis religiosus, alios doceo quibus procurent salutem animarum suarum, & tibi placeant, & illa in meipso adimplere non curo, sed negligo, & sic meipsum condemno. Nihil enim peius est quàm pœnam agnoscere, nec desistere. Adiuuare me digneris, clementissime Domine Iesu Christe, & da mihi veram & perfectam peccatorum meorum cognitionem, de quibus pro virili meo satisfaciam tibi prudenter tuo auxilio circa futura prouideam, ne in

Qqq iij

illa incidam, sed viriliter eis resistam tua gratia adiutrice, & concessa omnium peccatorum venia ad regnum laudis tuæ perueniam sempiternum. Amen.

De securitate.

C A P V T X X.

1. **N**emo securus est, Domine Iesu Christe, in iis quæ potest inuitus amittere. In hac vita nemo securus esse potest, quæ tota tentatio nominatur: mater enim negligentia, est securitas: & frequenter quem certamen tentationis superare non potest, securitas deicit: & quanto quilibet virtutibus crescit, tanto magis timere debet ne de sublimibus corruat. Innitatur tibi, qui dicis: Sine me nihil potestis facere. Vnde nec surgere ad bonum, nec perstare in bono quis potest, sine te, Domine Deus meus. Ergo qui stat, gloriam tibi dare debet, & tibi inniti: vt pericula quibus circumdatur euadat: nam ab infimis timor nocturnus insurgit, à sinistris sagitta volat in die, à dextris perambulat negotium in tenebris, & vt nihil sit vacuum, à summis dæmonium meridianum.

2. Sed miser & miserabilis religiosus, tot vicinis serpentibus, & igneis telis vndique volantibus, & insurgentibus inimicis circumdatus, nihilominus perniciosissima securitate dormitat, torpet otio, & piger est ad spiritualia exercitia, ac si pax sibi esset & securitas, & non esset militia vita hominis super terram. Nimia certe securitas, tempestas est, & maximum animæ detrimentum: & ideo sancti viri sic de spe sunt certi, vt tamen semper sint de tentatione suspecti. Si igitur bonus religiosus & deuotus esse desideras, sollicitus, atque spiritu feruens: caueas ne de tuis, quæ nulla sunt, confidas meritis, nec tuis operibus innitaris, neque tutam de teipso securitatem suscipias: alioqui tuus animus gratia vacuabitur, immò gratia in tuo animo locum non intueniet. Multos namque impedit à firmitate, præsumptio firmitatis.

3. O benignissime Domine Iesu Christe, fatuus religiosus semper fui, immò magis præsumptuosus, quia de me, & factis, & dictis meis temerariè præsumpsi, & in eis securitatem locaui, & de meis meritis inaniter confisus sum. Nunc autem, piissime Domine, cognosco me perperam egisse, & perditè vixisse: ideo ignosce mihi à misericordia tua peto. Parce mihi misericordiarum Deus, da gratiam vt vitam meam, ad tuum placitum emendem, & securus perueniam ad magnificandam gloriam tuam sempiternam, Amen.

De insidijs diaboli.

CAPVT XXI.

1. **N**on possunt, Domine Iesu Christe, spiritus immundi, cogitationum nostrarum attingere profunditates: sed insidijs sensibilibus eas forinsecus colligunt, id est, aut ex nostris dispositionibus, aut ex verbis, & studiis, in quibus propensiores nos perspexerint inclinari: quia ad illas quæ nondum de penetralibus animæ prodierunt, penetrari non possunt, sed solum ad illas quæ ex moribus, atque indicijs exterioris hominis deprehendunt. Intuetur igitur hostis humani generis, mores cuiuscunque præcipuè religiosi tuo seruitio dediti, cui vitio sit propinquus: & illud proponit ante faciem eius, ad quod cognoscit mentem eius facilius inclinari: ut cum viderit eum telum libidinis patienter, aut stimulos carnis suscipere, aut oculos libenter in pulchram mulierem iniicere, aut cum ea, vel de ea libenter loqui audierit, statim intelligit libidinis iaculum defixum esse in eius mente. Si verò cibos curiosius parare aliquem viderit, & de hora comedendi sollicitius inquirere: cognoscit hoc iudicio, desiderium gulæ fuisse susceptum: si autem viderit quemquam infremuisse tacitum, aut cum indignatione suspicasse, seu vultum quodam pallore ac rubore mutasse; tristitia, ira & furoris vitium continuò intelligit in eo regnare. Et hoc pacto, subtiliter, cui vitio sit quisque deditus, comprehendit. Illo namque vitio vnumquemque delectari certa ratione comprehendit, ad cuius instigationem mox quodam autu vel motu corporis, consensum conuenientiamque ab eo præstitam fuisse peruiderit.

2. Vnde licet tu, benignissime Domine Iesu Christe, sis non solum immissor, sed etiam factor, & impulsor bonarum rerum: tamen hostis humani generis, licet sit malarum tentationum suggestor, non est tamen compulsor. Non enim potest aliquem compellere ut consensum præbeat tentationi suæ, sed tentatus pro libito suæ voluntatis consensum illi præbere potest; de quorum numero sum ego miserabilis religiosus, benignissime Domine Iesu Christe, qui hostibus meis frequenter consenti, & amplius consensissem, nisi tua pietas meum animum retraxisset. Adiuvame, misericordissime Domine, & defende me clementer ab inimicis meis, ne eis consentiam, sed eis tua in virtute resistam, & tibi seruiam nunc & in sempiternum. Amen.

De resistendo hostibus.

CAPVT XXII.

1. **L**aqueum nostrum gestamus, & inimicum proprium portamus, Domine Iesu Christe, scilicet carnem de peccato natam, in peccato

nutritam, praua consuetudine vitiata: hac vitur ad impugnandum nos hostis humani generis, cui nullum aliud desiderium est, nullum studium, nisi fundere sanguinem animarum: & ideo iugiter machinatur malum, illicitos motus suggerit, nefarias cogitationes inflammat; mouet ad iram, parit odium & rancorem; gulam incitat; carnis desideria instigat, & corda hominum tentare non cessat: vnde vbi vehementior instat ad tentandum, ibi decet magis esse studiosum ad resistendum, & repugnandum: nam ibi grauior vrget necessitas, vbi totum belli imminet pondus, ibi paratur aut victis ignominiosa, & damnabilis captiuitas, aut vincetibus triumphalis gloria: callidissimus enim & tortuosus serpens, superna & æterita nobis conatur auferre: non tamen vt sibi cedat ad bonum, quod irreparabiliter amisit. Sed ne illuc pauper de puluere suscitatus accedat, vnde ipse in gloria conditus irreparabiliter cecidit. Vnde indignatur, & liuore tabescit, dum videt humanam naturam, & fragilem, accipere per gratiam, quod ipsa non meruit, quod perdidit per iustitiam. Hæc est tota colluctatio ipsius, Domine Deus meus, vt nos seducat, & inducat in vias suas, & perducatur ad destinatum perditionis finem: qui paratus est sibi. Sed quoties ei resistimus, & eum superamus, te honoramus, & angelos lætificamus. Tu namque instruis, nos, vt pugnemus; adiuuas; vt vincamus, deficientes subleuas, & vincentes coronas: & cum ei viriliter resistimus, confusus recedit, nec tam libenter iteratò reuertitur.

2. O misericordissime Domine Iesu Christe, bella me premunt hostilia, percutit, & infestat me vndique perfidus inimicus sine temporis interpositione, vt à tua gloria me repellat, & secum protrahat in damnationem. Sed tu, piissime Domine Iesu Christe, qui tuo pretioso sanguine me misericorditer redemisti, & eius potestatem debilitasti, & qui per ingressum religionis ad tuum seruitium me vocasti, non permittas quod ei consentiam, sed da vt ei resistam, tibi adhæream, tibi iugiter seruiam, & in hoc ipso tecum permaneam in sempiternum. Amen.

De castro animæ religiosi.

C A P V T XXIII.

1. **V**Ita religiosi, benignissime Domine Iesu Christe, à corde procedit dupliciter: aut quia corde creditur ad iustitiam, & iustus ex fide viuet, & mundo corde te Domine videbit: aut quia tu qui nunc per vitam habitas in cordibus nostris, vita nostra eris cum apparebis & nos tecum in gloria, & qui nunc lates in corde, tunc de corde ad corpus procedes configuratum corpori claritudinis tuæ.

2. Vulgo dicitur, bonum castrum custodit, qui corpus suum custodit: immò veriùs dicitur, quia vile sterquilinum custodit, qui corpus suum custodit: quoniam qui seminat in carne, de carne metet corruptionem. Qui verò in spiritu, de spiritu metet benedictionem. Castrum igitur animæ

anima magis est custodiendum : quia ab ipso vita procedit : sed hoc castrum in terra inimicorum est , & vndique impugnatur. Ideo est omni custodia conseruandum , & omni ex parte , inferius , superius , ante & retrò , à dextris & à sinistris muniendum. Inferius , impugnat concupiscentia carnis : quia caro concupiscit aduersus spiritum. Superius , imminet tremendum iudicium. Retrò , mortifera delectatio ex recordatione prætorum delictorum. Ante , instantia tentationum. A sinistris , arrogantium fratrum inquietudo. A dextris , obedientium fratrum feruor & deuotio : & hoc duobus modis , aut bonis actibus inuidendo , aut singularem eorum gratiam æmulando : ergo contra carnem , per fidelem custodiam ipsius castri , rigor vigilet disciplinæ. Contra iudicium tuum , remedium confessionis : contra delectationem ex memoria peccatorum , frequentia lectio- nis. Contra tentationes , orationis instantia. Contra fratrum inquietudi- nem , patientia & compassio. Aduersus obedientium fratrum feruorem , con- gratulatio , & discretio. Congratulatio enim expellit inuidiam & discretio nimiam æmulationem.

3. O misericors & miserator Domine Iesu Christe , ego negligens & de- fidiosus religiosus , castrum animæ meæ non custodiui : sed omni ex parte inimicos meos intrare permisi , qui illud spoliarunt omnibus bonis gratiæ tuæ : & ego sic miserabilis religiosus , nudus & spoliatus omnibus virtuti- bus remansi , & omni genere vitiorum stipatus. Conforta me Domine Iesu Christe , & expelle ab hoc castro aduersarios meos. Da mihi arma vir- tutum quibus sollicite castrum valeam custodire , munitus à te & protectus : animam tibi reddam ab omni vitio illibatam ad voluntatem tuam peren- niter faciendam. Amen.

De vestibus.

CAP V T XXIV.

1. Scio , piissime Domine Iesu Christe , religiosum vt militem tuum in- spirocinctu belli semper propositum : ideo accinctum lumbis oportet eum incedere : hoc enim habitu etiam illos ambulasse qui in veteri testa- mento professionis huius fundauerunt primordia , vt nonnulli sentiunt. Heliam scilicet , & Helisæum , diuinarum scripturarum autoritate mon- stratur : & deinceps principes noui testamenti , Ioannem videlicet , Pe- trum & Paulum , cæterosque eiusdem ordinis viros , taliter incesisse co- gnouimus. Vnde vestis boni religiosi debet esse , quæ corpus contegat tan- tum , ac repellat verecundiam nuditatis , & frigoris retundat iniuriam , non quæ feminaria superbiæ , aut elationis enutriet , Apostolo dicente : Ha- bentes autem alimenta , & operimenta , id est , quæ corpus operiant tan- tum , non quæ aliqua gloria blandiantur.

2. O benignissime Domine Iesu Christe , ego impiissimus religiosus præ- missa considerans in meipso , funditus contempsit : & more superbientium ,

Rff

& vana quærentium, quæsiui vestes, non quæ mihi vtiliores erant ad induendum, sed quæ subtiliores, non quæ frigus repellerent, sed quæ superbire compellerent, ac quæ alijs exemplum malæ ædificationis præstarent: pannum quæsiui non vilem, non grossum, sed pretiosum & delicatum: non asperum, sed mollem: non modici, sed magni sumptus, consumens inutiliter & superbe, quæ cum humilitate pauperibus debebam erogare: non quæsiui ad vtilitatem & necessitatem, sed ad voluptatem, & vanam superfluitatem: plus volui ornare miserabile corpus vestibus, quàm animam virtutibus, pulchrior volui apparere exterius quàm existere interius, quæsiui extrinsecus colorem, & intrinsecus perdiidi decorem. O vanitas insatiabilis, vanitas vanitatum! ad humilitatem religionis fui misericorditer assumptus, & ad vanitatem sæculi sum relapsus: immò magis pomposo habitu in religione vixi, quàm viuere potuissem etiam, si voluissem, in statu sæculi.

3. Corripe me Domine Iesu Christe, in misericordia tua, & non in furore tuo, ne fortè ad nihilum reducas me. Aufer à me extollentiam istam: ac donare mihi digneris tuam gratiam. Conuertere cor meum ad beneplacitum tuum, & sicut mutatus sum exterius per habitum, sic mutare me in melius digneris, interius per augmentum gratiarum, & virtutum, vt tuum regnum consecutus, te laudare valeam in sempiternum. Amen.

De visu.

C A P V T X X V.

1. **R** Aptores animæ sunt oculi incauti, mitissime Domine Iesu Christe, non enim Eva lignam vetitum contigisset, nisi prius incautè respexisset. Oculi namque multorum religiosorum in lasciuia & tepiditate meatibus viuentium, incautè hinc illinc iaculantur. Isti sunt quasi fenestra, per quas latrunculi, id est, tentationes, intrant ad animas: & sunt foramina, per quæ fures, id est, dæmones, intrant ad prædandam animam, sicut scribitur: Oculi meus depraedatus est animam meam: quia constat quòd per oculum indifferetè respicientem venenum tentationis illabitur, per quod mors consensus & operis sequitur, per quæ tunc anima misera à gratiis tuis spoliatur.

2. Isti sunt oculi basilisci, qui interficiunt quidquid vident. Isti sunt oculi bufonum, qui quamuis sint pulcherrimi, sunt tamen non parum venenosi, qui licet videantur habere magnam luminositatem; fugiunt tamen diem & claritatem, & diligunt noctem & obscuritatem: sic oculi prauorum religiosorum, diem, id est, proborum hominum præsentiam fugiunt, & obscuritatem & solitudinem semper quærunt, fitque eorum oculus in spiritualibus negotiis cæcus, & quanto magis respiciunt ad terrena limpidius, tanto magis ad spiritualia cæci efficiuntur. Ideo non licet intueri, quòd non licet concupisci, hoc enim est fœdus quod pepigit Iob cū oculis,

uis ne incautus aspiceret, quod postea inuitus amaret. Periculosè namque is ministrat alicui, cuius aspectus vel faciem libenter attendit: nam impudici oculi non norunt animæ, sed corporum pulchritudinem considerare. Vnde qui vult esse à peccati immunditia tutus, sit in visione discretus: quia oculi, præsertim religiosorum orioforum, vitia administrant, & multa deuia, cor postea ad multas concupiscentias inducentia.

3. O misericordissime Domine Iesu Christe, adiuuare me digneris: quia oculi mei fuerunt; & sunt incitamenta vitiorum, & duces multorum scelerum: & sic mihi modicum profuit corporis integritas: quia oculorum concupiscentias euitare nolui. Sed pietatem & misericordiam tuam suppliciter oro, vt peccata mihi remittas, & oculos meos ad beneplacitum tuum semper dirigas, vt te in tua æterna gloria videam, & sine fine laudem, & gloriam tuam concinam. Amen.

De ignorantia suiipsius.

CAPVT XXVI.

1. De ignorantia tuiipsius, ò religiose, nascitur superbia: quia ignorantia tuiipsius parit tibi superbiam, cum meliorem quam sis, decepta & deceptrix cogitatio tua te esse mentitur. Hoc siquidem est superbia, hoc initium omnis peccati, cum maiores in oculis tuis, quam apud Deum in veritate. Si enim cognosceres in quo statu te habeat Deus, utique cognosceres teipsum: nunc autem quia absconditum est tibi, quia nescis si dignus sis amore vel odio tutius tibi est nouissimum locum eligere, de quo postmodum cum honore superius ascendas, quam præsumere altiorum, vnde mox oporteat eum rubore cedere. Non est tibi ergo aliquod periculum, quantumcumque te humilies, quantumcumque te reputes minorem quam sis, id est, quam se veritas habeat. Est autem grande malum, horrendumque periculum, si etiam vni te præferas in tua cogitatione, quem fortè parem tibi veritas iudicat, aut fortè superiorem: & idè noli te comparare maioribus, noli minoribus, noli aliquibus, noli vni.

2. Scias tantum & cognoscas teipsum, quia talis scientia non inflat sed humiliat, & est quædam præparatio ad ædificandam veram, quæ solius Christi est, religionem. Nisi enim super humilitatis stabile fundamentum, spirituale ædificium stare non potest: ad te autem inueniendum, nihil inuenire valentius potes, quam si teipsum in veritate inueneris, & non dissimules, nec sit in spiritu tuo dolus. Inuenies enim te oneratum peccatis, mole huius corporis mortalis grauatum, terrenis intricatum curis, carnalium desideriorum fæco infectum, cæcum, curuum, infirmum, expositum mille periculis, mille timoribus trepidum, mille difficultatibus anxium, mille suspicionibus obnoxium, mille necessitatibus ærumnosum, procliuum ad vitia: & sic de cognitione tui, mater salutis humilitas oritur.

Rrr ij

3. O benignissime Domine Iesu Christe, peccata omnia mihi iniquissimo religioso ostendisti, me docuisti, & ad exequendum inspirationes dedisti: sed tanta fuit duritia cordis mei, quod meipsum cognoscere neglexi, cognoscere me nolui, sed maioribus & minoribus me pratali, & illos, me præferendo, spreui. Adiua me, Domine, & ignoscere mihi digneris: & sicut cognitionem misericorditer mihi dedisti: sic concede vt ad effectum eam perducam, vt te cum gratiarum actione, sicuti es, cognoscam in gloria sempiterna. Amen.

De vigilia obseruanda.

C A P V T. XXVII.

1. **S**uper omnia vigilare debet, Domine Iesu Christe, bonus ac deuotus religiosus in tuo timore viuens, & maxime vigilare debet super opera sua: vt nullo modo omittat quod sibi per te præceptum est, aut per regulam, aut per superiore[m] suam: vigilet etiam, vt quod sibi prohibitum est, non committat. Vigilare insuper debet tota mentis sollicitudine, super verba sua, ne in eis sit aliquid quod tuam maiestatem offendant, aut fratres, aut alios proximos lædat, aut exemplum perniciosum murmurationis, & malæ ædificationis in cordibus audientium præbeat.

2. Vigilare etiam debet super cor suum: cui sanè, omnem iam custodiam exhibere Sapiens monet: quia ex ipso vita procedit. Vigilare etiam debet super affectiones suas, & cogitationes, & vigilanter intendere, ne fur nocturnus eas surripiat. Tu Domine, ex immensa pietate illum præuenias, miscendo cogitationes bonas & affectiones viles, & malas immanes. Ministras enim bonis affectionibus & cogitationibus, operandi facultatem. A te sit sine dubio, nostræ salutis exordium: sola tua gratia excitas liberum arbitrium, cui seminas cogitarum: sanas, cum mutas malum affectum: roboras, cum perducis ad effectum: & seruas, ne sentiat defectum. Vigilare itaque debet super prædictis, si humilis ac deuotus religiosus esse cupit: ne illa per negligentiam perdat aut per incuriam: quia aduersarius humani generis, tanquam leo rugiens circuit vt in anima, & in corpore deuoret, & tecum trahat pariter ad gehennam.

3. O misericordissime Domine Iesu Christe, quid dicam, aut quid faciam ego sceleratissimus religiosus, qui non vigilauit sed dormiuit: idè facta mea & opera, praua & iniqua fuerunt: quia nec præcepta adimpleui, nec prohibita facere omisi: verbis meis pessimis te frequenter offendi, & proximum meum multipliciter læsi, super cor meum non vigilauit, sed ipsum ad illicita & inhonesta vagari permisi. Succurre mihi piissime Domine Iesu Christe, & vigilare digneris misericorditer super me, quia tu es qui non dormis neque dormitas: custodi igitur me, vt tecum in perpetua laude tua vigilem in æternum. Amen.

De debito reddendo.

CAPVT XXVIII.

1. **I**ustitia, Domine Iesu Christe, est virtus, ius suum cuique tribuens: unde religiosus in sua religione, tribus principaliter obligatur, scilicet suo superiori, æquali, & inferiori. Prælato, & superiori, tenetur reddere reuerentiam & obedientiam, quarum altera cordis est, & altera corporis, nec sufficit exterius obtemperare maioribus, nisi ex intimo cordis affectu id sentiant. Tenetur reddere æqualibus, scilicet fratribus, & inter quos uiuit, consilium & auxilium. Consilium, quo eorum ignoratia erudiat, & auxilium, quo eorum infirmitas adiuuetur: sed nullum consilium melius est, quàm exẽplo docere fratrem quæ oporteat, & quæ non oporteat, fieri, prouocando eum ad meliora, & consulendo non solum verbo & lingua, sed opere & veritate. Tenetur etiam inferiori reddere castigationem, non dissimulet redarguere cum charitate & amore culpas eius, & nullum ei offendiculum ponat sed omnes occasiones scandalorum penitus amoueatur.

2. Sed adhuc, Domine Iesu Christe, debitor est corpori proprio, quod regendum & gubernandum suscepit spiritus eius: debet namque illi sollicitam custodiam, vt à peccato caueat: & disciplinam, vt quod incautè & malè commisit, non remaneat impunitum: debet corpus custodire, vt non regnet in eo peccatum, neque membra eius fiant arma iniquitatis: debet etiam ei talem disciplinam, vt castigatum & subditum seruatur, dignos faciat penitentia fructus. Longè tamen periculosiori & grauiori debito tenetur astrictus, qui pro multis animabus redditurus est rationem.

3. O benignissime Domine Iesu Christe, ego miser religiosus, ex istis meipsum condemno, qui in religione manens, & sciens me debitorem & prædictis obligatum, debitum nulli persolui, & si aliquoties persolui, solutio non processit ex affectu interiori. Ignoscere mihi digneris misericordissime Domine Iesu Christe, & concede, vt quæ malè hæcenus omisi, in futurum emendem, & debitoribus meis affectu ex corde bono satisficiam: si religiosè viam, vt tibi placeam, honorem & cultum tibi debitum, in vitam sempiternam tibi reddens, Amen.

De irreprehensibilitate.

CAPVT XXIX.

1. **C**oram te, benignissime Iesu Christe, religiosus verus debet se irreprehensibilem exhibere, & etiam coram hominibus: coram te, cogitatione, affectione, & intentione, vt cogitatio sit sancta, affectio pura, & intentio recta. Et hæc consistunt in anima, in potentiis distinctis; nam

Rrr iij

cogitatio est in memoria, affectio in voluntate, & intentio in ratione. Impossibile enim est quin se menti ingerat cogitatio: sed bonus religiosus dum coepit mala cogitare, debet quamprimum cogitationem interficere, & elidere ad petram, id est, ad Christum: quia quantumcumque immunda sit cogitatio, mentem non polluit, si voluntas affectum non præbet, aut ratio non consentiat: quod si voluntas iam sensu delectationis afficitur, resistit tamen adhuc deliberatio rationis, infirmatur quidem, sed nondum moritur anima: tunc enim mori dicitur, quando & ipsa ratio ad peccatum per intentionem curuatur: in memoria namque & voluntate non ita est intolerabile, si memoria recipiat quandoque vagam cogitationem, vel voluntas impuram affectionem: sed hoc grauissimum est & omnino damnosum, si ratio perdat intentionis rectitudinem.

2. Debet insuper bonus religiosus se irreprehensibilem exhibere coram hominibus, habitu, actione, & sermone. Habitu namque, ne sit notabilis sed humilis: quia summa religiosi virtus, est humilitas, & summum vitium, superbia. Tunc autem religiosum se quisque iudicet, cum se tanquam minimum existimauerit. Actione autem, ne sit reprehensibilis: sed omnis eius actio & operatio, sit obedientia, meditatio in diuinis: & ut non iudicet alterum, non obloquatur, non murmuret, nec delectetur audire malum, quia scriptum est: Qui diligitis Dominum, odite malum. Sermone etiam se debet irreprehensibilem exhibere: ne sit sermo contemptibilis. Multum utilitatis affert animæ sermo diuinæ scripturæ, si corde & auribus audiat. Intellectum namque mentis erudit, & à mundi vanitatibus religiosum abstrahit, & ad diuinum amorem illum perducit.

3. O misericordissime Domine Iesu Christe, ego miser religiosus, vnum loquor, & aliud facio: nam coram te exibeo me reprehensibilem, cogitatione, affectione, & intentione: & coram hominibus, habitu, actione, & sermone. In omnibus autem cogitationibus meis, dictis, & factis, & operationibus meis reprehensibilis sum, & damnabilis: nisi tua misericordia mihi misero succurrat, quæ in me sic dignetur exuberare ut vita mea dignè emendetur, ad gloriam tuam sempiternam. Amen.

De variis cogitationibus præcauendis.

C A P V T XXX.

1. **T**emplum tuum, Domine Iesu Christe, est mens cuiuscumque fidelis qui seipsum penitus abnegando, tollit crucem & sequitur te. Ideo omni solitudine illi cauendum est à tribus generibus cogitationum, videlicet, à cogitationibus otiosis & ad rem nihil spectantibus, quæ tam facile possunt abiici quàm recipi, dum secum habiterin corde suo, & assidue tibi assistat dominatori vniuersæ terræ.

2. Ex illis namque cogitationibus nisi subito reprimantur, insurgunt alia violentia & magis ac fortius cordi inhaerentes, quæ ad necessitatem

naturæ non pertinent, quæ si paululum creuerint, sine læsione auelli nequeunt, vt sunt cogitationes carnales, videlicet de cibo & potu, de vestimentis, de familia, de statu proprio, & similibus: tales vix à corde eradicari possunt: sed sub clypeo necessitatis, honestatis, gradus & status paliantur, & iudicium iustum & verum impediunt: adeo vt credit iuste cogitare, quæ importunè & absque ratione ingerit praua caro: & sic à spiritali cogitatione inconsultè segregatur animus, & mundanis cogitationibus occupatur: quia qui sic in mundo & in mundanis versatur, consurgit sæpe & resultat ei immundissima & fœdissima cogitatio, quæ ad libidinem, inuidiam, iram, & vanam gloriam, & ad alia vitia & peccata pertrahit. Ideo, verus religiosus, qui parare desiderat templum tuum, quantum potest fieri, debet à talibus alienus esse, & multa indagatione occurrere & contrahenire, vt nullum eis det accessum.

3. Sed misericors Deus misereri mihi digneris: quia iniquus religiosus semper vixi, non parando tibi templum in corde meo, sed sic ipsum impleui prædictis omnibus & singulis cogitationibus, quod te expulso templum paravi inimicis meis, qui me deducet ad supplicia æterna, nisi misericordia tua mihi misero benignè subueniat, quæ dignetur clementer à corde meo expellere malignas cogitationes, & immittere tibi placitas: vt hic mecum habites per gratiam, & in futuro per gloriam tuam sempiternam. Amen.

De tribus metuendis in presenti.

C A P V T XXXI.

1. **T**u religiose, qui ad contemplationis quietem renuis venire, cuius oculus interior tenebris peccatorum, memoriâ delectabili ipsorum, & curâ nimîâ terrenorum excæcatur: velis omni sollicitudine, tria nouissima memorari: quæ sunt, mors, iudicium, & gehenna: quia nihil horribilius morte, nihil terribilius iudicio, & nihil intolerabilius gehenna, potest cogitari: nihil autem metuis, si ista non formidas & non expauescis; testis cogitari: nihil autem metuis, si ista non formidas & non expauescis; planè cæcus es, & dux cæcorum: ligatum te aduersarius humani generis tenet, vt non valeas respirare, neque compati tibi Christus.

2. Constat tibi indubitanter quod in morte, non magnum, non paruum aliquid de bonis huius mundi tecum feres. In iudicio autem, fallere aut resistere nulli possibile erit. In gehenna penitus nulla consolatio est, sed perpetuum vix, ululatus, fletus, & stridor dentium. Time ergo religiose, quod in morte separandus es ab omnibus bonis huius mundi, & tam dulce carnis & animæ vinculum, amarissimo diuortio est secandum. Time quod in terribili iudicio ei præsentandus es; in cuius manus horrendum est incidere, & eo examinante quem nullum latet secretum, si inuenta fuerit in te iniquitas, ab vniuersa quiete & gloria excludendus es, & à perpetuo sanctorum consortio. Time etiam quod in gehenna propter peccata tua,

cruciatibus æternis & immensis exponendus es, in sorte diaboli & Angelorum eius, in igne æterno qui præparatus est eis. Purifica igitur oculum interiore, & dispone te diuinæ contemplationi, vt timores prædictos & eorum affectus valeas euitare.

3. O misericordissime Domine Iesu Christe, mihi ipsi & non alteri religioso hæc loquor, qui religiosus sum, & inter ceteros religiosos pessimus, qui licet mortem ad memoriam reducam, tamen tuum terribile iudicium non timui, neque gehennam infernalem expaui. sed in peccatis voluptatibusque corporis miserum tempus meum consumpsi. Succurrere mihi digneris, piissime Deus, per tuam infinitam clementiam: & remitte mihi misericorditer omnia peccata mea, & concede, vt te contempler, te amem, te timeam & laudem, tibi que seruiam in sempiternum. Amen.

De patientia infamiae & detractionis.

C A P V T XXXII.

1. **P**ara te religiose ad patientiam habendam, si in religione benè & laudabiliter vis viuere & esse Christi seruus: quia cum corporis benè viuere, feruere bonis operibus, mundumque contemnere, in ipsa voluntate bonorum operum habebis reprehensores & contradictores, qui te dicent impudicum, aut aliis vitiis irretitum, & libenter in tuis detractionibus commorabuntur. Nam maleuolæ animæ dulce sapit, quod pessimè suspicatur, tu autem diligenter aduertas, si propter laudes humanas, continentiam & alias virtutes suscipere voluisti, si talis fuit intentio tua, defecisti, humanis reprehensionibus dignus, & totum quos tibi proposueras perdidisti. Si autem cum Apostolo dicere nosti, Gloria nostra hæc est, testimonium conscientiae nostræ: ex reprehensione & detractione, fructus operis tui non minuetur, sed potius augebitur.

2. Discas igitur si sanctè & iustè cupis viuere, calumniam sustinere. Nam Susanna castimoniam vitæ propriæ prætulit, nec vitæ dispendium pertulit, & gloriam castitatis retinuit. Nam falsus rumor Deo volente citò opprimitur, & vitæ posterior iudicat de priore: non enim potest aliquis pertransire hæc vitæ curricula, absque morsu & detractione malorum hominum, quorum solatium est, bonos & in via Dei ambulantes carpere, patientium minuere culpas peccatorum suorum, multitudinem peccantium. Nulla igitur aduersitate frangaris: sed pro veritatis defensione voluntarium certamini te offeras: nec vnquam pro bonis operibus exercendis, penas & tribulationes sustinere renuas: quia in te operabuntur erga Deum acceptionem, & ab elatione, quæ frequenter in bonis operibus se immiscet, te præseruabunt, & tibi cedent ad augmentum & cumulum gloriæ.

3. O misericordissime Domine Iesu Christe, ego infelicissimus religiosus in religione ignominiosam vitam duxi: quia in peccatis & vitiis diuersis

animam meam contaminaui, & si quandoque te inspirante aliqua bona
egi, statim in superbiam animam eleuau, nec contradicentes mihi susti-
nere potui: quin statim ad impatientiam prouocatus, in verba contume-
liosa prorupi, aut saltem indurato animo illa retinui. Misereri mihi di-
gneris, piissime Domine Iesu Christe, quia sic ex magna malitia tibi pec-
caui: mollifica cor meum lapideum, & da clementer patientiam in aduer-
sis, vt ad beneplacitum tuum viuam nunc & in perpetuum. Qui viuus &
regnas in æternum, benedictus in sæcula sæculorum. Amen.

Primi libri Idiotæ finis.

IDIOTÆ

DE

RELIGIOSORVM STATV.

LIBER SECVNDVS.

De obedientia.

CAPVT I.

I. **S**ICVT clementissime Domine Iesu Christe, Deo Patri tuo
obediens vsque ad mortem fuisti: ita religiosus debet esse
obediens tibi in suo prælato, quem pro te posui super caput
suum, & cuius imperio tamquam tuo se subiecit. Propria
namque virtus religiosorum est obedientia: quia propriæ voluntati re-
nuntiant, & voluntati suorum prælatorum, id est tuæ, in suis prælatis
omnino se submitunt. Dant tibi in eis suum velle, & suum nolle: moram
nesciunt, nec mandatum procrastinant; parant aures auditui, oculos visui,
linguam voci, manus operi, pedes itineri, & toti se colligunt, vt ex toto
mandatum impleant imperantis.

SSC

2. O benignissime Domine Iesu Christe, dum meipsum cogito cogitatione profunda, respicio me religiosum prauum & iniquum: religiosum quidem habitu, & non actu, inobedientem, peruersum, superbum, durum, & rebellem. Non dixi prælato; Domine quid vis ut faciam tibi: sed potius expectaui, ut diceret mihi, quid à me vis tibi fieri? Considerare nolui quæ erat voluntas prælati, & discernere ac iudicare in quibus obedirem imperanti: & sic non fuit obedientia mea, plena: quia in omnibus licitis & honestis non fui paratus obsequi præcepto ac voluntati superioris, nec per omnia s. qui propositum eius. Immò quoddam grauius & deterius est mihi nefandissimo religioso, non fui etiam paratus obedire voluntati tuæ, Domine Iesu Christe, qui non tuam, sed Dei Patris veneras facere voluntatem. Sic enim ego nequissimus religiosus, sic irreligiosè viuere volui, ut meam propriam ferè semper adimplerem voluntatem, & meis contradicerem superioribus, ac inobediens essem, & cæteris fratribus exemplum peruersum damnationis æternæ ostenderem.

3. Adiuua me Domine Deus meus, per tuam infinitam & immensam misericordiam, sine qua me prauum religiosum, rebellem & inobedientem; damnatum me sentio iustissimè in æternum. Succurrat igitur tua bonitas, auxilietur tua pietas, suppleant mea demerita, tuæ beatissimæ ac salutiferæ passionis merita: & non ponderatis meis inobedientiis & peccatis, veniam mihi concedas, & vitam in tua laude sempiternam. Amen.

De gradibus obedientiæ.

C A P V T II.

1. **P**ARUM bonus gradus obedientiæ est, Domine Iesu Christe, si religiosus obediat suo superiori propter metum gehennæ, deinde si propter professionem per ipsum factam & quam professus est: sed longè melior est gradus obedientiæ ipsius, si ex tuo amore obedit: quia prima obedientia seruilis est, & secunda necessitatis est, illa autem charitatis. Ille autem bonus gradus obedientiæ est: cum eo animo opus iniunctum recipitur, quo & præcipitur. Cum enim ex voluntate iubentis pendet intentio exequentis: sit ut nec maius minoribus, nec minus maioribus confusè (ut affolet) ad implendum quod iniungitur subiecti studium impendatur, sed moderante animo quæque pro sua dignitate imperia, modum sciat seruare, tam in obseruando videlicet iussa, quàm in cauendo prohibita: non quod minimum horum quæ iubentur contemnendum putet ipse religiosus: nec tamen minimum quod minimum est reputet, sed minimum ex comparatione maiorum.

2. Nouit verus & humilis, ac obediens religiosus, & minima non contemnere, maximèque curare quæ maxima sunt, intimo quodam deuotiori animi sapore decernens quodlibet, mandatis eius qui præest, Christum

in eo attendens, suis quodammodo factis respondere. Nam perfecta obedientia legem nescit, terminis non arctatur, neque angustiis professionis continetur: largiori voluntate fertur in latitudinem charitatis, & ad omne quod iniungitur, spontaneo vigore liberalis ac alacris animi, modum non considerans, in infinitum liberalitatem extendit. Est sanè quidem obedientiæ limes secundum tempus, ipsa temporis extremitas: ut ille sit terminus obedientiæ, qui & vitæ. Tu enim Domine Iesu Christe, usque ad mortem obediens fuisti Deo Patri: & ne perderes obedientiam, perdidisti vitam, neque dabit tantus obedientiæ tuæ amor, inobedienti copiam sui, qui mori plus quam non obedire maluit.

3. O misericordissime Domine Iesu Christe, digneris mecum misericorditer agere: quia à iuuentute mea religionem intraui, & professionem publice feci, quam perperam seruavi: quia inobediens meis superioribus semper fui, saltem animo. Ignoscere mihi digneris per tuam piissimam bonitatem, & concede mihi ventam delictorum meorum: ut tibi obedientiam per infinita sæcula sæculorum. Amen.

De Castitate.

CAP V T III.

1. **V**irtus spiritualis & laudabilis, Domine Iesu Christe, ad cuius observantiam astringitur verus religiosus, est florida & amanda castitas: quia sicut apes quæ gregatim in eodem alucri morantur perpetuam castitatem seruant, & nunquam cohabitatione inquinantur: sic viri religiosi qui pariter in eodem clauetro conuersantur, debent perpetuam seruare castitatem, omnia immunda & carnalia fugere, & nunquam se per carnis vitium maculare, quia scriptum est: Religio munda & immaculata apud Deum hæc est, immaculatum se custodire.

2. Quia hæc virtus est ornamentum nobilium, & exaltatio humilium, decus ignobilium, pulchritudo visuum, solamen mentium, augmentum pulchritudinis, decor religionis, minoratio criminum, multiplicatio meritum, amica creatoris omnium. Hæc lasciuia vincit, petulantiam calcat, & omnem impudicitiam detruat, hominem cælo iungit; & ei regnum cælorum promittit. Hanc verus religiosus amare debet, tam in corpore quam in corde, & ostia claudere sensuum corporalium, semper sollicitus esse de custodia ipsius, semper de eius amissione pauere & timere: præsertim quia incontinentia iugiter ei prælium indicit, nec lentescit: sed continuè insidias parat: tantæ enim improbitatis est, quod ubique se ingerit. Referat namque palatia principum, penetrat cameras prælatorum, possidet aulas clericorum, subuertit solitudines contemplatiuorum, rum-pit cellulas religiosorum. In senibus fumigat, in iuuenibus ardens salmi-nat, totum mundum interficit, totum fœdat, totumque aquis diluij exterminat.

Sff ij

3. O benignissime Domine Iesu Christe, qui tantam gratiam mihi fecisti, ut ad turrim sacratissimæ religionis confugerem, ut armatus fortissima castitate aduersus foetidissimam incontinentiam debellarem, & clausis viis per quas ad me venire poterat, ipsius inopinatum aduentum sollicitè præcauerem: ego tamen nequam religiosus in tanta turris fortitudine collocatus, ianuam omnes impudenter aperui, & relicta armatura mundissimæ castitatis, fœdam incontinentiam per omnes portas ocys intromisi, quàm in me multipliciter principatum obtinentem, ex mera malitia mea, licet expellere cum tuo auxilio eam possem, mihi dominari permisi. Succurre mihi piissime Domine, aufer à me istum infestum inimicum. Da mihi virtutem contra ipsum, ut tibi placeam castè viuendo, & tandem cum iis qui gloriæ tuæ semper concinunt canticum nouum, vitam habeam sempiternam. Amen.

De paupertate & contemptu.

CAPVT IV.

1. **V**ita tua, Domine Iesu Christe, in hoc mundo. fuit voluntaria paupertas: nam in cœlis, omnium æternorum bonorum sola affluentia erat, nec paupertas inueniebatur in eis: in hoc autem mundo abundabat & nesciebat homo pretium eius: hanc utique sitiens tu benignissime Domine Iesu Christe, voluntariè descendisti, ut eam tibi eligeres, & eam nobis tua exultatione faceres pretiosam: ditior enim fuit tua paupertas cunctis opibus, cunctisque thesauris. Hanc autem paupertatem voluntariam tuis Apostolis dedisti: ad cuius obseruantiam ceteri tibi placere cupientes, itarentur, quos beatos esse dixisti, dicens: Beati pauperes spiritu: quoniam ipsorum est regnum cælorum. Ad hanc obseruandam deberent religiosi ordinari: ut sic pauperes spiritu te imitando beati essent, & regnum cælorum tandem tuo dono possiderent. Per votum solenne ad ipsam obseruandam se astrinxerunt: ut, sicut transgrediendo plus peccarent, sed obseruando amplius tibi placerent, & à te acceptarentur.

2. Sed ego sceleratus religiosus, diuitias concupiui, claustrum dimittere affectam, præsumens quod multos lucrifacerem tibi, si diuitias obtinerem, non considerans quod rediens ad sæculum, de facili cadere poteram in infernum. Volebam præesse potius, quàm subesse, exire in publicum, & officia usurpare perfectorum: non attendebam ad exempla prædecessorum: nam filius Sunamitidis paruulus egressus ad messores, rediens clamauit ad matrem, Caput doleo, & sic defunctus est. Dina filia Iacob nisi in publicum venisset, Sichei raptoris sui violentiam declinasset. Inter namque mansuetudines Iacob computatur, quod domi residebat, quando Elau durus & hispidus foris venabatur. Volebam exire de monasterio, ut libertatem obtinerem: volebam beneficium, ut sæculi pompam ducerem, cupiebam diuitias, ut honoribus gauderem, non cogitans quod ad perfecti-

nem religionis pertinet, subiectione & abiectione gaudere, studium & contemplationem querere, & non solum facultates, immo etiam voluntates de cordibus extricare.

3. Sed ego impiissimus religiosus, ditior esse volui in clauistro, quam fuissem in saeculo, & sub te Christo paupere, diuitias transitorias possidere. Adiuuare me digneris, clementissime Domine Iesu Christe, quia votum meum voluntaria deliberatione emissum, ex iniquitate mea transgressus sum: parcere mihi & ignoscere digneris, vt sic paupertatem hic effectui ipso diligam, vt diues in laude tua ad tuam gloriam perueniam sempiternam. Amen.

De timore Dei.

C A P V T V.

1. **A**D repellendas à corde, Domine Iesu Christe, cogitationes noxias & immundas, necessarius est timor tuus, timor gehennae, timor priuationis gloriae tuae, timor amissionis tuae gratiae. Talis namque timor refrigerat animam religiosi noxiis desideriis aestuantem, & iacula inimici potest extinguere ignita: quia plus ceteris hominibus impugnari consuevit, qui magis & plus tibi adherere & seruire conatur: vnde beatus dicitur esse ille religiosus, si cor suum repleuerit triplici timore, vt videlicet timeat pro accepta gratia, amplius pro amissa, sed maxime omnium pro recuperata: & sic noxiae cogitationes, in eo non regnabunt. Timeat ergo cum arriserit gratia, timeat cum abierit, & timeat cum denuò resumpta fuerit. Cum enim adest gratia, timeat ne indignè operetur ex ea: si recesserit, tunc magis timeat: quia ubi deficit gratia, deficit & largitor gratiae, & tunc casum debet timere, quia reliquit eum custodia sua.

2. Nec est dubitandum Domine, quin superbia sit in causa, etiam si non appareat, etiam si nihil conscius sit: quia, quod ipse nescit, tu scis Domine. Nam si tu humilibus das gratiam, humili non auferes datam. Ergo augmentum superbiae, priuatio gratiae es. Si verò gratia redierit, multo magis tunc timendum est: ne forte contingat reciduum pati. Ideò omni tempore te, Domine, ex toto corde tuo timere debet. Nihil enim tam timendum, quam potestas tua, cui resisti non potest. Nihil tam timendum, quam sapientia tua, cui abscondi nihil potest, cui nec oculus deest, omnia videns, nec manus, omnia potens: vnde sicut aqua extinguit ignem, ita timor tuus extinguit omnes concupiscentias, & cogitationes noxias.

3. O benignissime Domine Iesu Christe, religiosus sum, & religiosum me non cognoui, nec cognosco nisi solo habitu, & non actu: cor prauum & peruersum semper gessi, in quo timor tuus non fuit, licet quandoque humanus fuerit: & ideò ad peccata sum multipliciter prolapsus, & si quandoque à peccatis cessauim, hoc feci metu gehennae: & sic peccare non metui.

Sff ij

sed ardere: sed tu Pater misericordiarum, manum misericordiæ tuæ mihi porrige, & concede mihi veniam delictorum meorum, & fac ut te toto corde timeam & diligam, tibi que cum cordis humilitate & deuotione placidè seruiam nunc & in sempiternum. Amen.

De Vnitate.

C A P V T VI.

1. **M**ira dulcedine, Domine Iesu Christe, intonat psalmista: Ecce quàm bonum, & quàm iucundum habitares fratres in vnum. Hanc unitatem cum diligentia obseruandam tradit Apostolus, dicens: Solliciti seruare unitatem spiritus in vinculo pacis. Seruatur autem hæc vnitas duobus modis: scilicet ad seipsum, & ad proximum. Ad seipsum, per integritatem. Ad proximum, per concordiam. Omnis enim fidelis & arctius religiosus debet imitari suum principium.

2. Cum igitur tu Domine Deus meus, sis vnus & idem, atque in te perfectus, nec villo indigens, inest tibi benignitas erga nos, & amor ex bona voluntate tua in nos veniens. Debet etiam quisque religiosus vnus esse sibi per integritatem virtutis, & vnus cum proximis per vinculum dilectionis. Sed tria solent hanc unitatem impedire, scilicet præsumptio, pusillanimitas, & leuitas. Præsumptuosi quidem sunt, qui putant se posse & quæ non acceperunt, præsumunt. Pusillanimes, sunt contrarij omnino præsumptuosis. Leues & inconstantes sunt, qui circumferuntur omni vento doctrinæ, quibus quod antè placuit, nunc displicet, quod nunc eligunt, post paululum reprobabunt. Sed contra præsumptionem, opponenda est consideratio propriæ fragilitatis, quæ odiosam illam suūplius opinionem deicit. Contra pusillanimitatem, habenda est diuinæ potestatis fiducia, aut quod suis viribus se non posse quis putat, ex tuo Domine, adiutorio possit. Contra leuitatem adhibenda est consultatio senioris, ne variis & peregrinis abducatur erroribus. Vnitas autem habetur ad Christum duobus modis: scilicet eum per dilectionem quis tendit ad alterum, & alterius in se recipit affectum: & hoc etiam duobus modis impeditur, scilicet obstinatione, & suspicione. Obstinatio non permittit illum ingredi ad cor alterius, nec suspicio patitur eum credere se ab aliis amari. Et ita fit ut dum obstinatus alium non diligit, nec se ab aliis suspiciosi diligi putant, vnitas quæ cum proximo habenda est, impediatur. Verum huic morbo duplex charitas medetur: illa scilicet quæ non sua quærit, & illa quæ omnia credit. Obstinatus ergo habeat charitatem non quærentem quæ sua sunt, & alios diliger. Et suspiciosus, charitatem omnia credentem, & ab aliis se diligi proculdubio credet.

3. Sed benignissime Domine Iesu Christe, misereri mihi digneris indignissimo religioso: quia prædicta omnia sciui, & nihil obseruavi, sed sin-

gularis semper fui, & ab aliis diuisus alios non dilexi, nec ab aliis me diligere credidi. Dele Domine iniquitates meas, & da, vt concordiam seruem, vt tuis sanctis in vnitatem laudis tue coniungar in sempiternum. Amen.

De otio vitando.

CAPVT VII.

EXimensa misericordia tua, Domine Iesu Christe: transtulisti hominem de sæculo nequam, ad sublimitatem religionis, vt abiecto & expulso omni torporis otio, tibi indefinenter seruitium impenderet continuum. Proprium namque religiosi viri est, vt sit neglector quietis, fugax voluptatis, appetitor laboris, patiens in abiectioe, impatiens in honore, pauper in pecunia, diues in conscientia, humilis ad merita, & superbus ad vitia. Malignus siquidem spiritus, otiosæ menti prauas cogitationes immittit: vt etsi ea quiescat à bono opere, non quiescat tamen à malarum cogitationum delectatione. Vnde Noe vir iustus & sanctus, quem totius orbis diluuium in tantis procellis & fluctibus peruigilem probauerunt, vbi tamen curas laxauit, corpore somnum ebrietatis accepit, & contumeliam paternæ pietatis incurrit.

3. Ideo verus religiosus aliqua bona semper aut facere, aut dicere debet, vt cum diabolus semper inueniat occupatum. Semper enim debet sine intermissione legere, orare, aut operari: ne fortè eius mentem otio & corpori deditam spiritus fornicationis surripiat. Cedit namque labori voluntas, animus autem vacantem citò præoccupat. Omnium enim cogitationum & tentationum malarum sentina, est otium, materque nugarum, & nouerca virtutum. O Domine Iesu Christe, vbi sunt hodie religionis professores, eremi frequentatores, deliciarum corporis contemptores, diuitiarum sæculi desertores, cælestium contemptores, disciplinae & poenitentiae sectatores, tui amatores, & sub asperitate & vilitate habitus tui seruitores?

3. Confiteor tibi Domine Iesu Christe, corde flebili & voce humili, me vnum ex illis non esse, imò nec attingere fimbriam caleamentorum ipsorum, quia ad religionem transeundo, non mutaui mentem, sed vestem, non actum, sed habitum, non opera, sed sermonem. Sæculariter enim ibi viuendo opinionem virtutis pro virtute quæsiui, prædicaui magna, & modica impleui, vitia accusaui, & in iisdem reprehendendis disertus fui, quæ tamen non abiici, sed potius occultis & malis operationibus cumulaui. Simulaui publicè mihi displicere quæ occultè volebam committere, & magis studui videri, quàm fieri, aut esse bonus. Hæc omnia mihi procurauit torpor & otiositas, quam infeliciter semper amplexatus fui. Adiuvame Domine Iesu Christe, da mihi operationem diligentem & perfectam, vt & tibi taliter placeam, nunc & in æternum, Amen.

De exercitio spirituali.

CAPVT VIII.

1. **S**umma & laudabilis, Domine Iesu Christe, forma exercitii spiritualis cuiuslibet religiosi, est, vt semper disponat presentia, recogitet in amaritudine animæ suæ præterita, futura quoque sollicitè tua gratia prouideat: vt secundum Apostolum sobriè, iustè, & piè uiuat in hoc sæculo: vt uidelicet in præsentia sobrietas obseruetur, vt iugis fidei operatione præterita tempora, quæ sine fructu salutis præterierant, redimantur: vt pietas, clypeus imminetibus de futuro periculis opponatur. Sola enim est, quæ ad omnia ualet pietas.

2. Vita insuper erit sobria, si continenter, si socialiter, si obedienter, id est, castè, charitatiuè, & humiliter vixerit. Per continentiam enim castitas, per socialitatem charitas, & per obedientiam acquiritur humilitas. Actus iustus erit, si fuerit rectus, discretus, fructuosus. Rectus, per bonam intentionem. Discretus, per mensuram potestatis. Fructuosus, per proximorum utilitatem. Sensus pius erit, si fides sentit Deum summè potentem, summè sapientem, & summè bonum: vt per tuam potentiam, ipse religiosus suam credat adiuuari infirmitatem, per tuam sapientiam, suam corrigi ignorantiam, per tuam bonitatem, suam dilui iniquitatem: secus autem, non potest sibi prouidere nouissima, nisi sedula cogitatione discat de sua industria, & de suis meritis diffidere, & se soli tuæ diuinæ protectioni mentis affectu, & effectu piæ intentionis permittere: & sic ipse religiosus, per sapientiam omnia sua disponet suauiter, præterita peccata damnabit, & futura cauebit.

3. O benignissime Domine Iesu Christe, ego sceleratus religiosus non habui hoc exercitium spirituale, licet in meipso cognoscerem me illud obseruare debere: sed meum exercitium fuit sæculare in desiderijs voluptatis & concupiscentiæ iniquæ. Sed tu miserator & misericors Domine, tribuere mihi digneris secundum magnam misericordiam, vt te iuuantem viuam sobriè, iustè & piè, in hoc sæculo, expectans à te vitam æternam ad tuam laudem & gloriam sempiternam. Amen.

De seruitio Dei.

CAPVT IX.

1. **O**mnes tuis fidelibus, quare & deuotis religiosi seruis tuis, Domine Iesu Christe, maxime scribitur: Preparare corda vestra Domino, & seruire illi soli. Licet enim, Domine, quilibet fidelis seruus tuus dicatur, præcipuè tamen talis esse debet religiosus, qui strictius tuæ voluntati per ingressum religionis se subiecit, qui vt tibi fideliter & voluntariè seruiat,

seruiat, debet esse lætus per spiritualement iucunditatem, & cum lætitia in tuis laudibus occupatus. Seruus tuus (inquit Psalmista) lætabitur. Debet esse lætus per munditiæ puritatem: quia sicut tu Domine mundus es mundum vis habere cultorem: quia scriptum est: In sanctitate & iustitia seruamus illi.

2. Debet etiam esse erectus per contemplationis sublimitatem. Nunquam enim prostratus ad terram bene seruit: sic etiam religiosus seruus tuus, ad terrena inclinatus, tibi, qui es Dominus excelsus & altus, nunquam potest bene seruire: idè per ingressum religionis tollis terrena ab eo, ut feruentius & magis attentè famuletur tibi. Debet etiam esse humilis & verecundus, per reuerentiæ simplicitatem: quia etiam tu humilis fuisti & temetipsum exinaniens, & formam serui accipiens. Debet etiam esse pauidus & tremebundus per tui timoris reuerentiam, ne fortè faciat quod displiceat tibi, idè scriptum est: Seruite Domino in timore: & exultate ei cum tremore. Debet etiam diligens & attentus esse: quia serui officium est seruire, & seruus non diceretur, si seruire non dignaretur: & idè serui tui debent esse diligentes, & seduli, seruendo, & laborem pœnitentiæ sustinendo, sicut Apostolus, corpus suum in seruitutem redigebat.

3. O benignissime Domine Iesu Christe, ego nefandissimus religiosus, ex ijs quæ dico dum ea considero, meipsum condemno: quia me indignum ad tuum seruitium deuoui, & de tuo patrimonio vnde viuerem accepi, & tamen non tibi semper seruiui, & si aliquando seruiui, hoc indecenter & negligenter egi: quia seruus fui non lætus, sed iracundus, non lotus, sed immundus, non erectus ad cœlestia, sed ad terram cum magna animi cupiditate inclinatus, non fui humilis, sed superbus, non verecundus, sed præsumptuosus: non diligens, sed negligens, non attentus, sed potius torus in tuo seruitio piger & desidiosus. Aduuet me tua clementia, & fac cum seruo tuo misericordiam: delendo, & remittendo iniquitates meas, & me misericorditer disponendo ad tuum seruitium, ut tibi placidè seruiam in sæcula sæculorum. Amen.

De deuotione Officij.

C A P V T X.

1. **D**omine Iesu Christe, gubernator omnium, tua infinita clementia nunquam deest nobis, sed semper nobis propitia est, & sicut in orationibus nos regit, sic in psalmorum studiis nos delectari facit: psallendi enim continuatio deuota, corda tristia consolatur, mentes vagas stabilis: fastidiosos oblectat, inertes exsuscitat, & ad lamenta peccatores inuitat. Nam quamuis dura sint corda carnalia, statim ut psalmi dulcedo insonuerit, animum eorum ad effectum pietatis inflectit, dum tamen adsit puri cordis intentio. Parum namque prodest sola voce, quantumuis so-

T t t

nora & dulci, psallere, sine pia cordis intentione, quæ sola hominum opera distinguit, malorum & bonorum discrimen facit.

2. Tu Domine Deus meus non quæris vocis sonoritatem, vel modulationis dulcedinem, sed cordis puritatem, quæ in radice charitatis fundata sit. Assistent namque sancti Angeli psallentibus deuotis, inter sunt cantantibus, assunt orantibus, insunt meditantibus, supersunt quiescentibus, præfunt ordiantibus, & procurantibus. Agnoscunt namque ciues suos, & sollicitè congaudent, confortant, instruunt, protegunt: & prouident omnibus in omnibus. Nec mirum, quia missi sunt in ministerium propter nos, vt hereditatem capiamus salutis, & simus ciues sanctorum, & domestici Dei.

3. Sed ego miser religiosus soli seruitio tuo, Domine Deus obligatus, non purè ac strenuè diuinis tuis laudibus interfui, nec reuerenter ac alacriter tibi seruiui: sed semper piger ac somnolentus, parcens voci, præcudens verba, integra frequenter transiliens, fracta & remissa voce aliud psallens, & aliud cogitans, corpore quidem in choro, & mente in foro, vltu solo, non deuotione psallendo, meipsum & alios perturbando, immò aliquando scandalizando. O misericordissime Domine Iesu Christe, gratias tibi ago quia me miserum & indignum religiosum ad tuum seruitium misericorditer elegisti, & vocasti, & vnde viuerem ministrasti. Indulgentiam tamen à te peto corde humili & contrito: quia temporalia mihi data acceptans, spiritualia adimplere neglexi. Concede mihi piissime, gratiam, vt tibi tua per merita satisfaciam, psallamque tibi laudes in vitam sempiternam. Amen.

De laude Dei.

C A P V T XI.

4. **V**Æ religiosi de te tacentibus, Domine Iesu Christe, quia multi ex seipsis loquaces sunt. Quoniam licet ad te laudandum electi sint, tuas tamen laudes non dicunt: qui nihilominus felices essent, si tuis laudibus insistere iugiter vellent. Tu enim semper laudandus es, siue blandiaris in prosperis, siue castiges in aduersis: & non solum laudandus es vocibus, sed etiam bonis operibus, assidujs orationibus, & cogitationibus sanctis. O miser religiosus, & omni miseria plenus, omni odio & confusione, qui à Deo in tua religione sine labore recipis stipendia, & non imple seruitia! Recipis pensiones, & non reddis Deo laudationes; ideo de te scribitur: Non mortui laudabunt te Domine: quia sicut mortuus non mouetur, non loquitur, sed fœtet: sic tu non moueris per bonam occupationem, non loqueris per Dei laudem & confessionem, sed fœtes per malam conuersationem.

2. Electus es solum ad Deum laudandum, & te disponis ad ipsum per multitudinem vitiorum inhonorandum: frequentare debes ad laudes diuinas concinendo, & tu ecclesiam frequentas ad distributiones recipien-

das. Similis diceris esse bubonibus, & vespertilionibus, quæ ecclesiam frequentant, non ad Deum laudandum, sed ad oleum de lampadibus exugendum, O clementissime Domine Iesu Christe, ego sum ille iniquissimus religiosus, de quo supra sum locutus, qui te non laudavi, sed per transgressionem mandatorum tuorum inhonoravi. Tu ex immensa bonitate tua non solum me ad religionem sustinuisti, sed etiam multa beneficia & dignitates contulisti. Et dum plus me exaltasti, remotius à te me separavi; bona temporalia magna cum diligentia recepi, sed negligenter te laudavi, immò frequenter ore, & corde nomen tuum blasphemavi.

3. Adhuc Domine ad confusionem meam loquar, sed veritatem loquar, ut tuam misericordiam consequar. Sciui, & scio, & instructus sum te adiuvante, quod omnes scripturæ clamant laudem tuam, ut omnes inducantur ad te laudandum, ut passim testatur Psalmographus: qui ait. Laudate Dominum omnes gentes: laudate eum omnes populi. Lauda Ierusalem Dominum. Laudate pueri Dominum. Laudabo Dominum in vita mea. Laudent illum cæli & terra, mare & omnia quæ in eis sunt. Et ultra hanc scientiam mihi à te benignè datam, multas inspirationes, & opportunitates mihi dedisti Domine, ut te laudarem: & tamen per meam negligentiam illud penitus omisi, & peccatis adhæsi. Succurre mihi Domine, misericordiam tuam, & remissionem peccatorum meorum tribuens, ut te laudare, glorificare, & magnificare in præsentī, & in perpetuum valeam. Amen.

De modo orandi.

C A P V T XII.

✠ **A**postolica doctrina, Domine Iesu Christe, omnes docet qualiter debeant orare, sic dicens: Volo fieri primum obsecrationes, deinde orationes, postulationes, gratiarum actiones. Cum autem peccati conscientia terret & cruciat, necdum adhuc resistendi virtus se offert: qui vident immanitatem suorum criminum, & bonorum operum exiguitatem, & velut ardentem gehennam coram se, expauescunt, quia in se nullum bonum inveniunt, & timent in conspectu tuo, Domine Deus, vacui apparere, & multò magis, quia cognoscunt se plenos vitiorum, & trepidant per seipsos Domine accedere ad te: student per alios supplicare, & obsecrant, dicentes: beatissima virgo oret pro nobis, & sic de aliis sanctis. Obsecrant etiam manifestè cum dicunt: per passionem tuam libera nos Domine. Cum autem spiritus veritatis irradiat cor eorum, ut peccata cognoscentes, eis viriliter resistent, tunc per se orant, pro præteritis delictis veniam petentes, per seipsos tibi loquuntur, recogitantes annos in amaritudine animæ suæ, & orantes puro affectu, non dissimulant peccata sua, neque palpan. Deinde postquam in lamentis penitentiae perseverauerunt, & fiduciam perceperunt veniæ, accedunt ad postulationes tanquam recepti.

T t ij

in gratiam tuam postulantes fiducialiter tam pro se quàm pro charis suis, aut pro pace totius mundi, aut secundùm Apostolum, pro regibus, & omnibus aliis.

2. Et hæc postulatio amplum quærit affectum, & fiduciæ latitudinem. Caueat tamen postulans, ne petat non postulanda, aut tepidè quærat quæ toto affectu, & omni tempore sunt quærenda, petit & non accipit, omnis qui terrena quærit vltra necessitatem, qui gloriam mundi sectatur aut voluptatem. Hæc autem sunt pro quibus incessanter est postulatio facienda, vt acquiratur tua gratia, & vt placere propter te solùm quis tibi possit, & in te viuere, & in te mori, vt ad te glorificandum te videre possit, & ad hoc ipsum solum gloria illa frui in perpetuum, dono gratiæ tuæ suscipiatur. Deinde tenetur tibi tota mentis deuotione reddere gratiarum actiones, de beneficijs tuis, & de iis quæ præparasti in futura iis qui te diligunt: quæ beneficia cum præsentia tum futura humana mente numerari non possunt, sic sunt à te Domine continuè multiplicata.

3. O benignissime Domine Iesu Christe, ego defectuosissimus religiosus, dum alios instruo de modo orandi, meipsum condemno: quia quæ docco, non feci, nec facio, licet frequentes inspirationes ad orandum mihi dederis, quas & spreui. Tribuere piissime Domine mihi digneris ex tua magna misericordia, vt iugiter ad tuum placitum te orem & adorem, nunc & in perpetuum. Amen.

De tribus petitionibus cordis.

C A P V T XIII.

1. **O** Propitiabilis Domine Iesu Christe, qui ad deuotos & iustos clamores languentium, piissimas aures & exorabiles inclinas, repulsam non patitur à te petitor opportunus, sed eius petitiones exaudis, si à lance debitæ rationis procedant. Inter alia autem, tria necessaria puro & humili corde sunt à te postulanda. Duo pro præsentī vita, & tertium pro futura æterna. Pro præsentī vita, sunt à te petenda, bona corporis, & bona animæ, quia hæc omnia à te veniunt, & à te largiuntur. Tua namque sunt bona corporis, sicut spiritualia: ideo illa à te sunt petenda, vt possit petens illa in tuo seruitio sustentari. Sed bona animæ sunt feruentius & frequentius petenda pro tua gratia obtinenda, & ea in tuo seruitio retinenda, pro vita autem in perenni tuæ laudis seruitio æterna, tota mentis pietate & toto cordis desiderio est humiliter insistendum: in qua nimirum laude tua, corporis & animæ, est plena & perfecta beatitudo.

2. Sed benignissime Domine Iesu Christe, in iis tribus petitionibus frequenter petentem, eo quod malè petit, non exaudis. Nonnumquam enim temporalia, ad superfluitatem, & voluptatem petuntur, gratia autem tua, & animæ bona, ad ostentationem: sed & vita æterna fortassis non in humilitate quæritur, sed tanquam in fiducia propriorum merito-

rum. Et sic in prima est superfluitas, In secunda, vanitas, & in tertia elatio. Et idcirco à te, & non absre quidem, repulsam patitur petens. Necessè est igitur petenti, & volenti à te exaudiri, vt petitiò pro temporalibus sit circa solam necessitatem restrictam, & petitiò quæ sit pro donis animæ, sit ab omni impuritate aliena, & circa beneplacitum tuum intenta. Illa autem quæ sit pro vita in tua perpetua laude æterna, sit in omni humilitate, & solummodò præsumat petens de sola tua miseratione diuina.

3. O misericordissime Domine Iesu Christe, ego nefandissimus religiosus, qui paupertatem tibi voui, concupiui diuitias temporales, non ad necessitatem, sed ad superfluitatem, & elationem, sed de donis animæ, nihil, aut modicum curau; pro vita autem illa æterna, preces modicas fudi, & exauditione indignas: quia à corde puro non fluebant: sed à corrupto & contaminato: & dum de tua misericordia confidebam, non desistebam peccare. Ignoscere tu mihi dignare, piissime Domine Iesu Christe, & munda cor meum immundissimum: vt à te petendo prædicta, exaudiri valeam, vt tibi seruire possim ad tuum solum placitum in æternum. Amen.

De impedimento orationis.

C A P V T XIV.

1. **O** Ratio, benedicte Domine Iesu Christe, quantò efficacior est, si fiat vt debet, tantò callidiùs impediri ab aduersario solet. Interdum enim grauitèr impeditur à pusillanimitate spiritus, & timore immoderato. Hoc autem fit cùm religiosus omnino deditus contemplationi, sic cogitat propriam indignitatem, vt non conuertat oculos ad tuam diuinam benignitatem. Verumtamen sicut periculum est, si fuerit oratio nimis timida, sic in contrarium, non minus, immò maius periculum est, si fortè fuerit temeraria. Hoc autem fit, quando orans, in cuius conscientia peccatum adhuc, aut vitium aliquod regnat, ambulat in magnis, & in mirabilibus super se, nimis vanè sollicitus de periculo animæ suæ.

2. Est etiam aliud periculum si fuerit oratio tepida, & non ex viua affectione procedens. Timida siquidem oratio cælum non penetrat: quia restringit animum timor immoderatus, vt omnino non ascendere, nec procedere queat. Tepida verò in ascensu languescit, & deficit, eo quòd non habet vigorem. Temeraria porro ascendit, sed resilit, resistitur enim ei: nec solum non obtinet gratiam, sed meretur offensam. Quæ verò fidelis, humilis, & feruens fuerit oratio, cælum proculdubio penetrat, & vacua redire non potest: quia aut dabis, tu Domine, quod petitur, aut quod vtilius videbis. Hæc namque oratio, Domine Deus meus, est magnum remedium illis, qui vitiorum tentamentis astuant, vt quoties aliquo tentantur vitio, toties orationi se subdant.

T t t iij

3. O misericordissime Domine Iesu Christe, qualis ego sum miser religiosus: vacuus enim sum omni bonitate in conspectu tuo. Qui licet contemplationi deditus esse deberem, & tam pro me quàm pro aliis orationi vacare, hæc tamen contempsit adimplere. Et si quandoque ad orandum me disposui, non prouenit oratio ex corde, sed potius fuit labor labiorum, quia plenus vitijs, & peccatis, orabam, & sic tepida, & temeraria fuit oratio mea. Aduua me, piissime Domine Iesu Christe, secundum magnam misericordiam tuam, & parce mihi misero religioso: vt te humili & deuoto corde, ac assiduo, orem, laudem, benedicam, & glorificem per infinita sæculorum sæcula. Amen.

De impedimento contemplationis.

C A P V T XV.

1. **T**ria impediunt, Domine Iesu Christe, oculum corporalem vt videre non possit: scilicet tenebræ, si lux exterior ei desit, aut licet lux ei non desit, humore tamen concreto turbatur, vt cernere minimè possit. Si autem neutrum horum adsit, læditur tamen aliqua pulueris iniectione. Sic etiam oculus intelligentiæ animæ, alijs tribus impeditur, ne contemplari valeat diuina: scilicet tenebris peccatorum, dum mens misera inuoluitur ipsis. Impeditur etiam humore concreto, id est, dum peccata in memoria recluduntur, absque displicentia ipsorum. Impeditur etiam iniectione pulueris, id est, nimia cura actuum terrenorum, atque occupatione.

2. Hæc ergo tria sunt, Domine Deus meus, quæ oculum intelligentiæ confundunt, & à contemplatione tui veri luminis excludunt: scilicet tenebræ peccatorum, recordatio delectabilis ipsorum, & cura actuum terrenorum. Deficiente igitur in nobis luce gratiæ tuæ nihil aliud inuenimus quàm tenebras peccatorum. Cum autem præcipue religiosus debeat esse contemplationi deditus, necessarium illi est, Domine Deus meus, si contemplationi vult intendere, prius hoc triplex impedimentum purgare: scilicet primum, per veram confessionem, secundum, per humilem orationem, & tertium, per mentis tranquillitatem, & quietem.

3. O mitissime Domine Iesu Christe, ego peruersissimus religiosus ista dico, & scribo, sed minimè ea facio; ore loquor, & corde dormio; vnum dico, & aliud facio; linguam laxo, & manum retraho: quia contemplationi non vaco, sed vagationi, non orationi, sed vanæ cogitationi, non religioni, sed curis mundi: & sic oculus meæ mentis penitus oblitus est peccatorum tenebris, & alijs impedimentis, non intendens, quæ sunt salutis. Purifica illum, Domine Iesu Christe, per tuam immensam bonitatem, vt videre possit quæ agenda sunt in præsentia, & in futuro te perenniter glorificando, valeat facie ad faciem intueri. Amen.

De lacrymis.

CAPVT XVI.

Plenisti, benignissime Iesu Christe, super Lazarum & super ciuitatem Hierusalem, & hæc est prima aqua. Factus est sudor tuus in nocte passionis tuæ, sicut guttæ sanguinis decurrentis in terram, & hæc est secunda aqua. Tertia fuit, quæ de latere tuo, dum in cruce pendebas vnâ cum sanguine emanauit. Verus religiosus qui tibi placere desiderat, & suam animam tibi placendo saluare affectat, has aquas debet habere: primam videlicet, rigando puris lacrymis conscientie statum, & dolore compunctionis, studendo obtinere macularum abstersionem præteritorum peccatorum. Secundam, in sudore vultus sui vescendo pane suo, id est labore poenitentiae corpus suum castigando, ac restringendo concupiscentiae flammam, crucem Christi portando. Quia si in tantum proficere potest, ad tertiam aquam veniet, scilicet contemplationis & dulcedinis tuæ, tunc potabit aquam sapientiae salutaris, & spiritus tui qui super mel dulcis est, & fiet in illo fons aquæ salientis in vitam æternam. Sed oportet, vt sicut illa aqua manauit à tuo corpore mortuo, & sine omni molestia fluxit, ita quod contemplator penitus sit mortuus mundo. Prima igitur aqua abluit conscientiam à delictis præteritis. Secunda aqua à futuris præcauere facit, & extinguit concupiscentiam. Tertia autem, venientes ad eam faciat animas sitientes.

2. O felix lacryma, Domine Iesu Christe, quæ te inuincibilem vincit, & te omnipotentem ligat, suum est regnum, & sua est potentia, ante conspectum tuum intrare non veretur, quicquid petit, obtinet: accusantibus inimicis silentium imponit: vbi illa abundat, ibi cogitationes sordidæ non appropinquant. Illa veniam petit, illa veniam meretur, & obtinet.

3. O misericordissime Domine Iesu Christe, quid faciam ego miserabilis religiosus, qui sic cor durum gero, vt nullo modo possit emolliri, sed amplius quotidie peccatis & vitiis induratur. Digneris me, Domine, respicere cum misericordia, & educ de corde meo lapideo fontem lacrymarum, vt peccata præterita plangam, futura fugiam & abstineam ab ipsis, vt illam aquam dulcedinis tuæ percipiam, qua satietur anima mea in sempiterna laude tua in æternum. Amen.

De compunctione.

CAPVT XVII.

In te, Domine Deus meus, ego ingratus religiosus quatuor reperi, quæ in anima mea confusionem & timorem pariunt. Tu enim es factor, tu Dominus, tu pater, tu benefactor. Cum te cogito factorem &

Dominum timeo, quia reum me sentio: cū te considero patrem & benefactorem, confundor. Pater non metuitur cū pater sit: patris autem est, misereri semper & parcere; & si percutit, virga, non baculo percutit; cū percusserit, sanat.

2. Paterna vox est: Percutiam, & ego sanabo. Et ideo non est in eo quod timeri debeat: quia si quando percutit, hoc est vt emendet, & numquam vt vindicet. Vnde dum cogito quod ego miser religiosus te Patrem offendi, etsi non est quod terreat, est tamen quod pudeat & confusionem inducat, quia tu exhibuisti mihi te Patrem, sed non ego me tibi exhibui filium: quomodo ergo possum, aut qua fronte, attollere oculos ad vultum tam benigni Patris, ego tam malignus filius? Pudet igitur me sic tot & tanta gessisse indigna generi meo. Pudet me tanto patre vixisse degenerem, pro pudor! Caduca, vana, & prope nulla, & quorum finis mors est, infelix & insanus, praeferre non erubui aeterni Patris amoris & honoris: etsi Pater non esset, erubescerem tamen, quia benefactorem meum effectu ipso cognosco, & de beneficiis eius, praesertim quia ad suum seruitium me admisit, ingratus fui reddens mala pro bonis, & odium pro bonis, & odium pro dilectione. Si igitur timor me non atterat, quia Pater & benefactor est, saltem pudor me confundit. Dum autem te cogito factorem & Dominum meum, timore crucior, quia Domino seruitium non impendi, considerans quod tu me redemisti; neque factori meo honorem & gloriam, quia me plasmasti. Et licet dissimules tamquam Pater, & ignoscas tamquam beneficus, non tamen tamquam Creator & Dominus, quia qui parcat filio, non parcat figmento aut seruo nequam, sed requires seruitium & honorem vsque ad nouissimum quadrantem, & retribues abundanter facientibus superbiam.

3. Ideo formido & horrore confundor, quia te contempni factorem omnium, & offendi te Dominum maiestatis, qui postquam occideris corpus potestatem habes mittere in gehennam. Sed indulgere mihi dignare, piissime Domine Iesu Christe, & da vt te honorem & timeam, tibi que seruiam in aeternum. Amen.

De silentio.

C A P V T XVIII.

1. **I**Nter alia, Domine Iesu Christe, per quæ religiosus verus purificari potest in mente sua, est silentium, in cuius obseruantia purificatur religiosus à peccatis quæ multiloquio & dicacitate multipliciter contrahuntur: cuius generis sunt, verbum stultum, verbum vanum, verbum mendax, verbum otiosum, verbum dolosum, verbum maledicum, verbum impudicum, verbum excusatorium. Pestis enim quæ de loquacitate nascitur, per silentij censuram aut euertitur funditus, aut certe ne plurimum noceat, reprimatur. Iuge nempe silentium, & ab omni strepitu secularium perpetua

perpetua quies, cogit caelestia meditari: ideo studiosum est silere à iactantia, à blasphemia, à murmuratione, & detractio. Nec tamen sic tacere debet religiosus, quòd omnino taceat, sed loqui debet tibi contra iactantiam, & peccata in confessione, vt obtineat veniam de praterito. Loqui debet contra murmurationem in gratiarum actione, vt ampliorem inueniat gratiam in praesenti. Loqui debet contra diffidentiam in oratione, vt consequatur gloriam in futuro. Confiteri igitur debet praterita, & pro praesentibus gratias agere, ac deinceps orare studiosius pro futuris: vt tu Domine Deus, non sileas à remissione, & promissione.

2. O benignissime Domine Iesu Christe, si de omni verbo otioso quodcunque fuerint locuti homines, reddituri sunt rationem in die tremendi tui iudicii, quid faciam tunc ego miserrimus religiosus, qui non solum in ore habui verba otiosa, sed habui in effectu. Protuli verba mendacia, mordacia, iniuriosa, elata, lasciuia, adulatoria, detractoria, maledica, blasphemica, dolosa, dissoluta, maghiloqua, impudica, & contumeliosa, quae leuiter volabant, sed grauite me & alios vulnerabant. In iis verbis tempus meum inutiliter, immò damnabiliter consumpsi: & sicut verbum fuit irremocabile, sic etiam tempus irremocabile, & sic vtrumque perdidici, & damnationem mihi ipsi procuravi.

3. Succurre mihi, Domine piissime Iesu Christe, in tanto discrimine posito, cohibe linguam meam à malo, & labia mea ne loquantur dolum. Ignoscere mihi dignare, & concede, vt. condignè satisfacere valeam de commissis, & dictis in tua gratia hic viuendo, & in fine gloriam laudis tuae consequar sempiternam. Amen.

De Locutione.

CAP V T XIX.

1. **Q**Vis numerare potest, Domine Iesu Christe, quantas sordes contrahat modicum membrum linguae religiosi lasciuia, & dissoluti? qui dum est in suo claustro, nullis bonis operibus deditus, sed potius otio, & vanitatibus, dissolutè loquitur sermonibus otiosis, impudica in lasciuia, magniloqua in arrogantia, dolosa in adulationibus & mendaciis, maledica in detractioibus, & contumeliis. Sermo eius leuiter volat, sed grauite vulnerat, leuiter transit, sed grauite vrit, leuiter penetrat, sed non leuiter extrahitur, profertur leuiter, sed non leuiter reuocatur, facile volat, sed non debiliter violat. Et si de omni verbo otioso reddenda est ratio in tuo tremendo iudicio Domine, longè districtius reddenda est ratio de verbo mendaci, & mordaci, iniurioso, & elato, lasciuo, & adulatorio, impudico, & detractorio.

2. Vera namque est illa sententia, quòd in multiloquio non deest peccatum: lingua enim lingit adulando, mordet detrahendo, occidit mentiendi, labitur vt anguilla, penetrat vt sagitta. Sermo namque vanus,

Vu

vanæ conscientiæ index est, mores hominis lingua prodit, & qualis sermo ostenditur, talis animus comprobatur: vnde non immerito, vitæ & operis vmbra vocatur sermo: mentis enim habitum sermonis cultus solet aperire. Verboſitas præterea nihil est aliud quàm semen fructum non faciens. Et ſicut mali mores per bona colloquia corriguntur, ſic boni mores per praua colloquia corrumpuntur. Et non ſolùm amittitur tempus vitæ in hiſce colloquiis prauis, ſed etiam multi in hiſ vitam amittere comprobantur. Nec ſolùm niſi vitam amittunt, ſed etiam aliis fratribus adimunt. Tenuis enim eſt lingua, & lata, inſtrumentum vacuandis cordibus aptiſſimum. Caveat à confabulationibus religioſus, quia lingua facilè labitur: nec minùs facilè cordi illabitur. Petenda eſt igitur bono religioſo oris cuſtodia, & oſtium circumſtantiæ labiis: vt nec vitalem ædificationem clauſura damnet, nec lethalis pernicies liberum ſortiatur egreſſum, vt lingua bonis ſit in fomentum, paruis in aculeum, tumidos retundat, iratos mitiget, pigros excitet, deſides, alacres reddat, reſugientibus ſuadeat, aſperis blandiatur, deſperatos conſoletur, præſumentes refrenet: & quia verus religioſus ductor, & via aliis eſt, viam ſalutis gradientibus oſtendat.

3. Optiſſime Domine Ieſu Chriſte, ego nequam religioſus, confeſſor tibi, talem me linguam habuiſſe: quòd non ſolùm meipſum, ſed etiam multos alios eius verboſitate interfeci. Parce & ignoſce mihi, tribueque vt ſic vitam emendem, linguam refrenem, & coërceam: vt per miſericordiam tuam, digna fiat te in tua laudare eccleſia, & hoc miſeriæ curriculo peracto, tecum viuam in tuo regno ſempiterno. Amen.

De conuerſatione bona.

C A P V T XX.

1. Scriptum eſt, Domine Ieſu Chriſte, per vicarium tuum, conuerſationem inter gentes habentes bonam, vt ex bonis operibus vos conſiderantes, glorificent Deum. Quod licet omnibus dictum intelligatur, veris tamen religioſis qui ſimul habent conuerſari, ſpecialiùs dici intelligi po- teſt, quorum bona conuerſatio ſalutem operatur, ſi in nullo prorfus reſiſtat maioribus, aut inuideat paribus, aut ſubiectis nihil deſit in cura, nulla ſuperbia præſit, prælatis ſit obediens; ſociis conſentiens, ſubditis utiliter condeſcendens. Debet eſſe conuerſatio honeſta in exemplum virtutum intuentibus gratioſa, vt virtute, gratia & perfectione, attrahat & inuitet eos quos poteſt facere meliores. Debet eſſe conuerſatio bona, & imitantibus fructuoſa, & vt videntes ipſorum bona opera, glorificent Deum qui in cælis eſt. Bona namque conuerſatio, delinquenti timorem incutit, bonum & innocentem, ad meliora inducit. Debet etiam bona conuerſatio poſſidentibus eſſe ſtudioſa: nam ſtudioſum & ſanctum eſt, vt homo poſſideat conuerſationem honeſtam non ſolùm internam, ſed externam: nam

conuersatio exterior signum est sanctitatis interioris: per hoc enim quod foris apparet, quid intus lateat, detegitur.

2. O benignissime Domine Iesu Christe, miserabilis conuersatio mea minimè intuentibus gratiosa fuit, sed potiùs horribilis & odiosa: non fuit imitantibus fructuosa, sed perniciosa, non utilis, sed damnosa, non sanatiua, sed infectiua, non fuit mihi studiosa, sed vitiosa, quia in vitiis & peccatis, conuersatio mea fuit mihi ipsi nocens per malam operationem, & aliis per iniquum & peruersum exemplum, dignumque me feci tot mortibus, quot alios per exempla mea peruersa ad damnationis interitum perduxì.

3. Indulgere mihi digneris misericordissime Domine Iesu Christe, & tua immensa bonitas conuersationem meam vitiosam, in studiosam commutet: & vt hæcenus in exemplum pernicipi aliis fui, ita in futuro saluationis eis existam, vitamque meam miserabilem accepta tibi satisfactione citò emendare festinem: vt purgatus à labe criminum, ad regnum tuum purus, ad te perpetuò laudandum misericorditer peruenire valeam. Amen.

De consuetudine bona & mala.

C A P V T XXI.

1. Scio, clementissime Domine Iesu Christe, quòd durum est religioso dissoluto apprehendere disciplinam, religioso loquaci, silentium pati, religioso vagabundo, stabilem permanere, religioso impudico, pudicitiam seruare, & religioso peccatis subiacenti, facile abstinere; quia quod incorruptus præ amaritudine priùs exhorrebat, vltu ipso amarum in dulce conuertit: & quod primùm importabile videbatur, processu temporis, si assuescat, iudicabit non graue, paulò post leue sentiet, paulò post nec sentiet, paulò post etiam delectabi: & ita paulatim in cordis duritiam, & prauam consuetudinem itur, & ex illa in auersionem.

2. Postquam enim tuo terribili iudicio, ipsa flagitia impunitas sequitur, experta voluptas libenter repetitur, repetita blanditur, & concupiscentia reminiscens sopitur ratio, ligat consuetudo, trahitur miser religiosus in profundum malorum, traditur captiuus tyrannidì vitiorum: ita vt carnalium voragine desideriorum absorptus, & sui, rationis, diuinique timoris oblitus, dicat ipse inspiens in corde suo: non est Deus. Et sic tunc indifferenter libitis pro licitis vitur: ab illicitis cogitandis, patrandis, & inuestigandis, animus, manus, pedes ipsius non prohibentur; sed quicquid in cor, in os, vel ad manum venerit, machinatur, garrit, vel operatur. Vnde talis consuetudo, grauissima est & perniciosissima catena, quæ non faciliùs soluitur quàm rumpitur. Et ideo mala mens, & animus ipsius, priusquam indureseat malitia eius molliri potest: sed postquam induruerit, desperandum est, nisi tua, Domine, misericordia exuberet. Et ideo iuxta

Vuu. l.j.

consilium Sapientis: bonum est religioso cū tollit iugum ab adolescentia sua: nam si post decursū iuuentutis annos iugum tulerit, non est statim perfectum bonum: stimulant enim eum peccata sua, exagitat conscientiam ipsa consuetudo peccandi, & vsus erroris instabilem facit. Luctandum igitur est religioso diu, vt abolere faciat inueterata, atque diuturna, & optimam viuendi formam eligat, quam iucundam redder consuetudo.

3. O misericordissime Domine Iesu Christe, ego pessimus religiosus ista dico, & non seruo; ista doceo, & non facio: ista aliis trado, & non recipio: quia in prauis & peruersis actibus vitam meam miseram ducere consueui. Sed ad tuam infinitam bonitatem supplex recurro, vt mihi indulgere digneris, prauam consuetudinem in bonam conuertendo: vt vitis expulsa, viis tuis inhaream; & tibi placendo seruam, nunc & in æternum. Amen.

De scientia memoriter tenenda.

C A P V T X X I I.

1. **P**riusquam tu, religiose, de tenebris huius mundi exeas, ne de tenebris trans eas ad tenebras sempiternas, necesse est te scientiam habere, & illam memoria tenere. Est autem illa scientia, scire quia veniet Dominus; sed quando veniet, scire non potes: certissimè tamen scire debes, quod venturus est iudicare viuos & mortuos, & reddere unicuique iuxta opera sua. Caue ne de illis sis qui videntur hanc scientiam ignorare: qui cū malè fecerint, letantur & exultant in rebus pessimis. Non enim ita se omni impuritate polluerent, si Deum venturum scirent, vel formidarent, sed vigilarent vtrique, & non sinerent tam grauiter perfodi conscientias suas.

2. Tu autem hanc scientiam semper mente teneas, & operabitur in te, primò, pœnitudinem, id est dolorem, vt risum in luctum, cantum in planctum, & gaudium in mœrorem conuertas, & incipiant tibi displicere quæ vehementer ante placuerant; & illa specialiter horreas quæ specialiter appetebas. Secundò, in te operabitur correctionem, vt iam non exhibeas membra tua, arma iniquitatis peccato, sed coërceas gulam, iugules luxuriam, superbiam deprimas, & facias corpus sanctitati seruire quod iniquitati ante seruierat. Tertiò, operabitur sollicitudinem, vt iam incipias sollicitus ambulare cum Deo, & ex omni parte seruire ei: ne in leuissima re tremendæ illius maiestatis offendas aspectus. In pœnitudine namque accendèris, in correctione ardebis, & in sollicitudine lucebis: vt interiùs & exteriùs in tua religione renouèris, & incipias respirare à tribulatione malorum & dolore: & si timeas Iudicem, sperabis in Saluatorem: plerumque timor lætitiā superabit, & lætitiā sæpius timorem excludet. Tunc enim felix erit conscientia tua, in qua lumen huiusmodi indefinenter fuerit, donec quod mortale est, absorbeat à vita; donec euacuetur timor qui ex parte est, & succedat gaudium & lætitiā quæ perfecta est: quia sic timor non erit tibi sempiternus, sed lætitiā sempiterna & perpetua.

3. O misericordissime Domine Iesu Christe, quanta poena sum dignus ego nequissimus religiosus, qui hanc scientiam ex tua magna misericordia noui, sed eam memoria non tenui, neque peccare desij: sed in peccatis perseueravi, de quibus poenitentiam non egi, nec dolui, neque correxi. Succurrat mihi, Domine, pietas tua, & da mihi clementiâ tuâ cor contritum & humiliatum, vt de peccatis doleam, & illa auxilio tuo emendem, vt laus tua non desit mihi clementiâ tuâ sempiternâ. Amen.

De sapientia.

CAP V T XXIII.

1. **A**ttende diligenter tu religiose, qui sapiens esse cupis, & sapientiam quæris. Inuenitur sapientia carnis, quæ est inimica Deo, inuenitur & sapientia huius mundi, quæ est stultitia apud Deum. Vtraque, secundum Iacobum Apostolum, terrena est, animalis, diabolica, & secundum has sapientias, dicuntur sapientes vt faciant mala, benè autem nesciunt facere: quia nulla talis sapientia, siue carnis, siue mundi ædificat, immò destruit animam. Est ergo alia sapientia quæ desursum est, condemnans illam vtramque, & hanc, tu religiose, tota mentis intentione quærere & habere coneris: quia per hanc ignobiles facti sunt gloriosi, & abiecti ad honorem venerunt: in hac piscatores vniuersum orbem terræ Euangelij retibus concluderunt.

2. Per hanc, tu religiose, si perfectè eam habueris, mortificabis propriam voluntatem, amputabis voluptatem, præterita vitæ peccata desibis, huius sæculi desiderabilia paruipendes, & æternam beatitudinem toto desiderio concupisces: relinques præterita tamquam mala, contemnes præsentia tamquam vana, futura desiderabis tamquam bona: hanc filij Dei, id est, viri iusti & veri religiosi, contemptores mundi diuino munere assequuntur, quam non lectio, sed vnctio; non litera, sed spiritus; non eruditio, sed exercitium in mandatis Dei docet. Hanc sapientiam possidens, metu non frangitur, potestate non mutatur, nec attollitur prosperis, nec tristibus deprimitur: nam ubi hæc sapientia est, ibi est virtus animi, ibi constantia, ibi denique fortitudo, ibi animus in Christo, & interior oculus erigitur ad superna: hæc autem sapientia pudica est, & deinde pacifica: nam sapientia carnis voluptuosa est, non pudica: & sapientia mundi tumultuosa, & non pacifica. Sed illa sapientia quæ ex Deo est, non quærens quæ sua sunt, sed quæ Iesu Christi, vt non suam propriam, qui eam habet, faciat voluntatem, sed probet quæ sit voluntas Dei bona & beneplacens: est etiam pacifica, non abundans in suo sensu; sed alieno magis iudicio vel consilio acquiescens.

3. O benignissime Domine Iesu Christe, ego prauissimus religiosus lumen aliis manifestum, & meipsum ignoro, quia hanc sapientiam contemnendo, sapientiam carnis & mundi dilexi, & pro virili habere studui; & illa totis conaminibus vltus sum, per quam mala præterita non derelinqui, præsentia non

Vuu iij

contempsisti, futura non caui, neque futura bona desideravi. Concède mihi, Domine, plenam tuam misericordiam peccatorum remissionem: da sapientiam quæ desursum est, ut tua clementia te increpantem sapientiam sapienter in cælestibus laudem & glorificem in sempiternum & ultra. Amen.

Qualiter Deus animam consolatur.

C A P V T X X I V.

1. **C**oncupiscis, Domine Iesu Christe, decorem animæ quam cognoscis in spiritu ambulanti, & curam carnis non perficientem in desiderio, sed potius in tuo amore flagrantem. Tali namque animæ suspiranti frequenter, & affligenti se præ desiderio, & sine intermissione oranti, miseranter occurris desideratus. Si ergo verus religiosus sit vir desiderij, & qui cupiat dissolui, & esse tecum: cupiat autem vehementer, sitiat ardentius, & assidue meditetur, ille profecto suscipiet te, & desiderium cordis eius tribues ei. Verum cum vigiliis & obsecrationibus, multo labore & imbre lacrymarum, te quaesierit, & misericorditer affueris: dum te tenere putat, elaberis. Et rursus lacrymanti & languenti occurrens, te comprehendere permittis, sed minimè teneri, quia subito iterum quasi è manibus euolas: & si insisterit precibus & fletibus deuotis, denuò reuertèris, & voluntate laborum eius non fraudabis eum. Sed rursus mox disparebis, & non videbit te, nisi iterum toto desiderio te requirat, ut sic de tua præsentia fiat illi frequens lætitia, sed non copia: ut in eo sit semper iugis deuotio & in nouata, desiderium vehemens iugis & dulcis affectus, ut proficiat de virtute in virtutem quousque perueniat ad te, atque facie ad faciem sicuti es, te videat in mansione tua perpetua: ut sic eius contemplatio hinc incipiat, & ibi perficiatur, & in sempiternum duret.

2. O misericordissime Domine Iesu Christe, ad hanc gloriosissimam & suauissimam contemplationem me clementer elegisti, dum ad sanctam religionis solitudinem vocasti, in qua ego prauissimus religiosus, non vacui contemplationi, sed vagationi; non obseruationi religionis, sed destructioni; non consolationi animæ meæ, sed desolationi: & tanta fuit bonitas tua, quod me miserum peccatorem non dimiserit, sed multas inspirationes dederit, ut ad te semper mentem meam dirigerem. Succurre mihi, piissime Domine, & mihi da veniam de commissis delictis & peccatis meis: trahe me post te, ut curram in odorem contemplationum tuarum, ut te cum æterna laude perpetuò contempler. Doce me facere voluntatem tuam, ut nihil sit in ea quod tibi displiceat, dirige gressus meos, ut nihil operer nisi tuæ sit voluntati gratum, ita ut omnes meæ operationes, cogitationes & contemplationes tuam fiant in laudem, gloriam & honorem per infinita sæcula sæculorum. Amen.

De profectu & defectu.

CAPVT XXV.

1. **V**idit Iacob scalam, Domine Iesu Christe, & in scala Angelos, ubi nullus residens, nullus subsistens apparuit; sed vel ascendere vel descendere videbantur vniuersi. Vnde per hoc datur intelligi inter proficere & deficere in hoc statu mortalis vitæ, nihil medium inueniri. Sed sicut corpus nostrum continuè aut crescere constat, aut decrescere, sic necesse est spiritum aut proficere semper, aut deficere. Nullus enim in incerto huius mortalis vitæ, in eodem statu permanet; sed necesse est vt ascendat vel descendat: si attenter stare, videat ne cadat, immò necesse est vt ruat: nam re vera bonus non est qui melior esse non vult, & ubi incipit nolle fieri melior, ibi desinit etiam esse bonus: quia nolle proficere in bono, nihil aliud est nisi deficere: vera namque virtus finem nescit, tempore non clauditur.

2. Nunquam iustus arbitratur se comprehendisse: nunquam dicit, Satis est; sed semper esurit & sitit iustitiam: ita vt si semper viueret, semper, quantum in se est, iustior esse vellet, semper de bono in melius proficere totis viribus conaretur. Non enim ad annum, vel ad tempus instar mercenarij, sed in æternum diuino se mancipat famulatui: & ideo iustitia eius non aliquanto solum tempore est, sed in sæculum sæculi. Sempiterna itaque esuries iusti sempiternam meretur refectionem, & licet ipse breui consummetur tempore, iudicatur tamen multa expleisse tempora & ætates, pro virtutis perpetuitate. Reprobis autem non ascendit, sed semper descendit: quia eius malitia inflexibilis est, & eius obstinata mens punietur æternaliter, licet perpetraverit malum temporaliter: quia quod breue fuit in tempore, in opere longum esse constat in pertinaci voluntate, ita vt si nunquam moreretur, nunquam velle peccare desineret: immò semper viuere vellet, vt semper parcere posset.

3. O benignissime Domine Iesu Christe, ad statum religionis misericorditer me suscepisti, vt ad te ascenderem de virtute in virtutem, & proficerem de bono in melius; sed tanta miseria & malitia plenus fui, quod ibi descendi de peccato in peccatum, & defeci de malo in peius. Nunc ad meipsum reuertor, & à te misericordiam peto: vt ex bonitate tua infinita peccata mea mihi remittas, virtutum gratias mihi infundas, vt de bono in melius tuo auxilio proficiendo ad tuarum laudum gloriam sempiternam ascendam. Amen.

De armis spiritualibus.

CAPVT XXVI.

1. **V**Era religiosi & perfecta virtus non est armis secularibus vincere inimicos, sed spiritualibus, quæ sunt validissima ad destruendas munitiones & altitudines nequitie spiritualis. Aggrediendus est igitur aduersarius non ligno, seu baculo; non ferro vel saxo, sed mansuetudine, humilitate, castitate & aliis bonis virtutibus & virtutum operibus. Hæc namque cum tua gratia sunt arma tuæ religionis, quibus in congregatione certamus; diuinus timor terrorem à nobis expellit: præcepta insuper sunt arma: nam arma sunt quibus tu, benignissime Domine Iesu Christe, nos misericorditer instruxisti, scilicet oratione, misericordia & ieiunio. Ieiunium enim melius tuetur quam murus; misericordia facilius liberat quam robur. Oratio longius attingit quam sagitta: sagitta namque non percutit aduersarium nisi de propinquo: oratio autem, eminens positum ferit inimicum: ideo aduersarii his actionibus magis quam virtute corporali vincuntur, & non tam viribus quam sanctitate superantur. Oportet igitur verum & perfectum religiosum arma parare, arma scilicet spiritualia, & non tantum ad resistendum, sed ad viriliter expugnandum inimicum: ut carnis concupiscentia mortificatione vincatur: oculorum verò concupiscentia, studio compunctionis & assiduitate lacrymarum: ambitionis verò vanitas largitatis & liberalitatis virtute excludatur. Et licet non tertium non sit in nostra potestate, tamen vinci vel vincere (adiuvante tua clementia) in nostra situm est potestate.

2. O misericordissime Domine Iesu Christe, magna confusione plenus ego impiissimus religiosus conspectui tuo appareo: quia tu ex magna bonitate tua me armasti, & in castris fortissimo arcis religionis me visitasti, in quo tibi humiliter seruendo inimicos viriliter superarem ac vincerem: sed negligenter, immò malitiosè arma deposui, inimicos intrare sinui, & me ab ipsis vinci & prosterni permisi. Adiuua me, piissime Domine, & arma perditam mihi restitue: sis mihi adiutor in bello, ne amplius corruam, sed inimicos vincam, & sic deinceps continuam victoriam reportem: ut corona gloriæ à te demum donatus, te æternum possim laudare & glorificare. Amen.

De bono opere.

CAPVT XXVII.

1. **S**ententia tua est, Deus meus; In sudore vultus tui vesceris pane tuo, non alieno: ideo ut tuæ sententiæ pareatur, laborandum est & operandum, dum tamen operatio accepta tibi sit & placens. Tibi namque placens est operatio, si sit recta, voluntaria, pura, discreta & firma. Recta, si intentione

intentione bona; scilicet tuipsum gratia, solūque propter te, & non suipsum faciat homo, querendo non tua, Domine Iesu Christe, sed quæ sui ipsius sunt, videlicet bona caduca, & opes immensas, laudem, honorem, gloriam suam. Voluntaria, si non timore præcepti, vel pænæ, seu alia coactione fiat, sed propria sponte, voluntate & arbitrio tuum negotium suscipiatur, & pro viribus ad opus accommodetur: nam coacta seruitia, tibi non placeant, Domine. Pura, si dum sit, non se immisceat aliqua cura vanitatis. Discreta, si ultra modum non extendatur. Firma insuper, si cum perseverantia copuletur.

2. Hoc namque est sacrificium, quod tu Domine Deus meus, super omnia holocausta requiris, & diligis, ut per iustitiæ & misericordiæ opera, nomen tuum ubique laudetur, & Deus verus servorum tuorum actus & opere esse comprobetur: merces namque gratiæ operanti augetur, quando non spe mercedis quis operatur, sed studio placendi tibi. Ideo semper quandiu vivimus in hoc sæculo nequam, operari & laborare debemus ad tui nominis gloriam & honorem, & non id solū relinquere successoribus: nam tutior via est, ut bonum quod quisque post mortem sperat agere per alios, per se agat ipse dum vivit. Beatius est enim liberum exire, quā post vincula querere libertatem. Opera namque, non verba, discernunt inter filios tuos, & filios diffidentiae, qui etiam ex suis fructibus, tanquam arbor cognoscuntur.

3. Quamvis autem Domine Iesu Christe, ad operandum in tuo opere & vinea omnes citra discrimen vocaveris, speciali tamen quodam modo religiosos ad hoc præcipue vocasti: ut sequestrati separatique à terrenis, promptius & opportunius operentur spiritualia. Sed Domine Deus meus, monitrosa res est, gradus summus operarij, & animus infirmus, sedes alta, & vita ima: lingua magniloqua, & manus otiosa, verba sesquipedalia, sermo multus, & fructus nullus: vultus magnifica promittens, & gravis, & actus levis, ingens autoritas, & nulla stabilitas. De istorum miserorum numero confiteor me esse, Domine Deus meus, qui semper otiositatem, & requiem, & non laborem corporis, vel animi exercitium quaesivi: legere non libet, orare non delectat, negligo aliqua bona inchoare, immo inchoata fastidit perficere. Succurre mihi Domine Deus meus, misericorditer, ne tantus languor, desidia, & torpor animum meum deprimat, tanta hebetudo mentem meam inficiat: sed da mihi cum effectu, operationem studiosam, tibi que placentem, per quam tua misericordia me perducatur in regnum tuum ad te laudandum, & glorificandum in sempiterna sæculorum sæcula. Amen.

Libri secundi Idiota de Religiosorum statu: finis.

Xxx



IDIOTÆ


DE

RELIGIOSORVM STATV.

LIBER TERTIVS.

De tempore neglecto.

C A P V T I.

1.  E M O est, Domine Iesu Christe, aut vix religiosus vllus qui ætatis suæ tempora diligenter inspiciat: quia voluptatibus corporis se dedicat, nolens in sudore vultus sui vesci pane suo. Quod si consideraret vitam suam temporalem, cuius oportet eum rationem reddere, sciret quia sua non est, sed tua Domine: tu enim pro ipso posuisti totam vitam tuam pro redimenda vita eius: ideo tua est vita eius, quæ adhuc in infinitum insufficiens est, vt cum tua vita quantulumcunque compensetur. Sicut enim nihil ad aliquid nullâ rationem habet, ita vita eius nullam habet ad tuam proportionem cum tua, nulla dignior, & illa, nulla miserior esse possit. Sed quid ampliùs Domine? certè exigunt peccata præterita totum tempus eius, vt faciat dignos fructus pœnitentiæ, & recogitet omnes annos suos in amaritudine animæ suæ: quia circumdederunt eum peccata, quorum non est numerus. Quod igitur sine numero est numerari non potest, & delicta quis intelligit? Non ergo sufficere tempus ad pœnitendum, sed propter nomen tuum, Domine Iesu Christe, non propter pœnitentiæ meritum (vt tuus ait Psalmographus) propitiaberis peccato meo.

2. Sed quid Domine, de tempore æterno tuæ gloriæ quam oculus non vidit, auris non audiuit, nec in cor hominis ascendit? ad hoc Domine tempus & æuum sempiternum emendum non sufficit præsens tempus, quamuis vtiliter & minimè negligentè expendatur: cum non sint condi-

gnæ passionēs huius temporis ad futuram gloriam quæ reuelabitur in nobis. Et si ad hanc gloriam tuam obtinendam, tempus præsens non sufficit, quid de te Domine, qui cælum & terram, & omnia quæ in eis sunt, fecisti? tu qui es creator, ego creatura, tu Dominus, ego seruus, tu figulus, ego figmentum tuum, tu dedisti siderum cursus, aeris temperiem, fecunditatem terræ, fructuum vbertatem, pro quibus ut gratiarum actiones agantur, non sufficit præsens tempus.

3. Quid ergo faciam ego miser religiosus, qui tempus neglexi, malè expendi, & perdidici, cum alteri ex prædictis non sufficeret etiam vniuersum tempus benè & vtiliter expensum? Eia Domine vim patior, responde prome: quia in manibus misericordiæ tuæ me totum subdo: suppleat clementia tua, reatus meos: quia tu es Deus & homo, & quod hominibus impossibile est, possibile est tibi: da tempus acceptabile, ut tibi placere possim in æternum. Amen.

De voluntate propria.

C A P V T II.

1. Ita iniqui religiosi, Domine Iesu Christe, est propria voluntas, quæ magna & diuersa scandala parit: quia dum ille miser sequitur suam propriam voluntatem, temerè quod vult in corde suo definit, & si hoc prohiberi aut impediri contingat, ad impatientiam, murmurationem, & scandalum rapitur. Talis voluntas propria, non est, Domine, communis tibi & hominibus: quia ad honorem tuum non cedit, nec ad vtilitatem hominum, sed solum intendit placere sibi & non tibi, neque fratribus, cæterisque hominibus prodesse affectat, solum autem animi impetum perficere cupit.

2. Hæc enim propria voluntas inimicitias exercet contra te Domine, & bellum crudelissimum suscitatur. Hanc voluntatem propriam odio habes, & punis: quia ubi cessat hæc voluntas, etiam infernus cessat: nam ignis infernalis non sœuit, nisi in propriam voluntatem. Cum enim aliquis religiosus frigus aut famem patitur, aut quippiam simile, non læditur in hoc nisi propria voluntas: & dum voluntariè patitur, & sustinet, iam non est propria voluntas, sed communis. Licet infirmitas quædam velut pruritus voluntatis, adhuc in illa sit & in illa omnes pœnas sustineat, donec penitus consumatur. Nam voluntas propria illius est, cui assentit, & cui se inclinat liberum arbitrium: illa autem desideria & concupiscentiæ, quæ inuitos tenent, non sunt voluntas, sed corruptio voluntatis. Porro voluntas propria quo furore te Dominum maiestatis impugnet, audiat & timeat religiosus, seruus propriæ voluntatis: quia primò se subtrahit à tua dominatione, cui tanquam auctori seruire debebat, dum efficitur seruus suæ voluntatis, & quantum in se est, omnia quæ tua sunt, tollit & diripit.

Xxx ij

3. O clementissime Domine Iesu Christe, ego sum ille religiosus peruersus qui voluntatem propriam secutus, volui vt eam alij sequerentur, quod nisi fieret, murmurauī, alios spreui, in verba iniuriosa prorupi, fratres scandalizauī, impatiens fui, aliisque detraxi, & sic miseram vitam in religione duxi, non ad tuum honorem, sed ad meam damnationem, non ad fratrum ædificationem, sed tribulationem. Parce mihi Domine peccata mea, & da vt pro virili tibi satisfaciam: repelle à me propriam voluntatem, vt tuam impleam, & eam semper implendo possideam sempiternam. Amen.

De scandalo interiori.

C A P V T I I I.

1. **S**andalum patior, clementissime Domine Iesu Christe, ferè quotidianum in anima mea: quia dum oculus, manus, vel pes meus interioris hominis aliqua spiritualiter operari desiderat, oculus, manus, vel pes exterioris hominis impedire nititur, adeò vt ab operibus desideratis, vel fortè iam inceptis penitus desistam. Oculus enim interior, est intentio pura, manus, operatio studiosa, & pes, affectio deuota: dum autem intentionem tu misericorditer excitas, vt manus, id est, operatio studiosa, ad laudem tui nominis, & ad utilitatem proximi exerceatur, oculus exterior, qui est intentio voluntatis propriæ, importunè impedit oculum interiorem, vt ad honestè operandum non moueatur, sed ad hoc trahit, & trahere conatur, vt voluntas propria impleatur: & sic scandalum patior omni die: sed huiusce scandali ego ipse sum in causa, qui licet sum religiosus, & tibi religatus, tuum tamen consilium sequi contempni.

2. Tu enim dixisti: Si oculus tuus, vel pes, vel manus scandalizat te, erue eum, & proice abs te: hoc autem fit cum aliquis non consentit, sed auertit & resistit. Cum enim ad bonè operandum intenditur, & voluntas propria conatur ad alia trahere, ista est manus quæ scandalizat, quæ abscindi debet, & proici, vt ei non consentiatur: sic etiam proficere in sancta religionis conuersatione, de virtute in virtutem ambulare, sæpè pes pusillanimitatis & negligentiae scandalizat, sed abscindi eum necesse est, vt pes gratiæ tuæ, qui statim in directo, currere faciat sine offensione, sine scandalo, & sine impedimento: nam sicut dicis, bonum est ad vitam introire cum vno oculo, aut manu, aut pede, quàm duos habentem mitti in gehennam ignis: per hoc autem notas illos, qui voluntatem suam siue bona sit, siue mala, æquè sequuntur, & ingrediuntur duabus vijs, nunc bona, nunc mala sectantes, secundum quòd desideria sua variantur, quibus utilius fuerat tuæ gratiæ in omnibus inhaerere, & vbi obuiat propria voluntas, abscedere, & à seipfis abiicere eam.

3. O piissime Domine Iesu Christe, ego sum ille peruersus religiosus sic scandalizatus & inconstans, qui semper secundum desideria mea ambu-

laui, nunc ad bonum, nunc ad malum: abjice à me misericorditer ea quæ scandalizant animam meam, ne intrem in gehennam ignis, vbi nullus laudabit te, sed in gloriam sempiternam, vbi nunquam cessabunt à tua laude, sicut scriptum est: Beati qui habitant in domo tua, Domine, in sæcula sæculorum laudabunt te. Amen.

De excusatione iniqua.

CAPVT IV.

1. **O** Miserabilis & nefanda multorum religiosorum conditio! ô pudor adducens peccatum! ô cor prauum & durum, omni dolositate plenum! ô lingua nequam, peccatum per iniquas excusationes occultans! tanta namque mentis obstinatione indurantur multi, quod multis modis peccatis suis excusationes prætexunt: dicunt enim malitiosè se excusantes, Non feci, aut feci quidem, sed bene feci, aut si malè feci, non tamen multum malè, aut si multum malè, non tamen mala intentione. Si autem de illis conuincuntur, sicut Adam & Eua, aliena suasionè se nituntur excusare: talis autem excusatio ore prophetico malitia appellatur.

2. Interdum etiam peccata nequaquam desunt, quæ faciunt, sed etiam laudare & defendere non erubescunt, non ignorantes quod cum culpa defenditur, geminatur: immò frequenter prauitatem suam ex alienis peccatis defendunt: quia enim alios talia fecisse considerant, hoc se non illicitè facere putant. Sed Domine Deus meus, adhuc periculosius agunt, quia nequiter se humiliantium, interiora plena sunt dolo. Vnde dum in peccatis comprehenduntur, neque tergiuerfari possunt, neque se purgare posse confidunt, in verba dolosæ confessionis prorumpunt, vultum inclinant, lacrymas extorquent, & vocem suspiriis, ac verba gemitibus interrumpunt: & sic eorum confessio laudabiliter sonat in ore, & tamen iniquitas eorum adhuc occultatur in corde.

3. O benignissime Domine Deus meus, tales dixi multos religiosos esse, nunc ad tuam piissimam misericordiam confugio ego sceleratissimus religiosus, & ore & corde tibi confiteor me talem fuisse, & in omnibus prædictis nequiter me deliquisse, & sic fictus fui religiosus, non verus; habitu, non actu; corpore, non mente, non cogitatione nec operatione: doleo me sic deliquisse, sed non quantum deberem, suppleat defectum meum bonitas tua, addat dolorem dolori, vt penitentiam agam quæ tibi ad satisfactionem sit accepta, & à reciduo caueam: tua quoque gratia misericorditer illustratus, hinc viuam secundum cor tuum, & in fine tandem vitam consequar in laude tua sempiternam. Amen.

De duritia cordis.

CAPVT V.

1. **O** Mitissime & piissime Domine Iesu Christe, gratias tibi ago prostrato & humili corde, ob tuam infinitam & exuberantem misericordiam quam geris erga miseros & peruersos religiosos, in quorum numero primatum teneo ego sceleratissimus, qui cum in religione cum aliis in humilitate & obedientia viuere deberem, loco humilitatis & obedientie habeo & habui cor durum, & more Pharaonis induratum, quod compunctione non scinditur, nec pietate emollitur, nec mouetur precibus, minis non cedit, flagellis induratur, ingratum est ad tua beneficia, ad consilia surdum, ad iudicia infidum, inuerecundum ad turpia, impavidum ad pericula, inhumanum ad humana, temerarium ad diuina, præteritorum obliuiscens, præsentium negligens, futura non præuidens. Ipsum est cui præteritorum præter solas iniurias nihil omnino non præterit, præsentium nihil non perit, futurorum nulla nisi forte ad vliscendum prospectio est: neque te timet, neque hominem reueretur: sed sic hebetatum est, vt continuam & propriam vexationem non sentiat.

2. Væ mihi, Domine, impiissimo religioso, à duritia cordis mei. Durum est enim, Domine, cor meum, durum est: quia ipsum non alliciunt tua promissa, nec terrent tua iudicia, nec inferni supplicia, neque castigant mundi tormenta: sed cogitatio amara, ipsum quotidie infestat, immunda maculat, vana inquietat, cum illaqueatur ab illis, & inuoluitur in istis: vanitas illud decipit, curiositas deducit, cupiditas allicit, voluptas seducit, luxuria polluit, torquet inuidia, turbat iracundia, cruciat tristitia: sicque multis casibus submergitur in vitis infinitis. Inter laqueos, Domine, ambulo, locum afflictionis inhabito, corpus mortis gesto, iugum gloriæ tolero, grauiorem conscientiam occulto, & ex iis grauissimam sententiam exspecto.

3. O misericordissime Domine Iesu Christe, fidelis es, & non deseris sperantem in te, nisi primitus te deserat: tunc autem deserit te, quando cor per impuras & inutiles cogitationes vaga mente discurrit. Adiuuare me digneris per tuam immensam clementiam, gratiam infundendo, vt omni sollicitudine custodiam cor meum, vt in illo requiescere possis: quia illud solum à me requiris: munda igitur & iustifica illud per remissionem & gratiæ infusionem, præparatum per puram confessionem, mollificatum per contritionem, circumcissum per satisfactionem, & incensum per assiduam orationem, vt te mundo corde tua misericordia tandem videam, & laudes tuas deprecemur in æternum. Amen.

De obstinatione.

CAPVT VI.

1. **O** Clementissime Domine Iesu Christe, multi in religione suis vitiis fauent, & quia propriam faciunt voluntatem, ad naturæ referunt necessitatem, non dominantur peccatis, sed potius illa obstinata mente defendunt: & idè ubi contemptus præcedit, necesse est accedere malitiam, vt consolationem quam potest miser obstinatus admittat, & cui non est pars in bonis, gaudeat saltem in malis: laterur scilicet cum malefecerit, & exulter in rebus pessimis: & sic legem spernunt, honestatem abiiciunt, valefaciunt pudori, timorem tuum transiunt, soloque ducuntur appetitu, solam sequuntur contumaciam, sola trahuntur voluntate, & est apud eos pro ratione voluntas.

2. Hi sunt inimici pacis, charitatis expertes, vanitate tumentes, placentesque sibi, & magni sunt in oculis suis, ignorantes tuam iustitiam, & suam propriam voluntatem sectantes, totique congregationi suum iudicium præferunt, tanquam ipsi soli habeant spiritum Dei. Inde in eis duritia cordis, inde animi obstinatio: quia meditantur non legem tuam, sed suam propriam voluntatem: ynde tam mordax & amarus sermo reperitur in ore eorum, quod nulla ad eos penetrare potest beneuolentium monitio. Tanta est ista peccata, & tam perniciosa, quod vnus obstinatio vniuersos turbat, & fit omnibus discordiæ fomes, & scandalorum materia: quia cordurum & induratum, nec Deum timet, nec hominem reueretur, contemnit animam suam, qui contemptus impœnitentiam parit, & impœnitentia obstinatione firmatur, & sic in omnibus viis suis adhærent diabolo, & manifestè efficiuntur vnus spiritus cum eo.

3. O benignissime Domine Iesu Christe, tibi pater obstinatio maligna mentis meæ, hanc habui in religione, quam frequenter manifestaui defendendo peccata mea, & quandoque illam occultaui in mente, vnum ostendens extrinsecus, aliud intrinsecus gerens in mente. Adiuuare igitur me digneris, Domine Iesu Christe, per tuam piissimam misericordiam: expelle ab anima mea istud venenum mortiferum & confer mihi tuam gratiam, vt obstinatione expulsa, peccata mea cognoscam & desiccam, acceptamque tibi de ipsis hic agam pœnitentiam, vt in fine gloria tua non caream, & te tua miseratione laudare possim in vitam sempiternam. Amen.

De leuitate animæ.

CAPVT VII.

1. **A** Nimis religiosi qui ad spiritualia intentus non est, mobilitate multa & leuitate iactatur: quia interdum curiosè quosdam sibi superiores

circūspicit, quosdam etiam inferiores, superioribus inuidet, inferiores deridet, pares sibi, parū pendit: & sic magna mobilitate, & leuitate animus eius permotus, nullā curam sui gerit: sed modō per superbiam ad alta se erigit, modō per inuidiam ad ima deuergit, nunc per iracundiam nequiter tabescit, nunc per extollentiam pueriliter hilarescit, in vno nequam, in altero vanus, in alio præsumptuosus, in omnibus superbus: quia amor propriæ extollentiæ, animam suam mobilem facit: quia superari se dolet, superare gaudet.

2. Has autem animi mobilitates & leuitates, indicant seria verba eius, nunc pauca & mordacia, nunc multa & inania, nunc risu nunc luctu plena sunt, & semper irrationabilia. Diffusus igitur eius animus ad multa, dum spatiosa claustrī perlustrat, damna interiora non sentit: nec mirum si propriam non sentit animi læsionem, quia oblitus sui ipsius, & absens penitus à seipso, in longinquam proficiscitur regionem, magna leuitate & mobilitate vniuersa perlustrans: cum tamen sicut corpus sub claustrī arctitudine clauditur, sic se animus magna stabilitate, in diuinis firmare deberet meditationibus, vt semper ibi constanter stabiliretur, vbi semper vera gaudia contempleretur.

3. O misericordissime Domine Iesu Christe, tua immensa bonitate multum indigeo, sine qua ego nefandissimus religiosus saluari non possum. Semper enim mens miserabilis, animus leuis & mobilis fuit, ad vitam aliorum perscrutandam, & in deteriorem partem eam temerariē interpretandam, multa ac diuersa alia vagē cogitando. Auxiliari mihi digneris, misericordissime Domine Iesu Christe, dirige cor meum ad meipsum, vt meipsum aspiciam & cognoscam, emendem, & per te tibi satisfaciam, te laudare & benedicere valeam in æternum, tecum vitam adeptus sempiternam. Amen.

De carne.

C A P V T VIII.

1. O Caro religiosi rebellis & delicata, quæ nullum vis ferre laborem, sed semper in quiete viuere cupis: ideo præceptus es ad libidinem, improba ad perulantiam, frequens ad luxuriam, inuerecunda ad fornicationem, crimini quotidie crimem adicis, peccata peccatis accumulās, nec cessas pessimis deteriora coniungere, voluntate crudelis es, vana, & insipiens, semper ad malum prona, ad bonum pigra, velox ad mortem, ad vitam difficilis, & sicut tinea lanam erodit, ignis ligna, scænum, stipulamque consumit, sic tu animam concremas, & conficis.

2. O miserabilis religioſe, ad quid & quare nutris carnem tuam miseram delicate & sine labore? quia semper æstuat, & tibi tempestas est, nec vnquam à motibus procellarum & miserandis naufragiis conquiescit, grauis tibi & animæ tuæ est, nec habes tam domesticum inimicum quàm carnis tuæ infirmitatem. Grauis lucta tibi est & graue periculum, quia conatur

natur subuertere animum tuum: quippe quæ de peccato nata, in peccato nutrita, intus in ipsa origine corrupta; sed multò magis praua consuetudine vitata, data est animæ tuæ quasi in bellum, quæ si mortificata fuerit, adducit ad vitam; & si nutriatur, præparat se ad bellum, & ducit ad interitum: laudabilis namque es, si in eam plenariam potestatem haberes.

3. O benignissime Domine Iesu Christe, cui religioso meliùs possum loqui quàm mihiipsi: quia de aliis loquor in sciè, de me autem loqui possum assertissimè, quamuis cum confusione loquar; quia animam meam vilipendo, carnem meam miserabilem nutriui in deliciis & ortis, in cibo & potu delicatis, in quiete & voluptate, in peccatis & delectatione, & in omnibus quæ illi placerent diligentiam adhibui, vt absque mora fierent. Auxiliari mihi digneris, piissime Domine, quia ancillæ seruitia indiscretè præbui, sic tua præcepta transgrediendo, & animam meam aspernando. Concede mihi misericorditer veniam de peccatis, & confer gratiam, vt te domante, domare valeam carnem miseram, & nutrire animam meam, vt ad tuam voluntatem perenniter faciendam, tuam gloriam consequar sempiternam. Amen.

De iis qui volunt bona habere, & mali esse.

CAPVT IX.

1. **O** Peruersa conditio religiosi! intraisti religionem intentione bene lautèque viuendi secundum miseram carnem tuam? bonum quæris, bonum desideras, bene vis viuere in cibo & potu, bonum beneficium vis habere, bonas vestes, & omnia corpori tuo necessaria optas, bona cupis & habere vis, & tamen non vis bonus esse. O insania & cæcitas mentis miseri religiosi! vt omnia velit habere bona præter seipsum, cum potius deberet amare bonitatem suam quàm totum mundum, quia præuuleret toti mundo.

2. Quid enim est in religione bonum, quoad vsum corporis, quod religiosi non affectent habere; etiam illa quæ suis superioribus iuste debentur, & quæ sibi iure denegari possunt. Diligunt namque primos recubitus, & vocari ab hominibus, Rabbi: primi cupiunt esse in mensa, vt lautius sibi seruiatur, honorabiliorem cellam in dormitorio petunt, & vbique meliorem affectant locum: & tamen habere volunt, & habent malam in seipsis vitam, quam sic negligunt, vt nolint aliquod habere malum nisi propriam vitam: & licet vita eos non offenderit, tamen ipsam volunt habere malam, vt inter omnia bona quæ habere desiderant, sint mali: si autem malum habeant, aut mala ea quibus ad vsum corporis vtuntur, tristantur, desolantur & impatienter tolerant, & vitam malam habent & habere volunt, & maximum bonum reputant omnia, præter seipsos, habere bona.

Yyy

3. O benignissime Domine Iesu Christe, ego sceleratissimus religiosus sum ille qui omnia prædicta in me miserabiliter sum expertus, qui vitam prauam ducendo bona temporalia ardentè concupiui, & si non haberem, murmuravi; aut si bona ad plenum non habui, impatienter toleravi: malam autem & peruersam vitam meam dilexi, & in illa perseveranter steti: & sic ingratus fui appetendo bonum, & faciendo malum, præmiari desideravi, unde maximam pœnam merebar. Ignoscere mihi digneris, Domine Iesu Christe, aufer à me tantam ingratitudinem: concede propitius mihi vitam bonam, & animæ meæ salutarem, vt mentem ad te eleuem, & bona spiritualia appetam, vt te donante ad honorem tuum tibi in hoc mundo seruiens, vitam ad melius tibi perenniter seruiendum consequar sempiternam. Amen.

De curiositate.

CAPVT X.

1. Domine Iesu Christe, curiosum est valde cor nostrum, ad scrutandum & inuestigandum vitam & facta aliorum, & valde desidiosum est & pigrum ad propriam vitam corrigendam. Hæc enim est curiosa cogitatio in claustro, vt semper aliorum vitâ & facta quis exploret, & omnia in deteriores partē in corde suo vertat, cum valde reprehensibilis in nobis ipsis essemus, si tanta diligentia nostra cerneremus vitia, quanta scrutamur aliena, sed hinc est vt nostra obliuiscamur, dum aliena perferutamur: & quandiu peccata nostra ignoramus, quæ defflere deberemus, tandiu curiosè rimamur aliena. Nam si conuerſi ad nosipſos, mores nostros diligenter attenderemus, non requireremus in aliis quod tam vigilanter reprehenderemus, sed solum quod in nobis lugeremus.

2. O quàm graue est, Domine Deus meus, curiosi vitium! quia semper vt aliena ſciat, ſeipſum neſcit, & animus eius quantò peritior fuerit alieni boni, tantò ſit ignarior ſui. Et tanta eſt iniquitas noſtra, quòd libentiùs vitia cuiuſque quàm virtutes attendimus, nec quid boni, ſed quid mali geſſerit, aduertimus: in omnibus ſerè hoc malum inuenitur, vt alios culpent, & ipſi culpas ſuas non agnoſcant ſi in eoſdem inciderint errores: magnus labor eſt diſcutere aliena commiſſa, & contemnere quod proximum eſt, ſed longè maior de alterius mente temerè iudicare, & ſuam noſſe non poſſe, nec facilis venia eſt, praua dixiſſe de bonis.

3. O piſſime Domine Ieſu Chriſte, maxima curioſitas nunquam mihi miſerrimo religioſo defuit: quia ſemper geſſi cor inclinatum ad inueſtiganda facta aliena, & illa in corde, praua eſſe, temerè iudicaui, aut non recta intentione facta: facta autem mea & malas meditationes non cogitaui, aut negligenter cogitaui, immò frequenter cogitare nolui, ſed contempſi. Succurre mihi Domine, vt de alienis non cogitem, ſed meipſum cognoscam: ab occultis meis munda me, Domine, & ab alienis

parce seruo tuo. Da vt te cognosceñ dohumiliter emendem, quæ malè ha-
ctenus gessi & cogitauī, & sic vitam meam in præsentī transigam, vt te
donante, vitam in perenni laude tua consequar sempiternam. Amen.

De detractiōe.

CAPVT XI.

1. **N**on sufficit, Domine Iesu Christe, multis religiosis curiositas, qua in
cordibus suis aliorum dicta aut facta, tanquam praua temerariè con-
demnant, sed etiam ad detractiōes varias, linguas suas laxant, & quandoque
ad adulationes. Nam tanta est iniquitas & prauitas eorum, vt in præsentia
adulentur, & in absentia detrahant. Adulatione vngunt, & detractiōe
pungunt; adulantur vltra quàm debeant, commendando, & detrahunt vltra
quàm debeant, vituperando: obseruant diligenter, non propria, sed aliena
peccata; non vt plangent, sed vt imputent & exprobrent; non vt curent,
sed vt amplius vulnerent. Est igitur detractiō in corde dolosa, in ore furiosa,
& in aure venenosa; in corde torquet obloquentem, in ore lædit absentem,
in aure foedit audientem.

2. Detractiō vrit, torquet, molestat & inquietat suum possessorem qui
omnibus bonis inuidet, omnibus malefactis arridet, secreta vult inuesti-
gare, vt ipsa possit reuelare, mala vult augmentare & bona diminuerē vel
tacere, nec vnquam carer inuidia, & inficit non solum seipsum & eum quem
diffamat, sed etiam illum cui diffamationem narrat, & vterque ipsorum tam
detractor quàm auditor diabolum secum gestat: sepulchrum patens est
guttur eorum, venenum aspidum sub labiis eorum. O Domine Deus meus,
nihil hodie suauius quàm aliena loqui, aliena curare, insultare miseris alio-
rum, & cunctis ad cæterorum condemnationem aliena vulnera monstrare.
In hoc ipso omne tempus vitæ nostræ absumimus, à quo vitio, nec sancti
homines, nec religiosi, liberi facili inueniuntur.

3. Auxiliari mihi digneris, benignissime Domine Iesu Christe, quia inter
ceteros mundi religiosos hoc vitio detractiōis me infectum sentio, qui
cùm sim cæteris peccator maior, plurimis, immò infinitis criminibus vul-
neratus & damnabiliter infectus, peccata mea post tergum projiciendo, alio-
rum peccata posui ante oculos meos, & illa prodidi: immò quod pernicio-
sius est, mihi & animæ meæ, bonam famam aliorum denigraui, & quantum
potui, in infamiam conuertri. Ignosce mihi, obsecro, Domine Iesu Christe,
& tanta flagitia mihi benignè remitte, & gratiam verè respiscendi mihi tri-
bue; vt in fine gratiam laudandi te, consequar sempiternam. Amen.

De inuidia.

CAPVT XII.

1. **V**bi inuidia est, Domine Iesu Christe, ibi mors est: quia non potest simul quis inuidere, & viuere. Dum enim inuidia interiora hominis penetrauerit, totum cor eius per dolorem, & sollicitudinem rodit, & lacerat: & nil iustius agit inuidia, quàm quòd autorem suum ante cruciat: nam semper lædit corpus, sicut venenum, grauatur etiam proximum, quia & amicis, & inimicis nocet. Tantum namque est venenum inuidia, quòd non solum inimicos inficit, verum etiam bonum amicorum ferre non potest, immò quæcumque diffamat & subuertit.

2. O execrabilis inuidia, tu murum religionis penetras, tu claustra subintrās tu venenum tuum mortiferum effundis in corda plurimorum religiosorum, qui semper dolent de bono & promotione aliorum, & contra gaudent de damno & deiectione aliorum, similes fratribus Ioseph, qui sola inuidia moti, eo quòd à patre plus cæteris amaretur, ipsum occidere uoluerunt, & Egyptiis tandem vendiderunt. Non enim attendunt inuidi religiosi, quòd te Domine, inuidia impugnatur, quia immediatè opponitur charitati, & tu charitas es: per ipsam namque inuidiam, homo tentatus fuit, & eiectus à paradiso: qui inuidia diaboli, mors intrauit in orbem terrarum. Tu etiam Domine Iesu Christe, per inuidiam traditus, flagellatus & occisus fuisti: ideo inuidia contrariatur tibi, quia tanta est bonitas tua, quòd bonis & malis vis prodesse: & tanta est inuidi prauitas, quòd bonis & malis vult & conatur verbo, facto, & corde obesse.

3. O benignissime Domine Iesu Christe, hoc inuidia mortifero morbo ego iniquissimus religiosus fui longissimis temporibus infectus: quia de fratrum meorum promotione dolui, de eorum malis & infortuniis sæpe gauissus fui: propter inuidiam, bonam aliorum famam carpsi, offuscavi, denigraui, damnum eis procuraui, contra superiores murmuraui, inuidens statui ipsorum, pares odio habui, & inferiores abiecti: quia tanta fuit in me inuidia, quòd omnes alios aut dictis, aut factis culpavi, cupiens super omnes ab omnibusque laudari. O piissime Domine Iesu Christe, ignoscere mihi dignare, quia sic tota vita mea inuidia fuit. Concede mihi misericorditer veram & perfectam charitatē, qui vitam meam miseram emendē, tibi & proximis per te satisfaciam, ad tuum beneplacitum hinc viuam, exacta autem hac, meliorem in tua misericordia, quæ numquam à laudibus tuis cesset, inueniam. Amen.

De tepiditate.

CAPVT XIII.

1. **S**Vnt plerimi, Domine Iesu Christe, in religione, qui dum in studiis spiritualibus magis solliciti esse deberent, cum præsertim ad hoc sint electi, magis in his fatigantur, atque in teporem & tepiditatem vertuntur, & defectu quodam spiritus positi, ambulant cum tristitia vias tuas, corde tepente, arente, & præ tædio tabescente, accedunt ad quæque iniuncta, frequenter murmurant, longos dies interdum, & frequentius longas noctes queruntur, quorum est brevis & rara compunctio, animalis cogitatio, tepida conuersatio, obedientia sine deuotione, sermo sine circumspectio, oratio sine cordis intentione, lectio sine ædificatione, quos vix gehennæ metus inhihet, vix arcet pudor, vix frenat ratio, vix vlla castigat disciplina, & si diu in ipsis tepiditas permanet, sub onere opprimuntur, & succumbunt, vt numquam ad plenum respirent in luce miserationum tuarum: nec in libertate spiritus, quæ sola facit iugum tuum esse suauē, & onus tuum leue.

2. Inde autem tam perniciofa tepiditas emanat, quia voluntas eorum nondum purgata est, nec bonum sic volunt, vt nouerunt, à propria conscientia abstracti & illecti; amant in carne sua terrenas consolatiunculas, siue in signo, siue in facto, siue in quocumque alio: raro namque suas affectiones dirigunt in te, & eorum compunctio non continua, sed momentanea est: impleri autem visitationibus tuis anima non potest, quæ hisce distractionibus, & tepiditatibus subiacer, & quanto magis illis euacuabitur, tanto amplius istis implebitur. Non enim spiritus & caro, ardor & tepiditas, in vno domicilio commorantur.

2. O misericordissime Domine Iesu Christe, quanta tepiditate sum infectus! ego miserrimus religiosus, qui dum magis ad tibi seruiendum fui obligatus, & sum astrictus, magis tepide quam non astrictè tibi seruiui, & seruiui. Non enim ex deuotione, sed ex consuetudine, non corde, sed ore, non cum letitia mentis, sed cum tristitia carnis, non spontanea voluntate, sed frequenti coactione. Succurre mihi, piissime Domine, aufer à me tepiditatem, & accende cor meum igne tui immensi amoris, vt tibi cordis ardore, & tota deuotione seruiam, & in præfenti, & in sempiternum. Amen.

DE VITIO GULÆ

CAPVT XIV.

1. **N**Vllus est in religione, Domine Iesu Christe, magis importunus exactor, quàm gula: quotidie clamat, quotidie queritur, numquam.

Y y iij

aut vix sat iatur, nunquam quiescit, nunquam tacet, semper contra administratores murmurat, nunquam dicit sufficit, nunquam cum ratione discernit, voluptatem sub specie necessitatis, aut prætextu laudabilis consuetudinis, palliat: ut dum putat consuetudinem obseruare, voluptatis desiderio seruiat, & tantò gula securius in præceps rapit, quantò sub honesto necessitatis explendæ nomine, aut rationabilis seruandæ consuetudinis, se contegit.

2. Misera gutturis voluptas, quæ vix longitudinem duorum digitorum habet, nec durat delectatio, nisi quantum transitus ille per gulam, semper incautum & miserum religiosum facit, querulosum, tristem, mendacem, impatientem, iurgia seminantem, ingratum, & scandalosum: non enim considerat quanta mala ex vitio gulæ euenerunt. Nam vitium gulæ primis parentibus fuit initium omnium malorum, per hoc vitium Noe, licet esset perfectus, fuit deceptus, per hoc vitium Loth commisit incestum, Esau vendidit primogenita sua, Filij Isaael incurrerunt iram Dei, de quibus scribitur: Adhuc escæ eorum erant in ore ipsorum, & ira Dei descendit super illos. Et hoc vitium sequitur carnis intemperantia, propter quam Absalon interfecit fratrem suum, & Herodes beatum Ioannem Baptistam. Ex isto vitio, aculei libidinis excitantur, & quantò magis venter impletur, tantò magis anima minoratur, & minus nocet princeps extorquendo pecuniam, quàm venter suscipiendo escam.

3. O misericordissime Domine Iesu Christe, miseram vitam meam ego pessimus religiosus in hoc vitio gulæ expendi, sumendo cibum ad voluntatem, & non ad necessitatem, modum excedendo, ieiunia infringendo, delicata cibaria appetendo, curiosè parari faciendo, & illa ad crapulam usque & ebrietatem accipiendo, & ex hoc somnolentiam, & pigritiam ad omne opus bonum incurri. Succurre mihi Domine, ex tua magna bonitate, & da mihi clementer abstinentiam veram, non solum ab excessu ciborum, sed etiam ab omni mortalium vitiorum, ut de præteritis propter offensam tui doleam, à futuris præcaueam, & in fine seruitium tui in sanctitate promerear, in vitam sempiternam. Amen.

De vanitate laudis humane.

C A P V T XV.

1. Mirandum est, immò magis dolendum, Domine Iesu Christe, quòd vana laus humana quoddam religiosorum animos sic inaniter occupat, ut laudari velint, cum sint verè culpabiles. Optant, & volunt, ut in eis veneremur, non quidem quod in eis est, sed quod de ipsis esse putatur, & non est. Vani enim sunt filij hominum mendaces filij hominum in statueris, ut decipiant ipsi de vanitate in idipsum. Laudantur namque mendaciter, delectantur inaniter, ut vani sint ipsi qui laudantur, & mendaces qui laudant: laudantur ergo, & ficti sunt, alij laudant quod putant, & falsi

sunt, alij vtrorumque præconiis gloriantur, & vani sunt: non enim attendunt ipsi miseri religiosi, quod non est laudandus homo in hac vita, quæ tentatio est super terram,

2. Vana quidem est talis laus & seductoria, qua laudatur peccator in desiderio animæ suæ, nec est prædicanda, nec commendanda: quia eorum vita non est talis, de qua quisque eorum dicere possit: Vivo autem ego iam non ego, vivit vero in me Christus: si autem laudarentur in quo iam sic viverent; non ipsi, sed Christus, in Christi, non in sua laudarentur vita, contra sententiam: Ne laudaveris hominem in vita sua. Sed quis est hic, Domine Iesu Christe, talis, & laudabimus eum? Certe, quod pudet dicere, plus dolet sic esse. Omnes declinauerunt, simul inutiles facti sunt, non est qui faciat bonum, non est usque ad vnum. Similes sunt sepulchris dealbatis, quæ foris pulchra apparent, & intus plena sunt vermibus, & ipsi quoque, fœtoribus & immundissimis spurciis diversorum peccatorum.

3. O benignissime Domine Iesu Christe, ego religiosus pessimus qui loquor, de numero sum illorum perditorum, & inutilium religiosorum, qui vanitatem dilexi, & apparere volui quod non eram, laus humana mihi placuit, cum tamen confusio deberetur, quia prædicabar bonus, & magna nequitia plenus eram. Succurrat mihi bonitas tua, misericordissime Domine Iesu Christe, & non permittas me sic finire miserabiliter vitam meam, sed sic clementer illam emendes, ut non amplius propriam laudem, sed tuam solam quæram, & diligam in vitam sempiternam. Amen.

De insatiabili desiderio.

C A P V T X V I.

1. **L**icet Domine Iesu Christe, humana natura vix satietur, sed semper appetat potiora, tamen longe minus satietur natura peruersi religiosi, quia suæ miseræ concupiscentiæ nescit, aut non vult modum apponere: quia suæ miseræ concupiscentiæ nescit, aut non vult modum apponere: quia pretiosa veste indutus, pretiosiores affert, & multas diuitias, bonæque possidens, invidet ditiori se. Si cupidus est, nunquam dicit, sat est, si libidinolosus est, nunquam satietur suâ misera voluptate, si superbus, ad altiora mente & spiritu anhelat, si gulosus, nunquam caret murmure, & scandalo inmensa, si inbediens fuerit, verba contumeliæ multiplicat: si ambitiosus laudis humanæ, adeptus dignitates aut fauores, amplioris honoris æstuat desiderio, nec finem desideriis suis imponit.

2. Non considerat, nec animo conspicit, quod stultum est, & extremæ dementiæ, ea semper appetere quæ nunquam satiant; nec appetitum expleant: nam cum quicquam talium habuerit, nihilominus non habita concupiscit, & ad quæque quæ defuerint, semper anhelat: & ita fit, ut per varia, & fallacia mundi oblectamenta, vagabundus animus, casto labore discurrrens, fatigetur, & nunquam satietur: & dum quicquam fameli-

inglutierit, parui æstimet ad id quod superest deuorandum, semperque non minus anxie cupiat quæ desunt, quam quæ sunt, vt latè possideat.

3. O clementissime Domine Iesu Christe, confiteor ego sceleratissimus religiosus quod isto morbo laboro, & laboraui ferè quandiu in religione permansi: & licet plurima bona ex mera tua gratia, & exuberanti clementia mihi dederis, & alii s me indignum præfeceris, tamen tanquam ingratisissimus insatiabili ardore potiora concupiui, nec vnquam contentus vixi illis donis gratiosè mihi datis. Adiua me, piissime Domine Iesu Christe, tempera desiderium meum, & ipsum de terrenis eleua ad te, vt te semper desiderem, & tibi seruiam, teque in sancto seruitio tuo perpetim manens, placatum videam & propitium in æternum. Amen.

De concupiscentia.

C A P V T XVII.

1. **M**aximum delictum est, Domine Iesu Christe, præsertim in religioso, concupiscentia, quæ interiorem & exteriorem hominem occupat vniuersum, adeo vt in eo non sit à planta pedis vsque ad verticem sanitas, quin totum inficiat concupiscentia. Lex namque peccati est, quæ in omnibus membris dominatur, vndique per fenestras mors intrare contendit, & intus fomes totius nequitie periculosius sæuit, & crudeliùs graffatur: & vix est in religioso quicquam purum ac immune ab hac macula, & contagio: quia mentem desideriis afficit, membra illecebris inficit, inde pruritus aurium, oculorum petulantia, inde olfaciendi voluptas, inde in faucibus inordinata delectatio, inde in vniuerso corpore mollicies sensus, libidòque perniciosa, inde in tota anima ebrietas illa desideriorum, & fornax quædam ambitionis, auaritie, inuidie, contumacie, & omnium denique vitiorum affectibus accensa vehementer.

2. Huic ergo tam multifarie pesti per singula resistere, multiplex est labor: quia dum resistitur concatenationi concupiscentiarum, resultat inde magna tribulatio: quot enim corpus illecebras, quot oblectamenta mundus videtur habere, tot patitur tribulationes, & tot tentamenta etiam bonus sustinet religiosus: quia sicut pauper concupiscit facultatem: infirmus sanitatem, & obsessus securitatem: sic bonus religiosus concupiscere debet illi bona cælestia, quæ conferunt facultatem quæ non minoratur, nec fastidium generat: debet etiam suauitatem concupiscere perdurabilem, quæ nunquam amarefcit, & securitatem, quæ nunquam impugnatur, vt tu Domine Iesu, qui es sapientia Patris illi & sui similibus dicere possis, Transite ad me omnes qui concupiscitis me, & à generationibus meis adimplemini.

3. O misericordissime Domine Iesu Christe, ego miserimus religiosus, deposito vsu rationis, & vtendo sola sensualitate, quocunque appetitus semper desiderium inflexit, illa statim bestiarum more, quæ concupiscentiis

tiisducuntur, concupiui. Cùm enim accessit appetitus superbiæ statim honores optauit cùm auaritia se obiecit, statim diuitias cogitauit, & cùm se luxuria ingessit, motus venereos animi declinare nolui, sed semper ad modum pueri, vbicumque se inclinauit effectus, illuc statim meipsum rapui. Succurre mihi, Dòmine Iesu Christe, & aufer à me concupiscentias malas, & da concupiscentiam bonam, vt in presenti te sic cupiam, quòd in æterno seruitio tuo te apprehendam. Amen.

De ingratitudine.

C A P V T XVIII.

1. **P**eruerforum religiosorum est, Domine Iesu Christe, occasiones ingratitudinis inuestigare: quia dum dona tua recipiunt, nesciunt à quo illa habent, sed impia vanitate iactantur, & propriam gloriam quaerunt, qui tamen ad omnia dona tua gratias agere negligunt, quas deberent ad singula, vt nulla gratiarum actione frustrarentur. Scio Domine, quòd peremptoria res est, ingratitudo, hostis gratiæ, inimica salutis, exinanitio benefactorum, virtutum dispersio, beneficiorum perditio, ventus vrens, siccans fontem pietatis, rorem misericordiæ, & fluente gratiæ, præsertim in filiis gratiæ, & in hominibus conuersionis, sicut sunt religiosi: iure enim perditum reputatur, quòd in ingratum confertur, & dedisse pœnitet, quòd perisse videtur.

2. Nemo est qui non facile, si à te querit, inueniat. Vnde plurimum ingratulus est qui obnoxius tibi sit: quia non est qui se abscondat à calore gratiæ tuæ: & licet multi sint satis importunè petentes quòd sibi deesse cognouerint, pauci tamen sunt qui dignas super acceptis beneficiis gratias rependunt: nec reprehensibile est quòd instanter petunt, sed quia inueniuntur ingrati, planè petitioni negant effectum, & fortè, Domine Deus meus, clementia videtur esse, ingratius negare quòd petunt, ne contingat vt tantò grauius de ingratitudine iudicentur, quantò magis accumulatis beneficiis ingrati extitisse probantur. O quam fœlix est ille, Dòmine Iesu Christe, qui ad singula dona tuæ gratiæ redit ad te, in quo est plenitudo omnium gratiarum, vt dum pro acceptis beneficiis non ingrati competunt, locum gratiæ faciant, vt maiora adhuc accipere mereantur.

3. O benignissime Domine Iesu Christe, ego impiissimus religiosus ingratissimus tibi semper fui, quandoque negando beneficia & dona, quæ à tua exuberanti clementia acceperam, quandoque illa dissimulando, quandoque gratias non agendo, & quandoque tua dona obliuioni mandando. Immo quòd grauius & damnabilius est, à te mihi data, adscribere volui meritis meis, & non tuæ immensæ bonitati. Adiuua me misericordissime Domine Iesu Christe, & ignoscere mihi clementer dignare. Da cognitionem veram, vt tua dona cognoscam, de ipsis gratias agam, ingratitudinis

Zzz

& aliorum peccatorum me pœniteat, vt tibi toto corde & corpore seruiam, & tandem te miserante in seruitio tuo gloriam consequar sempiternam. Amen.

De procrastinatione.

C A P V T X I X.

1. **L** Argiris misericors Deus, spatium pœnitiendi, emendandi, & corrigendi: sed miser religiosus in delitiis & voluptatibus viuens potius amat dilationem, quàm emendationem, diu se putans victurum & tardè moriturum, quamuis templa lata marmorea, ferro & plumbo consolidata corruant, demoliantur, & decendant. Longè quidem putat esse diem tui tremendi iudicii, cum tamen vniuscuiusque dies longè esse non possit, quia brevis est vita, & ipsa breuitas semper incerta est, & dies vltima, ignota, sed opulencia, & voluptas miserum religiosum occidunt, cum dicit voce coruina, cras, cras, & interim clauditur arcis ianua, & foris remanebit cum voce coruina, quia gemitum columbinum non habuit.

2. Conuerso, Domine Deus meus, veniam promittis, sed crastinum nulli promittis: nam paterfamilias venienti hora vndecima promissit denarium, sed quod viueret vsque ad sextam, non promissit. Quare ergo miser religiosus à te vocatus differt venire, certus de mercede, & incertus de die, non attendens quod potest sibiipsum auferri differendo, quod tu ex tua immensa misericordia ei daturus eras promittendo. Non differret in longum bonum prandium miser & voluptuosus religiosus, & malam vitam mauult habere longam. Si aurum illi afferatur, non dicit vt in crastinum differatur, sed statim recipit, aut sibi debitum exigit, hoc differre non vult, nec excusationem recipit: & cum tu ex infinita bonitate salutem animæ illi promiseris, illam miser recipere differt, & sic frequenter decipitur: quia dum ignorat spatium vitæ suæ, longius credit sapius fore quàm sibi futurum sit illud.

3. **O** misericordissime Domine Iesu Christe, ego miser religiosus, plenus dierum malorum, senex & antiquus in vitiis & peccatis, atque contractis praua consuetudine, hucusque distuli ad te redire per emendationem vitæ meæ, quam quasi continuè consumpsi in prauis moribus, & exemplis, in criminibus & delictis diuersis. Adiua me per tuam clementiam, & compelle rebellem mentem meam redire ad te, & me benigne suscipe, vt ad te toto corde veniens, discam tibi in vitam æternam seruire. Amen.

De hypocrisi.

C A P V T X X.

1. **O** Clementissime Domine Iesu Christe, sunt in religionis claustris, non veri religiosi, sed simulatores, qui etiam iusti esse non querunt,

videri tamen cupiunt. Hi mala peragunt, & bona profitentur, quippe qui per ostentationem, boni, sed per actionem, mali existunt. Ex vera cordis compunctione nunquam sui accusatores fiunt, etsi peccatores se esse ad hoc designant, ut ex ficta humilitate confessionis, locum aucupentur sanctitatis. Tristitia eorum non in corde, sed in facie est. Exterminant enim facies suas, ut appareant hominibus ieiunantes: singularia magis & inusitata sectantur, & vanis fauoribus delectantur: eorum mentes non testimonio conscientiarum, sed adulationibus demulcentur.

2. Hi Monachi oves sunt habitu, vulpes actu, & crudelitate lupi. Non diligunt virtutes, sed vitia velant sub pallio virtutum: de remediis morbos creant, & de medicina conficiunt languorem: quod est exterius, mundant, & quod est interius, relinquunt immundum. Citò prouocantur ad iram, & diu retinent in corde rancorem. Alios credunt illuminare, & seipsos confundunt: quia dum aliis per bonum exemplum proficiunt, ex simulata eorum intentione, sibiipsis nocent, nomen habent quod uiuant, & mortui sunt. Hi non semper latent: nam licet à principio suo non appareant, postea tamen apparent, & prius quàm vita eorum finiatur, non attendunt quòd nulla est iniustitia capitalior, quàm cum quis malè facit, & videri vult bonus.

3. O benignissime Domine Iesu Christe, ego sum peruersus ille religiosus, habitu honestus, actu prauus, bonum simulans exterius, & malum gerens interius. Ad laudes humanas audiendas voluntarius, ad operanda studiosa tardus, plenus iniquitate in corde, & humilis apparens in voce. Auxiliari mihi dignare, piissime Domine Iesu Christe, non permittat immensa tua bonitas me sic miserabiliter dies meos ad perpetuam damnationem finire, sed concede mihi, misericorditer, ut cum effectu vitam meam miseram corrigam & emendem. Et sicut exteriore habitu honestatem ostendo, sic eam interius in corde conseruem, ut in veritate, & puritate vitæ, tibi seruiam, te laudem & glorificem, in perennia sæculorum sæcula. Amen.

Idiotæ de statu religiosorum finis.



E X

LIBRO SEXTO

MAPHÆI VEGII,

D E

PERSEVERANTIA

RELIGIONIS.

De meditatione quieti & tranquilli status Religiosi.



ONNEXA est superioribus, quam meditari quoque oportet dulcissima religionis quies atque tranquillitas. Scitū est enim quæque inter se contraria pari iudicio discerni. Si igitur grauē esse demonstratum est mortalium sortem propter ingentes eius, innumerasque miseras placidam contra ac iucundam, confiteri necesse erit religiosam vitam, quæ plena fruens pace ac libertate, ab illis semota sit penitus & exempta. Quod quisque meditans attentē considerauerit, demerere profecto videbitur, si de tanto pelago calamitatum, in amœnum dulcemque & securum portum, mutata longē impari conditione traductus non cupiat, studeatque maiore in dies desiderio, tantam quam assecutus est, felicitatem conseruare, conseruatamque augere etiam magis ac beneficentiam benignitatēque eius cuius gratia & vocatione ad illam peruenit agnoscere. Non hic ambitio, non ira, non liuor, non cupiditas congregandarum pecuniarum, amittendarumque simul timor, grauissimæ atrocissimæque pestes, animum inuadent atque perturbabunt. Non hic caudicorum improbitas, negotiatorum auaritia, militum audacia, fœneratorum voracitas, quæstorum rapacitas, tyrannorum impietas, sollicitudinem & metum generabunt. Non seruorum, filiorum, vxorumque graues vndique & inolerabiles molestiæ mentem torquebunt atque affligent. Non hic sudandum, æstuandum, anhelandum; magnisque laboribus, & periculis subiacendum: procul hinc lites, & iurgia, procul amara suspiciones & odia. Quantō ille felicior qui ab his ereptus vexationibus,

his à malis liber, pace secunda fruitur, tranquillos omnes agit dies, sua contentus sorte, iucundus sibi, iucundus aliis, semper hilarius, semper lætus, cui suaves cibi, suaves somni, nihil non sapidum & dulce, nihil non instar magnarum deliciarum: quanto verò ille felicior qui licet seipsum deliciat, inferiorēque omnibus faciat, non aliter tamen ac si toti dominetur orbi, triumphoque vehatur, latari atque exultare videatur: qui nemini invidens, nemini nocens, neminem etiam molestum sibi aut infensum habet, qui nullius vim atque iniuriam sustinet, & si sustinere cogatur, non soluitur, non frangitur tamen, fortis semper & intrepidus: perfert autem omnia, siue aduersa, siue prospera illi contingant, vno eodemque vultu atque animo; non ullus eum exterre impetus, non vis ulla maior, non ipsa denique omnium quæ excogitari possunt, obscurissima & amarissima mors, quam & læto suscepturus expectat animo, spe alterius melioris & duraturæ semper vitæ, suspirans illud Pauli: Cupio dissolui, & esse cum Christo. Si qua etiam est quæ mentem eius subeat perturbatio, ea est commiseratio quæ vehementer afficitur erga ceteros mortales, quos magnis innumerabilibusque vexari incommodis, torquerique videt angustiis, quas quod magis considerat, eò magis etiam felicitatem quietis suæ intelligit: neque aliter illi accidit, quàm quòd ad Theodorum monachum lapsus scribit, Chrysostomus. Cùm multis enim salubribus eum monitis ad contemptum mundi, amorēque religionis exhortatus esset, pulcherrima etiam hac similitudine confirmare studuit, uti sit vir religioni dicatus, tanquam is qui rupis exelsæ verticem tenens, pelagus omne prospiciat, multosque inde navigantium crebris fluctibus, freti vnda submergi, alios in prærupti montis saxa collidi, nonnullos ad alia littora contendendo properare, & subita vi tempestatis ut victos ad alia deduci, plures sorbente vnda sævientis profundī ima penetrare, alios tabulæ vnius auxilio ex fragmentis navis inuentæ, à morte defendi: aliquando pro gubernaculo atque remigiis, manibus tantummodo suis uti, alios autem videat supra turbidos fluctus, multiforē atque multiplici mortis genere cadauera ferri. Ita esse ergo illum dicit qui militat Christo, cùm se à tempestatibus atque turbinibus vitæ istius separarit: consistere quippe in arduo semper ac tuto securum loco, vnamque tantum sollicitudinem gerere, quemadmodum Deo placere possit, quo celsius nihil esse potest aut tutius. Verùm hæc minima, comparatione eorum quæ prædulcia quidam ac nulli hominum enarrabilia sentiunt, gustantque Deo deuoræ & religiosæ mentes. Nota est in primis pluribus, summa quæ ex lectione simul ac meditatione sacrarum historiarum doctrinarumque suauitas percipitur. Quam dulcia (inquit David) faucibus meis eloquia tua super mel ori meo! Inter orandum verò incredibile videtur quanto rapiatur incendaturque mens amore, quanta afficiatur liquefiatque lætitia, præsertim cùm admixta est lacrymarum gratia, quarum tam gratus, tam lapidus, & dulcis est profluvius, ut vel minima earum guttula superet omnia, quotquot haberi possint, terrena oblectamenta. Porro quantum ad quod sensum postremo altioreque

Zzz iij

loco peruenitur, maius quidem ac excellentius cæteris contemplandi munus, non est meum, non dicam eloqui, sed nec intelligere: qui autem intelligunt rapi se ingenti exultatione & iubilo, mirumque & inexplabilem quandam amenitatis dulcedinisque gustum sentire consentunt, quem quantumcumque sentiant, nullis tamen verbis, tanta est eius magnitudo & redundantia, explicare villo modo possunt. Quid verò mirum si quis despecta proculcatæque hac terrena facie Dei tantum commercium habet, diuinis etiam fruatur gaudiis, si mente altius eleuatus, nihilque præter Deum suspirans, hauriat (vt inquit propheta) inquam in gaudio de fontibus Saluatoris, aquas viuas, salientes, vt dixit Christus formina, in vitam æternam. Si quas assequi aliquando sperat arthæ quasi nomine, interim cælestes libat delicias, verasque, & Dei magni proprias, sempiternasque voluptates. Vt enim tradit Hermes Trismegistus in libro quem de idolo ad Asclepium composuit, Pater omnium, & Dominus, qui solus est omnibus omnia, se libenter ostendit, non vbi sit loco, nec qualis qualitate, nec quantus sit quantitate, sed hominem sola mentis intelligentia illuminans, qui discussis ab animo errorum tenebris, & veritatis claritate percepta, toto se sensu intelligentiæ diuinæ commiseret. Cuius amore à parte naturæ, quæ mortalis est, liberatus, immortalitatis futuræ concipit fiduciam. Hoc ergo inter bonos & malos distabit: Vnusquisque enim pietate, religione, prudentia, cultu & veneratione Dei clarescit, quasi oculi vera ratione perspecta, & fiducia credulitatis suæ tantum inter homines, quantum sol lumine cæteris astris antestat. Nec mira hæc cuiquam videri debent: sacer namque spiritus (vt scribit Seneca) intra nos sedet, bonorum malorumque nostrorum obseruator & custos. Bonus vir, sine Deo nemo est. Neque potest aliquis supra fortunam, nisi ab illo adiutus exurgere: ille dat consilia magnifica & recta. Non potest res tanta sine adminiculo numinis stare. Itaque maiore sui parte illic est vnde descendit: quemadmodum radij solis contingunt quidem terram, sed ibi sunt vnde mittuntur: sic animus magnus ac sacer, & in hoc dimissus, vt propius diuina nosceremus, conuersatur quidem nobiscum, sed hæret origini suæ, illinc pender, illuc spectat ac nititur animus qui nullo bono nisi suo nitet. Non latuerunt hæc Gregorium Nazianzenum, qui in Apologetico asserens non tulisse se violenter in medias turbas pertrahi populorum: & velut de templo quodam quietis, tumultuosis vitæ huius fragoribus obici. Nihil, ait, reuera mihi ad beatam vitam præstantius videbatur, quam velut clausis carnalibus sensibus, & extra carnem mundumque effectum, quempiam in semetipsum conuerti, id est, suos sensus atque animos conspiciari, alienumque effectum à mortalium curis sibi soli loqui, & Deo, vt altior cunctis visibilibus factus, mentem suam repleat diuinis sensibus, & cælestibus formis absque vlla admixtione terrena. Verè speculum immaculatum effectus imaginis Dei, & ex ipsius lumine semper lumen accipiens, auspicia quædam vel initia futuri in semetipso sæculi ferens, atque in terris adhuc positus, consortio quodammodo perfruens Angelorum, despectaque ac dere-

licta fragilitate terrena, ad superna cœlestia Spiritus sancti subiectione
 transferri. In eodem quoque libro alio loco: Duo sunt, inquit, in cœlo qui
 teneri non possunt: Deus & Angelus. Tertius verò est in terra Christianus
 Philosophus, veluti quidam incorporeus viuens in carne, incircumscri-
 ptus in corpore: in terra cœlestis est, in corruptione impassibilis est, in om-
 nibus cedit, in omnibus ceditur præterquam in animi libertate, & in eo
 magis vincit in quo omnibus auferre ei quid volentibus cedit. Non im-
 meritò Chrysostomus exponens epistolam primam beati Pauli ad Timo-
 thæum ita vitam monachorum laudat, inquiens: Ibi munda sunt omnia,
 nulla ibi nidoribus locus, absunt procul sanguinis rui. Ibi perturbatio-
 nes, curæ, tumultus, tranquillo in portu nauigant: ac velut luminaria
 sunt sublimi de loco nauigantibus, fulgore suo iter aperientes: in littore
 placido sedent, omnes ad quietem suam inuitantes ac pertrahentes; neque
 naufragium pati sinentes, eos qui se intuentur, non permittunt in tenebris
 degere eos qui suas aspiciunt sedes. Perge itaque ad illos, quære, hospitio
 suscipe, accede, tange sacros pedes. Quasi enim de terra in cœlum, ita san-
 cti cuiuslibet viri monasterium: de propriis domibus itur, non ibi conspi-
 cis ea quæ domi, mundus est locus ille, alta ibi quies atque silentium est,
 meum & tuum inde prorsus eliminatum est: illic si vel diem vnum aut
 duos manseris, tunc verò voluptatis maiore sensu perfunderis. Non ibi
 velut in sæcularium domibus stertit familia, clausæ sunt ianux, omnes
 alto sopore prostrati mortuis similes sunt, nihil illic eiusmodi est, nemo
 stertentes audit illic aut hiantes somno, nullus iactari per soporem quem-
 piam vider aut nudari. Haud enim nudos ibi dormire fas est, sed dor-
 miunt honestius vigilantibus compositi. Hoc autem totum ex animi disci-
 plina & honestate proficiscitur: isti profectò sunt sancti, atque inter ho-
 mines Angeli. Summus namque Dei timor non sinit hos profundo sopore
 demergi, animumque à suo vigore laxare: sed firmè in superficie est, ipsos-
 que reficit solum. Huiusmodi illorum quoque sunt somnia, non fantasias,
 aut portentosas imagines referunt, sed in gallicantu, qui præest, continuo
 assistit, pulsaturque modicè pede iacentem, sicque omnes vnà protinus
 excitat: nullus illic famulum vocat, quisque enim sufficit sibi, non
 eger vestibis plurimis, nihil opus habet excutere somnum, simul
 atque oculos aperit, diutius vigilasse videtur, quòd illi sobrietatis ratione
 contingit: nisi enim cor prægraue cibus infra mergatur, leui salubrique
 sonno expurgiscitur facile, moxque precum reperit vices, manus puræ
 tenduntur, quia somnus præcessit honestus atque moderatus. Inde vbi sur-
 rexere, diuinis laudibus instant, hymnòsque propheticos canunt magno
 suauisque concentu, & canticis numerosis, non cithara, non fistulæ, non
 vllum aliud instrumentum musicum tam dulces efficit modos quam sancti
 illi summa in solitudine & quiete psallentes. Rectè igitur Ephrem in ser-
 mone quem edidit de vita & exercitatione monastica, dum felicitatem
 commendaret, Paradisus est (inquit) plenus lætitiæ fructibus, variisque
 virtutibus: multitudo vnamis monachorum, charitatis ornamento lu-

centium : fons decorus & aquis affluens . & multitudinem arborum rigans , conuentus monachorum est in vnum coactus , qui psalmodiam suam lacrymis rigant . Vrbs mœnibus septa & munita , monachorum multitudo est in idipsum congregata , in se inuicem diuinæ charitatis excitantium flammis . Diadema pretiosum est lucentibus gemmis , & candentibus margaritis , intextum , monachorum cœtus in vnum connexus , ac diuina charitate plenus . Naui est referta opibus regis , monachorum chorus in vnum diuini amoris ardoribus æstuans : olea est speciosa atque fructuosa monachorum chorus simul diuina charitate solidatus . Castra sunt sanctorum Angelorum monachi vnanimiter viuentes , quorum semper animus ornata monachorum adunata multitudo , instructa varietate virtutum . Magna hæc & singularia religiosæ vitæ bona , eximia hædotes , excellentia ornamenta , quorum meditatio in maiorem nimirum spem ac deuotionem adducet , ad sanctæ quoque religionis perseverantiam quemcunque ea animo volutantem magis inflammabit .





TRACTATVS

DE OCULO,

PER R. P. D. IORDANI
Præpositum Vticensem anno Domi-
ni 1381. qui deinde factus Abbas de
Cellis, Bituricensis diœcesis, ibi dies
suos clausit vniuersos, cuius anima
requiescat in pace.

PRÆFATIO ET DIVISIO

totius operis.



SI diligenter voluerimus in Lege Domini meditari, facillimè perpendemus, quæ pertinent ad visionem & oculum, præ cæteris frequentius in sacris eloquiis recitari: Ex quo pater, considerationem oculi, & de iis quæ spectant ad ipsum, esse perutilem ad habendam diuinæ cognitionis scientiam pleniorẽ. Dicemus ergo pauca de oculo, prout ibi continetur animarum ædificatio. Primò de ipso scientialiter, postea moraliter breuem volo sermonem facere. prout qui finxit oculum, cuius oculi in pauperem respiciunt, rationis meæ cæcutientem oculum dignabitur illustrare. Præsens autem opusculum in quindecim capitula distinctum est. Primum tractat de numero partium oculum componen-
tium. Secundum, de partium ordine in oculi compositione. Tertium, de

A A a

visionum numero. Quartum, de visionis modo. Quintum, de visionis organo completiuo. Sextum, de nouem mirabilibus oculi, in visione accidentibus, moralem continentibus informationem. Septimum de instructione morali secundum duodecim proprietates repertas in oculo corporali. Octauum, de septem differentiis oculi iuxta differentiam septem capitalium vitiorum. Nonum, de carentia oculorum corporalium æquanimitè sufferenda. Decimum, de sumptuositate oculi respectu cæterarum partium corporis humani. Vndecimum, de informatione scholarium ex septem conditionibus quæ requiruntur ad visum. Duodecimum, de informatione vel instructione Prælatorum ex septem proprietatibus oculi. Decimumtertium, de quatuor rebus quas spirituales oculi debent iugiter contemplari. Decimumquartum, de tribus visibilibus oculum delectantibus. Decimumquintum & vltimum, de oculo septemplici intuitus diuini.

CAPVT PRIMVM.

De numero partium oculum componentium.

1. **S**ciendum est igitur quodd, sicut potest elici ex sententia Constantini in libro, quem fecit *de oculo*, & ex verbis Albategnij in lib. 1. *scientia perspectiua*, Oculum tres habet tunicas in sui compositione, quarum prima dicitur *vnea*, quia est sicut vna. Secunda, *cornea* quia sicut cornu clara est, & lucida. Tertia verò *sclerotica*, siue consolidatiua, eò quod sit solida siue dura. Habet etiam tres humores. Primus *vitrei* nomen accepit, quia vitri liquati similitudinem gerit. Secundus, *glacialis*, seu *crystallinus* dicitur, quia crystallum vel glaciem imitatur. Tertius verò *albugineus*: quia est albugini oui simillimus. Habet insuper oculus vnā telam subtilem & peruiam, humorum, qui suprà tacti sunt, contentiuam, quæ tela *aranea* similatur, propter quod & tela aranea nuncupatur. Habet postremò oculus palpebras quibus velatur, & à nocementis exterioribus præseruatur. Humor autem crystallinus in cæterorum humorum medio collocatus, *pupilla* vocatur, & in ea est virtus visua sicut in subiecto; licet non primo; quia neruus communis est organum radicale, in quo in modum crucis se interferant duo nerui visiles, ab oculis venientes: & in illo neruo communi virtus visua fontaliter radicitur, & inde in vtriusque pupillam oculi deriuatur.
- Psal. 16.* 2. Hinc apparet quàm eleganti similitudine vsus sit Propheta Dauid, quando dicit *custodi nos Domine, vt pupillam oculi*. Nam, vt iam dictum est, pupilla humor crystallinus seu glacialis dicitur, qui duobus humoribus & vna tela, & tribus tunicis, & insuper palpebris continetur, nihilominus continuam influentiam spirituum, & virtutum recipiens à fontali plenitudine virtutis visua, existentis, vt tactum est, in neruorum crucea

OCVLVS MYSTICVS.

475

sección. Ex quo manifestè ostenditur, quod septem ad pupillæ custodiam requiruntur.

3. Modo consimili, pro spiritualis pupillæ, id est, animæ perfectæ custodia; septem sunt nobis necessaria, videlicet septem virtutes principales, nempe tres Theologicæ, & quatuor Cardinales. Insuper etiam debet addi continua influentia charismatum gratiæ, manans à plenitudine Crucifixi. Per hoc enim nostra pupilla spiritualis conseruatur, & habet à Domino custodiri. Ideò Dauid sapientissimus aptè petit, cum dicit; *Custodi nos Domine vt pupillam oculi.* Eadem similitudine vsus fuit sanctus Moyses ab eodem edoctus Spiritu, quando dixit, *circumduxit eum, & docuit, & custodiuit, quasi pupillam oculi sui.* In hoc enim quod natura tanta custodia vallauit oculum, incitatur ad sollicitam custodiam oculorum, ne si negligentes fuerimus, tandem dolentes dicamus, *Dereliqui me virtus mea, & lumen oculorum meorum, ipsum non est mecum.* Cum enim spiritualis pupilla, id est, anima à septem virtutibus tanquam à septem pupillæ custodibus habeat custodiri: non est mirum si ille, quem virtus dereliquit, amiserit lumen oculorum. Et ideò Dominus legem suam volens districtissimè custodiri, vtpotè qui mandata sua, nimis custodiri mandauit; signanter legis suæ custodiam, pupillæ custodiæ comparauit; dicens, *serua legem meam vt pupillam oculi.*

Psalm. 161

Deut. 33.

Psalm. 37.

CAP. II.

De partium ordine in oculi compositione.

HOC autem in prædictis tunicis oculorum considerandum est, quòd cum tunica ad custodiam pupillæ concurrentes, sint in mollietate & duritie differentes; mollior tamen tunica est pupillæ proximior, durior verò ab eadem remotior. In quo oculi Ecclesiæ, videlicet Prælati, possunt spiritualiter informari, vt sic misericordiæ lenitatem exhibeant, vt censuram iustitiæ non omittant. Nam vt dicit Gregorius iustitia vel disciplina sine misericordia multum destituitur, si vna sine altera teneatur. Sint tamen ad misericordiam proniores, vt sit in eis interior misericordia: huic accedat iustitia, vel disciplina.

2. p.

Pastor.

c. 6.

2. Cuius rei exemplum accipiant in Helia. Helias quippe quasi quidam oculus extitit, qui tanquam à remotis aspiciens, futura præuidit; *quæ enim modò dicitur Prophetas, olim dicebatur videns*, vt dicitur i. Regum. Hic autem oculus rectissimè fuit compositus. Fuit enim ad misericordiā pronus, magis quàm ad iustitiam, & sic misericordiam habuit, quod altram conseruauit; de ipso quippe dicitur, *pater mi, pater mi, currus Israël, & auriga eius.* Et primò congruè *currus* dictus est, & post *auriga*; debet enim Prælati principaliter esse *currus*, infirmos per misericordiam sup-

AA a a iij

portando; secundariò debet esse auriga per seueritatem iustitię discolos stimulando. Hunc ordinem obseruauit, & exemplo suo ad huius obseruantiam nos informauit Samaritanus, qui interpretatur *custos* per quem significantur Pręlati. Infudit enim vinum, & oleum vulneribus sauciati. Et ex ordine congruo, primò oleum infudit, quo designatur lenitas misericordię; deinde vinum, quo designatur seueritas disciplinę.

3. Audiant, & attendant Principes & Pręlati, qui proniores sunt ad seueritatem quàm ad pietatem, quid prudentissimus super hoc dicat Helinandus. Pręlati (inquit) & Principes, sicut Medici, numquam debent vti grauib; remediis; nisi cùm lenium beneficio desiderata sanitas non obtinetur. Vnde Liuius, Pręlatum, seu Principem, senem moribus esse oportet, & qui moderatiora consilia sequatur; & vicem gerere medicorum, qui morbos curant, nunc ex inanitione in repletis, nunc cauterio, nunc fomentis. Si enim citharędi aliique fidicines multa diligentia procurant, quomodo aberrantis chordę compescant vitium, & aliis concordem reddant; quanta sollicitudine oportet Pręlatum & Principem moderari, vt subditos reddat quasi vnanimis, & vnus moris habitantes in domo? Certum est autem, quod tutius est chordas remitti ampliùs, quàm intensius intendi: remissarum namque intensio, artificis opera conualescit, quę autem semel rupta est, nullo artificio reparatur. Vnde ver-

*Ouid. 2.
de Ponto
eleg. 3.*

*Sit piger ad pœnas Princeps, ad præmia velox.
Et doleat quoties cogitur esse ferox.*

4. Horum alterum iustitię, alterum est pietatis. De quibus Salomon: *Misericordia & veritas non te deserant: circumda eas guttur tuo, & describe in tabulis cordis tui; & inuenies gratiam & disciplinam bonam coram Deo & hominibus.* Gratia namque debetur misericordię, disciplina iustitię. Qui sine prima est, omnibus est odibilis: qui sine secunda, omnibus contemptibilis est. De hoc etiam Claudianus ait:

*Sæpius inprimis; Nam cum vincamur in omni:
Munere, sola Deos aequat clementia nobis.
Nec tibi quid liceat, sed quid fecisse licebit,
Occurrat, mentemque domet respectus honesti.*

Dicit enim Chrysostomus; [Si erramus modicam poenitentiam imponentes, nonne melius est propter misericordiam dare rationem, quàm propter crudelitatem succumbere punitioni.] Si tales essent moderni Pręlati, tunc essent similes oculo corporali; & tunc à subditis amarentur, vt oculi; imò fortè magis quàm oculi. Idè Beatus Paulus, qui erga subditos misericordissimus extitit, in tantum vt diceret; *Quis infirmatur, & ego non infirmior? quis scandalizatur & ego non vror?* Et iterum: *Filioli mei quos iterum parurio; & ad Philippenses; Testis est Deus quomodo cupiam vos omnes in visceribus Iesu Christi.* Idcirco à subditis, plus quàm oculi, amabatur. Dicit enim; *Sicut Angelum Dei excepistis me;*

In Mat.

1. Cor. 11

Galat. 4

Phil. 1

Gal. 4

Testimonium enim perhibeo vobis, quod si fieri posset, oculos vestros eruis-
setis, & dedissetis mihi. Sed hodie propter duritiem Prælatorum, sæpè
contingit contrarium. Vellent enim interdum subditi, oculos eruisse
Prælati.

CAP. III.

De visionum numero.

DOctores perspectiue scientiæ, distinguunt triplicem oculi visio-
nem. Prima est per lineas rectas. Secunda per lineas fractas. Ter-
tia per lineas flexas. Quarum prima perfectior est duabus aliis. Secunda
certior est quàm prima, & tertia minùs certa.

Modo consimili spiritualiter loquendo, possumus in homine visionem
triplicem assignare. Vnam perfectam quæ erit in statu gloriæ post re-
surrectionem vitam. Alia est in anima separata à corpore vsque ad
resurrectionem in cælo empyreo diuinam essentiam contemplante, &
hæc visio debiliior est quàm prima. Tertia est in hac vitâ, & est omnium
debilissima. Et habet fieri per reflexionem, sicut & visio qua aliquis vi-
detur in speculo habet fieri mediantibus reflexis lineis: vnde & ab Apo-
stolo vocatur *visio specularis. Videmus* (inquit) *nunc per speculum in*
anigmate. Sed in gloria facie ad faciem, & post resurrectionem secun-
dum plenam rectitudinem: & ante eam in anima, secundum obliquatio-
nem ab illa rectitudine eò quod non complebitur anima visionis plenitu-
dine, antequàm suo corpori sit vnita. Nam vt ait Augustinus, animabus
iam beatis, in cælo Deum videntibus, inest quidam naturalis appetitus
administrandi corpus, quo retardantur ne totaliter ferantur in Deum. Ex
quo patet quod conuenienter loquutus sit sapientissimus Perspectiuus
Paulus Apostolus quando visionem patriæ, facialem; visionem verò viæ,
specularem & ex parte vocauit. Videmus nunc per speculum in anig-
mate, tunc autem cognoscam, sicut & cognitus sum.

1. Cor.
23.12. de
Genes.
ad lit.
6. 35.

1. Cor. 13.

2. Et sic vt aliquis amicum suum dilectissimum ex multo tempore vide-
re desiderans, non quietaretur, si ipsum videret tantùm in speculo, nisi
etiam ipsum respiceret in seipso: Sic in præsentia cum Deum videamus
per speculum, non *satiatur oculus visu*: Sed in futuro cum ipsum dilecta, *Ecl. 1.*
& faciali visione videbimus, implebitur illud Psalmi, *Satiabor cum ap-* *Ps. 26.*
paruerit gloria tua. Et sicut Apostoli gauisi sunt viso Domino; sic & nos *Ioan.*
cum Deum oculo iam beato videbimus, vt potè perspectiui seu specula-
tores gloriosi iam facti, ineffabiliter delectabimur in bono optimo quod
cernemus, & præ gaudio inexplicabili, in laudis iubilum erumpemus,
vt ait *Isaias; Vox speculatorum tuorum, leuauerunt vocem simul; lauda-* *Cap. 52.*
bimus, quia oculo ad oculum videbimus.

AAaa iij

CAP. IV.

De modo Visionis.

*Lib. de
aspetti-
bus.* 1. Sicut probat Ptolomæus, ad visionem exigitur ut fiat non solum in-
stus suscipiendo visibilis similitudinem. Sed etiam extra mittendo
per propriam speciem & virtutem. Simili modo spiritualis visio, non
solum requirit ut aliquid recipiat ab extra, scilicet à Deo virtutes & gra-
tiam, sed ut cooperetur per virtutem propriam. Nam ad iustificationem
impij, requiritur motus liberi arbitrij, & consensus cum gratia Dei. Vnde
*Serm.
25. de
Verb. A.
post.* Augustinus, *Qui creauit te sine re.*

2. Pro huius rei designatione, cum Laodiceę spiritualiter esset cœ-
cus, ut dicitur in Apocalypsi, *Tu dicis quia diues sum, & nullius egeo, &
nescis, quia miser es, & miserabilis, & pauper, & cæcus, & nudus:* dicit
Cap. 3. ei cœlestis medicus. *Collyrio unge oculos tuos, ut videas.* Per collyrium
quod mordicat & pungit oculum, significatur attritio & dolor de pecca-
tis, & conatus proprius in exercitio bonorum operum; quibus homo co-
operatur, ut visum recipiat spiritualium oculorum. Vnde Glossa dicit
super dictum locum. [Collyrio oculi inunguntur ut videamus, cum ad
cognoscendam veri luminis claritatem; intellectus nostri aciem modera-
mine bonę operationis adiuuamus.]

3. In signum etiam huius rei, videlicet quod operari debemus, ut spi-
ritualiter videamus, voluit Dominus, ut priusquam Paulus excecatus vi-
Acto. 9. sum reciperet, oraret, & triduo ieiunaret. Idem etiam designatur in
Tob. 11. hoc quod Tobias felle piscis, oculos patris sui liniuit, statimque visum
recepit. In felle, quod est amarum, signatur amaritudo, & dolor de pec-
caris, & indignatio contra peccatum: nam fel commouet iras. Illud au-
tem ex parte hominis iustificandi requiritur, ad hoc ut visus interior
restauretur.

CAP. V.

De visionis organo.

1. Sicut in scientia Perspectiua docetur, visio in oculis non completur.
Nam eiusdem rei duę species ad vtrumque veniunt oculum, & cum
diuersitas speciei diuersificet iudicium, si visio compleatur in oculis, pro-
pter apprehensionem speciei geminę, vna res iudicabitur esse duę. Opor-
tet ergo ut ponatur aliud sentiens præter oculos, in quo visio compleatur,
cuius instrumenta sunt oculi, qui reddunt ei speciem visibilis rei. Et hoc
est communis nervus in superficie cerebri situatus; vbi concurrunt duo

nerui à duabus partibus anterioris cerebri, qui post concursum, in duos iterum diuiduntur, & sic ad oculos extenduntur. In illo igitur neruo communi virtus visiva fontaliter radicatur. Et quia tunc virtus fontalis est vna, ad quam continuantur virtutes oculorum per medium neruorum opticorum; idèd potest vna res apparere vna, quamuis à duobus oculis videatur.

2. In hoc autem quod visio in oculis exterius apparentibus non completur, sed in neruo communi, qui interius occultatur, moraliter innuatur, vt iudicium temerarium declinemus; nec de rebus, vt apparent in prima facie iudicemus, sed per deliberationem ad internum iudicium recurramus. Vnde & de Angelo magni consilij, cuius secundum Augustinum, omnis actio, nostra est instructio, dicitur ab Isaia; *Non secundum visionem oculorum iudicabit.* Non enim, vt ait Seneca, quod ante oculos est tantum sufficit intueri. Vnde multa fordent in exterioribus oculis, quæ tamen munda sunt internæ iudicio rationis. Quod euidenter apparet de iudicio lepræ, de quo dicitur. *Si autem effloruerit discurrens lepra in cute, & operuerit omnem carnem à capite vsque ad pedes, quidquid sub aspectum oculorum cadit, considerabit eam Sacerdos, & teneri à lepra mundissima iudicabit.*

Lib. de
vera
relig.
c. 16.
Cap. 11.
Epi. 74^a

Leui. 13.

CAP. VI.

*De Merabilibus circa oculi visionem.**De primo Mirabili.*

1. **P**ROBATUM est in scientia Perspectiua, & hoc docet experientia, quod oculus locatus in aëre nebuloso, nec videt, nec percipit vapores & nebulas quibus est circumseptus: Cum autem recedens exierit extrà huiusmodi aërem vaporosum, si tunc retrò respiciat, videt ipsum, quem prius in ipso positus non videbat. Per hunc modum, etiam peccator, quandiu est in peccato, peccati sui tenebras non aduertit: sed extra peccatum positus, & lumine gratiæ illustratus, tunc primò peccati grauitatem & caliginem, in qua fuerat, recognoscit.

2. Exemplum de simia iuxta truncum iacente, quæ dum iuxta truncum iacet, non percipit molem trunci, donec cæperit ab eo elongari. Vnde & Dauid, postquam à peccato cum Bersabee perpetrato se per penitentiam elongauit, peccatum suum agnouit, & dixit; *Quoniam iniquitatem meam ego cognosco, & peccatum meum contra me est semper.* In huius figura dicitur in Exodo. *Leuantes filij Israël oculos, viderunt Egyptios post se.* Egyptus autem interpretatur tenebræ & peccatum significat, quod est spiritualis tenebræ; quam homo tunc primò cognoscit, cum à peccato penitendo recedit: Benè dicit Anselmus in lib. de similitudinibus. Con-

Ps. 50.

Cap. 14.

Cap. 22.

suetudo vitij est, vt non facîle videatur ab eo, qui eo premittitur: sed mox vt cessauerit, & ab illo se alienauerit, tunc demum considerat in quanta miseria & fœditate iacebat.

De secundo Mirabili.

3. Compertum est in scientia Perspectiua, quòd si quis oculo supponit digitum, & à situ debito pellit eum, propter motum factum in oculo, vnum sibi videbitur esse duo.

Sic contingit interdum Prælati moderni temporis, qui dum per institutionem mali consiliarij, à rectitudine depelluntur, iudicant aliquem dignum beneficio duplici, quem tamen vnico tantum contentum esse debere sentirent, si iudicio non errarent. Hoc autem plerumque per malum consiliarium committitur, qui ratione discretionis, quâ pollere creditur, non vtitur. Per digitum designatur malus consiliarius, qui suis malis exhortationibus, quasi quibusdam impulsibus, sæpè præcipitat in errorem; dum extortis autoritatibus & Tyrannorum Exemplis persuadet, quòd potenti, seu Principi, cuncta licent; quæ placent Principi, cuncta licent; quæ placent Principi, legis habent vigorem. Exemplificat v. g. Quis Tyrannus domesticum aut familiarem suum in aliquam Ecclesiam sine electione intruserit; quis in prouincias collectas induxerit; quis clerum pessumdederit; quis tandem in subditos, suæ voluntati executionem & libito licitum adæquaueris.

Sic volo, sic iubeo, sic pro ratione voluntas.

4. Et sicut malus consiliarius Reges peruertit, & Principes; sic etiam interdum ipsos Pontifices, & ceteros Ecclesiæ præfidentes. Si enim Prælati de alicuius indigni promotione rogatus, defectum opposuerit ob quem ritè promoueri non possit; assistens malus consiliarius, quidquid oppositum fuerit, concurrentibus exemplis & PP. sanctionibus annullabit. Si enim obiectum fuerit, ignobilis est; respondebit: sed nec Petrus vertex Ecclesiæ, gloriatur alicubi de sanguinis claritate. Si dicatur, quod iunior est; Ieremiam & Præcursores Domini, pueros fuisse respondebit; & iterum seniores condemnatos à Daniele puero allegabit. Illiteratus est, nec vnquam fuit causa studij Parisiis, nec in alia ciuitate; respondebit, nec scholas leguntur Apostoli frequentasse. Elinguis est; sed Aaron, vt legitur in Exodo, vite Moyse, qui erat impeditioris linguæ, functus est sacerdotio. Luxuriosus est, & lupanaria frequentauit; sed & Oseas Propheta sibi meretricem mandato Domini copulauit. Insuper; sed per insipientiam mundi decreuit Deus saluare credentes. Percussor est, & arma portauit; sed & Petrus gladio, serui Principis sacerdotum auriculam amputauit. Vinolentus, & gulæ deditus est; sed & Dominus ipse potator vini, & vorator carniū legitur esse dictus: non est autem seruus maior domino suo. Non acquiescit maioribus, nec vult eis in aliquo obedire, sed & Paulus legitur Petro & Apostolorum Principi in faciem resistisse

Mat. 11.

Gal. 2.

tisse. Contentiosus est, & pacis turbator; sed inter discipulos Christi facta est contentio, quis eorum videretur esse maior. Militiam armatam exercuit; sed & Martinus aliquando sub Iuliano militauit. Homicida est, & sanguinem effudit; sed & Moyles Ægyptium interfecit. Perfidus est, & pluries periurauit; sed & Petrus Apostolus perfidiam periurio copulauit. Mutus est, & prædicare non poterit; sed hoc Zachariam à sacerdotio non exclusit. Cæcus est; sed & Paulus erat excæcatus, quando fuit ab Anania Baptizatus & Domino consecratus. Surdus est; sed hoc ei non prohibet prædicare legem Dei: prædicatorem enim, non auditorem quærimus; & tanto verbum Dei proponet altius, & quasi tuba exaltabit vocem suam in prædicationibus; quia adhuc ei videbitur quòd in aure loquatur. Persona est despicibilis; sed & hoc idem B. Martino Defensor obijcit, ipsum tamen Ecclesia non audiuit. Agrotatius est; sed & Gregorius in summo languore stomachi, optime Ecclesiam Domini gubernauit. Superbus est & vanus; sed talis fuit Brixius Turo-nensis Episcopus. Hæresim quoque docuit; sed Augustinus Manichæum se fuisse asserit. Persecutus est Ecclesiam Dei; sed & Paulus prius persecutor, postmodum factus est prædicator. Auarus est, sit poterit congregare dispersa, & inutiliter non distrahet congregata. Postremò, si Prælatus obiecerit, quòd ad omnia prorsus ineptus sit; adhuc malus consiliarius respondebit, sed & Samson cum mandibula asini Philistæos expugnauit. Potens est autem Deus, etiam nunc sicut in illo tempore, de lapidibus filios Abraham suscitare.

5. Vides igitur, quàm potens sit ille digitus, nempe malus consilia-rius, vt perluasionum suarum impulsione, speculatoris, id est, Præ-lati oculum errare faciat in videndo, & eius iudicium peruertendo. Et ad hoc quidem tanto efficacior inuenitur, quanto discretior reputatur; itant & de ipso dicatur, *Digitus Dei est hic*. Talis erat Achitophel per-^{Exod. 3.} uersissimus consiliarius Absalonis; de quo tamen dicitur. *Consilium Achitophel quod dabat in diebus David, quasi consilium Angeli Dei*. Quid ^{2. Reg. 16.} autem est hoc aliud, quàm dicere, *Digitus Dei est hic*? Ideò dicitur. *A consiliario malo serua animam tuam*. Et David orabat; *Domine custodi* ^{Ecc. 37.} *animam meam à labijs iniquis, & à lingua dolosa*. Hoc etiam debet ^{Pf. 119.} Prælatus orare, & à Domino postulare.

6. Non solum autem per malum consiliarium decipitur dicto modo Ecclesiasticus oculus, id est, Prælatus; sed etiam interdum acceptione munerum, quæ à loco suo quodammodò rationis oculum propellunt. Vnde & eum, qui iam recepit munera, vulgariter dicimus, *esse pulsatum*; & idèd peruerit iudicium. Isti sunt digiti, de quibus ait Isaias. *Digiti Cap. 59.* *uestri, pleni sunt iniquitate*. Idèd non est mirum, si faciunt rationis oculo ab æquò iudicio declinare. Tria namque præ cæteris solent peruertere iudicium; videlicet credendi facilitas; acceptio personarum; amor munerum. Idèd in Deuter. dicitur. *Munera excæcunt oculos iudicium*. Et de C. 16. filiis Samuelis. *Acceperunt munera, & peruerunt iudicium*. Et Poëta dicit. *Reg. 3.*

BBbb

Galte-

rus l. 1.

Alexan-

dreidos

Ps. 25.

Laudat

hinc

eum S.

Bern. l.

3. de

confid.

esp. 3. &

Joan.

Sarisb.

l. 5. po-

lycr. c.

15.

lib. 4. de

confid.

c. 5.

*A norma recti munus distorquet acumen
Iudicis, & terra inuoluit caligine mentem.*

Et ideo dolendum, & lugendum est, si contigerit (quod Deus auerrat) ut Prælati qui sunt sæculi iudices, diligant munera, sequantur retributiones: si subditos concutiant, ut loculos excutiant: si, ut repleant suos, exinaniant alienos: ut possit dici de eis, *In quorum manibus iniquitates sunt; dextera eorum repleta est muneribus.*

7. Excutiant ergo Prælati Ecclesiæ, manus suas ab omni munere, si volunt in iudicio non errare: exemplo Eugenij, qui nullum omnino munus recepit ab homine litigante; aut ab eo, cui litem crederet, munere accipi voluit. Vnde & cuidam Priori, qui modicæ facultatis erat, cuius causam nondum audierat, & sibi marcam auri deuotissimè offerebat, non sine magna indignatione fertur dixisse; nondum ingressus es domum, & iam vis corrumpere dominum? Refert etiam S. Bernard, quod Martinus Presbyter Cardinalis, cum à legatione pauper contra morem rediret, & ab Episcopo Florentino equum sibi necessarium accepisset, eundem donatori restituit, ex quo datorem muneris causam in Romana Ecclesia ventilandam habuisse cognouit. Decepisti me, (inquit,) nesciebam tibi imminere negotium; Tolle protinus equum tuum. Ecce verbum hominis acceptionem munerum detestantis. Gaudfridus etiam Carnotensis, legatione fungens in Aquitania, nulla recipiebat munera, sed ut stercorea contemnebat: Piscem quoque magnum, sturcionem videlicet, à deuoto quodam legationis suæ Clerico, accipere tunc tandem acquieuit, postquam pro admissio xenio, pretium numerauit.

8. Si sic facerent moderni Prælati, tunc diligerentur ut patres; timerentur ut domini; colerentur ut Sancti. Si exactionibus parcerent, munera non amarent, nec omnem quæstum pietatem putarent: Sed hodie in domibus multorum Prælatorum & Principum, omnia sunt venalia, regnante ibidem auaritia. Nam

*Cum semel obtinuit vitiorum mater in aula,
Pestis auaritia que sola incarcerat omnes,
Virtutum species, spreto moderamine iuris,
Curritur in facinus, nec leges curia curat.*

Frustra apud eiusmodi curiales, de testimonio tuæ confidis conscientiæ. De morum etiam venustate, nisi paraueris viam munere præcedente; Ouidius:

*Ipse licet venias Musis comitatus Homere;
Si nihil attuleris, ibis Homere foras.*

In multis Curijs inuenies ianitores Tricerbero duriores: Sed apud Inferos, tantum dicitur vnus esse Tricerberus; hic autem tot sunt Tricerberi, quot sunt Ostiarij. Totam familiam aut mordentem inuenies, aut latrantem. Et sicut dicitur à Michea. *Si quis non dederit in ore eorum quidpiam, sanctificant super eum bellum.* Sed,

Audito nummo, quasi viso Principe summo

Diffiliunt valua, nihil auditur nisi salua.

Legitur de sancto Anselmo, quod ab omni munere manus suas excutens, acceptores munerum vt detestabiles fugiebat: quibus etiam ipse dicebat; *prehendere & pendere*, non differunt nisi vna littera tantum. Vnde patet quod qui munera libenter accipit, valde est proximus suspensio, nisi ea acceperit bono modo. Super omnia vero quisque cauere debet vt iniquorum munera non accipiat; ne, aut ingratus, si eos non foueat, accepto munere censeatur: aut, si foueat, iniustus habetur.

In vita S. Edmundi mundi tuar. Episcopi refertur ex S. Edmundi Exam-

plum tamen sinceritatis S. Anselmi hac in parte habetur l. 3. Epistol. 20.

De tertio Mirabili.

De discussione peccati & duplicis pœnæ.

9. Apud Perspectiuos expertum est; quod si quis de nocte virgam, vel digitum, vel quamcumque rem aliam, quæ umbram faciat, eleuet inter oculos & candelam; si tunc rectè candelam respiciat, videbitur ei de vno digito quod sint duo. Et in hoc aduertendum est diligenter; quod, si claudatur oculus dexter, disperebit imago sinistra; & clauso sinistro, imago dextra penitus euanesceat: Super quo plurimum admiratus est Augustinus. Vnde dicit, longum esse causam apparitionis huius declarare; & verè longum est homini perspectiuam scientiam nescienti.

lib. 11 de Trinit. c. 12.

10. Modo consimili, si peccator existens in nocte peccati, peccatum suum considerationis oculis anteponat, & ad lucernam aspiciat, scilicet ad verbum Dei de quo in Psalmo; *Lucerna pedibus meis verbum tuum*, videbit peccata singula quod pœnæ correspondentiam quodammodò duplicari. Poterit ad hanc lucem aspicere, pro peccato vnico se pœnam duplicem incurrere; videlicet amissionem cælestis præmij, & reatum supplicij sempiterni. Ita quod dextro oculo, quo bonum operari debebat, reatus supplicij tanquam imago sinistra respondeat, sinistro autem oculo, quo malum vitare debuit, velut dextra imago respondeat cæleste brauium, quod amisit. Ad hoc mirabile, vel potius miserabile speculandum, monetur peccatrix anima per Ieremiam, *Videte quia malum est, & amarum, dereliquisse Dominum Deum tuum*. Dominum relinquare, nihil aliud est, quàm peccare: quod quidem, licet vnico actu committatur, ipsum tamen peccatum pœna gemina comitatur: est enim malum quoad priuationem visionis diuinæ, & amarum, propter acerbitatem infernalis pœnæ. Et quia illud mirabile clare patet, si quis ad lucernam verbi diuini consideret; ideo signanter sequitur in eodem Propheta *videte verbum*: vt scilicet valeatis prædictum spectaculum intueri.

Ibid.

BBbb ij

De quarto Mirabili.

Quod Prælati cauendum sit à malo exemplo vel scandalo.

11. Exponitur etiam in dicta scientia, quod baculus cuius pars est in aqua, & reliqua est super aquam prominens, oculo existenti in aëre fractus apparet. Cuius causa redditur: Nam ibidem probatur, quod res quam in aqua conspiciamus propinquior apparet visui, quam si esset extra aquam. Quare licet quod est in aqua sit continuum & directum, cum parte alia baculi extra aquam positi; tamen videtur esse ipsi oculo propinquius; & ideo videtur baculus esse fractus.

12. Sic contingit interdum quod aliquis, qui secundum veritatem est vir iustus, rectus, ac timens Deum, si fortassis aliquando ob causam aliquam vtatur deliciis huius mundi, quæ mundanorum oculo sunt propinquæ; quamvis non totaliter se immergat fluxui deliciarum huius mundi, sed solum ex parte; quia fortassis hoc facit non propter mentis petulantiam, sed propter recreationem corpori necessariam; nihilominus quandoque scandalizat plurimos hæc videntes; & à vulgo iudicatur spiritualiter fractus esse, & à morum rectitudine obliquasse. Et de huiusmodi possumus exponere quod Saul de Dauid legitur dixisse, *dabo ei Michol, ut fiat illi in scandalum*. Michol interpretatur *aqua omnis*, & fluxum significat deliciarum carnalium, quibus si quispiam vir perfectus per Dauid significatus per amorem se copulet; in scandalum vertitur plurimorum.

13. Et ideo viris perfectis à dissolutionibus & apparatus est cauendum, propter scandalum aliorum vitandum. Quod attendens Apostolus qui ad imitationem sui alios hortabatur, dicebat. *Videte autem ne forte hæc licentia vestra, (scilicet comedendi carnes idolis immolatas,) offendiculum fiat infirmis. Si enim quis viderit eum, qui habet scientiam, in idolis recumbentem: nonne conscientia eius, cum sit infirma, edificabitur ad manducandum idolothyta! & peribit infirmus in tua scientia frater, propter quem Christus mortuus est? & subdit Apostolus. Si esca scandalizat fratrem meum: non manducabo carnem in æternum, ne fratrem meum scandalizem.* Sciebat enim Apostolus, quod facta maiorum facile à subditis trahuntur in exemplum. Superiores namque, quanto locum tenent inter homines celsiorem, tanto plurium patent aspectibus: & ideo superiori subditus studet esse conformis: vnde dixit Claudianus.

De 4.
Honor.
Consul.

*Regis ad exemplum totus componitur orbis,
Mabile mutatur semper cum Principe vniuers.*

*De quinto Mirabili.**Quòd peccata carnalia, magis infamia sint quàm spiritualia.*

14. Probatur in scientia Perspectiua, quod ea, quæ videntur in aqua, oculo videntis videntur maiora: & interdum aliqua quæ oculis non poterant intueri, possunt aquæ superinfusione videri. Et hoc potest quilibet sensibiliter experiri. Si enim denarius in scutella ponatur, sumatur quoque distantia, in qua minimè videatur: eodem existente spatio inter videntis oculum, & scutellam, denarius videri poterit, si aqua de super fundatur.

15. Modo consimili, videre possumus quod peccata carnalia quæ in fluxu carnalium deliciarum committuntur, oculis hominum maiora videntur. Sunt enim maioris infamiæ, quàm peccata spiritualia, iquamuis minoris sint culpæ: & viæ valent finaliter occultari: & plerumque, cum peccatores peccatis carnalibus irretiti, peccatum suum putant ab aliis non videri, prodit in publicum & fit manifestum. Vnde cum Dauid peccatum cum Bersabee commissum, cunctis crederet occultatum, missus est ad eum Nathan Propheta, vt diceret ex parte Domini: *Tu fecisti abscondit; ego autem faciam verbum istud in conspectu omnis Israël, & in conspectu Solis huius.* Et hoc est, quod Dominus talibus comminatur. *Renelabo pudenda tua, in facie tua, & ostendam gentibus nuditatem tuam, & regnis ignominiam tuam.*

2. Reg.
12.
Isaie
47. &
Nabum
3.

*De sexto Mirabili.**Quod mundus reputat prosperum, coram Deo esse aduersum, & è contrario.*

16. Oculo respicientis in speculo facies apparent preposteræ & altitudines videntur euersæ. Iudicat enim oculus dum res cernit in speculo, quod dextrum est, esse sinistrum; & quod est inferius, esse superius; & quod est deorsum, esse sursum.

Sic & nostræ considerationis oculus, si secundum doctrinæ sanctæ speculum de rebus iudicat, ea quæ videntur sinistra, id est aduersa; dicet ea esse dextra, id est prospera: & etiam è conuerso, vtilitatem aduersitatis, & prosperitatis periculum attendendo. Ea etiam, quæ sursum videntur, asseret esse infima, & è conuerso: id est, superba esse vilia, & humilia pretiosa: idè dicitur signanter per Isaïam *dicam Aquiloni*, (id est, aduersitati,) *da;* & *Austro*, (id est, prosperitati,) *noli prohibere*: quia ea, quæ videntur aduersa, sunt prospera, & dant nos Deo: & quæ videntur prospera, sunt aduersa, & prohibent nos à Deo.

17. Et idè legitur quòd Patriarcha Iacob benedicturus filios Ioseph, *Gen. 48.*

BBbb iij

manibus cancellaris sinistram manum posuit super Manassem, qui erat in dextera; & dexteram super Ephraim, quem Ioseph collocauerat in sinistra. Timeant ergo diuites huius mundi, qui gaudent tenere dexteram in presenti, ne sinistram teneant in die iudicij, & nunc etiam in presentia Dei. Manasses enim, qui interpretatur *obliuio*, & significat diuites, qui Dei sunt immemores, positus est ad sinistram: pauperes enim posuit Dominus ad dexteram; sed malos diuites ad sinistram. Ideo dicitur in Proverbiis. *Longitudo dierum* (id est, pauperes, qui diuitibus viuunt quàm diuites;) *in dextera eius; & in sinistra illius, diuitie, & gloria.* (Id est, diuites, & gloriosi in dignitatibus constituti.) Hoc idem Iacob in cancellatione manuum signauit, & Angelus in impositione pedum, Ioannes enim dicit: *Vidi alium Angelum fortem descendentem de caelo, &c. & posuit pedem suum dexteram, super mare. sinistram autem super terram.* Per mare namque fluctus aduersitatis, per terram sæculi prosperitas figuratur. Vt igitur Angelus aduersitates sæculi prosperitates esse ostenderet, dextrum pedem posuit super mare: sinistrum verò super terram; ut quod mundus reputat prosperum, significaret aduersum.

28. Idem nobis in imagine Crucifixi monstratur, quæ tanquam liber laicorum in Ecclesiis eleuatur: Hic enim dexteram manum ad Aquilonem porrigit, sinistram autem ad Austrum extendit. Per Austrum ergo prosperitas, per Aquilonem significatur aduersitas. In quo etiam aduertendum est, quòd imago B. Virginis, ad Aquilonem sub dextra Crucifixi est posita, quia B. Virgo aduersitatibus in presenti vita fuit exposita. Vnde & Iustus Simeon dixit ei: *Tuam ipsius animam pertransibit gladius*, quam tamen supra omnes à Deo dilectam scimus, & nunc ad Dei dextram exaltatam. Dominus enim charos suos, in presenti aduersitatibus & pressuris exponit, quos tandem in dextra gloriæ collocare disponit.

19. Sic igitur ad sacræ Scripturæ speculum oculos dirigendo, videntur nobis dextra sinistra, & è conuerso: nihilominus apparebit, quod deorsum creditur, esse sursum, & è conuerso. Nam scriptura beatificat, & exultat pauperes, cum ait. *Beati pauperes spiritu.* Potentes autem & diuites, miseros & deiectos dicit. *Agite nunc diuites plorare ululantes in miseriis vestris.* In hoc speculo non respexit qui dicebat: *Vidi seruos in equis, & Principes, quasi seruos, ambulantes super terram.* Qui enim Principes reputantur, reuera serui sunt, multis miseriis, & calamitatibus mancipati. Refert Valerius Max. de quodam Rege sublevis iudicij, qui traditum sibi diadema, priusquàm capiti imponeret, diu considerauit, & dixit, o pannum magis nobilem quàm felicem quem si quis cognosceret, quam multis sollicitudinibus, periculis, & miseriis sit refertus in humi quidem iacentem releuaret. Bene iste, quod multis hodie videtur superius, inferius iudicauit.

*De septimo Mirabili.**Quod S. Scripturam directe videt, qui eam opere complet.*

20. Demonstratum est etiam in præfata scientia, quod oculus debilius apprehendit rem quam videt in speculo, quam si eam cerneret aspectu directo. Eo quod formæ reflexæ debiliores sint, & ideo debilius representant. Et hinc est, quod homo, suæ formæ, quam pluries videt in speculo, vix & tenuiter recordatur, & melius imaginatur alterius hominis faciem, quam aliquoties directe respexit, quam suam, quam nunquam directe, sed in speculo sæpè vidit.

Sic & moraliter applicando, per faciem intelligo diuinam legem. Nam sicut in facie hominis interna voluntas penditur, iuxta illud; *Oculus in facie hominis legitur secreta voluntas*: sic & nobis Dei voluntas in lege diuina monstratur. Et sicut facies testificatur de homine iuxta illud Ecclesiastici, *ex visu cognoscitur vir, & ab occurssu facies, sensatus*. Sic & Scriptura sacra testificatur de Christo, vnde & ipse Dominus dicebat. *Scrutamini Scripturas, &c. ille sunt quæ testimonium perhibent de me.*

Oculus voluntatis speculum. Cassiod. l. de anim. m. c. 16.

21. Hanc faciem diuinam, id est, Scripturam sacram ille directe videt, qui eam opere complet, & sic eam memoriter retinet. Qui verò eam solum audit, & eam non perficit, quasi in speculo eam cernit, & hic eam statim obliuioni tradit. Et ideo dicitur. *Estote factores verbi, Jacobi & non auditores tantum, fallentes vosmetipsos, quia si quis auditor verbi Dei est, & non factor; hic comparabitur viro consideranti vultum naturitatis suæ in speculo: considerauit enim se & abiit; & statim oblitus est qualis fuerit.* Et ideo qui vult in sacra doctrina proficere, & vsque ad habitum scientiæ peruenire, studeat quod in ea legit, operibus adimplere. Et ideo David sapientissimus inter tres, ostendens qua via ad sapientiam perueniret, dicit, *Super senes intellexi, quia mandata psalm. tua quasini.* Et iterum. *A mandatis tuis intellexi,* dicit Glossa, quod *id.* per obedientiam mandatorum venit ad sapientiam occultorum. Prius igitur debet homo exercitari in studio bonitatis, quam in studio contemplandæ veritatis. Hæc enim duo studia sunt coniuncta, nec debet homo vnum ab alio separare, vt scilicet studeat sapientiæ, & non bonæ vitæ. Studium tamen bonitatis debet præcedere studium veritatis. Vnde Psaltes. *Bonitatem, & disciplinam & scientiam doce me.* Et ideo si *ibid.* gnanter versus, *Beati immaculati in via qui ambulant in lege Domini,* præcedit versum qui statim sequitur. *Beati qui scrutantur testimonia eius.* Idè dicitur in Ecclesiastico. *Fili concupiscens sapientiam, conserua iustitiam, & Dominus præbebit illam tibi.*

cap. 19. Ioan. 5.

psalm. id.

ibid.

cap. 2.

De octauo Mirabili.

De Trinitatis & Vnitatis veritate.

22. Apud Perspectiuos expertum & vulgatum est, quod si oculis in speculo in aqua posito solem aspiciat, apparent oculo duo soles: Ad quod quidem spectaculum, quasi tres soles videntur concurrere; vnus videlicet existens in celo, & duo procedentes ab ipso, id est, duæ solis imagines in aqua & speculo apparentes, & tamen scimus secundum rei veritatem, tantum vnicum esse solem. Modo consimili, si in aqua sapientia salutaris, oculo fidei, solem iustitiæ contemplari fuerimus, apparebit nobis Deus trinus, & vnus. Vnde statim in exordio diuinæ Gen. 2. sapientia, introducit Deus dicens, *Faciamus hominem ad imaginem & similitudinem nostram*. Dicens enim *faciamus*, & *nostram*, pluralitatem personarum ostendit; dicens vero *ad imaginem* demonstrat essentia vnitatem. Innumera quoque testimonia hanc ineffabilem vnitatis atque Trinitatis ostendentia veritatem, patere possunt sacras litteras intuenti.

Id autem in iam dicta similitudine consideratione dignum existimo, quod cum in speculo duplex resulter imago; circa alteram illarum plures Perspectiuorum leguntur errasse, putantes alteram illarum esse solis imaginem, reliquam verò esse alicuius stellæ propè solem (vt existimant,) collocata, quod tamen falsum est & erroneum. Non enim est stella, quæ apparet; sed est duplex solis imago à duplici reflexione speculi, vt habetur alibi demonstrari. Modo consimili, circa tertiam in Trinitate personam, id est, Spiritum sanctum quamplures leguntur Exod. 8. errasse, in cuius rei designationem Magi dicuntur in signo tertio defecisse.

De nono Mirabili.

Quod Deus est speculum sine macula.

23. Probatum est in scientia Perspectiua quòd oculus existens in centro concaui sphaerici speculi, si respiciat speculum, videt se tantum. Vnde si totum calum esset speculum, oculus existens in centro, si calum respiceret, solummodò se videret, quod sic probatur: Cur enim res extra centrum posita, habeat radios supra superficiem speculi cadentes obliquè, cum etiam sint æquales anguli reflexionis & incidentia; sequitur vt radij non in ipsum centrum, sed ad partem oppositam reflectantur.

Circum-
fertur ex
Trinitate
gisse.

Sic etiam suo modo est videre in Deo: vt enim dicit Alanus, Deus est sphaera intelligibilis. Cuius centrum est vbique: Et etiam speculum sine

sine macula, vt dicitur Sapientia septimo. Diuinus igitur oculus, quasi in centro omnium existens presentissimus, cum omni rei sit intimus; in seipso tanquam in speculo seipsum tantum intelligit per seipsum; alia vero à se non debet in seipsis cognoscere. Nam sicut dicit Philosophus, eius vilesceret intellectus. Sed ea cognoscit, & intelligit in seipso, in quantum est exemplar omnium, in sua essentia idealem continens similitudinem singulorum.

12. Metaph. 1.
51.

De decimo Mirabili.

Quod corpore praeuati, Diuinam essentiam videre non possunt.

24. Probatur etiam iam dicta scientia, quod res existens in centro speculi sphaerici concaui, ab oculo extra centrum posito respiciente speculum, non videtur.

Sic quandiu in hac vita incolatus noster prolongatus est, & mole carnis oppressi, à Deo distamus, videre diuinam essentiam non valemus. Vnde & Moyse vt diuinam faciem videret oranti, respondit Dominus, *Non poteris videre faciem meam: non enim videbit me homo & uiuet.* Cum autem sic cucurrerimus vt comprehendamus, & impletum fuerit quod dicitur. *Qui adheret Deo, vnus spiritus est cum eo;* quando etiam Deus erit omnia in omnibus, tunc non iam extra centrum, sed quasi in centro diuinæ stabilitatis positi, & vnum quodammodo cum Deo per amorem effecti, *videbimus eum sicuti est.*

Exodi. 33.

1. Cor. 6.

1. Ioan. 3.

De undecimo Mirabili.

Quod scientia discernendi peccata, Prelatis sit necessaria.

25. Probatur est in scientia sepe dicta, quod rei visæ sub fractis radiis, certificari non potest quantitas: potest autem si videatur per rectas lineas, vt patet de re aliqua quæ nunc videtur in aëre, nunc in aqua.

Modo consimili peccatum potest certitudinaliter apprehendi secundum gradum propriæ quantitatis ab eo qui peccatum directè respicit oculo rationis. Hoc autem modo doctor aliquis, vel quicumque alius studiosus peccatum respicit, qui veritatem in singulis speculando de peccatorum gradibus agnoscendis considerat, vel inquirat. Sed hæc quidem notitia Prelatis est necessaria, qui tenentur habere scientiam discernendi inter lepram & lepram, vt dicitur in Leuitico. Peccator autem, quando peccatum committit, culpam non directè, sed quasi per fractam lineam respicit, seu obliquè. Non enim respicit ad ipsam peccati deformitatem seu malitiam, sed potius ad delectationem annexam, quia secundum Dionysium nullus ad malum respiciens, facit, quod facit. Vnde & Philosophus dicit in Ethicis. *Omnis malus ignorans: quia sci-*

cap. 13.

cap. 4.

dju.

nom.

3. Eth.

c. 1.

CCcc

licet ignorat in eligendo, dum peccat; & hoc plerumque contingit quod doctor aliquis legens seu determinans de quantitate peccati alicuius, iudicabit rectissime, eo quod tunc respicit ad peccatum directe. Postmodum verò ingruenti tentationi succumbens, errabit in eligendo quod prius reprobrauerat in docendo: idque ideo, quia tunc respicit indirecte peccatum.

Vtinam nostri Theologi in culparum quantitibus metiendis, sic haberent rectum iudicium in eligendo, sicut recte iudicant speculando: quod quia non habent, ideo fortasse contingit quod inveniuntur ad operandum desides, licet sint ad discernendum feruentes. Pulchre semel confutauit Parisiis, quorundam Theologorum multitudinem quidam stultus. Quæro (inquit) à vobis omnibus, quid horum est melius, facere quod scit homo, vel addiscere quod nescit? tunc illis super iam mota quæstione disputantibus, & pro, & contra arguentibus stultus eorum audienti altercationem, tacebat, expectans ut videret finem. Tandem conclusum est & probatum quod melius est facere, quod homo iam nouit, quàm discere, quod non nouit; quia, sicut Apostolus dicit, *Non auditores legis tantum, sed factores iustificantur*, Et Isidorus dicit, Lector strenuus plus ad implendum quæ legit, quàm ad sciendum est promptissimus: minus enim peccatum est nescire quid competat, quàm, ea quæ noueris, non implere. Ergo, (inquit stultus,) omnes estis dementes, qui tantum die nocteque laboratis ut discatis, quod nescitis, & non curatis opere implere quod scitis.

Rom. 2.
Lib. 3. de
summo
bono c.
8. n. 6.

De duodecimo Mirabili.

Quod tollatur iudicium visus hominis circa pauperes & diuites.

27. Probatur etiam in scientia Perspectiua quod res visa maior quàm sit secundum veritatem, apparet oculo existenti in medio rariori. E contrario contingit posito in medio densiori: unde oculo existenti in aëre, rem visam, in aqua existentem maiorem necesse est apparere; minorem autem oculo in aqua defixo, & re visa in aëre collocata.

Modo confimili plerumque contingit, quod pauper aliquis existens in arido paupertatis, cum videt aliquem mundanis opulentis affluentem, ipsum iudicat esse magnum. Vnde Psalmista, *Beatum dixerunt populum, cui hæc sunt*; sed fallitur in iudicio visus eius. Vnde dicit quidam Philosophus, Nemo eorum, quos fortuna sublimes facit, propter hoc magnus est. Sed isti tibi magni videntur, quia metiris eos cum basi sua. Nec enim granum milij magnum est, quamuis supra montem sit positum. Et Bernardus ad Eugenium. Nunquid quia summus Pontifex, ideo summus?

Psalm.
143.
Seneca
Epist. 76.
2. de
confid.
c. 7.

28. Econtrario qui mundanis diuitiis transitoriis est immersus, cum videt pauperem à mundanis diuitiis elongatum, reputat eum modi-

cum, cum reuera magnus sit apud Dei oculum, respicientem pauperem, & in iudicio non errantem. Vnde de Ioanne Bapt. dictum est. *Erit enim magnus coram Domino.* In oculis autem diuitum, pauperes minimi reputantur, vt possint dicere quod dixerunt exploratores. *Fi. Num. lios Enachim vidimus ibi; quibus comparati quasi locustæ videbamur.* 13.

29. Cum Magistrum Alanum Doctorem egregium, adhuc pauperissimum, quidam quodam discipulus eius, iam factus Episcopus inuitasset ad prandium, cernens inopiam. Miror (inquit) magister, non modicum: scholares vestri iam facti sunt magni viri, vnus est Abbas, alter Episcopus, alter Archiepiscopus; & vos estis in paupertate nihilominus derelictus. Alanus aliter sentiens, tanquam habens rectum iudicium, tale fertur dedisse responsum. Nescitis (inquit) quæ sit dignitatum perfectissima celsitudo, & veta hominis magnitudo. Non est enim magnum, esse Episcopum, sed esse bonum Clericum. Probatio. Ad vocem trium ribaldorum Canonicoꝝ, quibus dabitur eligendi potestas, fiet vnus Episcopus. Sed si omnes Sancti qui sunt in paradiso, & omnes homines existentes in mundo contra Deum & rationem concorditer dicerent, & vno ore, Martinus est bonus Clericus; non ideo Martinus esset bonus Clericus, sed adhuc in sua insipientia remaneret. Huius siquidem Episcopi oculus erat tanquam in densiori medio diuitiarum immersus, & Alanum esse modicum reputabat. Alanus verò è contra, eo quod in paupertatis medio positus esset, subtilius cernebat. Fertur etiam postmodum adieciſſe; Probo vobis, Domine Episcopo, quod pauper, est Rex & Dominus huius mundi; nam voluntati diuitis, quantumcumque potentis, mundus non obedit per omnia, dum timet perdere, quod habet; & vult acquirere, quod non habet: & in hoc voluntati eius mundus repugnat; quia veller, quod habet, non posse perdere; & quod non habet, iam acquisiuisse. Pauper autem habet mundum prorsus voluntati suæ obnoxium: Cum enim contemnat diuitias, nihil optat acquirere; & cum nihil habeat, nihil timet perdere. Et ideo verum est quod Fortunatus ait.

Pauper in angusto regnat, habendo Deum.

Et Seneca loquens de Diogene diuitiarum maximo contemptore, qui Alexandro offerenti sibi munera sic respondit. Tolle (inquit,) non sunt hæc munera hominum, sed onera iumentorum. De hoc inquam Diogene præclare ait Seneca. Potentior erat Diogenes Alexandro Macedone omnia possidente; plus enim erat, quod ille noller accipere, quam quod iste posset dare.

30. Ista tamen visus deceptio mentes potentium & diuitum hodie sic inuasit, vt apud eos nihili reputetur, nisi vel diues fuerit, vel saltem diues secundum apparentiam æstimetur. Refert etiam Stobæus, quod cum quidam Philosophus, fuisset in ingressu curiæ cuiusdam Regis repulsus, tandem considerans illud Poëticum.

Curia pauperibus clausa est; dat census honores.

*Lib. 8.
carm. de
Senatu
curiæ
cæli.
Lib. 5. de
benef. 6.
6.*

*Ouid. 2.
falso.*

Pretiosis ornatus vestibus admissus est, & mox aditus paruit venienti. Ingressus autem coram Rege, cepit vestes suas venerabiliter osculari; Tunc Rex admirans, cur hoc faceret, inquisiuit. Respondit Philosophus, ego me honorantem honoro: quia, quod virtus non potuit, vestis obtinuit: ô, inquit vanitas vanitatum, plus deferetur vestibus quam virtutibus; plus venustati, quam honestati! Scribitur in historiis Romanorum, quod Romani, qui viros magnificos deificare consueverant, disputauerunt in consilio vtrum Christus in numero Deorum esset recipiendus, cum tot miracula esset operatus. Et tantem definitum est, quod non deberet recipi; quia non haberet cultores, cum paupertatem predicauerit, quam omnes recusant, & quam vnusquisque conremnit.

De decimo-tertio Mirabili.

De seruanda humilitate in sublimitate.

- Lib. 7.
Persp.* 31. Docet Albategnius, quod stella, versus terram in Oriente vel Occidente locata, maior apparet oculo, quam cum fuerit ad celi medium eleuata. Modo consimili viri caelestes, quanto ad altiora dignitatum videntur ascendere, tanto seipsos per humilitatem paruificant, & tanto minores humanis aspectibus apparere nituntur, iuxta illud, *Quanto magnus es, humilia te in omnibus.* Eleganti metaphora posset dici de talibus, quod dictum est de Esther, *Fons parvus erexit in fluminem magnum; & in Solem, Lunamque conuersus est.* Isti namque etiam dignitate sint magni, dum non inde superbiunt, humilitate sunt parui; ac per hoc in Solem, Lunamque, quasi metaphoricè conuertuntur, quia instar luminarium caelestium exaltati, humiliores fiunt. Talis fuit Virgo Maria, quæ cum fuisset ad tantæ dignitatis fastigium, vt Dei mater fieret, exaltata, mox seipsam ostendens paruulam instar stellæ, se obtulit in ancillam; Et ideo vocamus eam congruè maris stellam.
- Lib. 1.
dialo.
c. 5.* 32. Refert Gregorius, de quodam qui vocabatur Constantinus, corpore quidem paruus, sed mente magnus; quod cum quidam, ei qui vt eum videret aduenerat, despectiuè dixisset, quod nihil hominis haberet; protinus vir Dei in eius amplexum, nimium lætus ruit, & eum ex amore feruentissimo, brachiis cepit stringere, & dulciter osculari; gratias ei referens, quod de se talia iudicasset; Tu (inquit) solus es, qui in me oculos apertos habuisti. Hic ad statum celi meriti, iam plenè conscenderat; & in hominum oculis, more caelestis syderis, paruus apparere volebat. Et sicut reputamus mirabile, quod stella cum ascenderit ad celi medium, minor appareat, cum tamen ad inuentis oculum, magis ascendat: sic etiam, quod aliquis tanto videri velit humilior, quanto fuerit in dignitate sublimior, reputamus mirabile, quia rarum. Rarò namque contingit, vt gradus honoris, tumorem non pa-

riat in animo praesidentis. Nam secundum Bernardum; non est magnum esse humilem in abiectione, sed magna prorsus, & rara virtus est humilitas honorata. Et, ut dicit Gregorius, Magnum est honorem non appetere, maius est oblatum respuere, maximum verò de habito non superbire.

CAP. VII.

De Instructione morali secundum XII. proprietates reperiās in oculo corporali.

Oculus est geminus, compari suo simillimus, colore diuersus, figura sphaericus, palpebris velatus, in capite collocatus, specierum visibilium receptiuus, non sui, sed alterius agnitiuus, iuxta gradus distantiae visibilium diuersimode cognitiuus, totius corporis directiuus, arcanorum mentis medicatiuus, post longuam vigiliam somnolentus.

I. De bono socialis vite.

2. Primò ergo, oculus est natura geminus; & hoc ideò, ut testatur Albatagnius, ut vnus fortificetur ex altero; & ut defectus vnus, per alterum suppleatur. Vnde & Bernardus Syluestri, metricè de oculis ait,

*Nonnihil est hos esse duos, si langueat alter,
Ut vite participis suppleat alter opus.*

*Lib. 1. de
micro-
cosmo.*

In quo nobis socialem vitam, exemplo sui, natura commendat. Sicut enim oculi, cum sint duo in eodem capite, vicissim se fortificant: Sic multæ personæ degentes collegio vno, mutuo se supportant. Ideò dicit Salomon, *Melius est esse duos simul quàm vnum: habent enim cuncta lumen societatis suæ.* Iuuant enim se quantum ad recessum à malo; ideò subdit; *Si vnus ceciderit, ab altero fulcietur. Vt Soli, quia si ceciderit, non habet subleuantem se.* Hieronymus ad Rusticum hoc refert exemplum. Vidi (inquit) in Ægypto adolescentem in quodam cœnobio, qui nulla abstinencia, nulla operis magnitudine, flammam poterat carnis extinguere; Hunc periclitantem pater Monasterij hac arte seruauit: imperat cuidam viro, ut minis & conuitiis insectaretur hominem: & post irrogatas iniurias, primus veniret ad querimonias. Vocati testes pro eo loquebantur, qui contumelias irrogauerat. Flere ille contra mendacium cœpit, & nullus pro eo stetit. Solus pater defensionem suam callidè opponere studuit, ne abundantiori tristitia absorberetur. Quid multa iam anno expleto, interrogatus super cogitationibus pristinis, an ipsum adhuc molestant; Papæ (inquit) viuere non

CCcc iij

Epist. 11. licet, & fornicari libeat? O (inquit Hieronymus) si solus iste fuisset, quo adiutore supertraheret? Ideo dicit Seneca, magna pars peccatorum tollitur, si peccatori testis afflatur. Vtilis est etiam socialis vita, quoad
 Prov. 9. conseruationem in bono. Salomon; *Frater qui adiunatur à fratre, quasi ciuitas firma.*

3. Legitur in vitis Patrum, quod quidam suæ salutis æmulus, quendam Patrem consuluit, quid horum sibi melius expediret, ducere scilicet vitam cremiticam, vel cœnobiticam. Cui pater noluit respondere verbo, ne pateretur calumniam; sed respondit exemplo. Iubet vt vas plenum carbonibus ignitis afferret; quod cùm ille mandatis obediens attulisset; pater ille carbonem extrahens, quem ignitissimum vidit, seorsum in terra locauit; vbi, cùm esset solitarius, non multo post extinctus est: Quod ille non intelligens, ait; Pater, quid sibi vult, obsecro, quod fecisti? Et ille, iam, (inquit,) si bene aduertisti, satisfactum est quæstioni tuæ. Ecce carbo, qui prius existens cum aliis, erat plus omnibus ignitus, est ab aëre frigido circumstante extinctus, quia mansit ab aliis separatus; reliqui adhuc igniti permadent, eo quod ex consortio mutuo, se in calore tenent. Sic homo manens in sancto collegio, confouetur in bono; solus autem existens, vel circumdatus prauorum consortio, qui in frigiditate sunt in peccato, facile tepescit, & extinguatur ignis charitatis in eo. Et hoc est quod dicitur in Ecclesiastico. *Si dormierint duo simul, fovebuntur; vnus quomodo calefiet?* In hoc ergo, quod oculus est geminus, commendatur nobis sancta societas, & amor mutuus. Et ideo discipulos tanquam nostros spirituales
 Lucæ 10. oculos, Dominus misit binos.

II. De secunda instructione morali, scilicet de stultis multa dicentibus & pauca facientibus, multum cognoscentibus & parum diligentibus.

4. Secundò, oculus suo pari debet esse simillimus; Monstruosum est enim, si vnus oculus sit maior quàm reliquus, vel si aliter coloratus. Hoc tamen monstrum possumus in multis videre. Nam, cùm in nobis sit duplex oculus, intellectus scilicet, & affectus; sunt quidam qui hos oculos habent in colore dissimiles, vnum dicentes, & aliud facientes. Alij verò eos habent in magnitudine inæquales; nam multa dicunt, & pauca faciunt; multum cognoscunt, & parum diligunt; multum student illuminationi intellectus, & parum illuminationi affectus. Illuminat veritas oculum intellectus, charitas oculum affectus. Virumque pariter illuminari petebat Dauid cùm dicebat; *illumina oculos meos.* Sed in multis sinister oculus est multum illuminatus, cùm dexter sit obscuratus, quia de Prælati Ecclesiæ legitur Prophetatum fuisse. *O pastor, & idolum, derelinquens gregem; brachium eius ariditate est sicca.*

bitur; & oculus eius dexter, obocatus obscurabitur. Dextrum oculum potius quàm sinistrum studet Diabolus homini erueri; quia hominem quoad spiritualia nititur excacare. Scit enim quodd, si homini eruerit oculum dextrum, ipsum ad pugnam spiritualem inutilem reddet.

5. Et hoc nobis figuratum est in eo quod legitur, quodd viri labes obfessi, dixerunt ad Naas Ammonitem. *Flabeto nos fœderatos, & seruiemus tibi;* & respondit Naas, *in hoc feriam vobiscum fœdus, ut eruiam omnium vestrum oculos dextros.* Naas interpretatur serpens, Ammonites comprimens, vel coangustans; & hostem humani generis representat, qui est serpens blandiens in suggestionem culpæ, comprimens in remorsu conscientia, coangustans in exactione pœnæ. Serpens iste vult nobiscum fœdus inire; vt dimisso sinistro oculo, id est cogitatione temporalium, eruat dextrum oculum, per quem significatur desiderium eternorum.

O quàm multi sunt hodie, qui clarè vident in temporalibus, & cæci sunt in diuinis! qui multum intendunt circa quæstiones, sed modicum circa mores. De quibus potest dici illud Iobi. *Paruit enim sterilem, & quæ non parit: & vidua non benefecit.* Per sterilem significatur intelligentia, quæ non parit, id est, non videtur: quia omne meritum in voluntate consistit. Per viduam intelligitur affectio, quæ in multis est vidua, dum Sponso suo cælesti non est per desiderium copulata.

7. Huiusmodi homines sunt monstruosi, qui vnum oculum, scilicet intellectum, habent adeo grossum, & magnum, quodd cum eo contemplantur Lunam, & stellas, cælum, & cursum planetarum & syderum, & distantiam totius terræ & climatum; vt de eis possit dici illud Zachariae. *Oculus eorum in vniuersa terra:* Sed alterum oculum, scilicet affectum, habent minimum, & ferè nullum; quia parum afficiuntur ad Dominum. Et illi possunt dicere illud Iobi. *Ad Deum stillat oculus meus.* Isti enim multa contemplantur de corporalibus, & caducis; sed parum cogitant de spiritualibus, & æternis. Vnde eorum oculus copiosè fluit ad mundum, sed parcè stillat ad Dominum quia minimè mouentur ad eum.

8. Item sunt similes Iacob, qui amori Lia prætulit amorem Rachelis: Rachel enim interpretatur *videns principium*, & significat speculatiuas scientias, quæ inquirent principia rerum & principia contemplationum. Lia verò interpretatur *laboriosa*, & significat virtutis exercitium: nam virtus est circa difficile & arduum.

9. Audiant curiosi, quid dicat Seneca. Vt quid te torques in illa quæstione, quam vtilius est contempsisse, quàm didicisse? Et idem ait. Si multum superesset ætatis, parcè dispensandum erat in necessariis; nunc autem, quæ dementia est, superuacua querere in tanta temporis egestate? Et Hugo de S. Victore. In lectione diuina prius debetis querere, quod mores vestros instruat ad virtutem, quàm quod sensum acuat ad subtilitatem: magisque velle præceptis Scripturæ infor-

1. Reg. 15.

Cap. 24.

Cap. 5.

Cap. 6.

Epist.

48. &

117.

Lib. de

instit.

Novitio.

mari, quàm questionibus impediri.

In eius
vita.

Lib. 5.
Confess.
c. 4.

10. Legitur de Beato Edmundo, quod mater sua eidem apparet, ipsum, quia studeret in figuris Geometricis arguit, & in dextra manu tres circulos habens unum intra alium, in quorum primo erat scriptum, *Pater* in alio *Filius*, in tertio *Spiritus sanctus*, dixit, fili charissime, talibus figuris intende. Qua visione perdoctus, relictis curiosis scientiis, ad sacre Scripturæ studium conuolauit. De hoc Augustinus, de Mathematicis scientiis loquens, ait; [Infelix homo qui scit illa; te autem nescit: Beatus autem qui te scit, etiamsi illa nesciat. Qui verò te & illa nouit, non propter illa beator, sed propter te solum beatus est, si cognoscens te, sicut Deum glorificet, & gratias agat, & non euanescat in cogitationibus suis. Sicut enim melior est qui nouit possidere arborem, & de usu eius tibi gratias agit, quamuis nesciat, vel quod cubitis alta sit, vel quanta latitudine diffusa, quàm ille qui eam metitur, & omnes ramos eius enumerat, & neque possidet eam, neque creatorem eius nouit aut didicit; Sic fidelis homo cui totus mundus diuitiarum est, & quasi nihil habens, omnia possidet inherendo tibi cui omnia seruiunt, quamuis nec saltem Septentrionis gyros nouerit; dubitare stultum est, quin utique melior sit, quàm mentor cœli & numerator syderum, & pensor elementorum & negligens tui, qui omnia in numero, & pondere & mensura disposuisti.]

III. Tertia instructio moralis de memoria mortis habenda quam mundiales despiciunt.

Lib. 5. de
animal.
gener.
c. 1.

11. Tertio, oculus in diuersis hominibus interdum est colore diuersus, & pro oculorum differentiis, variatur operatio visuæ virtutis. Vnde dicit Philosophus, quod habentes oculos nigros, sunt acuti visus in die, sed obtusi in nocte & habentes oculos glaucos, vident in nocte clariùs, quàm in die: vt in murilegis, & cæteris animalibus oculos glaucos habentibus, est videre.

12. Spiritualiter adaptando, oculi glauci, eo quod habent debilem spiritum & modicum humorem, sapientes huius mundi significant: In quibus humor gratiæ deficit, & virtus operandi torpescit. Et isti in nocte, quàm in die clariùs conspiciunt, quia totum sensum suum in terrena conuertunt. Qui in hoc, sunt sicut talpa, quæ sub terra sagax est, & astuta & sibi nouit diuerticula multa: Cum autem supra terram ascenderit, efficitur stupida, & omnem estimationem amittit. Sic & sapientes huius mundi, in terrenis & temporalibus sunt astuti, sed in spiritualibus sunt hebetes & ignari.

13. Illi vero oculos mentis habent nigros, in quorum oculis mortis memoria firmiter est impressa; & isti de nocte videre nequeunt, sed de die: quia tales non vident, id est, non approbant peccatorum opera tenebrosa, sed opera lucis, id est, opera virtuosa. Ideo dicitur in Ecclesiastico.

eleſtaſtico. *Memorare nouiſſima tua, & in eternum non peccabis.* De hac ſpirituſuali & laudabili mentis nigredine, Sponſus commendatur in Canticis, cū dicitur, *coma eius nigra, ſicut cornu.* Per comas, co-
 gitationes, eo quod ſint ſubtiles, & quaſi innumerabiles, designantur. *Cap. 7.*
Cap. 5.
 Tunc ergo nigra comæ capitis ſunt, cū eſt in mente iugis memoria mortis.

14. Hanc mortis memoriam antiqui commendaffe leguntur, verbis pariter & exemplis. Vnde dicit Seneca; Mors vbique te expectat, tu quoque, ſi ſapiens eris, eam in omni loco expectabis. Et idem ait in libro de moribus, multos vitam differentes, mors incerta præuenit. *Epist. 16.*
Num.
 Omnis itaque dies, velut vltimus ordinandus eſt. Vnde Poëta Hora-
 tius ait;

Omnem crede diem tibi diluxiſſe ſupremum.

Et alius dixit:

Semper habet memori mentē, neceſſe mori.

Et, ſicut ait Hieronymus, Pythagoras definiens Philoſophiam, ait, Philoſophia eſt meditatio mortis, quotidie de carcere corporis nitens animam educere in libertatem. Et, ſicut refert idem Hieronymus, Plato villam Academiam, in qua terræ motus frequenter accidit ſtudenti vſui dedicauit: & hoc ideo, vt terræ motu ſcholares territi, mortis memoriam haberent, & ſic à vitiiſ abſtinerent. Legitur etiam in hiſtoriis Romanorum, quod poſt coronationem Imperatoris, antequam quidquam aliud imperaret, intrabant ad eum ædificatores ſepulchrorum, ferentes in manibus quatuor genera marmorum diuerſorum & colorum, coram Principibus, Imperatori dicebant; de quo genere marmoris iubes, Imperator, tibi fieri monumentum? quo facto inſinuabant eidem, & vt mortem obliuioni non traderet, & vt imperium cum clementia gubernaret. *In apo-
 log. ad-
 uerſus
 Ruffinū,
 ſub ſi-
 nem.
 Lib. 2.
 contra
 Iovin-
 ante me-
 dium.
 Refer-
 tur in
 actis S.
 Ioannis
 Eleemo-
 ſynarij,
 huius
 fuiſſe
 vſum
 Impera-
 torum
 Orientis.*

15. Reuera, magna ſapientia conſiſtit in mortis memoria; ſicut enim initium humanæ creationis incepit à puluere, quia Deus creauit hominem *de limo terræ* (alia littera habet *creauit Deus hominem puluerem*;) Glorificationis etiam vltimæ principium, incipiet à puluere, quando pulueres corporum noſtrorum congregabuntur, & reformabuntur corpora glorioſa. Sic etiam principium ſpirituſualis creationis per gratiam, incipit à puluere; id eſt, à mortis conſideratione, in qua homo in puluerem ſuum reuertetur: Iuxta illud Pſalmi, *Auferes ſpiritus eorum, & deficient, & in puluerem ſuum reuertentur.* Et quia non vtilis eſt mortis memoria, ideo Dauid optans, vt ad eam ſemper haberet mentis oculum vigilem & apertum, orabat dicens, *Illumina oculos meos, ne vnquam obdormiam in morte.* *Gen. 2.
 Pſ. 103.
 Pſ. 12.*

IV. *Quarta instructio moralis de simplicitate
intentionis seruanda.*

16. Quarto, oculus est sphaericus seu rotundus: figura autem sphaerica, omnium figurarum est simplicissima, cum vnica linea sit contenta. Figuræ igitur oculi simplicitas, nos ad simplicitatem intentionis hortatur. Figuræ enim orbicularitas persuadet, vt in cunctis, quæ agimus, ad æternum brauium, intentionis oculum dirigamus. Hæc autem intentionis simplicitas, non solum significatur in figura oculi, sed etiam in modo videndi. Vt enim dicitur in libro de visu, quidquid videmus, sub angulo videmus; Ita quod vertex est in acie oculi, basis verò ad terminos rei visæ. In quo figuratur recta intentio, quæ omnes terminos cogitationum & affectionum nostrarum vnit in Deum, omnia referens in laudem Creatoris. Iuxta illud Pauli. *Sive manducatis, sive bibitis, &c. Omnia in gloriam Dei facite.* Idèd Dominus ad simplicitatem intentionis nos admonens, dicit. *Si oculus tuus simplex fuerit, totum corpus tuum lucidum erit, &c.* Ille autem habet simplicem oculum, qui in omnibus quæ agit, intendit honorem diuinum. Qui autem aliud intendit, infidelem Deo se esse ostendit: Et idèd aptè subditur, *Si autem oculus tuus nequam fuerit, totum corpus tuum tenebrosum erit.* Rectè Bernardus. [Fidelis reuera famulus es, si de multa gloria Domini tui, etsi non exeunte ex te, transeunte tamen per te, nihil manibus tuis adherere contingat. Talis fuit Ioab domino suo. Pugnans enim contra Rabath, cum iam esset capienda vrbs regia, misit ad Dauid, ne nomini suo adscriberetur victoria.

1 Cor. 9.
Matt. 6.
Serm. 13. in Cant.
2 Reg. 21.

17. Sed multorum oculus non est simplex, sed magis duplex, similis vetulæ, quæ si ad cælum leuet oculos, vt videat miluum, hoc facit amore pullorum: Sic multi, etsi aliquando operantur aliqua, quæ videntur cælestia, tamen intentionis oculo respiciunt ad terrena: Et idèd talium oculus non est simplex, sed nequam potius, & iniquus. Videmus quod isti balistarij volentes videre rectitudinem signi, vel cum balista sagittam rectè proicere, consueuerunt vno oculo clauso reliquum aperire. Sic & qui voluerit rectificare suum opus, vno vtatur oculo, vt eius intentio dirigatur ad vnum, quod est necessarium, videlicet ad Deum, dicens cum Augustino Domine, gloria nostra tu esto: Propter te amemur & verbum tuum in nobis: qui enim laudari vult ab hominibus, vituperante te, non defendetur ab hominibus, iudicante te; nec eripietur, damnante te. In signum huius consuevit Ecclesia in fine cuiuslibet Psalmi decantare, *Gloria Patri.* In Psalmo significatur operatio, quasi dicamus pro quolibet opere nostro; *Non nobis Domine, non nobis; sed nomini tuo da gloriam.* Bonitas enim scripturæ, scriptori debet attribui, & non pennæ. Idèd cum ipse opere, tur in nobis omnia, soli Deo sit honor & gloria.

L. 10.
Confess. cap. 36.
Ps. 113.

V. Quinta informatio de vitanda inani gloria.

18. Quintò, oculus palpebris est velatus. Ad hoc natura ingeniata est palpebras, vt oculum à nocuentis exterioribus præseruaret, & deperditioni spirituum visibilium obuiaret: nam, vt dicit Philosophus. Omne animal carens palpebris, est debilis visus, vt patet in piscibus, & leporibus, quorum oculi sunt semper aperti; & ideo fit in eis dispersio nimia spirituum, propter defectum custodiæ, seu velaminis palpebrarum. Lib. 2. de animal. part. 6. 13.

Modo consimili, qui bona sua non occultant, sed per inanem gloriam se ostentant, dum humanos honores appetunt; totum perdunt. Vnde Gregorius, [Deprædari desiderat, qui thesaurum publicè portat.] Et in vitis Patrum dicitur. Sicut thesaurus manifestus minuitur cito, ita & virtus qualibet, deperit publicata. Et quidam senex ait, si-
cut fieri non potest, vt herba simul nascatur, & fructificet; ita impossibile est, vt laudem & gloriam habentes sæcularem, simul etiam fructum capiamus celestem. In huius signum, manus Moysis sana consistit dum in sinu reconditur, leprosa verò est, dum exterius propagatur. Hom. 11. in Euang. Lib. 5. libello 9. n. 19. Exodi 4.

19. Legitur in Isaia quod cum Rex Ezechias per manum Isaia Prophe-
tæ signum incolumitatis à Domino recepisset, umbra horologii decem gradus retrorsum reuertente, cum umbra procedere soleat non redire; misit ad eum rex Babylonis nuncios, literas & munera deferentes; in quorum aduentu lætatus est Ezechias, & ostendit eis domum aromatum, aurum, & argentum, & totam congeriem suorum thesaurorum. Ad quem missus Isaia, ex parte Domini prædixit, hæc omnia in Babylonem auferenda. Signanter autem, cum Dominus Regi miraculum indulgisset, Babyloniorum nuncij cum muneribus dicuntur aduenisse, quia tunc præcipue quis sollicitatur à tentationibus immixtis à Dæmone, quando per admirabilem Dei clementiam, virtus eius clariùs innotescit: Tunc autem imprudentis est exultare, & thesauros bonorum suorum inaniter gloriando per iactantiam ostentare: & cuncta meretur amittere, quæ, ne perderet, debuit occultare. Cap. 10.

20. Audiamus de Magistro nostro Iesu Christo, qualiter nos instruxit super hoc oculorum velamine spirituali, verbo pariter, & exemplo: dicitur enim apud Mattheum. *Te autem faciente eleemosynam, nesciat sinistra tua, quid faciat dextera tua & sit eleemosyna tua in abscondito.* Quasi dicat, non admisceat se laudis appetitus, vel ostentatio operi tuo. Et ibidem, *Tu autem, cum oras, intra in cubiculum tuum, & claude ostium, & ora Patrem tuum.* Nec solum hoc verbo docuit, sed etiam exemplo firmavit. Præcepit enim Apostolis, coram quibus transfiguratus fuerat, *Nemini dixeritis visionem.* In huius etiam mysticam documentum, post obtentum de Diabolo in passione trium-
phum. Cap. 6. Matth. 17.

DDdd ij

phum, myſteriali triduo abſcondi voluit in ſepulchro; vt poſtquam de hoſte triumphaueris, in ſecreto conſcientiæ abſcondaris. Sicut etiam dicit Apoſtolus. *Mortui eſtis, & vita veſtra abſcondita eſt cum Chriſto in Deo.*

21. Hoc etiam nota circa palpebras oculorum: quia, ſicut Philoſophus ait, aues claudunt oculos palpebra inferiori, animalia verò grefſibilia, palpebra ſuperiori. Per aues ſignificantur viri cæleſtes, per animalia grefſibilia, viri mundani, ea, quæ ſuper terram ſunt, ſapientes. Animales ergò homines oculum habent clauſum ad cæleſtia, ſed apertum per deſiderium ad terrena. Pfalmiſta, *Oculos ſuos ſtauerunt declinare in terram.* Et de nefariis ſenibus dicitur. *Declinauerunt oculos ſuos, vt non viderent cælum.* Spirituales autem viri è contrario, terrena non aſpiciunt per amorem, ſed contemplationem cæleſtium vehementer intendunt; dicentes cum Apoſtolo. *Noſtra conuerſatio in cælis eſt.* Vnde B. Martinus oculis ac manibus in cælum ſemper intentuſi. Sinite me, (inquit,) videre cælum. Et iterum de ipſo canitur, nec terram iam videre dignatus, cælo totuſ inhaſerat.

V I. Inſtructio ſexta Moraliſ: Quod oculi id eſt intellectus & affectus, dirigendi ſunt ad Deum.

22. Sextò, Oculuſ eſt in capite collocatuſ. Eccleſiaſteſ ait; *Oculi ſapientis in capite eiꝯ.* Caput noſtrum eſt Chriſtuſ, à quo nobiſ ſpiritualiter inſluitur ſenſuſ, & motuſ. In hoc ergo capite debemus oculos noſtroſ collocare, oculum videlicet intellectuſ per cognitionem, & oculum affectuſ per amorem: quia vbi amor, ibi oculuſ. Benè in capite Chriſto oculos ſtatueraſ Dauid, qui dicebat, *Oculi mei ſemper ad Dominum.* Intellectuſ noſter debet in Chriſto ſemper ſtatuī, vt eo inſpecto, in vita, & conuerſatione, eidem valeamus conformari. Sicut ſcriptoꝝ per hoc, quod oculos ad exemplar habet, rectè ſcribit. Rex Iſaſaphat dicebat. *Cum ignoremus quòd agere debeamus, hoc ſolũ habemus reſiduũ, vt oculos noſtroſ ad te dirigamus.* Affectuſ etiam noſter debet in Chriſto capite collocari, vt attendentes quæ pro nobiſ fecit, & pertulit, & quanta nobiſ beneficia contulit, ipſum ſuper omnia diligamus.

23. Sed multi ſunt ſicut porcuſ, qui fruſtuſ cadenteſ ab arbore deuorat, & oculoſ ad arborem numquam leuat. Vnde in Pfalm. dicitur. *Sicut oculi ancille in manibuſ domine ſue, ita oculi noſtri ad Dominum Deum noſtrum, donec miſereatur noſtri.* Sunt etiam quàm plureſ, vt paupereſ & trutani, qui ad manuſ eleemoſynarij propter dona reſpiciunt; & recepta eleemoſyna, eleemoſynario doſta vertunt, & ipſum deincepſ obliuioni tradunt. Sic & multi, beneficiiſ iam receptiſ à Domino per ingratitudinem auertuntur ab eo; & de talibuſ poteſt dici. *Qui quatit locupletari, aduerſit oculum ſuum;* Poſtquam enim locu-

OCVLVS MYSTICVS.

501

pletati sunt, oculum considerationis auertunt à Deo, & per obliuionem à Deo recedunt, iuxta illud. *Incrassatus est dilectus, & recalcitrauit: incrassatus, impinguatus, dilatatus, dereliquit Dominum Deum factorem suum, & recessit à Deo salutari suo.* Dent. 32

24. Talium hominum ingratitude confunditur, si bestiarum irrationalium gratitudo pensetur. Refert Commentator, quòd quidam paterfamilias aspidem quandam adedò domesticauerat, quòd quotidie veniens de cauerna sua ad mensam patrisfamilias, hora prandij petens cibum, post comestionem ad cauernam suam, vnde venerat, recedebat: quæ processu temporis duos filios genuit, quos secum ad mensam hospitii sui, vt cibarentur adduxit; vnus verò filiorum indomesticus, filium patrisfamilias venenauit; quòd cernens mater, velut ingratum filium puniens, in conspectu omnium interfecit; & quasi rationis capax, confusa, cum alio filio recessit. Ad librum de animal. c. Plin. l. 10. c. 74.

21. Adhuc autem ad plenam confusionem humanæ ingritudinis, exemplum referam gratitudinis bestialis. Scribitur in historiis Romanorum, & idem refert Polyhistor quòd quidam in vrbe Roma homo, nomine Andronicus, ad mortem propter sua facinora condemnatus, leoni obiectus est deuorandus: quem vt leo procul aspexit, repente quasi admirans stetit: tunc demum ad ipsum placidè & quasi letabundus accessit, & caudam more canum adulantium blandè mouit, & homini iam pæne præ timore mortuo, crura & manus leniter lingua demulsi. Tunc ille homo blandimenta leonis percipiens, vix oculos ad intuendum leonem paulatim aperuit, & animum, quem propter metum amiserat, cepit recuperare. Tunc quasi post factam mutuum recognitionem, letos videns & gratulabundos adinuicem hominem & leonem, & acclamantem populum, qui conuenerat ad spectaculum, Cæsar illum hominem ad se vocans, diligenter inquit, cur atrocissimus leo sibi soli pepercerit, qui ceteros sibi proiectos deuorare protinus consuevit. Ille verò rem mirabilem narrans ait: cum prouinciam Africanam proconsulari Imperio dominus meus obtineret, ego propter crudelitatem eius & verbera, dominium eius ferre non sustinens, ad camporum solitudines fugiens elongaui, & in cauerna quadam latebrofa, quam reperi, latitavi: ad quam cauernam non multò post venit hic leo, pede debili & cruentato terribiliter rugiens, & præ dolore vulneris ingemiscens. Quo viso ultra modum sum territus, & quasi toto animo consternatus. Sed postquam leo specum ingrediens in habitaculum illud suum ingressus me vidit, ad me mitis & mansuetus accessit, & pedem læsum ostendens, mihi gratia curationis porrexit. Tunc ego ingentem stipitem vestigio pedis eius inhaerentem diligenter euulsi, & compresso vulnere saniem aggeratam eduxi, & cruorem detergens, vulnus ipsum leniter exsicaui. Tunc ille per medelam meam alleuiatum se sentiens, pede in manibus meis posito, procubuit & quieuit. Et ex hoc, per triennium ego & leo in eo specu mansimus, & iisdem

Dddd iij

cibariis vti sumus: Cum enim feras venatione ceperat, pinguiora membra mihi afferebat, quæ ego ignis non habens copiam, meridiano cocta sole edebam. Sed postquam illius vitæ ferinæ me tædedit, & leone ad venationem profecto, specum reliqui, & post fugam à militibus deprehensus ad dominum meum, quem quondam fugeram, sum adductus: & ex Africa ductus Romam, vbi me damnatum capitali sententia, dominus meus dandum ad bestias procurauit. Hic autem est leo ille, quem quondam socium habui, qui mihi gratiam exhibet & vicem, vt videtis, & pro fideli societate, & pro sibi exhibita per meam operam sanitate: tunc Andronicus, iubente Cæsare est à pœna solutus, & eidem leo vt socius, est donatus. Exinde comitantibus sibi leone & homine & urbem peragrantibus, cernentes omnes dicebant, *Hic est leo hospes hominis; hic est homo, medicus leonis.* Erubescant ergo homines, beneficiorum diuinorum immemores, tantam ferarum ad suos beneficos gratitudinem audientes.

VII. Instructio, quod vulnera Christi per memoriam sunt respicienda.

26. Septimo, Oculus est formæ seu speciei rei visibilis receptiuus. Cuius, inter alia, hæc est vna probatio manifesta. Probatur enim in principio Perspectiuæ, quod si quis in luce dici vehementer aspicat in cælum, de loco, super quem domus habeat foramen magnum coopertum ad cælum, & reuertatur postea ad locum obscurum, vel claudat oculos, aspiciet formam illius foraminis, cum figura.

Foramen, quod nos debemus attentè & frequenter omnes aspicere, *Apoc. 1.* est latus Christi perforatum in cruce. Vnde Ioannes. *Videbit eum omnis oculus, & qui eum pupugerunt, Et Zacharias. Aspicient ad me, quem confixerunt.* Pluraliter dixit, *quem confixerunt*: omnes enim Christum confiximus, imò crucifiximus, quia pro nobis crucifixus est Christus. Intret igitur quisque domum conscientia suæ, & mentis oculo Christi vulnera contempletur, vt Christo pro suo modulo conformetur. Scribitur enim in lib. de commixtione elementorum, quodd si interfector, eum quem interfecit, aspexerit, vel si præsens affuerit, protinus sanguis de interfecti vulneribus emanabit. Quod si verum est, inferri potest, quod si Christum occidimus, cum pro nobis occisus fuerit, non rectè ipsum aspicit, quem sanguis eius, ac si recenter de vulneribus eius fluere, non afficit.

Prou. 1. Sed pauci hoc foramen aspiciunt: vnde conqueritur Dominus. *Exsendi manum meam, (supplè in cruce perforatam) & non fuit, qui aspiceret.* O quàm deuotè respiciebat ista foramina Beatus Bernardus. Vnde exponens illud Cant. 2. *Veni, &c. in foraminibus petra, in caverna maceria,* loquitur ita. [Securus habito, quia statuit supra petram pedes meos; fremit mundus, premit corpus, insidiatur Diabolus. Non

cado : fundatus enim sum supra firmam petram. Peccaui peccatum grande, turbabitur conscientia, sed non perturbabitur, quia vulnere Domini recordabor. Nempe vulneratus est propter iniquitates nostras. Ego verò fidenter, quod ex me mihi deest, viurpo de vulneribus Domini : quoniam misericordia affluunt : nec desunt foramina, per quæ effluant. Foderunt enim manus eius, & pedes, latiusque lancea perforauerunt, & per has rimas, licet mihi sugere mel de petra, oleumque de saxo durissimo : id est, gustare & videre quoniam suavis est Dominus. Clavis enim referans, clauus penetrans factus est mihi ; vt videam voluptatem Domini Patet arcanum cordis ; Per foramen corporis, patent viscera misericordiæ Dei nostri, in quibus visitauit nos oriens ex alto. Ibo igitur ad illa sic referta cellaria, atque ad admonitionem Prophetæ, relinquam ciuitates, & habitabo in petra, & ero quasi columba nidificans in summo ore foraminis.] Hoc sumptum est ex Ieremij 48. Ait enim S. Propheta, *Relinquitte ciuitates, & habitate in Petra.* Et idem Bernardus Bernardo. In illud Psalmi 90, *Cadent à latere tuo mille,* In Ps. dicit ; [Vtinam talis merear esse columba, quæ in foraminibus petrae habitet, & in foramine lateris Christi.] 90. *serm.* 7. *sub finem.*

VIII. *Octaua instructio moralis, contra fatuos sua negligentes & aliorum facta temerè iudicantes.*

Octauo, Oculus corporalis est non sui, sed alterius agnituius. Et in hoc differt oculus carnis ab oculo mentis. Nam oculi carnis seipfos videre non possunt, sed alia conspiciunt ; è contrario oculi cordis de se, non de alijs infallibiliter iudicare possunt. Vnde, qui alios iudicant, non seipfos, oculos mentales conuertunt in corporales, iuxta illud, *Numquid oculi carnei tibi sunt.* Et idè fatui sunt qui facta aliorum *Iobi 12.* & cogitata, quæ conspiciere nequeunt, temerè iudicare præsumunt. Sed hodie quamplures inueniuntur tales. Vnde Augustinus ; Curiosum est genus humanum ad cognoscendam vitam alienam, desidiosum *Lib. 9. confess.* est ad cognoscendam suam. Et Beat. Bernardus. Multi multa sciunt, *Lib. me. dicit.* & seipfos nesciunt ; alios inspicunt, & seipfos deserunt. Et Gregorius Nazianzenus. [Nihil suauius videtur hominibus, quàm aliena loqui, *initio.* & aliena cogitare.] Quod è compositæ mentis arbitrio videtur alienum. Sed sicut Hieronym. scribit ad Asellam. [Periculosum est de *Epist. 1.* seruo alterius iudicare : & non facilis venia est praua dixisse de re- *99.* ctis.]

29. Isti sunt sicut scholaris fatuus, qui habet librum literis Latinis scriptum, quem benè intelligit, & in eo studendo multum proficere posset ; & tamen meam numquam inspicere vult, sed in libro Græco, vel Hebraico sibi prorsus incognito mussitaret. Tales videntur speciem humanam exuisse, & lyncis speciem induisse : dum dicunt se cordium secreta videre, cum tamen dicatur à Paulo. *Quis enim ho-* *1. Cor. 2*

minum scit, quæ sunt hominis, nisi spiritus hominis, qui in ipso est! Ita, & quæ Dei sunt; nemo cognovit, nisi Spiritus Dei. Et verè stulti sunt; quia, vt dicit Tullius. Proprium est stultitiæ; aliena vitia cernere, & suorum obliuisci. Isti sunt quibus dicit Dominus, *Quid autem vides festucam in oculo fratris tui; trabem autem, quæ in oculo tuo est, non consideras? aut quomodo potes dicere fratri tuo; frater, sice eijciam festucam de oculo tuo, ipse trahem, quæ in oculo tuo est, non vident?* In seipsis quidem non vident peccata grandia; in aliis autem vident, quæ parua sunt, vel forsitam nulla. Vnde & Horatius Poëta dicit.

Horatius lib.
1. Satyr.
3.

*Cum tua peruideas oculis mala lippus inunctis,
Cur in amicorum vitijs tam cernis acutum?*

30. Tales assimilantur furibus, qui arcas apertas negligunt, id est, conscientias proprias, quæ eis apertæ, & notæ sunt; sed arcas clausas, id est, alienas conscientias, quas non vident, quarunt Seneca. Fures signata quarunt, aperta prætereunt. Tales propriè dormitantibus comparantur. Ille enim qui dormitat, ad se claudit oculos, dum caput inclinat; ad alios autem oculos aperit, dum caput erigit. Sed audiant quid eis dicatur in Prouerb. *Et inaneur pannis dormitatio.* Occasione enim huius dormitationis, qua volunt iudicare ceteros, se neglectis, vestientur pannis, id est, veste damnationis; & qui nituntur alios confundere temerariè iudicando, induentur quasi diploide, confusione sua.

Prov. 23.

31. Oculus existens in luce non videt existentem in tenebris, sed potius è conuerso. Sic peccatores in tenebris existentes, iustos existentes in luce gratiæ temerariè iudicare præsumunt; Iusti verò calitus illustrati peccatores iudicare non norunt. Et ideò, vt filij lucis simus, cum peccatores conspiciamus, non eos faciliè iudicemus; sed magis condolentes miseris eorum, defleamus; quia in similibus aut lapsi sumus, aut labi possumus.

In vita.

Lucæ 6.

In vitis

Patrum

l. 3. n.

136. &

l. 9. n.

9. refer-

tur de

Abbate

Pior.

Lib. de

Smil.

6. 110.

32. Legitur de S. Ioanne Eleemosynario, inter alia bona, quæ hic Sanctus habebat, quia neminem iudicabat; sed, cum audiebat iudicantes alios, corriperebat dicens; vos peccatis primò contra Domini mandatum dicentis; *Nolite iudicare, & non iudicabimini.* Deinde, quia nescitis qualis futurus sit, quem modò peccantem videris. Sæpè enim peccatum furis, vel periuri iudicamus; sed eius pœnitentiam, quæ Deo accepta est, non videmus. Legitur etiam de S. Moyse Eremita, quòd inuitatus instantiùs ad iudicandum ibi fratrem culpabilem, sportam plenam arena portabat. Interrogatus, quid hoc esset, respondit; peccata mea post me sequentia non video, & hodie venio iudicare aliena. Benè iste in luce gratiæ positus erat, qui peccatorem existentem in tenebris iudicando temerariè non videbat.

33. Dicit Anselmus. Consideratio alieni peccati multa mala in diuersis parit. Si enim peccator est, qui alterius culpam considerat, malo illius exemplo in malo perseverat: si verò sit pœnitens, à peccati pœ-

nitentia

nitentia frigescit. Quod si eodem peccato, vel alio tentatur, facilius exemplo superatur. Si autem tentatione carebat, eo ipso tentatur, quod vitium ipsius considerat. Si autem iustus, se praeferebat illi, in superbiam extollitur; quem si diligebat etiam in Deo, nunc incipit habere odium. Non est ergo facile considerata alterius culpa, cuius consideratio tot generat mala.

34. Sancti ergo viri non temere iudicant alios, sed sollicitè non erunt iudicare seipsos; scientes, quod scriptum est. *Posuit oculus ipsorum Eccl. 17. super corda ipsorum.* In quo verbo Sapiens prædictam proprietatem interioris oculi nobis apertè demonstrat; ut dum oculus super cor ponitur, seipsum posse videre monstretur. Secreta autem aliorum cordium videre non valet. Nam ea solus homo, cuius sunt, aspiciat; & nullus alius, nisi Deus, cuius oculus cuncta cernit. Vnde in Iobo dicitur. *Sensum eius ignoravit avis; nec intuitus est eam oculus vulturis. Cap. 28.* Peccator per vulturem designatur: vultur enim pedibus libenter graditur, unde à quibusdam *gradis* appellatur; quia terrena peccator amat, & terrenis inhiat; quandoque etiam vultur in altum volat; quia peccator mentem in altum leuat ad caelestia: sed qua intentione hoc faciat, alter ignorat. *Quis intuetur oculos vulturis, id est, intentionem cogitationis?* Hoc Omnipotens sibi reliquit, qui cogitationes hominum solus nouit.

IX. Nona instructio moralis; Quod peccatores caelestia parui faciunt, & terrena magni pendunt.

35. Nonò, Oculus est secundum diuersitatem distantiae visibilibus, diuersimodè cognituius: Si enim rem videat à remotis, eam iudicabit esse paruum: si verò de propè, iudicat esse magnam; Vnde Solem, quem à remotis cernimus, esse modicum iudicamus; cum tamen demonstratione certissima probetur esse centies sexagesies septies maior terrâ.

Modo consimili peccatores à Deo, & à caelesti præmio per peccati distantiam plurimum elongati, (longè & enim à peccatoribus salus, Deum & caeleste præmium parui pendunt: terrena verò, quibus per *Ps. 118.* amorem sunt propinqui, magni pendunt. Vnde dicitur in Num. *Di. Cap. 24.* *xix Balaam filius Beor: dixit homo, cuius obruratus est oculus; &c. qui cadens apertos habet oculos; videbo eum, sed non modò; intuebor illum, sed non propè.* Peccatores siquidem cadentes, & deiecti ad temporalia per amorem, ad terrena apertos habent oculos; sed ad caelestia obruratos.

36. Deum quasi longè aspiciunt; & idè ipsam non secundum eius magnitudinem æstimantes, contemnunt. Vnde & Pharao, per peccatum à Deo elongatus, dicebat, *Quis est Dominus, ut audivi vocem Exod. 5.* *eius? Nescio Dominum, & Israël non dimittam.* Vnde & talibus, tan-

E E e

quam longè distantibus dixit Dominus. *Audite, qui longè estis, quæ fecerim: & cognoscite vicini fortitudinem meam.* Pari ratione quis contemplantur celestia tanquam ob defectum amoris à se distantia, re-
 Cap. 38. putant ea exigua; in quorum persona dicit Esaïas, *Attenuati sunt oculi mei, sufficientes in excelsum.* Terrena verò vtpotè affectui eorum pro-
 Cap. 22. xima iudicant esse magna. Vnde & de Auaro dicitur in Ieremia, *Qui dicit, edificabo mihi domum latam, & coenacula spatiosa; & sequitur. Tui verò oculi, & cor ad auaritiam:* Oculo enim avari terrestris do-
 minus, quam de propè respicit videtur magna: celestis verò domus, quam
 Baruch 3. procul aspicit, parua paratur. Cùm tamen scriptum sit. *O Israël quàm magna est domus Domini, & ingens locus possessionis eius! magnus est, & non habet finem excelsus & immensus.*

37. E conuerso verò Sanctorum oculis celestia, vt propè posita, vi-
 dentur maxima; & idè David, cuius affectui Deus propinquus erat,
 Ps. 34. Dei magnitudinem cognoscebat; vnde & dicebat. *Ego cognoui quòd magnus est Dominus, & Deus noster præ omnibus dijs.* Et de magnitu-
 Ps. 30. dine celestis premij, idem ait. *Quam magna multitudo dulcedinis tuæ, Domine!* Terrena verò, cum sint à Sanctorum cordibus & affectu re-
 Cap. 4. mota, parua videntur eis; imò etiam quasi nulla. Vnde Ieremias, *As-
 pexi terram, & ecce vacua erat, & nihil.*

38. Confimilis est ratio de humilibus, & superbis, quare isti se ma-
 gnos reputant, illi se paruos. Sæpe inter Scholares hæc questio fuit
 mota; Quomodo sit hoc quod quantò aliquis perfectior & sanctior est,
 tantò est humilior; & quantò maior peccator, tantò superbior: cùm
 è conuerso debeat esse, vt videtur. Nam homo Sanctus magis habere
 videtur materiam vnde extolli debeat; peccator verò vnde humiliari
 valeat; cùm nullum bonum habeat. Et respondit quidam loquendi
 promptulus, quòd imò è conuerso debet esse: humilitas enim homi-
 nem Deo proximat, superbia ab eo elongat. Videmus enim in hac ma-
 china Mundi aliquòd quantò circumferentia est minor, tanto est centro
 propinquior; & quantò fuerit maior, tanto est à centro remotior: sed
 Cap. 5. dicit Dionysius, quòd Deus est quasi centrum. Per hunc modum est
 de hominibus qui suo modo circa Deum mouentur, iuxta illud. *In
 Altior. ipsa viuimus, mouemur, & sumus.* Quantò ergo quis est breuior, id
 17. est humilior, tantò Deo est propinquior; & quantò per superbiam ma-
 ior, tantò est à Deo remotior. *Humilia enim respicit* (scilicet à pro-
 Ps. 137. pè) *& alta à longè cognoscit* (scilicet superba.) Et Ecclesiasticus. *Longè
 Cap. 15. abest à superbia.* Nunc autem sic est quòd quantò aliquis à remotiori
 videtur, tantò minor videtur. Qui enim turrim à remotis respiceret,
 parua ei videretur & quantò remotior, tantò minor; & quantò pro-
 pinquior, tantò maior; & cùm ad pedem eius peruenerit, eam esse
 maximam iudicabit. Viri autem Sancti sunt prope Deum positi. Vnde
 Job 17. *peribat vnus ex eis, Libera me Domine; & pone me in xata te.* Quinimò
 sedent ad pedes Domini, tanquam eius discipuli vt est in Deuterono-

mio. Qui appropinquant pedibus eius, accipient de doctrina illius, & Cap. 10.
 idèd cùm se conspiciunt tanquam Nanos iuxta Gigantem positos Do-
 minum magnum reputant, se autem esse paruos. Peccatores autem à
 Deo per peccatum distantes, seipsos magnificant, & extollunt, dum
 Dei magnitudinem non attendunt.

X. Instructio decima moralis, quod bona quæ habemus, aliis
 libenter communicare debemus.

39. Decimò, Oculus est totius corporis directivus; unde & oculi vo-
 cantur *luminaria*: quia lumen exterius respiciunt, & acceptum com-
 municant, & refundunt. Unde secundum Philosophum, oculum defi-
 niens, ait. Oculus est dux corporis, vas luminis, index animi: Oculus
 enim sibi soli non videt, sed toti corpori. In quo natura nos instruit,
 ut bona quæ habemus, aliis studeamus impartiri. Unde Sapiens de
 Sapientia loquens ait, *Quum sine sitione didici, & sine invidia com- Sap. 7.*
 munico; & honestatem eius non abscondo. Ad hoc etiam admonemur à
 Petro. *Unusquisque sicut accepit gratiam, in alterutrum illam admi- 1. Petr. 4.*
 nistrantes, sicut boni dispensatores multiformis gratia Dei. Bona enim
 spiritalia, si quis communicet, non minus habet. Et idèd, sicut, di-
 cit Cassiodorus. [Non debet esse difficile beneficium, quod non patitur Lib. 1.
 largitate detrimentum.] Et Augustin. [Non fit minor, accedente, vel var. ep.
 permanente consorte, possessio bonitatis, quam tantò latius, quantò 14.
 concordius indiuidua fociorum possidet charitas. Non habebit deni- Lib. 15.
 que istam possessionem qui eam noluerit habere communem, quia de civit.
 tantò eam recipiet latiore quantò amplius potuerit amare confor- 1. 5.
 tem.] Et idèd etiam dicit antè Claudianus.

*Exigit omne bonum, melius sub luce patebit:
 Namque bonum quod sæpè latet splendore minori,
 Degenerat, crescitque magis si luce fruatur,
 Sic flos in fructus, in flumen rivus inundans
 Ibit, & in messem pinguis præcedet arista.*

Lib. 2.

Idem in libro 7. dicit.

*Gratia lux ingens animi, quæ prodiga largos
 Vni possessores, & designatur avaros:
 Clausa perit, diffusa redit; nisi publica fiat
 Labitur, & multas vires acquirit eundo.*

Dicit quidam sapiens. [Notam ingratitudini tuæ videris incurere dum
 pigritatis ceteris communicare, quod gratis probaris accepisse. Hac
 quippè negligentia quid deterius arcta servare custodia, quod distri-
 butum, danti & accipienti conferre potuit incrementa salutis? Rapius-
 se videtur proximo, qui nulli communicat quod accepit, quasi glorias
 depriuat. Cocca prudentia est, nolle prodesse cum possis.] Huic au-
 tem sententiæ consonat quod dicit Bern. [Rem profectò proximi re-
 E E e ij

Serm.
 18. in
 Cant.

tines, si donis scientiæ & eloquentiæ adornatus verbum bonum, quod posset prodesse multis, inuiti, imo damnabili silentio ligas; cum ma-

Pron. 11. lediſſet ſit, quæ abſcondit frumenta.

40. Spiritualiter autem ſicut oculus corporalis lumen ſuum cæteris membris communicat, dum non ſolùm ſibi videt, ſed toti corpori; ſic quicumque illuſtratus dono ſcientiæ, debet illud omnibus liberaliter impertiri, vt poſſit dicere illud Eccleſiaſtici, *Videte quoniam non ſolum mihi laborauit; ſed omnibus exquirentibus veritatem.* Sic Dauid, qui petierat à Deo dicens, *Illumina oculos meos*; alibi dicit, *docebo inimicos vias tuas.* Et Paulus, qui lumen oculorum amiſerat, poſtquam viſum à Domino per manum Ananiæ recepit, continuò Synagogam ingreſſus, Iudeis prædicare cœpit ideò dicebat Seneca in quadam Episto- la ad Lucilium. [Omnia cupio in te transfundere, & in hoc gaudeo aliquid addiſcere, vt doceam: nec me vlla res delectat licet ſit eximia & ſalutaris, quam mihi vni ſum ſciturus. Si cum hac exceptione datur Sapiencia vt intùs teneam non rejiciam? Abjiciam. Nullius ſiquidem boni ſiue ſocio iucunda eſt poſſeſſio] & ſic videmus quod oculus corporalis; non ideò minus videt, quia toti corpori videt; quin potiùs ex videndi exercitio, potentior redditur in videndo. Vnde & ex longi mora in carcere, contingit aliquos cæcos eſſe: Sic & ſcientia commu- nicando non minuitur, ſed augetur. Vnde dicit Iſidorus, ſcientiam quam aure concipis, ore funde. Sapiencia enim dando fit amplior, retinendo minoratur. Et in prima epiſt. Alexandri ad Didymum Regem Brachmanorum ſic dicitur. Libera res eſt doctrinæ communitas, & neſciens pati diſpendium, cùm in alios participata transfunditur. Sicut ex vna face, ſi lumina vel ligna plura ſuccenderis, nullum damnum principali materiæ generabis; quæ quidem facultatem accipit pluſ lu- cendi, quoties cauſas inuenit pluſ prætendi.

41. Aliquando verò donum ſcientiæ aliquibus à Domino ſubtrahitur, cùm accepta ſcientia cæteris non communicatur, ſed magis illiberaliter occultatur. Vnde & Beatus Bernard. de ſeipſo refert ſuper Cantica, & cùm inter loquendam exiis, quæ ſuggerebat Spiritus, etſi non infideli, minus tamen confidenti animo reſeruaret, vt haberet, quid diceret, denud tractaturus; Ecce vox venit ad eum dicens; donec iſtud tenueris, aliud non recipies: Simus ergo inſtar oculi corporalis, bonorum no- ſtrorum communicatiui; dicit enim Tullius vnum omnibus debet eſſe propoſitum, vt eadem ſit vtilitas vniuſcuiuſque, & vniuerſorum.

X I. Moralis inſtructio vndecima, quod per oculum corporis, perpenditur ſtatus mentis.

Vndecimò, Oculus eſt arcanorum mentis indicatiuus. Vnde & motus oculi ſignificat ſtatum interiorem animi. Vnde etiam patet per Philoſophum. Si oculus fuerit nimis mobilis, ſignificat inſtabilitatem men-

tis; si nimis tardus, pertinaciam voluntatis; si motus mediocris apprehensionem mentis facilem, & in apprehensis debitam fixationem. Modo consimili ex ratione agendi quorundam, deprehendi potest quales sint. Sunt enim quidam in principio feruentes, qui postea à bono inchoato defistunt: quia ad tempus credunt & in tempore tentationis recedunt. Alij sunt tepidi & remissi, alij autem & bonum faciliter inchoant, & in cæpto firmiter perseverant. Cùm enim oculus sit iudex animi, ut dicit Seneca Philosophus, hinc est quod plerumque per oculum possumus pendere mentis statum. Qualis enim vnusquisque interioris lateat, exterioris oculus manifestat. Vnde & de Asiuero legitur in libro Hester. *Cùmque elenasset faciem, & ardentibus oculis furorem pectoris indicasset;* Et Ecclesiasticus. *Ex visu cognoscitur vir, & ab occursum faciei cognoscitur sensatus.* Lib. 1. de ira c. 1. cap. 15.

43. Vbi autem amor, ibi oculus: Et ideo faciliè conuertitur oculus, ad quod inclinatur affectus. Vnde dicit Iob. *Si secutus est oculus meum cor meum.* Et ideo multum decet honestum virum, ut ab obscenis & impudicis spectaculis eius oculus arceatur; ne ipsius oculi incontinentia mentis impudicitiam fateatur. Vnde dicit Tullius, cùm Pericles & Sophocles ad colloquendum de consultationibus publicis confedissent, & casti quidam pulcher adolescens transiret, ait Sophocles, ô Pericle, vide pulcherrimum puerum. Respondit Pericles, Principem decet non solum manum & linguam, sed etiam oculos habere continentes. Sicut enim de recentia piscis iudicamus per oculum: (non est enim recens piscis qui habet oculum putridum & sanguineum;) sic nec benè castus videtur, qui oculum habet impudicum. Nam ut dicit Gregor. impudicus oculus impudicæ mentis est nuncius. Et verficator quidam dicit, Cap. 11. Lib. 1. de Off. 11. Moral. c. 7.

Inconstans animus, oculus vagus, instabilis pes.

Hæc hominis signa, de quo mihi nulla bonâ est spes.

Duodecima instructio moralis, quod utile sit relictis exterioribus, aliquando ad interiora conuerti.

Duodecimo, oculus est post longam vigiliam somnolentus, vnde & de Apostolis dicitur. *Inuenit eos dormientes: erant enim oculi eorum gravati.* Postquam enim oculus corporalis circa exteriora visibilia diu fuerit occupatus, oportet quod spiritus animalis qui ad exteriora vacavit, reuertatur interioris, & tunc dormit animal, & quiescit. Matth. 20.

In quo oculi natura nos instruit, quod cùm homo diu circa exteriorem administrationem intenderit, expedit ei, ut ad interiora redeat, & sic somno spirituali dormire valeat, & in Deo delectabiliter requiescat. Et hoc est quod Psalmista dicebat. *Si dederò somnum oculis meis, & palpebris meis dormitationem, donec inueniam locum Domino, Et alibi; In pace in idipsum, dormiam, & requiescam.* Ideò nos admonet Deus per Ps. 137.

E E e iij

cap. 26. Isaiam, *Vade populus meus, intra in cubiculum tuum, & claud: ostia tua super te.* Quasi diceret, claud: exteriorum sensuum ostia, & intra in conscientia domum; & tunc interior homo noster dormit sopore contemplationis, quo sensus exteriores ligantur, & à suis actibus suspenduntur; vt possit dicere illud quod dicit Sponsa in Canticis; *Ego dormio, & cor meum vigilat.* Nam viri spirituales, instar leonum & leporum, apertis exterioribus oculis dormire dicuntur. Vnde & Paulus excacatus exterius, illuminatus est interius.

45. Exemplo igitur exterioris oculi; debet homo ab exterioribus ad interiora conuerti. In cuius rei mysterium Diaconus lecturus Euangelium primò baiulat sibi librum, sed redit vacuus; ad denotandum, quòd post predicationis exercitium, est contemplationi vacandum. Et ideo Prelatus, qui est corpori Ecclesie pro oculo reputatus, postquam vacauerit exterius circa sibi commissum populum, debet redire interius ad seipsum. Exemplo Iacob circumspecti postoris, qui postquam pauperat oues Laban, dixit *Iustum est vt aliquando etiam prouideam domui meae.* Vnde & Bernardus salubriter monebat Eugenium. Quid tibi prodest si vniuersos lucreris, & teipsum perdas? quamobrem cum omnes te habeant, & tu esto ex habentibus vnus.

Genes. 30. *Lib. 1. de consid. cap. 5.* 46. Hoc autem non est solùm Prelato necessarium, sed etiam cuilibet aliorum vt aliquando, relictis exterioribus, interius redeat ad seipsum. Vnde Seneca. *Quidquid feceris, citò redi à corpore ad animam, illam diebus, ac noctibus exerce.* Idem [vir magnus ac prudens animam seducit à corpore, & multum cum meliore ac digniore sui parte versatur.] Et B. Bernardus in lib. meditationum dicit. [Vbicumque fueris, tuus esto, Noli te rebus tradere, sed commodare.] Sed multi sunt quorum semper vagatur oculus exterius; nec volunt redire ad suam conscientiam, vtpotè ad domum bonis cunctis spiritualibus destitutam; in hoc similes histrioni, qui inuitus inhabitat domum suam, & libentiùs frequentat domum alienam. Sicut enim in domo histrionis nihil foco frigidius, idèd quod histrio semper moratur exterius, nec ibi vas ad ignem, nec ibi scutella lota: sic in corde hominis, qui quotidie vagatur per inutilia, non est ignis deuotionis; nec scutella lota lachrymis compunctionis; Et idèd peccator non libenter vadit ad conscientiam; quia non inueniret ibi nisi malitiam suam. Et idèd potest dicere propriè illud *cap. 7.* Iobi. *Es non reuertetur oculus meus, vt videat bona.*

CAP. VIII.

De septem differentiis oculorum iuxta differentiam septem capitalium visiorum, ac primò de oculo superbia.

1. **S**uperborum oculi, quia semper ad magna & excelsa respiciunt, dicuntur tumidi & elati. Elationem enim animi prætendunt sublimes oculi. Gregor. in moralibus, cordis superbia usque ad membra foras extenditur, & per oculos primùm indicatur. Et Architre-
nius describens statum superbi dicit.

*At nisi pro voto respondent omnia vultu
Candor, & ignitis oculis prognosticat iram,
Et digito nasum ferienti, magna minatur.*

Hos oculos detestabatur Propheta Dauid dicens, *Superbo oculo & insatiabilis corde, cum hoc non edebam.* Et iterum de semetipso dicit. *Domina non est exaltatum cor meum, neque elati sunt oculi mei; neque ambulavi in magnis.* Et idè nycticoraci se comparat dicens, *factus sum sicut nycticorax in domicilio.* Nycticorax enim non quemlibet iustum nobis innuit; sed eum, qui inter homines degens ab intuitu hominum se in quantum potest abscondit; lucem refugit; quia humanæ laudis gloriam non attendit; sciebat enim, quod scriptum est. *Oculi sublimium deprimuntur.* Et idè etiam ipse dicit, *Oculos superborum humiliabis.* Tales oculi Deo, qui est mitis & humilis corde, potissimè sunt odiosi, idè benè dicitur in Prouerbiis. *Sex sunt quæ odit Dominus & septimum detestatur, nimirum oculos elatos.* Idè Publicanus, qui non audebat nec oculos sursum ad cælum eleuare, quasi diceret, *Non sum dignus videre altitudinem celi, præ multitudine iniquitatis meæ:* legitur iustificatus fuisse.

2. Nec mirum si sublimes oculi, displicent Deo; quia in hoc homo maxime assimilatur Diabolo de quo Iob. *Omne sublime videt, & ipse est rex super omnes filios superbia.* Et de Antichristo dicitur. *Qui extollitur super omnes, quod dicitur Deus, aut quod colitur.* Idè petebat Ecclesiasticus, *extollentiam oculorum ne dederis mihi.* Sunt etiam quidam, qui exteriores oculos satis humiles habent; sed interiores valde sublimes; dum per subtilitatem nimiam plana fastidiunt, & arcana Dei curiosè perscrutari volunt: & idè meritò hebetari ad talia non attingunt. Vnde dicitur in Prouerbiis. *Ne erigas oculos tuos ad opera, quas non potes habere, quia facient sibi pennas, quasi aquila, & volabunt in cælum,* id est, celabunt se tibi: multa enim sunt quæ quantò magis perscrutantur, tantò minus sciuntur. Idè dicitur in Canticis. *Auerte oculos tuos à me; quia ipsi me auolare fecerunt.* Imò tales sæpe

Ps. 110.

Ps. 130.

Ps. 101.

Isaie 5.

Cap. 6.

Lucæ 8.

Cap. 41.

2. Thess.

2.

Cap. 2.

Cap. 23.

Cap. 6.

propter suam superbiam visionem interiorem amittunt: quia de sua scientia intumescunt. Et in hoc sunt similes vespertilionibus; qui id eo debiliter vident, quia humor crystallinus, qui est oculo necessarius ad videndum transit in substantiam alarum: unde dicitur habere alas coriales de quibus dicit Ovidius.

4. Me-
tam.
fab. 2.

Sustinere tamen se perlucentibus alis.

Et id eo propter volatum amiserunt visum: quia subtractum est oculis, quod positum est in alis: & significant illos, qui quanto magis elati propter scientiam extolluntur, tanto magis lumine diuinæ gratiæ priuantur. De quibus dicitur. *Enanuerunt in cogitationibus suis, & obsecraturum est insipiens cor eorum.* Et 4. Regum de Assyriis, qui interpretantur sublimis dicitur. *Percute gentem hanc cecitate.*

Rom. 1.
Cap. 6.

Nec mirum est, si superbia excæcat oculum rationis quia superbia est albugo spiritualis in oculo, sicut exponit Gregorius super illud Levitici. *Si albuginem habens in oculo.* Pupilla oculi nigra videt, alba non videt. In oculo habet albuginem, qui sibi arrogat virtutis candorem: & interdum incurritur huius cecitatis dispendium propter exercitium virtuosorum operum. In cuius rei signum Tobias fatigatus à sepultura mortuorum, veniens domum, lumen perdidit oculorum. Et id eo dicit Gregor. de superbia loquens. Valde timendum est vitium, quod de victoria nascitur vitiorum, & verè superbus cæcus est, cum seipsum esse hominem non cognoscit: homo enim ab humo dicitur. Si autem de humo se esse, cognosceret benè, instar terræ, quæ elementorum est infima, nouissimum locum tenere contenderet; & se humiliando, in finem reputaret. Id eo Psalmista, *Peteat, sciant gentes quoniam homines sunt.* Et id eo signanter dominus, quando aperuit oculos cæci nati, super oculos eius lutum liniuit, Ioan. 9. Per naturam cæcum ille congruè significatur, qui de sua origine vel bonis naturalibus inaniter glorians, excæcatur: qui si lutum, id est, vilitatem humanæ originis, atque finis, mentis suæ oculis superposuerit, depresso tumore excæcantis superbiæ, humiliabitur, & videbit. Sidymus Rex Brachmanorum in Epistola quadam ad Alexandrum Regem, sic scripsit.

Lib. 19.
mor. cap.
17.

Pf. 9.

[Sole calefcimus, rore humectamur, sitim riuo frangimus, thorum ministrat humus, somnum sollicitudo non rumpit, mentem cogitatio non fatigat: In homines nobis similes, supra non agimus imperium nec à quolibet seruitium exigimus, præterquam à corpore, quod solum animæ famulari censemus. Alioqui seruitia est in obsequium cogere, quos nobis fratres eadem natura genuit, & quibus ab vno Deo Patre, omnium bonorum spondetur hæreditas.]

II. De oculo inuidie.

4. Oculus inuidi, instar est strabonis nec rectè videt illum, cui inuidet. Vnde 1. Reg. dicitur quod postquam Dauid triumphauerat de Philisthino,

OCVLVS MYSTICVS.

513

Philisthino, *Nec relictis oculis Saul aspicebat David à die illa, & deinceps.* Nam felicitas alterius est inuido cruciatus. Nimirum

Inuidus alterius rebus macrescit optimis.

Horat. l.

Et ideo dicitur *inuidus*, quasi *non videns*: Inuidi namque dum alienæ felicitati inuident aliorum promotionem, seu prosperitatem videre non

1 epist.

valent. Dicitur in Genesi. *Quod Labam audiens quod Iacob dines factus esset nimis & inclitus, non exhibuit faciem suam sicut heri & nudius tertius.* Item in Genesi dicitur. *Vidit Esau quod pater suus non*

ad Lot-

linm.

Cap. 31.

Cap. 18.

libenter aspicere filias Chanaam, quod interpretatur *possidens*. Inuidia namque non est ad inopes, sed ad bonorum plurium possessores.

Dicit enim Philosophus quod inuidia est tristitia ex apparenti prosperitate boni alicuius. Et ideo non est via, qua eam declinare valeas, nisi

Lib. 2.

Rhetor.

c. 10.

miserimus fias; nam sola miseria caret inuidia. Vnde Socrates, Platonis discipulo suo, querenti qua ratione inuidiam condiscipulorum suorum declinaret, Esto (inquit,) vt Therfites.

Hinc est quod illi, qui sunt illustrioris meriti, magis subiacent inuidiæ & detractiõni: inuidi enim (vt ait Boëtius) nequeunt oculos te-

Lib. 4. de

nebris assuetos, ad lucem perspicuæ veritatis attollere; similes aubus,

consol.

quarum intuitum nox illuminat, dies cæcat: Et hinc est, quod serui domini-

prosa 4.

minos, & subditi Prælatos, insequuntur detractiõibus; & raro euenit quod Prælato prudenti à subditis non detrahatur; quamuis Prælatus in-

terdum rectè suum officium exequatur. Oculi igitur inuidorum torquetur visis prosperitatibus proximorum. Et si subito apparuerit au-

Tob. 24.

roræ, (id est, initium prosperitatis alicuius, suspicantur umbram mortis, (id est, tristantur, & dolent, ac si mortem sibi imminere viderent.)

Et ideo Socrates dicit; Vtinam inuidi, in omnibus ciuitatibus oculos & aures haberent, vt de cunctorum felicitatibus torquerentur. Et ideo quidam volens alij summum malorum omnium imprecari, ait;

Omnibus inuideas, inuide, nemo tibi.

Mar-

tial. l. 1.

epigr.

13.

Cap. 14.

1. Reg.

13.

6. Hic est oculus de quo Ecclesiasticus. *Oculus malus ad mala.* Semper enim ad mala proximi respicit, & à bono se auertit. Et ideo per

Heli figurantur, inuidi de quo dicitur quod *Oculi eius caligauerant, nec poterat videre lucernam Domini donec extingueretur.* Tales sunt inui-

di, per inuidiam excæcati, qui bonos videre nequeunt, qui sunt lucerna Domini, donec sint per mortem extincti. Nam liuor post fata

quiescit. Aliquando namque hominem post mortem commendant, cui, dum viueret, inuidebant. Vnde Poëta dicit,

Vix enim fulgore suo, qui prægrauat omnes

Horat.

lib. 2.

epist. 1.

Infra se positos, extinctus amabitur idem.

Lucerna extincta fætet: inuidus ergo non potest videre lucernam, donec extingatur, & fæteat: quia inuidus qui proximum non poterat

respicere, dum erat in lumine gratiæ, tunc primo videt eum, cum extinctus est, & fætet per peccatum. Vnde dicit Richard. de S. Victore, inuidus bonum, quod videt, inuidet; quod audit, odit, quod contingit extinguit.

FFFf

7. In tantum autem malum alterius eleuat, quod vellet etiam pati graue dispendium, dum alter grauius læderetur: sicut ille, qui sibi vnum oculum erui volebat, vt vtroque proximus priuaretur. Infelix; quippe qui de sola proximorum miseria prosperatur; & cui sola prosperitas fratrum aduersatur. Et quando inuidus de bonis proximi visis dolet, in doloribus semper manet: & dicere potest illud Iobi. *In amaritudine moratur oculus meus.* Et Chrysostomus. Oculus inuidi liquatur tristitia. Inuidus etiam morte viuit continua, tanquam separatus ab eo, qui est vita: à quo, vt dicit Plato, relegata est omnis inuidia.
8. Natura etiam aquilæ, in probando pullos suos talis dicitur esse. Ponit siquidem eos in Solis radio; & cum, qui immobiliter Solem respicit, tanquam suum conseruat, & nutrit: illos autem abiicit tanquam degeneres, quos viderit oculorum intuitum à Solis radiis deflecentes.
- Cap. 10. Sic & ipse Deus, qui aquilæ comparatur in Deuteronomio. *Et sicut aquila pronocans ad volandum pullos suos.* Inuidos abiicit tanquam sibi dissimiles; fulgorem bonorum in aliis respicere non valentes. Et quia lucem prosperitatis videre renuunt, congruè in Inferni tenebris miseriam obtinebunt.

III. De tertia differentia, scilicet ira; De turbato oculo iracundi ad tempus insani.

- Pf. 6. 9. Ira turbat oculum rationis. Vnde Psalmista, *Turbatus est pra ira oculus meus.* Iram furem appellat; nam iratus, est insanus ad tempus, secundum Senecam. Et Poëta dicit, *Ira furor breuis est.* Ideo dicit Hugo de S. Victore. Superbia aufert homini Deum, inuidia proximum, ira seipsum. Et interdum interior ira in exteriori oculo manifestatur. Vnde Architenius statum irati describens, ait,
- Nam cum turbatur animi pax intima, verbis
Intonat, ardescit vultu, oculisque minatur;
Surgit in articulos, oculisque mouentibus iram
Fulminat, & vomitus fumanti desinit ore.*
- Vnde etiam probatum est, quod aliquorum hominum oculi sunt naturaliter infectiui; si quem respiciunt, cum eos contigerit vehementer irasci. Refert Plinius, in Scythia fœminas quasdam nasci, quæ Bithyæ nuncupantur; & perhibet eas in oculis geminas pupillas habere, & visu perimere, si fortè aliquem respexerint, cum fuerint vehementer iratæ.
10. Et quoniam rationis oculus est in irato turbatus, idè non potest rectè indicare de rebus: Nec mirum, cum iracundiæ sanguine sit respersus: Ira enim secundum Philosophum, est accensio sanguinis circa cor. Idè dicitur Iobi. *Caligauit ab indignatione oculus meus.* Et sicut imago in aqua turbida non apparet, sic & in mente, dum per iram turbata fuerit, veritas non relucet: quia secundum Poëtam.
1. anima
i. 16.
Cap. 17.

Impedit ira animum, ne possit cernere verum.

Hanc autem turbationem procurat Diabolus: Est enim sicut piscator ^{Diony-}
astutus, qui propterea turbat aquam, ut piscis capiatur. Scit enim ^{sus Ca-}
Diabolus, quod si in homine turbauerit, oculum rationis, capiet eum, ^{10 cap. 2.}
ac ducet pro sua libito voluntatis; exemplo equi, qui tunc ad molam ^{distich.}
circuit, cum eius oculi sunt velati. ^{moral.}

II. Hinc est etiam quod iratus, cuius interiorem oculum turbauit
ira impetus, solet interdum immoderate punire. Vnde Valerius Má-
mus refert quod Tharentinus Archytas, cum diu in remotis partibus ^{Lib. 4.}
sub Pythagora Philosopho studuisset, & tandem post adeptum donum ^{cap. 1.}
scientia ad patriam remeasset, remque suam propter villici negligen-
tiam perditam, & corruptam vidisset, intuens male meritum, hoc fer-
tur dixisse notabile verbum. Nunc de te supplicium sumerem, si tibi
iratus non essem: malo enim te impunitum dimittere, quam propter
iram, iusto grauius te punire. Hoc idem refert Hieronymus ad Salui-
nam. Vbi refert Archytam dixisse, iam verberibus te necassem, nisi ^{Epist. 9.}
iratus fuisset. Refert etiam Valerius Maximus libro praedicto, quod
cum Plato aduersus delictum serui sui vehementius exarsisset, veritus
quod vindictae modum inspicere non posset, Speculippo amico suo ca-
stigationis mandauit arbitrium, deforme sibi futurum existimans, si
commisisset, ut parem reprehensionem, culpa serui & Platonis animad-
uersio mereretur. Vnde ait Valerius; Fuit ergo nimis liberalis Architae
moderatio, temperatio Platonis. Ideo apud Iobum; dicitur, *non te* ^{Cap. 36.}
superet ira; ut aliquem opprimas. Et Tullius cauenda est ira in punien-
do, ne maior sit poena, quam culpa. ^{Lib. 1. de}
^{offic.}

II. Ex iam dictis possumus elicere saluberrimum documentum, quod
impediente ira, nihil est attentandum, sed magis impofterum, donec
motus irae sedatus fuerit, saniori consilio differendum; iuxta illud
Poëticum.

Dum furor in cursu est, currenti cede furori.

Vnde legitur in historia Romanorum, quod Theodosius Imperator ^{Imo}
cum ad ferenda iussa seuera nimis esset pronus, à quodam Philosopho ^{Augu-}
famosissimo est correctus. Cum enim Philosophus aduertisset Impera-
torem facile commoueri, ne aliquid asperius statueret, monuit, ut, ubi ^{sus, ut}
cœpisset irasci, viginti quatuor litteras Alphabeti memoria recenseret; ^{est, apud}
ut illa concitatio, mente aliò traducta languesceret, quo facto si quid ^{Suidam}
statueret, æquum esset. Vnde etiam dicit Seneca, Lex videt iratum, ^{cum de}
iratus non videt legem. Et Philosophus dicit quod duo sunt maxime ^{Atheno-}
consilio contraria, videlicet festinantia & ira. Hinc etiam possumus ^{doro.}
informari, quod non debet aliquis indignari, si iratus cum cæcus sit, ^{Lib. 7.}
in eum impingat; sed sibi potius irascatur, qui sibi ab irato non cauit. ^{Ethic.}
Ideo dicit Seneca, male de te loquuntur; mouerent (inquit) si hoc iu-
dicio facerent; sed morbo laborant. ^{Lib. de}
^{remed.}

FFFF ij

^{fortuit.}

IV. De quarta differentia scilicet Acedia. De putrido oculo
acediosi, ad salutem suam pigri & somnolenti.

13. Acediosi, quorum oculi interiores somno pigritiæ sunt grauati, signantur per discipulos dormientes, de quibus dicitur. *Inueni eos dormientes; erant enim oculi eorum grauati.* Huiusmodi possunt dicere illud Psalmistæ. *Dormitauit anima mea præ tadio.*

14. Hoc autem prouenit ex inconsideratione satietatis æternæ. Si enim repromissam opulentiam gloriæ cælestis attenderent, mentis somnum discernerent, & ad eam consequendam oculos intentos & apertos haberent secundum illud Prouerbiorum. *Aperi oculos tuos, & satura te panibus.* Causatur etiam somnus acediæ, ex inconsideratione pœnæ futuræ: de quo potest exponi, quod ait Iacob in Genesi. *Die noctisque astu urebar, & gelu; fugiebamque somnus ab oculis meis.* Ille æstu & gelu uritur, qui mentis oculis inferni supplicia meditatur. Vnde reprobi, *Trahebant ab aquis nimum ad calorem nimum.* Quæ si quis consideret, ab eius oculis somnus fugiet; quia somno pigritiæ non obdormiet.

15. Refert Macrobius quod Imperator Augustus narrata sibi nimis magnitudine debitorum, quam quidam Eques Romanus, dum vixit, celauerat, culcitram eius, in qua dormire consueuerat, protinus iussit emi, & satellitibus, admirantibus iussionem, hanc reddidit rationem. Habenda est ad somnum culcitra, & sollicitè conseruanda, in qua ille dormire poterat, qui tantis debitis obligatus erat. Multo magis mirandum est, quomodo peccatores somnum capiant, qui tantis debitis, scilicet pœnæ æternæ obligatos se sciunt; cum oculos, quos culpa potuit claudere, pœnæ consideratio debeat aperire. Vnde Iob post flagella cap. 41. dicit. *Nunc autem oculus meus uidet te.* Et Ieremias dicit, *Virgam vigilantem ego video.* Virga enim vigilans à somno torporis & acediæ, est consideratio æternæ pœnæ futuræ. Et ideo in vitis Patrum legitur quod Abbas Achilles, cuidam fratrum, cur pateretur acediam, sciscitanti, quid sibi esset faciendum, respondit, acediam pateris, quia nondum vidisti præmia quæ speramus, neque supplicia quæ timemus. Si enim ea diligenter respiceret, in cella tua etiam plena vermibus, sine acediæ torpore iaceres.

16. Hic autem torpor acediæ non solum facit interiorem oculum animæ præ tadio dormire; imò interdum oculum exteriorem corporis. Sunt enim nonnulli Ecclesiastici hora matutinalis officij in cubilibus dormientes; vel in Choro, si forte affuerint dormitantes; contra quos Bernardus: *Quid hoc ignauitæ est, o boni milites; sociis in sanguine & cæde versantibus, vos aut cibos diligitis delicatos, aut somnos capit matutinos? aliis redimentibus tempus, quoniam dies mali sunt; vos è contrario, longas noctes dormiendo consumitis; & dies otiosos*

fabulando ducitis? [Idem super Cantica. Doleo aliquos vestrum graui
in sacris vigiliis deprimi somno; nec ciues cæli reuereri, sed in præ-
sentia cælestium Principum tanquam mortuos apparere; cum nostra
ipfi alacritate permoti, nostris interesse solemnibus delectentur. Vereor,
ne vestram delidiam aliquando abominantes, cum indignatione recedant.

17. Et si somnus huiusmodi, vel dormitatio in tali tempore, rationaliter argui possit in quolibet Ecclesiastico, multò magis in Prælato, qui tanquam vigil & speculator Ecclesiæ, sollicitè vigilare debet, vt non dormitet, neque dormiat, qui custodit Israël. Debet enim vt pastor peruigil, custodire vigilas noctis super gregem suum. Elinandus Frigidimontis Monachus in suis Chronicis, inter alia huiusmodi narrationem refert de seipso. Audi, (inquit,) fabulam non fabulam, sed rem gestam. Philippus Beluacensis Episcopus aliquando apud nos hospitatus est, non vt quidam deuotionis causa sed deuotionis; iam enim Ordinis nostri communis hospitalitas, plures inuenit, qui eum deuorent quàm singularis sanctitas qui eam honorent. Præcepit autem mihi præfatus Episcopus, vt eum facerem Missam matutinalem audire, ad quem eum de crastina Prima iam cantatâ venissem, inueni adhuc dormientem, & nemo ex familia sua, eum excitare præsumebat. Ego autem accessi propius, & excitaui eum, quasi iocando dicens, iamdiu est quod passeres surrexerunt ad benedicendum Domino, & adhuc nostri Pontifices stertunt in cubiculo suo. Attende Domine Pater, quid dicat Psalmographus, *Praueniunt oculi mei ad te diluculo.* Super quod verbum dicit Glossa Ambrosij Indecens est Christiano, si ipsum otiosum confusus in lecto radius solaris inueniat. Ad quam vocem experge factus Episcopus, & confusus, indignatus aduersum me, quòd eum tam liberè arguissem, substomachans ait: vade hinc miser, & interfice pediculos tuos. Ego autem motum illius conuertens in risum, continuò respondi. Vide tu Pater, ne interficiant te vermes tui: ego enim iam vermes meos interfeci: Scito, Pater, hanc esse differentiam inter vermes diuitum & vermes pauperum, quia vermes diuitum diuites occidunt, vermes autem pauperum à pauperibus occiduntur. Lege Machabæorum libros, & Iosephum, & Actuum Apostolorum historias; & inuenies Reges potentissimos Antiochum, & Herodem Agrippam, à vermibus fuisse consumptos. Qua ratione simul & auctoritate Episcopus oppressus, statim obmutuit.

18. Acediosi ergo habent oculos interiores obscuratos. Vnde dicitur in Prouerbiis. *Sicut fumus oculis, sic piger ijs, qui miserunt eum.* Vt Cap. 10: enim fumus obscurat oculum corporis; sic acedia oculum mentis. Nec mirum si acediosorum, qui torpent otio, obscurantur oculi, ne videant: nam visus iuuatur ex gustu; Vnde dicitur. *Extendit Ionathas summitatem virgæ, quam tenebat in manu, & intinxit in faenum melis, & conuertit manum suam ad os suum, & illuminati sunt oculi eius.* Virga

FFFF iij

est recta, & significat intellectum simplicem, & rectum: quæ in manu habetur, dum in opere exercetur. Summitas virgæ est sublimitas intelligentiæ. Hæc in fauam mellis intingitur, quando ad occultam sacre Scripturæ dulcedinem peruenitur. Manus ad os conuertitur, quando opus doctrinæ sociatur. Cibus autem animæ spiritualis, est exercitium bonæ operationis. Vnde dicit Veritas. *Mens cibus est, ut faciam voluntatem eius, qui misit me; ut perficiam opus eius.* Quia ergo otiosi de hoc cibo non comedunt, ideo oculi eorum obtenebrati sunt, & possunt dicere illud Psalmi. *Oculi mei languerunt præ inopia.* Ideo dicitur per Zachariam. *Brachium eius ariditate siccabitur, & oculus dexter eius, obinebescens obscurabitur.* In brachio intelligitur operatio. Verè ergo brachium ariditate siccatur, cum homo torpens otio, bonum non operatur. Et tunc necessariò oculus dexter obtenebratur; quia intellectus quoad notitiam spiritualium obscuratur. Et ideo Salomon, cuius oculi præ aliis fuerunt per sapientiam illustrati, postquam constructo Templo Domini cepit otij torpore marcere, statim idololatra factus, legitur infatuatus fuisse. Infelix ergo acediosus; qui, dum sectatur otium, interiorem amittit oculum.

19. Refertur parabolicè Regem quendam tres filios habuisse; qui volens de regno suo secundum extremam sui voluntatem disponere, conuocatis coram se tribus filiis, dixit se pigriori velle regnum suum legare; Tunc ait primus, mihi ergo debetur regnum, quia aded sum piger, quod cum ad ignem sedeo, prius crus comburi permitto, quam illud retraham ab incendio ignis. Imo, (inquit secundus,) ad regnandum sum aptior, quia sum pigrior. Nam si funem habeam in collo, & mox suspendi debeam, & gladium in manu teneam, propter pigritiam, ad abscindendam chordam non porrigerem manum meam. Imo, (subdit tertius,) ego regnare debeo, quia in pigritia cæteris antecello: cum enim resupinus in lecto iaceo, si stiller aqua super vtrumque oculum, dextrum scilicet & sinistram, propter summam pigritiam à statu meo me non remoueo ad partem dextram vel sinistram. Huic Rex legauit regnum, reputans eum magis pigrum. Rex iste significat Diabolum, qui est rex super omnes filios superbiæ. Per primum trium filiorum congruè designatur ille, qui existens in societate peruersa, per quam ad malum incenditur, magis eligit ab igne cremari peccati, quam à tali consortio separari. Secundus autem filius, significat illum, qui licet peccatorum suorum funibus videat se constrictum, vel etiam circumplexum, in quibus mox suspendendus est ad inferni patibulum, nihilominus pigritatur funem abscindere gladio linguæ id est confessione. Per tertium filium, super cuius vtrumque oculum, dextrum scilicet & sinistram, aqua stillare dicitur, ille congruè signatur, qui doctrinam audit de paradisi gaudiis, & inferni suppliciis, & tamen præ pigritia statum suum non deserit: nec se voluit ad dextram, amore & desiderio premiorum; nec ad sinistram, ut saltem peccatum deferat, terribus metu tormentorum.

V. Quinta differentia scilicet auaritia de oculo auari,
terrenis possessionibus excæcati.

20. Auarorum oculi mundanæ possessionis puluere sunt respersi, & idè excæcati. Nam *oculi stultorum in finibus terra.* Et super illud *Prou. 5.* Psalmi. *Mane adstabo tibi, & videbo,* dicit Glossa, Non videt, qui *psal. 12.* temporalibus adhæret. Et idè sunt sicut talpæ, quæ oculis priuatæ sunt, & tamen oculorum signa gerunt: terram fodiunt, & eam super se iaciunt. Sic & auari in hoc mundo, prudentiæ tenent similitudinem, sed non habent veram sapientiæ veritatem; & dum terrena quærun, terrenis desideriis seipfos viuos sepeliunt. Quia, vt dicitur in Prouerbiis. *Desiderium impij, monumentum illius.* Hic est oculus, de quo dicitur *Cap. 12.* à Zacharia. *Oculus eorum in vniuersa terra,* Quia ad acquisitionem terrenorum tendit tota intentio auarorum. *Cap. 51.*

21. Oculus autem rem planè, clarè, & plenè videre non potest, nisi res ab eo proportionaliter distet. Et idè quia cupidi temporales diuitias super oculos cordis ponunt, peruersum de diuitiis iudicium ferunt; vt, quæ sunt vilia, reputent pretiosa. Et sicut per interpositionem corporis opaci habet fieri corporalis eclipsis: sic quando terrenum aliquid, per amorem nimium interponitur inter oculum cordis, & Solem iustitiæ habet spiritualis Eclypsis in anima cupidi prouenire. Psalmo 57. *Super cecidit ignis scilicet ardentis auaritiæ, Et non viderunt solem,* supplè iustitiæ. Et idè *argentum* congruè interpretatur *ardor gentium.* Sicut enim visus excæcatur per peluim ardentem, sic cupidus per terrenum amorem: vbi enim amor; ibi est oculus. Cupidus, ad aurum quod summè diligit, oculum intentionis omnino conuertit, & deinde eius fulgore & pulchritudine delectatur; & sic instar vrsi spiritualiter excæcatur.

22. Cùm autem auaritia homini oculum abstulit, ipsum ad molam, id est, volubilitatem horum temporalium molere facit. Vnde legitur de Samfone. *Quem cùm apprehendissent Philistiim, strim eruerunt* *Iudic. 16.* *oculos eius, &c. & clausum in carcere molere fecerunt.* Nec mirum si cupidus clarè videre nequeat, cùm in oculo trahem gerat. Ille namque in oculo trabem gerit, qui per affectionem aspirat ad Ecclesiasticam dignitatem.

23. Aranea à trabe dependet, & se totam euiscerat, fila de suis visceribus educendo, & telam inutilem componendo. Sic ambitiosus & cupidus, mente pendet ab ea quam ambit & appetit, dignitate; educit fila, dum distrahitur per diuersa desideria. Inutilem telam textit, dum laborat propter rem transitoriam, quam aliquando non attingit; & si fortè ad eam peruenerit, non diu subsistit. Sed etiam se euiscerat dum diuersis cogitationibus absumptus animi virtutem eneruat. Idè cupidi, qui dignitates ambiunt, verè dicere possunt, *Anni nostri sicut psal. 89.*

Cap. 21. *arana meditabuntur.* Et sicut Leuitico. Prohibebatur a templi ministerio habens albuginem in oculo: sic ambitiosus esset ab Ecclesiasticis beneficiis meritò repellendus, qui tanquam albuginem mentis oculum excæcantem, habet in oculo desideratam Ecclesiæ dignitatem. Cui dici potest illud Ieremiæ. *Oculi tui, & cor ad auaritiam.* Quantum autem cupiditas in excæcando præualeat, ex hoc patet; quod Prophetæ oculos cupiditas excæcauit; & discipulus pecunia corruptus, Dominum innocentem tradidit manibus impiorum. Hæc autem auaritia radiculam, & miserandam contraxit familiaritatem cum senibus; qui cum minùs egeant, auidius concupiscunt; & quò rebus sunt citius carituri, tantò auidius student parcitati. Nam & manus in iuuentute porrecta, in senectute plerumque contrahitur: &, quæ in iuuentute contracta est, aut numquam, aut rarò in senibus dilatatur.

24. Quamuis autem avarus spiritualium oculorum luce sit priuatus, sibi tamen videtur prudentissimus, & præ aliis oculatus. Postquam nummos in arca fuerit contemplatus, considerat primò quod dicit Petronius.

In Sa-
tyr. sub
finem.

*Quisquis habet nummos, secunda nauiget aura,
Fortunamque suo temperet arbitrio.
Carmina componat, declamet, concipet, omnes
Et peragat causas, siue Catone prior.
Iurisconsultum, paret non paret, habetor.
Atque esto quidquid Sernius & Labeo.
Multa loquor, quid vis nummis presentibus opta;
Et veniet; clausum possidet arca louem.*

Cap. 3. Sed potest illi dici illud Apocalypsis. *Tu dicis quod diues sum, & lecuples, & nullius egeo: & nescis quia tu es miser, & miserabilis, & pauper, & cæcus, & nudus.* Miser in vita, miserabilis in fama, pauper in bonis operibus, nudus in virtutibus, & cæcus, quia spirituali cognitione priuatus; & quia cupidus seu avarus, puluere temporalium, ut dictum est, excæcatur.

25. Idè per Tobiam stercorebus hirundinum excæcatum congruè designatur. De quo dicitur in Tobia, *Et è nido hirundinum calida stercora ceciderunt super oculos eius & factus est cæcus.* Stercora hirundinum, sunt possessiones temporalium, quæ calidæ dicuntur, quando plusquàm debeant diliguntur: & idè, qui ea diligunt, excæcantur.

Cap. 6. Sed qualiter valeat eorum visus reparari, dicitur in Tobia. *Exentera hunc piscem, & cor eius, & fel reponet tibi: sunt enim hæc necessaria ad medicamenta utiliter.* Piscis est Christus. Exenterat hunc piscem, qui profundè cogitat Christi passionem. Cor eius reponit; qui, ex quanto corde dilexerit nos, attendit. Fel etiam reponit; qui quanta fuerit eius amaritudo passionis intelligit, & necessaria hæc sunt vtiliter ad oculorum spiritualium medicinam. Aliter etiam curatur prædicta cæcitas felle piscis, id est, cogitando amaritudines, quæ sunt in diuitiis.

OCVLVS MYSTICVS.

321

diuitiis. Est enim labor in eas acquirendo, timor in possidendo, dolor in amittendo. Quæ si quis diligenter attenderit, temporales diuitias non amabit; & sic spiritualiter illustratus, oculorum lumen, quod per cupiditatem amiserat, rehaerebit.

VI. De sexta differentia scilicet gula. De oculo gulosi, nimia ingluwie sauciati.

26. Oculi gulosorum dicuntur carnei, quia ad procurandam carnem totaliter sunt intenti. Iuxta illud, *Nunquid oculi carnei tibi sunt?* Et Tob. 10. Iuuenalis dicit.

Sunt quibus in solo est viuendi cura palato. Gulosorum oculi ad escam contemplandam, sunt acutissimi, & quasi aquilini; de quibus dicitur, *Nunquid ad præceptum tuum eleuabitur aquila, & in arduis ponet nidum suum?* inde contemplantur escam, & oculi eius de longè respiciunt. Est enim natura aquilæ, quod cum ad alta volauerit, inde pisces in mari prospicit, & ad eos deuorandos subito descendit. Gulosorum oculi, non solum escam contemplantur in aquis, sed etiam in omnibus elementis, iuxta illud Poëticum.

*Inter ventriculos versatur questio pisce,
Quis colitur meliore lacus, quis fertilis aer,
Alitibus, quæ terra feras effundet edules.*

Hic est oculus de quo dicitur Deuter. 33. *Oculus Iacob, in terra framenti & vini.* Nam ut Poëta testatur.

*Ingenium est quæsisse merum: Nam gratia mensis
Absque mero decisa venit, nec plena voluptas
Est mense quæ fundit aquas, facinusque receptis
Nanfragium fecisse cibus, solennia mensa
Bacchus agit.*

Et, sicut spiritualium virorum oculi, semper ad Dominum, sic carnalium seu gulosorum oculi, semper ab cibum, & ad ventrem, de quo faciunt Deum, iuxta illud. *Quorum Deus venter est.* Quod cernens Hugo de claustro animæ dicit; Per singula Deo comparatur venter: solent enim Diis templa construi, altaria erigi, ministri ad seruiendum ordinari, pecudes immolari, thura concremari. Deus itaque venter est, cuius templum est coquina, altare mensa, ministri coqui, immolatae pecudes, coctæ carnes, fumus incensorum, odor saporum: Sed ut ait quidam,

*Non tibi sit venter Dominus, sed vine decenter,
Serna gustando, quid, quantum, quomodo, quando,
Non properè, laute, nimis, ardentè, studiosè.*

Gulosus viso cibo delectabili oculo capitur sicut hamo, iuxta illud. *In oculi eius, quasi hamo capiet eum.* Namque cum piscis capitur, esca superponitur, sed ferrum interius occultatur. Sic & in cibo delectabili,

G G g g

exterius dulcedo respergitur, intus tamen latet aculeus, quo mens spiritaliter sauciatur. Vnde Boëtius.

*Habet hoc voluptas omnis,
Stimulis agit ferentes
Apiumque par volantum
Vbi grata mella fudit
Ferit ista corda morsu.*

Et quia illecebra gulæ intrat per oculum ad animam, ideo signanter dicitur in Proverbiis. *Ne inuearis vinum, quando stauescit, cum splenderit in vitro color eius: Ingressus blandus, sed in fine mordebit, ut conlber; & quasi regulas, venenum diffundet.* Regulus enim interficit solo visu. In hoc autem quod dicitur, *ne inuearis vinum*, notat ingluuiem modernorum, quibus non sufficit sapor gulæ, sed volunt ut omnes sensus in eodem inebrientur calice. Delectatur autem visus claritate, tactus frigiditate, gustus sapore, nasus odore. Et quia non est in vino quod delectet auditum, assumimus lyram, & tympanum, & tibiam, & vinum in conuiuiis nostris. Gula ergo, quæ sic per oculos capit, oculos carnales sæpè tollit. Malunt enim oculos perdere, quàm ebrietate carere; dicentes arguentibus, plus valet bonum vinum, quàm marulus oculus. Idèd dicitur in Proverbiis. *Cui va? cuius patris va? cui rixa? cui fouea? cui sine causa vulnera? cui suffusio oculorum? Nonne is qui commoratur in vino, & student calicibus epotandis? Sicut autem gula interdum aufert oculos corporis & excæcat, sic etiam oculos cordis.* Osee 4. *Fornicatio, & vinum, & ebrietas, auferunt cor.* Et Poëta dicit.

Ebrietas rationis vile sepulchrum.

28. Et sicut canis, qui cæcum ducit, cum ossa in luto videt, dum illic ex auuiditate diuertit, cæcum per immunditias secum trahit: sic & gula, postquàm spiritum excæcauerit, per peccatorum spurcicias ipsum ducit. Sic protoplastis contigit. *Vidit enim mulier quod bonum esset lignum, & ad vescendum suauis, & pulchrum oculis, tulitque de fructu illius, & comedit, &c.* Gulosi ergo ingurgitatione ciborum & potuum, opprimentes spiritum, rationis excæcant oculum; & rationis oculo priuati, & quasi bestiales effecti, instar pecudum, quorum tota cura versatur in querendis pinguibus pascuis, student delicatis cibariis, & calicibus epotandis. Et tunc arte multiplici, conquiruntur irritamenta palati, & ut verbis utar Poëtæ.

*Par labor & studium quo fercula sine parata,
Quo frustata modo, quæ scissa libidine possint
Ardorem fadisse gula: Nam forma paratis
Delicias pretiumque parit, multumque tenetur
Materies forma, nam si labor improbus adsit,
Materiam superabit opus, dapibusque paratis,
Addet opes, acuetque gulis ardentibus ignes,*

Quis autem (vt ait Philosophus,) habens aliquid humani pudoris, voluptatibus his duabus, coeundi; & comedendi, quæ homini cum sue, & asino communes sunt, captiuetur?

VII. *Differentia septima de luxurie, quod oculi mulieris, sint tela impudicitie quibus multi vulnerantur.*

29. Oculi corporis est ianitor cordis: qui si pudicus fuerit, quidquid indecens esse nouerit, excludit. Impudicus verò, quarens quod placeat, per omnia discurret; sicut malus ianitor, volentes intrare non patitur, nolentes verò monet, & hortatur. Legitur in Genesi. *Iniecit domina oculos in Ioseph.* Sunt hæc impudicitie tela, quibus vulnerantur multi, licet longè positi. Iis telis, pudicitie scutum opposuit; scriptum est enim, *Auerte faciem tuam a facie mulieris.* Et idè in oculis eius *Ecl. 9.* non fuit captus, sicut econtra de Holopherue contigit, in Iudithæ historia. *Cumque intrasset ante faciem eius, statim captus est in oculis suis.* *Cap. 10.*

30. Basiliscus, etiam aues volantes, intuitu suo interficit: Sic & mulieris aspectus, quandoque viros celestes ad ima voluptatis trahit, & sic spiritualiter interficit. Vnde in Prouerbiis dicitur de muliere ornata meretricio preparata, *Multos vulneratos deiecit, & fortissimi quique, interfecti sunt ab ea.* Basiliscus, licet sit brevis serpens, multos visu interficit; sic & aspectus, licet modicum quid videatur, tamen multos vulnerat, & occidit. Videtur namque probabile, quod cum mulier libidinose respicit virum, tunc à corde mulieris, libidinosus fumus egrediens, vsque ad oculos venit, deinde radios visuales mulieris inficit, qui sic infecti veniunt ad oculos viri, (supposito quod videamus extra mittendo:) & cum ad oculos viri venerint, & eos infecerint, infectio vsque ad cor transit, sicut à corde mulieris processit. Hæc est enim natura radij venenosi, sicut per simile potest videri. Canis enim rabidus in cerebro venenum habet; & quando aliquem in quacunque parte corporis mordet, ille primò dum patitur, inficitur in cerebro, sicut mordens infectus erat in simili membro: cordis enim infectio ad oculos exit, vnde & Poëta dicit.

Ex corde lampas, faculis, ignescit oculus.

Et secundum Philosophum, cum menstruata mulier, speculum inspicit, ipsum maculat, & inficit. Sic interdum mulier virum ex libidine respiciens, inficit animam, in qua tanquam in speculo, Dei relucet imago.

31. Sicut autem aspectus mulieris actiuus, id est, cum aspicit, sæpè lædit, sic & aspectus eius passiuus, id est, cum aspicitur, non minus offendit. Vnde Quintilianus dicit, virtus in animam per oculos via est. Et Ieremias, *Ascendit mors per fenestras nostras, ingressa est domos nostras.* Sicut enim contingit, quod intromissus latrunculus per fenestras.

Declam. 1. pro cæco nouer- cam. Cap. 9.

G G g ij

Cap. 1.

stram, magnis latronibus ostium aperit, qui ingressi domum spoliant, & dominum domus necant; sic aspectus illicitus per fenestram oculorum immisus, portam consensus aperit; & tunc hostis intrans, & domum spolians virtutibus, spiritum occidit. Ideo Ieremias, *Oculus meus, depredatus est animam meam.* Et ideo, sicut dicit Helinandus; stulta est castitas, quæ inordinate ridet, vel aspicit indecenter. Venatores, volentes feram inuenire & capere, paruos canes venaticos quos *furetos* appellant, consueverunt pramittere, qui huc & illuc vagari non cessant, donec prædam inueniant. Et cum ab his inuenta fuerit, venator magnos canes emittit, & postquam feram coeperunt, venator superuenit, & venabulo feram occidit. Sic & Diabolus qui hominem venatur ad mortem, tanquam suos furetos, impudicos oculos iuuenis pramittit, qui tandiu vagantur per vicos, donec prædam inueniant; id est aliquam pulchram mulierem aspiciant: Et tunc Diabolus mittit ad eos magnos canes, id est immundas cogitationes, & tandem superuenit venator & venabulo consensus vel operis, animam occidit. *Qui enim viderit mulierem ad concupiscendum eam iam mæchatus est eam in corde suo.* Et sic est interfectus. Vnde fornicatio dicitur quasi fortis necatio vel formæ necatio, vel fornacis accensio.

32. Natura leonis, dicitur hæc esse, quod si quis iuxta leonem transeat, & leonem non respiciat, illeſus euadit: si autem leonem respiciat, ipsum Leo deuoraturus inuadit. Sic interdum, ex aspectu mulieris in tantum inuadit hominem carnalis tentatio, quod si non aspexisset, securus euasisset. Colloquium quarum non est nisi virus amantur. Vnde Iob 31. dicitur, *Pepigi fœdus cum oculis meis, vt ne cogitarem quidem de Virgine.* Super quo dicit Gregorius [quia non licet intueri, quod non licet concupisci.] Et Isidorus in lib. de Syn. [Tolle naturam delinquendi si vis esse à formidine tutus, esto visione discretus. Nullus sanæ mentis iret ad spectandum basiliscum, cuius aspectus interficit. Ergo nullus debet ire ad spectacula mulierum, quarum aspectus interficit, & occidit: Quidam iuuenis Eremita cum Abbate suo in ciuitatem iuit, vbi mulieres vidit, & cuiusmodi res essent, ab Abbate sollicitè quæsiuit; cui Abbas anseres esse respondit. Reuersus puer in claustrum, inconsolabiliter flere cœpit; cui Abbas, quid vis fili mi? Et ille dicit, volo de illis anseribus quas in ciuitate vidi. Tunc Abbas fratribus suis conuocatis; considerate fratres, (inquit,) mente sollicita, quam periculosa sint mulierum spectacula. Nam hic puer innocens, qui prius mulierem non viderat, in eremo nutritus; sic solo visu, est igne concupiscentiæ carnalis incensus.

33. Infanus esset habendus, qui vas plenum balsamo, si illud in media platea poneret, & omnibus exponeret, vt vnusquisque contra vas lapidem iactaret. Infanus igitur est, qui habens in corde balsamum gratiæ, tanquam in vase debili propter vertibilitatem liberi arbitrii, habeas etiam thesaurum castitatis & integritatis in corpore, quod pro-

pter pronitatem ad malum, multum est fragile; si ad spectacula mulierum sit ausus accedere, & vas suum ictibus lapidum passim exponere. Mulier enim quam primò respicit, ad cordis sui vasculum, speciei suae similitudinem quasi lapidem vnum mittit. Et idem accidit, quando secundam aspicit, & quot impudicè cernuntur, quasi tot contra eum lapides jaciuntur. Et ideo dicitur Ezech. 6. *Oculi eorum fornicantes post idola*, id est post mulierum recepta simulachra. Et seneca in quadam Epistola. [Nihil tam damnosum moribus bonis, quàm in aliquo spectaculo residere. Tunc enim per voluptatem facilius vitia subre-
punt.] Et Gregorius in Dialogis, dicit. [Qui cor suum continentiae Lib. 3.
dedicant, habitare cum fœminis non presumant. Nam species mulie- 6.7.
ris oculis opposita, facit plures cogitare nefanda. Sicut enim magis nocet oculo corporis, aspectus visibilis nimis albi, quàm visibilis vehementer nigri; sic etiam magis periculosus est aspectus mulieris pulchritudinis excellentis quàm deformis; & eius quæ in habitu meretricio est preparata, quàm eius quæ simplicitates est induta. Nam luxur vestium, lascivium fœminarum demonstrat animum, & imprudentes inuitat ad malum. Hinc est illud Poëticum.

*Detegit exterior animum status; Intimus extra
Pingitur affectus cultu monstrante; latentis
Copia sit mentis; habitus quoque cœtera velans
Pectora deuolat, aperitque abscondita morum,
Garrulus interpret, & mentem veste loquens,
Prædicat exterior internas pagina leges.*

Ideo dicitur Ecclesiastici 9. *Auerie faciem tuam à muliere compta, & ne circumspicias speciem alienam. Propter speciem enim mulieris, multi perierunt.*

Narrat Sigebertus in suis Chronicis, quod Tribunus quidam cum vxore sua ad Ioannem Anachoretam accessit, & ipsum, ut se videndum præberet vxori, hoc multum desideranti rogauit. Ille autem hoc respuit, & adjecit; Vade quia in domo tua, hac nocte me videbit. Nocte illa apparuit mulieri, & ait; Desiderio tuo parens, o mulier, ad te veni, ut non faciem corporalem seruorum Dei, sed eorum gesta velis per spiritum contemplari. Et in vitis Patrum dicitur, quod quædam vidua ad B. Anselmum de remotis partibus venit, & prostrata cum lachrymis ait, Ora pro me Deum. Cui ille respondit. Oro Deum ut tui memoria deleatur de mente mea, & ab ea se diuertit; Illa verò ingemiscens recessit. Quantum ergo nos debiles timere possumus, cum audimus, quod sancti, adeò mulierum virabant aspectus. Beatus Dauid, quia oculos suos jecit & fixit in mulierem, illico appetitu deuictus, adulterium & homicidium perpetravit. Nisi enim fœminam incautè aspexisset, in tantam carnis tentationem minimè ecidisset. Si ego per intuitum oculorum, tantus vir cecidit; nos qui longè ab eius sanctitate distantus, mortale præcipitium sum ut operè timere & cauere debemus.

& orare cum eodem Dauide & à Domino petere, *Auerte oculos meos ne videant vanitatem.*

35. Mulier autem non tantum capit virum per oculos, sed etiam per singulos sensus. Et primò per auditum, sicut & Sirenes, quæ sunt monstra quædam marina, virgineum vultum habentia, quæ cantu suo nauigantes alliciunt: illectis soporem immittunt, & soporatos interficiunt; Sic & mulier, cantu suo hominem attrahit, & in peccato suo obdormire facit, & sic spiritualiter ipsum interficit. In quo facto uterque culpabilis existit; mulier, quia virum perniciosè perimit; & vir, quia ad cantum suum, ut stultus accedit. Secundò mulier capit per visum; tigris enim, dum cernit speculum in via à venatoribus ex industria positum, delectata pulchritudine speculi, sistit gradum, & obliuiscitur catulorum suorum. Per speculum lucidum, intellige corpus mulieris ornatum; quod cum stultus aliquis respicit, spirituales aliquando gradum sistit, & ecclesia quæ deberet insequi obliuioni tradit. Capit tertio mulier per olfactum: Sicut enim panthera, ut dicit Philosophus, odoris sui fragrantia, attrahit cetera animalia, quæ postquam senserint suauitatis eius odorem, ipsam comitantur usque ad mortem: Sic & plerumque fatui, quorum cor vanis odoribus delectatur, currunt post odorem muliebrium vnguentorum. Sed audiant mulieres talibus operam dantes, quid Dominus commineretur. *Auferet Dominus olfactoriola, & inanes, & specula: & erit pro suauis odore fetor.* Tandem quarto mulier capit virum per tactum, opus nefarium perpetrando.

36. Et tunc interficitur misera anima, exemplo vnicornis: qui, sicut ferunt qui de natura scripserunt animalium, hoc modo capitur. Virgo namque puella decenter ornata in sylua ponitur, quæ veniente vnicorne sinum aperit, in quo ille omni ferocitate deposita, caput ponit, quem soporatum venatores capiunt, & occidunt. Sic Samson dormiens in sinu Dalila, oculos perdidit, ex quo mortem tandem incurrit. Alpectus siquidem mulieris & viri, aufert oculum rationis, unde dicit Gregorius, sic fit rectæ retributionis examine; ut, qui exteriori oculo negligenter vitur, interiori oculo non iniuste cæcetur. Dicit etiam Eusebius quod Gorgon meretrix, propter eximiam pulchritudinem, ita spectatores suos reddebat mentis inopes, ut eos putaretur vertere in lapides. Coruus cum inuenerit animal mortuum, primò sibi oculos eruit, & deinde extrahit ei cerebrum, cum aufert ei sensum suum & reddit eum fatuum. Nam,

Omnis amor cæcus, non est amor arbiter æquus,

Nam deforme prius, iudicat esse decus.

Sicut ait Solinus, Hic est modus capiendi simias. Nam cum habeant ingenium emulandi, dum gestus venariorum effigiare appetunt, visco à venatoribus in sylua relicto, oculos suos liniunt, sicut à venatoribus mendacio factum viderunt. Et cum earum conclusi sunt oculi, pro-

Lib. 21.
moral.
7.
In Chronico, ad annum mundi 3850.
In 29. lybist.

num est eas capi. Sic etiam cum mulier impudica oculos suos linit, ad hoc ut capiatur ab hominibus; unde faciem exteriorem clarificat, interioriorem offuscat, secundum illud Ieremia. *Cum intueris oculos tuos* Cap. 4. *stibio, frustra componeris.*

37. Quædam meretrix, cum ex morbo unum oculum amisisset, & ei Sacerdos diceret quod istud propter peccatum suum, digna Dei indicta contigisset; *Malo* (inquit) *contenta esse uno oculo quam uno viro.* Ecce feminam, propter suam incontinentiam, oculis orbatam uno tantum in corpore, sed duobus in morte. Hæc autem cæcitas carnalis concupiscentiæ designata est in Sauli cæcitate Actuum 9. Ipse enim sequebatur legis ceremonias quæ præcepit carnales obseruantias, sed curatus fuit cadendo in terram, id est macerando carnem suam & ostendendo se Anania, id est Sacerdoti in Confessione. Hæc etiam cæcitas proueniens ex peccati luxuria, est figurata cum suo remedio in cæcitate Tobia. Tobias siquidem stercorebus hirundinum excecatus, felle piscis super oculos posito legitur fuisse curatus. Per stercora, signatur luxuria. Ecclesiastici 9. *Mulier fornicaria quasi stercus in via, ab hominibus prætereuntibus conculcabitur.* Piscis qui nutritur in aquis, signat peccatum carnis, quod nutritur in fluxu abundantiae temporalis, quia

Non habet unde suum paupertas pascat amorem.

Piscis habet in carne dulcedinem, sed in felle amaritudinem. Et peccatum carnis habet, dulcedinem in actu, sed amaritudinem in reatu. Si igitur super oculos mentis, ponatur fellis amaritudo, non carniū dulcedo; id est, si homo cogitet & attendat non delectationis carnalis dulcedinem, sed pœnæ subsequentiæ amaritudinem, tali medicamine curabitur à carnalis concupiscentiæ cæcitate.

38. Ut ferunt fabulæ domina quædam quandam vaccam habuit dilectissimam, quam pastoris cuiusdam custodiæ commisit. Pastor ille, Argus nomine, centum oculos fertur habuisse, iuxta illud Poëtæ.

Centum luminibus circum caput Argus habebat.

Hic autem volens vaccam diligenter custodire, binos solum oculos simul sinebat dormire, cæteris interim vigilantibus & vaccam custodientibus, quidam autem cupiens habere vaccam illam, filium suum, nomine Mercurium cum instrumento musico misit ei; qui cum venisset, cepit cum Argo, histrionico more fabulas dicere, & plerumque cantare; & tandiu non cessauit hoc agere, donec duo Argi oculi coeperunt dormire. Deinde ad cantum eius, duo alij obdormierunt, & sic deinceps, donec somnum caperent vniuersi; quod cernens Mercurius, caput Argi protinus amputauit; & vaccam rapuit ad patrem adduxit; eique retulit, qualiter Argum per cantus blandimenta seduxit. Argus iste centum oculis oculatus, figurat virum prouidum & vndique circumspæctum; cui tamen timendum est, ne, si cantus mulierum libenter audiat, à circumspæctionis suæ vigilantia cadat; & dor-

Ouid.
lib. 1.
Metamorph.

Epist. 10
quæ est
ad Fu-
riam, &
eadem
paucis
mitante ipsius prudentia, spiritualiter pereat; & animam, quam diligen-
ter seruare debuit, per peccata amittat. Ideo dicit Hieronymus; Gran-
dis virtutis est, sollicitæ diligentia, cum natus sis in carne, non carnali-
ter vivere; Tecum pugnare & quotidie & inclusum hostem, Argi, (vt
fabulæ ferunt,) centum oculis obseruare.

mutatis habet ad Demetriad. epist. 8.

CAP. IX.

De corporalium oculorum carentia æquanimiter
ferenda.

De re-
med.
fortuit.
Tobias amisso oculorum lumine legitur Deo gratias egisse: In-
terdum enim amissio oculorum homini cedit in bonum: nam,
ait Seneca, cæcitatem, innocentia magnam esse partem. Huic oculi,
adulterium monstrant, huic incestum, huic domum quam concupiscat.
Oculi enim Instrumenta vitiorum sunt, & duces scelerum. Melius est
autem oculos non habuisse, quam Deum oculis offendisse. Vnde dicit
Tullius, in suis orationibus. [Miserior es cum in omnem fraudem ocu-
lis raperis, quam si omnino oculos non haberes.] Hinc etiam sicut te-
stat Plutarchus, quidam Philosophi oculos sibi effodisse leguntur,
ne exteriorum illecebris caperentur. Vtique admirando boni & honesti
feruebant zelo, quamuis recti scientiam non haberent. Siquidem, vt
dicit Aristoteles, Voluptatum initia obliuioni mandanda sunt, & soli
exitus memorandi, pœnitentia pleni.

Lib de
curiosi-
tate.
Ex Sa-
rish. 8.
Polycr.
cap. 6. &
Leu. 10.
in Ari-
stotele,
et Vi-
lerio
Max. 1.
7. cap. 2.
Ex So-
crate 1. 3.
6. 10.
2. Et ideo sancti Viri, dum mala ex oculis prouenientia diligenter
considerant, in oratione vnus oculi vel amborum, in oratione vnus
oculi vel amborum, (si contingat,) exultant. Vnde legitur de Petro
Monoculo Abbate Clareuallensi, quod cum morbo oculum alterum
perdidisset, iocando solebat vir Dei dicere; vnum se de suis hostibus eua-
sisse: & se plus à residuo, quam à perduto formidare. Consimili modo,
vnus alius sanctus homo, amisso vno oculo, amicis flentibus, ait; Nolite
 flere, de duobus enim hostibus vnum amisi. Legitur in Historia Tri-
partita quod dum Iulianus Apostata apud Constantinopolim Idolis im-
molarer; Maris Episcopus Chalcedonis ad eum accessit, & ipsum publicè
Apostatam vocauit: Iulianus verò solam cæcitatem improperauit: Erat
enim senex, & pro imbecillitate oculorum, manu alterius utebatur: &
addidit Impius Iulianus; Neque Galilæus tuus curare te potest. Respon-
dens verò Maris, Ego, (inquit,) Deo meo pro cæcitate gratias ago: quia
hoc gestum est, ne te viderem pietate nudatum, Narrat Sigebertus, &
idem habetur in vita S. Audomari, quod Audomarus Teroanensis Epi-
scopus primò cæcus factus cum Atrebatibus in translatione S. Vedasti visum
diuinitus

diuinitus recepisset, dolens quod cecitatem, quam donum Dei reputauerat, amisisset; obtinuit quod iterum cecus esset; & sic cecus factus, ait, *Ad te leuauit oculos meos, qui habitas in caelis.*

Pf. 122.

3. Sæpè etiam contingit, vt, cum lumen oculorum carnalium amittitur, spiritualium vigor augeatur. Legitur in Historia Tripartita, quod Didymus à pueritia cæcus, Dialecticam, Rhetoricam, Geometriam, aliasque Philosophicas disciplinas auditu didicit, & memoriter sciuit. *Ex 80-
Lymens
13. 14.* Insuper nouum & vetus Testamentum sic perfectè cognouit, quod multos libros edidit, & de Trinitate tres libros fecit, & super librum Periarchon Origenis explanationes eximias reliquit. Quem videns S. Antonius, ait ei, non te turbet, ô Didyme, amissio oculorum sensibilibus: tales enim tibi desunt oculi, quibus muscæ & culices nocere possunt; sed gaude potius, quia habes oculos, quibus etiam Angeli vtuntur; per quos & Deus videtur, & eius lumen inspicitur. Hinc etiam legitur, quosdam mundi Philosophos sibi oculos eruisse; vt totam cogitationem ad mentis conuerterent puritatem, sicut dicit Hieronymus contra Iouinianum. Hoc etiam fecisse Democritum Philosophum, Claudianus in libro suo restatur. Et ideo Agellius ac etiam Iustinus referunt quod Platonis discipuli in templorum lucis & partibus versabantur, vt admoniti augustioris habitaculi sanctitate nihil aliud quam de virtutibus cogitarent. Quidam etiam ob hoc sibi eos eruisse perhibentur, ne per eorum usum à contemplatione Sapientie tardarentur.

CAP. X.

De sumptuositate oculi, respectu cæterarum partium corporis humani.

1. **I**N mensa cuiusdam Prælati, mota fuit hæc quæstio; quodnam est membrum sumptuosius in corpore humano, communiter loquendo. Responsum fuit ab omnibus, quod venter est membrum sumptuosius, iuxta illud Ecclesiastici. *Omnis labor hominis in ore eius.* Interrogatus tandem quidam Philosophus, qui cum aliis discumbebat, quid super hoc ipse sentiret, sentio, (inquit,) quod oculi plus constant, quam membrum aliud corporis humani. Quia sex sunt quæ diuitibus sumptus nimios afferunt, scilicet pretiositas vestium, equorum, ædificiorum, librorum, & cibariorum, vasorum argenteorum & aureorum. Superfluitas autem ista non est ob aliud inuenta, nisi vt pascat oculos; proprios, & quod miserabilius est, alienos: Vnde Seneca; Non fames magno nobis, sed ambitio, constat. Et idem alibi ait. Iam non sunt homines dentibus, & ventre, & ore contenti: oculis quoque gulosi sunt. Et quidam ait,

Cap. 6.

Epist.

17. 25

119.

L. 3. natura. 99.

c. 12.

HHhh

Plus oculi pascunt animum quam fercula ventrem

Plus honor obsequij quam super ipse sapit.

Vnde & Poëta describens auiditatem oculorum gulosi supra dicti.

Respicit ergo dapes; circumfususque paratus

Iam votis oculisque vorat, circumspicit omnem

Luxuriam mensa, meretur fercula, rursus

Inspicit, & blandis epulas percurrit ocellis.

2. Et in hoc patet oculi profusio, quia aurum etiam conuertit in cibum: dum enim gula pascitur cibo, oculus auro pascitur, & argento, Vnde narrat Helinandus quod anno Domini 1102. Rex quidam Angliæ, Guilielmus nomine, cum calcearetur nouas caligas quodam mane, quæsiuit à cubiculario, quanto emptæ fuissent pretio: Cumque ille respondisset tribus solidis, indignans ac fremens ait, fili meretricis, ex quo Rex habet caligas tam exilis pretij, vade ex parte Diaboli & affer mihi emptas marca argenti. Iuit ille, & multo viliores attulit, & ei, quanti præceperat, fuisse emptas dixit. Ista, (inquit Rex,) conueniunt Majestati Regiæ, in quam omnium oculi sunt intenti. Iste verò vt alienos pasceret oculos, denarios commutauit in solidos.

Ecl. 2. 3. Tanta est oculorum sumptuositas, vt Salomon qui de se dicit. *Omnia, quæ desiderauerunt oculi mei, non negauit eis: Dicat alibi, Oculi*

Cap. 14. *hominum insatiabiles.* Et Ecclesiasticus. *Insatiabilis oculis cupidi.* Tanta est enim oculorum curiositas, vt non solum faciat in sumptibus excedere, verum etiam interdum insanire, iuxta illud Ezechielis. *Insaniuit concupiscentia oculorum suorum.* Hoc etiam videre possumus in Nerone, qui, vt refert Orosius, effigiem Troiani incendij videre desiderans, vrbis Romæ incendium voluptatis suæ fecit spectaculum. Per sex dies & septem noctes ardens ciuitas, regiones pauit aspectus. Quod quidem vrbis incendium, ipse ex altissima turri prospectans, lætusque (vt aiebat) flammæ pulchritudine, Tragico habitu, Iliad. decantabat. Et quod plus auditum offendit, matris suæ adhuc viuentis viscera secari præcepit; vt sic locum oculis cerneret, in quo nondum natus multo temporis iacuisset. Ipsum planè oculi dementem fecerant, quem ad perpetranda tam nefaria pertrahebant. Propter quod non immerito

Cap. 31. queritur Ecclesiasticus. *Nequius oculo, quid creatum est? Quam dannosa sit curiositas oculorum, testificantur non solum diuinarum testimonia scripturarum, sed etiam fabulæ Poëtarum.* Vnde Fulgentius, sic

L. 4. dicit. [Curiositas oculorum, semper periculorum germana detrimenta nouit suis amatoribus parturire. Vnde Actæon venator, dianam lauandem se, curiositate quadam oculorum videre voluit, & in ceruum conuersus, non agnitus à canibus suis legitur esse deuoratus.]

*De informatione Scholarium ex septem conditionibus quæ
requiruntur ad visum.*

1. **A**D hoc vt fiat completa visio, septem sunt necessaria; Debita dispositio organi, præsentia obiecti, proportio distantia, soliditas rei visæ, attentio potentia, mora temporis, diffusio luminis medium illustrantis.

*I. Informatio prima, de humilitate discendi, nullum contem-
nendi, & iniurias tolerandi.*

1. Debitam dispositionem oculi, auferunt ista tria, Tumor, puluis & humor. Sic spiritualiter tumor seu prominentia superbia; puluis auaritia, humor concretus luxuria. Propter primum dicit Philosophus, *Lib. 19.* quod oculus eminens est visus debilis; & oculus profundus bonivisus *de anim.* & fortis. Modo consimili est de homine humili: Nam, sicut oculos profundos habentes, melius vident longè distantia, & subtilia, & minima, quàm habentes oculos tumidos vel prominentes, qui etiam de facili læduntur ab obiecto sensibili. Similiter humiles clariùs vident subtilia, quàm superbi. Vnde Salomon. *Vbi humilitas, vbi sapientia. Prou. 11.* Ideò dicebat Saluator. *Confiteor tibi pater, Domine cali & terræ; quia Math.* abscondisti hæc a sapientibus, & prudentibus, & reuelasti ea paruulis. *11.* Glossa, humilibus quandoque, id est, paruulis reuelantur à Deo, quæ sapientibus absconduntur.

3. In cuius rei signum nunciata fuit salus Samariæ per leprosos. Et subiugalis asina Balaam per leprosos. Et subiugalis asina Balaam domum suam, à via reuocauit illicita. Vnde Antonius Eremita singulos Patrum interrogabat de Scripturis; & quisque secundum sententiam suam respondebat. Sed Ioseph interrogatus ultimo loco respondit, *nescio*: & Antonius ait, hic solus viam sciendi inuenit, qui se nescire respondit. Hinc est quod B. Bernardus, docet in libro de gradibus humilitatis. Illud quoque quod in scala illa quæ in typo humilitatis Iacob monstrata est, Dominus innixus apparuit, quid nobis aliud innuit, nisi quod in culmine humilitatis, constituitur cognitio veritatis! Et Isidorus dicit in lib. 2. Soliloq. Veritas mentem fugit quam humilem non inuenit. Et Valerius Max. dicit de Socrate quod dum ad discendum se pauperem credit ad docendum se locupletissimum fecit. *11.* Ad hoc ergo quod scholaris in scientia benè proficiat, oportet quod humilitati benè studeat: quia secundum Psalmistam, Dominus *intelle-* *Pf. 118.*

HHhh ij

IDIOTA,

332

Cap. 10. *Ann dat parvulis*, id est, humilibus. Et Ioannes in Apocalypsi. *Ecco coram te dedi ostium apertum*, (scilicet ad notitiam Scripturarum) *quia modicam habes virtutem*. Glossa humilitatem; quæ facit hominem in oculis suis modicum reputari. Et in Deuteronomio. *Si custodieris mandatum Domini Dei tui, aperiet thesaurum suum optimum, calum*, id est, notitiam celestium. Mandatum autem Dei est humilitas, iuxta illud.

Cap. 28. *Disce a me, quia mitis sum, & humilis corde.*
Matth. 11. 4. Hæc autem scholaris humilitas in tribus consistit. Primò quidem ut libenter discat; ut ait Augustinus. Ego senex, & tot annorum Episcopus, à collega meo nondum anniculo paratus sum edoceri. Vnde & Paulus sapientia legis præditus, utpote à Gamalièle edoctus, missus fuit ad Ananiam virum simplicem, ab eo instruendus. Vnde dictum est. *Surge & ingredere civitatem & dicerur tibi, quid te oporteat facere.*

4. Cor. 9. Vbi dicit Glossa exemplum discendi datur, & superbia increpatur; ut nullus alium indignum æstimet, à quo doceatur, quod ignorat.
De sim. cap. 155. 5. Item quod nullam scientiam contemnat: Dicit enim Anselmus. Similitudo est inter stultos pauperes, & stolidos scholares. Pauper enim insipiens, dum obolum acquirit, vel aliud parvi pretij, dicit, ad quid istud tantillum servabo? Iam propter hoc dives non ero. Expendam ergo hoc in pomis, aut nucibus, aut quacunque re delectabili; non enim istud custodiendo sollicitus esse volo. Sic stolidus scholaris dum parvi pendit minima, numquam proficit ad maiora. Sapiens verò pauper, parva quæ acquirit, diligenter custodit; & quo minus se habere considerat, eo magis servare ea desiderat, & ex paruorum congerie ad maiora quandoque pertingere. Sic is, qui sentit se pauperem esse scientiæ, debet facere, si velit ad aliquem profectum scientiæ pervenire. Nam sicut plura grana massam, & guttæ fluvium, & multi nummi divitem faciunt; sic multæ particule scientiæ sapientem efficiunt.

6. Item requiritur quod illatas iniurias, & contumelias patienter sustineat. Circa hoc etiam antiqui Philosophi dicuntur fuisse studiosissimi. Vnde quidam Philosophus cuidam maledicenti sibi dixit; Tu didicisti maledicere, & ego didici maledicta contemnere. Legitur etiam quod Socrates cum semel per villam transiret, & quidam cum pugno in capite percussisset, nihil aliud respondit, nisi quod percutienti, iocando ait; Malum est quod homines nesciant quando armati, & quando inermes incedere debeant. Si enim hunc ictum præsciuissem, caput cooperuissem. Legitur etiam de hoc Philosopho, quod cum nubere vellet, mulierem litigiosissimam, quam invenire potuit, sibi coniugio copulavit; quæ ipsum, statim ut domum intraerat, iurgijs & contumelijs impetebat. Ille autem, ut patientissimus, ad omnia tacebat; cumque ab amicis interrogatus fuisset, cur tam inquietæ mulieri nupsisset, respondit; ut discerem in domo, qualis deberem esse in foro. Hieronymus etiam in l. contra Iovin. loquens de patientia

eiusdem Socratis, dicit. Accidit quodam tempore, quod cum socra-
tes uxori suæ in alto domus suæ solario existenti, eique infinita conui-
tia ingerenti, diu per patientiam restitisset, tandem aqua immunda
perfusus, nihil respondit ampliùs, quàm detergo capite; Sciebam (in-
quit,) quod post ista tonitrua sequeretur pluuia. Olim cum Philoso-
phiæ studium floreret Athenis, senex quidam sedebat in porticu ciui-
tatis, & quando scholaris aliquis veniebat ad studium, senex ille con-
uitiis prouocabat illum; & si videbat in eo aliquod signum impatien-
tiæ, non permittebat eum intrare; sed tanquam ineptum ad studium,
compellebat eum ire retrorsum. Scholaris ergo internus oculus, non
debet esse prominens siue tumidus superbia, sed profundus humili-
tate.

7. Authores autem Perspectiuæ solent causam triplicem assignare
quare peius vident, qui habent oculos prominentes, quàm qui oculos
profundos habent. Prima causa est, quia profundus oculus est magis
a nocuentis exterioribus elongatus. Secunda causa est, quia in ocu-
lo profundo virtus visiva ampliùs adunatur, eo quod magis interius
profundatur. Tertia causa est, quia profundus oculus ad neruum
communem propinquius accedit, in quo neruo virtus visiva consistit.
Ex consimilibus sapientia magis conceditur humilibus, non superbis.

8. Primum quidem tumor id est superbia obstat visui animæ, eum vero
iuuat & acuit humilitas: & quia humilitas est maximè à periculis elon-
gata, & ideo nouit declinare pericula. Vnde cum S. Antonius mun-
dum laqueis plenum vidisset, & quæreret, quis laqueos euaderet, res-
ponsum est ei, quodd humilitas. Nec mirum si humilitas laqueos eua-
dit, quia caput demittit, & quis ad terram respicit, vnde Psalmista,
Humiliatus sum, & liberauit me. Hoc est autem initium sapientiæ
scire scilicet mala declinare. Secundo quia bona sua non ostentat, sed
magis congregat, & occultat, & quanto ampliùs, tanto vider perfe-
ctius. Vnde, sicut dicit Plinius; Oculus existens in profundo puteo
potest de die stellas videre in celo. Ideo dicit Ptolomeus, qui inter
sapientes humilior est, sapientior existit; sicut locus profundior magis
abundat aquis. Tertio, quia humilitas est Deo maximè propinqua.
Vnde & Beata Virgo, quæ fuit humillima, ac per hoc Deo summè pro-
xima, omnia verba saluatoris in corde suo legitur conseruasse. Et ideo
pleniorum notitiam de diuinis creditur præ cæteris accepisse. Et alibi
dicitur. *Qui appropinquanti pedibus eius, accipient de doctrina illius.* Deuter.
Qui ergo volunt ad veram scientiæ doctrinam peruenire, ad eum de-
bent per veram humilitatem accedere; qui scientiarum Dominus est in 1 Reg. 2.
quo sunt omnes thesauri sapientiæ & scientiæ absconditi. Oporter enim
familiarem esse thesaurario, qui vult gaudere de thesauro. Debet qui-
dem ad ostium eius pulsare humiliter, in cuius manu est liber omnium
sciendorum, quem solus Agnus qui occisus est, dignus est aperire. Hæc
est clavis illa quæ aperit, & nemo claudit; claudit & nemo aperit, &

HHhh iij

sine qua ad intelligentiam veram nemo accedit: Hic est enim qui cum discipulorum oculi tenerentur, ne sapientiam quæ eos alloquebatur agnoscerent, aperuit eis sensum ut Scripturam intelligerent. Nam qui præsumptuose ingenij aut studij viribus, scripturarum integritatem, quasi ostium infringere tentat, quasi à sacrario sapientiæ exclusus, ab intelligentia veri, alienus existit. Nam & sodomitæ, dum Angelos correptores malitiæ & viri iusti hospites corrumpere voluerunt, cæcitate percussus sunt aberrantes contra parietem tanquam cæci & tenebris involuti. Sic dum elati ad parietem Scripturarum oberrant, iusto Dei iudicio cæci fiunt, & sensum rectum qui in domo est simplicis cum quo est sermocinatio Dei, & qui corrector est malitiæ, videlicet Angelum non attingunt. Scriptura siquidem sacra, est velut Angelus, qui Deo mittente ad increpandam hominum malitiam, in mundi Sodomam & Gomorram descendit, & dicit: *Audite verbum Domini principes Sodomorum: auribus percipite legem Dei populus Gomorrae.*

Isaia 1.

9. Secundum quod impedit debitam dispositionem oculi, est pulvis avaritiæ, & ideo Philosophi quidam execrabantur diuitias: nec putabant cum earum sollicitudine posse aliquam scientiam obtineri. Unde, sicut dicit Tullius, Nobiles Philosophi, desiderio scientiæ acquirendæ patriam relinquentes, in exilium iuerunt, numquam postea reuersuri. Etiam Anaxagoras ut refert Valerius, cum post longa tempora studiorum, in patriam rediisset, ac possessiones suas quas reliquerat, desertas reperisset; Non essem (inquit) saluus, nisi ista perisissent. Dicit etiam Socrates. Nemo locuples fiat ut doceat, nisi se ad discendum pauperem & egenum credat. Sicut enim pulvis oculum obtegit, & visum impedit; sic rerum affluentia lumen rationis extinguit. Vnde pulchre ait Polycraticus.

Lib. de
Offic.
Multos
collegit
Hieron.
epist.
103. ini-
tio.

Joannes
Saris-
ber.

*Nulla libris erit apta manus ferrugine tincta,
Nec nummata queunt corda vacare libris.
Non est eiusdem libros, nummosque probare;
Nummipetes cum libricolis nequeunt simul esse.
Ambos crede mihi, non capit una domus.*

L. 6. in
proam.

Crates etiam, cum Athenas discendi causa pergeret; magnum pondus auri procecit in mare, & ait; ite pessimæ diuitiæ, sollicitudinibus plenæ: submergam vos, ne submergar à vobis. Refert Vitruvius, quod Aristippus Philosophus Socraticus; cum per naufragium ad littus Rhodiensium fuisset eiectus, cum Geometricas figuras vidisset in Sabulo, ad comites exclamavit præ gaudio, Benè speremus, hominum enim vestigia video: statimque in oppidum Rhodiense conscendit, & ad gymnasium deuenit. Ibiq; disputans cum Philosophiæ professoribus, donatus est multis muneribus, ut non tantum se ornaret, sed etiam eos qui secum fuerant, & vestitum & cætera quæ opus erant, ad victum præstaret. Cum autem eius comites in patriam voluissent reuerii, &

ei dicerent, quæ domum vellet renunciari; Dicite (inquit) cum ad patriam veneritis huiusmodi possessiones & viatica, oportere parare liberis, quæ factò naufragio possint euadere, & possessoribus suis, cum ipsis euadentibus, talia vitæ præsidia præstare, quibus obesse nequeat quantalibet rerum mutatio, nec belli vastitas, nec fortuna aliqua, quantumvis aduersa. Ecce Philosophicum simul & salutiferum documentum, hortans ad sapientiam potius quàm ad pecuniam acquirendam, iuxta illud, *Præposui sapientiam regnis & sedibus & diuitias nihil esse duxi in comparatione illius. Arena exigua est, & tanquam lutum aestimabitur argenti in conspectu illius.* De hoc etiam Theophrastus ait. Inter homines solus ille qui fuerit doctus, in alienis locis non reputabitur peregrinus. Amisissis enim familiaribus non erit amicis necessariis destitutus, sed in omni ciuitate reputabitur tanquam ciuis & notus difficilisque fortunæ, sine timore potest despiciere casus. Ille verò qui non scientiis sed diuitiis est vallatus, lubricis incedit, itineribus, præsidii innitens infirmis & instabilibus. Omnia enim munera fortuna, cum dantur ab ea, facillè adimuntur: Disciplina verò cum animis coniuncta, permanent stabiliter, vsque ad exitum vitæ. Hinc apparet quorundam modernorum stultitia, qui omnem scientiam, laborem inutilem arbitrantur, nisi eam diuitiæ sequantur: cum tamen secundum Sapientis sententiam constet, eam super salutem & speciem diligendam.

Tertium quod impedit debitam oculi dispositionem, est humor carnalis concupiscentiæ. Vnde dicit Philosophus quòd aues habentes in oculis humorem purum & temperatum, sunt acuti visus, & alti volatus: sicut patet de aquila, quæ propter puritatem oculorum volat cæteris auibz altius, & Solem cernit irreuerberatis obtutibus. Modo consimili, habentes puritatem mentis & corporis, pennis virtutum volant sublimius, & cælestia contemplantur limpidius. Hinc est quod Ioannes Euangelista propter Vitæ puritatis prærogatiuam, præ cæteris, tanquam cælestis aquila, tunc altius volauit; quando fluentia Sapientia de ipso Dominici pectoris fonte potauit. Paulus etiam qui de puritate sua loquens, ait, *Gratias ago Deo meo, cui seruo in conscientia pura*, quasi iam ad cælestia volasset, dicit, *Conuersatio nostra in cælis est.* Fuit ergo alti volatus, fuit etiam acutissimi visus, quando ad tertium cælum, id est, tertium genus visionis, vt intellectualiter contempleretur cælestia, fuit raptus. Et dicit Cassiodorus quòd Paulus venit ad tantam Sapientiam propter carnis munditiam. Sapientia enim cum speciosior sic Sole, vt dicitur in lib. Sapientia mundum requirit hospitium.

10. Narrat Gregor. Nazianz. quòd cum ipse iuuenis studeret Athenis, apparuerunt ei in visione duæ speciosissimæ puellæ, & accedentes propius ruerunt in eius amplexus. Ipse verò, vt castus, erubuit; & admiratus non modicum, (ait;) quanam estis, & vnde? Nos (inquiunt)

Sap. 8.

Sapient.

7.

Lib. 1. de animal.

1. Cor. 11. Philipp.

3. 2. Cor. 12.

Cap. 7. Refert

Ruffinus in præf.

ad tractatum

eius de fide &

Aldet. de Virginit.

cap. 12.

sumus puellæ admodum tibi familiares, & dilectæ. En ego sum Castitas, dicit una, & ego Sapientia, subiungit alia; & venimus ad te, ô castissime iuuenis, habitare tecum; quia tu nobis in corde & corpore tuo sanctum habitaculum preparasti. Sapientia enim in animas sanctas se transfert, & immundum deestatur habitaculum.

Sap. 7.

Cap. 19.

Psal. 18.

Lib. 3. crudidi. dast. c.

13.

Lib. 8. de ciuit. 3.

In cuius rei figuram legitur in Exodo quoddam Moyses filiis Israël recepturis legem præcepit ut vestimenta lauerent, & à mulieribus abstinere. Cum enim *lex Domini sit immaculata*, ut dicit Psalmista, & *eloquia Domini eloquia casta*; diuina Sapientia immaculatum & castum requirit habitaculum, & discipulum. Ideo dicit Hugo; Illaudabilis est scientia quam vita maculat impudica. Et 1. Reg. 21. Abimelech Sacerdos antequam panes propositionis daret Dauid; & pueris eius, diligenter quesivit, *Sunt ne vasa puerorum munda maxime à mulieribus*. In quo mysticè datur intelligi, ut qui desiderant à summo Sacerdote Christo, pane sapientiæ & intellectus cibari, studeant castitati. Vnde dicit etiam Augustinus quod Socrates, primus inter Philosophos, Philosophiam conuertit ad mores, cum omnes ante illum magis naturalibus libidinibus exoneratus animus, ad noticiam diuinorum ascendere posset; ubi tanquam in suo fonte, omnium rerum causas aspiceret. Sicut enim candela madefacta vix potest accendi; sic in corde pleno carnali concupiscentia, lumen doctrinæ vix potest suscipi; Et, si fortè recipitur, citò à vento vanitatis extinguitur. Et sicut oculus carnalis clarè videre non potest, si fuerit lippus, vel sordibus plenus. Si ad hoc quod oculus sincerè diuinam Sapientiam contempletur, oportet ut ab humore prauo carnalis concupiscentiæ depuretur. Vnde dicitur de puero Prophetæ, *Aperuit Dominus oculos eius, & vidit montem plenum curribus, & equis in circuitu Helia*. Perfecta namque Sapientia contemplatio non compatitur fœditatem incontinentiæ. Vnde dicit Hieron. ad Rusticum Monachum. Ama scientiam Scripturarum, & carnis vitia non amabis.

4. Reg. 6.

Epist. 4.

Psal. 106.

Epist. 36.

Lib. 2. de summo bon. c. 42.

Cap. 1.

II. Non solum autem debitam dispositionem interioris oculi tollit vel impedit humor carnalis concupiscentiæ ad luxuriam, sed etiam quantum ad gulam. Nam ut ait Seneca copiâ ciborum, animi subtilitas impeditur. Vnde Psalmista, *Turbati sunt, & moti sunt, sicut ebrius, & omnis sapientia eorum deuorata est*. Et Hieron. contra Iovinian. Sapientiæ operam dare non possumus, si mensæ abundantiam cogitemus. Nam, ut dicit idem Hieronymus non est eiusdem hominis manè gustare, & Prophetas vel Apostolos intelligere. Et Ildorus. Qui nimium cibis vtuntur, quanto magis ventrem pascunt, tantò amplius sensum mentis obtundunt. Nam Græci dixerunt, ex crasso ventre subtilem sensum gigni non posse. Et ideo dicit Ecclesiastes, *Cogitavi à vino abstrahere carnem meam, ut animum meum transferrem ad Sapientiam*. Ideo dicitur in Daniele quoddam pueris, qui à vino abstine-

runt,

runt, & cibus regis vesci noluerunt, *dedit Deus scientiam & disciplinam.* In omni libro & sapientia; Danieli autem omnium visionum & somniorum intelligentiam. Et Danielis 10. dicitur; *In diebus illis, ego Daniel lugebam trium Hebdomadarum diebus, & panem desiderabilem non comedi, & caro & vinum non intraverunt in os meum.* Et sequitur postea, quod missus ad eum Angelus, reuelavit arcana.

12. Cum ergo sobrietas mentis, & studium Sapientie sint connexa, & tanto federe sociata, indecens est viris Scholasticis, si vacent epulis, & studeant calicibus epotandis. Vnde quidam scholaris socio suo, qui relicto studio, comestationibus intendebat, ita scripsit. Tu qui disciplinarum militie & libris omnia postposueras, nunc codices ad calices transtulisti, & scribere in bibere conuertisti. Et nunc pradicaris egregius potator, qui prius fueras nominatissimus disputator; Plus studens in calicibus, quam in codicibus; plus vacans comestationibus, quam lectionibus; *Plus in salmone, studes quam in Salomone.* Non est hac mutatio dexteræ Excelsi: Patet igitur, quantum spectat ad informationem scholarium, quod debita dispositio organi requiritur ad visum & qualiter hac dispositio impeditur per tria.

I. I. De libris scholarium, non tam succubo, quam memorie commendandis.

13. Secundo ad visum requiritur presentia obiecti: non enim sufficit scholari, ut à magistro audiat, sed etiam oportet ut etiam libros diligenter inspiciat. Nam duo sensus deseruiunt acquirendæ scientiæ, scilicet visus & auditus. Ideo dicitur, *Aurem audientem, & oculum videntem, Prov. 10.* Dominus fecit verumque. Propterea dicit Augustinus. Sine Scriptorum Epistol. notario, aures decerpunt labores studentium, sicut venti puluerem rollunt. Ideo dicit Hieronymus, Utinam omnium tractatorum haberem volumina, & tarditatem ingenij, eruditionis diligentia compensarem. Sunt etiam quidam, qui libros multos & bene aptos habere volunt; sed in eis studere nolunt; & tales per Herodem signari possunt, qui interpretatur *glorians in pellibus.* Gloriantur enim in pellibus caprinis, vel vitellinis. Sed sciendum est illis illud, quod dicitur apud Iobum. *Pellem pro pelle,* ut scilicet pro pelle caprina, quam detinent in iniustitia, detur pellis in inferno cremanda. *Cap. 2.*

Scholaris debet esse assiduus in legendo & studendo. Hieron. Diuina Scriptura semper sint in manibus, & iugiter mente voluantur: nec sufficere potest mandata memoria tenere, & operibus obliuisci. Idem Diuinas Scripturas sapius lege; imò sacra lectio de manu tua nunquam deponatur. Væ autem habentibus libros, nec legentibus. Nam tales, ut dicitur ab Apostolo, *Veritatem Dei in iniustitia detinent,* quia libros suos, de quibus nihil faciunt, deberent tradere pauperibus scholaribus, qui libenter addiscunt. Isti fructus scientiæ non attingunt, quia

in libris, quos propter eorum pulchritudinem detinent clausos, raro vel numquam student; ideo non est mirum si in eis parum intelligant, qui libros etsi habeant, sibi velant. Ad visum, sicut dixi, requiritur praesentia obiecti; & ideo de talibus dici potest, quod legitur in Isaia, *Et erit vobi visio omnis, sicut verba libris signatis, quem cum dederint scienti literas,* (id est, qui reputatur scire, cum tamen nihil sciatur,) *dicenti; lege istum, & respondebit,* (id est, respondere poterit,) *non possum; signatus est enim.*

14. De talibus scholaribus, ait quidam: in nugis sunt subriles, in necessariis tardi & habetes; & ne nihil fecisse reputentur, cum repatriauerunt, de pellibus vitellinis cum magnis expensis lata componunt volumina, eaque pellibus rubris & pulchris vestiunt; & cum sapienti sacculo, (licet cum insipienti animo) ad parentes redeunt. Quae est ista scientia, quam fur subripere, & aqua delere, & ignis comburere & mus rodere & tinea demoliri potest? Cum quidam semel de numero talium clericorum fatuorum rediret ad patriam cum numerositate librorum, casu contigit quod eius somarius libros portans in aqua cecidit; & sic totum amisit. Quod attendens scholaris quidam post eum pedicans, pauper libris, diues autem scientia qui, quod in scholis audierat, non libris, sed memoriae commendauerat, hos versus composuit; & ei, qui libros simul, & scientiam amiserat, recitauit.

Cordi, non chartae tradas, quae noueris arte,

Vt si charta cadat, tecum sapientia vadat.

L. 1. pro-
sa 5.

Et ideo dicit Boetius in Consolatione. Nec bibliotheca potius comptos ebore ac vitri parietes, quam tuae mentis sedem requiro, in qua non libros, sed id quod libris pretium facit, librorum quondam meorum sententias collora tui & Seneca dicit; non refert quam multos libros habeas, sed quam bonos, & in mente tua reconditos.

Epist. 45

III. Quod elongatio à Deo per peccatum, à studentibus tollit notitiam diuinorum.

15. Tertio, requiritur ad visum proportio distantiae: nam si visibile super oculum ponitur, vel nimis distat ab oculo, non videtur. Modo consimili si scholaris ab aliqua scientia nimis distat per odium, vel si accedat nimis per amorem inordinatum, non videt eam, nec rectum iudicium de ea habet. Et, sicut dicit Seneca. Perit omne iudicium, cum res venit ad affectum. Hinc contingit aliquando quod multis opera propria non multum valentia, videntur aliorum operibus, quamuis praestantioribus meliora.

Lib. de
tranq.
anim.
c. 1.

Nam, quod fecit, homo quisque tuetur opus.

16. Ut enim ut dicit Petrus Alphonsus naturaliter quisque gloriatur in suo carmine quaecunque sit, sicut & simia in sua prole. Videtur enim simia, quod sua proles ceteris antecellat in pulchritudine; cum

tamen extremum locum teneat in deformitate. Vnde simia de suo filio fingitur dixisse,

Iudicio super est omnibus iste meo.

Sic etiam dicit Poëta, *Author opus laudat.*

Et iterum.

Est cupidus doctor, studiorum quisque suorum.

Sicut interdum homo de suis operibus malè iudicat, eo quod sunt ei nimis proxima per amorem; sic de aliorum operibus, si distent ab eius affectu per odium vel rancorem. Nam vt dicit Gregorius, non facile capit intellectus, quod abhorret affectus.

17. Potest etiam poni secundum alium modum proportio distantia, quæ requiritur ad visum; vt dicatur quod sicut distantia temperata ad visionem requiritur, ita vt nec ex superflua distantia, nec ex approximatione nimia, visibile videatur; sic & in spiritali visione requiritur. Nam elongatio à Deo per infidelitatem & multitudinem peccatorum, tollit notitiam diuinorum. Vade Iſaias, *Iniquitates vestra diuiferunt* *inter vos, & Deum vestrum; & peccata vestra absconderunt faciem eius à vobis.* Et Augustinus dicit. Errat qui se veritatem cognoscere putat, si adhuc nequiter viuat. Hoc etiam impedit præsumptio diuinæ familiaritatis nimia, & persecutio maiestatis, secundum illud *Scripta Prou. 25* *tor maiestatis opprimetur à gloria.* Et in Canticis dicit Sponsus ad *Cap. 6.* Sponsam. *Auerie oculos tuos à me; quia ipsi me auolare fecerunt.*

*IV. Quarta informatio, quod scientiis solidis
studendum sit, non vanis.*

18. Quartò, Ad visionem requiritur soliditas rei visæ: vnde quia aër non est corpus solidum, non est visionis obiectum. In quo informantur Scholastici citra intellectuales visiones intenti vt studeant in scientiis solidis, non in vanis. Dicitur autem in libro Sapientia. *Vani* *Cap. 2.* *sunt omnes homines, in quibus non est scientia Dei.* Scientia autem Dei est sacra doctrina, per quam homo cognoscit Deum, & seipsum. Et Beatus Bernardus orans, sanctus quidam, Deus (inquit) nouerim me, nouerim te. Breuis oratio, sed fidelis; hæc enim est vera Philosophia, & vtraque cognitio prorsus necessaria ad salutem. Ex priori quidem concipitur fides, & humilitas: ex posteriori spes, & charitas generatur. Et Augustinus dicit. Scientiam cælestium tenes triumque *L. de* rerum, magni æstimare solet genus humanum, in quo profectò me- *Trinit.* liores sunt qui huic scientiæ præponunt nosse semetipsos. Laudabilior quippè est animus cui nota est infirmitas sua, quàm qui ea non respecta vias syderum scrutatur etiam cogniturus; aut qui iam cogni- *Lib. de* tas tenet, ignorans ipse viam qua ingrediatur ad salutem. Et Seneca *liberal.* dicit Fatuum est studere diuisionibus terrarum, & seipsum nescire me- *studiis,* tiri: stultumque est vacare concordia musicorum, & non habere con- *sub ini-* tium.

cordiam cum proximo vel cum seipso. Et Bernardus super Cantica;
 Serm. 36. Vtilitas scientiæ in modo sciendi consistit; vt scias quo ordine, quo studio, quo fine, quantum scire oporteat. Quo ordine, vt id prius, quod magis necessarium est ad salutem: quo studio, vt illud ardentius, quod vehementius ad amorem: quo fine, vt non ad inanem gloriam, aut curiositatem, aut aliquid simile, sed tantum ad edificacionem tui, vel proximi.

19. Sacra Scriptura est tanquam spiritualis apotheca; in qua inuenitur efficax contra omne vulnus vnguentum, salubre contra morbos antidotum, salutiferum contra dolores remedium. Et sicut dicit Chrysostom. In sacra Scriptura inuenit ignorans, quod discat, contumax quod timeat; laborans præmia, pusillanimis solatia. Ecce quanta est in sacra Scriptura soliditas; & quam elongata est ab ea vanitas. Idem Sapiens inuitans nos ad studium Sapientiæ diuinæ, dicit. *Ecce descripsi eam tibi tripliciter: in cogitationibus & scientia; vt ostenderem tibi firmitatem, & eloquia veritatis.* Et idem ad hanc tanquam ad obiectum firmum & solidum debemus dirigere oculum rationis. Vnde dicitur ab Apostolo. *Habemus firmiorem propheticum sermonem, cui bene facitis attendentes.* Ergo iuxta consilium Hieronymi ad Paulinum discamus in terris, quorum scientia nobis perseveret in cælis.

20. Sed sunt multi qui sacram doctrinam adeo solidam, reputant, vt inanem & vanam, dicentes illud Numeri, *Nil aliud respiciunt oculi nostri, nisi Man.* Quod interpretatur, *Quid est hoc.* Et rursum. *Anima nostra iam nanscat super cibo isto lenissimo.* Sed istorum visus decipitur. Nam in sacra Scriptura, veritas solidissima continetur. Dicitur enim 11. Petri 1. *Non enim voluntate humana, allata est aliquando Prophetia, sed Spiritu sancto inspirati, locuti sunt sancti Dei homines.* Dicitur etiam a Salomone. *Labium veritatis firmum erit in perpetuum.* In secularibus vero scientiis est vanitas multiplicis erroris. Idem dicit Jeremias, *Hec dicit Dominus: iuxta vias gentium nolite discere; quia leges populorum vane sunt.* Et Apost. ad Titum. *Stultas autem & inanes quaestiones deuota, sunt enim inuiles & vane.* Narratur Geneleos 11. quod turris Babel dum præsumptuose erigeretur in cælum, præsumptuosus sublatum est vnitatis linguæ commercium, & facta diuisione linguarum, subsecuta est sectio populorum. Sic & Philosophi, dum sui ingenij machinas erexerunt in altum, caelestia & diuina curiosè rimantes, & de suis viribus præsumentes, subtracta est eis veræ & incommutabilis vnitas veritatis; & ignorantia nebula obuoluti, & in reprobum sensum dati, in sectas errorum varias sunt dispersi, & dicentes se esse sapientes, stulti facti sunt. Et idem in dictis eorum parum est soliditatis, & multum vanitatis Ecclesiasticis 6. *Verba sunt plurima multamque in disputando vanitatem habentia.* Et Ieremia, *Annulauerunt post vanitatem, & vani facti sunt.* Et tandem cum hoc percipiunt, dicunt, vel dicere possunt illud Psalmi. *Oculi mei languerunt*

pre inopia. Quia in talibus scientiis non reperitur resectio spiritualis. Vnde Hieronymus ad Damasum, loquens de siliquis, quibus non poterat filius prodigus saturari, dicit: in his nulla saturitas veritatis, nulla resectio reperitur iustitiæ, studiosi earum in fame veri, & virtutum penuria perseverant. Et ided dicitur in Psalmis, *Beatus vir cuius est nomen Domini spes eius, & non respexit in vanitates & insanas falsas.* Istæ enim sunt scientiæ quæ faciunt insanire. Vnde dictum est Paulo, *Insanis Paule, multa litera faciunt te insanire.*

21. Et ided scientiis secularibus, non debet homo esse nimis intentus. Hieronymus ad Eustochium, refert de seipso, quod, ided quia circa libros Ciceronis erat nimium studiosus, ante tribunal æterni Iudicis est deductus, & ibi atrocissimè verberatus. Narratur etiam in vita Beati Vgonis Cluniacensis, quod cum semel dormiret, vidit per somnum sub capite suo cubare multitudinem serpentum & ferarum; & euigilans & inquirens, inuenit librum Nasonis sub cervicali repositum, obscenitatibus plenum, & ritibus gentilium, quem postquam abiecit, in pace quieuit.

22. Et ided debet scholaris orare, *Auerte oculos meos, ne videant vanitatem*, scilicet scientiarum secularium. *In via tua vinifica me.* Hæc via est sacra Scriptura, siue lex diuina, de qua Psalmista. *Viam mandatorum suorum cucurri.* Hæc est via, quæ ducit ad cælum. Iuxta illud. *Concupiscentia sapientiæ deducit ad requiem perpetuam.* Huic ergo debet vnus quisque scholaris adherere; & quidquid de secularibus scientiis nouit, in huius seruitium dedicare. Vnde Hieronymus exponens quod habetur Deut. 21. ita dicit. Secularis sapientiæ typus in Deuteronomio sub mulieris captiue figura describitur; de qua diuina lex præcipit, vt si Israëlites habere voluerit eam uxorem, caluiciem ei faciat, vngues resecet, & pilos auferat; & cum munda fuerit, tunc transeat in eius amplexus. Hoc sic intelligimus, quod, quando in manus nostras libri venerint sapientiæ secularis: si quid in eis vtile reperimus, ad nostrum dogma conuertamus. Si quid verò superfluum de idolis, de amore, de curis secularium rerum viderimus, iis caluicium inducamus; hæc in vnguium morem, ferro acutissimo resecamus, & ideo nec absurdum est, nec inconueniens, si inter verba Prophetæ Philosophia vel ciuilis scientiæ doctrina, maximè cum ratio hoc postulauerit, admittantur. Nec debet aliquis calumniosè quærere de qua facultate fumanur, dummodò ædificent ad salutem. Sicut de herbis non quæratur, quæ terra eas procreauit, aut quis hortulanus excoluit, dummodo virtutem habeant salutarem. Et ided interdum causa eruditionis communis aliqua de Gentilium libris recipi possunt in diuinis eloquiis: Nam & Paulus Apostolus cum quosdam velleret redargui, vltus est versibus Epimenidis Poëtæ.

Epist.
146.Epist.
21.

Ps. 118.

Sap. 10.

Epist.
146.Ad Ti-
mum 2.

V. Informatio quinta, de diligenti attentione & retentione doctrine, & indefesso circa studium discendi amore.

23. Quintò, Ad visionem requiritur attentio visuæ potentia. Cum enim species multorum visibilium afficiant aërem medium, & circumstant oculum, tamen aliquando de omnibus illis visibilibus coram oculo positus, visus vnicum apprehendit; illud scilicet ad quod anima attendit. Sicut cum canis venaticus odori vnius cerui per attentionem potentia vehementer fuerit alligatus; sic illum ceruum insequitur, ut alios ceruos occurrentes, vel casualiter emergentes, non videre aut sentire videatur. De hac attentione dicit Isaias. *Vtinam attendisses* Cap. 40. *mandata.* Et ad eam hortatur Dominus. *Ponite hæc verba mea in cordibus & in animis vestris,* &c. *& inter oculos vestros collocate.* Sed multi scholares similes sunt marmosetis qui semper magistro legenti assistunt, nec scholis exeunt; tamen, quia cor & attentionem ad doctrinam magistri nequaquam apponunt, idè, licet in scholis diu fuerint, nihil tamen sciunt. Tunc enim scholaris in studio proficit, cum iis, quæ legit, vel audit, diligenter intendit: & cum ea, quæ legerit vel audierit, intus in cordis icrinio examinat & reuoluit. Aliter Dionys. Cato in re, & non intelligere, (id est, intus non legere,) negligere est. *legere* dicit Bernardus ad fratres de monte Dei: De quotidiana lectione, aliquid in ventre memoriæ reponendum est, quod fidelius digeratur, rursumque reuocatum, crebrius ruminetur. Item dicit Seneca, cum multa percurreis in die, vnum elige, quod illa die concoquas. Et idem Lib. 3. de benef. 6. 2. *neceffe est vt quoties ad intellectum reuocant, memoriæ affigant, Quorum enim velox est stylus, eorum labilis est memoria.*

24. Sed multi sunt scholares desides, qui studio nolunt mentem apponere, ut multiplicem laborem studij valeant euitare. Nam, ut ait Seneca, desidioso, studere, torpere est. Dum amat piger Clericus sine labore viuere, querit solatium suæ imperitiæ. Dicit enim, cum audit quod ardentè alij student, ad quid labori studij me subiicerem? Ad quid sapientiæ studerem? Non enim peribunt, qui sapientes non sunt. Præterea satis sapientum est in mundo, non est opus quod ego me fatigem, & cruciem in discendo. Præterea dicit; Satis sunt Sapientes in mundo. Non est opus ut me fatigem, & cruciem in discendo. Primam pueritiam exitui, & senectuti appropinquauit, nec iam possem ad magnæ scientiæ fructum peruenire, si modò inciperem laborare. Sic secum piger tractat, & in sua desidia, simul & ignorantia perseverat: nec percipit, quod antiquus hostis ad interitum eius talia suggerit: quatenus in tota vita sua nulli utilitati intendat, sed in torpore & ne-

OCVLVS MYSTICVS.

543

gligentia simul & imperitia semper viuat, & tandem pereat. Dicit enim; moritur similiter doctus & indoctus. In fine moriar poenitens; & ita benè saluabor, sicut sciens. De talibus ait quidam Poëta.

*Sunt quidam, qui scire volunt, sed non operari,
Nec studium penamque pati: modus iste Catianus.*

25. Catus benè vult comedere piscem, sed non piscari. Habui ego socium, qui poterat tota nocte de otiosis & friuolis fabulando vigilare; qui tamen, prout est mihi confessus, sepè studium sic habuit exosum, vt si contingeret quod aliter dormire non posset, aperto libro & perlectis in eo 4. vel 5. lineis, protinus obdormiret. Iste planè contrarius erat ei, de quo refert Cassianus. Cum, (inquit,) Egypti prouinciam petissemus; vidimus senem quemdam nomine Macherem hanc à Domino gratiam diutinis precibus impetrasse; vt diebus ac noctibus nunquam dormiret, cum ageretur collatio spiritualis. Si quis verò detractionis verbum, seu otiosum tentaret inferre, in somnum protinus concidebat; Sic quod nec vsque ad aurem eius, polluti virus alloqui poterat peruenire.

26. Non sic leguntur fuisse desides olim ad studium Philosophi; immo potius tanquam indefessi Sapientiae milites, circa Philosophicum gymnasium miro modo fuerunt intenti. Narrat Valerius Maximus, quod Marcellus captis syracusis, machinationibus Archimedis Philosophi, multum ac diu victoriam suam senserat retardatam. Eximia tamen Philosophi prudentia delectatus, vt capiti illius parceretur, edixit, penè tantum gloriae in Archimede seruato, quantum in syracusis castris reponens. Iste verò Philosophus, dum anima & oculis in terram defixis formas describit, militi qui praedandi gratia domum irreperat, strictoque super caput gladio, quisnam esset interrogabat, propter nimiam cupiditatem inuestigandi quod inquirebat nomen suum indicare non poterat: sed protracto manibus puluere, noli (inquit) obsecro, istum disturbare. Ex quo quasi negligens imperij victoris, capite truncatus, sanguine suo, artis suae lineamenta confudit. Et sic accidit vt propter idem studium, modò donaretur vita, modò spoliaretur. Eadem ergo industria sibi dedit vitam & abstulit. Narrat etiam Hieronymus, cum Antisthenes Philosophus nullum discipulum recipere, & Diogenem remouere non posset, nouissimè minatus ei est verbera, vt abiret; cui ille caput dicitur subiecisse, atque dixisse, nullus baculus tam durus esse poterit, qui me à tuo obsequio possit separare. Benè iste Magistri verba intenta cupiebat aure percipere, quem ab eo non valuit claua seiungere. Refert etiam Symmachus in Epistolis quod Anaxagoram Philosophum grauis de filij nuncius à disputationibus non retraxit. Refert etiam Valerius, quod Solon Philosophus, qui summo sapientiae feruore semper flagrauerat, supremo vitae die ceteris Philosophis amicis suis isti confestim morituro assidentibus, & de quadam quaestione inter se conferentibus, letho iam ferè mersum caput crexit.

interrogatusque cur hoc faceret; respondit, ut, cum illud, de quo disputatis, percepero, iucundius migrem è vita. Erubescant ergo scholares desides, cum audiunt Philosophum, etiam morientem, ab attentione studij non cessasse. Legitur etiam in Chronicis, quod Virgilius Poëta eximius interrogatus quomodo versus suos componeret; respondit, ego compono versus meos more urfino: Nam sicut urfa, quæ factum, pariendo ineffigiatum & informem ediderat, eum postmodum lambendo effigiat & format; sic versus mei, quos pario, quasi partus, cum primo prodeunt in esse, rudi & imperfecta sunt facie; sed postmodum tractando eos & versando, & summam circa eos diligentiam adhibendo, eos bene formatos reddo. Et ideo; sicut ait quidam Philosophus, artium mater est instantia, Nouerca eruditionis negligentia. Quidam describens vitam scholaris studiosi, dicit quod potus eius est ex fonte fletus, cibus ex prece, & somnus in codice. Sed hodie, scholarium plures inueniuntur desides, & pauci feruentes. Quæsiuit semel à me quidam laicus mihi familiaris & notus, in qua facultate essent plures scholares studentes Parisiis: & respondi quod in artibus, vel in Logica. Et ipse; imo in Musica, quia plures mullant quam student. Describens diligentiam & attentionem scholaris in studio Architenius, eleganti metro loquitur.

*Languidus, insomnis, & oculo & pectore noctes
Extrahit alterutro vigiles, oculosque lucerna
Pernigil, ac lippit, & lippum torquet ocellum.
Imprimis ergo libris, oculi mentisque lucernam
Et libro cubito dextroque innixus, & auri
Quid nona quid veterum peperit cautela renouit.
Nunc oculo, nunc mente bibens, nunc haurit viroque
Illo plus, illaque minus, nunc lecta camino
Decoquit ingenij, memorique in pectore, nodo
Pressius astringit; nunc quid rodosius obstat
Ingeniumque tenet, nec tollit in altius alas
Instanti rodit studio, conamine toto
Pectoris, externis primisque ignescit ocellis
Immergitque caput gremio, longumque volutat.
Præcipites reserasse vias, cursumque negantes
Oppositas fregisse fores, oculumque reducit
Sæpius ad librum, digitique & mentis acumen.*

Post hoc de sopore scholaris fatigati, versus subiungit huiusmodi.

*Nulla quies somno, nec enim cessura quieti
Cura soporatur, & nulla pacè soporis
Pacis eget study labor insopitus & ipso
Cura vigil somno libros operamque ministrat.
Excutitur somnus anima, nec prima soporis
Anxietas cedit, sed quæ vigilauerat ante.*

Sollicitudo

*Sollicitudo redit, quod non sperauerat ante,
Sequior intus vigilantis, multa magistro
Nox aperit somno, cum strati corporis extra
Sarcina dormitet, vigilans in pectore sensus.*

Tandem attentionem scholaris in presentia Doctoris describit Archi-
trenius versibus istis.

*Suscitat ingenij flammam, conamina mentis
Contrahit, exacuit animum corpusque coactis
Pectoris, incumbit oculis, riguaque Magistrum
Aure & mente bibit, & verba cadentia palmo
Promptius utroque leuat, oculis: & mentis in illo
Fixa vigilque manet facies, aurisque maritat
Pronuba dilectam cupida cum mente Minervam.*

Nota septem sunt clauces Philosophandi quas ponit Polycraticus istis
versibus.

*Mens humilis, studium querendi, vita quieta
Scrutinium tacitum, paupertas, vita remota.*

Et septima clauis, est amor docentium, vnde & quintilianus ait; *Hec
reuerare solent, multis obscura legenda.*

*VI. Sexta informatio, quod studio lectionis sit insistendum,
nec ante mortem desistendum.*

27. Sexto, Ad visionem requiritur mora temporis. Nam, vt probat
Ptolomeus quinto libro de aspectibus, licet visibile subito visui osten-
datur, non tamen distincte cognoscitur, nisi prius aliqua deliberatio
habeatur; quæ mora indiget, & tempore mensuratur. In quo schola-
ris instruitur quod lectioni debet insistere, non eam subito pertransire,
vt possit ad notitiam veritatis peruenire. Vnde dicit Bernardus ad fra-
tres de monte Dei tantum abest studium à lectione, quantum amicitia
ab hospitio, essentialis affectio à fortuita salutatione. Et Gregorius.
Veritatis intelligentia cum quæritur, assiduitate penetratur. Legitur in L. 5.
Genesi quod Patriarcha Iacob in itinere constitutus cum Angelo usque *Moral.*
ad ascensum auroræ luctam exercuit; in qua lucta nervus femoris eius *Gen. 31.*
emarcuit, & ab hac lucta non ante cessavit, quo usque benedictionem
Angelicam reportavit. Exemplo cuius & nos in via peregrinationis,
Scripturam tanquam Angelum nuncium voluntatis diuinæ, debemus
apprehendere, & cum ea luctari usque ad ortum auroræ, id est, donec
notitia veritatis luceat, & oriatur in mente. Secundum illud *Collu- Ecc. 51*
Etata est anima mea cum illa. Ex quo luctamine marcescit nervus fe-
moris; quia ex studio sapientiæ, debilitatur in homine concupiscentia
carnis, Hieronymus. Ama scientiam Scripturæ, & carnis vitia non
amabis. Ex hoc etiam, quod scholaris, intellectu & affectu, quasi
duobus brachiis, cum sapientiâ luctatur, pro benedictione clarificatio.

KKkk

Cap. 4. nem obtinet. Vnde in Prouerbiis dicitur, *Posside sapientiam; arripe eam, & exaltabit te gloria, cum eam fueris amplexatus.* Vt enim dicit Gregorius in Moral. Idcirco nonnumquam studiosus tarditate intelligentiæ punitur, ut eo maiora præmia retributionis inueniat, quo magis in studio inuentionis elaborat. De hac etiam spiritali lucta dicit Poëta.

*Mens quandoque studens, tanquam pugil, anxia pugnat,
Perstet adhuc instans, poterit mora quod nequit hora.*

In hoc ergo quod ad visionem corporalem temporis mora requiritur, ad lectionis instantiam informamur. In hoc etiam instruimur, ut omni tempore studium sapientiæ amplectamur. Ait enim Augustinus ad Volusianum: tanta est Christianarum profunditas litterarum, ut semper in eis proficerem, si eas ab ineunte pueritia usque ad ætatem decrepitam, summo studio & meliore ingenio conarer addiscere. Et

Sapient. 8. *ideo Sapiens de sapientia loquens, signanter ait. Hanc amant, & exquisiui a iuuentute mea; quasui eam sponsam mihi assumere.* Debet Sapientiam homo tanquam sponsam, non ut concubinam assumere: ut videlicet ei iudissolubili fœdere copuletur, non ut ei ad tempus adhareat, & post hoc ab ipsa recedat. Sic leguntur quondam fecisse Philosophi, qui mihi videntur in multis memoria digni. Vnde ait Valerius, Plato 81. anno decedens sub capite libros Sophronis fertur habuisse. Sic nec extrema eius quidem hora, cogitatione studij vacua remansit, Sed idem illi viuendi & Philosophandi finis fuit: in quo etiam ostendit aliis tempus deesse, alios vero temporis. Et Quintilianus dicit. Amor scientiæ, & vsus lectionis, non scholarum temporibus, sed vitæ spatio terminetur.

V. I. I. Instructio septima, quod studentes indigent lumine gratiæ, & de triplici oculo.

29. Septimò & vltimò, Requiritur ad visionem diffusio luminis medium illustrantis: nihil enim videtur in tenebris. Vnde probatur in Perspectiua scientiæ, quod nihil videtur nisi per lucem Orientem super rem visam, ab eadem usque ad oculum multiplicatam. Sic ad hoc quod oculus noster intellectualis veritatem aliquam apprehendat, necesse est ut super eum Solis iustitiæ splendor fulgeat: *Deus enim est lux vera, que illuminat omnem hominem venientem in hunc mundum.* Et ideo, sicut sine corporali lumine non fit visio corporalis, sic absque isto diuino lumine, non fit visio intellectualis; Deus est enim, qui docet hominem scientiam, ut dicit Psalmographus. Et Augustinus, In cælis cathedram habet, qui corda docet. Solus enim Deus docet hominem effectiue, homo autem docet alium tantum excitatiue. Quod in libro de Magistro, docet Augustinus triplici signo. Primò, quia sine doctore potest homo ad scientiam peruenire. Ergo oportet illum

547

40. no-
mis.
C 12.
E 1097.

Epist.
34.

Epistol.
108.

*De informatione Prelatorum ex septem proprietatibus
oculorum.*

Oculus in eminentiori loco corporis locatur; pro toto corpore speculatur; ea, quæ sunt ab eo distantia, non sibi adherentia contemplatur; senescente corpore deficit, & debilitatur; cæteris membris dolentibus, tanquam compatiens, lacrymatur; pilos habet in palpebris, quorum quantitas non augetur. Magna in eo reputatur macula, quæ in cæteris membris modica censeretur.

*Prima instructio, quod Prelati sicut dignitate, sic præcellere
debeant sanctitate.*

1. part.
pastor.
c. 2.
Lib. 3. de
confid.
c. 7.

2. Primò igitur oculus in corpore præ cæteris membris locum obtinet celsiorem; & hoc propter maiorem inter cætera membra dignitatem; In quo, natura docente, instruuntur oculi spirituales Ecclesiæ, scilicet Prelati, qui loco oculorum sunt Ecclesiæ dati, ut, sicut præcellunt alios status dignitate, sic & vitæ superemineant sanctitate. Nam, ut dicit Gregorius; Moribus debet esse conspicuus, qui cæteris proponitur imitandus. Et Bernardus ad Eugenium. Audi Canticum minus suaue, sed salubre. Monstruosa res est gradus summus, & animus infimus; sedes prima, & vita ima; lingua magniloqua, & manus otiosa; sermo multus, fructus nullus. Et idèd Constantinus Imperator Helenæ matri suæ, quæ sibi aliquid mandauerat iniquum, sic legitur scripsisse. Quanto excellentiorem tenemus locum inter homines, tanto magis omnium patemur aspectibus. Omnium itaque mortalium, oculi, omnium iudicia, omniumque vota, nostrum velle, & nostrum nolle considerant; & idèd non solum debet esse irreprehensibile, sed etiam laudabile, quod volumus.

Epistol.
237.

3. Lapis magnus de monte corruens multos subiectos lapides secum trahit; sic & Prelatus si peccauerit, exemplo suo multos in barathrum inferni demergit. Gregorius, cum pastor per abrupta vitiorum graditur, necesse est ut ad præcipitium grex ducatur. Quia etiam in alto Prelati sunt positi, possunt, & debent non immerito casum vereri. Vnde B. Bernardus in quadam Epistola quam scripsit Eugenio nouiter in Papam creato, sic dicit. Factus est de filio meo Bernardo pater meus Eugenius: Magna prorsus mutatio; qui post me venit, ante me factus est. Fateor; non inuideo: Considero namque gradum, & vereor casum: fastigium dignitatis considero, & iterum periculum re-

formido; pro eo quod scriptum est, *homo, cum in honore esset, non intellexit*. Ac si vellet dicere, honor obscurauit intellectum.

4. Debet etiam Prælatus attendere quia quanto gradus altior, tanto casus grauior. Vnde legitur quòd *cecidit Ochusias per fenestras coenaculi, quod fecerat in Samaria, & mortuus est*. Non tam lethaliter ex casu vulneratus fuisset, si tam altè non ascendisset. Resonare debet sæpius in auribus Prælati, illud verbum Donati. Præpositioni quot accidunt? vnum. Quid? Casus tantum. Quot casus? duo. Qui? accusatiuus, & ablatiuus. Hoc enim debet Prælatus timere, accusari de crimine, & auferri de regimine, & sic ignominiosè cadere.

5. Oculi in alto positus, inferiora modica iudicat; & si inferius respiciat, timendum est homini ne per hoc euanescat, & cadat. Sic & Prælato timendum valdè, ne dum ab alto subiectos tanquam pusillos considerat, per superbiam euanescat, & sic spiritaliter cadat. Ideò dicitur in Ecclesiastico. *Rectorem te posuerunt; noli extollì. Esto in eis, quasi vnus ex illis*. Vnde & de Rege nouiter sublimato dicitur. *Nec cletetur cor eius per superbiam super fratres suos*.

6. Ex hoc etiam quod in humano corpore, oculus est ori superpositus, & ore vnico existente, oculus est geminus, spiritaliter informatur Prælatus, vt principalis & amplius intendat circumspectioni, quàm locutioni. Vnde & *Episcopus* interpretatur *super intendens*. Sic etiam oris vnitas, & manuum dualitas ipsum monet, vt amplius intendat operi, quàm sermoni. Nam principem & Prælatum decet esse pauciloquum, & multificum. Et idè Iob, qui dicebat, *Sede bam quasi Rex circumstante me exercitum; dicit, stillabat super illos eloquium meum*. Sed multi sunt Prælati, qui magis possunt dicere, *Cumque sederem in medio, circumstante me sociorum collegio, inunda bat super eos eloquium meum*. Sed attendant quod in multiloquio non deerit peccatum. Et quòd Prælatorum, qui pauca & prudenter loquuntur, sermo pretiosus est. Vnde & Iob dicit ibidem. *Verbis meis nihil addere audebant*. Vnde Aristoteles libro de secretis secretorum, quem scripsit ad Alexandrum, dicit, Speciosum & honorificum est Regi, abstinere multiloquio, nisi necessitas, vel ratio hoc exposcat. Melius est enim, quod aures hominum semper sint sitibundæ ad eius eloquium, quam luis affatibus saturentur: quoniam saturitas fastiditur. Si ergo pauciloquum decet Regem esse, quanto magis rectorem animarum? Et idè Socrates Philosophus, cum quidam ab eo quæreret, quomodò quis famam optimam compararet; respondit: si fecerit optima, & locutus fuerit pauca.

*Secunda instructio Prælatorum; Quod Speculatoris,
id est Prælati, est vigilare non cæcum esse.*

7. Secundo; Oculi speculatur pro toto corpore. Sic & Prælati in Ecclesia habet speculatoris officium exercere iuxta illud Ezechielis. *Cap. 3. Fili hominis speculatorem dedi te domus Israël.* Superioris est vigilare: ne fortè si somno cordis obdormiat, hostilis gladius subditos incautos feriat. Sed audiant nostri vigilantes, quid eis dicat Bernardus super illud. *Serm. 78. in Cant. Inueniant me vigilantes qui custodiebant civitatem.* Parum (inquit) est nostris vigilibus quod non seruant, nisi etiam perdant. Alto quippe demersu obliuionis somno, ad nullum diuinæ comminationis tonitruum expergiscuntur, ut vel suum periculum expauescant. Inde est ut non parcant suis, qui non parcant sibi, perimentes pariter & pereuntes, Quem dabis mihi de numero Præpositorum, qui non plus vigilet, subditorum euacuandis marsupiiis, quàm extirpandis vitiis. O vti tam vigilantes reperirentur ad curam, quàm alacres currunt ad Cathedralam. Vigilent utique, nec sinerent de se dici, *Ps. 37. Amici mei & proximi mei aduersum me appropinquauerunt.* Vtinam superiores nostri essent adeò sollicitè vigilantes, ut sunt grues ut enim dicit Physiologus & Hugo de S. Victore in lib. de Iudiciis, grues quæ eliguntur ad hoc ut aliis dormientibus vigilent, in pede tantùm à terra suspensæ, lapillum tenent: ut si fortè aliqua illarum dormiat, lapsus à pede lapillus cadat, & tunc euigilans clamet. Prælati igitur, qui ad custodiam sui, & aliorum vigilat, lapillum in pede, id est, Christum in mente portet. Lapis enim Christus est, pes mentis affectus. Illud autem summo perè caueat, ne lapillus à pede, id est, Christus à mente recedat. Si autem ceciderit, per confessionem clamet, ut dormientes excitet, id est plebem sibi commissam, tam pro se, quàm pro eorum excessibus ad vigilantiam circumspectionis inuitet. Idèd dicitur Prouerbiis. *Cap. 6. Fili, si sponderis pro amico tuo, discurre, festina, suscita animum tuum, ne dederis somnum oculis tuis, nec dormitent palpebre tue.*
8. Sed dicitur in Isaia. *Cap. 16. Speculatores eius cæci omnes sunt,* ut Heli excutientes, in otio residentes, & de exercitu Domini tantummodò rumores sciscitantes: volentes experiri laborem exercitus, nec militare cum militantibus. Sunt etiam velut alter Iacob cæcutiens, qui cancellatis manibus dexteram super Ephraim ponunt; quia principales intentiones & opera terrenis insigunt, quæ per Ephraim, qui interpretatur frugifer, designatur: super Manassim verò, qui interpretatur obliuio, & idèd significat cælestia, quæ sunt à multis obliuioni tradita, sinistram manum collocant; quia secundarias intentiones & opera cælestibus applicant. Operantur principaliter manu dextra, sed rarò & secundariò sinistra. Patet etiam quod sint cæci. Sunt enim velut alter Lamech, qui feram conficere putans, hominem interfecit. Sic & ipsi

plerumque, cum se credunt alicuius persequi culpam, reuera persequuntur personam. Iste Lamech secundum veritatem Hebraicam legitur primus cecitatem incurrisse & bigamiam induxisse. Et ex Prælatorum cecitate, verum est vel certum, bigamiam spirituales in Ecclesia originem habuisse.

9. Legitur in libris Regum, quod Iebusei dixerunt ad Dauid, *Non ingredieris huc, nisi abstuleris cecos & claudos dicentes, non ingredietur Dauid huc.* Et sequitur *cecus, & claudus non intrabunt in templum.* Cæci sunt, quorum intellectus oculus, est excæcatus per ignorantiam, & oculus affectus per malitiam. Claudus verò dicitur, qui obtentis duobus beneficiis in duabus Ecclesiis; cum simul in ambabus non valeat residere, ad instar claudi inæquales tibias habentis, videtur spiritualiter claudicare. Cæcus etiam est, quia vtrumque beneficium non potest videre. Isti verò dicuntur in muris Ierusalem poni, & prohibere Dauid, ne valeat in Ierusalem ingredi; quia tales homines consueverunt in Prælatione statui, & impedire ne alius bonus possit in Ecclesia promoueri. Isti ergò, cum sint cæci, non possunt dicere illud Iobi, *Oculus fui cæcus, & pes claudus.* Sed dicit Bernardus, *Monstruosa res est speculator cæcus, doctor inscius, præco mutus.* Potest verò eorum cecitas apparere, cum videamus eos interdum in via morum plusquam laicos cespitare. Et idè, qui deberent alios vt oculi dirigere, faciunt eos à recto tramite deuiare.

9. Cæci autem dicuntur, quia etsi oculos habeant, ad sui tamen, & aliorum regimen iis non vtuntur. Habent enim plerumque scientiam; sed non secundum suam scientiam dirigunt vitam suam. Et in hoc assimilantur pauoni, qui in cauda multos oculos habet, sed illis oculis nihil videt. Et idè sæpè contingit quod Prælati, & multi per scientiam oculati diuinam dulcedinem non degustant, quibus potest dici illud, quod dicit Elizeus cuidam, *Videbis oculis tuis, & inde non comedes.* Illiterati verò & simplices oculos scientiæ non habentes, plerumque diuinæ consolationis dulcedinem experiuntur, & gustant. Et isti possunt per Isaac designari, cuius oculi caligauerant, & videre non poterat, quando oblatum à filio pulmentum edebat, vt dicitur in Genesi.

10. Vt habetur in scientia Perspectiua, idcirco duos ingenerauit oculos natura, vt clauso vno, vel etiam impedito, spiritus visibilis ad alium se transferens virtuosius operetur in illo; Tunc enim in actu videndi, pupilla oculi confortatur: quia visua facultas in ea abundantius adunatur. Hoc videmus in sagittariis, qui vnum oculum consueverunt claudere, vt possint directius sagittare. Sic, cum in presenti Deum videamus oculo duplici, scilicet rationis & fidei; interdum, cum oculus rationis clauditur, oculus fidei Deum certius & clariùs contemplatur. Vnde contingit aliquando, quod vna simplex vetula aliquem articulum fidei firmissima fide tenebit, circa quem aliquis lit-

Cap. 27. teratus, dum rationi innititur, hæsitabit. Legitur in Genesi. *Oculi Israël caligauerant præ nimia senectute, & videre non poterat.* Israël interpretatur *videns Deum*; & significat litteratos, qui Deum in Scripturis inspicunt. Et tamen quoad operabilia cæci sunt. Econtra legitur de Moyse. *Quod non caligauerant oculi eius.* Per Moysem, qui interpretatur *sumptus ab aquis*; significantur simplices & illiterati, qui ab aquis sapientiæ sunt per ignorantiam separati; & isti in iis, quæ ad mores pertinent, plerumque clariùs vident. Litterati namque discussione nimia, excæcantur à sublimium excellentia. Nam secundum Philosophum, excellentiæ sensibilibus sensum corrumpunt. Vnde & de Paulo legitur. *Subito circumfusi lux de calo, & apertis oculis nihil videbat.*

Deuter. 10.

2. anim. Astro- rum 9.

Tertia instructio Prælatorum; quod Prælati debet non solum aliorum, sed etiam suorum mores diligenter discutere.

11. Tertio, Oculi non videt sibi adherentia, sed ab eo distantia. Sic & Prælati vitam aliorum discutunt, sed mores suorum collateralium & familiæ propriæ non considerant, nec attendunt; ut verè possint dicere illud Psalmi, *Lumen oculorum meorum ipsum non est meum.* Nam ut ait Hieronymus ad Sabinianum. Solemus mala domus nostræ scire nouissimi; & liberorum ac coniugum vitia vicinis canentibus, ignorare. Si enim iste oculus esset super se reflexus, ut sui & suorum vitam & mores inspiceret, interdum in iis multa mala inueniret. Nam sicut decipula plena est auibus, sic domus eorum plena sunt dolo; & foris interficit gladius, & domi mors similis est. Viderent in domo sua superbiam, iuxta illud Iuuenalis.

Satyr. 3.

Maxima quæque domus seruis est plena superbis.

Sed Dauid dicit, *Non habitabit in medio domus mea qui facit superbiam.* Tales enim de domo Prælatorum abjiciendi sunt, & tollendi, quantumcumque videantur aliàs necessarij iuxta illud Matthæi. *Si oculus tuus scandalizat te, &c. Erue eum & projice abs te.* Sæpè enim, cum talis eruitur, in vnus extermínio, multorum incolumitas procuratur. Cum enim, qui remanent, hoc aduertunt, considerant seipsos, & dicunt, cui parcat, qui scuit in oculos? Corrigamus ergo mores nostros.

Horat. lib. 1.

Nam tua res agitur, paries cum proximus ardet,

epist. ad Lull.

Felix quem faciunt aliena pericula cautum.

12. Si etiam domum suam diligenter inspiceret Prælati, interdum inueniret in ea homines se inuicem odientes, & sibi mutuò inuidentes. Nam, ut vulgariter dicitur; habitantes in curia, sunt, ut canes in coquina. Nam,

Cum

OCVLVS MYSTICVS.

553

Cum canis os rodit, socium, quem diligit, odit.

Et, vt dicit Claudianus.

Regales famuli socium spreuerē superbi.

Et canis in prato herbam non comedit, nec tamen alia animalia comedere sinit. Sic & in curiis Prælatorum nonnumquam inueniuntur aliqui, qui etsi beneficiis sint indigni, prohibent alios nihilominus admitti. Videret etiam in domo sua fœditatem luxuriæ, vt posset dicere cum Iobo se domum luteam habitare. Sed Dauid dicit, *Am- Cap. 10. bulans in via immaculata, hic mihi ministrabat.* Et de beato Edmundo *Pf. 100. Cantuariensi*; legitur quod à seruis suis carnis mundiciam exigebat, *in eius volens omnem familiam suam semper esse mundam.* Videbit etiam in domo sua versipelles, dominum suum seducere molientes. Vnde dicit Beda quod serpens, qui Euam seduxit, faciem habuit humanam & caudam serpentinam. Huic sunt similes consiliarij mali, qui frequenter inueniuntur in domo Prælati. Nam eorum sermo videtur rationabilis & discretus, sed intentionis suæ finis est toxicatus. Attende ergo Domine Pater, ne decipiaris. Forsitan *subuersores sunt tecum, & Exech. cum scorpionibus habitas.* Videbit etiam in manibus sociorum iniquitates; nam dextera eorum repleta est muneribus.

13. Tandem, cùm vniuersa in summam redegerit, videre poterit, quod non deficiat de domo sua fluxum seminis sustinens, & leprosus, & tenens fustum, & cadens gladio, & indigens pane. Videbit enim fluxum seminis in luxuriosis, lepram in detractoribus, gladium in iracundis, & inuidis; panis indigentiam in cupidis, & avaris. His visis verè poterit dicere illud Ieremix, *in domo mea inueni malum.* Et præ dolore simul, & admiratione poterit exclamare & dicere, *Numquid ergo 23. in domo mea plus diligit, admirans exclamabit, Quid est quod dilectus 7. lerem. meus in domo mea fecit scelera multa? Et verum esse quod dicit Bernardus ad Eugenium. Curia bonos recipere facilius, quàm facere consuevit. Et iterum. Non dicam te sanum, dolentem latera. Lib. 4. te confid. c. 4. Leuit. 13. & 14.*

14. Et idèd præceptum est in Leuitico, vt Sacerdos non solum consideret lepram, quæ domos corrodit, quia Prælatus non solum aliorum vitam debet discutere, sed etiam suorum mores diligenter attendere, & inquisitis extraneorum meritis ad se reuertens dicere, quod Patriarcha Iacob. *Iustum est igitur vt aliquando provideam etiam domui meæ. Gen. 30. Multum enim per omnia Prælatum decet honesta familia.* Nam, vt dicit Seneca. Compositus Princeps debet habere compositam familiam.

15. Sicut enim in mundo maiori videmus, quòd Sol non potest illuminare remota, nisi illuminet media, seu propinqua; nec etiam potest illuminare proxima, nisi luceat in propria substantia; sic nec Prælatus, qui est vt Sol, in Ecclesia, benè potest illuminare Ecclesiam, nisi illuminet se, & propriam familiam. Nam, vt dicit, Paulus. *Si quis*

L L I I

1. *Ti. domus sue præesse nescit, quomodo Ecclesie Dei diligentiam habebit? Si*
moth. 3. enim radius offuscatur in proximo, id est, per prauos socios, & consiliarios, necesse est ut talis ad remotiora perueniat. Nec etiam Præ-
Cap. 10. co. secundum iudicem populi, sic & ministri eius: Et, qualis rector
est ciuitatis, tales & inhabitantes in ea.

Quarta instructio Prælatorum, quod Prælati & Clerici caligantibus oculis peiores sunt laicis.

16. Quartò; Oculi debilitantur in corpore senescente. Sic pro dolor! iam quasi senescente Ecclesia videmus eius oculos caligasse, dum processu temporis Prælati & Clerici fiunt deteriores Laicis: ut impletum sit hodie illud vaticinium Isaie. *Et erit sicut populus, sic sacerdos;* Et utinam non sit peior sacerdos, quàm populus ut addit Bernardus legitur in Genesi quod *Senuit Isaac, & caligauerunt oculi eius, & vixit Gen. 27. dere non poterat;* & sequitur quomodo Iacob sibi pulmentum obtulit, & comedit. Et sic gustus deceptus non fuit, nec tactus; quia pilositate Gen. 27. colli, ac manuum benè sensit. Nec auris; quia ait, *vox quidam vox Iacob est:* Nec odoratus, quia sensit fragrantiam vestimentorum eius. Solus ibi visus defecit. Sic & modo vergente mundi vespere videmus Prælatos Ecclesie à statu perfectionis pristinae plusquàm laicos cecidisse.

17. Et ideo status Ecclesie figurari potest per statuam Nabuchodonosor quam legitur vidisse in somnis, cuius caput erat ex auro, & pectus & brachia de argento, venter & femora ex ære, pedum autem quædam pars erat ferrea, & quædam fictilis. Talis fuit Ecclesia in primitiis Prælati; aurea per sapientiam, argentea per vitæ munditiam, ærea per eloquentiam; quæ tria sunt prædicatori necessaria, scilicet fulgor sapientie, munditia vitæ, & sonoritas eloquentie. Sed pedum, id est, vltimorum Prælatorum (scilicet modernorum,) pars quædam est ferrea per cordis duritiem, & quædam fictilis per carnis luxuriam.

18. Cùm Petrus bonæ memoriæ Senonum Archiepiscopus Abbatiam Clareuallensem aliquando adiuisset, ut quemdam Conuertum eiusdem, qui frequenter rapiebatur in ecstasim, visitaret; & cum quadam vice cum illo staret, postularétque ab eo ut sibi visionem aliquam enarraret. Vidi, (inquit,) dominam quamdam speciosissimam, & auro & gemmis ornatam; dixitque mihi stupenti, & eius ornatum & pulchritudinem admiranti. *Quanam sum? Ego respondi, videtur mihi quoddam sis Virgo Beata. Et ipsa respicias me à tergo. Cùmque tergus eius respicerem, vidi eam putridam, & vermibus scaturientem. Nunc, (inquit,) potes perpendere me gloriosam Virginem non esse, non sum*

OCVLVS MYSTICVS.

555

enim Virgo Maria, sed sum mater Ecclesia: quæ in primo statu, quasi in anteriora parte, scilicet in Apostolis, in Martyribus & Confessoribus, fui pulcherrima, & decenter ornata; sed à parte posteriori, id est postremo tempore, vt in modernis Prælatibus sum putrida, & corrupta, & ignominia plena; & *argentum meum versum est in scoriâ.*

19. Narrat Valerius Maximus cum omnes optarent Dionysij tanquam crudelissimi tyranni mortem, mulier ætatis prouectæ, quæ Syraculis debebat, sola quotidie matutino tempore, vt Dionysius diu viueret, Deos deuotissimè exorabat. Quod vt cognouit Dionysius tantam mulieris erga se beneuolentiam admiratus, eam, vt ad se veniret, protinus aduocauit. Et quare hoc, vel quo suo merito, faceret, inquisiuit. Cum essem (inquit) puella, Tyrannum crudelem Dominum, habuimus, eoque carere plurimum optabamus: quo defuncto, crudelior eo successit; cuius etiam mors amplius, quàm prioris, nobis desiderio fuit. Postremum, tertium te uidelicet, superioribus importuniorem cepimus habere rectorem. Ne igitur si tu per mortem fueris sublatu, succedat alius omnium nequissimus; idcirco consueui quotidie pro tua longauitate orare Deum. Hoc modo, prohi dolor! procedit Ecclesia. Si quis consideret priora tempora & moderna. Olim enim Moyses faciem suam velabat, quia non poterant in eum intendere filij Israël, propter gloriam vultus eius, vt dicitur 2. Cor. 3. Sed hodie nostri Moyses, id est Sacerdotes moderni temporis, præ confusione possunt faciem suam velare. Iam enim filij Israël in eos non tantum non dedignantur intendere, sed potius erubescunt & gemunt præ dolore. Legitur enim 2. Machab. 3. *Iam verò qui videret vultum summi Sacerdotis, mente vulnerabatur.* Sed hodie si quis benè considerat statum Ecclesiæ, vulneratur mente, hanc differentiam Prælatorum Ecclesiæ considerans. Gregorius ait. In iudicio ostendetur, quid vnusquisque lucratus est. Ibi Petrus, cum Iudæa conuersa apparebit: Ibi Paulus cum gentibus conuersis ad fidem: Ibi Andreas post se Achaian ducens, Ioannes Asiam; Thomas Indiam. Cum ergo tot Pastores cum suis gregibus, ante iudicem venerint, quid nos miseri dicturi sumus? qui ad Dominum post negotium nostrum vacui redimus, qui pastorum nomen habemus, & oues quas ex nutrimento debemus ostendere, non habemus. Hic pastores vocati sumus, & ibi gregem non ducimus.

Quinta instructio Prælatorum. De Pia Compassione Prælatorum erga subditos & de ouo struthionis.

20. Quinto oculus ceteros membris dolentibus quasi compatiens lacrymatur. Sic & Prælatus inspectis subditorum miseriis erumpere in lacrymas debet compassionis exemplo Ieremiæ dicentis. *Plorans plorabit, & deducet oculus meus lacrymas, quia captus est grex Domini.* Talis erat Beatus Iob, qui dicebat *Flebam quondam super eo qui afflictus*

LLII ij

erat & compariebatur anima mea pauperi. Narrat Valerius Maximus lib. 6. quod Marcellus captis à se Syraculis stetit in ciuitatis arce, vt inde ciuitatem prius opulentissimam, tunc afflictam aspicere posset. Cuius casum lugubrem intuens, fletum non potuit cohibere; quem si quis ignarus vidisset, alterius esse victoriam credidisset. Itaque syraculana ciuitas, hoc saltem in clade tua maxima solamen habuisti, quodd, etsi incolumis stare non poterat, saltem sub victore clementissimo cecidisti. Si ergo Princeps iste, inspectâ hostium clade lacrymas non valuit continere, quantus deberet à Prælatorum oculis lacrymarum fluuius emanare, cum spiritualem cladem inspicere animarum suo regimini commissarum? Audiant quid dicat Ieremias. *Quis dabit capiti meo aquam, & oculis meis fontem lacrymarum & plorabo die ac nocte interfectos, &c.* Debent enim flere cum fletibus & per compassionem infirmari cum infirmantibus exemplo Pauli, qui dicit. *Quis infirmatur, & ego non infirmor?* &c. Natura piscis est; quod cum videt periculum pisciculos recipit in os suum, donec eos perduxerit ad locum securum. Sic & prælatus videns subditum in periculo constitutum, debet ipsum in ore recipere per orationem salutiferam & exhortationem; & intra cordis viscera per compassionem. Sic faciebat Paulus qui dixit ad Philipp. 1. *Testis est mihi Deus, quomodo cupiam vos in visceribus Iesu Christi.*

21. Narrat Iulius Francius, & etiam Valerius Maximus lib. 5. Cum Codrus rex Atheniensium contra Dorenses pugnans, congregasset exercitum, super euentu belli consuluit Apollinis oraculum: cui responsum est, quod pars sua aliter non vinceret, nisi ipse hostili gladio interiret. Quod quidem innotuit castris Atheniensium, & etiam aduersa parti Dorensium. Tunc Athenienses regis sui custodiam militibus commiserunt; Dorenses autem, ne quis Codri corpus læderet, edixerunt. Quod postquam Cedrus audiuit, mutato regio habitu, familiarum cultum induit, & saccum collo gerens hostium pugnacium cuneos penetrauit. Et vnus ex militibus, quem falce percussit, ipsum repercutiens interfecit. O quantum iste propter populi sui decessuisset salutem, qui ob hanc causam gladium super se hostilem desiderauit. Eruhescant ergo Prælati inertes qui exemplo illius non se opponunt murum pro domo Domini: quorum oculi sic aruerunt, quod nondum, pereunti compatientes populo, lacrymam amicam emisissent.

22. Verificatur hodie illa Euangelij parabola, quâ dicitur Lucæ 10. Velo sauciato prætereunt sacerdos & Leuita: quia videmus tam de maioribus quàm de minoribus Prælati, quod non compatiuntur animabus spiritualiter sauciatis, cum tamen ad eorum spectet officium, ut potè modicorum spiritualium, saluti intendere animarum. Nam vt dicit Greg. [Cum curam populi electus præsul suscipit, quasi ad ægrum medicus accedit.] Sed sicut ait Bern. ad Eugenium in persona loquens huiusmodi Prælatorum. [Quotidianas expensas quotidiano reciproca-

mus scrutinio, & continua Dominici gregis detrimenta nescimus. De pretio escarum, & numero panum, quotidiana cum ministris discussio est; rara admodum cum presbyteris collatio celebratur de peccatis populorum. Cadit asina & est, qui subleuet; cadit anima, & non est, qui requirat. Vnde quidam verificans ait. [*Non curant aras; sed heras non vera, sed era.*] *Non equum; sed equum non inopes; sed opes.*

23. Mirum est & miserabile, quod dolent de amissione denarij, & non tristantur de amissione subditi. Quæsitum fuit aliquando cur oua structionum suspendantur in Ecclesia: & qui sint homines, qui plura dicunt mendacia. Primæ quæstio soluta fuit hoc modo; Oua structionis, idè suspenduntur in Ecclesia & Prælatorum oculis proponuntur. ne structionem quoad filiorum incuriam imitentur. De struthione namque dicitur Iob 39. *Indrauit ad filios, quasi non sint sui.* Sed ad secundam, sic fuit responsum. Sacerdotes & clerici, præ cæteris hominibus, mentiantur frequentius & etiam solennius. Nam quotidie declamant coram omnibus, *Defectio tenuit me pro peccatoribus declin- quentibus legem tuam.*

Sexta Instructio Prælatorum. De Mediocritate Prælatorum seruanda circa temporalia bona.

24. Sexto Oculus habet pilos in palpebris quorum quantitas non augetur processu temporis. Per pilos qui animali exterius adhærent signantur temporalia, quæ homini quasi exterius adiacent. Vnde Marth. 6. *Hæc omnia (scilicet temporalia) adjiciuntur vobis.* In hoc igitur quod pili, qui sunt in oculorum palpebris, non crescunt per processum ætatis sed sunt terminatæ naturaliter quantitatis, informantur Ecclesiastici oculi, videlicet Prælati, ne temporalia sibi multiplicent, sed mediocribus sint contenti. Si enim regi terreno præcipitur à Domino. Deut. 17. *Ne habeat argenti & auri immensa pondera;* Quanto magis dicit illud Prælati & personis Ecclesiasticis, qui non sunt Domini, sed dispensatores Ecclesiasticæ facultatis? Sed hodie in Prælati & Personis Ecclesiasticis, multum creuerunt, & multiplicati sunt isti pili, ita quod facti sunt ex omni parte pilosi, vt iam de Ecclesia impletum sit, quod olim de Babilone prædictum fuit. Isaïæ 13. *Habitabunt ibi struthiones, & pilosi saltabunt ibi.* Per struthionem, qui pennas habet, sed mole corporis prægrauatus in altum volare non potest, signantur hypocritæ, qui bonorum vitam exterius imitantur, sed à terrenis ad caelestia numquam per desideria eleuantur. Pilosi verò sunt homines diuitiis temporalibus inuoluti & isti dicuntur saltare in Babilone, id est in Ecclesia, in qua ferè confusa sunt omnia, quia ex temporali opulentia, surget lasciuia. Deut. 32. *Incrassatus est dilectus & recalcitrauit.*

25. De istis etiam pilosis idem Propheta meminit cum de Babylone loquens ait. *Pilosus clamabat alter ad alterum.* Hodie namque videmus in Ecclesia, quod pilosus pilosum vocat, quia diues diuitem inuitat; cum tamen dicatur. Matth. 24. *Cum facis prandium vel cenam, noli vocare diuites, sed pauperes.* Hæc maledicta pilositas, multum inualuit in Prælati Ecclesiæ: nam à maiore vsque ad minorem, omnes auaritiæ student, & pecuniæ congregandæ. Considerant enim illud, quod ait Tullius. [Optimum vestigal parsimonia est.]

26. Vtuntur metaphoris & exemplis in fomentum auaritiæ & cupiditatis. Pauper (inquiunt) si parcus est, facillimè impletur; diues verò si prodigus, facillimè exinanitur. Videmus enim, quod arca capacissima quotidianis, licet paruis, immissionibus ad vltimum impletur. Et è contrario quæ plena est iteratis emissionibus euacuatur. Paucos etiam aquarum exitu tandem stagnum in aridam commutatur. Videmus etiam quod si fonti vena scaturiens auferatur, non multo post fons ipse consumitur & siccatur. Sic dum congestarum diuitiarum aceruus, minutissimis, dum tamen frequentibus & continuis sumptibus expenditur, tandem totaliter quotidianis minutiarum subtractionibus exhauritur. Nam vt ait Claudianus.

Est luxus populator opum, cui semper adherens

Infelix humili gressu comitatur egestas.

Ergo sumtibus est parcendum & cumulandis diuitiis insudandum. Et vt dicit Iuuenalis.

Lucri bonus est odor ex re

Qualibet illa tuo sententia semper in ore.

Perferur, Dis atque ipso lone digna, Poëta.

Vnde habeas nemo querit, sed oportet habere.

Nam, secundum eundem.

Quantum quisque sua nummorum seruat in arca

Tantum habet & fidei.

Et iterum.

Pinunt diuitia: nec sacro cedit honori,

Nuper in hanc urbem pedibus qui venerat albis.

27. Meditationibus & fomentis huiusmodi, ipsorum animos amor nouit habendi. Hæc autem est Vanitas quam sub sole testatur se Salomon reperisse. Ecclesiastes 4. *Vnus est, & secundum non habet*, id est, heredem aliquem, non filium, non fratrem: & tamen laborare non cessat congregando superflua, de quibus ignorat, cui congregat ea, nec satiantur oculi eius diuitiis acquisitis, sed semper inhiant acquirendis. Et reuera illud est vanitas, imò etiam magna peruerfitas. Nam vt ait Philolophus [Commenfuratio in fine non attenditur, sed in his, quæ ad finem ordinantur.] Vnde cum sanitas sit finis quem Medicus intendit, in ea inducenda commenfuratiōem non attendit, sed quantumcunque potest sanitatem inducit, sed in eis quæ sunt ad finem, scilicet

in medicina commensurationem considerat: quia non quantamcunque medicinam, ei qui patitur, administrat, ne eum interficiat; sed potius medicina dosim & quantitatem determinat, prout morbus & patientis virtus expostulat.

28. Nunc autem scimus quod spiritualia sunt bona finalia; & temporalia, tanquam ad finem ordinantur ad ea: ergo spiritualia sine commensuratione induci debent, & appeti; temporalia verò in mensura vnumquemque decent. Sed hodiè huius contrarium videmus fieri. Nam quilibet commensurat sibi spiritualia, dicens; sufficit mihi, si hanc virtutem habeam, & gradum talis virtutis attingam. Sed rarus est, qui commensuret sibi temporalia, dicens; Mihi sufficit hæc Præbenda; sed obtentâ primâ appetitur secunda, & post hanc tertia, & sic vltèrius sine meta. Nam *In cupido crescit censu crescente cupido.*

Septima Instructio Prælatorum.

Quod multò deformius & nociuius est peccatum in sacerdote aut Prælato, quam Laïco.

29. Septimò magna reputatur in oculo macula, quæ interdum in cæteris membris modica censetur. Sic & idem peccatum maius est in Prælato quam in subdito & in Sacerdote, quam in Laïco. Sic & spina plus lædit oculum, quàm pedem vel manum: vt merito sit tanta differentia inter Prælati & subditi, sacerdotis & Laïci prauaricationem, quanta est inter festucam & trabem. Propter quod dicitur Matth. 7. *Quid autem vides festucam in oculo fratris tui, & trabem, quæ in oculo tuo est, non consideras?* Sicut enim sacer locus, in quo delinquitur, aggrauat peccatum, sic & personæ gradus & dignitas, culpam exaggerat. Vnde & Iuuenalis ait.

*Omne animi vitium, tanto conspectius in se
Crimen habet quanto quis peccat, maior habetur.*

30. In huius rei figuram, Moyses legislator, quando de animalibus immundis tractabat, per quæ hominum immunditiam designabat, circa immunditiam auium diligentior fuit: nam plures aues immundas, quàm pisces aut bestias numeravit vt patet Deut. 14. Immunditia auium designat immunditiam clericorum; bestiarum autem & piscium, Laïcorum. Sic & ceteris (non dubito omissam esse à librario vocem paribus) prohibetur idem peccatum commissum à sacerdote seu clerico grauius esse, quàm commissum à Laïco. Sicut enim sacerdos bonus, est melioris conditionis, quàm laïcus bonus; sic & peioris, si vterque fuerit malus. Nam sacerdos si malus est, officium, ad quod tenetur, absque peccato exercere non potest, quod tamen potest laïcus, etsi fuerit malus. Vnde sicut bonus sacerdos vocatur angelus bonus Ma-

lach. 2. *Labia sacerdotis custodiunt scientiam, & legem requirent ex ore eius, quia angelus Domini exercituum est.* Sic & sacerdos malus vocari potest angelus malus. Nam sicut Diabolus peccat in omni opere suo, licet etiam in se bono, ut quia credit Deo, vel quod ad Dei iussum egreditur de corpore obfesso, quia hoc totum facit, cum murmuratione & animo malo: sic & sacerdos malus peccat etiam bonum opus faciendo, ut scilicet missam celebrando, & sacramenta Ecclesiastica ministrando. Et sicut periculosius est, si quis dormiat super equum, quam si dormiat super solum propter casus periculum, sic grauius & periculosius peccat Prælatus, quam subditus.

31. In cuius rei designationem Heli sacerdos de sella corruens legitur expirasse. Et iterum, cum subditi quasi de collò pendeant Prælati, si Prælatus ceciderit ex consequenti sequitur, quod etiam subditi cum labente labantur. Vnde Prælati dicitur Il. 3. *Princeps esto noster, ruina autem hac sub manu tua.* Et sicut cum videmus in nauigantibus, quod si nauta remigando defecerit, modicam affert remigibus læsionem; si verò Nauclerus in gubernando defecerit, avertit naui naufragium & submersionem. Sic peccatum Prælati, qui habet alios regere, magis nocuum est, quam priuata personæ. Ecclesiastici 10. *Rex insipiens perdet populum suum.* Et ideo dicitur de Reg. Deut. 17. *Non re-ducet populum in Ægyptum, equitatus numero si biliaris.*

32. Diligenter est cauendum omni, qui in sublimitate constituitur, ne exemplis suis commissis sibi populus corrumpatur, & qui debuit eum ad supernam perducere Ierusalem, ducat eum ad tenebras & in merorem. Ægyptus siquidem *tenebra* vel *meror* interpretatur. Prælatus siquidem de omnibus tenetur, & omnium auctor esse videtur, quia, cum mala quæ fiunt à subditis, possit corrigere, eorum meritò particeps est, quæ noluit emendare. Vnde valde possunt & debent Prælati timere, audientes, quod postquam Israël cum Madianitis fornicando Dominum prouocauit, iratus Dominus ad Moysen dixit. *Tolle cunctos principes populi, & suspende eos in patibulis contra solem, ut aueriat furor meus ab Israël.* Peccasse siquidem populus legitur, & fornicatio Principum nusquam exprimitur: & tamen ad patibulum principes tradi iubentur, & in eorum pœna Dominus populo delinquenti placatur, eo quod ex negligentia Prælatorum sapissimè excessus prouenit subditorum.

Patet igitur, quod peccati macula magis nocet, cum oculum corporis id est Prælatum inficit, quam cum membrorum aliud, id est priuatam personam polluit. Et ideo sapienter acutæ naturæ prouidit, ut in sole non esset macula, sicut eam videmus esse in Luna. Nam secundum Bernh. Siluestrum. *Sol est oculus mundi, quoniam omnibus astris præminet, & calum vindicat esse suum.* Sicut enim Sol vniuersis eminet, ut radiis suis cuncta perlustret; sic Prælatus quasi altus Sol omnibus præminens, singulorum merita conspiciere debet, instar solis, vir-
tuosorum

tuosorum exemplis operum, quasi quibusdam radiis debet lutum, id est, fluidum per luxuriam, desiccare, & congelatum per auaritiam, & immisericordiam, & impietatem, & arrogantiam dissoluere. Nam non sine notabili documento raro vel nunquam in sacra Scriptura de obscuracione solis fit mentio quin statim subsequatur Luna, & plerumque stellarum obtenebratio. Vnde dicitur Isa. 13. *Obtenebratus est Sol in ortu suo, & Luna non splendet in lumine suo.* Et Ioëlis 2. *Sol & Luna obtenebrati sunt, & stella retraxerunt lumen suum.* Et iterum Ioëlis 2. *Sol conuertetur in tenebras, & Luna in sanguinem.* In quo spiritualiter datur intelligi, quod Præfato peccante communiter peccant & subditi exemplo illius ad peccandum inducti. Dicitur enim Ecclesiastici 10. *Secundum iudicem populi, sic & ministri eius: & qualis est rex ciuitatis, tales & in habitantes in ea, &c.*

CAP. XIII.

De Quatuor rebus, quas spirituales oculi ingiter debent contemplari.

I. Hæc quatuor debet homo sæpissimè respicere, scilicet, fœdritatem iniquitatis propriæ; calamitatem alienæ miseræ; acerbitatem pænæ perpetuæ; remunerationem vitæ beatæ ut sic sit oculatus ex omni parte, instar animalium, quæ Ioannes dicit se vidisse Apoc. 4. *Et animalia erant plena oculis, ante & retro, &c.* Dextro enim oculo debet homo inspicere præmia; sinistro supplicia: posteriori proximorum & miserorum quasi à mundo deiectionum miseriam; anteriori propriam culpam. Ps. *Delictum meum contra me est semper.* In huius rei figuram dictum est Moyfi, Deut. 3. *Ascende cacumen Phasge, & oculos tuos circumfer ad occidentem, & ad aquilonem, austrumque & orientem, & aspice.* Per Orientem æterna præmia significantur, quæ semper erunt in ortu, & quasi noua. Per Occidentem, æterna pœna, in qua occidit, & deficit omnis temporalis lætitia; per austrum feruor peccati; per aquilonem miseria proximi. Debet igitur vnusquisque multipliciter oculatus esse, ut non solum aspiciat præsentia, verum etiam diligenter consideret futura. Vnde Boët. de consol. Philosoph. [Non quod ante oculos est, sufficit intruere; sed rerum exitus prudentia metitur.] Hæc prouidentia seu circumspectio, maximè decens est in Principe seu Præfato. Vnde Aristoteles in libro de secretis secretorum ad Alexandrum. [Sis prouidus prouidendo, quæ possunt contingere: nam cum euenerint; tunc scient homines, quod oculi tui procul viderint, & propter hoc tuam laudabunt sapientiam, & cauebunt tuam offendere maiestatem.]

MMmm

De consideratione proprii peccati.

2. Primum autem inter quatuor aspicienda superius enumerata est propria culpa. Vnde peccatori dicitur Ierem. 3. *Lena oculos tuos in directum, & vide ubi non prostrata sis.* Viator siquidem si oculos suos leuauerit, & viam immundam, periculosam & distortam viderit, reuertens, ab ea diuertit. Via autem peccatorum, est immunda propter lutum luxurie; periculosa propter foucas auaritie, distorta propter deuiationem superbie. Et ideo securum est a tali via retrorsum abire. Vnde & paulo ante pramiserat Propheta: *Sotto & vide, quia malum est & amarum, dereliquisse te Dominum Deum tuum.* Debet enim homo scire per preteritorum recordationem, videre per presentium inspectionem, quia malum est sibi, propter gratuitorum spoliationem, & amarum propter Conscientie lationem, se dereliquisse Deum, qui eum creauit, cum non erat: qui eum redemit, cum perierat.

3. Debet igitur homo respicere culpam suam. Hoc autem ad detestandum, non ad delectandum; alias peccatum per solam recordationem interficat. In cuius signum vxor Lot interijt, quia Sodomam, de qua exierat, respexit Gen. 19. Ideo dicit aug. [O homo si te videres tibi displiceres, & mihi placeres. Nunc autem quia te non vides, tibi places, & mihi displices: Veniet tempus, in quo & tibi & mihi pariter displicebis; mihi, cum iudicaberis; tibi, cum ardebis. Num enim non vident peccatores periculum status sui, nec mirum, quia sunt excacati. 4. Reg. 6. *Pervenit gentem hanc cecitate.* Et sequitur. *Dominus, aperi oculos istorum, ut videant.* Aperuitque Dominus oculos eorum, & viderunt se esse in medio Samaria, inter hostes. Sic peccator, si oculos apertos haberet, in medio hostium, id est, demonum se videret. Diabolus enim nititur primo hominem excacare, ut non possit peccatum suum videre, sicut latro domum ingressus, consuevit primo lumen extinguere. Vnde & Antiochus ingressus templum, legitur candelabrum luminis abstulisse. 1. Machab. 1. Sicut etiam samson a Dalila deceptus, a Philistinis captus, primo criminibus est nudatus, postmodum excacatus, & tertio est funibus ligatus. Sic & peccator deceptus a carne, captus a demone, primo virtutibus spoliatur, secundo oculis interioribus excacatur, tertio funibus peccatorum astringitur.

4. Et sicut vsus excacatus peluis claritate, coram domino suo ludit, sic peccator, excacatus apparente delectatione, coram demonibus in peccatolasciuit. Vnde legitur Iud. 26. postquam Philisthim excacauerunt Samsonem, praeceperunt, ut vocaretur Samson, & ante eos luderet. Et sicut rex Babylonis filios Sedeciae in eius oculis interfecit, & ipsius Sedeciae oculos eruit, sic & rex confusionis Diabolus bona opera per peccatum mortificat, & peccatorum spiritualiter excecat. Quia

postquam homo cessat à bonis operibus, lumen gratiæ ei subtrahitur, & penitus excæcatur. Pro tanto autem peccatores excæcati sunt, quia discretionis iudicium amiserunt, signati per Sodomitas, qui prout dicitur Gen. 19. percussi cæcitate ostium Lot non poterant inuenire; Lot enim interpretatur *declinans*, & ipsi à peccato nesciunt declinare.

De Consideratione miseria proximi.

5. Secundò inspicienda est proximorum miseria. Eccli. 4. *Oculos tuos ne transueras à pauvere.* Et iterum. Ab inope ne auertas oculos tuos. Idem ingeminat, ut magis nos ad pietatis affectum moueat. Pauci enim sunt, qui per compassionem in pauperem respiciunt, sed multi sunt, qui ab eis oculos misericordiæ auertunt, & eorum miseras videre non possunt. Oculus enim qui est in lumine, non videt eum qui est in tenebris. Sic & diues qui est in luce prosperitatis, non videt pauperem, qui est in caligine aduersitatis. Inde & Pincerna, quamdiu fuit in tenebris carceris, Ioseph afflictum nouit, & socius eius fuit: sed egressus ad fulgorem prosperitatis, ipsum amplius non agnouit: imò succedentibus prosperis, oblitus est pincerna interpretis sui. Gen. 45. Intellexi, quod quadam domina, dum videret pauperes tempore caritatis, herbas ad esum colligentes in agro: nonne, (inquit,) possent comedere pisa cum lardo? Respondit vnus de assidentibus; possent vtique, si haberent. Huius siquidem oculus, quia in luce prosperitatis positus erat; idcirco pauperem in tenebris degentium non videbat inopiam. *Nam veniet plenus, nescit quid capiet egenus.* Et sicut videmus, quod qui diu in lumine fuit, si accedit ad agrum existentem in tenebris, non statim eum cognoscit, nisi postquam diu cum eo permanserit; sic qui in prosperitatis lumine vitam agit, eos qui sunt in tenebris aduersitatis positi, pietatis oculis non aspicit, nec agnoscit; nec eorum miseretur, nisi postquam per compassionem se coaptauerit, ut sic compatiatur in mente, sicut illi patiuntur in corpore.

6. Hæc figurata sunt Exodi 3. Vbi legitur, quod Moyse ituro, ut videret visionem magnam, ait Dominus. *Solve calceamentum de pedibus tuis*, quasi diceret. Hanc visionem non poteris videre, nisi prius calceamentis depositis. Quæ postquam deposuit, ad videndum visionem, quare rubus arderet, & non combureretur, accessit. Rubus ardens & non combustus, est pauper & infirmus in paupertate & miseria per impatientiam non fractus: sed permanens, per patientiam illibatus; quod diuites calceati, rem admirabilem, & magnam reputant visionem. Hunc rubum videre non valet oculo compassionis diues stipatus diuitiis; & deliciis, & nullis adustus incommodis, nisi prius soluerit calceamenta pedes ab offendiculis protegentia; id est carnis nutrimenta, quibus impediuntur affectus mentis, ne procedant ad opera pietatis. Vnde & pincerna, de quo prius mentio facta est, in carcere

MMmm ij

tanquam discalceatus, id est à deliciis segregatus, benè videbat rubum, qui ardebat, & non comburebatur, id est Ioseph, qui patiebatur sed non deducebatur: sed postquam prosperitatis & deliciarum calceamenta resumpsit, ipsum alterius non agnouit.

7. Vis videre hominem in panperes liberalem, & ab eorum necessitatibus nequaquam oculum auertentem? Respice ad beatum Iob, & audi, quid loquatur ait iustus, & timens Deum, & recedens à malo. Non dicit, Ad me confluēbant histriones, & mimi; adulatōres & fabularum inutilium concentores. Non dicit, vrsos alebam, simias & catulos educabam. Sed dicit, *Humerus meus à iunctura sua cadat, & brachium meum cum ossibus confringatur si negavi pauperibus, quod volebant, si oculos viduæ expectare feci. Si comedi buccellam meam solus, & non comedit pupillus ex ea.* Et paulò ante dicit, *Oculus meus caco, & pes claudos; pater eram pauperum,* & non prædo. Et ut magis affluas pietatis visceribus vide alium, qui beatum imitatus Iob oculos viduæ non fecit expectare. Narratur in historiis Romanorum, Quod cum Trajanus ab bellum iturus cum exercitu suo, iam ascendisset equum, quædam paupercula vidua, pedem eius apprehendit, & exclamavit ad Imperatorem, & dixit. Domine fac mihi iustitiam de eo, qui filium meum interfecit. Cui ille. Ego cum rediero plenam iustitiam exhibebo. Et illa, quid, (inquit,) si non redieris? Et ille, satisfacies tibi successor meus. Cui illa. Tu mihi debitor es, secundum merita tua recepturus. Et fraus est non reddere, quod successor tuus, præmiabitur de liberali iudicio: te autem non liberabit aliena iustitia. His verbis motus Imperator de equo descendit, & totum exercitum expectare fecit. Et sedens pro tribunali de causa viduæ diligentissimè inquisiuit, & satisfactione dignissima molestiam eius releuauit. Et ideo, quod dictum est mirabile, Deus cum oculo pietatis respiciens, precibus Beati Gregorij ab inferis reuocauit. Beati enim misericordes, quoniam ipsi misericordiam consequentur. Iste cum Beato Iob verè potuit dicere. *Si oculos viduæ expectare feci.* Iob. 31. *Et cor viduæ consolatus sum.* Iob. 29.

Sequitur consideratio pœnæ Gehennalis.

8. Tertio inspicenda est Gehennalis pœna. Ieremias Propheta postquam ollam succensam viderat, & faciem eius à facie Aquilonis, & audierat Dominum dicentem, *Ab Aquilone panderur omne malum.* Ierem. 1. Hortabatur postmodum ceteros ad idem contuendum spectaculum. Ier. 13. *Leuate oculos vestros, & videte, qui venitis ab Aquilone,* &c. Per Aquilonem enim, quæ est regio intemperatissima, & à sole maximè elongata, congruè datur intelligi infernalis pœna, in qua erit acerbitas pœnæ & elongatio à sole iustitiæ, propter carentiam visionis diuinæ. Hanc pœnam benè respiciebat Hieronymus, qui dicebat,

[Cum considero Iob sedentem in sterquilinio, Ioannem esurientem in cremo, Paulum occisum gladio, Petrum suspensum in patibulo, tunc cogito, quid in futuro reprobis faciet, si in praesenti sic affligit, quos amat.

9. Hic aspectus utilis est & ut culpa vitetur, & ut praesens poena facilis reputetur. Vnde dicit Isidorus primo soliloquiorum. [Propone tibi aduersus carnis ardorem, futuri supplicij ignes; Memoria ardoris gehennae, ardorem excludit luxuriae.] Videmus quod quando digitus est adustus applicatur ad ignem ut minor calor possit extrahi per maiorem, sic & peccator inflammatus igne peccati, si per considerationem ignis se applicat infernali, minor calor extrahi poterit à maiore. Eccli. 7. *Memorare nouissima tua*, id est inferni supplicia, & *in aeternum non peccabis*. Facit etiam haec meditatio, ut praesens poena reputetur facillima. Vnde dicit Bernardus. [Vigilias times, & ieiunia, manuumque labores, sed haec leuia sunt flammis perpetuas meditati.] Narrat Beda in libro de gestis Anglor. quod tempore Constantini Imp. Iunioris, quidam paterfamilias cum decessisset in Anglia, eius anima ante tribunal aeterni iudicis est adducta. Vbi tandem obtinuit Dei Genitricis intercessionibus ut prius inspectis poenis infernalibus post hoc rediret ad corpus. Reuixit ergo, qui erat mortuus, & narratis iam visis mirabilibus, & rebus suis erogatis pauperibus, salutatis cognatis & familiaribus, profectus est in quandam siluam, ubi egit tantam poenitentiam, ut lingua simul & opere ostenderet, quanta tormenta vidisset. Etiam in maxima hieme nudum se mergebat in flumine. Et cum super hoc eum arguerent amici & noti, respondebat: finite me, nam grauiora vidi.

10. Consideratio gehennalis poenae facit oculos aperire. Nam secundum Gregorium poena oculos aperit quos culpa claudit. Et non solum hoc facit, cum fuerit experta, (ut patet in diuite epulone, qui eleuatis oculis suis, cum esset in tormentis, vidit Lazarum, à quo prius cum esset in diuitiis, auertit oculum:) sed etiam, si fuerit oculo considerationis diligenter inspecta. Sicut enim collyrium clarificat oculos, sic consideratio infernalium tormentorum clarificat animum & intellectum. Vnde & Iob oculus erat ad videndum adeo validus, ut Domino diceret. *Nunc oculus meus videt te*. Iob 42. Quasi collyrio vnixerat, ut videret. Dicit enim Iob 17. *In amaritudinibus moratur oculus meus*. Collipium est oculi medicamentum. Illius igitur oculus moratur in amaritudine, qui diligenter considerat amaritudinem gehennalis poenae. Et per hanc amaritudinis considerationem, amissam recuperat visionem. Vnde in signum illius, Tobias fellis linitione visum legitur recepisse. *Tobia* 11. Et ideo peccatores, qui non considerant infernale tormentum, sunt sicut rei, qui velatis oculis ducuntur ad patibulum. Sicut enim caecus est, qui non videt peccatum suum, ut ei suppliceat, & caeleste praeium, ut ei placeat, sic qui non videt aeter-

MMmm iij

num supplicium, ut eum deterreat.

11. Et mirum est, quod homines inferni supplicia non considerant, vel si considerant, non formidant, cum tamen demones credant, & contremiscant, ut dicitur Iacobi 2. Legitur in Vitis Patrum, quod sanctus quidam cum eum Spiritus fornicationis grauius tentaret, orauit Dominum, ut tentator ei Spiritus visibiliter appareret. Tunc daemon in humana ei facie apparuit. Quo viso, sanctus ait. Quid tibi proficis, quod me tentas? Hec est enim summa fatuitas. Nosti namque cum aliquem in peccatum precipitas peccatum tuum, & per consequens poenam augmentas. Nihilominus studium tuum tendit totaliter ad precipitandum homines in peccatum, & sic per consequens ad poenae tuae cumulum. Respondens diabolus: Scito, (inquit,) verum esse, quod loqueris. Sed dico tibi causam tentationis. Scio enim, quod quanto plures peccare fecero, tanto diem iudicii retardabo. Illum autem diem super omnia reformido, in qua duram illam sententiam me auditurum expecto. *Ite maledicti in ignem aeternum qui praeparatus est Diabolo & Angelis eius.* Et ut fulminationem illius sententiae, saltem ad tempus, valeam retardare, idcirco nitor homines sic tentare.

De Consideratione vitae caelestis.

12. Quarto consideranda est remuneratio vitae beatæ. Vnde dicitur de Moysè ad Hebr. 11. *Aspiciebat enim in remunerationem.* Et idè dicitur Isa. 33. *Oculi tui videbunt Ierusalem habitationem opulentam.* Hec est ciuitas quam describit Bern. in lib. meditat. O ciuitas caelestis mansio, secunda patria, totum continens quod delectat; populus sine murmure, incolæ quieti, homines nullam indigentiam habentes. *Quam gloriosa dicta sunt de te ciuitas Dei! Sicut latantium omnium habitatio est in te.* Ibi.

Pax, bonitas, pietas, lux, virtus, splendor, honestas,

Gaudia, letitia, dulcedo, vita, perennis,

Gloria, laus, requies, amor, & concordia pacis.

Quæ ergo nos agit vesania, vitiorum sitire absinthium, huius mundi sequi naufragium, impiæ tyrannidis ferre dominium, & non magis conuolare ad Angelorum societatem, sanctorum, splendorem Regis potentis honorem, supernæ gloriæ decorem.

13. Vnde in caelestibus oculis cordis nostri per meditationem & desiderium deberet esse defixus. Quod etiam docet humani corporis erecta figura: & hoc est, quod dicit Poëta.

Pronaque cum spectent animalia cætera terram,

Os homini sublime dedit, calumque videre

Insit, & erectos ad sidera tollere vultus.

Hinc etiam Empedocles interrogatus, ad quid natus esset, respondit ut;

cælum & sidera contempler. Cuius etiam dicti Bernard. Siluestris meminit dicens.

Quarenti Empedoclis, cur viueret, (inquit,) ut astra

Inspiciam: cælum subrahe, nullus ero.

In Vitis Patrum legitur quod beatus Arsenius, cum moreretur, à fratribus requisitus ut prius quam migraret ad Dominum, relinqueret verbum edificatorium & memoriale, dixit: Ibi, vbi. Quo dicto emisit spiritum. Post cuius transitum solliciti fratres ut intelligerent verborum sensum pro habenda expositione miserunt ad quendam senem alium, qui rescripsit eis. Hæc est, ut puto, verborum intelligentia, Ibi nostro fixa sint corda, vbi vera sunt gaudia.

14. Ad hanc inspectionem cælestium, horrabatur Hieron. virginem Eustochium dicens in Epistola 22. [Egredere paulisper de carcere, & præsentis laboris mercedem ante oculos tuos depinge, Quam oculus non vidit, nec auris audiuit. Qualis erit illa dies, cum Maria mater Domini occurreret tibi concitata Virgineis choris, post mare rubrum, submerso cum suo exercitu Pharaone, tenens tympanum præcinet responsoris. *Cantemus Domino gloriöse enim honorificatus est, &c.* Tunc etiam ipse sponsus occurrer, & dicet. *Surge prope amica mea, &c.* Tunc etiam Angeli mirabuntur, & dicent: *Qua est ista, que progreditur quasi aurora?* Videbunt te filia, & deprecabuntur, &c. Sara cum nuptis obuiam veniet. Anna cum viduis. Pueri quoque clamabunt, *Osanna in excelsis.* Quoties te vana seculi delectat ambitio, quoties videris aliquid gloriosum, sic ad paradysum mente transcendende.]

CAP. XIV.

De Tribus visibilibus oculum corporalem delectantibus.

TRia quidem sunt quæ corporalis oculus delectabiliter intuetur videlicet, aquæ limpiditatem, florum & erudium venustatem, & speculi claritatem. Versus.

Delectant oculum lympba, viror, speculum.

Per aquam, ad præsens intellige Virginem Mariam gloriosam, per florem & viridia, sanctorum agmina; per speculum, Dominum nostrum Iesum Christum. Beata siquidem Virgo dicitur. *Fons horiorum, puteus aquarum viuentium.* Canticorum 4. Nam sicut aqua communis est omnibus, iuxta illud. *Vfus communis aquarum.* Sic & virgo benedicta, iustis & peccatoribus. Vnde B. Bernardus. [Maria omnibus omnia facta est, ut de plenitudine eius accipiant vniuersi, captiui redemptionem, ægri curationem] &c: Et Anselm. in meditat. O (dicit,

Domina ad te venit, & te laudat concio laeta iustorum; ad te fugit territa turba reorum. Utinam in amore tuo cor meum langueat, anima liquecat, caro deficiat: summum enim post Deum est te videre & intueri, in tuis laudibus delectari. Propter hoc, instat aqua ipsa omnibus se exponens, dicit Eccli. 24. *Transite ad me omnes, qui concupiscitis me, & a generationibus meis implimini.* Ac si diceret: illud, quod scriptum est Isaia 55. *Omnes sitientes venite ad aquas,* &c. In aspectu huius aquae, omnes delectabiliter infiguntur oculi animae sanctae iuxta illud Cantic. 5. *Oculi eius sicut columba super viuos aquarum, quae resident iuxta fluentia plenissima,* Nec mirum si delectabilis est aspectus eius. Nam pulchritudinem candoris eius admirabitur oculus, ut dicitur Eccli. 43. Hæc est etiam Esther regina de qua dicitur. *Erat enim formosa valde & incredibili pulchritudine omnium oculis gratiosa,* Esth. 2.

2. Fuit quidam clericus beatissime Virgini deuotissimus, qui diligenter attendens illud, quod scribitur Cantic. 4. *Quam pulcra es amica mea suavis & decora.* Et illud 7. *Quam pulcra es & decora, charissima in deliciis.* Audiens, quod etiam intelliguntur & exponuntur de Beata Virgine, rogauit eam, ut ei dignaretur se ostendere: beatum se reputans, si eam tam speciosam semel posset respicere. Post multa venit ad eum Angelus ex parte Beatæ Virginis destinatus, & salutans Clericum, dixit ad eum. Beata Virgo exaudiuit orationem tuam, & mandat quod tali die & hora, ad te veniet, & videbis eam. Sed scias hoc esse nimis inconueniens & indignum, ut postquam oculi tui eius speciositatem aspexerint, & decorem omnium excessuum, postmodum videant terrenum aliquid & caducum. Non curo, (inquit clericus,) si de cætero fiam cecus, ex quo semel eam fuero contemplatus. Cum autem abiisset Angelus, cœpit ille ex infirmitate, multum esse sollicitus, & cogitat, quid ultra faceret, postquam oculos amississet. De cætero, (inquit,) non potero scribendo lucrari panem meum, sed oportebit me alterius esse miserum & mendicum; & amittere omne solatium, & potero dicere cum Tobia *quale gaudium mihi erit qui in tenebris sedeo: & lumen cæli non video?* Tandem cogitauit & dixit. Quando Beato Virgo venerit, vnum oculum aperiam ad videndum, & alium claudam; & sic tantum vnum amittam. Et cum mihi vnum remiserit, hoc mihi bene sufficit. Postquam autem assignatâ horâ, Beata & gloriosa Virgo apparuit, tantam claritatem & pulchritudinem aspexit, quod nec exprimi, nec cogitari possit. Cumque manum superpositam alteri oculo, ne eam cum illo cerneret, amoueret, ut illud oculum aperiret, & sic eam plenius aspiceret, Virgo gloriosa disparuit, & eam ultra non vidit. Tunc ille vno orbatus oculo, eo scilicet quo eam viderat, altero saluo quo eam non aspexerat, seipsum acriter arguebat, & mœstus nimium cum lacrymis hoc dicebat. *Heu miser, quare vnum oculum clausi? Quare ambos non aperui? O utinam*

tortus

totus fuisset oculatus, ut eam potuisset vidisse plenius. Cumque diu B. Virginem exorasset; ut se iteratò sibi ostenderet, ut residuo saltem oculo eam usquequaque videret, desiderans utroque oculo priuari ut eam posset iterum contemplari, Missus iterum Angelus dixit ei. Mandas tibi Domina mea cuius sum nuncius. Amice, quid petis amplius? Visne iterum videndo orbari residuo oculo. Cui ille. Vtique Domine. Etiam si mille oculos haberem, optarem perpetuò pendere, ut possem eam perfectè videre. Cui Angelus. Et ipsa clementissima mandat tibi, quod eam iterum videbis, & superstitem nequaquam amittes oculum, imò recuperabis etiam perditum. Quod & non multo post factum fuit. Iteratò namque dulcissima Virgo apparuit, & se sibi videndam & contemplandam exhibuit, & amissum ei oculum restauravit. Ex quo possumus perpendere, quantà sit pulchritudo Virginis gloriosæ, & quam delectabile est eam oculis videre. Vnde & Anselmus dicit in meditationibus. [Pulchra est Maria ad intuendum, amabilis ad amplexandum, delectabilis ad fruendum.]

Secundum quod delectat visum, significat quod virentia sanctorum exempla sunt diligenter attendenda.

3. Secundum quod delectat oculos est florum venustas, & viridum amenitas. Vnde dicitur Eccli. 40. *Gratiam & speciem desiderabit oculi tuus, & super hoc virides facies.* Eccli. 39. *Florate flores, & frondate in gratiam.* Quia enim sancti floruerunt interiùs per propositum sanctum, & floruerunt exteriùs per exemplum, idè sunt grati oculo ad videndum. Delectatur si quidem oculus viri iusti cum cernit rosas Martyrum; violas Confessorum; lilia Virginum. Nam secundum Plinium l. 21. c. 5. flos rosæ inter ceteros flores obtinet principatum: & idè principalis pars hominum, scilicet caput, solet floribus rosarum coronari. Est enim flos rosæ venustus aspectu fragrans olfactu. Sui namque decorè reficit aspectum, & sua fragrantia allicit odoratum. Per quem congruè designatur præminencia Martyrum. Vnde & calathus sanguineas habens rosas, figuravit protomartyris Stephani loculum, ut habetur in legenda Inventionis reliquiarum ipsius. Et Eccli. 50. dicitur de Simone, qui interpretatur obediens, & signat quemlibet Martyrem, qui Deo Patri obediens fuit usque ad mortem. *Quasi arcus refulsit inter nebulas gloriæ; & quasi flos rosarum in diebus vernis.* Arcus enim caelestis refulget in medio nubis & sancti Martyres rutilant in mediis tormentis. Et dicuntur esse inter nebulas gloriæ, quia dum affligebantur, erant in caelesti gloria meditatione. Dicuntur autem quasi flos redolere in diebus vernis, propter imitationem Dominicæ Passionis quæ fuit in tempore veris.

4. Flos violæ cum ad perfectum venerit, caput inclinat & deprimi, & parvitatem substantiæ recompensat magnitudine virtutis & fragran-

NNn

ria. Et sanctos signat confessores, qui maximè fuerunt humiles. Vade vnus eorum ait. [Qui ceteras virtutes sine humilitate congregat, quasi qui puluerem in ventum portat. Dicit & alius.] Nil ita à pueritia conatus sum vitare, quàm tumentem animum, & erectam ceruicem Dei contra se odia prouocantem. Noui enim Dominum & magistrum meum in carnis humilitate dixisse. *Discite à me quia mitis sum & humilis corde.* Flore verò filij secundum Plinium nihil est generosius in colore, redolentius in odore, efficacius in virtute. Habet etiam flos lilij hoc proprium dum integer & intactus permanet, suauiter redollet; confractus autem, & manibus confrictus horribiliter fœtet. Et congruè Virginitatem signat, qua nihil est gratiosius, nihil fragrantius, dum permanet illibata, foret autem Deo & hominibus, si fuerit per impudicitiam violata?

5. Sancti ergo floruerunt in via per puritatem conuersationis. Florent & nunc in patria, quoad animam per-adeptionem felicitatis. Vnde Ps. *Plantati in domo tua Domine.* &c. Florebant tandem & in corpore per dotem incorruptionis. Vnde Ps. *Florebunt de civitate; sicut fœnum terræ:* id est ad similitudinem herbæ. Sicut enim herba in hieme moritur, & in renouatione temporis renascitur sic & corpus hominis in peccati vita soluitur in puluerem, & in futura resurget in incorruptionem. Benè videtur spiritualiter esse cæcus, quem non delectat florum tam speciosorum aspectus. Et sicut aspectus florum & viridum visum corporalem roborat & confortat, sic & vita sanctorum & gloria intuentium spirituale robur augmentat. Vnde Greg. [Si facta præcedentium recolamus non erunt graua, quæ toleramus.]

6. Aspiciamus ergo rosas patientiæ Martyrum, & exuentes ignauiam, fructus bonorum operum producamus. Ad quod monet Eccli. 39. *Obaudite me diuini fructus & quasi rosa plantata super riuos aquarum fructificata.* Aspiciamus & violas humilium confessorum, & deponentes superbiam, per humilitatis redolentiam Domino placeamus, vt possimus dicere illud Canticorum 1. *Cum esset Rex in accubitu suo, nardus meus dedit odorem suum.* Nardus est herba media, & aromatica, & humilitatem signat, (sicut dicit Glossa, quæ Deo plurimum est accepta. Aspiciamus etiam lilia Virginum & abicientes inmunditiam, sanctimoniam inducamus. Eccli. 39. *Florete flores, quasi lilium, dante odorem.* Qui vult ergo oculos mentis reficere, debet eos ad sanctos leuare, & cum Psalmista dicere. *Leuaui oculos meos in montes, unde venit auxilium mihi:* id est in sanctos, per altitudinem cælestis conuersationis sublimes. In his montibus amenitatem tantam inueniet, quod multi oblectamenta despiciet, instar onagri, de quo, Iob dicit 39. *Contemnit multitudinem ciuitatis, circumspicit montes pascua; & videntia quæque perquirat.* Circumspicit enim in monte Martyrum pascua patientiæ, in monte confessorum pascua humilitatis, & obedientiæ, in monte Virginum pascua pudicitiae.

7. Propter iam dicta sancti congruè figurati sunt per virgas virides in parte decorticatas quas Iacob posuit in canalibus; ad quarum aspectum, oues conceperunt varios fetus. Vt legitur Gen. 30. Virgæ istæ sunt sancti, qui quamuis essent in terra, quantum poterant, erigebantur ad cœlestia. Dicuntur autem *virides*, quia ad bonum operandum semper erant recentes, & cum consummauerant, se esse adhuc in initio reputantes. Dicuntur autem *ex parte decorticati*, quia eorum sanctitas non est nobis detecta totaliter, sed in parte, multo autem plura latent in eis intrinsecus, quam apparent nobis extrinsecus. Canticorum 3. *Absque eo quod intrinsecus lateat.* Hæ virgæ in canalibus sunt positæ, quia in sanctorum scriptis sunt commendatæ, & quasi quibusdam canalibus per huiusmodi scripta fluit ad nos sanctorum notitia; horum autem conuersationem debemus ante oculos habere, vt eos imitando varios fetus bonorum operum possimus concipere.

8. Postquam autem oculus mentis nostræ nitorem sanctorum aspexerit quem habuerunt in via, eleuari debet vt amplius delectetur ad intuendum etiam nitorem quem ipsi iam contemplantur in patria: de qua dicit Hugo libro 3. de claustro animæ. [Veriditas pratelli, quod est in medio claustrum, oculos supernorum ciuium recreat, & eos semper suâ nouitate confortat. Nihil enim ibi vetustum vel transitorium erit, sed semper in nouitate suæ veriditatis absque dubio permanebit. In medio pratelli ponitur lignum vitæ, vt vita sed in amenitate. Est enim lignum vitæ Sapientia Dei Patris, cuius fructus salutem conferuat, & vitam præstat.] Cum illuc homo peruenierit. Quod petat ulterius, non habebit. Tunc enim silebit iniquitas, abundabit charitas, nec quicquam ibi deficiet, vbi vnusquisque omnia in se habentem habebit. Nihil deesse poterit, quando Dei sapientia omnibus omnia prouidebit. Ibi nullus in suo ordine deficiet, quoniam in libro diuinæ sapientiæ, in quo scriptus est ordo naturæ, vnusquisque leget.

De tertio, quod delectat visum:

*Quod speculum id est Iesum Christum frequenter
respicere debemus.*

9. Tertium delectamentum oculi, est aspectus speculi. In libro 2. de speculis, demonstratiuè probatur, quod oculus naturaliter in speculo delectatur. Ibi enim tantummodo se speculatur eo quod in termino contactus, radij aggregantur, & in superficie specularis corporis reflectuntur. Sic & contemplatiuus oculus in eternitatis speculo delectatus, in seipsum reflecti non cessat, & ex consideratione puritatis & munditiæ quam in speculo illo aspexerat, conscientie maculas incessabiliter purgat. De quo dicitur Exodi 25. *Inspice & fac secundum exemplum*

NNnn ij

plar quod tibi in monte monstratum est. Et ideo dicitur Ierem. 3. ipsi anima. *Leua oculos tuos in directum*, scilicet ad intuendum hoc speculum; & *vide ubi non prostrata sis*. Cum enim Deus & homo sint in eadem imagine, cum anima contemplatur puritatem Dei, perpendit veritatem sui. Et ideo Iob postquam hoc speculum respexerat defectus suos considerans, seipsum arguebat. Vnde & dicebat, *nunc oculus meus videt te*, & *idcirco me reprehendo*, & *ago penitentiam in favilla & cinere*.

10. Dicitur autem vulgariter, quod turpis non libenter speculum intuetur ne de sua turpitudine inspecta tristetur: sic & multi in suis peccatis & immunditiis obstinati, non libenter speculum istud aspiciunt, sed ab eius contuitu se auertunt; & ideo suas immunditias non attendunt, ut auferant. Et ideo dicit Dominus Ierem. 2. *Vertunt ad me dorsum & non faciem*. Et post pauca sequitur. *Quam vilis facta es nimis, iterans vias tuas*? Et quid morum si vilis facta sit, quæ speculum ad suas maculas deprehendendas non aspicit? Et ideo homines qui nec verba Dei libenter audiunt, nec eius facta & opera oculo aspiciunt, in peccatis suis tanquam iumenta in stercore computrescunt. Et ideo speculum illud frequenter respicere debemus, ut mentis nostræ maculas possimus in nobis deprehendere, & purgare. Et ideo dicitur in Psalmo. *Respice in faciem Christi tui*.

11. In aperta visione istius speculi, beatitudo consistit hominis & Angel. Ioannis 17. *Hæc est vita æterna, ut cognoscant te solum Deum*, &c. Et 1. Petri. *In quem desiderant Angeli prospicere*. Nec mirum, quod illud speculum est purissimum. *Est enim splendor lucis æternæ, & speculum sine macula*. Sapientia 7. Est etiam omnium representativum. Dicit Gregorius. [Quid est, quod non vident, qui videntem omnia vident.] Et ideo Beati in patria speculatores facti illius magnitudinis, pro tali speculatione Deum laudant, & extollunt præconijs. Vnde dicitur Is. 52. *Vox speculatorum tuorum: lenauerunt vocem, simul laudabunt, quia oculo ad oculum videbunt*.

CAP. XV.

De Oculo Septemplici intuitus diuini.

1. Dicit Ioan. in Apocal. *Vidi & ecce, in medio throni agnum stantem quasi occisum, habentem cornua septem, & oculos septem*. Per agnum occisum, intelligimus Christum innocentissimum, mansuetum & pro nobis in ara-crucis immolatum. Per septena oculos agni intelliguntur septem proprietates intuitus diuini.

Quod diuinus oculus omnia respiciat.

2. Primò enim diuinus oculus est omnium inspectiuus ad Hebræos. *Omnia munda sunt, & aperta eius oculis.* Et Eccli. 24. *Omnia videt oculus eius.* Narrat Petrus Damiani quod homo quidam, suum furatus est alienam. Erat autem vir ille hospitalis valdè: & quia beati misericordes quoniam ipsi misericordiam consequuntur, Dominus Iesus, qui nunquam obliuiscitur viros misericordiæ, statim adest in pauperis effigie, & tanquam prolixo crine, tonsuram rogauit. Ille protinus pauperi reuerenter assurgens, assumptis forcipibus tondere eum cepit. Quod cum faceret, in occipite eius, duos oculos latentes reperit. Quo viso vehementer expauit, & quid hoc esset, quæsiuit. Cui Iesus. Ego (inquit) Iesus vocor, qui vndique cuncta contemplor. Et isti sunt oculi, quibus vidi suum, quam in cauea conclusisti; moxque disparuit. Et ille vir compunctus, suum restituit. Et ideo dicitur Eccli. 23. *Oculi Domini multo lucidiores sole, circumspicientes vias hominum in absconditis paries.*

*Secundus intuitus diuini oculi, quo incutit timorem,
Solis exemplo.*

3. Secundò oculorum diuinorum intuitus est timoris incussiuus, ac per hoc à peccati perpetratione retractiuus. Fur enim non auderet furari, si sciret se à iudice videri Prou. 20. *Rex qui sedet in solio iudicii, in iram suo dissipat omnia mala.* Et Amos 9. *Ecce oculi Domini super regnum peccans, & conieram illud à facie terra.* Nullus auderet fornicari in oculis hominum: quanto magis confundi deberet, aliquid turpe committere ad diuinum aspectum? Bernardus: [O homo, quouis loco, quouis diuersorio, quouis angulo, reuerentiam exhibe angelo tuo, qui te custodit vt eo presente non facias, quæ me vidente facere non audes.] Hic est magni consilij Angelus, cui patens est omnis angulus, Et quidam ait.

*Cum quid turpe facis, quod me spectante ruberes,
Cur spectante Deo non magis inde rubes?*

4. In cunctis igitur quæ cogitando vel loquendo, vel agendo delinquimus, superni iudicis aspectum formidare debemus. Quia si aliquando non apparent hominibus nostra vitia, illius tamen oculis omnia sunt munda, & aperta. Et sicut videmus, quod sol aspectu suo lutum desiccet: vbi autem non aspicit, lutum abundat: sic quia homines Dei præsentiam non attendunt, putantes eum non aspicere flagitia quæ committunt, idcirco in peccatorum sordibus vitam ducunt. Vnde Ps. *Non est Deus in conspectu eius: inquinata sunt via illius in omni tempore.*

NNnn iij

*Tertius intuitus diuini oculi, lacrymas pœnitentiales
educit exemplo ignis.*

5. Tertio diuinus aspectus est lacrymarum pœnitentiarum educitius. Dicitur in Apoc. 19. *Oculi eius ut flamma ignis.* Peccator autem est peccati gelicidio congelatus, & instar glaciei frigidus, & durus effectus. Et ideo sicut aspectus ignis glaciem liquefacit, sic diuinus aspectus, peccatorem in lacrymas soluit. Vnde dicitur Lucæ 22. *Respexit Dominus Petrum, & egressus foras fleuit amare.*

*Quartus intuitus diuini oculi, qui operationes strenuas
promouet exemplo vineæ, &c.*

6. Quarto diuinus aspectus est operationis strenuæ promotius. Vnde Boët. 5. de consolatione. [Magna vobis, si dissimulare non vultis, indicta est necessitas probitatis, cum cuncta agitis ante oculos iudicis cuncta cernentis.] Dominus est sicut paterfamilias, qui pro eo, quod operarios in vinea respicit, eos magis strenuè operari facit. Ipse enim tanquam vineam Ecclesiam custodit. Vnde dicit de vinea Ecclesiæ. *Ego Dominus qui seruo eam* Isaïæ 17. Et in Psalmis dicitur; *Oculi Domini super iustos.* Dicuntur autem iusti, non quicumque, sed operarij: ad Rom. 2. *Non enim auditores legis iusti sunt apud Deum, sed factores legis iustificabuntur.*

*Quintus diuini oculi intuitus spirituales fortitudinem
confert exemplo stellarum.*

7. Quinto, diuinus aspectus est spiritualis fortitudinis collatiuus, 2. Paralip. 16. *Oculi Domini contemplantur uniuersam terram, & præbent fortitudinem his qui perfecto corde credunt in eum.* Si enim planeta stellam aliam fixam vel erraticam aspectu suo fortificat, ut maioris efficacitæ, & virtutis existat, non est mirum, si aspectus Dei virtuosissimi atque fortissimi dat lasso viritem: & his qui non sunt, fortitudinem, & robur multiplicat.

*Sextus intuitus diuini oculi, infirmitates animæ sanat
exemplo Charadrij.*

8. Sexto diuinorum oculorum aspectus, est infirmitatis animæ sanatiuus. Eccli. 11. *Est homo marcidus? Quia morbo culpæ grauiter affectus, Egens recuperatione; Quia bonis spiritualibus spoliatus; Deficiens virtute, quia bene agendi viribus destitutus & abundans paupertate. Quia bonorum spiritualium inopia prægrauatus. Et oculos Dei res-*

OCVLVS MYSTICVS.

575

pexit illum in bono. Quia aspectu suo morbum expulit, & amissam sanitatem restituit. Vnde dicit Physiologus. [Charadrius est auistore candido, cuius talis fertur esse natura, quod si ad hominem infirmum fuerit adducta, cum infirmi vultum diligenter considerat, vitam signat. Si autem oculos ab infirmo auertat, mortem prognosticat. Similiter & Christus conuersatione mundus, quasi colore candidus, si oculo pietatis peccatorem respiciat sanitatem eius non solum signat, sed etiam causat. Quod si eum non aspiceret peccator finaliter interiret. Idem dicitur Eccli. 34. *Oculi Domini super timentes eum.* Et sequitur. *Dans sanitatem, & benedictionem, & vitam.*

Septimus intuitus ad regnum gloria sempiternum perducit.

9. Septimo diuinorum oculorum intuitus est ad regnum gloriae perductus. Iob 36. *Deus non auferet a iusto oculos suos, & reges in solio collocat in perpetuum & illic eriguntur.* Ad illud regnum nos perducit, qui sine fine viuit & regnat. Amen.





SUPPLEMENTVM.

Antehac Lugdunensi editioni attextum; ad explendum defectum partis capitis duodecimi, & trium sequentium capitum, quæ tunc desiderabantur.

MONITIVNCULA

AD LECTOREM.

IRREPSE- RAT Lacuna in Manuscriptum Codicem, è quo editio Lugdunensis anni 1641. adornata erat. Ea labes ut obduceretur, atque adeò ne opus hiarer, fædeque deformatum remaneret; capita quæ in illo Codice desiderabantur, genuinis capitibus anterioribus subiuncta fuerant ex conjectura. Spectato ordine ab Autore in sua præfatione proposito. Nunc tamen opus integrum quale ab Autore prodijt publico damus ex varijs Codicibus plenis quorum postea facta est copia: illud tamen supplementum, qualecumque demum fuerit, libitinæ quæ ipsum iure manebat, subductum est, & in hoc angulo representatum ob causas adductas inter proponendum cogitationes posteriores de hoc Autore.

..... Et vetula intrepidè respondit percontanti cur tantam pro eius salute curam gereret; Ego cum puella essem & grauem haberemus Tyrannorum, Deos sæpè fatigabam pro eius interitu. Illo interfecto, successit aliquanto terrior cuius exitium exorasse me, postea dolui. Nam tertium te, anterioribus truci-

culentiorum

culentiorum experti sumus dominatorem. Itaque veritate te
absumpto immanior quispiam succedat, deos pro tua incolumi-
tate precor. Sic Prælati antiquis succedere minùs perfecti, &
istis suffecti sunt deteriores, mox habituri successores vitiosiores.

Quinta proprietas Oculi.

20 **Q**uintò, Oculus compatitur cuicunque corporis membro ali-
quod incommodum subeunti, & ad indicandum sensum com-
passionis & commiserationis suæ, emittit lachrymas. [Hinc (ex oculis)
illæ misericordiæ lachrymæ (ait Plin.) Hos cum osculamur, animum
ipsum videmur attingere. Hinc fletus, & rigantes ora riuui. Quis ille
humor est, in dolore tam fecundus & paratus? aut ubi reliquo tem-
pore?] Modo consimili bonus Prælatus, cum aliquis è subditis, cor-
pore aut animo infirmatur, debet patienti condolere, & infirmari cum
infirmante, vt exemplo suo monstrauit Paulus, qui de se dixit, *Quis*
infirmatur, & ego non infirmor? [Paulus, (iuxta Gregorium,) quia in
se trahebat damna infirmitatis alienæ, crucem portabat in corde.] Ad
quem modum facile est Prælati in pace Ecclesiæ viuentibus, pertin-
gere ad martyrij coronam. Nam vt dicit S. Bernardus. Triplex est
genus martyrij, vnum in sanguinis effusione, alterum in carnis mace-
ratione, tertium in proximi compassione. Itaque si Prælatus non potest
obtinere martyrium sanguinis defectu persecutorum Ecclesiæ; Item si
non potest durè & asperè tractare corpus suum, quia fortassis est tenui
& afflicta valetudine; saltem non prætermittat martyrium compassio-
nis, quod subibit condolendo subditis afflictis, & eorum defectibus
ac necessitatibus collachrymando, sicque super se tollendo incommo-
dum eorum per veram commiserationem. Ideò Iob, qui erat exem-
plum boni prælati, dicebat, *Facies mea intumuit à fletu.* Gregorius.
[Facies sanctæ Ecclesiæ, sunt hi qui in locis regiminum positi, appa-
rent primi: vt ex eorum specie, sit honor fidelis populi, etiamsi quid
in corpore latet deforme. Qui nimirum Prælati fletibus, plangunt
culpas infirmantium, seque sic de alienis lapsibus, ac si de propriis af-
fligunt.] Hæc sunt vbera Sponsæ meliora vino, quia misericordia &
compassio superexaltat iudicium, hoc est iustum rigorem, sicut oleum
superexaltat omnes liquores, eisque supematat, secundum Richardum
de S. Victore, qui etiam interpretatur, quod odor vnguentorum Spon-
sæ, dicitur esse super omnia aromata: quia [huius suauitatis fragrantia,
& vñctionis spiritualis qua tam benè afficitur ad omnes, condolet, ge-
mit, orat, & subueniri cupit; in naribus superni Sponsæ, suauis omnium
virtutum operibus redolet, & placere cognoscitur.]

21. Sed o quam multi Prælati, cum contingit aliquem è subiectis,

OOOO

corpore vel animo infirmari, aliter se erga eos gerunt quàm oculi erga membra. Non enim illis collachrymantur, nec patiuntur aliquid super contritione Ioseph. Hoc est abdicare à se dignitatem Prælati. Nam verus Prælatus, debet esse sicut mater, & sicut nutrix alumnaum suum confouens. Mater autem nunquam adeò efferatur in vteri sui infantem, vt videns eius miseriam, non compatiatur ei, & non simul crucietur ac doleat cum illo. Item nutrix tenerè diligens puellum quem lactat, ad omnes eius gemitus commouetur, nec potest viscera sua super eum claudere. Mater & nutrix non auertuntur ab infante ob eius spurcicias, & infantiles necessitates, sed ei sollicitè subueniunt, nec præ amore lassantur. Sic ergo Prælatus, ne fatigetur animo deficiens in subditorum infirmitatibus, tam spiritualibus, quàm corporalibus; atque ita monstret non modò compassionem, sed etiam sapientiam suam, suscipiendo & fouendo infirmos. *Qui enim suscipit animas, sapiens est.*

Prov. 12.

22. Est autem hoc presertim verum, cum subditus est qualis filius phreneticus, qui exacerbatur contra remedium sibi adhibitum. Non enim idcirco tunc Pater filium abiicit, sed multo magis ei compatitur, & fundit lachrymas super calamitate illius: eoque sollicitius illi subuenit, quo magis vider illum egentem, nec agnoscentem quod egeat. Nec hoc dico, quòd oporteat blandiri peccanti, & prætextu compassionis, verius crudelitatis, fouere peccata, sed ita oportet condolere malè habenti, vt tamen cohibeatur, ne ei peius fiat. Augustinus. [Duo sunt nomina, homo & peccator. Quia peccator est, corripe; quia homo miserere.] Legitur de quodam patre qui videns serpentem circumplacatum corpori filij, tam dextrè sagittam intorsit in serpentem, vt filium non læserit. Similiter ergo sequendum piè est in peccatum; personæ autem impendenda compassio & collachrymatio, quod non faciunt illi Prælati, quorum furor carnificalis, vt dicit D. Gulielmus Aruernus, multum abest à vero Zelo, qui compassione & dulcore misericordiae leniri debet. [Multum verò interest inter atrocem carnificinam, & piam disciplinam; nec minùs quàm inter Chirurgicam modestiam, & trucidantem insaniam.]

In Psal.

100. &

101. &

hom. 6.

ex 50.

Lib. de

moribus

6. 8.

Hom.

32. in

Euang.

23. Tenenda itaque est moderatio quam sapiens ille Antistes præscribit, ducem secutus Antistitem summum S. Gregorium. Cauenda est vt falsa misericordia & impiissima pietas, qua nulla maior crudelitas; ita durities immisericors. [Compassionem animi (inquit Gregorius,) plerunque latenter obsidet pietas falsa, vt hanc nonnunquam vsque ad condescendendum vitiis pertrahat, cum ad culpas quisque non debeat compassionem exercere, sed zelum. Compassio quippe homini, & rectitudo vitiis debetur; vt in vno eodémque homine, & diligamus bonum quod factum est, & persequamur mala quæ fecit: ne dum culpas incautè remittimus, non iam per charitatem compati, sed per negligentiam concidisse videamur.] Per hanc veram compassionem zelo per-

mistam, Prælatus probat se esse gregis Dominici canem, qualem eum vocat Gregorius super illud Iob *non dignabar eos ponere cum canibus Iob. 30. gregis mei*; & Augustinus in illud Davidis *lingua canum rorum. Canis ps. 67.* ita mordet inimicos, vt lingat vlcera, & eorum saniem extergat. Quod ab illo Sancto Episcopo Gallo de quo scribit Cæsarius corporaliter in *Lib. 8.* vno leproso ex charitate semel factum, quotidie in pluribus à Sanctis *cap. 32.* pastoribus ex sincera compassione exercetur.

14. Est etiam alia falsa compassio cauenda, qua aliqui ita compatiuntur subditis, vt sibi sint nocumento, ob nimiam compassionem, & excessum afflictionis de aliorum culpa. Sic oculus aliquando propter nimiam lachrymationem, & compassionem immoderatam erga alia membra, valdè læditur, & interdum etiam excæcatur. Nam legitur de quibusdam mulieribus, quæ ob nimium ploratum in morte maritorum aut filiorum, lumine oculorum sunt orbatæ, falsugine lachrymarum & humoris acrimonia, visum exedente. Imo Hieremias præ nimietate ploratus, adductum se in mortis discrimen testatur. *Oculus meus*, (inquit,) *degradatus est animam meam*, id est, vitam vocauit in discrimen. Similiter ergo aliqui Prælati, propter nimiam compassionem erga subditos delinquentes aut infirmos, dum nimium tristantur de eorum damno, eripiunt sibi visum animæ, & in vitæ spiritualis discrimen veniunt, malè memores quomodo Deus erga peccantes se habeat, non enim idcirco perdit suam pacem. Nec item SS. Angeli, cum vident suam pro nobis sollicitudinem abire irritam, amittunt suam tranquillitatem & beatitudinem.

25. Porro oculus non collachrymatur tantum membris valdè nobilibus vel valdè necessariis, v. g. non tantum lachrymatur, si caput offendatur, quo pereunte periret. Nec tantum lachrymatur, si lædatur cor, quod est fons vitæ, & quasi Rex in corpore: Vel si stomachus videtur, qui est communis omnium membrorum promuscondus. Sed quodcunque tandem corporis membrum, etiam si vilissimum, offendatur, puta pes, aut extremus digitus, oculus ei impendit lachrymas compassionis. Modo consimili, Prælatus non debet spectare in subdito vt ei compatiatur, cuius sit conditionis; an nobilis, an doctus, an sapiens: Sed quisquis sit subditus qui corpore aut animo infirmatur, debet ei compati ex animo, & subuenire pro posse. Sicut faciebat S. Paulus, qui simpliciter & absolute dicebat, *quis infirmatur, & ego non infirmor*. Nec querebat an is qui infirmabatur, esset Episcopus, vel magna inter fideles autoritatis. [Hoc erat, (inquit Chrysostomus,) quod tribulabat ipsum, & angebat, ac sauciabat eius mentem, quod in singulis infirmis hæc pateretur, quicunque illi essent. Non enim de maioribus quidem dicebat, minores autem despiciebat, sed etiam abiectum inter necessarios ponebat. Ideò dicebat, *quis infirmatur* & quisquis fuerit.] Apud diuinum oculus non est personarum acceptio. Emuletur

OOO ij

ergo Deum pius Prælatus, & diuinam erga quoscunque subditos equitatem imitetur, compatiens omnibus. Et sicut in corpore, œconomus à Deo constitutus, nempe hepar, non suppeditat alimentum conueniens soli cordi aut cerebro, sed omnibus planè membris, prout eorum necessitas postulat, ita in corpore mystico, fidelis seruus & prudens quem constituit Dominus super familiam suam, non debet curare aliquos tantum, abiectis cæteris simili vel maiori necessitate grauatis; sed debet omnibus condolare, & collachrymari, ac subuenire prout potest.

Sexta proprietas oculi.

26. Sextò, Oculi habet in palpebris pilos, quorum quantitas non augetur. Id enim est maxime admirabile in palpebris oculorum. [Qua de causa, (inquit Chrysostomus,) dic mihi, capitis quidem capilli crescunt & detondentur, ciliorum verò minime? Neque enim hoc nobis temerè & casu factum est, sed ne se demitrentes, oculos obtenebrarent; quod ad profundum deducti senium, patiuntur.] Consimili modo, cilia palpebrarum oculi spiritualis, siue Prælati, non crescunt procedente tempore. Sunt enim cilia, oculi tela & hastilia. Sicut namque in spicis aristæ, (iuxta Chrysostomum,) tanquam quædam prætenta spicula aues repellunt, non sinentes fructui insidere, & stipulam infirmiore diffingere; sic profectò & in oculis velut quædam aristæ & spicula, prætentæ sunt palpebrarum setæ; puluerem, & festucam, & omnia vexantia extrinsecus, repellentes ab oculis, nec palpebras infestari sinentes.] Animalcula quoque his quasi teniculamentis, repelluntur ab oculo, ut ait Theodoretus. [Vbi enim cilia, instar palorum & sudium præfixa conspexerint, retrò fugiunt.] Sunt igitur cilia velut tela, & hastilia oculi: quæ in spiritali oculo siue Prælato, non debent crescere processu temporis, quia Prælatus ob longi temporis regimen, non debet fieri subditis magis metuendus, atque terribilis.

27. In quo labuntur quidam Prælati, qui initio prælationis, sunt satis affabiles subditis; postea verò cum per longam in prælatione moram contraxerunt habitum imperandi, sunt morosi; ac per diuturnum usum viuendi suo nutu, & extra alienum ductum, feruntur ad regendum cum summo imperio & terribiliter; dominantes fidei subditorum, quod se fecisse negat Apostolus. Tales Prælatos, Sapiens appellat *ictum fluij*; quia sicut ictus fluij, vulgo *silum aqua* incitatum, rapidissime decurrit, & omnia obuia, inordinatè ac ferociter conuoluit; lætas segetes bouumque labores, domos perpulchras, & virentia prata, vel amœnissimos hortos, nullo discrimine vastat: Ita imperiosus Prælatus, cum longo vsu imperandi, deditic subesse, omnia in quæ incurrit, abripit. S. Gregorius, huiusmodi Superiorem vsque ad eius similitudinem perducit, ait, qui *omne sublime videt, & est Rex super vniuersos*

filios superbiæ; quia [in luxum superbiæ, ipso potentia fastigio lenocinante, corrumpitur.]

28. Qui talis est, deberet repelli à ministerio Christi, ac præpositura super eius familiam, qui est gradus oculi spiritualis in corpore mystico. Est enim lippus, & albuginem habet in oculo: quod genus hominum Deus à sacro ministerio repellebat, iuxta eundem Gregorium. Habet albuginem, quia stultum te & peccatorem non intelligit, quæ nigredo necessaria est oculo, vt videre possit. Lippus est, quia sensum à natura fortè datum, conuersationis prauitate tanquam visceri & crassi humoris turbiditate, confudit. Itaque quamuis initio fortè fuerit frugi, sibi & aliis ducatum præstare vtunque potuerit; tamen longo vsu imperfectè operandi, propter impunitatem delinquendi, & diuturnam ab aperta reprehensione immunitatem, quam ferè aduehit prælatio, hebetudinem spiritualis visus contrahit, sitque sibi in exitium, & aliis in exterminium.

29. Ille est oculus ille superbus, quem Dauid auersabatur. *Oculus sublimis*, qui à Sapiente, primus ponitur inter ea quæ odit Dominus. *Oculus excelsus, cuius palpebra in alium surrecta.* *Oculus nequam*, qui aliorum defectus, etiam si exiguos videt, suos tamen trabales, non videt. Quæ est similitudo illius (vt ait) magnæ difficultatis motæ à Richardo de S. Victore circa oculum corporeum [qui videndo non sentit vbi est, & sentit vbi non est. In cælo vbi vtique non est, stellam positam videt: palpebra tamen obductus, ipsam sub qua latet palpebram non videt. Cæteri sensus corporei, sola adhærentia sentiunt, & discernunt. Solus oculorum sensus ad adhærentia hebet, ad longinqua & remotissima viget.] Et quo plus spirituales oculi pergunt sic se habere, eo magis circa se hebescent, quia acquirunt habitum: Vnde in dies euadunt nequiores, & minùs apti ad præstandum corpori mystico ducatum, quod non contingit oculo corporeo penes hoc caput, quia operando non acquirit habitum. Itaque talis oculus scandalizans, semperque nequior, eruendus est, & proiciendus à corpore mystico, tanquam monstruosus, quia crescunt in eo cilia procedente tempore.

30. Non debent etiam spiritualium oculorum cilia crescere, quatenus cilia, sunt velut suggrandia arcentia ab oculo incommoditates. Prælati enim processu temporis non debet fieri sollicitior de suis incommodis declinandis, quàm initio esset. Aliquibus Prælati, in sui regiminis principio, magna cura est vt præluceant subditis verbo & exemplo, nec à se alienum ducunt quicquam, quo subditos grauent. Postea tamen, quia rarò dicitur illis *cur ita facis?* alligant onera graui & importabilia super humeros hominum; digito autem suo nolunt ea mouere, quod est vitium Pharisaicum à Christo reprobatur. Bonus Prælati, non debet pro sua parte refugere sustentiam incommodorum quibus tota congregatio subiacer: nec debet culmen potestatis quæ cæteris præeminet, & libertatem ei potestati coniunctam, in

In reg.
cap. 56.

Petr.
Abelard
epist. 8.
qua est
reg mo-
nial.

occasionem carnis dare. Sed quanto plus cæteris potest, tanto & aliis virtutibus, & sui odio debet eminere. Cùm S. Benedictus piè constitisset, vt Abbas cum hospitibus seorsim ad mensam recumberet, postea tamen deprehenso damno, iussus est Prælatus à conuentu & communi mensa non recedere, & fidelem dispensatorem hospitibus assignare comitem. [Tunc enim (vt ait hoc referens Magister Petrus,) tolerabilior omnibus quælibet habetur inopia, cùm ab omnibus æquè participatur, maximè verò à Prælati] Et addit exemplum Catonis qui in magna siti totius exercitus, oblatum à quopiam aquæ pauxillum recusauit, quo pacto omnes ad sitim tolerandam animauit. Elisæus venit ad scindenda ligna cum filiis Prophetarum. Abimelech vt induceret milites ad strenuè laborandum, dixit eis, vt facerent quod ipsum facere viderent. Dauid quia non fuit cum exercitu in obsidione vrbs hostilis, sed mansit domi, expectans donec ad triumphandum vocaretur, quia in labore hominum non fuit, turpiter cecidit.

Lib. 4.
epist. 51.

31. Quod ergo semper debet in Præfato crescere, est amor in Deum, & charitas erga suos, de conscientia bona, & fide non ficta. [Cum honor crescit, etiam sollicitudo proficiat (aiebat Virgilio Episcopo S. Gregorius, & erga cæterorum custodiam vigilantia exerceat. Vitæ quoque merita subiectis in exemplum veniant, & nunquam sua per suscepti honoris gratiam, sed lucra cælestis patriæ, Prælatus acquirat.] Crescere autem potest honor, non intensuè tantum, sed etiam extensuè, cùm prorogatur & diutius durat. Itaque non ei duntaxat qui ad prælationem primùm euehitur, sed & ei qui in ea prorogatur, rectè dicitur, cùm honor crescit, etiam sollicitudo proficiat. Oculus quidem corporis procedente tempore euigescit, & longè hebetius videt, fitque ad functionem suam minùs habilis, quia eius virtus est corporæ, & diuturniore vsu atteritur. At oculus animæ semper magis perficitur, secundùm Platonem, qui idcirco senes esse sapientiores affirmat. Idem ergo cernatur in oculo mystico, si verè spiritualis est, & non corporeus ac materialis.

Septima oculi proprietas.

Lib. 3. de
conspre-
sa 4.

32. Septimò, Oculus hoc habet, vt eius maculæ quantumuis paræ, deformiores habeantur, & citiùs prodantur & appareant, quàm maculæ aliarum corporis partium. Nam pedis, & femoris, vel humerorum macula, facile occultatur, sed labes oculi in prospectu est, & prima omnium aspicitur, censeturque longè maior & turpior, quàm si esset in aliis membris. Modo consimili, maculæ inferiorum facile latent, sed maculæ superiorum sunt in propatulo, & quia eminent, statim videntur ab omnibus. Sicut dicit Boëtius. [Multorum minùs pateret indiguitas, si nullis honoribus inclaresceret.]

33. Eorum qui cæteris eminent, vt eximie dotes, ita & dedecora

statim incurrunt in contuentium oculos. Seneca ad Neronem. [Alia Lib. 1.
est conditio eorum qui in turba quam non excedunt, latent. Quorum de clem.
& virtutes, vt appareant, diu luctantur, & vitia tenebras habent. Ma- cap 2.
gnorum facta, dictaque rumor excipit.] Et Plinius ad Traianum. [Ha- In pa-
bet hoc magna fortuna, quod nihil tectum, nihil occultum esse patia- negr.
tur. Principum verò non modò domus, sed cubilia ipsa, intimosque
recessus recludit, omniàque arcana, noscenda proponit famæ.] Legitur
in Sallustio quod Cæsar rogatus sententiam, sic respondit apud PP. In bello
Conscriptos. Qui demissi in obscuro vitam agunt, si quid iracundia Catilin.
deliquere, pauci sciunt. Fama atque fortuna eorum, pares sunt. Qui
magno imperio præditi in excelso atarem agunt, eorum facta cuncti
mortales nouere. Ita in maxima fortuna, minima licentia est.

34. Et propterea bonus Poëta, licet homo malus, dicebat Livia Ouid. in
uxori Augusti, conf.

*Imposuit te alto fortuna, locumque tueri
Iussit honorum: Livia perfer onus,
Ad te oculos auresque trahis, tua facta notamus,
Nec vox missa potest Principis ore tegi.*

Et Claudianus Honorio.

*Hæc te præterea crebro sermone monebo,
Vt te totius medio telluris in orbe
Finere cognoscas; Cunctis tua gentibus esse
Facta palam, nec posse dari Regalibus usquam
Secretum variis. Nam lux altissima facta,
Oculum nihil esse finit, latebrasque per omnes
Intrat, & absconditos explorat fama recessus.*

Denique Poëta Christianus.

*Nec Princeps latebras, nec Sol desiderat umbras;
Abcondat Solem, qui vult abscondere Regem.*

35. Itaque prudentissimè D. Philippus Abbas bonæ spei qui vixit
tempore S. Bernardi, admonet Prælatum, vt sit maximè sollicitus de
sanctimonia vitæ supra omnes domesticos, si non vult de dignitate de-
jici, & haberi deridiculus. [Dignitati (inquit) comes indiuidua, san-
ctitas assignetur, vt eius consortio tanquam muro inexpugnabili mu-
niatur; Cuius patrocinium si inuenta fuerit dignitas non habere, com-
pelleretur detrimento, iustoque contemptui subiaceret.] Ita planè effun-
ditur contemptio super Principes, & quibus dignitas venerationem
deberet conciliare, perspecta nimium ob gradus eminentiam imperfe-
ctiones, pariunt despectionem. Quod non contigisset eis, si essent in
humili statu collocati, nec supra ceteros per munus quod obtinent,
collocarentur; indeque crescit infamia & dedecus Prælati, vnde auctior
& maior debere esse gloria videbatur. Idem Abbas. [Dignitas, eum
quem efficit gradu & ordine celsiorem, reddit etiam consequenter;
longè latèque, cæteris notiozem: Et cuius vitam indigna conuersatio

In pa-
negr. de
4. Hono
conf.

Gente-
rus l. 4.

Epist. 3

Ibid.

deprimit & incestat, incestum eius dignitas quasi Prælo lumine manifestat.] Nimirum sicut dicit Apostolus. *Omnia quæ arguuntur, à lumine manifestantur. Omne enim quod manifestatur, lumen est.* Qui igitur in luce & sole dignitatis collocantur, sicut sunt manifestiores, Lib. 2. de ita facilius arguuntur & contemnuntur. Quod S. Bernardus grauior conf. c. 7. Eugenium admonuit.

36. Sed hoc exiguum esset damnum, si in contemptione Prælati, manifestatis eius defectibus sisteretur. Verùm quod est longè magis extimescendum, nihil proliuius, quàm vt Prælati velut oculi defectum, ruina totius corporis consequatur. Omnes enim ad ea quæ in Prælo conspiciunt, se conformant. Vnde si oculus mysticus tenebescat, totum corpus tenebrosum erit. [Quandoquidem oculus, (inquit S. Isidorus Ægyptius) vniuersum corpus moderatur, facièmaque exhilarat & exornat, atque omnium membrorum lucerna est, propterea velut in regia quadam sede collocatus est, vt qui supernam sedem nactus sit, aliisque sensibus præsideat. Quammodum enim Sol in terrarum orbe, sic quoque oculus in corpore est. Et quemadmodum ille si extingatur, omnia perturbabit; sic etiam extincto oculo, & pedes & manus, ac totum penè corpus, inutile reddetur. Prælati, corporis sacri oculus est. Quare si hic lucidus fuerit, hoc est virtutum radiis splendeat, totum corpus lucidum erit, vtpotè quod ab ipso regatur & gubernetur, eamque quam par est, curam consequatur. Si autem tenebrosus sit, hoc est ea quæ tenebris digna sunt, perpetret, vniuersum propemodum corpus obscuratur.] Nemo ergo amplius in Ecclesia nocet, quàm qui peruersè agens, nomen sanctitatis habet, vt 1. p. pa- ait in hanc rem S. Gregorius.

37. Tandem paræ oculorum maculæ, censentur longè maiores quàm cæterarum corporis partium grandiores neui; & labeculæ quæ in aliis partibus non curarentur, in oculo maximi fiunt: Simili modo, culpæ quæ in aliis censentur exiguæ, in Prælati habentur magnæ. Et idè Deus, idem sacrificium expiatorium deposcebat pro solo sacerdote, plebis fidelis Prælo, quod pro tota plebe. [Quod quidem, (iuxta S. Chrysostomum,) quid aliud signat, quàm Sacerdotis vulnera maiori medicamento atque auxilio indigere, atque adeò tanto, quanto coniuncta simul vniuersi populi vulnera indigent? Porro maiori nequaquam indigerent, nisi ea grauiora forent. Atqui grauiora certè fiunt, non natura ipsa, sed Sacerdotis qui ea commiserit conditione & dignitate.] Ob hanc ipsam causam, vulgaris puella quæ turpiter se gessisset, mitius plebatur, quàm filia Sacerdotis quæ similiter deliquisset. Nam filia Sacerdotis comburebatur, quia ob paternam dignitatem maiorem, iniquitas filie Sacerdotis habebatur maior.

38. Itaque ex celsiore loco, grauior est casus, & maior ruina, pleniorque contritio, quia culpæ grauitas non est tantum æstimanda penes damnum quod infert Prælo peccanti, sed etiam penes damna quæ infert

infert aliis qui ad eum attendunt. Et consideranda quoque est maior indignitas ex parte Prælati, qui honoratus à Deo vicaria nūminis dignitate, & præpositus aliis, tamen delinquit. Sicut enim eius ingratitude plenior est, ita & iniquitas maior. Iuxta Ambrosium, Prælati oculorum in corpore officium obtinet, vt reliquum corpus ducatum lucis assequatur. Vnde si obnubiletur nequitia cæcitate, non solum quia ipse malè agit, dignè perit; insuper & alios indignè perdit, quia sicut ipse cunctos respicit, ita etiam cunctorum oculi in illum respiciunt. Atque ita multo maior & tetrus est eius labe, quàm si in humili quopiam mystici corporis membro cerneretur, & verum apparet quod dixit S. Gregorius. [Grauius ergo onus de honore nascitur.]

C A P. XIII.

De quatuor rebus quas spirituales oculi debent iugiter contemplari.

I. **O**culi spirituales debent esse semper intenti in contuitu quatuor obiectorum. Primum est, Deus; Secundum, Christus Dominus; Tertium, Sancti, cum anteriores, tum præsentis; Quartum nos ipsi. Horum enim obiectorum visio, immensa est utilitatis, & ideo sæpè præcipitur in sacra Scriptura.

Obiectum primum oculorum spiritualium, Deus.

1. Deus est obiectum dignissimum in quod iugiter designantur oculi nostri, iuxta illud. *Oculi mei semper ad Dominum.* Et rursus. *Sicut oculi ancille in manibus domine sue, ita oculi nostri ad Dominum Deum nostrum.* Et hoc multis de causis. Nam Deus est principium nostrum, dans vitam, inspirationem, & omnia, in quo viuimus, mouemur, & sumus. Ipse est patientia nostra in tribulationibus, refugium in necessitatibus, misericordia in via, corona in gloria. Atque ita debemus semper Deum spectare vt causam nostri esse, vt subleuatorem necessitatum nostrarum, vt iudicem, & coronatorem operum nostrorum.

3. Perspicuum est, quod Deus sit causa nostra in genere entis: Nam si non essemus ab eo, qui ex se est, procreati, cur non semper fuissetmus, aut quomodo desinere aliquando possemus. Sed quia sumus factura Dei libere agentis, incepimus esse quando ipsi libuit, & desinemus quando subtrahet manum suam, & succidet nos. Est item Deus causa nostra in genere gratiæ. *Ipsius enim factura sumus, creati in Christo IESU in operibus bonis, quæ preparauit Deus.* Et merito dicimur à Deo creati, quia sicut in creatione deest subiectum, resque

ppp

producitur nullo ipsius præexistente quod concauset quoquomodo existentiam, ita quando accipimus primum esse supernaturale, nullum nostrum meritum propriè dictum ad id interuenit, sed pura causalitas efficientis Dei, sine qua nullam gratiam consequeremur. *Non enim sumus sufficientes cogitare aliquid tanquam ex nobis, sed omnis sufficientia nostra ex Deo est.* Et, nemo potest dicere Dominus Iesus, id est, velle credere Christum esse Saluatorem nostrum, qui est primus actus liber supernaturalis, nisi in Spiritu sancto.

4. Quis itaque non videat, quàm sit stultum, gloriari de eo quod aliunde habes? Iuxta illud Apostoli, *Quid habes quod non accepisti?* 2. Cor. 4. Nempe inter ea quæ sunt verè bona, siue naturalia, siue supernaturalia & pertinentia ad salutem. Nam peccata & defectus, non accepimus à Deo, sed habemus ex nobis: *si autem accepisti, quid gloriaris quasi non acceperis?* Itaque si omne bonum nostrum naturæ & gratiæ est à Deo, qui gloriatur, in Domino gloriatur. Aspiciat quisque in autorem & consummatorem fidei, ei que honorem pro omnibus suis bonis deferat, sibi autem confusionem faciei. In cuius rei signum, iubeat Deus, *Non plantabis lucum & omnem arborem, iuxta altare Domini Dei tui:* quia ut dicit quidam Sapiens, non licet sibi arrogare plantationem bonam, factam in anima, & inde altare Dei inumbrare, siue diuinam claritatem & gloriam minuere. In eiusdem rei signum dicitur in Exodo, *Si super altare culcrum tuum leuaueris,* id est, si tibi adscriperis, & acumini tuo ac industria tribueris tuum bonum opus, *polluetur.* Esse autem magnam impudentiam sic extolli de bono non suo, expendit egregiè Richardus premens illud Apostoli. *Quid habes quod non accepisti?*

5. Hinc est, quod multi in via salutis ruunt ac pereunt. Quemadmodum enim funambuli, nisi oculos semper sursum erectos habeant, in præceps abeunt & colliduntur, ita & nos, ut ait Chrysostomus, cum viæ insistamus longè arctiori, & ad cælum vsque protensæ, nisi semper sursum corda & oculos ad Deum conuertamus, cademus deorsum, & deiiciemur in æternum exitium. Idcirco multis expedit, ut Deus permittat illos cadere, sicut dicit Augustinus de Iudæis; permisisse Deum ut Iudæi ruerent in immania peccata, quoniam tanta erat eorum superbia, ut tali humiliatione esset deiicienda. Et hoc est quod ait Gregorius, super illa verba, *propter superbiam, quasi leonem capies me,* quod mira dispensatione pietatis, ante superbi oculos res quælibet in quam corruat ordinatur. Sicut leonæ ut capiatur, ouis in fouea obicitur, in cuius secretiore parte, cauea per quam leona securè educatur, constituitur, & sic clausa sine timore extrahitur. Habemus exemplum Nabucodonosoris, qui decreto vigilis efferatus est, & seipsum ut bos comedit, donec cognosceret quod potestatem haberet Altissimus in regno hominum. Item exemplum illorum Regum, quorum Deus baltheum dissoluit, & præcinxit fune renes eorum, id est illarum

regiarum quondam animarum, quas Deus ob superbiam fuit cadere in fœda peccata, vt differit S. Gregorius, qui alibi quoque ait, hoc esse de vtero Dei egredi glaciem, & gelu de cœlo generari.

6. Respicendum præterea est in Deum, vt in subleuatorem quatumcunque nostrarum necessitatum: quod Scriptura perpetuò celebrat, inculcans quod Deus est adiutor in opportunitatibus, in tribulatione, & quod pugnat & patitur nobiscum; descenditque cum Azaria & sociis eius in fornacem. Item quod descendit cum Iosepho in foueam, & in vinculis non dereliquit eum. Et alibi laudatur Deus quod redemerit sibi ex Ægypto gentem & Deum eius. Quod si redemptus est, captiuus ergo erat cum captiuus. Denique alibi dicit *cum ipso sum in tribulatione*, nimirum quia adiuuat eum qui tribulatione premitur, ita vt rectè dixerit Propheta, *In omni tribulatione eorum non est tribulatus*? Quando contigit, vt in aliqua eorum tribulatione, Deus non se gesserit perinde ac si tribulatio ipsum attingeret? Quando defuit illis, vel solatium & auxilium ne deficerent, non præbuit? Quis sperauit in eum & confusus est?

7. Sunt ergo stulti, qui cum haberent Deum paratum ad illis opitulandum, statuerunt potiùs oculos suos declinare in terram, ponentes carnem brachium suum, eique maledictioni se subiicientes qua feriuntur qui confidunt in homine: Detestabiliter verò stulti sunt, qui quærunt à Satana auxilium in necessitatibus suis, v. g. in morbis: vt ille Rex, qui auersis à Deo oculis, consuluit Beelzebub, Deum Accaron, cum posset ad Deum verum cum fructu recurrere. Satanæ enim remedia, omnibus sunt nocentiora vulneribus, vt S. Leo admonuit. Et qui ita ad Satanam recurrunt in morbis, adhibentes ligaturas vel incantationes, fiunt cultores Diaboli, sicut dicit Chrysostomus. Sicut è contrario, qui dicit cum Ezechia ægrotante, *Attenuati sunt oculi mei suspicientes in excelsum*, vel mox curatur, sicut Ezechias per miraculum curatus est; vel si perseuerat patiens, expectans Dei misericordiam, secundum Augustinum, [fit martyr in lecto, coronante illo, qui pro illo pedendit in ligno.]

8. Insuper respiciendus est Deus, vt idoneus ac legitimus iudex actuum nostrorum, cuiusque sensus exquirendus, neglecto contrario sensu cuiuscunque alterius. De B. Maria dicitur, [arbitrum mentis solita non hominem, sed Deum quærere.] Modo consimili, omnes Sapientes habent oculos in hoc suo capite, vt ait Salomon. Nam de oculis corporis, non esset mirum, quod dicit oculos Sapientis esse in capite eius, cum nullum sit animal quod alibi oculos habeat, quàm in capite. Igitur de animi oculis, tanquam peculiare sapienti dictum est, quòd oculos in capite, id est in Deo iudice habeat, sicut dicit Gregor. Nyssenus, quia Deum solum respicit, & à solo eius iudicio pender. Est enim summè sapiens; vnde non potest falli; & summè bonus, vnde nec fallere potest, & rectitudinem iudicij quòd ferendum

Ppp ij

agnoscit, velle peruertere: ac proinde standum est eius iudicio; & vel si mundus totus stet in contrarium, non est ab eius sensu recedendum, iuxta illud Augustini, [Cælum tonat, ranæ taceant.] Optimè Gregorius Theologus. Dei iudicium cordatis hominibus, pluris faciendum magisque curandum est, quàm omnium aliorum in vnum coactorum. An tu duos quidem homines, quorum alter acutior & sagacior, alter imperitior & hebetior esset, de eodem negotio in consilium adhibens, haud recta mente præditus esse videreris, si relicto prudentis consilio, iudicium imperiti sequereris; (neque enim Roboam ex eo laudem est consecutus, quod pro nihilo habita senum sententia, iuuenum consiliis paruit:) cum autem Deus & homines inter se expendantur, iudicia hominum potiora duces quàm Dei?] Intendamus ergo in Deum oculos, & ab eius iudicio pendeamus, posthabitis corruptis hominum iudiciis.

9. Tandem respicere Deum debemus, vt remuneratorem bonorum operum. Aliqui valdè stultè spoliant se mercede quam pro suis actibus sperare poterant, vt aliquem gloriæ fumum consequantur, & honorificentur ab hominibus. Idèd cum benè faciunt, canunt tuba ante se. Sed receperunt mercedem suam. Laudatur Ozias, quia fecit quod rectum est, sed etiam quia in conspectu Domini, id est quia Dei solius laudem & approbationem in bono opere quæsiuit, vt dicit Chrysostomus, qui contra eum qui aliter se gerit, addit, [Quid facis homo? Alij redditurus es rationem factorum tuorum, & alium testem citas eorum quæ facis? Alium habes iudicem, & alium adhibes spectatorem? Non vides aurigas, qui prætercurrentes totam illam stadij partem qua vniuersa ciuitas è sublimi spectat, sedens in equestri certamine, ibi contendunt concertatorum currus subuertere, vbi Cæsarem viderint sedentem, & vnum oculum, digniorem cui fidant, ducunt, quàm tot hominum vultus? At tu cum videas ipsum Angelorum Regem, tuo cursui, agonothetam, hoc est certaminis iudicem, & præmiatorem, præsidere; eo prætermisso, ad conseruatorum fugis oculos? Atque idèd sanè post innumeras luctas incoronatus recedis; post sudores plurimos, absque brauiis venis ad agonothetam. At non talis erat Ozias, sed in conspectu Domini faciebat quod rectum est.

*Christus Dominus, obiectum secundum oculorum
spiritualium.*

10. Post Deum in seipso, necesse est vt oculi nostri semper sint defixi in Deum hominem, siue Christum qui est caput nostrum homogeneum; & eodem proportionem modo se habet ad nos, quo ipsemet Deus. Nam est causa nostra atque principium; Est item refugium nostrum & virtus, & legitimus arbiter ac iudex noster, cui Pater omne iudicium dedit, ac denique est agonothetes & remunerator noster.

Est Christus Dominus causa nostra in ordine gratiæ, & idcirco dicitur *pater futuri sæculi* & sponsus Ecclesiæ. Omnes enim ex eo patre, & ex Ecclesiâ matre procreamur, omnes de plenitudine eius accipimus. Ipse omnibus gratiam promeruit, & remissionem peccatorum. Ipse fidelibus per ministerium Ecclesiæ sanctificationem quotidie impertit. Itaque nobis quoque dicitur illud Isaïæ. *Attendite ad petram vnde excisi estis, & ad cavernam laci de qua præsisi estis. Attendite ad Abraham patrem vestrum, & ad Saram qua peperit vos.* Glossa. Attendite ad Christum patrem multarum gentium, & ad Ecclesiâ quæ prius sterilis peperit vos. Christus est secundus Adam, quia nos genuit ex matre omnium viuentium Ecclesiâ. Legitur de S. Ephrem, quod ingressus Edeßam, obuiam habuit meretricem, ipsum intentissimè contuentem, de quo valde miratus, cum eam interrogasset cur ita faceret, accepit responsum sapiens, *quia ex te viro sumpta sum.* Similiter igitur, quia ex Christo sumpti sumus, debemus in eum iugiter respicere, nec unquam ab eo auertere oculos.

11. Nec tantum Christus, est causa nostra efficiens & veluti pater, sed etiam est exemplar nostrum, & idea. Quemadmodum enim architectus, priusquam ædificet, præconcepit domum ad cuius imitationem construat ædificium quod molitur; ita Deus cum aliquem formaturus est in filium adoptiuum, habet propositam formam filij naturalis, quam vult adoptiuo filio secundum eius capacitatem imprimere, quia intendit eum conformem facere imaginis filij sui naturalis, qui proinde est idea nostra. Et propter omnes *sanctificantes se*, ut dicit Apostolus, *sicut & ille sanctus est*, conformantur exemplis Christi, eumque sibi proponunt pro Idea, inspicientes & facientes secundum exemplar.

12. Respicere insuper debemus Christum, tanquam refugium nostrum. Non est enim homo qui non peccet, & multiplices irascendi causas Deo præbeat. Vnde totum refugium nostrum est Christus, præsertim crucifixus, in cuius vulneribus, abscondimur iuxta monitum Isaïæ, *Ingrederet in petram, abscondere in fossa humo, à facie timoris Domini.* Bernardus. [Si intellexerimus fossam humum, illam quæ ait, *foderunt manus meas, & pedes meos*, non erit ambigendum, de sanitate in ea citius adipiscenda animæ vulneratæ, quæ in ea demorabitur. Quid enim tam efficax ad curanda conscientie vulnera, nec non ad purgandam mentis aciem, quam Christi vulnerum sedula meditatio? Quod certius refugium herinacis & timidissimis leporibus quam hæc petra?] Idem Bernardus. [In foraminibus petre, passer inuenit sibi domum, & turtur nidum ubi reponat pullos suos. In his se columba tutatur, & circumuolitantem intrepida intuetur accipitrem. Et ideo ait: Columba mea in foraminibus petre, &c. In petra firmitas atque securitas est. Petra refugium hermactis. Et reuera ubi tuta firmaque infirmis securitas & requies, nisi in vulneribus Saluatoris? Tanto illic

securior habito, quanto ille potentior est ad saluandum. Fremit mundus, premit corpus, diabolus insidiatur? Non cado; fundatus enim sum supra firmam petram.] Desperatio opprimeret nos, in recogitatione peccatorum nostrorum: sed releuat nos cogitatio tantæ Dei misericordiæ, quanta elucet in Christo crucifixo, ad quem confugientes non deficimus, & omnia à Deo fiducialiter speramus. Qui enim proprio Filio suo non pepercit, sed pro nobis omnibus tradidit illum, quomodo non cum illo omnia nobis donauit? utique in præparatione animi, ac si per nos non steterit.

13. Contuendus quoque est Christus, ut arbiter mentis, & idoneus per omnia iudex noster, est enim sapientissimus ut falli non possit, & optimus ut fallere nolit. Itaque eius æstimationi & iudicio standum potius est, quam iudicio carnis aut sæculi. Amauit Christus pauperem, probauit demissionem, docuit tollendam cuique crucem suam. Non est tale, (ait Bernardus) iudicium mundi. Aut Christus fallitur, aut mundus errat. Sed diuinam falli impossibile est sapientiam. Merito proinde & carnis prudentia (mors siquidem & ipsa,) inimica est Deo, & sæculi quoque prudentia, stultitia nominatur. Quid enim? Christus utique qui non fallitur, elegit quod carni molestius est. Id ergo melius, id vtilius, id potius eligendum: & quisquis aliud doceat vel suadeat, ab eo tanquam à seductore cauendum, &c. Quis enim prudentior est duobus? Cuius iudicium iustius? cuius sententia sanior?

14. Quod si adhærendo sensui Christi, inferantur sannæ, non est cadendum animo, sed recordandum est, stultam fecisse Deum sapientiam huius mundi. Et sic fecit Zacchæus, cum relictis humi turbis ascendit in arborem sycomorum, quod interpretatur *ficus fatua*, quia fatua sæculi iudicia calcavit ut Christum videret, secundum Augustinum. Consideret qui huiusmodi est, quod Deus benedicit iusto; quod mirum in modum roborare debet animum eius, quem grauant peruersa iudicia in adhærendo sensui Christi. Nam ut ait Chrysostomus. [Quid damni accipit si homines contemnant, & vniuersus orbis terrarum, quando Angelorum Dominus eum laudat & prædicat?] Qui ergo pendet ex linguis hominum, & à tam infelici retinaculo nutat, cuidam sedi omnino inconcussæ stabilique se religet; nec, quid putent homines, sed quid Christus optimus rerum æstimator iudicet, attendendum sibi existimet; monentemque Augustino, statuat, qui talium putatorum linguis concidi timet, lignum esse aridum.

15. Neque verò figendus tantum est mentis oculus, in Christum iudicem rectum, & sapientissimum æstimatorem, per huius vitæ tempus, sed inspicendus est tanquam iudex scrutaturus in lucernis Hierusalem, in vitæ meta, & mundi fine, ubi monstrabit se habere oculum semper vigilem, quem quisquis semper considerauerit, numquam abducetur à recto. In cuius rei euidentiam legimus, cum quidam confor alteri

furripuisset suam, Christum paulo post ei esse obuolutum specie hominis comati, tonsoris operam deposcentis; quam cum ille non negasset, & ad occiput tendendo peruenisset, reperit duos sub crinibus oculos, & ad subitum tantæ nouitatis contuitum expauescens, cum inquisisset quid hoc esset, responsum retulit. Ego IHSVS vocor, qui vndique cuncta contemplor, & isti sunt oculi, quibus etiam suam vidi quam rapuisti. Videbit igitur Christus in iudicio, etiam ea quæ retrorsum sunt posita, quantumvis sint abdita, & de eis feret sententiam. Eaque consideratio, non terrorem tantum, sed etiam securitatem & fiduciam ingenerare apta est. Nam & vulgo, & vulgariter dicitur, vt ait quidam Sapiens, securus vadit ad placitum qui patrem habet iudicem.

16. Contuendus denique est Christus, vt corona nostra, & munerator noster. Ipse intendentibus in eum, coronam gloriæ & diadema speciei est pollicitus, & quæ promisit, fideliter iam exhibuit innumertis seruis suis. Nec nos igitur faller, si ab eo expectemus bonorum operum nostrorum compensationem. Miseri, qui actus pretiosissimos, quibus æterna bona emergari potuissent, pro fumo vendunt, & ab humano die magnificari, magni pendunt: Christus è contrario, pro terra silicem dabit, & pro silice torrentes aureos: & secundum magnitudinem laboris & perpeffionum, rependet gloriam & honorem. Sicut legitur in Iosepho, de Caio Imperatore qui Agrippæ è carcere educto auream catenam imposuit, eiusdem ponderis cuius fuerat ferrea, qua in carcere ligatus fuerat. Quod verò fingere in humanis possumus auctius munus, quàm si regnum omnibus à Christo dispositum dicamus, vt ipsemet professus est? Ait enim, *Et ego dispono vobis sicut disposuit mihi Pater meus, regnum.* In huius rei signum, in serie sacrorum librorum, ponitur primò lex, deinde iudicium, postea historia Regum: quia vt ait quidam Sapiens, seruantibus legem, post iudicium, rependetur sine fine regnum.

Tertium obiectum oculorum spiritualium, viri Sancti.

17. Post Deum & Christum, defigendus est visus noster in viros sanctos. Hique sunt montes in quos leuasse se oculos aiebat Dauid. Et secundum B. Gregorium, hi sunt testes quos Deus instaurat contra nos. [Quia bona quæ facere ipsi negligimus, hæc ad correptionem nostram fieri ab aliis demonstrat, vt qui præceptis non accendimur, saltem exemplis excitemur, atque in appetitu rectitudinis, nihil sibi mens nostra difficile æstimet, quod perfectè peragi ab aliis videt.] Nimirum si Deum duntaxat & Christum oculis nostris obiceremus, suppètere posset excusatio: quia Deus est ex se ens purissimum & indefectibile; Christus item quia Deus & homo est, non potest à recto deflectere.

Cum autem obuerfantur oculis nostris Sancti, ex eadem massa lutea ex qua nos coagmentati, merito dicitur nobis, tu non poteris, quod isti, & isti? Et idcirco dicebat Iob de peccatore reuerso ad cor, *Respiciet homines, & dicet peccauit*. Ac si dicatur, ait B. Gregorius. [Sanctorum virorum exempla conspiciat, atque eorum comparatione se pensans, iniquum se esse deprehendit.] Et hoc secundum eundem Gregorium, est inuenire thesaurum, effodiendo sepulchrum.

18. Nec tantum respicere debemus antiquos Sanctos iam caelis illatos, sed eos etiam quibuscum degimus. Propterea enim peruidit Deus, ut in omni aetate, & gradu, & regione, inueniantur viri sancti qui velut stellae in tenebris micent, ut dicit Augustinus; quarum plerisque varias virtutes singulatim praemonstrantibus, ex nomine propositis, subiungit B. Gregorius. [Ecce quam fulgentes stellas in caelo cernimus, ut inoffenso pede operis, iter nostrae noctis ambulemus.] Has stellas quamdiu durant tenebrae, & donec verus Lucifer oriatur, subministrat omni loco ac tempore Deus, ita ut de Demetrio, quem virum probum & sanctimoniam exemplar putabat, dicat Seneca, illum fuisse a Deo prouisum, ne saeculo suo testis deesset, possentque reuinci qui difficultatem vel impossibilitatem recte viuendi causarentur. In eos ergo sanctos quibuscum viuimus, respiciendum iugiter est; quod ad fouendam charitatem, & promouendam humilitatem, mirum in modum conferre potest. Sicut narrat B. Bernardus de vno laico sui Monasterij qui valde confundebatur in seipso, & in proximi venerationem & amorem valde incendebatur, cum triginta virtutes in vno e sodalibus annotasset, quarum se expertem profitebatur.

Quartum spiritualium oculorum obiectum, nos ipsi.

19. Tandem quartum, debemus iugiter oculos animae conicere in nos ipsos, iuxta illud oraculum quod e caelo descendisse dictum est, *nosce teipsum*. Conspectus autem est, & ortus noster, & progressus, & exitus e vita. Cum autem e duplici substantia sumus compacti, nempe ex anima & corpore; ortus noster quoad animam, est ex nihilo, quia anima sit per creationem. Natales ergo nostri ex ea parte sunt valde obscuri, nec habemus unde ex eo capite inflemur. Quid enim tenuius & abiectius, quam nihilum? ex parte vero corporis, discernenda sunt principia materialia & effectiua ortus nostri, & vtraque sunt valde misera.

20. Principia materialia, duo sunt distinguenda; nempe mediatum, siue terra de qua primus homo sumptus est, & proximum ac immediatum, e quo quilibet nostrum nunc primo formatur. Ortu suo e terra, homo & fragilitatis suae & humilitatis admonetur, secundum illud, *quid est homo, ut immaculatus sit?* Vbi Gregorius. [Eo ipso quo dicitur homo, terrenus exprimitur, & infirmus. Homo enim ab humo appellatus

appellatus est. Et quomodo esse valet sine macula, qui sponte sua ad infirmitatem concidit factus de terra? [Homo ergo ex puluere aqua subactio & intrito confectus, quomodo spiritus tollat? Quid superbit terra & cinis? Gregorius Nyssenus. [Sumpsit Deus puluerem è terra, *Orat. 2. de hom. prouocat.* & hominem te formauit. Si è terra discederes, fortè conditionis tuæ posses obliuisci. Nunc autem ab ea nunquam discedis, sed cum illa naturaliter coniunctus es, &c. Quamobrem quicquid agis in terra, siue magnum siue paruum id sit, abiecta conditionis tuæ monumentum habes, &c. Rationi terra semper suppetias ferat, eamque semper commonefaciat.]

21. Legitur in historiis, quod Agathocles Rex Sicilia, vt recordaretur suæ conditionis primæ, & quod ex figlina prouectus esset ad regnum, *Auson. epigr. 7.* vtebatur vasis fictilibus. Vnde Poëta.

Fama est fictilibus cœnasse Agathoclea Regem,

Atque abacum Samio sæpè onerasse luto.

Fercula gemmatis cum poneret horrida vasis,

Et misceret opes, pauperiemque simul.

Quarenti causam, respondit; Rex ego qui sum

Sicania; figulo sum genitore satus.

Hoc ipsum debet conspiciere oculus Christianus, sicut faciebat S. Paulus, qui dicebat, [Amamus vasa fictilia, quia & secundum Adam congnata nobis sunt, & Domini thesaurum in talibus vasis commissum habemus.] *Epist. 1. ad Senecam, in fine.*

22. Iam initia nostra immediata, quoad materiam eiusmodi sunt, vt si inspiciantur, opportunissima sint censenda ad remouendum tumorem nostrum. Nam ex parte quidem, ea materia talis est, vt nec honestè nominetur. Ex alia verò parte, talis materia, nempe menstruum materium, est aliquid non modò abiectum, sed etiam tetrum ac virulentum. Et sicut dicit Plinius, [nihil facile reperiatur mulierum profluuium magis monstrificum. Acefcunt superuentu eius multa, sterilefcunt tactæ fruges, moriuntur insita, exuruntur hortorum germina, & fructus arborum, quibus insedere, decidunt: speculorum fulgor aspectu ipso hebetatur, acies ferri præstringitur, eborisque nitor; aluei apum emoriuntur, æs etiam ac ferrum rubigo protinus corripit, odorque dirus aëra, & in rabiem aguntur gustato eo canes, atque insanabili veneno morsus inficitur.] En quanta sit virulentia, materiæ de qua maiori ex parte compingimur; ac proinde quanta inde nobis existat seges humilitatis, & diffidentiae nostri ipsorum. *lib. 7. c. 15.*

23. Generamur autem ex tam fœdis initiis materialibus, longè miserabilius quàm Adam ex suis. Hic enim quamuis per mortem in corruptionem descenderit, tamen à corruptione non cœpit. Idèd dicitur putredo, sed non vermis, secundum Gregorium in illud; *homo putredo, & filius hominis verbis.* [Primus namque humani generis parens, homo, non filius hominis; ex quo quisquis prodiit, non solùm homo, sed filius

QQQ

quoque hominis fuit. Sicut ergo ex homine filius, ita ex putredine nascitur vermis. Vnde rectè homo putredo, filius verò hominis, vermis vocatur. Primus quippe homo, putredo non vermis, quia etsi per mortem putruit, non tamen ex putredine per natiuitatem venit. Qui autem hominis est filius, vermis dicitur, quia iam ex mortalium corporum corruptione propugatur. Itaque omnium Adæ filiorum productio, est ex corruptione, proptereaque fugiuntur etiam ab honestè conuenientibus, oculi omnium. Vnde Augustinus, [cum agitur vnde filij nascantur, nec ipsi filij, si qui inde iam nati sunt, testes fieri permittuntur. Sic enim rectè factum, ad sui notitiam lucem appetit animorum, vt tamen refugiat oculorum. Vnde hoc? Nisi quia sic geritur quod deceat ex natura, vt etiam quod pudeat comitetur ex pœna.] Nempe multiplex corruptio, cui sublequitur prolis sic conceptæ corruptio miserrima. *Ecce enim*, aiebat Dauid, in legitimo satus connubio, *in iniquitatibus conceptus sum, & in peccatis concepit me mater mea.* Glossa, [in peccatis originali,] in quo virtute sunt omnes iniquitates & peccata.

Psalm.
50.

24. Sic genitus in sordibus & corruptione, feruorèque libidinis, & mortali suo peccato, miser homo, primordia vitæ habet humillima, & inferenda demissioni commodatissima. [Natura (ait Plinius) vnum animalium cunctorum alienis velat opibus. Cæteris variè tegumenta tribuit, testas, cortices, coria, spinas, villos, setas, pilos, plumam, pennas, squammas, vellera: truncos etiam arborèque cortice, interdum gemino, à frigore & calore tutata est. Hominem tantum nudum, & in nudà homo, natali die abiicit ad vagitus statim, & ploratus, nullumque tot animalium aliud, ad lachrymas, & has protinus vitæ principio, &c. Ab hoc lucis rudimento, quæ ne feras quidem inter nos genitas, vincula excipiunt, & omnium membrorum nexus; itaque flebiliter natus iacet, manibus pedibusque deuinctis, flens animal, cæteris imperaturam, & à suppliciis vitam auspicatur, vnâ tantum ob culpam, quia natum est. Heu dementiam, ab iis initiis existimantium, ad superbiam se genitos.]

25. Cœpta ad eum modum vita, perpetuæ corruptioni est obnoxia, ita vt aliud non sit quàm quædam prolixitas mortis iuxta Gregorium, ob quotidianum defectum nostræ corruptionis. Inde superbiam detestari docet Origenes, quod edificat quàm fragili vasculo homo contineatur, & quibus stercoribus homo immersus sit, & qualia semper purgamenta de sua carne proiciat. [Quid enim ait Scriptura? *Quid superbit terra & cinis? Et in vita eius proiecti interanea eius.*] Chrysostomus eundem locum expendens, ait. [Obscurum est fortassis dictum istud. *Interanea* dicit intestina, dicit viscera, ventrem stercoribus plenum, & multis sordibus ac fœtore. Non quod naturam damnet, sed vt ad humilitatem adducat. *Quoniam in vita, ad nihilum redacta sunt.* Vides quàm vilis & fluxa sit nostra substantia. Noli diem obitus expectare, vt infirmitatem tuam discas. Adhuc viuentem hominem scrutare, atque in eius viscera cogitatione descendere, tum videbis quàm nihil sit & abjectus.]

26. Nec ista consideratio Ethnicos fugit. Seneca. [Quid est homo? Quodlibet quassum vas, & quodlibet fragile. Iactatu, non tempestate magna, vt dissiparis est opus. Vbicumque arietaueris, solueris. Quid est homo? Imbecillum corpus, & fragile, nudum, suapte natura inerme, alienæ opis indigens, ad omnem contumeliam proiectum, &c. ex infirmis fluidisque contextum, & lineamentis exterioribus nitidum; frigoris, æstus, laboris, impatiens: Ipso rursus situ & otio iturum in tabem, alimenta metuens sua, quorum modò inopia, modò copia rumpitur, anxie sollicitæque tutelæ, precarij spiritus, & malè hærentis, &c. Numquid enim vt concidat, res magni moliminis est? Odor illi, saporque, & lassitudo, & vigilia, & humor, & cibus, & sine quibus viuere non potest, mortifera sunt. Quocunque se mouet, infirmitatis suæ statim conscium, non omne cælum ferens, aquarum nouitatibus, flatuque non familiaris auræ, & tenuissimis causis atque offensionibus morbidum, putre, casum.] Epicharmus hominem vocauit virem inflatum. Vt autem dixit Gregorius Nyssenus. Non magno negotio euenit vt exinaniatur vter spiritus. Anacreon acino vix passæ; Fabius senato poto in lactis hauitu vno pilo strangulatus est, vt narrat Plinius. Alij minimis ex causis ac plerumque latentibus & improuisis, vitam abruptere. Huc ergo oculum mentis sæpè reflectamus. Videamus qui, & vnde simus, ac quò tendamus, breui ad metam peruenturi.

27. Spirituali denique contuitu prospiciamus, quod plenius erimus cum animus è corpore exceßerit. Nempe plena putredo, nec iam saccus tabi & stercoris, vt ille Sapiens nominabat, sed mera corruptio & fœditas. Hoc in prosperitate, & lætitia, hoc in aduersitate & tristitia iugiter ab oculos ponendū erit. Legi quod Romani, cum aliquis triumphabat, collocabant eodem curru ponē eum, carnificem, vt mortis admoneretur, ne efferretur nimia superbia ob gloriam triumphi. Iidem in conuiuio, cum periculum erat ne animus exundante lætitia mergeretur, circumferebant laruam argenteam, inclamantes illud:

Hæu hæu nos miseròs, quàm totus homuncio nihil est!

Sic erimus cuncti, post quàm nos auferet orcus,

Ergo viuamus, dum licet esse, benè.

Digna non Ethnicis inter epulas, sed maximè sobrijs sapientiæ cultoribus conclusio, qua oculos in mortem certò securam defigere, & ad omnem honestatem studiosè ferri, admonemur.

CAP. XIV.

De tribus visionibus oculum delectantibus.

1. **T**Ria sunt, quorum conspectu oculus corporalis oblectatur. Nempe primò lumen, & Sol, iuxta illud, *Dulce lumen, & delectabile Eccl. i. oculis videre Solem.* Secundò Iris, de qua Iesus Sirach. *Vide arcum, & be-*

QQQ ij

*Ecl. 43. nedicum qui fecit illum. Valdè speciosus est in splendore suo. Gyrane
Æcid. cælum in circuitu gloriae suae. Tertiò color viridis, iuxta illud,
6. Denenere locos laetos & amœna vireta.*

Modo consimili, tria sunt quorum visio maximè oblectat oculos spirituales.

1. Primo, valdè delectabile est oculis spiritualibus videre Solem Iustitiæ, quod lumen respectu oculorum interiorum est Deus, in cuius visione tanta est delectabilitas ut dicat David, *Memor sui Dei & delectatus* Deus est lux æterna, nulla umbris permixta, nullis nebulis infuscabilis, nullis obnoxia eclipsibus, nec ita transmutabilis per motum, ut sequatur nox. Vnde de patre luminum, id est, de Sole mystico seu Deo; dicitur Iacobi 1. *Apud quem non est transmutatio, nec vicissitudinis obumbratio.* Nos in hinc in umbra sumus, quia habemus lucem, cui admixta est tenebricositas; unde status vitæ præsentis, à lobo nominatur *lux & tenebra*, cum ait *donec finiantur lux & tenebra*, id est, vita præsens. Et David cursum huius vitæ describit per successionem diei ac noctis, dicens, *Dies diei eructat verbum, & nox nocti indicat scientiam.* Quia ergo umbra est lux diluta tenebris admixtis, meritò in hac vita dicitur esse in umbra, ut disse-rit S. Bernardus. In Inferno autem sunt puræ tenebræ, & idè esse ibi umbra mortis; & David ait, vocem Domini interciderè flammam ignis, id est, iuxta S. Basilium, facere ut in Inferno, etiam flamma ignis separetur prorsus à lumine, sitque omnino tenebrosa. At Deus est lux perpetua, & nullo modo diminuta, qua in cælo potientur beati. De ea dicitur, *An- nunciat Deus, de luce amico suo, quod possessio eius sit, & ad illum possit ascendere.* Hæc est lux vera illuminans omnem hominem venientem in hanc mundum. Quam non obscurant quacunque ex parte tenebræ, ut ait Poëta laudans lucem, sed ei primam & principem lucem quæ totum præ- cessit opus, longè anteponeus.

3. Lux ista valdè recreat & exhilarat oculum mentis in eam delectum, iuxta illud, *Lux oculorum lætificat animam.* Verè enim Deus est lumen oculorum nostrorum, multò magis quàm iunior Tobias, *lumen oculorum* dictus est à matre. Et David cum peccasset & Deum amisisset, conquiritur, *lumen oculorum meorum non est mecum.* Hoc ergo lumen lætificat visum animæ, quantumvis mœrore pressæ. Et idè S. Iacobus admonebat, *Sed quis tristatur, oret.* Et David suam tristitiam professus, dicendo, *Ad me ipsum anima mea conturbata est,* addit, *propterea ut scilicet hanc* turbationem depellam & mœrorem diluam, *Memorero tui de terra Iordanis & Hermoniim, à monte modico.* Ab angustiis meis quæ tristitiam mihi & mœrorem offendunt, auertam oculos, eosque ad te sustollam, sicque exhilarabor. Ad huius lucis oblectationem, studiosè confugiendum est fatigatis oculis. Aliqui ob diuturniorem moram in tenebris, sunt excœcati; & ratio est; quia sedes facultatis visuæ nimis diu destituta spiri- tibus, frigore corripitur & marcet, nec est ulterius idonea suæ functio- ni. Quam etiam ob causam, ut dicit Seneca, artifices ex alicuius rei sub-

tilioris inrentione quæ oculos defatigat, si malignum & precatum lumen habent, in publicum prodeunt, & in aliqua regione ad populi otium dedicata oculos libera luce delectant. In tantis ergo tenebris nostris, subinde ad Deum cōuertendi sunt oculi: & sine hoc spectaculo, omne gaudium humanum mœror est & tristitia, secundum illud Tobia^{Tobia} senioris, quod quilibet peccator sibi debet accommodare; *quod gaudium mihi esse potest, qui in tenebris sedeo, & lumen cœli non video?*⁵²

4. Sed quia nimia lux, qualis est Solis in se spectati, noceret oculis; & legimus aliquos amisisse visum, per subitam educationem è carcere tenebroso ad nimiam lucem, propterea consultius, & nobis accommodatius est dum hîc peregrinamur, nec per speciem ambulamus, conuertere oculos spirituales in Solem iustitiæ, amictum nube: hoc est, in Verbum incarnatum, de quo Deus per Prophetam. *Solem nube regam.* Nam humanitas fuit illa nubes paruula, quasi vestigium hominis, quam monstratam legimus prænunciam Domini, diluuium inhabitare facientis. Hæc lux diluta, est tam delectabilis, vt antiqui eam à montibus æternis mirabiliter illuminantem prospectantes, & à longè salutantes, valdè exhilararentur. Abraham enim tenuem eius radium contemplatus, *vidit & gavisus est.*

5. Est autem maximè gratus oculis spiritualibus, aspectus huius Solis quando oritur: quia lux Solis orientis cum sit temperata, non præstinguit visum, sicut lux Solis in meridiano exurentis terram, qui radiis suis obcæcat oculos. Consimili modo, visitans nos oriens ex alto, in sua conceptione & Natiuitate Christus Dominus, cuius *quasi diluculum præparatus est egressus*, vt ait Oseas, valdè lætificat & oblectat oculos in eum conuersos, qui ei dicunt salutem, & læta acclamatione illum excipiunt, sicut legitur acclamasse luci nouæ Paganos, dicendo *Kaiete r̄v̄v̄ q̄d̄s, Salue nouum lumen*, Salue Sol oriens, Sol noue. Et iidem loquentes sicut asina Balaam, & nesciendo prophetantes, illum ipsum diem quo Christus natus est vocabant *Solem nouum*, vel diem nouæ lucis, vt dicunt Ambrosius, Augustinus, & Leo Papa.

6. In ortu igitur Christi conspiciendo, valdè oblectantur oculi spirituales de quibus dicitur. *Exortum est in tenebris lumen rectis corde.* Sicut legitur de S. Bernardo, quod à prima ætate maximè delectabatur in consideratione mysticorum nascentis & infantis Christi: Videre enim tantam Dei erga nos teneritudinem, valdè dulce est ac delectabile; Deinde suauissima nobis est recordatio liberationis nostræ è teterrimo & olidissimo ac obscurissimo carcere, per aduentum eius in carnem. Sicut non licet dubitare, quin maxima & prorsus extra communem modum exaggerata fuerit lætitia illius Michaëlis Imperatoris, qui cum esset conclusus in obscuro carcere, indeque paulo post esset educendus ad viuicomburium, cui cum ob linguæ procaciam addixerat Leo Armenus;eductus subito è carcere est, in ipsa nocte Natalis Domini; & interfecto Leone euectus in thronum Imperij, de tam immanibus

QQQ. iij

malis quæ ipsi imminebant ereptus, & tam magnis bonis ornatus, in ipso puncto aduentus Christi in mundum. Consimili modo, genus humanum erat in tenebroso carcere, addictum morti æternæ, & ignibus qui nec succeduntur, nec extinguuntur. Inde autem ereptum est, & in regnum filij dilectionis Dei translatus, per aduentum Verbi in carnem, cuius proinde aduentus contuitio, valdè grata est spiritualibus oculis. Meritò B. Virgini cantat Ecclesia; *Felix es sacra Virgo Maria, ex te enim ortus est Sol iustitiæ, Christus Deus noster.* Verè de Maria ortus est Sol, melius quàm de matre Augusti, cuius pater in puncto natiuitatis eius, vidit è sinu conjungis suæ oriri Solem, vt legitur in historiis.

7. Secundò valdè grata & amœna est oculis visio Iridis, quæ

Mille trahit varios aduerso sole colores,

Estque pulcherrimum Dei opus. Vnde Psalmista proferens speciosissima quæque Dei opera, cum quibus Salomonis thronum conferat, recenset quoque testem in cælo fidelem, id est Iridem, quam Deus posuit in nubibus, vt esset in testimonium fœderis Dei cum humano genere, deinceps non perdendo per diluuium. Et valdè quidem Iris oblectat visum corporalem: sed multò magis spirituale visum recreat, & delectat, significatum Iridis, siue Christus crucifixus, quem Isaias confert cum Irade dicens in Dei nomine, *In misericordia sempiterna misertus sum tui, dicit Redemptor tuus Dominus. Sicut in diebus Noë istud mihi est, cui iuravi ne inducerem aquas ultra supra terram, sic iuravi ut non irascar tibi, non increpem te. Montes enim commovebuntur, & colles contremiscent, misericordia autem mea non recedet à te, & fœdus pacis meæ non movebitur, dixit miserator tuus Dominus.* Et meritò cælestis arcus dicitur designare Christum crucifixum, quivelut arcus in ligno tensus est, fuitque signum fœderis inter nos & Deum; vnde & verius & cælum tensus est, ne homines teneantur.

8. Pius Poëta hunc arcum si expressit.

Pendulus obliquum Solem cum senserit humor,

Ancipites vario mistens splendore colores

Nec numerare queas, sic mixtos lumine visus

Multipli illudunt diuersis vultibus orbes,

Saphyrino, viridi maculoso, cœrulo, & albo,

Purpureum de nube trahit, de Sole cornescum, &c.

Hanc formam signo trepidis mortalibus arcus

Præstitit esse Deus, promittens nube serenum;

Nullaque iam terris debere pericula cælum.

Talis quidem fuit prima Iridis formatio, & in prædictum finem usurpata. Sed rectè subdit Alcimus, verum huius arcus significatum esse Christum, sic canens.

Nunc quisquis semel allatam seruare salutem

Optat, signatum potius signo inspicit Christum:

*Verus enim atque vnus firmatū fœderis arcus,
Ille Deum atque homines inter, qui virgine carne
Virginea ex vtero sumpta, iam munere lucet
Multiplici in celo varius, sed fulgidus omni
Fœtalem monstrat sacrati pignoris arcum.*

9. Hinc maximè delectatur visus spiritualis, cùm videt summum Dei erga se amorem, & clementiam inexplicabilem, qua Pater Filium tradidit, & quidem pro seruis & peccatoribus. Itaque Bernardus ait hunc fasciculum myrrhæ respectu Christi, cui tot perpeffiones fuere amarissimæ: sed respectu nostri, myrrhæ amaritudinem mutari in vinum quod lætificat cor hominis, vinum iucunditatis, & botrum Cypri, dummodo hanc myrrham non retrò in humeris, sed ante oculos habeamus, & inter vbera commoretur. Qua ratione sponder, omnes angustias nostras præ angustias Domini fore dulcorandas, & suauitate replendas. Sicque enascitur in nobis, vnus ille oculus vulnerans cor Dei, vt dicitur in Canticis; vbi Richardus, hunc oculum tradit esse visionem laborum Christi pro nobis, præsertim in cruce, vnde intramus in gaudium Domini, & cum summa iucunditate videmus, quanta nobis Deus bona per tanta sua mala parare voluerit, quæ visio summè recreat & oblectat videntem. [Deuotus miles non sentit sua, dum ad Christivulnera sustollit oculos, [vt ait Bernardus.

10. Tertia visio quæ valdè grata est oculis corporalibus, ea est qua intuetur colorem viridem. Nam vt dicitur in scientia Perspectiua color viridis maximè delectat oculum. Et rationem reddit Philosophus quia color viridis medius est inter extremos, & neque nimia luce perfunditur, qua dissipet spiritus visorios & lædat oculum, neque adedò mouet oculum, vt in perceptione sic diluti coloris, sit ei valdè laborandum.

11. Modo consimili, quamuis candor lucis æternæ curiosius inspectus disgreget visum nostrum; (*scrutator enim maiestatis, opprimitur à gloria;*) nigredo autem poenarum Inferni si nimium profundè cogitetur, apta sit lædere oculos mentis, & terrore nimio vrgere animam: Tamen viror promissionum Dei, & bonitatis eius, ac spes temperata misericordiæ diuinæ, oblectat oculos spiritualium virorum. Vnde Abbas Apollo, negabat fas esse homini credenti esse sibi Patrem in cœlis, & regnum præparatum, tristitiam pati vehementem. Et S. Ambrosius sub mortis horam dixisse legitur, non ita vixi vt me pudeat inter vos viuere, sed nec mori timeo, quia bonum Dominum habemus. Quæ verba S. Augustinus valdè admiratus legitur eaque tanquam valdè elimata & librata laudasse, quod sciens Ambrosius examen æquitatis diuinæ, de bono Domino magis confidere videri voluisset, quàm de suis purgatissimis moribus temerè præsumere. Itaque temperabat fiduciam sobrio metu, indèque internum visum qui in ea hora solet fatiscere, recreabat.

12. Hoc quoque debet similiter seruari, quoties quis ante obitum videns labores & asperitatem piæ vitæ, experitur languorem & fatigationem mentalis oculi. Sicut etiam plerique, ut scribit Plinius, ab intentione alia obscuratam aciem, aspectu smaragdi recreant. Est autem smaragdus viridis coloris, cuius aspectus est oculis iucundissimus: Vnde herbas quoque virentes, frondisque, avidè spectamus. Et qui gemmas scalpunt, hac grata oculorum refectione & viridi lenitate lassitudinem luminum mulcent. Quod spectans Salomon, ut significaret fessile leuamen post longam in expetendo fatigationem, dixit; *gemma gratissima, expectatio praestolantis*. Sic insipienti per virorem & amœnitatem bonorum promissorum, asperitates praesentes; non secus videbuntur iucundæ aspectu, & pulchræ oculis, quàm horrendæ & cruentæ gladiatorum pugnae, quas Nero spectasse dicitur interposita smaragdo, ut Plinius recitat, Hæque sunt vernantes gemmae, quas sibi à sponso circumdatas affirmabat B. Agnes. Cogitatione enim & prospectione futurorum bonorum, leuabat oculos, tot tormentis obseruantibus fatigatos.

13. Qui verò animum fessum recreare & leuare satagunt obiectu rerum caducarum, merorem sibi potius, & angorem cumulant: Nec aliter mentis suæ oculos afficiunt, quàm facerent erga Catholicorum corporeos oculos, impij illi Hæretici, de quibus S. Augustinus narrat, quod viam calcem oculis, & acetum immitterent. Similiter oculis suis laborem & dolorem accersit, qui eos quærit oblectare per bona caduca, quæ non sunt vera hominis bona. Sed heu quàm pauci sunt, quorum oculi non deprauentur & ferantur in obiectum cruciamentorum animi. Omnia alia animalia, in verum suum bonum rectà feruntur. Vni animalium homini, deprauantur oculi; Vnde Strabonum & Pætorum cognomina, quia solus homo à vero suo bono auertens oculos, accersit sibi laborem & dolorem, per creata bona quæ captat. Sed saltem cùm de morte cogitamus, & suprema funera oculis oblicimus, spectemus cœlestia, spretis his æreumis terrenorum, sicut ait Plinius, moriantibus operiri oculos, rursusque in rogo patescieri, Quiritium magno ritu sacrum fuisse; ita more condito, ut neque ab homine supremum eos spectari fas sit, & caelo non ostendi, nefas.

CAP. XV.

De osculo septemplici intuitus diuini.

1. Spiritus est Deus, ac proinde nulla nostra membra habet, ut bene tradit S. Paphnutius. Sæpè tamen memorantur in Scriptura oculi Dei, æquè ac alia membra nostra, puta aures, nares, manus, quæ reuera in eo quippe incomposito & simplici non habent locum. Efficacia igitur ibi diuinæ per membra monstrantur, non habitus Dei, nec corporalia lineamenta

neamenta ponuntur, vt quidam Sapiens ait. Ceterum ipse totus oculus, quia totus videt. Pro varietate tamen rerum visarum multiplex Dei oculus à Scriptura proponitur, nec semel in ea septem Dei oculi referuntur, id est multi, vt cum de versuto dicitur *oculis illius septemplices sunt*; id est omnia circumspiciet vt te emungat. Possumus itaque distinguere in Deo septemplicem contuitum, siue oculum; Nempe visionis presentium, prauisionis futurorum; recordationis antecedentium, miserationis ac benevolentiae; prouidentiae remunerationis & ultionis. Hic est oculus septemplex intuitus diuini, de quo dicendum.

2. Oculus visionis, ille est quo Deus, omnia praesentia quocunque tandem loco lateant, deprehendit; quod extendendum est ad arcana cordis nostri. Nam quamuis de corde humano scriptum sit, *Prauum est cor hominis & inscrutabile, quis cognosceret illud?* Tamen de Dei oculo perspicue dicitur quod *discretior est cogitationum & intentionum cordis, & non est ulla creatura inuisibilis in conspectu eius. Omnia enim nuda & aperta sunt oculis eius.* Hæc postrema verba Isidorus Monachus putat continere allusionem ad victimas excoriatas. Quemadmodum enim illæ, cum pelles detrahuntur, omni conspicuo indumento spoliantur, abditarumque internè partium statum & affectionem indicant, atque ad ossium omnium & membrorum indagacionem dissecantur: ita Dei oculus, ad omnes nostri cordis latebras, nullo obstante operimento peruadit. *Quoniam multa sapientia Dei, & fortis in potentia, videns omnes sine intermissione. Oculi Domini ad timentes eum, & ipse agnoscit omnem operam hominis.* Et rursum. *Posuit oculus suum super corda illorum.*

3. Quam ergo stulti sunt, qui putant inueniri posse latebras in quas diuinus oculus non penetret. Hæc est omnium peccantium insania, qua dicunt apud se, *Non videbit Dominus, nec intelliget Deus Iacob.* Sed Ps. 39. valde falluntur, eosque sepius reprehendit Scriptura. Et Dauid. *Et dixi, forsitan tenebra conculcabunt me.* Hanc suam peruersam cogitationem vel potius peccatoris, cuius personam ibi assumit, illico refellit Dauid, subiungens, *nox illuminatio mea, in deliciis meis,* id est, illa nocturna carnis opera, quæ putabam extinctis luminibus clam omnibus peragi, nocte tibi clarescente, non potuerunt à te abscondi; quia tibi *nox sunt dies illuminabitur, sicut tenebræ eius, ira & lumeneius.* Ita tibi clara est nox, ac dies. Iob eodem modo contestatur impios. *Non sunt tenebræ, & non est umbra mortis, vt abscondantur ibi qui operantur iniquitatem.* Et Ecclesiasticus. *Non dicas, à Deo abscondar, & de summo quis mei memorabitur? In populo magno non agnoscat.* *Que est enim anima mea in tam immensa creatura? Ecce calum & celi celorum, abyssus, & vniuersa terra, & quæ in eis sunt, in conspectu illius commouebuntur, &c.* Et omne eorum intelligitur ab illo. Et alibi. *Omnis homo qui transgreditur lectum suum, contemnens in animam suam & dicens, quis me videi? Tenebræ circundant me, & parietes cooperiunt me, & nemo circumspicit me, quem vereor: Delictorum meorum non memorabitur Altissimus. Et non intelligit, quoniam*

R.R.R.

omnia videt oculus illius, quoniam expellit à se timorem Dei huiusmodi hominis timor, & oculi hominum timentes illum. Et non cognouit, quoniam oculi Domini, multò plus lucidiores sunt super Solem, circumspectantes omnes vias hominum, & profundum abyssi, & hominum corda intrinsecus in absconditis partes.

4. Hoc item perpetuò admonent & inculcant Sancti. Et benè Bernardus, postquàm proposuit verba impij, qui dixerat, *parietes sunt undique, quis me videt?* Respondet; [Elto, nemo te videat, non tamen nullus. Videt te Angelus malus, videt te Angelus bonus; Videt te & bonis & malis maior Angelis Deus. [Et rursum.] Audit planè qui plantauit aurem, & qui finxit oculum, ipse considerat, Non illius Solis arcet radios; maceria lapidum quos ipse creauit, non vel ipse corporis huius partes, veritatis excludit aspectum. Nuda sunt oculis eius omnia. [Ambrosius, hanc esse ait stultitiam impiam, quam Sol peruadens omnia, apertè coarguit. [Si igitur radius Solis fundit lumen suum super omnem terram, & in ea quæ clausa sunt se inserit, nec vectibus ferreis aut grauium valuarum obicibus quo minùs penetret, impeditur; quomodò non potest intelligibilis Dei splendor in cogitationes hominum, & corda, semet, (quæ ipse creauit) inferere?]

5. Legitur de oculis smaragdinis leonis marmorei, quoddam radiosi erant, ut illustrarent subiectam abyssum, ita ut thynni instrumenta refugerent, diu mirantibus nouitatem piscatoribus, donec mutauere oculis gemmas. De Tiberio quoque scriptum est quod haberet oculos tenebrarum depulsores, ita ut expergefactus noctu, paulisper, haud alio modo quàm luce clara contueretur omnia, paulatim tenebris sese obducentibus. At oculus Dei, non modò ad breuiem moram & modicam distantiam illustrat obscura, sed etiam quantumuis loco dissito perpetuò illustrat, & non secùs ac splendidissima quæque, clarè conspicit. Minimas quoque cogitationum fibras, exactè perspicit. Quod multo est admirabilius, quàm quod narrat Plinius de illo dicto Strabone, qui peruidebat centum triginta quinque millia passuum, ita ut à Lilybæo Siciliae promontorio, exeunte classe Carthaginis portu, etiam numerum nauium diceret. Myrmecidis quoque & Callieratis, tam acutum visum fuisse dicit, ut quæ aliorum oculos fugerent, nec particulatim inspicere ab aliis possent, opera fabricarent. At nihil est adeò minutum, adeòve diffusum, ut diuini oculi præcellentiſſimam aciem possit effugere.

6. Merito igitur Augustinus obtestatur peccatorem. [Si peccare vis, quare ubi te Deus non videat, & fac quod vis.] Legitur de viro sancto, quoddam volens abducere à scelerum consuetudine miseram mulierem, adiit ad illam quasi idem præstiturus quod ceteri. Sed cum posceret locum secretiorem quàm is esset in quo alij peccare cum ea consueuerant, inductus est in locum abditorem. Cum autem nec iste ei videretur satis abditus, deductus est in penetralia adhuc remotiora. Verùm cum neque ibi se satis absconditum diceret, contestata est mulier, quod ibi à nemine

videri possent, praterquam à Deo. Siccine igitur, exclamat vir sanctus, quæ hominum conspectum reformidas, nec auderes in propatulo coram vili plebe peccare, non horres peccare in conspectu Dei? Ego quidem delinquere nolo, nisi ed deducar, vbi Deus nos nequaquam conspiciat. Audiuerat iste illud Ambrosij. [Hominem vereris præsentem, Dei Patris & Filij non vereris præsentiam? &c. Noli esse sicut cæcus oculis corporalibus, qui eo quod non potest videre præsentem, solum esse se credit, & in plurimorum cœtu, cum putat nullum esse præsentem, perpetrare ad-ritur quod arbitratum esse secretum: Non potest enim videntes videre, qui non videt. Similiter & tu mentis cæcatus oculis, noli æstimare, quod sine teste delinquas, quia hominis præsentiam declinare potuisti, &c. Putas te solum esse cum fornicaris, & non recordaris quia oculi Domini vident orbem terrarum?]

7. Propter hanc causam, quodcunque peccatum est graue multo magis; non modò quia est Dei iniuria, ob abusum rei suæ, inuito Domino; (agit enim peccator, atque ad eò seipso vtitur contra Dei veri Domini voluntatem;) sed etiam quia fit in conspectu Dei. Valdè autem impudens & in iudicem contumeliosus est, qui facinus ipso iudice teste committit, vt dicit Petrus Rauennas.

8. Denique non tantum Deus videt omnes, & omnia, sed etiam æquè perfectè singulos ac vniuersos, & singula ac omnia videt. Vnde super illud quod Moyse dictum est, *nouit te præ omnibus*, Glossa Augustini sic habet. [Nunquid ergo Dominus Deus, nouit plus aliqua, & aliqua minus? An secundum quod dicitur quibusdam, in Euangelio, *non noui vos*;] secundum hanc enim scientiam Deus dicitur scire quæ illi placent, nescire quæ displicent, non quia ignorat ea, sed quia non approbat, sicut ars rectè dicitur nescire vitia, cum improbat vitia;] præ omnibus Deus Moyses sciebat, quia Deo præ omnibus Moyses placebat? Itaque nihil plus, nihil melius, aut distinctius, quam alia videtur ab oculo Dei, sed omnia æquè clarè atque perfectè, non obstante multitudine, vel elongatione, à nobis; secundum illud, *Puerasne Deus è vicino ego sum, dicit Dominus, & non Deus de longe! Si occultabitur vir in absconditis, & ego non videbo eum, dicit Dominus. Nunquid non calum & terram ego impleo?* Nec visio diuina eget illustratione rei visæ, sed vno obtutu totam perfectè & exactè contuetur. Vnde propriè Deus dicitur *respicere non circumspicere*, secundum doctrinam Richardi.

9. Secundò oculus Domini ad futura quoque portigitur, & hoc est proprium illius: quia futura cum nondum existant, non possunt realiter mouere potentiam cognitiuam. Creatura autem cum sit finita, & debeat aliunde determinari ac compleri, non parit cognitionem nisi fecundata ab obiecto per immersionem speciei, sicut dicit B. Augustinus. Cum ergo obiectum quod non nondum est, nihil actiue conferre possit ad efformandam sui notitiam, & grauidendam potentiam; perspicuè infertur, creaturam facultatem visiuam non posse futura prospicere, sed hoc esse pro-

RRR ij

prium diuini oculi. Et idcirco talium rerum præcognitio, non secus dicitur diuinatio, nomine ducto à diuinitate, sicut humanus dicitur ab humanitate, sicut dicit Lactantius.

10. Hæc veritas frequenter inculcatur in Scriptura. Dicit enim Ecclesiasticus. *Domino Deo antequam crearentur omnia sunt cognita.* Rursusque alibi. *Opera omnis carnis, coram illo, & non est quicquam absconditum ab oculis eius. A seculo usque in seculum respicit, & nihil est mirabile in conspectu eius.* Id est nihil eueniet illi non præcognitum, quoddamque eum admiratione afficiat cum euenierit; sicut miramur quæ nobis nec opinantibus acciderunt. Item David dicit Deo, *Tu cognouisti sessionem meam & resurrectionem meam*, id est, quod eram sessurus & surrecturus, atque adeo omnia quantumuis minuta opera mea externa tu probasti, & penitissimè perspexisti. *Intellexisti omnes cogitationes meas de longe, semitam meam & funiculum meum inuestigasti*; omnes inquam meositus & reditus, omnes circuitus & gyros, quales facit prædam insequens canis venaticus, & præda illum fugiens: *Et omnes vias meas prauidisti, quia non est sermo in lingua mea*, quem tu non prauideris. *Ecce Domine, tu cognouisti omnia nouissima.* Omnia quantumcunque à tempore præsentis abijuncta, & extremis temporibus euentura, tu prauidisti. Sapiens quoque ait. *Sapientia de futuris æstimat, &c. Signa & monstra scit antequam fiant, & enentis temporum & seculorum.* Et Elaias, ait quod Deus fecit quæ futura sunt, quia perinde ea conspiciat oculus Domini, ac si iam facta essent, ita ut non videatur præscientia, sed præsens scientia, ut dicit S. Anselmus.

11. Magna hinc consolationis & confidentiæ materia subministratur bonæ animæ, cum perspicit nihil posse sibi euenire, quod à Deo præcognitum non fuerit, ac proinde aduersus quod non possit diuinitus muniri, & protegi. Vnde Augustinus super illud *firmabo super te oculos meos*, dicit ex Dei nomine. [Non à te auferam oculos meos, quia & tu non auferes à me oculos tuos, &c. Ergo leua oculos tuos semper in Deum, ut firmet super te oculos suos. Sed quid times, ne cum habeas oculos ad Deum, offendas, ne non respicias ante te, & fortè incurras in laqueum? Noli timere; ibi enim sunt oculi ipsius, quos obfirmat super te.]

12. Nec tantum oculus Dei ea prospicit quæ reuera aliquando erunt, sed etiam quæ reipsa non erunt; essent tamen, si aliquid aliud poneretur. Sic enim David de rogante, an si ipse in Ceila maneret, & Saul eò veniret, Ceilitæ essent ipsum tradituri, respondit Dominus, *iradent.* Tam ergo perspicax est diuinus oculus, ut rem quæ futura non erat, fuisset tamen futura, si David ibi mansisset, & Saul eò venisset; præcognouerit perinde ac si absolute futura fuisset. Nimirum illud quod fieret, aut non fieret, si conditio aliqua poneretur, est aliquid verum determinatè: (non enim vtrumque contradictorium, vel neutrum, sed alterum duntaxat, verè tunc accideret;) Cum igitur oculus diuinus

perspiciat omne verum, non potest Deus hoc ignorare. Vnde magis firmatur fiducia & consolatio bonæ mentis, ex tanta diuini visus perspicacia, quæ ad omnia quomodocunque nos spectantia, pertingit.

13. Tertiò, Oculus Domini videt quoque quæ remotiora sunt ab esse, quàm præsentia vel futura, hoc est præterita, vt dicit Ecclesiasticus. *Domino Deo, antequàm crearentur omnia sunt agnita, sic & post perfectum, respicit omnia.* Non est ergo timenda in Deo obliuio: & mentita est iniquitas sibi, cum dixit, *oblitus est Deus auertit faciem suam ne videat in finem.* Deus enim etiam quæ nobis præterierunt, æquè habet oculis suis præsentia, ac cum re ipsa existebant. Vnde nihil illi excidit. Et sicut nullum iusti folium defluit, sed Deus accuratam omnium rationem seruat, compensaturus quantumuis minuta bona opera eius in tempore; ita de malis operibus nullum planè erit, quod Deus non adducat in iudicium. *Omnis misericordia,* (inquit Sapientia) *faciet locum unicuique, secundum meritum operum suorum.* id est, cap. 16. Deus qui est ipsamet misericordia, & quidem vniuersalis & infinita, assignabit unicuique sedem ipsius meritis debitam, & secundum intellectum peregrinationis ipsius, id est, prout videbit eum se gessisse in corpore, cum peregrinaretur à Domino, & esset viator. Et propterea subdit. *Non dicas, à Deo abscondar, & ex summo quis mei memorabitur? In populo magno non agnoscar; quæ est enim anima mea in tam immensa creatura? &c. In omnibus his insensatum est cor,* (id est quia) *omne cor intelligitur ab illo.*

14. Hoc est quod Iob Deum compellans, aiebat. *Signasti quasi in sacculo delicta mea.* Sicut enim antiqui annulo obsignabant sacculos, ne quid inde subduceretur, ita Deus delicta peccatoris asseruat in suo intellectu, & ita custodit, vt nihil inde effluat, sicut dicit per Moysen, *Nonne hæc condita sunt apud me, & signata in thesauris meis? Mea est vitio, & ego retribuam in tempore.* Quasi diceret, ego semper video coram me omnia ab hoc populo hætenus malè gesta, ita vt nihil eorum apud me pereat, sed eorum perfectè meminerim. Imò Deus propriè non meminit, neque recordatur. Nam recordatio est iterata cognitio rei præcognitæ, siue visio intellectualis rei prout prius visæ. At Deus eandem visionem atque notitiam, absque vlla variatione continuat. Non igitur habet in rigore loquendo, memoriam vel recordationem, sed perennem contuitum rei in tali differentia temporis positæ; quæ est multo perfectior rei præteritæ visio, atque cognitio.

15. Quartò, Est in Deo oculus amoris. Nam de re cupidissimè amata dicit Zacharias. *Hæc est oculus eorum in vniuersa terra.* Et Dominus ait. *Si oculus tuus scandalizat te, erue eum.* Oculum vocat rem charissimam, nec secus dilectam quàm oculus, vt exponit Ildorus Monachus. Et Dauid dicebat, *non proponebam ante oculos meos rem iniustam.* Glossa Augustini. *Quid est non proponebam ante oculos? Non diligebam.* Deut 32. Soler enim dici de homine, qui ab aliquo diligitur, *anse oculos illum* Ps. 100.

RRRr iij

habet. Et ille qui contemnitur sic solet quæri, *non me habet ante oculos.* Quid ergo est ante oculos habere? Diligere.] Et alibi ait, quod dicitur vxor Putipharis inieciſſe oculos in Iosephum, quia ea est vſitata locutio pro eo quod est, *amauit eum.* Denique oculus amor est, & amare, videre est, vt dicit Richardus. Etiam profani idem tradiderunt. Idcirco enim Græcus Poëta affirmavit, quod oculis ſtillat amor.

16. Hic oculus & hæc viſio, est manifeſtè in Deo, & ſæpè inculcatur in ſacra Scriptura. Sic enim oculi Domini dicuntur eſſe ſuper iuſtos, quod est Deum amare illos. Et alibi dicit Deus, *Ponam ſuper te oculos meos*, id est, amabo ac fouebo. Similiter apud Zachariam dicit Deus, *Non tranſibis ſuper eos ultra exactor, quia nunc vidi in oculis meis*, id est, aſpexi eos amoris oculis, & dilexi. Item apud Ezechielem: *cum eſſes in ſanguine tuo, vidi te.* hoc est, amaui, & eripere tantis malis volui. Hanc Dei erga ſe viſionem agnoſcebat Agar dicens. *Tu Deus qui vidiſti me*, demonſtrans amorem quo Deus eam proſecutus fuerat. Puteum quoque ad quem Deus teſtimonium amoris illi exhibuerat, vocauit *puteum viuentis & videntis.* Erat etiam antiquum prouerbum, *in monte Dominus videbit.* Id est, ſicut amaui Deus Iſaacum, & è ſummo diſcrimine ac præſentiſſimo illum eripuit, ita amabit nos, & erit adiutor in opportunitatibus, in tribulatione, vt Hieron. expoſuit.

17. Agebat gratias de his Dei erga ſe oculis B. Maria, dicens, *reſpexit humilitatem ancillæ ſuæ*, id est, amaui me, & beneuolus erga me puſillam & abiectam fuit. His iſtis oculis Dominus apud Lucam, *conuerſus reſpexit Petrum*, qui tunc erat in atrio, nec poterat à Chriſto in domus penetralibus conſtituto, videri corporaliter. Sed vidit eum Dominus, amando deiectum in tam infelicem ſtarum, vt dicit S. Aug. Sicut ergo impij, iuxta Apoſtolum, *habent oculos plenos adulterij, & inceſſabilis delicti*, quia iugiter vident, id est, amant & concupiſcunt, quod concupiſcere & ſibi amare vetantur, ſecundùm quod dicit Iſidor. Monachus exponens verba Chriſti *qui viderit mulierem*, ita Deus habet oculos plenos charitatis & inceſſabilis amoris in nos, quod innumera beneuolentiæ argumenta, quæ perpetuò edit, ſatis ſuperque teſtatum reddunt. Et hi verè ſunt oculi catti, quæ eſt gemma præſantiſſima, de qua fabulantur, quod diuitem faciat poſſeſſorem, obſtèctque ne prematur paupertate: de qua etiam illud narrant admirabile, quod ſi lineus pannus applicetur eius oculo, id est, meditullio, vti non poteſt. Is enim ſuper quem ſunt oculi Dei, nec poteſt diues non eſſe, nec vti igne vlllo profano, aut conſumi, vel quomodolibet lædi.

18. Quintò, Eſt in Deo oculus prouidentiæ quo dirigit nos, & præparat nobis neceſſaria, tam ad corporis bonum, quàm ad animæ ſalutem. Dicit Macrobius, quod Egyptij ſceptro Dei appingebant oculum, & hoc vt ſignificarent prouidentiam Dei oculatiſſimam, ſempèrque vigilantem ſuper nos. Id quod etiam S. Cyrillus Egyptius ſcriptum reliquit. Sed & hiſtoria prona refert, quod Atreus Iouis in ſubdiali ad

quam Priamus capta Troia confugit, tribus oculis erat insignis, quibus diuina de tribus orbis partibus, per tria tempora, exprimebatur prouidentia. Imo Ieremias, rectricem Dei prouidentiam expressit per virgam vigilantem, id est, oculatam, nec indormientem, sed excubantem rebus nostris.

19. Iste oculus est valde mirabilis, & eius consideratio magnam parit iustis consolationem. Nam quamuis omnibus planè creaturis, maximèque hominibus prospicit, tamen specialius inuigilat iustis. Et ideo dicitur, *Oculi Domini super iustos*. Et alio loco, *Oculi Domini super iustos mentes eum*. Saluianus. [Aspicere iustos homines Deus dicitur utique ut *ps. 15.* conferuet & protegat. Aspectus enim diuinitatis propitiæ, munus est conseruationis humanæ.] Quàm ergo dulces est, cogitare, quantàmque securitatem ingenerat, bene attendere, quod oculus Dei, qui non dormitat, neque dormit, inuigilet nobis & firmetur super nos, ut iustis & piis promittitur? Vnde sequitur, quod Dei oculo regente & dirigente nos, nihil nobis deerit, & omnia mala auerterentur à nobis.

20. Hic oculus prauenit nos, nec facit expectare oculos nostros. Nam si Iob protestabatur se non fecisse expectare oculos viduæ, ut non solum ex munere (inquit Gregorius,) sed ex celeritate quoque muneris, bonorum operum merita augeret: Multo magis Deus, non expectatione nos fatigat, sed prauenit nos inexpectata beneficia conferens, sicut dicit Philo. Tantùm quoad ea quæ præxigunt consensum nostrum liberum, expectat Dominus ut misereatur nostri: Quia in parte bono nostro ac honori consultum voluit secundum Gregorium Nazianzenum, ut salus nostra non esset purum Dei beneficium gratuitum, desituereturque ratione meriti, sed aliquo etiam modo, nostra esset. Id quod multo nobis dignius est quàm merè alieno munere salutem adipisci. Et quanquam nos ferè semper malè respondeamus tantæ Dei beneuolentiæ, expectanti nos, & tam parum à nobis deposcenti, tamen oculus iste nunquam friger vel torpet præ rigore, quod de oculo corporali dixit Philosophus, quia tam multis tunicis obuolutus est, tamque multo adipe circumfartus, ut non periclitetur à frigore: vnde nulli vnquam legitur congelasse. Hoc multo verius est de Dei oculo. Nam ob nimiam charitatem suam, Deus, magna prouidentia & amore curat res nostras, tametsi nostrum frigus erga Deum, aliud exigeret.

21. Sextò habet Deus oculum ultorem. Iste est oculus iustitiæ, quem agnouerunt Pagani. Dicit enim Gellius ex Diphilo. [Est qui tuetur cuncta Iustitiæ oculus.] Isti oculi sunt scintillantes, de quibus scriptum est. *Oculi eius velut flamma ignis*. Respicit Deus his oculis montes, & facit eos tremere, quia superbi & impij, respiciente & succensente Deo, dant scelerum pœnas. Aiebat quidem Propheta Deum alloquens, *Mundi sunt oculi tui, ut non videant malum, & respicere ad iniquitatem non poteris*: quia etiam si Deum nulla latet iniquitas, secundum illud, *Infernus & perditio coram illo*, ac etiam alibi, *cognoni scie-*

lera vestra; tamen dicitur Deus non videre & non respicere, malum quod odit & pleat: sicut ait Augustinus circa illud *de celo respexit Dominus*. [Vidit eos ille qui ait, cum esses sub ficu vidi te. Vidit enim eum, qui miseratus est eum. Vnde plerumque, egenti misericordia dicimus homini, *Vide me*. Et de illo qui te contemnit, quid dicis? *Non me videt*. Est ergo quaedam visio miserantis cordis, non visio punientis. Illa visio ad peccata, animaduersio est. Quia illa peccata non vult videri qui dicit; *Averte faciem tuam à peccatis meis*. Quod vult ignosci, non vult agnosci. *Averte* (inquit) *faciem tuam à peccatis meis*. Cum ergo auertit faciem suam à peccatis tuis, non videbit te.]

22. Hoc oculo videt Deus omne peccatum, quia seriùs ocyùs illud puniit; Estque iste oculus incorruptibilis, multo magis quàm oculus illius sancti Episcopi Ludouici Catalaunensis, qui quod iniuste conspiceret non huius, inuentus est longè post mortem incorruptus, & intentior crystallo; quàmuis totum reliquum corpus esset resolutum in puluerem. Ne putent ergo peccatores, quod corrupturi sint oculum Dei, iusti vltoris. Et aliqui quidem pingunt ascititi coloribus hos Dei oculos, vt appareant non truces & terribiles, sed pulchri, sicut faciebat Iezabel, pingens stibio oculos suos: & illæ quas S. Hieronym. & Isidorus Monachus damnant, habentes orbes stibio fuliginatos. Oculos enim fuligine collinebant, vt dicit Tertullianus, vt apparerent pulchræ oculis. Alia crocum apponebant, iuxta illud.

Nec pudor est; oculos tenui signare fauilla,

Vel propè te nato lucide Cyane croco.

Sed hæc picturatio & suffuscatio, vt eam sanctus Cyprianus appellat, non potest habere locum circa Dei oculos, quia quantumuis peccator, Deum sibi fingat, dissimulaturum & dimissurum cum peccauerit, tamen Deus non irridetur.

23. Septimò habet Deus oculum præmiantem, de quo dicitur. *Dominus est oculus hominis, & omnium tribuum Israël*, quia Deus omnem Israël, quod est interpretatum *videns Deum*, aspiciet æquissimis & beneuolentissimis oculis, reddens ei bona quæ oculus non vidit. Et tunc apparebit verum, quod dixit Sapiens. *Rex qui sedet in solio iudicij, dissipat omne malum inuitu suo*. Nam ex quo Christus venerit iudex, & deinceps per totam æternitatem, exterminabitur malitia quæ prorsus à celo aberit, & omnis iniquitas oppilabit os suum, id est, Diabolus, (vt dicit Gregor. Nyssen qui est omnis iniquitatis incensor, desinet vrgere & sollicitare iustos ad culpam, cui vlteriùs non erunt obnoxij. Et hæc erit præcellentissima electorum præmiatio, tam arctè, tamque indissolubiliter iungi Deo, vt nulla ratione auelli ab eo possint, & declinare in obligationes.

24. Hic idem Dei oculus, complebit bonis posituiis, & immensa, nec satis vnquam per nos explicanda beatitate, omnes electos. Nam ibi verè videbitur esse rectè dictum, quod omnes dicunt, inquit Chrysologus,

logus. [Hoc vniuersitas sentit ex usu, de felicibus sic dicendo, *Vidit illum Deus.*] Quia ergo cumulabit Deus electos omnibus bonis, facietque felicissimos, in præmium rectè anteactæ vitæ, dicetur illos videre. Et ipsi quoque, mundato mentis oculo Deum videbunt. Nam nunc quidem omnes homines vident eum & unusquisque inuenitur procul. Procul eum intuentur, atque aded verè non vident, secundùm Gregorium, qui eum per sola opera conspiciunt, non vident autem, sicuti est, quod in cælo dabitur.

25. Sed ad hoc exquisita exigitur præpurgatio. Nam, vt ait quidam Sanctus, si nascentis iubar Solis, oculorum nostrorum vix suffert sanitas tora vel puritas, quanta interni visus est præparanda synceritas, vt splendorem sui ferre possit orientis & radiantis autoris? Purgationum autem & aptationum oculi Deum visuri; ea est potissima, vt homo in omnibus videat Deum; Vbiq; inquam, & in omnibus studiosè intendant Dei gloriam. Deinde regendus, & aberratione quàm exactissimè prohibendus est corporis oculus; nam & idcirco modicæ extensionis creatus in pupillam, quatenus moderatè visum videat, non inuideat; præuideat, non proripiat; prospiciat, non despiciat. Oculus sit animæ fenestra, speculum sit mentis, sit lumen corporis; membrorum dux sit, non introitus vitiorum. Sic dirigendo corporeos oculos; qui nunc nostri non sunt, nostri fient, iuxta promissionem Domini, *quoniam oculi tui considerabis*, quia vt dicit Bernardus, cum oculus mentis mundatus Deum videbit, oculi corporis nunc alieni, nostri erunt, quod concedere tandem digneetur dulcis & rectus Dominus. Fiat, fiat.





REGVLÆ VITAM CHRISTIANAM COMPLECTENTES.



PRIMA REGVLÆ si homini videtur dura via virtutis, quia continuè oportet nos pugnare aduersus carnem, & diabolum, & mundum; recordetur quòd quacumque elegerit vitam, etiam secundum mundum; multa illi aduersa, tristia, incommoda, laboriosa patienda sunt.

Secunda. Recordetur quòd in rebus mundi, diutius pugnatur, & laboriosius, & infructuosius, in quibus labor est finis laboris, & tandè pœna aeterna.

Tertia. Recordetur stultum esse, credere ad cœlum posse perueniri nisi per huiusmodi pugnam, sicut & caput nostrum Christus, non ascendit in cœlum nisi per crucem; nec debet serui conditio, melior esse conditione Domini.

Quarta. Recordetur non solum esse ægrè ferendam hanc pugnam, sed optandam, etiamsi nullum inde nobis præmium perueniat, solum vt conformemur Christo Deo & Domino nostro. Et quoties resistendo alicui tentationi, alicui ex sensibus tuis vim facis, cogita cuinam parti crucis Christi conformis reddaris; vt quando gulæ resistens, gustum affligis, recordare illum felle potatum & aceto. Quando manus retrahis à rapina alicuius rei quæ tibi placet, cogita manus illius pro te ligno crucis affixas: Et si resistis superbix, recordare illum, quum in forma Dei esset, pro te formam serui accepisse, & humiliatum fuisse vsque ad mortem crucis: Et quum ira tentaris, recordare illum qui Deus erat, & omnium hominum iustissimus, quum se tamen videret quasi latronem, & illudi, & conspui, & flagellari, & opprobriis omnibus affici, & cum latronibus deputari; nullum tamen vnquam, aut iræ, aut indignationis signum ostendit, sed patientissimè omnia ferens, omnibus, mansuetissimè respondebat.

TTT

Et sic discurrendo per singula, inuenies nullam esse passionem quæ te Christo aliqua ex parte conformem non efficiat.

Quinta. Caue ne in vllis mortalibus armis, nec in quoquam alio humano remedio confidas, sed in sola virtute Iesu Christi, qui dixit: *Confidite, ego vici mundum*, & alibi: *Princeps mundi huius, eijcietur foras*, quare & nos sola eius virtute confidamus, & mundum posse vincere, & diabolum superare. Et ideo debemus semper petere eius auxilium per orationem, & sanctorum suorum inuocationem.

Sexta. Recordare quum vnā vicisti tentationem, semper aliam esse expectandam, quia diabolus semper circuit quærens quem deuoret: *Quare oportet semper seruire in timore*, & dicere cum Propheta: *Super custodiam meam stabo*.

Septima. Non solum non vincaris à diabolo quum te tentat, sed vincas ipsum, & hoc est quando non solum non peccas, sed ex ea re vnde te tentauerat, occasionem sumis alicuius boni: vt si opus tuum bonum aliquod tibi offert, vt inde in vanam gloriam incidas, tu illud statim non opus tuū, sed vt beneficium Dei cogitans, humilias te, & iudicas parum gratum te esse Deo de beneficiis eius.

Octaua. Cum pugnat, pugnes quasi vincendo, deinde perpetuam pacem habiturus, quia fortè hoc tibi dabit Deus ex gratia sua, & diabolus amplius non redibit, confusus de tua victoria. Sed quum vicisti, geras te quasi mox pugnaturus, vt in pugna semper victoriæ, & in victoria semper sis memor pugne.

Nona. Vt quamuis te sentias vndique benè munitum & paratum, semper tamen fugias occasiones peccandi, quia vt dicit Sapiens; *Qui amat periculum, peribit in illo*.

Decima. Vt tentationibus semper in principio occurras, & allidas paruulos Babylonis ad petram, *Petra autem erat Christus*: quia serò medicina paratur.

Undecima. Recordare quod licet in ipso conflictu tentationis ardua videatur pugna, tamen longè dulcius est vincere tentationem, quàm ire ad peccatum, ad quod te inclinat. Et in hoc multi decipiuntur, quia non comparant dulcedinem victoriæ dulcedine peccati, sed comparant pugnam voluptati: & tamen homo qui milles expertus est quid sit credere tentationi, deberet semel saltem experiri, quid sit vincere tentationem.

Duodecima. Propterea quod tentaris, ne credas te à Deo derelictum, Deo parum gratum esse, aut parum iustum & perfectum. Memor sis, quod postquam Paulus vidit diuinam essentiam, patiebatur tentationem carnis, qua permittebat Deus eum tentari, ne de superbia tentaretur. In quo etiam homo debet aduertere, quod Paulus qui erat vas electionis, & raptus vsque ad tertium cælum, tamen erat in periculo, ne de suis virtutibus superbiret, sicut ipse dicit de se; *Ne magnitudo reuelationum exsolueret me, datus est mihi stimulus carnis meæ Angelus Satana qui me co-*

laphizet. Quare super omnes tentationes, homo debet maximè se munire contra tentationem superbiz, quia radix omnium malorum superbia est; contra quòd, vnicum remedium est, cogitare semper, quòd Deus se humiliavit pro nobis vsque ad crucem, & mors nos vel inuitos eò vsque humiliabit, vt simus esca vermium.

ANNOTATIONES IN PSALMVM

Decimum-quintum.

Conserua me Domine. Si quis perfectus vult recognoscere statum suum, vnum habet periculum, ne de sua virtute superbiat. Idèd David loquens in persona iusti, de statu suo, incipit ab hoc verbo: *Conserua me.* Quòd rectè consideratum, omnem amouet occasionem superbiz. Nam qui potest aliquid ex se acquirere, potest illud ex se sibi conseruare. Qui ergo petit à Deo conseruari in statu virtutis, significat per hoc, quòd nec à principio, ipsam virtutem ex se acquisiuit: Qui autem recordatur virtutem se consecutum non virtute propria, sed virtute Dei, non potest de ea superbi, sed magis humiliari coram Deo, iuxta illud Apostoli: *Quid habes quòd non accepisti, & si accepisti, quid gloriaris quasi non acceperis?* Duo sunt ergo verba quæ semper habere debemus in ore, alterum scilicet: *Miserere mei Deus*, quum scilicet recordamur peccatorum. Alterum est: *Conserua me Deus*, scilicet cum recordamur virtutum. Quoniam speravi in te. Hæc vna res est, quæ facit nos à Deo impetrare quod petimus; quum scilicet nos impetraturos speramus. Et si duas has conditiones obseruabimus, vt numquam petamus à Deo nisi ea quæ nobis sunt salutaria, & vt id quod petimus, ardentè petamus, cum firma spe quòd Deus nos exaudiat, nunquam erunt irritæ orationes nostræ. Quum igitur non impetramus, est, aut quòd illud nobis est noxium: nescimus enim quid petamus, vt inquit Christus, & idem dixit: *Quidquid petieritis in nomine meo, dabitur vobis.* Hoc enim nomen Iesus, Saluatorem significat: & idèd nihil petitur in nomine Iesu, nisi quod est ad salutem ipsi petenti. Aut non exaudit, quia si bona petimus, non benè petimus, hoc est cum parua spe: qui autem timidè sperat, frigidè petit. Idèd dicebat Iacobus: *Postulet autem, in fide nihil hesitans.* Dixi Domino Deus meus es tu. Postquam muniuit se contra superbiam, incipit describere statum suum. Totus autem status iusti consistit in hoc verbo; *Dixi Domino, Deus meus es tu.* Quòd verbum licèt videatur fere omnibus commune, pauci tamen sunt qui illud possint vere dicere: Illud enim quis habet pro Deo, quod habet pro summo bono: & illud habemus pro summo bono, quo solo habito, si cætera desint, putamus nos esse fælices: & quòd vnum si desit, etiamsi habeamus omnia alia bona, putamus nos esse miseros:

TTT t. ij

Dicit igitur avarus pecuniæ; *Deus meus es tu*: Quia etiam si ei desint honor & sanitas, & virtus & amici, modò pecuniam habeat, contentus est. Et si habeat omnia illa bona quæ diximus, & pecunia desit, putat se esse infelicem. Gulosus item, crapulæ; & incontinens, libidini: & ambitiosus, imperio siue gloriæ dicit: *Deus meus es tu*. Vide igitur quàm pauci possint dicere: *Dixi Domino, Deus meus es tu*: quia illi solus Deus sufficit; itavt si ei proponantur omnia regna mundi, & cælestia omnia, & terrena bona, non tamen vt illa consequeretur, Deum offenderet. In hoc igitur dicto consistit totus status hominis iusti. Quoniā bonorum meorum non eges. Reddit rationem propositi sui, quare scilicet soli Domino dicat: *Deus meus es tu*. Ratio autem est, quoniam solus Deus bonis nostris non eget: nulla enim creatura est, quæ non indigeat aliis creaturis, quamvis imperfectioribus, vt probant Philosophi & Theologi, quia si illæ non essent, ipsa non esset. Quia destructa vna parte vniuersi, destruitur totum vniuersum: Destructo autem toto, destruantur omnes partes: omnes autem creaturæ sunt partes vnius vniuersi; cuius vniuersi, ipse Deus, non pars est, sed principium, nihil ab eo dependens: nihil enim acquisiuit Deus ex hoc quòd creauit mundum, & nihil perderet, si totus mundus annihilaretur: solus ergo Deus bonorum nostrorum non eget. Debemus autem erubescere, illum habere pro Deo, qui bonis indiget nostris, qualis est omnis creatura. Præterea non debemus habere pro Deo, hoc est pro summo bono, nisi illud in quo est summum bonum: In nulla autem creatura est omne bonum: Soli igitur Domino debemus dicere: *Deus meus es tu*.

Sanctis qui sunt in terra. Post Deum maximè debemus amare illos qui sunt Deo maximè coniuncti, quales sunt Angeli & beati in patria: Idèd postquam dixit Domino. *Deus meus es tu*: subdit, quòd Deus. Mirificauit voluntates meas in eis, hoc est, mirabiles fecit amores eius, & desideria eius erga sanctos, qui sunt in terra eius: hoc est, in cælesti patria, quæ dicitur terra Dei, & terra viuentium. Et verè, si consideremus quanta sit illius patriæ felicità, quanta huius mundi miseria, quanta ciuium illorum bonitas & claritas, desiderabimus semper hinc discedere, vt illic habitemus. Hæc autem & similia quum meditamur, illud semper curare debemus, ne infructuosæ sint meditationes nostræ, sed ex qualibet meditatione aliquam semper acquirere virtutem debemus. Vt ex hac cogitatione de bonitate patriæ superioris, debemus acquirere virtutem hanc, vt mortem non solùm fortiter feramus & patienter, quum venerit hora nostra, aut si pro fide Christi nobis obeunda sit; sed vltro etiam appetamus; cupientes scilicet ex hac valle miseriorum discedere, vt in illa felici patria, cum Deo & Sanctis eius regnemus. Quum ergo iustus descripsit statum suum, qui totus est in affectu erga Deum & diuina, despiciatque ex alto statum hominum malorum, dicit:

Multiplacatæ sunt infirmitates eorum. *Per infirmitates* autem intelligit idola, & ita habet textus Hebræus: sicut enim bonus, vnum habet Deum quem colit, ita mali, multos habent Deos & idola, quia multas scilicet voluptates, multa desideria vana, passionēs diuersas quibus seruiunt. Idè autem multas quærunť voluptates, quia nullam inueniant quæ eos quietet, & idè in circuitu impij ambulant. & subdit, postea accelerauerunt: quia scilicet post sua desideria precipites ruunt, & inconsideratè. Vnde edocemur, vt non minùs ipsi celeriter curramus ad virtutes, quàm ipsi currant ad vitium, nec Domino nostro minùs diligenter seruiamus, quàm ipsi seruiant Domino suo diabolo. Iustus autem considerans statum malorum, proponit firmiter, sicut & nos semper debemus facere, nullo modo velle eos sequi, & dicit:

Non congregabo conuenticula eorum de sanguinibus, nec memor ero nominum eorum per labia mea. Dicit autem *de sanguinibus*; tum quia idololatræ solebant collecto sanguine victimarum circa idolum suas agere ceremonias: tum quia tota vita malorum, relicta ratione, sensualitatem sequitur, quæ in sanguine sita est. Dixit autem quod non solum non vult sacrificare idolis, sed nec nominare ea, quod tamen dici & fieri potest; ostendens per hoc, quod non solum homo perfectus, debet abstinere ab illicitis voluptatibus, sed etiam à licitis, vt magis totus feratur in cælum, & contemplationi diuinorum purius vacet. Et quia aliquis posset credere quod esset stultitia, priuare sese omni voluptate, subdit:

Dominus pars hereditatis mea. Quasi dicat, non mireris si omnia alia relinquo vt Deum possideam, in quo etiam alia omnia bona possidentur. Debet hæc esse vox cuiuslibet boni Christiani, *Dominus pars hereditatis mea*; quia nos Christiani, quibus Deus ipse pro hereditate promittitur, debemus erubescere aliquid præter ipsum desiderare. Et quia posset videri alicui præsumptio, audere hæc sibi promittere, idè subdit. *Tu es qui restitues hereditatem meam mihi.* Quasi dicat: Domine Deus meus, benè scio quod quam nihil sim respectu tui, viribus meis non possum ascendere ad te possidendum, sed tu es qui trahes me ad te per gratiam tuam, & tu es qui te ipsum dabis mihi possidendum. Vt consideret deinde iustus, quanta sit hæc felicitas, vt ei Deus pro hereditate contigerit, subdit:

Funes ceciderunt mihi in præclaris. Pars enim & sortes antiquitus per funes diuidebantur; & quoniam multi sunt qui licet ad hanc felicitatem sint vocati, sicut sunt omnes Christiani, ipsam tamen nihil faciunt, vt potè quam pro leui sæpè voluptate commutant, idè subdit. *Hereditas mea præclara est mihi.* Quasi dicat, sicut ipsa est præclara, ita ego eam præclaram reputo, & omnia alia respectu eius, vt dicebat Paulus, sicut stercora reputo. Quoniam autem habere hoc lumen intellectus,

TTT t iij

ut homo cognoscat felicitatem sibi à Deo datam, donum Dei est, idè subdit.

Benedicam Dominum qui tribuit mihi intellectum. Quoniam autem sapè homo iudicat secundum rationem servire Deo, sensualitas autem & caro repugnant: tunc autem homo perfectus est, cum non solum anima eius, sed & caro in Deum fetuntur, iuxta illud: *Cor meum & caro mea exultauerunt in Deum vinum*; idè subdit: *Insuuer & usque ad noctem, increperunt me renes mei.* Id est renes ipsi in quibus maxima solet esse inclinatio ad concupiscentiam, non solum inclinant me ad malum, sed potiùs increpant; hoc est retrahunt; etiam usque ad noctem; id est còusque, ut etiam ipsi ultro proprium corpus affligant. Afflictio enim sapè, per noctem solet designari. Ostendit deinde quæ sit radix tantæ perfectionis, & dicit.

Prouidebam Dominum in conspectu meo semper. Nam si quis Deum semper haberet ante oculos pro regula omnium operationum suarum, & in omnibus operationibus suis, nec propriam utilitatem, nec gloriam, nec voluptatem quæreret, sed solum ut Deo placeret, breui perfectus euaderet. Et quia qui ita agit, semper in omnibus prospicitur, idè dicit: Ipse à dextris est mihi ne commouear. Ostendit deinde quanta sit felicitas iusti viri, quia scilicet erit in æternum felix, & in anima & in corpore, idè subdit.

Propter hoc lætatum est cor meum. Id est, anima mea lætata est, sciens post mortem sibi cælum esse paratum. *Et caro mea requiescet in spe.* Id est, quamuis ipsa non lætetur, quasi acceptura statim post mortem statum suum; requiescet tamen in sepultura, cum hac spe, quod resurget in die iudicij, cum anima sua immortalis, & splendidissima. Et hoc totum declarat in sequenti versiculo: nam quia dixerat quod anima lætabatur, subit rationem.

Quia non derelinques animam meam in inferno. Et quia dixerat, quod caro requiescebat in spe, subdit rationem dicens. *Nec dabis sanctum tuum videre corruptionem.* Quia quod fuit corruptibile: & quia Christus fuit primus qui intrauit paradysum, & nobis vitam aperuit; & fuit primus qui resurrexit, & resurrectio eius est causa nostræ resurrectionis, idè ista quæ diximus de resurrectione, principaliter de Christo intelliguntur, sicut declarauit Petrus Apostolus, & secundariò intelligi possunt de nobis, in quantum sumus membra Christi, qui solus non vidit corruptionem, quia corpus eius in sepulchro putrefactum non fuit. Quoniam igitur via benè viuendi, ducit nos ad perpetuam vitam animæ & corporis, idè subdit.

Notas mihi fecisti vias vite. Et quia tota felicitas huius vitæ consistit in aperta visione & fruitione Dei, idè subdit.

Adimplebis me læticia cum vultu tuo. Et quia felicitas in æternum durabit, idè subdit.

IN PSALMVM XV.

617

Delectationes in dextera tua usque in finem. Dicit autem in dextera tua, quia felicitas nostra completur in visione & fruitione humanitatis Christi, qui sedet in dextera maiestatis in excelsis, iuxta illud Iohannis; Hec est vita aeterna ut cognoscant te, & quem misisti, Iesum Christum.

FINIS.



DE
RAYMVNDO
IORDANO
CANONICO REGVLARI,
QVI HACTENVS
IDIOTÆ
NOMEN PRÆTVLIT;
COGITATIONES
PRIORES ET POSTERIORES
Theophili Raynaudi ex Societate IESV,
EIVSDEM
Facule ad subobscura quadam loca.

D B
RAYMUNDO
JORDANO
CANONICO REGULARI
OVI HASTENVS
I D I O T A E
NOMEN PREVALIT
COGITATIONES
ERIORES ET POSTERIORES
Thophilis synonimi ex societate IESV
FINIS
Ludo ad philosophiam ordinis IESV



D E
RAYMVNDO
IORDANO
 CANONICO REGVLARI,
 QVI HACTENVS
ID IOTÆ
 NOMEN PRÆTVLIT.

PRIORES COGITATIONES, SIVE
coniectura de Autore anno 1630. euulgata.

1.



Vis & cuius fuerit, quo æuo vixerit, quod institutum professus sit, Autor contemplationum quæ *Idiota* nomine circumferuntur, nondum liquet. Coniecturas nostras aliorum sensibus in hoc limine subnectere, operæ pretium videtur. Quamquam de omnibus capitibus propositis præterquam de ætate, altum hæctenus apud omnes silentium. Hos & de æuo nonnulla distinctius, & de reliquis aliqua proponere possumus, beneficio M. S. exemplaris quod nacti sumus, continens præter quinarium libellorum, *Idiota* nomine pridem vulgatorum, alios præterea plerosque pios fœtus intermixtos prioribus, eodem ordine ac stylo, & quod caput est, eodem spiritu ac pietate conscriptos: vt indubitatum planè videatur, eiusdem ingenij partus esse, de quo prouoco ad pij & periti Lectoris saluam: nam nunc tandem exhibentur è mendosissimis, & maculosissimis codicis salebris, tanquam è luto gemeno recens educti; ope benè oculati ac industrij librarij, cuius peritiæ

Aaaaa ij

556 COGITATIONES PRIORES ET POST.

ac fidei, in tam incommoda conformatione characterum, & aspectus nostri suppressione, plus tribuendum necessariò fuit, quàm voluntas, quacumque euulgamus, omnia per nos dispiciendi non aliena fide edendi, ferre solet. Ex illis ergo alijs libellis, non paucas aut leues coniecturas, cum quoad æuam, tum quoad alia auctoris adiuncta promerere licet, quas Lectoris interest non ignorare.

2. I. *Ætatem*, certum est non prætergredi, vel etiam attingere sæculum à Christo nato sextum, quo vixit Sanctus Gregorius magnus; Eius enim verba vsurpat Autor, tanquam anterioris & recepti scriptoris. Vt *cap. 3. de beatitudine. num. 2.* locum profert S. Gregorij ex Homil. 37. in Euangelia. Et *cap. 11. meditat. de Spiritu Sancto robor. animam; num. 1.* locum adducit ex Libro 25. Moral. c. 12. & ex Homil. 11. in Ezech. Hæc exploratum reddunt, Autorem de quo agimus, esse D. Gregorio posteriorem. Nec ullus sanè adeo promouit eius ætatem, vt D. Gregorio æqualem statueret: sed qui illam maximè prouexit Genebrardus, in Chronologia, Idiotam collocat sub annum Christi 850. cum Treculpho, Ansegiso, Vvandelberto, ac Theophane Nicæno, cuius æui designatorem, laudat Trithemium. Sed apud hunc nihil inuenio tametsi vt ita scripserit Trithemius, densi apud eum anachronismi suaderent, fidem non faciliè adhibendam dictis, quæ potiore & ineluctabiliore, quàm Trithemij autoritate destituerentur. Idem circiter æuam tribuunt Idiotæ Ferdinandus Salazar l. de Concept. c. 42. & X. & Egidius à Præsent. l. 3. de præseruat. q. 4. art. 1. §. 1. dicens Idiotam floruisse anno 800. Et pugnat cum ea nota temporis, quo vixerit & scripserit hic Autor, multiplex ratio, & quidem potens. Nam Autor in *meditationibus de Spiritu Sancto c. 18.* in fine, meminit flagellationis Christianæ, quam passim vocamus *disciplinam*, eoque ipso nomine illam signat. Et hoc nomen, tempore Petri Damiani, hoc est sub annum Domini M. L. inductum esse in Ecclesiam, Cardinalis Baronius, anno 1056. annotauit; & liquet ex eiusdem Petri Opusc. 50. cap. 14. ac ex libri 5. Epist. 8. quæ inuehitur contra molles quosdam sancti illius vsus tamquam noui infectatores. Fortius etiam vrget argumentum ex eò ductum, quod Autor S. Bernardi verba aliquoties vsurpet. Vt in *Prologo contemplat. de Deip. num. 3.* cum ait: [Iuxta cõsiliũ cuiusdã deuoti serui eius.] Mariã semper cogita, Mariam semper inuoca: non recedat ab ore, non recedat à corde: & vt impetres eius orationis suffragium, non deferas conuersationis exemplum. Quæ hausta sũt ex calce Homiliæ 2. super *Missus est* apud Bernardum. Ex eodem item petita sunt illa in *cap. 2.* earundem *contemplationum* directæ ad Deiparam. [Quodcumque alicui sanctorum vnquam datum fuit, tibi non fuit negatum.] Hoc enim veluti principium, apud Bernardum legitur Epist. 174. Apertè quoque numerus 1. & 2. cap. 10. *meditationum de amore*, compactus est ex Bernardi tractat. de diligendo Deo in §. primi calce. At citra controuersiam est, posteriorem Damiano fuisse Bernardum; quippè qui anno 1153. è viuus excesserit; cum Petri Damiani anno 1072. obiisse prodatur. Itaque Idiotæ non antecessit fines sæculi duodecimi.

3. Ausim verò dicere, multò etiam inferiùs summouendum esse. Nam passim deprehendo, receptas in schola Theologica loquendi formulas apud eum adhiberi. Sic cap. 26. *meditat. de amore, num. 1.* præceptorum meminit affirmatiuorum, & negatiuorum. Et ibidem cap. 16. num. 2. & cap. 21. num. 2. mentio est actuum ab amore imperatorum, vt sint Deo grati. Capite item 15. num. 3. & cap. 17. num. 1. virtus moralis, absque charitate pronuntiatur informis. Capite 16. *de beatitud.* Autor distinguit beatitudinem in obiectiuam & formalem; quæ omnes sunt Scholasticorum Phrasæ, anterioribus Ecclesiasticis scriptoribus incompetæ: primum autem inductæ, ex quo efferbuit scholastica docendi & scribendi ratio, sub annum scilicet Christi 1250. Quin etiam, tam liquida conceptæ absque parentali labe Deiparæ assertio, quam proponit cap. 2. *contemplat. de beata Maria num. 4.* & cap. 6. num. 1. sapit posteriora tempora, quibus Scoti præsertim, eiusque partiariorum studijs, mollitie piæ illius sententiæ præterito rigore, & depulsa nouitatis inuidia, promptius in eam à Catholicis, pro sua erga Deiparam veneratione, ventum est. Accedit denique quod Autor in *contemplat. de morte cap. 2. num. 2.* deplorat Catholicæ Ecclesiæ angustias, & compactionem in angulum Occidentis; quod perfectum est sæculo 15. post Constantinopolitanam cladem, & Turcicam Imperij Orientalis inuasionem, quæ contigit anno 1452. Quare in hos fines sæculorum, concludendus omnino videtur Idiotæ, quamuis vbi præcisè statuendus sit, compertum non habeam. Et cum ætatis annum 50. attigisse se scribat p. 3. *de glor. cap. 2.* potuit inchoato iam sæculo decimosexto, vixisse. Hæc de Autoris æuo.

4. II. Natione Gallum fuisse, frequentes Gallismi testatum faciunt, Eiusmodi sūt quos subijcio; initio Proëmij tractatus deplorationū: *Oportet quod homo cultinetur.* Hominem *cultinare*, Gallis idem est, quod expolire. & excolere; metaphora ab agris ducta. Cap. 1. *medit. de Spiritu Sancto.* *Carpentarius similitudinem suam, quam habet in mente, imprimit in arca;* Carpentarium pro vsu Gallico vsurpat, loco fabri lignarij Cap. 33. *de amore num. 2. video per effectum, quod laqueus est in auro.* Et hæc Gallica Phrasis est, aliquid verè & re ipsa positum designans. Capite 16. *de morte, num. 2. proprium magistrum occidit inuidia.* Hic verò purissimus est Gallismus; quo passim Dominus & possessor rei cuiuspiam, *eius magister* audit. Hæc, (ne plura anxie conquiram,) perspicuè produnt, scriptorem de quo agimus, Gallum fuisse, quando quidem omnes lingua nostra loquimur, in qua nati sumus.

5. III. Professio citra dubium est. Disertè enim se sacerdotem testatur, in *deplorat. par. 1. cap. 6. num. 2.* Nec nudè sacerdotem fuisse, sed cui credita esset cura animarum, constat ex cap. 11. *eiusdem partis num. 1. & 2.* Et verò Ecclesiasticæ Præfecturæ adiunctos fuisse annuos proventus, proficetur *ibidem cap. 7. num. 2. & parte 4. cap. 5. num. 2.* Necesse autem est, fuisse beneficium regulare. Nam ipse disertè *parte illa 1. cap. 13. initio*, se à mundo segregatum affirmat: idque iurat *parte 4. cap. 8. num. 2. vbi se com-*

Aaaaa iij

558 COGITATIONES PRIORES ET POST.

munem fratrum vitam profiteri scribit, & se S. Augustini filium profite-
tur. Quod praefectura illa animarum, & adiuncti prouentus, suadent de
Canonicis Regularibus accipiendum, non de Eremitis, quibus ex Regula,
neutrum quadraret. Eiusmodi porro sunt haec adiuncta, quae protulimus,
ut non liceat comminisci Autorem veluti formam precandi, aut pium
aliquid mente agitandi, proponentem; ea exempli gratia adhibuisse, à
Lectore, (uti in hisce descriptionibus assoler,) in se transformanda. Quid
enim intererat, aetatem quinquagenariam, & concreditam animarum
procuracionem, ac talem religiosam professionem signare, in precandi
vel meditandi formula, nulli (quod ex epigraphe doceamur,) accommo-
data, sed omnibus vniuersim proposita? Itaque haud dubie Autor, adiu-
cta illa status sui exprompsit, ut se eorum commemoratione, ad pietatem
excitaret, non ut alijs orandi vel meditandi paradigma per scriberet.

6. IV. Nomenclatio *Idiotæ*, in nostro Codice nusquam comparet: &
verisimile est ab eo qui vulgatos quinque libellos primus edidit, fuisse ap-
positam, spectata styli simplicitate, & descriptionis ratione, quae tota est in
sanctis affectibus, & pijs igniculis excitandis, abiecta omni lenociniorum,
& phalararum, (verius dixerim, muscarum morientium, vnguenti suauitatem
perdentium) sollicitudine. Quamquam Iacobus Faber Stapulensis,
qui priusquam Neracum in Aquitania, ad Caluinisimum profitendum se-
cederet, ante annos circiter centum, Parisijs, quinque illos libellos Ty-
pographico praelo, (fortasse primus,) commisit, Autorem non alio se,
quam *Idiotæ* nomine prodidisse testatur. Et ita semper in omnibus poste-
rioribus editionibus, quae extant quamplurimè, nominatus habetur.
Quamquam si Commentarius in Psalmum 15. & Regulae Christianae vitae,
Idiotæ nomine haecenus vulgatae, & idcirco huic quoque editioni adiu-
cta, sunt reuera Ioannis Mirandulae Comitis, ut fert eiusdem operum
Elenchus, & in eius vita à nepote edita insinuat; liquet, lucubrationes
viri & ingeniosissimi & facundissimi, *Idiotæ* nomen praeferre; tamen si pla-
ne diuersi ab eo cuius sunt Tractationes reliquae huius voluminis: Neque
enim adiuncta quae proposuimus num. 2. & 3. possunt in Ioannem Picum
cadere. Et potuit sane Picus, in illis duobus lucubratiunculis, disertus licet
ceteroqui ac doctus; potuit Autor reliquorum huius operis tractatum,
quamuis alias facundus & eruditus, in hoc tamen opere *Idiotæ* audire; eo-
dem iure quo apud plerosque, S. Ephrem; cuius tam vilem verborum tes-
tam, quae *Idiotam* plane referat, in plerisque operibus, & fere in omni-
bus asceticis, mirati iam pridem sunt veteres apud Photium Cod. 196.
quamuis doctrinam, & cum res fert, etiam facundiam, vix alibi reperias
exquisitiorem & amariorem; quod prodit bona pars tomi quarti, quo ora-
tiones encomiasticae continentur.

7. Ut ut sit, latere sub hoc nostro sordido pallio sapientiam, interstiti
identidem tantae dictionis humilitati, grandium sensuum velut purpurei
clavi, demonstrant: vnde prudens Lector, Autoris doctrinam non diffi-
cile aestimabit. Nam ut est apud Constantinum Manassem in annal. num. 133.

Gustus etiam per exiguum, doli totius, & contexti egregie populi documentum, fimbria prebet; ut leo magnanimus, ex unguibus agnoscitur.

Posteriores de Idiota & eius operibus cogitationes.

8. Sic scribebam ante annos viginti, ex luce quæ tunc affulgebat. Nunc Saffula pleniore luce, illustranda, ac etiam corrigenda sunt aliqua; Et in primis, commutanda est voluminis inscriptio, his verbis concepta, ante hac truncus, nunc integer ex *M. S. Cod. Lugdunensi*. Breuius etiam, ad mollis scalpulturæ tabellam, epigraphæ his duobus verbis inscripta. *Idiota totus*. Existimabam enim, post tam numerosam seriem lucubrationum; quæ tunc primum edebatur, nullam deinceps expetendam esse accessionem eidem Autori faciendam. Verum præter spem *περὶ δλον*, nactus postea sum, quod falsum me esse in prima illa inscriptione, demonstrauit, non modò ob refossum, deniquè ac è tenebris eductum Autoris nomen genuinum; sed etiam quoad lucubrationes aliquas, hoc admodum pio & planè sapiente Antore dignas, in quas postea incidi, & nunc simul cum illis antèrius vulgatis emittuntur. Itaque recognoscendas, & explicatiùs euoluendas video, binas illas voces epigraphæ propositæ; pro *Idiota* exhibendo genuinum nomen & cognomen Autoris quibus subnectuntur adiuncta omnia personæ Autoris; tum quid priùs ad totum hunc Autorem desiderantur, aperiam.

9. Nominalia huius Autoris, verè humilis qui non posuit nomina sua in terris suis, debeo *M. S. Codici V. C. L. D. Ludouici de Caseneuve, Tur-nonen-sis*, non vna scriptione pridem publico data, eruditè benè noti. In eum Codicem cum incidisset *R. P. Gilbertus Ioninus ὁ μαργεῖτης*, in cuius præcoci obitu, res literaria haud leuem plagam excepit; & libellos à nobis vulgatos, & alios præterea quosdam, eodem Codice contineri significauit, præfixa operis initio hac Epigraphæ. *Librorum huius voluminis Autor est R. P. D. R. Iordani Prepositus Vicensis, anno Domini 1381. qui deinde factus Abbas de Cellis Bituricensis Dioecesis, ibi dies suos clausit vniversos, cuius anima requiescat in pace.* Quæ epigraphæ, initio voluminis (vt dixi,) exarata iteratur specialiter ad Tractationem de Oculo, de qua postea. Liquidum ergo est, ex ea inscriptione, Autoris cognomen. In nomine tamen aliquid supererat ambiguum. Quis enim ille *R. P. Dominus R. Iordani*? Poterat quippè anceps videri, *Renatusne*, an *Richardus*, aut *Robertus*, legendum esset: an verò aliquod aliud nomen cuius ea esset initialis littera, eo dispendioso festini Librarij compendio signaretur. Ambiguitatis ratio, non dissimilis ei qua etiam nunc laboratur circa verum *Platina* nomen. Nam vetera quæcumque exemplaria, habebant compendio scriptum, *B. A. R.* Recentiora habebant *B. A. P.* Itaque cum non satis constaret, vtra esset lectio verior, qui *Platina* opera prælo posterius commiserunt, recentiores codices secuti, *Baptistam* dixere, nulla (vt facti sunt,) ratione permoti, esse recentioribus potiùs Codicibus, quàm vetustioribus adhære-

60 COGITATIONES PRIORES ET POST.

rent. Vnde aliqui *Posseuino* referente in Apparatu Sacro, ferè semper *Platinam* ex nomine appellant *Bartholomæum*. Par confusio timenda erat circa Autorem quem vulgamus. Sed suppleuit Librarij festinationem interpellata à nobis diligentia *Optimi Patris Alexandri Degletain*, nostri, qui Hemauti in Vticensi Vicinia degens, dum quaquauiersum, ex cognomine, & munere, ac ætuo annotato, proprium Autoris huius nomen rimatur, incidit in transactionem anno 1377. initam inter Martialem Vticensem Episcopum, ipsumque Præpositum Iordanum suo & Capituli nomine contendentem de iure plectendi, & ad officium reuocandi Canonicos Regulares Vtenses; si quando delinquerent. Ea transactione, Præpositus Vticensis, nominatur *Raymundus Iordanus*, honestaturque titulo *Licentiatum in decretis*, & *Procuratoris in ea controuersia*, à Capitulo constituti, ut coram Cardinali Sabinensi causam ageret, vel componeret: quod denique fecit ijs cum Episcopo pactis conuentis, ut Episcopo ius esset, mulctandi noxios, Præposito autem saluum esset ius custodiæ; reis non alibi quam intra Præposituræ carcerem concludendis. Quare liquido tandem constat, de Autoris qui prius *Idiota* audiebat, vero nomine & cognomine: quæ nos, epigraphæ Codici Turnonensi inserta docuit.

10. At illud perbellè accidit, quod indidem omnes propè anteriores cogitationes nostræ de hoc Autore, in illa priori editione propositæ, egregiè firmanantur. Nam & *Gallum* illum esse conieceramus, & *Ordinis D. Augustini Canonicum Regularem, Præfecturam in eo ordine gerentem*. Quæ omnia explicatissimè signantur in proposita epigraphæ. Nam Præposituram Vticensem vulgo *d'Vse*, in Septimania, Canonici Regulares S. Augustini, hodièque obtinent; Nec ita pridem, Abbatiam Cellensem, in tractu Bituricensi, iidem Canonici Augustiniani, Patribus Cisterciensibus strictioris instituti, Congregationis Fulliensis, cessere. Atque ita quod de Autoris natione, ac Religioso Ordine, & sacra in eo præfectura conieceramus, ratum manet atque indubitatum. Circa ea quæ de sæculo dixeramus, minùs aberratum erat, quam ab alijs plerisque sit factum: quorum aliqui sæculo octauo, quidam nono, nonnulli decimo, hunc Autorem transcripserant: omnes admodum abiuncti à vera ætate qua Autor floruit. Mihi visus erat collocandus sub sæculi decimi quinti finem, ita ut etiam decimum sextum attingere potuisset videretur. Argumentum petebam ex eo quod deploret fidei veræ ac Ecclesiæ compactionem in vnum angulum Occidentis: quod tum maximè contigisse existimabam, cum anno 1452. Constantinopolis, Regia Orientis, Orthomanico Tyranno præda est facta. Sed paulo antè signandam fuisse Autoris ætatem, haud grauiter concedo. Nam cum post annum 1381. iam pridem Præpositus, Vtica migrasse Biturigas, & ibi Abbatem egisse, tandemque obiisse prodatur; verisimile est ad cladem Constantinopolitanam minimè pertigisse. Nec arctatio Ecclesiæ ac fidei ad vnum angulum Occidentis, ab Autore memorata, labefactat quod dico: quandoquidem ante contritum Tyrannide Orthomanica Orientis Imperium, Ecclesia Græcanica sædo pridem schismate,

mate, erroribus crassis immisto, seipsa erat: Et in multis oris Occidentibus grassabantur graues hæreses: ita vt orbi ferè toti Orientali, & haud exigua parti orbis Occidentalis nox atra incubaret. Sic euoluta sufficienter est pars prior Epigraphes, voce *Idiotæ* comprehensa.

II. Iam quod *Totum* hunc Autorem, priore illa editione vulgaram arbitrabar, corrigendum est. Accessio enim postea facta est non modò, aliquorum *contemplationum de amore diuino*, nunquam antea eis commissarum; sed etiam iustarum aliquot lucubrationum. Nam incidi postea Romæ in opus huius Autoris *de Instructione Religiosorum*, Parisijs, ante centum annos vulgatum, quod exhibuit domus nostræ Professæ Bibliotheca: aliquot vero post annis, legi recusum Remis, ex recognitione R. P. Simonis Hulot Ordinis S. Francisci de Paula; qui cum recepisset curaturum se inibi omnium huius Autoris operum editionem plenam vno volumine comprehensam, accepit à me, quòd post primam editionem ex Codice Turnonensi nactus eram, Opus M. S. integrum de B. Virgine, quod alias editum esse, coniectura est, ex eo ducta quod Onuphrius. I. de ritu sepelien. cap. I. ex opere Idiotæ de B. Maria cap. 20. alleget eius petitionem, vt sibi Deus concedat in hora mortis deuotam Eucharistiæ suspensionem quæ viaticum ab instructu in via ad aliam vitam appellatur. Quæ allegatio non cadit in Tractationem illam contemplationum Idiotæ de Virgine Maria; non vltra senarium capitum diffusam primùm à Iacobo Fabro Stapulensi priusquam ad Caluinum transgrederetur, cum paucis aliquot Idiotæ libellis vulgata, & postea à Margarino in Bibliotheca sua veterum Patrum recusatam, sed extra locum. Nam quod Hæretici Orthodoxographiæ concinnatores, Idiotam, hac tractatione truncum inalignè immisissent ei Autorum farragini; maluit Margarinus præmonito lectore, extra locum eam lucubrationem *contemplationum de Deipara* edere, quàm fraudare Catholicos B. Virginis studiosos, eo facto pietatis. Quare vt constaret vbinam fraus manu hæretica interuenisset ac ne quis notatum ex segmento locum, sic desideraret, etiamsi nunc plenum de Deipara opus huius Autoris emittimus, visum est è re piorum fore, eam deflorationem vberioris operis non omittere. Hæ lucubrationes & aliæ omnes prima editione ex M. S. Codice Lugdunensis Collegij emissæ, & æquè Codici Turnonensi insertæ, sunt extra cuiusvis controuersie aleam; nec fuit qui ambigeret, recte ne Raymundo Iordani adscriberentur.

III. De sola lucubratione seorsim à nobis post primam quatuordecim tractatum editionem factam, publico data, titulo *Oculi Mystici*, lis mouetur. Nam eam opellam, duo chara capita R. P. Georgius Heferus, & Christiana inter suos germanos facundia, ac potenti Thomæ Kempensis vindicatione clarus; & R. P. Franciscus Storek, ante hac Professor Ingolstadtensis, nunc martyrij in Æthiopica expeditione candidatus, abiudicatam Iordano nostro adscripsit Ioanni Beccano, Anglo, Ordinis Minorum, Archiepiscopo Cantuariensi, Autori perspectiue communis, qui corruptè apud aliquos *Pisanum* audit, cum omnes propè Autorum syllabi,

Bbbbb

562 COGITATIONES PRIORES ET POST.

Peuanum appellent nonnulli *Pisfanum*, pauci *Pithfanum*. *Peuano* igitur opus *de oculo spirituali & mystico*, inscribunt prædicti duo, & à doctrina, & à iudicio bene constituti sodales; nec non Index Conradi Gefneri, & emendatiores vetusti Codices duo MM.SS. nec non Catalogus antiquior Augustanæ Bibliothecæ typis vulgatus. Aliam viam init, & hoc opus Iordano, ac *Peuano* abiudicatum Ioanni Valeis, alias Galensi, aut Valensi Minoritæ Anglo, tribuit F. Lucas Vadinghus ex fide Pithoei, in scriptorum Anglicanorum Catalogo. In Italica eiusdem libelli interpretatione iam olim typis mandata quæ asseruatur in Vallicellana Bibliotheca, hoc ipsum opus tribuitur *P. la Cepiera*, Magistro in Theologia. Quis verò sit, ille siue *Petrus*, siue *Paulus*, siue *Publius* la Cepiere, incompertum est. In tam alto de eo apud omnes Indicum & Catalogorum contextores silentio. Fabianus Iustinianus in eiusdem Bibliothecæ indice vniuersali Codicem illum Italicum recensens, Anonyma adscripsit, falsus ex nuda operis fronte, nullum præferente Autorem: qui tamen pro usu ea ætate non infrequenti; annotatur in calce operis diciturque fuisse *P. la Cepiere*.

12. In tanta sententiarum varietate, quid dicam? Quid, nisi quod habet solemne Iurisperitorum pronunciatum? *Qui tenet teneat, possessio valet*. Nisi fortius aliquid proferatur, ad hoc opus Raymundo Iordani abiudicandum, posset sanè in sua possessione Codex manu exaratus, & contra quem nihil licet excipere, in ea ipsa ora in qua Raymundus floruit, quantum ex characteris & chartæ annositate fas est conijcere, æquans Autoris ætatem, notato anno & loco quo liber est conscriptus, Raymundum consignat opusculi *de Oculo* Autorem. Quid ultra quarimus? Quidue in eo de sua possessione deijciendo tricamur? Ausim confirmare, vix vlli Autori, tot firmatum titulis alicuius scriptionis possessionem, posse deprehendi, quam sint ij, quibus liber *de Oculo spirituali ac mystico*, asseritur Raymundo nostro. Quid enim verò stabile deinceps ac fixum erit circa legitimos fœtus Autorum, si hic tot adiunctis perspicuè signatis res vocetur in dubium, nullo præsertim alicuius momenti argumento in contrarium adducto? Nam quæ contra Raymundi possessionem intorquentur, æquè ac quæ pro alijs libelli huius parentibus proferuntur, enodia sunt, ac nullo negotio expeditibilia; quæ verò contra eos vrgeri possunt, multo sunt fortiora quam quæ aduersus Raymundi possessionem intorquentur.

13. In Raymundum vrgetur dumtaxat nonnulla styli diuersitas, à stylo quo aliæ eius lucubrationes sunt exarata. Item quod aliquando Anglos doctores alleget; haud leui coniectura quod sit scriptor Anglus, non Galus. Verùm hoc secundum est apertè futile: cum Ioannes Sarisberensis Autor Polycratici, quem vnum recolo allegatum ab eo Autorem Anglum, à Carnotensi in Gallia Episcopatu, æquè Gallis accenseri possit, atque alij tam multi; alibi quidem nati, sed commoratione diuturna & præfectura sacra Galli. Deinde quid mirum, Autorem Anglum operis celeberrimi & perulgatissimi scriptorem, à Gallo homine allegari? Passim Bedam, Valdenscm, Copum, Sanderum, & alios Anglos adducunt Galli, non abiectio

Gallorum titulo. Hæc fortius desipere, puerile fuerit; Styli diuersitatem, quæ præterea opponebatur, argumenti diuersitas poposcit. Nam in sacris commentationibus & contemplationum paradigmatis, (cuiusmodi sunt illæ aliæ Raymundi lucubrationes;) soli affectus adhibendi sunt, & vix vllis allegationibus locus datur, nisi diuinæ scripturæ, & quidem auara manu prolatis: quæ omnia aliter se habent in lucubratione alterius generis, qualis est ista de qua agimus, ad alias asceticas Raymundi scriptiones comparata. Notatum verò iam pridem est, aduersus hanc nimium quantum fallacem Erasmi rubricam (qui prout illi sapiebat Stylus, plerisque Patribus, omnino certos eorum fœtus subduxit;) eundem Autorem pro varietate argumenti, stylum diuersum assumere nec semper eundem scribendi characterem in omnibus scriptionibus adhibere. S. Ephrem, vt in prioribus cogitationibus monebam, post Photium Cod. 196. tractans Ascetica, neglecto & obsoleto scriptionis quasi vestimento contegitur. Idem in laudationibus ac encomiasticis orationibus quas habet complures, aded eloquentia valet, & tantum præfert orationis cultum, vt has & illas scriptiones quoad stylum componere haud aliter liceat, quàm similitudinem lectissimum panem cum furfuraceo, vel cum trabea Senatoria, mastrucam sardam: styli itaque diuersitatem Autor idem, pro argumenti varietate non refagit. Id quod benè annotarunt, & plenius illustrarunt Aloysius Lippomanus præfatione ad Tomum 2. de vitis Sanctorum; Raphaël Bagata, & Baptista Peretus, præfantes ad sermones S. Zenonis Veronensis, & obiter Hieronymus Torrensis in proloquo ad confessionem Augustinianam: Præter varios, qui de Erasmi Censuris censuerint. Nihil igitur aduersus Raymundi possessionem profertur, quod incommodam habeat expeditionem.

14. At contra assertum Peuano hoc opus, facit, quod in tot indicibus operum eius, ab Anglis inter quos ille fastigia sacrarum dignitatum tenuit perquam studiosè concinnatis, auspiciam hæc de oculo lucubratio comparet. Soli Germani (ac nè omnes quidem, sed vnus & alter;) toto diuisum orbe scriptorem, huic operi acciungere parentem; quantum fas est conijcere, permoti consensione doctrinæ huius lucubrationis, cum doctrina libri cui titulus est, *Respectiua communis*, Autores plerique, (non absque multorum aliorum reclamatione,) censuerunt, hoc ipso Ioanne Peuano: cui tamen velimus falsum esse ius in librum illum de perspectiua communis; non inferitur solidè, ad scribi, item debere, quascumque alias scriptiones, illius optici operis doctrinæ consentientes; cum potuerit facile alius scriptor doctrinam alterius peruulgati Autoris passim receptam, assumere, in ædificandis ad lectorum vtilitatem sensus moralibus.

15. Pro Ioanne Valensi, siue Galensi Anglo Ordinis Minorum, putatur stare Pithei Catalogus scriptorum Britanniarum, in quo cum cæteris eius scriptionibus annotatur *liber de Oculo morali*: sed in primis indices cæteri non ad stipulantur Pitheano. Nemo quippè alius præter Pitheum, inter opera Valensis siue Galensis, scriptionem aliquam de Oculo morali recenset, &

B b b b ij

564 COGITATIONES PRIORES ET POST.

Posseuinus qui exscribens varios Catalogos ter in suum Apparatum intulit hunc Ioannem, prout in variorum indicum serie oblationem aliquam in eius nomine factam deprehendit; nempe sub nomine *Ioannis Valens*, & sub nomine *Ioannis Galensis*, ac denique sub nomine *Ioannis Valensis*; repetita ad quamlibet appellationem serie lucubrationem huius Ioannis, nusquam reperit inter eius opera *Librum de Oculo*. Demus verò, Valensem, vnius alicuius libri de Oculo moraliter spectato, fuisse Autorem: unde constat eius esse hunc ipsum de quo agimus librum de Oculo spirituali ac mystico? Ita enim habet huius operis inscriptio, in Vallicellana Bibliotheca; In M. S. C. Turnonensi, absolute ac nudè legitur, *Tractatus de Oculo*. Leuicula est hæc diuersitas inter titulum operis Valensi adscripti à Pitheo notatum; & titulum, operi Raymundo tributi appictum: Et ut planè essent iidem vbiuis tituli, quid vetat dicere de eodem argumento varios Autores, similiter prænotatos, nec tamen eosdem libros scripsisse? Ioannes Gerson de *Oculo* accommodatè ad mores informandos spectato, vnam & alteram exarauit lucubrationem; quarum vna simpliciter inscribitur de *Oculo*, altera de *triplici Oculo*, conserta tractatis eius de meditatione. Recentiorum non nemo, eodem titulo prænotatum opus emisit: quæ tamen omnes, de Oculo moraliter spectato lucubrationes, à scriptione Valensi attributa longè discrepant. Idipsum ergo potuit contingere Raymundo, scribenti de Oculo Mysticè spectato, si de illo antè scripserat Valensis. Pitheus sanè, nulla (ut solet,) initialia operis de Oculo verba notauit; ex quo liquere possit, opus Valensis de Oculo morali, illud ipsum esse quod Raymundo vindicamus. Et verò si ex modo scribendi faciendâ est coniectura, longè aliter scripsit Valensis, quàm Autor libri pro quo saginamus. Hic enim peramcenus est, & multiplici doctrina, quasi fluentis hinc inde corruatis, lucubrationem hanc suam perfudit; ratiocinationes adhibens non auisas & extremo tantum digito tactas sed liberius exertas, & multipliciter conditas. E contrario scriptio quædam Valensis, (quam vnam pridem causam videre memini,) estque in Posseuini & aliorum indicibus præterita, aduersus Mahumetum, & Saracenicis spurcitiis, fortis quidem est ac nervosa, sed squalida & ieiuna, nec vllis perspersa amantibus. Quanquam quia iustum non est, ex vna scriptione æstimare Autorem multæ intellectualis sobolis parentem, cuiusmodi Valensis fuit: ita quod Raymundi causâ commodat adduco, ut salua Ioanni sua alibi decora velim; me non modò non refragante, sed etiam applaudente; In SS. la Cepiere, obscuri planè nominis scriptorem, nihil oppono, quia causa eius per se concidit; quandoquidem qui huic terræ filio manum admouerit, adhuc quæro.

16. Auditis itaque firmamenti causâ Raymundi, & ijs quæ in aliorum gratiam adducuntur; præstat possessorem cui nihil validum opponitur in sua possessione relinquere. Obiter tamen, ex multitudine Autorum quibus hic *liber de Oculo*, ad scriptas varijs locis reperitur, coniectura fieri potest de libri dignitate ac pretio. Quod æquè contigisse videmus circa aureolum

eiusdem æui libellum *de imitatione Christi*; à quibusdam satis otiosè S. Bernardo attributum; à plerisque verò adscriptum Ioanni Gersoni, illustrissimo per id tempus scriptori; ab alijs Ioanni de Gersen, vel Gessen, Abbati (vt volunt,) Benedictino; ab alijs, quos causa superiores arbitror, Thomæ à Kempis: de quo opere tam multis adscribendo, non fuisset certatum, nisi liber esset pretiosus & dignus pro quo contenderetur. Idem igitur statuendum est de hoc libro *de Oculo*, æquè quatuor (vt vidisti,) diuersis parentibus attributo, & planè digno quod cæteris tam pijs, tantòque in pretio, passim ex quo prodierunt, meritissimò habitis, Autoris huius lucubrationibus annumeretur.

17. Non est quod deprecandis Raymundi scriptionibus, quis opponat, vile orationis tegmen, & minùs nitens vel etiam sordidum vbilibet apud eum verborum pallium. Habet enim hic locum, quod à Theodoro l. 9. contra Græcos obseruatum est, [ita vsu venire, vt ea, quæ sunt maximè pretiosa, cuncta ferè vili materia integantur. Videre siquidem est, pretiosum vnionem, quales ampli ac magnifici viri apud se esse desiderant, aspernabili testæ innasci; eadèmq; nutriri, augescere, occultari. Qui verò eum sibi coëmunt, auri plurimum persoluentes, missam faciunt testam. Præterea verò pelluentes gemmas, ornandisque regijs capitibus destinatas, aliud genus lapidis extrinsecus circumuectit; despicabilis ille quidem atque inutilis. Qui ergo eas gemmas expoliunt, atque ad ornatum concinunt, superfluam illam testam, nihilque pendendam, circum amputantes abradentèsque, nitorem lucentium lapillorum detegunt, & expediunt, &c. Iure igitur factum est, vt verissimas de diuinis humanisque rebus traditiones, non illustres eloquentia tumidique sermones, sed simplices humilèsque, ac omnibus mortalibus noti prædicent; magnùmque adeò inefabilemque thesaurum viles admodum testæ, despicabilèsque circumferant.)

18. Ne tamen neglectus orationis mundus, simplicitatem sanctam redolens, ipsèque *Idiota* nomine quod sibi vel Autor præ humilitate indidit, vel ab alijs accepit prælata scientiæ penuria fraudi esset huius Autoris scriptionibus; & doctrinæ soliditas apud minùs æquos ac pruriginosos aestimatores periclitaretur, consultum visum est, faculas ad subobscura loca adhibere, quibus nihil ab Autore, non sincerum aut non sanum prodijisse, constaret; quæ diligentia circa lucubrationem *de Oculo* posterius editam non est visa recessaria; quando ex lectione anteriorum illarum scriptionum, quæ doctis æquè ac pijs omnibus valdè arriserunt, Autoris existimatio securitatem nacta erat; & faculas nostras admouere, haud aliud fore viderem, quàm tentare lumen Soli, admotis candelis affundere. Illustrationem autem nonnullarum qua Physicarum, qua Opticarum propositionum, de quibus Autori cum recentioribus Physicis Opticisque non conuenit, vt quoad numerum tunicarum oculi, quoad visionis fabricam per extramissionem; eiusdèmq; consumationem in neruo, ac similia nonnulla, suscipere non libuit: quia cum laborem ante occupauerat, & in

Bbbbb iij

566 COGITATIONES PRIORES ET POST.

scriptione sui iuris, (quippe è Bibliothecario suo deprompta,) præripuerat iam ante laudatus D. Ludouicus de Caseneuve, nunc pluribus annumeratus. An emisit superstes, vel etiam an conscripserit, in tanta à multis, ante eius obitum, annis abiunctione nostra, me latet.

19. Obductio lacunæ extremorum trium eiusdem operis capitum, & limbi capitis duodecimi, quæ per Librarium in nostrum Codicem interuenierat, à nobis in prima eius editione, eo consilio facta erat, ut si integrum opus aliundè emergeret, assumentum hoc abijceretur. Nactus postea quod prælaguerat animus Italicam totius operis interpretationem, iam olim typis commissam, quam Vallicellana Bibliotheca asseruat, ad supplendam Latinè hanc lacunam me accingebam; cum è Germanicis Codicibus, & manu exaratis, & pridem typo cussis, ipsa genuina Autoris scriptio vnde cumque integra transmittitur, beneuola voluntate R. P. Georgij Heferi, qui varios Codices Augusta conquisitos, suppeditauit, optimo Patri Francisco Storer, nunc professori Ingolstadtensi. Hic immenso labore, editionem nostram Lugdunensem cum multis MM. SS. & typo iam olim vulgaris Codicibus, contulit; variantes lectiones diligenter annotauit; lacunas expleuit, subinde ab oscitante Librario factas in maius accessiones ex Autoris (ut fit,) posterioribus locupletationibus, in Codice quem Librarius exscribebat, desideratas; plerumque haud ita breues suis locis immisit; capita quæ editionem nostram deficiebant, ex scripsit, totum opus exquisitè emaculauit, eiusque vniuersam recognitionem transmisit, pretij tamen cupidus, nec aliud sibi laboris haud exigui præmium, quam Deum optans. Sed ubi ubi nunc, inter Africana sabuleta, vel Æthiopica tesqua degat, æquus ferat se non auditum. Et quod gratus concipio votum, experiatur benignè in cælo exceptum. Sit manus Domini cum tam beneuola manu, & in Apostolico opere expeditionis tam arduæ tantisque obsecræ difficultatibus atque periculis, secundet serui sui pia consilia; leuet ærumnas, condiet ira bonitates, labores fortunet, omnem introitum, ac exitum benedicat. Ita precor ac voueo. Annue Deus.

20. Voluntati viri de hoc libro tam benè meriti, datum est, ut illud ipsum supplementum, eodem ordine capitum qui ab Autore in præfatione proponitur à me quondam concinnatum, reperto nunc opere integro, non profus abijceretur, sed in totius operis angulo legeretur, ut genuinis Autoris cogitationibus subiunctum, gratiam illis conciliaret, & deteriora posterioribus lenocinarentur: quo pacto suffectionem quandam excusare memini Gregorium Nyssenum, Oratione in suam ordinationem.



F A C V L Æ

A D

I D I O T Æ

SVBOBSCVRA QVÆDAM LOCA,

S I V E

Iudicium de quibusdam eius propositionibus, quæ nonnullis, cum receptiore Theologica doctrina minùs coherere, sunt visa.



T nihil inter quanta vsque adeo læue ac tersum est, nulli vt in eo hiatus, nulla tubercula à perspicaci obtutu notari possint, ita nihil in scriptionibus, præsertim Christianis, vsque eò accuratum, & exquisitè limatum est, in quo sagax aliquorum perspicenda, non inueniat quod pater meritò improbandum. Quare cum in his Idiotæ libellis, præsertim qui nunc primò cuduntur, viri eruditi quibus exhibiti sunt, recognoscendi, quædam sin minùs erronea, at errorem sapientia loca, alia verò antiquatam & vietam Theologiam redolentia obseruarint, operæ pretium fore visum est, ea hîc attexere, & cuiusmodi reuera sint, diiudicare.

I. Me fecisti creaturam, animatam anima rationali: Hanc summè mundam, & speciosam creasti. Parte 2. depl.c.i.n.1.

HÆc propositio, si de ipsius Autoris anima, vt verba sonant, accipiat, errore non vacat. Anima enina vniuscuiusque nostrum, in peccatis creatur: quia à primo momento productionis, conseritur corpori quod est ex origine vitata, & modo naturali ex Adami stirpe traducitur. Vnde fit, vt quamuis ex se, & vi productionis suæ à Deo, principio purissimo, careret labe, tamen vasis cui immittitur contagio sordeat; sicut in vase non sincero vinum infusum, licet optimum, inficitur, & acescit, ait Verbanus Papa in Metaphrasi Psalmi 50.

Potest etiam absque recurſu ad animam. Adæ, aliter exponi Autor iungendo hunc eius locum cum alio paulo ſalebroſiore ex c. 2. ſequenti ubi ſic loquitur: Vt ergo locus Autoris, præſtetur immunis à macula quam ei ſenſus propoſitus oblineret, dicendum eſt; munditiem illam & ſpecioſitatem quam animæ in creatione ſua tribuit, cadere in animam humanam prout condita eſt in Adamo. Deus enim fecit hominem rectum, & animam eius, gratia ſanctificante exornauit. Eſtque longè veriſimilius, & SS. Patribus ac Conciliorum decretis congruentius, quod anima primi hominis in ipſa ſua conditione & primo quo extitit momento, gratia ſanctificante ſit decorata. Quamuis, ex fide quidem, tantum liqueat, hominem ante inobedientiam fuiſſe rectum, ac gratiæ ſanctificantis ſplendore colluſiſſe. Hoc igitur beneficium tanquam ſibi præſtitum, celebrat Autor, quia non ſtetit per Deum, quominus beneficium Adamo collatum, perenne eſſet, & ad nos quoque transfunderetur. Eundem loquendi modum non raro uſurpant alij Patres, quos appendere in re perſpicua, inutile duco. Sed nominatim frequenter id habet Drogo l. de Sacram. Domin. paſſio. Apud Autorem verò Elucidarij S. Anſelmo adſcripti c. 43. idem traditur, & cum additamento duriore,

Miſericors Saluator meus, animam meam mihi dedisti ſpecioſam & immaculatam. Ex conjunctione & unione infecti corporis, infecta & maculata Originali peccato fuit. De vitæ curſu 2. p. c. 2.

Non eſt ſenſus, animam priùs fuiſſe productam labis expertem, tum per immiſſionem in corpus, fuiſſe inquinatam; veluti cum res nitens, ſordido vaſculo immiſſa inficitur. Hæc enim eſſet aſſertio aperte reproba, cum certum ſit ex S. Leonis definitione Epiſto. 71. animam non præextiſſe corpori, ſed eodem primùm momento creari, quo infunditur corpori. Nec ipſum corpus reuera ſædum eſt, morali, ſæditate quæ ſola apud Deum inquinat hominem; vt dici poſſit, animam nitentem, ſordere ex eo præuiſe, quod corpori immittatur. Alenitòque SS. Cyrillus Hieroſol. Catech. 4. Baſilius c. 3. Conſtit. Monach. & Chryſoſtomus Homil. de reſurr. mortuor. conclamant in corporis noſtri tanquam ex ſe ſædi ac ſordentis calumniatores, cum reuera nihil in eo præciſe ſumpto ſit, non concinnum ac nitens. Igitur mens Autoris non fuit, Originale peccatum aduenire animæ antèritus productæ, eo ipſo quod corpus ex ſe ſædum ſubit: ſed eo loquendi modo exprimere voluit; vnde, & quando, ac quomodo, animæ quæ ex ſe niteret, (id eſt peccato careret,) contrahat labem originalem. Opera præteritum eſt id tantisper euoluere, ſed præparè.

Anima igitur à ſolo Deo efficienter producitur, vt docet S. Leo Epiſto. illa 71. & multis confirmant Bellarminus l. 4. de amiſſ. gratiæ & ſtatu peccati c. 11. Pererius l. 4. in Genef. diſp. de creat. animæ q. 2. & Criſpus diſtribut.

distribut. 7. lib. 2. Itaque anima nostra neque ab Adamo, neque à parentibus traducitur, sed à Deo ipso immediatè creatur; atque creando infunditur corpori in eo momento in quo parentes sufficienter & vltimò illud disposuerunt ad animæ introductionē. In illo igitur momento, quod simul est primum instans generationis hominis, anima vnitur materiæ seu corpori: & per talem vñionem, fit pars totius ex Adamo descendens via seminali & naturali: quod totum, ex suppositione destinationis ad finem supernaturalem, & diuini decreti de conferenda gratia in generatione, si Adam non peccasset, debuit ab ipso ex ortu habere sanctitatem, quæ tamen ob interpositum Adami peccatum tunc non confertur, secluso priuilegio ac ne priuilegio quidem posito, confertur vi generationis. Itaque anima non habens in eo primo suæ creationis & vitæ hominis momento, destinatum sibi (quantum ex Deo erat,) sanctitatem eo ipso contrahit peccatum Originale, quò nitor, idest carentia labis vi productionis affutura excluditur, & perspicuè exponit S. Anselmus l. de Conceptu Virgin. c. 7. & 10. Et eo ipso foedari & inquinari dicitur, non per nexum cum materia vltimò disposita, sed per peccatum irrepens in momento illius nexus, ob inobedientiam Adami à quo omnes, (saltem mediatè) accipimus materiam figurationis nostræ. Idque est quod voluit D. Augustinus 2. de Nupt. c. 8. & l. 6. in Iulia. c. 6. & l. 3. de peccat. merit. c. 9. cum aliquod vitium, in semine à parentibus ad compactionem nostram transmissio, videtur agnoscere. Non enim est sensus, ipsum semen esse formaliter maculatum morali macula; aut aliquid vitij in eo residere per quod paruuli anima in illud immissa foedetur, (quod à quibusdam assertum latè refellit antiquus Autor qui ad Librum S. Anselmi de Conceptu Virginali, apologiam pro viro sancto subiunxit, æqualis S. Bernardi, vt monui in notis ad eum S. Anselmi Librum.) Sed vt benè notat Stapleto l. 1. de Iustific. c. 8. sensus est, transmissionem seminis, & quæ per eam fit, insertionem in numerum posterorum Adami, causam esse cur anima in momento illius insertionis, siue vñionis cum corpore, inquinetur peccato. Nec aliud voluit Beda, similiter locutus q. 14. ex varijs, ac etiam Tertullianus cum c. 40. libri de Anima, dixit, animam recipere ignominiam suam, ex carnis societate.

Quæ ergo Glossa, Augustinum, Bedam, & Tertullianum, puros præstabit hac in parte, eadem Autori purgando sufficiet. Nec enim aliud voluit, quàm peccatum originis aduenire animæ, per immissionem in corpus, via seminali ab Adamo acceptum. Sicut spurius eo ipso contrahit irregularitatem, quod ex tali sexuum commercio nascitur. Exemplum est Gulielmi de Rubione in 2. d. 31. q. 1. *sub finem.*

Ccccc

II. *Tua immensa misericordia, aspirationes salutare semper mihi dedit & præbuit. Non fuit in hoc temporis interpellatio, non dierum electio, non horarum diuisio, non momentorum interruptio: sed temporum, dierum, horarum, & momentorum, mirabilis continuatio. Parte 2. depl. c. 3. num. 1. Non est hora, aut momentum temporis, quo gratia tua caream. Parte 5. deplor. c. 7. num. 1.*

Difficile videtur, hæc dicta, cum experimento & veritate conciliare. Experimur siquidem, non semper ac perpetuò affulgere intellectui nostro diuinum lumen, nec semper emicare in voluntate scintillam pietatis, cuius consensui supernaturali præuiam. Plerumque enim naturalis distractio, aliò auertit potentias, ita vt nulla ratione quicquam agitent spectans ad salutis negotium. Igitur saltem tunc, abest à nobis diuinus pulsus, qui situs est in subita illuminatione intellectus & gustu non libero voluntatis. Tam ergo experimur nos non excipere continuè & citra omnem interruptionem, diuinas aspirationes, quàm experimur nos non perpetuò & absque vlla interruptione cogitare ac velle supernaturalia bona. Omitto Scripturas & Patres è quibus id euincit Bellarminus l. 2. de grat. & lib. arbit. c. 6.

Fuerunt qui eatenus censerent dici posse præberi à Deo singulis momentis auxilia gratiæ, quatenus Deus quantum est ex se semper ea confert, quippe qui semper parata & in promptu esse peccatori auxilia præuenientia decreuit. Ita cum Banne Aluares disp. 112. de auxil. conclus. 3. & disp. 113. in respons. ad argum. Sed quamuis certum sit gratiam cooperantem semper peccatori præsto esse, & ratione eius nullo vnquam temporis momento per Deum stare, quominus peccator conuertatur; tamen agendo de gratia excitante qua discutiendum antea est peccatoris veterum, non video unde constet quod Deus quantum est ex se eam semper peccatori conferat, sitque semper paratus ad illam exhibendam. Nam si vellet conferre, nihil obstatet quominus conferret. Peccata enim, siue antecedentia, siue etiam quæ actu admittuntur, non obstruunt aditum gratiæ præuenienti: & plerumque Deus, etiam in flagranti delicto, & per æstum peccati aliquos tangit & ad frugem bonam reuocat. Illustria eiusmodi exempla benè multa profero in tractatione de S. Latrone cap. 4. Quare tamen si Deus in peccati poenam, posset peccatoribus excitantem gratiam negare, tamen si velit nihil est quod collationem eius præpediat: ac proinde non est ex se paratus conferre peccatoribus auxilia excitantia, quouis momento.

Sed ne de iustis quidem id admitto; contra quàm faciunt, qui censent, Deum respectu iusti habere ex se generalem applicationem ad auxilia præ-

uenientia exhibenda, proportionalem illi generali applicationi quam in ordine naturæ ex se habet ad concursum exhibendū ei qui habet actum primum naturalem, cui certus concursus debetur. Hoc reicio, quia hic non agimus de applicatione Dei ad concurrendum & cooperandum in ordine gratiæ, sed de applicatione ad excitandum & præueniendum. Præterquàm quod conferendo applicationem ad concurrendum in ordine naturæ ex qua ducebatur doctrina proposita, cum applicatione ad concurrendum in ordine gratiæ, etiam cum iusto, non est operosum detegere quantum inter duo illa intercedat discriminis. Nam quod constituit iustum in actu primo supernaturali exigente concursum ex parte Dei paratum, non est habitus gratiæ: Quia ex parte defieit proportio ordinis gratiæ cum ordine naturæ purè materialis V.G. ignis, cui vi solius naturæ suæ habentis passum ad motum, debetur concursus; quia eo ipso est sufficienter instructus ad operandum, atque adeo Deus tanquam prima causa, non debet ei deesse: Vnde paratus semper est ad cooperandum quantum est ex se, & illico à passu admotione. At quod iustum hominem constituit in ordine gratiæ operatum, & diuini concursus exigitium, non est gratia sanctificans, sed gratia præueniens fecundans naturam, eamque reddens vltimò completam in ratione principij moralis supernaturalis, idonei ad liberè se determinandum in eo genere. Sicut quod in ordine naturæ, hominem constituit, & vltimò complet in ratione principij moraliter philosophicè operatiui, est bona cogitatio indeliberata, & suauitas voluntati affusa naturaliter, vel ex speciali bonæ fortunæ benignitate. Vt igitur Deus astringatur cum iusto concurrere supernaturaliter & intra gratiæ ordinem, debeatque ex se semper esse paratus ad cooperandum, non sufficit quod iustus gratiam habeat: sicut vt sit semper paratus ad cooperandum homini tanquam principio morali naturali, non sufficit quod homo habeat naturam rationalem: sed in vtroque ordine necesse est, vt habeat naturam tali semini operationis fecundatam, id est proportionata illustratione, & affectu indeliberato. De quibus vtriusque facultatis afflatibus, etiam respectu iusti, negamus, Deum semper ex se ad illos ministrandos paratum esse, aut decreuisse vt semper iusto sint in promptu, sicut de peccatore item statuimus. Proindeque non potest inde peti legitima interpretatio loci Idiote in quo versamur.

Nihilominus locus ille commodè interpretationis est capax, & indubiè sanus. Nam etiam Concilium Senonense in decreto fidei 15. disertè ait, *gratiam nobis semper esse in promptu, & ne momentum quidem præterire in quo Deus non stet ad opitium, & pulset.* Sed & S. Prosper epist. ad Demetriad. non dubitauit profiteri, *extra gratiam effici, qui aliquid de plenitudine eius diffusetur, quasi homo auxilio Dei in quadam actionum suarum parte egeat, in quadam autem parte, non egeat: sitque vltimū tempus, vltimū momentum, quo permixtum illi esse non possit, si ab eo Spiritus Sanctus defuerit.* Denique Paulus Orosius in Apolog. pro libertate, magna verborum emphasi contestatur aduersus Pelagium, gratiam Dei, hominibus *Speciatim, quotidie, per*

Ccccc ij

tempora, per dies, per momenta, per atomos, & cunctis & singulis ministrari.

Statuendum itaque est, Deum idcirco dici continuò & singulis momentis gratiam præuenientem largiri, quia nunquam illam negat, cum oportunitas hominem præueniendi consentaneè ad diuinæ sapientiæ regulas incidit: ita ut nullum sit tempus, imò nec momentum opportunum, quò Deus constituerit, hominem non excitare ac præuenire. Quod autem sit tempus illud opportunum, nos pro caligine qua in rebus supernaturalibus offundimur, definire exactè non possumus. Tamen certum est quocunque momento aut tempore infesta est tentatio, vel operandi abstinendive præceptum vrget, aut imminet peccandi periculum. Deum homini præueniendo non deesse, si absque ea præuentione impotens foret tentationi obistere, legem vigentem implere, & peccatum imminens declinare. Quod verò nihil horum aliquando locum habeat, Dei est dispicere quandonam præterea incidat hominem vocandi ac excitandi opportunitas: Quæ posita Deus non deest vilo vel tempore vel momento. Et in hunc sensum benignè accipiendus est Idiota locis propositis. Constat verò plerasque etiam Scripturas, quibus aliquid semper, aut tota die, vel nunquam deficiendo faciendum aut factum dicitur, accipienda esse cum hac eadem temperatione, quam fert communis loquendi ac sentiendi modus, ita scilicet ut tantum designetur tempus singulis actionibus opportunum. Quæ ratione semper orandum esse, & nunquam deficiendum, monemur. Et Christus se semper in synagoga docuisse professus est, & discipuli in calce Euangelij Lucae, dicuntur semper fuisse in templo. Sexcenta huiuscemodi, vbiuis prostant.

III. S. Martinus, par Apostolis. Parte 4. deplor. cap. 7.
num. 1.

HVnc de S. Martino, loquendi modum, vsurpat hymnus Gallicanæ Ecclesiæ qui legitur apud Clyctouæum libro 1. Elucidatorij Ecclesiastici. Fuit autem hymni illius Autor S. Odo ex Turonensi Canonico Abbas Cluniacensis. Qui etiam obstrepentibus nonnullis, & aduersus audacem comparisonem reclamantibus, respondit iusto opusculo de eo argumento quod extat, nuper cum reliquis Sancti viri lucubrationibus editum in Cluniacensi Bibliotheca. Annuit Petrus Damiani sermone de S. Martino. His enim verbis cumulat insigne elogium quod S. Martino panxerat à sermonis initio. *Creuit in immensum fama nominis eius, & ausa est in ipsam Apostolorum irrumperè dignitatem, quorum manus tractauerunt de verbo vite, qui filium hominis inter filios hominum, felici vocis officio diuulgarunt. Nec dubitat versiculum Psalmi 18. Apostolis ab Apostolo aptatum, Sancto item Martino accommodare. Addit enim. In omnem terram peruagata est memoria tanti Pontificis, & vbiunque resonat fides Christi, sonat visa Martini. Præiuerat Sulpitius episto. 1. Sanctum Martinum nominans, per omnia*

nia similem Apostolis. Et episto. 2. ait de eodem. Est ille confertus Apostolis, & Prophetis, & quod pace sanctorum omnium dixerim, in illo iustorum grege, nulli secundus. Similia habentur dialogo 3. Approbat Sulpitium Apostolis exequantem S. Martinum, Gregorius Turonensis lib. 1. miracul. cap. 1. Imo in Epistola Episcoporum ad S. Radegundem recitata à Gregorio Turonensil. 9. c. 39. videtur S. Martinus præferri Apostolis.

Difficultatem tamen in hac re non modicam facit, iudicium S. Thomæ, cuius sobrietatem & modestiam in alienis placitis configendis, nemo ignorat, qui illum norit. In hanc autem Sancti cuiuscunque è nouo Testamento cum Apostolis comparationem, strinxit S. D. censuram admodum seueram. Sic enim scribit lect. 5. in caput 8. ad Rom. ad illud, *sed & nos ipsi primitias spiritus habentes, & exponens cur Apostoli dicti sint habere primitias spiritus. Id scriptum ait, quia Spiritum Sanctum, & tempore prius & ceteris abundantius, Apostoli habuerunt: sicut & in fructibus terre, illud quod primo ad maturitatem peruenit, est pinguius & magis acceptum. Hierem. 2. Sanctus Israël Domino, primitiæ frugum eius. Hebr. 12. Accessistis ad Ecclesiam primitiuorum, qui conscripti sunt in cælis. Ex quo patet, quod Apostoli sunt omnibus aliis Sanctis, quantacunque prerogatiua præfulgeant, siue virginitatis, siue doctrine, siue martyrii, præferendi, tanquam abundantius Spiritum Sanctum habentes. Addit S. Thomas rationem huius rei luculentam, petitam ex Apostolico munere, ratione cuius acceperunt gratiam vberiore & fortiore quam ullus purus homo, dempta Deipara. Electi enim sunt, ut doctrinam immediatè à Christo haustam in alios transfunderent, essentque quodammodò Ecclesiæ fundamenta. Vnde quamuis aliqui Sancti plura & acerbiora sustinuerint quam Apostoli; tamen quia mensura meriti est charitas, & ad hanc excitati diuinitus sunt Apostoli præ omnibus aliis propter muneris propositi celsitudinem, liquet neminem quantumuis conetur, posse ad sublimitatem meritum, atque adeò gratiæ & sanctitatis Apostolorum pertingere. Ita ibi ratiocinatur D. Thomas. Et ex eodem principio, in c. 1. ad Ephes. lect. 3. in ipso limine, infert, temerarium, ac fortè erroneum esse, comparare Apostolis quoad gratiam aut gloriam, sanctos aliquos noui Testamenti, nullo modo implicatos cum ordine vnionis hypostaticæ. Quibus verbis excluditur comparatio Apostolorum, tam cum S. Ioanne Baptista; qui non fuit sub nouo Testamento, quam cum S. Iosepho qui pertinuit ad ordinem vnionis hypostaticæ, prout pater Christi iuxta communem existimationem. His sepositis, maiestas Apostolica de qua plenè ago in tractatione de Iuda cap. 3. cum gratiæ cumulum deposcit, qui omnem cum Apostolis aliorum sanctorum contentionem fieri vetet. Et accessus ad Christum gratiæ fontem, idem suadet, ut benè ratiocinatur Ben. Iustinius disp. de Apostolatu cap. 5. num. 8. conuenit de S. Matthia in fine, cum ait: *Extolluntur Apostolorum merita, non quia Sanctis præferantur omnibus, dignitatis gratia, sed quoniam animarum zelo, honoris Dei, contemptus sæculi, ceterarumque virtutum, præ cunctis sublimius**

CCCC iij

inascere, ut posset propinquiores verbo & spiritualibus donis locupletiores. Nam quod aliis est imperitum ex parte, hoc istis totum est præsinitum abunde. Hæc inquam non repugnant Apostolorum primatui supra omnes sanctos subsequentes: nam verba illa priora, quæ minus attento Lectori possent imponere, hunc sensum faciunt; Non præferri Apostolos aliis sanctis ratione nudæ dignitatis Apostolicæ, sed quia nomen tantæ dignitatis impleverunt, & iis virtutibus colluxerunt, quibus insignis vbertas gratiæ & supernaturalium bonorum copiosus splendor adiungitur: quod est verissimum, optimèque cohaeret cum proposita ex S. Thoma doctrina. Quæ intelligenda est cadere in totum cœtum Apostolicum; idest non tantum in illos duodecim qui antonomasticè dicuntur Apostoli, (quanquam in eos maximè,) sed & in alios eorum gregales ac socios, immediatè edoctos à Christo; ut Stephanum; de quo nominatim monet S. Gregorius Nyssenus orat. de eo, cauendum esse ne quis ei secundum ab Apostolis locum tribuat, cum eos planè æquarit sanctitate ac meritis, etiam si non munere: quod item disertè habetur apud Clementem Romanum 8. constit. c. 46. Et in commemoratione eius 26. Decemb. agnominatur à Græcis Apostolus.

Idem esto iudicium de sanctis illis Apostolorum ætate collaborantibus Evangelio de quibus in Græcorum Horologio, ultimo Octobris ita habetur. Tanquam sancti & pretiosa Sanctissimi Spiritus vasa, & solis gratia fulgores, hymnis debitis celebremus, sapientes Apostolos, Apellem, Vrb anum, Aristobolum, Ampliam, Narcessum, quos gratia congregauit Dei nostri.

Vt ergo appareat quo non improbabili sensu, & citra temeritatem, Autor S. Martinum Apostolis parem nominauerit, occurrit inprimis quod aiunt Gulielmus Durandus in ration. diu. offic. lib. 7. cap. 37. & Ioannes Belethus in opere eiusdem argumenti cap. 163. Referunt enim hanc S. Martini cum Apostolis æqualitatem ad exhibitam diuinitus apparitionem globi ignei inter sacrificandum, post insignem sancti viri erga pauperem beneficentiam, de qua Sulpitius initio dialogi secundi de vita S. Martini. Quod igitur igneus ille globus sancti viri capiti illapsus, similitudinem retulerit descensus Spiritus sancti in Apostolorum vertices ignis specie, inde S. Martinum, parem Apostolis dictum, pronunciant hi Autores.

Verissimilius tamen censuerim hanc S. Martini & Apostolorum paritatem, de mente antiquiorum, (vno fortassis excepto S. Odone, de quo postea) non esse crudè accipiendam, & iuxta extimum verborum corticem: sed duntaxat pertinere ad analogiam aliquam, & non degenerem similitudinem, ac proportionalem paritatem, tamen infra æqualitatem. Qua ratione S. Bernardus Tironius à Gaufrido Grosso in eius Actis c. 63. æqui paratur Apostolis. [Credimus enim (inquit Grossus) cum illis non inferiore fuisse, misericordia & pietate, mansuetudine & humilitate.

Item S. Germanus Antistiodorensis, ab Henrico Monacho qui sub Carolo Caluo floruit, non cuiusque Apostolo, sed Apostolorum omnium principi æquatur aliquatenus. Sic enim canit.

Quamquam vocer improbus, ausim
 Magna quibus seges est concedita totius orbis
 Fidus Apostolicis Germanum inscribere granis,
 Et si non numero, numeri quem finit Autor,
 At merito meritis ipsi concurrere Petro
 Haud vetitum, meritis Petrus non invidet equis
 Vitam, & virtutes à nostro Prasule gestas,
 Et documenta legas, si non & Apostolus esse,
 Et dici valeat. Videor non dicere fallax
 Pontificum cathedras quantis splendoribus ornet,
 Inferior nullo, multis præstantior extans.

Sed his subobscuris nominibus prætermisiss, audiamus aliquot Patres aliquorum Sanctorum collationem cum Apostolis non refugiētes. S. Anastasius Sinaita c. 9. *ὁδὸς* ait Patres Nicænos (in quorum laudes ibi effunditur pag. 141. & 143.) *Apostolorum sortem esse consecutos.* S. Max. homil. 1. de S. Laurent. ait cum se Apostolorum confessui copulasse, fuisseque eorum supparem. Et S. Basilii l. de Spir. sancto cap. 39. Magnum Gregorium Neocæsariensem eodem quo Apostolos loco ponit, quod eodem cum eis spiritu vitam exegerit. Sed & S. Gregorius Nyssenus in ipsius S. Basilij encomio, securè pronunciat, secundas Basilio post Apostolos partes, solum tempus dedisse. Idquē S. Basilij à fratre elogium, respexit Palladius in Laus. c. 86. cum de Euagrio; dicens, *sapientissimus & à perturbationibus animi alienus & omni doctrina clarus, Gregorius Episcopus Nyssenus frater Episcopi cui datur honos inter Apostolos, id est Basilij:* At ipsi S. Gregorio Nysseno, in vitis PP. lib. 8. num. 136. ita tribuitur: *Gregorius Episcopus Nyssenus, cui datur honor inter Apostolos.* Ipsemet Nyssenus, S. Meletium in eius monodixæ fronte, vocat novum Apostolum, cooptatum in ordinem Apostolorum. Et in Græcorum Horologio ac veluti Diurnali 22. Iulij S. Magdalena, & 24. Septemb. S. Thecla, nominatur *consors par & equalis Apostolis.* Item 21. Maij adscripta ibidem habetur commemoratio SS. Magnorum Regum, & Apostolis equalium, Constantini, & Helene. Vbi etiam Constantinus, vocatur *Inter Reges Apostolus Christi, sicut Paulus, vocationem non ab hominibus accipiens.* Nicolaus Cabasilas orat. in SS. Basilium, Gregor. & Chrysostr. ab alijs adscripta Philotheo Patriarchæ Constantinopolitano, vocat eos, *Theologorum Trinitatem, Secundam vocationem Apostolos post Apostolos, Euangelistas post Euangelistas, Equales Apostolis, & Apostolos;* multusque est in ostendenda eorum cum primis Apostolis paritate: nempe proportionali & aliquali, de qua etiam accipio quod Ennodius hymno 16. ait, S. Ambrosium esse *adiectum Apostolis.* Eodem igitur sensu accipiendam censuerim paritatem illam S. Martini cum Apostolis, ab antiquioribus nonnullis traditam & in Gallicano hymno celebratam.

Excipiebam tamen S. Odonem. Adeo enim disertè & verbis adeo conceptis æquat S. Martinum Apostolis quoad gratiam & gloriam, ut non sit relictus explicationi locus. Tantum verò Apostolos præfert S. Martino, quod præcesserint eum, *Sicut causa effectum, sicut materia materiaturum, & sicut principium, prius est iis que ex ipso inchoant esse suum.* Unde quoniam Apostolica doctrina, causa, & materies, & principium est fidei, discipline, & religionis, in Patribus, in hoc debet & potest præferri omnibus: non tamen ideo vel meritis, vel gloria, præminet vniuersis. Non possumus viri sancti, pro sancto emulationem, ratam habere, propter fundamentum ex D. Thoma iactum. Quæ etiam ex causa displicet, quod Henricus Antissiodorensis, carmine de S. Germano Antissiodorensi Episcopo, cecinit, eum quamuis numero non censeatur inter Apostolos quos diuinum beneplacitum, duodenario concludit;

At meritò meritis, ipsi concurrere Petro,

Haud vetitum: meritis Petrus non inuidet aquis.

Absit tamen ut decerptum quicquam velim de eminentia, & insigni gloria S. Martini cuius in vniuersa Occidentali Ecclesia summus iam olim splendor fuit, præsertim verò in Gallicana, quam annos ab eius obitu longo tempore numerasse, notauit Genebrardus in chronolo. anno Christi 400. Vniuerso autem in orbe diffusam fuisse sanctitatis eius fragrantiam, Seuerus Sulpitius laudum eius nunquam satur, latè monstrat Dialog. 3. cap. 21. & 22. Breviùs dialog. 1. cap. 18. vbi de eo apud solos Gallos inglorio expostulat. Scitè item dialog. 2. cap. 5. ait, *Minima S. Martini, aliorum maximis maiora esse, nulli dubium est.* Sed de viri sancti præconiis, vberimè præterea Gregorius Turonensis, Petrus Damiani, Laurentius Iustinianus, Albinus, S. Bernardus, alij.

IV. O Adam & Eva si peccatum non commisissetis, absque peccato vixissetem. Parte 5. deplor. cap. 1. num. 2.

Supponit Autor, Adamo non peccante, omnes eius posteros fuisse confirmandos in gratia, quam vi originis acciperent, & perpetuò perstituros absque culpa. Quæ fuit aperta S. Gregorij sententia lib. 4. moral. cap. 36. & S. Anselmi lib. 1. cur Deus homo cap. 18. Non est ea sententia improbabilis, aut digna quæ suffigatur. Tametsi (mihi quidem,) ut communior ita & probabilior videtur contraria sententia, quam S. Augustinus apertè supponit lib. 4. ciuit. cap. 10. & tradit disertè S. Thomas 1. p. q. 100. artic. 2. vbi Molina, Valentia, alijque suffragantur, nec non Suares lib. 5. Cosmop. cap. 9. num. 3. à quibus in eam rem multiplex ratio, & autoritas conuocatur. Ad Idiotam tamen, indemnem præstandum, satis superque est, quod sententia quam tradit, multorum nec vulgarium Autorum fuerit, nec aliquo destituatur colore probabilitatis & veritatis.

V. Not

V. *Non solum diligis in gratia existentem, sed etiam in peccatis constitutum.* Parte 5. deplor. cap. 7. num. 4.

AN verò diligit Deus impios, & non potius, sicut scriptum est, *Odio sunt Deo impii, & impietas eius?* Et ubi illa in scripturis toties tamque luculenter testata Dei concitatio in peccatores? Non est tamen operosum, aliquam Dei erga peccatores dilectionem qualem Autor proponit, ac etiam puram & nudam dilectionem, excluso vero Dei erga eosdem odio, agnoscere. Diligit enim Deus peccatorem, inprimis amore naturali, quo ei vult esse, iuxta illud sapientis. *Diligis omnia quæ sunt, & nihil odisti eorum quæ fecisti.* Præterea non est peccator prorsus extraneus à terminando diuino amore supernaturali, quatenus aliquarum etiam gratiarum stillarum, participes est: Nimirum multarum excitationum quibus ad resipiscentiam inuitatur. Odio autem à Deo non habetur peccator, ut benè vidit Sanctus Thomas primo contra gent. cap. 96. quia Deus non fertur in malum peccatoris ut malum eius est: siue non fertur in malum eius ad modum rationis ultimæ, sed tantum prout substratæ supremo omnium Dei intentionum moriuo, quod est eius gloria, & attributi alicuius manifestatio: Nimirum iustitiæ diuinæ in peccatorem iuste animaduertentis, & meritò aduersus eum exacerbata. Est enim magnum quoddam bonum, ut Deus iustus iudex & victor prodatur, ac iustificetur in sermonibus suis, & vincat cum iudicabit: quod non est ferri in malum peccatoris, purè ut malum eius est, sed in bonum iusta peccatoris recruciatione conuersitum. Tamen quia ea animaduersione infertur aliquid peccatori acerbum, nec Deus ei vult potiora sua bona, dicatur à Deo odio haberi, ipse & impietas eius.

VI. *Bona remunerans (Deus,) ultra condignum, & mala puniens citra condignum. Mercedem auges, & pœnam minuis.* Parte 5. deplor. cap. 11. num. 2. & contempl. de beatitud. cap. 15. num. 1. & 2.

HOC videri potest contra plerasque scripturas, sæpè docentes unicuique retribuendam mercedem secundum suum laborem, ac pro meritis, ut Matth. 16. Rom. 2. 1. Corinth. 3. Apocal. 22. annuuntque passim Patres. Quid quod nullum vel in scriptura, vel in traditione fundamentum est, ad comminiscendum excessum aliquem præmij supra condignitatem operum, vel aliquam supplicij mitigationem infra quantitatem admissis sceleribus rependendam ex metro diuinæ iustitiæ. Vnde constare videtur, nullum tale siue superpondium gloriæ, siue supplicij decrementum, agnos-

Dddd

ci posse. Nam cum scripturæ aliquid definitè tradunt sub certa quadam ratione, & semper loquuntur tali præciso modo, idoneum signum est, omne additamentum excludendum, & omnem deiectionem infra eum terminum, remouendam esse. V. G. quia scriptura semper proponit tres Augustissimæ Triadis personas, nec vnquam plures aut pauciores esse dicit, certum signum est, docere non dari plures. Similiter ergo quia modulum reparationis gloriæ, ac supplicij semper statuit secundum vniuscuiusque operam, signum est, eam esse vnicam & adæquatam præmij ac mûltæ mensuram, secluso quouis auctario, aut gratis inuecto intertrimento. Pugnant pro hac parte graues Theologi, nominatimque Andreas à Vega q. 5. de iustif.

Nihilominus locutio Autoris sana est, & apud Theologos, non noua. Nam quoad excessum præmij, ita habet D. Thomas in 4. d. 46. q. 2. artic. 2. & ibidem Scotus, Bonauentura, atque Durandus. Ex recentioribus, idem tradunt Stephanus Durantus lib. 2. de ritib. cap. 44. nu. 8. & Bellarm. lib. 5. de iustificat. c. 19. Vasques item 1. 2. d. 215. c. 4. huic parti adhæret, vt magis præ. Inter Patres, videntur apertè suffragari S. Basilus ad illud Psalmi 114. *Conuertere anima mea in requiem tuam*, S. Fulgentius lib. 1. ad Monimum cap. 10. & Innoc. 3. in illud Canonis Missæ, *non estimator meriti*. Imò in bulla Gregorij 13. aduersus Baium, damnatur hæc propositio. *Opera bona iustorum, non accipient in die iudicij, ampliorem mercedem, quam iusto Dei iudicio mereantur accipere*. Nimirum vt est apud Lucam cap. 6. mensuram bonam, & coagitatam, & supereffluentem, dabit Deus in sinum beatorum: & mercedem eis rependet copiosam, ac magnam nimis: Nec vt Apostolus, Rom. 8. monuit, condignæ sunt passionis huius temporis ad futuram gloriam. Quibus aliisque eiusmodi loquendi modis, superpondium illud gloriæ, non quibusdam tantum beatis, vt Bellarminus supra censet, sed planè omnibus rependendum, supra leue hoc & momentaneum tribulationis nostræ, non obscurè proditur. De supplicij item minutione infra debitam ex summo iure mensuram, consentiunt S. Chrysost. homil. 37. in Genes. S. Basil. ad illud Psalm. 114. *misericors Dominus & iustus*. Autor sermonum ad fratres in eremo serm. 6. ac Innoc. 3. loco iam notato, qui illud Psalms in hanc rem profert, *Non secundum peccata nostra fecit nobis, neque secundum iniquitates nostras retribuit nobis*. Hac opinione prolata S. Augustinus 21. Ciuit. cap. 24. temperat à censura, nec vult eam pœnæ à Deo irrogatione citra condignū, improbare. Approbant verò eam gregis scholastici arietes, Magister in 4. d. 46. & ibidem S. Thomas q. 2. art. 2. & 1. p. q. 21. artic. 4. ad 1.

Cum verò variis modis accipere liceat quòd hactenus diximus, præmium fore maius & pinguius quàm merita, supplicium verò minuendum esse infra malorum operum condignitatem; ego sensum quem cortex verborum præ se fert, suffixione dignum nego. Atque adeò admitto citra notam dici posse, diuinam largitatem, vltra præmium ex natura rei respondens operibus, corollarium aliquod conferre; quale etiam est congiarium quod à munifico Principe strenuis militibus post victoriam partam supra stipendium conceditur. Hoc enim in æterna retributione præmiorum scet.

uari à Deo, improbabile non est: præsertim si vt gloriæ, ita & gratiæ ac charitatis mensura quædam meritis indebita, simul admittatur, vt graues plerique Autores admisserunt: Nec pauci idem tradiderunt de pœnæ minutione. Quod sufficit, ad Autorem labe purum, & indemnem præstandum. Addi verò insuper potest, præmium nostris operibus supernaturalibus ex natura rei debitum, non esse ex sola rei natura determinatum, sed continere latitudinem aliquam, intra quam sit locus diuinæ erga nos munificentiae. Sicut cum de rebus venalibus agitur, si secludatur lex taxans, non datur ex natura rei, pretium prorsus indiuisibile, sed cum aliqua latitudine, cui contrahentium voluntas, vel publicum præscriptum, determinationem apponit. Similiter ergo tametsi generatim loquendo, opera nostra meritoria proportionem habent cum præmio gloriæ, tamen proportio illa, ex sola natura rei loquendo, non est omnino indeterminata & indiuisibilis: sed reperitur in ea moralis latitudo, intra quam salua condignitate & morali æquitate potuerit Deus hæc opera præmio illo compensare, cum potuisset tenuiore ac minore. Non quod quantitas præmij de facto rependenda, non sit apud Deum statâ & fixa, aut pro variis operantibus sit varia, sed quod cum Deus sua operibus præmia constituit, potuisset illa sæ condignitate debita decernere minus aliquid reddendum, quàm reuera decreuerit. Et idem proportionem seruata dici potest de punitione, quæ proinde non malè dicitur esse *citra condignum*.

VII. *Contritio non esset accepta Deo, nec esset pars veræ penitentiae, sine charitate.* Contempl. primi mens.
spir. c. i. num. 2.

DVobis modis concipi potest contritio, nempe & ex motiuo charitatis, & ex motiuo iustitiæ. Nam si quis peccata detestetur, quia impetunt diuinam bonitatem, contritio illa concipitur ex motiuo charitatis. Si autem detestatio peccatorum eliciatur ex motiuo diuini iuris violati, quod indemne seruari iustissimum fuerat, contritio illa est actus iustitiæ. Liquet, Autorem non agere de contritione formata ex motiuo charitatis, quandoquidem planum est huiusmodi contritionem non posse esse absque actuali charitate, quod Autor supponit cadere posse in contritionem de qua agit. Videtur ergo de contritione loqui prout concepta ex motiuo iustitiæ. At hæc quamuis à charitate neque eliciatur neque imperetur, quomodo non est accepta Deo, cum sit actus optimus? Quomodo autem non est pars veræ penitentiae, cum id quoque habeat attritio, quæ est motus in peccatum longè despiciatior?

Mens Autoris esse videtur, contritionem ex iustitiæ motiuo elicitam, non esse acceptam Deo ad conciliandam peccatori gratiam sanctificatam, quod habet contritio concepta ex motiuo charitatis: neque esse veram penitentiam simpliciter dictam, quæ scilicet ex opere operantis iustificet, ad

Dddd ij

modum dispositionis vltimæ, conuenientis homini gratiam Dei, & sanctificationem. Quæ sententia est longè communissima, & vt censent aliqui tradita in Tridentino sess. 14. cap. 4. vbi ad peccati remissionem requiritur contritio perfecta charitate, quæ verba admodum affinia sunt iis quæ protulimus ex Autore, ac proinde non potest in hac parte de suffixione periclitari.

Quamquam ego quidem non dubito, quin contraria positio, veritate nitatur. Pœnitentiam enim ex motiuo diuini iuris violati conceptam, dummodò sit vniuersalis & qualem esse oportet ad plenum à peccato recessum, arbitror sufficere ad iustificandum. Nam est perfecta auersio à culpa, & vera peccati detestatio propter Deum: cui actui diuina gratia in Scripturis repromittitur. Et motiuum quidem eius, despiciatius est illo alio motiuo quod pœnitentiæ ex charitate conceptæ præfigitur: est tamen satis nobile, vt inde liquere videtur, quod peccator in huiusmodi detestatione peccati, non quærit seipsum, sed bonum Dei extrinsecum, siue honorem & gloriam Dei, quam à se imminutam dolet. Operari enim propter Dei gloriam imminutam, est operari, ne Deus maneat læsus in illo bono suo externo, qui est æquæ actus iustitiæ ac similis actus circa bona externa hominis; estque actus valde pretiosus, & liber admisione factum amoris proprii, tamen non accedit ad pretium alterius actus, quo homo quærit diuinam gloriam absque obligatione: id est, ne non peccet, aut vt peccati pedicis se extricet, sed vt Deus quem diligit, honoretur. Itaque admodum probabilem duco sententiam qua contritio nixa motiuo iustitiæ, statuitur accepta Deo ad conueniendam homini gratiam, & habetur iustificantis pœnitentiæ pars, contradistincta pœnitentiæ ex motiuo charitatis eliciti, quam ea vi pollere, est exploratum.

Non me latet quantis autoritatum & rationum machinis hæc positio à recentioribus appetatur. Sed irritò nisu ac casso, quantum aduerto. Et imprimis quod Tridentina Synodus ait, contritionem ante Sacramentum charitate perfici & hominem Deo reconciliare, malè accipitur de charitate actuali, cum accipiendum sit de habituali; ita vt sensus sit, dolorem peccatoris formari charitate & gratia diuinitus collata ante susceptum re ipsa Sacramentum. Quæ ratione locus ille Tridentini, nihil aduersariorum causa commodat, nostræve incommodat. Scripturæ quæ præterea vrgentur, quamuis tribuant dilectioni vim iustificandi, nunquam addunt esse illi soli tribuendam. Specialiterque malè ad hoc negotium trahitur illud Apostoli, *qui non diligit, manet in morte*: nam ibi Apostolus agit de non diligente, id est graui odio fratrem prosequente; quem meritò ait, manere in morte: hoc autem longissime abest à præsentis instituto. Sed & perperam negatur, Deum, per hunc pœnitentiæ actum, quæri ex toto corde; quod alibi scriptura ad verum peccatoris regressum deposcit. Eum item vnum regressum ad peccatoris sanationem exigunt Patres, non solliciti, an ex charitate, an ex iustitia fiat. Tamen si plerunque priorem tanquam certiores & nobiliores proponunt, non excluso posteriore. Aliquando

autem vtrunque neſcunt, tanquam diſiunctiue, non copulatiue neceſſarium ad iuſtificationem ex opere operantis: quo pacto accipio illud Auguſtini ſerm. 7. de temp. *pœnitentiam certam non facit, niſi odium peccati, & amor Dei*: ita vt in his verbis illud & eundem faciat ſenſum, ac in illo Chriſti dicto, *niſi manducaueritis, & biberitis*. Vltro autem do, pœnitentiam ex motiuo iuſtitie conceptam, eſſe deterioris notæ, quàm eam, quæ eſt ex motiuo charitatis; nego tamen eſſe inidoneam ad conciliandam peccatori ſanctitatem, cum non ſuis, ſed diuinis commodis conſulat; ſicque ſuper omnia cum diuino amore, & plena diuini iuris obſeruatione incompoſſibilia, quod non habet attritio, quippe cui adiungi poteſt alius actus includens affectum ad peccatum, vt patet ex eo qui cum ſeruilitate timet. Et in humanis quidem verum eſt, poſſe aliquem abhorrere à violando iure eius, quem habeat exoſum: non tamen idcirco dicendum eſt hominem peccata deteſtante ex motiuo diuini iuris, poſſe Deum odio habere. Discrimen namque in eo eſt, quod homo non habet ius vt ametur: ideoque dummodo nullum eius ius violetur, poſſunt vigere inimicitie ſalua iuſtitia. At Deus ius habet, ne odio habeatur. Si enim omnia peccata pugnant contra ius Dei, multo magis ſos ille ſcleris, quod formalem à Deo reſeſſum inferat. Tandem malè aliqui, deteſtationem peccati ex iuſtitie motiuo, ad deſpicatiorem pœnitentiam quæ attritio dicitur, relata à Tridentina ſynodo cenſent; cum docuit ſeſſ. 14. cap. 5. dolorem ex ſola peccati ſœditate conceptum, non eſſe niſi attritionem, ad iuſtificandum ex opere operantis inidoneam. Hoc dico malè intorqueri contra placitum cui ſuffragamur. Quamuis enim labes peccati admodum terra ſit, quod diuinum ius violet, tamen non omnis ſœditas peccati, conſtituit attritionem; alioqui dolor de peccato ob illam ingentem eius ſœditatem quod ſit contra Dei bonitatem, eique præferat bonum creatum, eſſet attritio inidonea ad iuſtificationem. Nomine ergo ſœditatis peccati, quæ eſt motiuum inadæquatum attritionis, intelligitur illa peccati ſœditas quæ in peccati deformitate, aliò quàm ad Deum terminata conſiſtit, cuiuſmodi eſt ſœditas peccati purè philoſophica.

Hæc de placito in quod grauiffimi recentiores ſeucriùs egerunt, aſtipulante vt videtur, Autore, & ferè omnibus. Vnus enim (quem viderim,) Franciſcus Victoria in ſumma de Sacram. num. 119. placito illi noſtro patrocinatus eſt. Quandoquidem autem, tam multi efficaciam pœnitentie ex iuſtitia conceptæ, improbant, vel dubiam habent; omnes autem pœnitentiam ex charitatis motiuo elicitam, tãquam certò fructuoſam agnoſcunt; nulli Autor eſſe velim, vt certum incerto poſtponat. Inconſultè planè facere dixerim, qui in re omnium grauiffima, & quæ poſſit in animarum perneciem certam cedere, non extimeſcat periculum, cui nullum eſſe par poteſt: præſertim cum non ſit operoſius ex illo alio motiuo ad charitatem pertinente, peccata deteſtari, quàm ex motiuo iuſtitie.

VIII. *Sine charitate, nec meritum quis habet, nec premium.*

Ibidem.

HOC aliqui de charitate actuali accipi volunt, existimantes, actum quantumcumque supernaturalem, & à persona grata elicatum, nisi vel à charitate profundatur, vel ob interpositum charitatis imperium, radiis eius colluceat, esse meriti supernaturalis infœcundum.

Et prior quidem sententia, quæ soli elicito charitatis actui, meritum simpliciter dictum assignat, paucissimorum est. Innuunt eam aliqui apud Almainum in 3. d. 18. *sub initium*. Apertè autem illam tradit Bannes 2. 2. q. 24. artic. 6. dub. 5. Sed meritò eam explodit Suares relect. de reuiuisc. merito. disp. 2. f. 1. num. 39. & f. 3. à num. 52. & lib. 12. de grat. cap. 8. Mihi- que videtur planè improbabilis, & quantum arbitror, contra scripturas, & Patres, laborem in omni opere bono commendantes. Quis verò diffi- teatur aliarum quoque virtutum actiones, esse media ad finem vltimum, & in Dei gloriam cedere? Igitur accedentibus aliis ad verum meritum ex- cundendum necessariis, nihil eis deest, quominus gratiam homini ac glo- riam conuehant. Posterius autem placitum, quod Almaino suprà placuit, & Bellarmino lib. 5. de iustific. cap. 15. quamuis sit minus inuenerisimile quàm præcedens, tamen mihi quoque non probatur. Nam saltem actus virtu- tum infusarum, merito facti sunt absque imperio charitatis. Sunt enim substantialiter supernaturales, tenduntque per se & suapte natura in Deum, vt gratiæ Autorem, ac supernaturalem finem: Siquidem gratiæ factus sunt, ac veluti potentia, & eundem cum illa finem habent. Sicut finis potentia- rum, idemmet est atque animæ. Igitur actus illi absque alia extrinseca de- stinatione per charitatem, tendunt in Deum vt in finem supernaturalem, quod tamen vnicum est quod obtendi posset aduersus eorum vim meri- toriam.

Sensus ergo Autoris longè alius est quàm Doctorum hæcenus memo- ratorum. Eius quippe verba non pertinent ad charitatem actualem, sed ad habitualem, sine qua nullum esse meritum, Apostolus liquidò tradit. Quamuis enim habitus charitatis si à gratia distinguitur. (vt fert probabi- lior sententia) non conferat seipso & formaliter, vim ac idoneitatem ad merendum, cum non sit forma iustificans: tamen ratione gratiæ cuius est connaturale satellitium, & cum qua computatur vnus & idem animæ dec- or, rectè dicitur hoc præstare homini, vt absque ea nullum sit meritum: quia vbicumque deest charitas, deest & gratia, sine qua meritum euanes- cit. Hanc porro fuisse Autoris mentem, cumque non de actuali, sed de/ habituali charitate egisse, vt affirmabam, perspicuè expressum habes in/ contempl. de beatitud. cap. 12. num. 2.

IX. *Peccator per contritionem reconciliatus Domino, adhuc tamen non habet pacem cum Ecclesia; sed per apertam confessionem peccatorum, reconciliatur Ecclesiae, & facit pacem cum ea.* Contempl. mens. 3. spirit. num. 3.

HÆc non spectant ad errorem Sectariorum cū nostri temporis, tum antiquiorum, qui peccatores extra Ecclesiam statuerunt, & velut excommunicatos ac Ethnicos ab eius corpore abscissos fuisse, ideoque redeuntē pace & reconciliatione cum Ecclesia egere commenti sunt, ut referunt, latēque refellunt Valent. 2. 2. disp. 1. q. 1. p. 7. §. 15. & Bellarm. lib. 3. de Eccles. cap. 8. & 9. Pugnat potro error ille, contra tam multas ac patentissimas Scripturas, ut vix possit in hominem non prorsus in Scriptura hospitem cadere. Quid enim illæ parabolæ, bonos & malos in eandem aream, in idem rete, in eandem arcam, in eundem virginum cœtum congregatos, referentes, nisi typi Ecclesiæ fuerunt, iustos ac iniustos ambitu suo coërcētis, donec finiantur lux & tenebræ?

Non igitur Autor hoc ignorauit, ac proinde non egit de reconciliatione qua membrum præcisum recorporetur Ecclesiæ: sed tantum egit de ea reconciliatione, cuius verbum Apostolus in ore ministrorum Christi positum dixit: Siue de pacatione inimicitiarum cum Deo, quæ utcumque refunduntur in sponfam eius, quatenus potest ipsa quoque de peccatoribus dicere, *perfecto odio oderam illos, & inimici facti sunt mihi*. Eas autem inimicitias, Sacramentalis absolutio dissoluit, quia quamuis contritio potuerit antea maculas peccatorum absterfisse, tamen in sola Sacramenti confessione, intercedit peccatori negotium cum Ecclesia, quoad peccata quæ inimicitias illas ingesserant.

X. *Aliud fides pro virtute, & aliter pro fructu Spiritus.* Contempl. noni mens. spirit. num. 3.

Apparet, Autorem fuisse in sententia singulari de fructibus Spiritus sancti Sensisse namque videtur, fructum dici gustum ac delectationē ex bono actu progerminantem: affinēque est quod Albertus in 3. d. 34. fructum spiritus dixit esse ipsum actum supernaturalem, prout suauiter reficientem & oblectantem. Neutra sententia notam meretur: Tamen negari non potest, longē verisimilius alios, nomine *fructuum* actibus virtutum communi, cuiusmodi est charitas & fides, non aliud intelligere quàm actus virtutū eo nomine expressarū, prout anima ab inhabitare Spiritu sancto fecundatur, & in eos diuini seminis fructus erumpit. Denominatio nāque fru-

ctuum spiritus, petita est ex Apostolo ad Galat. 5. ubi fructus spiritus opponuntur operibus carnis: ac proinde debent ipsi quoque numerari inter opera; quamvis consultò videantur nomine *fructuum* notati, ut innueretur necessitas operæ cœlestis agricolæ in plantam è qua existunt, excolendam. Non debere autem fructus omnes in delectatione statui, ex eo perspicuum videtur, quod vnus è fructibus sit gaudium: quod certè non est gaudium abstractum; (nullum enim tale datur nisi per intellectus præscindens negotiationem.) Est ergo gaudium de opere virtutis, non huius potius quàm alterius; igitur cuiuscunque. Atque ita nisi velimus membrum illud fructuum, esse superfluum & expungendum, aliter exponendi sunt reliqui, quàm per rationem gaudij & oblectationis.

XI. Veni Sancte Spiritus in animam meam, quia sic certus ero de hereditate habenda. Contempl. de spir. robor.

cap. 13. num. 1.

HOc videri potest non coherere cum ea gratiæ incertitudine quam Tridentinum seclusa speciali reuelatione ratam esse voluit sess. 6. cap. 9. quamque contra sectariorum impudentiam plenissimè stabiliant Vega l. 9. & Stapleto. l. 7. de iustif. Bellarminus toto ferè lib. 3. eiusdem argumenti, ac passim Hæreseologi: à quibus proinde videri potest impugnatus Autor, concedens ad sancti Spiritus præsentiam, consequi certitudinem de habenda hereditate, quæ certitudo necessariò supponit certitudinem de filiatione, cui adiudicatur hereditas.

Sed dicendum est, certitudinem quam Autor homini iusto tribuit respectu gloriæ, non aliam esse quàm spei, quæ in omnibus fidelibus cernitur salua iustitiæ suæ ignorantia, quia includit conditionem exequendi mandata: de qua conditione per nos ad vltimam vsque vitam ponenda, securi esse non possumus, nisi per reuelationem specialem. Dici etiam potest, certitudinem de qua Autor loquitur, esse quidem certitudinem fidei, sed communem tantum ac generalem; qua scilicet vniuersè certi sumus obuenturam nobis hereditatem si habuerimus gratiam: Hoc enim duntaxat affirmat Autor. Nemini autem dubium est, quin id Catholicè affirmetur, probeque cohereat cum illa propria sanctitatis incertitudine quam fides astruit. Eaque ipsa ratione S. Chrysostomus homil. 14. in c. 8. ad Rom. interpretatur testimonium à spiritu, conscientiæ nostræ exhibitum, quod sumus filij & hæredes, quo Apostoli loco Autor mox vtitur.

XII. Pono

XII. Pono mihi ante oculos meos mulierem in ciuitate, peccatricem, mulierem deprehensam in adulterio, latronem qui propter homicidium & seditionem missus fuerat in carcerem, & deinde suspensus est in cruce, Dauidem &c. Hi omnes, Domine, materiam confidentiæ mihi præbent. Contempl. de confl. car. & anim. c. 4. num. 2.

A Vtor, Sanctum ex latrone Euangelistam, & scarabæum de ligno clamantem, (vt S. Athanasius scitè nominat,) vel cum Barrabbæ latrone confudit, vel participem ac socium sceleris Barrabbæ statuit: Fortè quod hic quoque, latro appelletur in Euangelijs. Præiuit Autori Iannoc. 3. serm. 1. de conuers. S. Pauli, vbi eadem emendatæ flagitiosæ vitæ exemplaria recensens, similiter ait, latronem sanctum propter seditionem & homicidium, fuisse carceri mancipatum, ac crucifixum. At licet ratum exploratumque sit, S. latronem, ante crucem fuisse facinorosum, & nequam; alium tamen fuisse à Barrabba, est extra dubium. Nam constat, Barrabbam carcere solutum, non fuisse actum in crucem, liberatum optione generationis pessimæ, eligentis magis mortem quàm vitam. Participationem autem sceleris Barrabbæ, & causæ contrusionis in carcerem latroni sancto affricare ob nudum latronis nomen vtrique aliquando commune, diuinatio est non solida, saltè quæ incerta. Itaque nisi velimus admittere Autoris *παρρηγορηδὲν ἀμαρτηνία*, dicere possumus, rei incertæ affirmationem ei excidisse, ex Innocentij (quantum arbitror) autoritate. Discussio hæc diligentius, in tractatione de bono latrone, cap. 1.

XIII. Scribitur de te, merces mea mecum est: hanc mercedem non merui ex operibus meis. Contempl. de beatitud. cap. 16. num. 3.

Non pugnant hæc contra meritum bonorum operum, quod Scripturæ, Concilia, & Patres, ipseque Autor, toties & tam luculenter confirmant. Sed nomine operum intelligit hoc loco Autor, opera mortua, siue actiones peccati quibus Deus non debet copiosam mercedem, quam secum esse, id est, paratam homini, & ad manum sibi esse, contestatur. Verba continenter sequentia, hunc sensum ferunt. Addit enim Autor. *Quia iniquus peccator sum, sed iustificare me digneris per tuam immensam pietatem, ut te donante, mercedem obtineam sempiternam.* En donante Deo, & interposita iustificatione, sperat obtenturum se mercedem, quæ certè non nisi meritis rependitur. Et prima quidem totius meriti radix, ac primum totius meriti principium.

Eccc

386 FACVLÆ AD IDIOTAM.

est gratia: ideoque ratione eius, gloria, nominatur *gratia*, apud Apostolum, cum ait, *gratia Dei, vita aeterna*. Supposita tamen liberali communicatione illius principij, & diuino pacto nobiscum de compensando bono illius vsu, fructus inde existentes, pariunt gloriam tanquam mercedem: ac proinde gloria frequentissime in Scripturis, & *merces*, & *corona iustitiae*: siue iustorum operum, & *brauium* nominatur. Hæc explicatissime proponit Autor in contempl. de beatitud. cap. 14. num. & 2.

XIV. *Vera dilectio in via omnem culpam expellit, nec esse potest cum aliquo peccato mortali. Ipsa sola, nulla labe inficitur & inquinatur. In patria, ipsa sola gloriam procurat.* Contempl. noua de amore (nunc. 21.) num. 2.

Sicut iusto flagrantiores alicuius erroris infectatores, vt à S. Basilio Epist. 41. notatum est, nonnunquam in extremum contrarium deflectere videntur: ita Encomiastis dum sollicitius pro exornatione suscepta satagunt, eadem interdum labe affricatur. Et verendum est ne cui Autor noster dum totus est in exornatione diuini amoris, plus iusto cum attollere videatur, siue insinuans quod actus amoris sit forma sanctificans & excludens formaliter mortalem culpam (de quo iam actum est facula 14.) siue ei tribuens quod solus nulla labe possit infici) aut quod solus conciliet homini gloriam.

Hæc vt labis pura præstentur, præmittendum est non tantum apud Autorem, sed etiam apud omnes fere charitatis exornatores (quorum aliquos ad calcem signabo) laudes eius tamen pro tenore depictas, aliquando habitum, aliquando actum spectare, ita vt à prudente Lectore intra eandem sæpè periodum, membrum vnum laudationis accommodandum sit habitui charitatis, alterum actui. Ea quippè permistio & quasi confusio non attenditur, quia totus sermo de charitate est, quamuis cum debita distributione accipi debeat. Hoc Autori in his de amore diuino contemplationibus familiarissimum est ac fere perpetuum. Et iuxta hanc observationem non erit difficile labis pura præstare quæ proposita sunt.

Quod ergo Autor dixit de nitore solius diuini amoris, semper illic facile accipi potest de actu amoris, qui solus incapax est iniquationis simpliciter dictæ, hoc est labis mortiferæ. Nam fides & spes, possunt coherere cum peccato mortali, non item dilectio perfecta. Certum quippè est & fidem & spem in peccatoribus superesse. Esto actus earum semper in seipsis niteant, nec possint sordere siue elicitivè & vi sui obiecti, siue ratione extrinseci imperij per voluntatem vitiatam eos actus ord inantem ad finem malum, qua ordinatione posita negaretur gratiæ auxilium sine quo actus illi cudi non possunt. Et ita docent graues Theologi; Vasques. 1. 2. d. 53. n. 26. & 29. Suares. 2. de grav. c. 3. n. 14. & disp. 1. de fide sect.

7. à n. 8. Malderus tract. de fide q. 2. art. 9. dub. 3. Becanus c. 8. de fide q. 7. Torres 2. 2. t. 1. disp. 33. dub. 1. 2. 3. & alij. Quamquam non defunt qui reclamant & hos quoque supernaturales actus per vitiosas ordinationes aut circumstantias indebitas, inquinari posse concedant, vt Salas, 2. tract. XI. disp. 7. n. 18. fauente D. Thoma 1. 2. q. 64. art. 4. Sed quicquid de hoc sit, ceteræ virtutes actuales possunt in maleuolâ animâ & peccatis subditâ reperiri, non item actus charitatis qui secum aduehit sanctitatem. Atque ita Autor hac in parte caret macula.

Iam quod Autor subdebat, solum amorem conciliare homini gloriam, si accipiat de amore actuali, non ita facile intelligitur. Nam vt monstratum est facula 8. non est solidum quod pauci quidam dixerunt, solum actum elicium charitatis, esse condignè meritorium gratiæ, atque adeo etiam gloriæ; cum nulla Dei lex nulla vt ratio ex natura rei petita, tali doctrinæ suffragetur. Quin etiam illa aliorum assertio, quod saltem imperium charitatis extrinsecum exigatur, vt alij virtutum infusarum actus sint condignè meritorij, non probatur omnino à multis, & meritò, quia tales actus absque actuali imperio charitatis, prodeunt à Christi influxu, & in Deo siue ex supernaturali fine fiunt, quod vnum à Tridentina Synodo ad meriti feracitatem deposcitur. Quod verò multo plus est, neque actus virtutum moralium humanarum vt euadant meritorij postulant illud imperium charitatis. Sunt quidem hi actus inferioris notæ, quia seipfis ad Deum non referuntur; vnde vt sint simpliciter meritorij, necessarium est vt eliciantur ex imperio alicuius virtutis per se infusæ, vt habetur ex S. Augustino præfatione in psal. 31. & ex S. Leone serm. 7. in Quadrag. Nihil tamen est quod euincat illud imperium non posse esse alterius virtutis quàm charitatis. Videndus Suares l. 12. de grat. c. 10. n. 20. Quare locus propositus Autoris agrè accipi potest de charitate actuali, vt præmittebam.

Accipiendus ergo est de charitate habituali, vt de simili loco dixi facula 8. Nam de charitate habituali quæ vel eadem est cum gratia sanctificante, vel eam inseparabiliter comitatur, rectè dicitur, absque ea nullum esse meritum condignum, atque adeo ipsam solam esse quæ conciliat gloriam. Ita habetur ex Marco Eremita l. de lege spirit. c. 23. ex posterioribus. Imo est certa omnium Theologorum sententia in 2. d. 24. aut 27. 29. vel 1. 2. q. 114. 2. quæ traditur apertè in Tridentino sess. b. cap. 16. & can. 32. Ethoc sensu Apostolus 1. Cor. 13. ait hominem absque charitate nihil esse, & absque ea nullum opus quantumuis sublime prodesse. Alias Scripturas in eam rem profert Bellarminus l. 5. de Iustif. cap. 12. Sola ergo charitas habitualis dicitur causa meriti, quia ex parte personæ operantis conditio essentialis ad merendum, est sanctitas, quæ vel est charitas, vel charitati indissociabiliter adiungitur. Itaque propositus locus Autoris subducitur cuius reprehensioni, quia aliud non fert quàm quod Apostolus loco annotato dixit, & Ecclesia in Tridentina Synodo agnouit, traduntque

Ecccc ij

588 FACVLÆ AD IDIOTAM.

omnes Doctores. Scitent huiusmodi locutionibus encomia charitatis quæ contextunt Hugo & Richardus Victorini iustis Opusculis, S. Bernardus libello de charitate, creditus Prosper. l. 3. de vita contempl. c. 13. & 14. & passim Patres.

XV. *Ex dilectione, homo uiuit vita gratiæ. Contempl. de amo. c. 22. num. 3. Vera dilectio sic reddit tibi hominem charum, & pretiosum, ut filius tuus nominetur. Ibid. cap 28. num. 1.*

Hæc loca possunt accipi, vel in sensu formali, vel in causali. Iuxta priorem sensum, continent sententiam quam hætenus non esse ab Ecclesia reprobam, contendit Vasques 1. 2. d. 203. à cap. 3. quàmque simpliciter docet ibid. d. 55. *in fine*, & Malderus 2. 2. q. 23. art. 1. quæstione. 2. Nempe quòd amor Dei perfectus, sit forma suapte naturâ sanctificans, & hominem Deo amicum ac filium adoptiuum constituens. Nolim tamen hunc sensum Auctori tribuere, quia ut non sit ab Ecclesia improbus, Catholica tamen doctrinæ conformius existimo dilectionem perfectam & ea grauidam contritionem, disponere tantum ad formam sanctificantem, & præcedere ut conferatur gratia iustificationis, qua tanquam unica forma, homo gratus efficitur. Habet hæc omnia Tridentinum sess. 6. & 14. Cum autem ratum sit, habitum gratiæ qui actus illos tanquam ultimas dispositiones affectatur, esse formam sanctificantem, inferri apertè videtur, exulare à viatoribus omnem aliam formam sanctificantem ab habitu gratiæ distinctam. Accedit quod si dilectio esset forma sanctificans, admittendum esset, peccatorem mereri condignè primam gratiam sanctificantem. Nam ante collatam gratiam, persona per actionem prius natura elicitam, sancta esset: atque ita semotus esset vnicus obex meriti condigni respectu gratiæ sanctificantis, hoc est, indignitas personæ. Quod autem fingunt, dilectionem esse effectiuè à prima gratia sanctificante, & idcirco non posse eam condignè mereri, reiectum suo loco est, tanquam ex falsæ philosophiæ principiis assumptum. Excindunt multis securibus hoc placitum, quod nunc molli brachio, alibi robustius appetij, graues plerique recentiores, ut Bellarminus l. 2. de Iustific. cap. 15. & 16. Lessius l. 13. de diuin. perf. cap. 27. Albertinus coroll. 18. ex 1. princ. compl. dub. 5. Egid. Coninc. disp. 2. de pœnit. dub. 3. Iustina. 1. Ioan. 1. v. 9. à num. 21. Regula 3. p. disp. 5. & solita doctrinæ vbertate & immensitate, Suares t. 1. 3. p. d. 4. f. & l. 7. de grat. c. 8. & 13. & 18. Præstat ergo Autorem accipere in sensu causali quem faciliè patiuntur eius verba: in quo sensu, vacant diff-

XVI. *Statutum est omnibus hominibus semel mori; Ista lex, nunquam habuit nec habitura est, (saltem quantum ad cursum communem,) in aliquo exceptionem. Contemplat. de morte, c. 1. n. 2. & c. 3. n. 1.*

Non abhorret Autor à sententia quæ aliquos à morte eximit: eos nimirum iustos qui instante aduentu Christi ad iudicium, & sub horam generalis resurrectionis, nondum è vita excefferint: Quos non exuendos mortali hoc amictu & ostreo carnis, sed gloria superuertiendos esse, grauium Patrum fuit sententia, Origenis, Tertulliani, Hieronymi, Chrysostomi, Isidori Pelusiota, Theodoret, & aliquando Augustini: è recentioribus autem, Caietani, Fabri, Isidori Clarij, aliorumque nonnullorum, quos appendunt qui pro contraria sententia late pugnant, & Scripturas multas ac Patres quàm plurimos pro se proferunt, Catharinus lib. de vniuers. resurr. Sixtus l. 2. bibl. annot. 265. Suarez t. 2. 3. p. d. 50. l. 2. Salmeron disp. vltima ad 1. Cor. 15. A Costa l. 4. de tempor. nouiss. c. 20. Basil. Ponc. in variis disp. q. 10. scholast. c. 2. Salas. l. 2. tract. 2. d. 14. num. 21. Lessl. l. 13. de diuin. perfect. nu. 120. Valent. t. 4. d. 11. q. 3. p. 3. A neutra sententia diffidet Autor, sed suspendit iudicium, quod iusti illi quamuis morituri certò essent si permitterentur cursui communi, nec eius seriem diuina iussio abrumperet, tamen cœlesti decreto statim cursus humani subito intercidente, & iubente vt tempus iam non sit ampliùs, videri non improbabiler possint liberandi temporis accessionibus, morte nimirum eiusque adiunctis. Quamuis autem sententia quæ omnium planè mortalium mortem agnoscit, verissima sit, nec vllò fundamento inuechatur pro iustis illis speciale priuilegium toties firmatæ vniuersali legi de omnium morte contrariù, ac etiam minùs consentiens cum effato Apostoli 1. Cor. 15. quo traditur omnes resurrecturos, atque adeò etiam morituros: Tamen quod Gennadius l. de Eccl. dogmat. c. 7. rectè vidit, neque hæreticum, neque erroneum, ac temerarium quidem censeri debet, quod tam graues DD. priore loco adducti asseruerant: cum locutiones generales facilerè admittant raras quasdam exceptiones, extra communem vsum cadentes: Apostolicus autem locus, omnium resurrectionem firmans, contrarium potius ferat iuxta nonnullos Græcos codices, quos profert S. Hieronymus epist. 152. quæ est ad Minecium & Alexandrum: & admissa lectione vulgata quæ sola est authentica & inuolabiliter retinenda, non desint subterfugia glossarum, & latibula interpretationum non vsquequaque improbabilia, quibus loci illius impetus declinetur,

XVI. *Percutis, ut emendes, non ut vindices. De patient. c. 12. n. 1.*

Hoc videtur falsum. Vltio enim, etiamsi spes emendationis præclusa supponatur, iusta est, ac proinde iuste, & dignè Deo, intendi potest. An non verò in damnatis æterna suppliciorum repensione mulcandis, sola vltio quæretur? Emendationis enim, siue in ipsis damnatis, siue in aliis eorum exemplo, nulla spes supererit. In humanis item, Iudices plerunque, reuocationem iustam directè appetunt, & correctionis opportunitates, vitæ ademptione præcidunt. Imo quamuis certò constaret flagellato pestilente, neminem fore sapientiores, iusta nihilominus esset pœnæ irrogatio facta legitima autoritate, & iuxta præscriptum rationis rectæ, legum violationem vlciscens. Videnda quæ profero in Morali dist. 4. à num. 477. expendens castigationis debitos fines. Meritò igitur S. Od. collat. 1. cap. 5. agnoscit, Deum interdum castigare ad solam peccatorum antecedentium vltionem: Quod repetit. 3. cap. 43. Certè si prædicta in humanis valent, quanto magis circa diuinas leges, quantum contemptio hominifœdior & tetrior est; quâque diuina autoritate latas, dignum & iustum fuerat, illas & indemnes quàm accuratè retineri? Itaque vindex Dei iustitia & in altera vita ad iustam vltionem armabitur, nullo iam fructu emendationis vndelibet affulgentè, tantùm ut peccator, quantum in deliciis fuit tantumdem accipiat tormentorum ac luctus; & hic quoque pluit super reprobos bellum suum, non tantum si fortè animum mutent, quod prænoscentur non facturi; sed etiam ut debitam malitiæ atrocitatem æternorum suppliciorum, iam ex hac vita prægustent. Sicque impij induuntur velut diploide confusione sua, & Deus secundò eos qui non crediderunt, perdit, ut egregiè in rem præsentem philosophatur S. Greg. 9. moral. c. 33.

Nec Autor refragatur, qui reuera tantùm agit de paterna flagellatione iustorum, aut etiam electorum, qui cum sint aliquando in malo statu, superueniente Dei mansuetudine, correpti erudiuntur corde in sapientia, ut reuertantur ad cor, quod est formate lucem creando tenebras, & facere pacem inferendo mala, ut fusè docet S. Gregorius proximè laudatus, 3. moral. cap. 6. & S. Chrysostomus in paræn. priore ad Theodorum. Eodemque modo accipiendus est Origenes qui planè insigniter in hanc rem disserit, & videtur cum Autore idem dicere Hom. 5. in Ezech.

XVII. *Tua tribulatio non est condigna ad præteritam culpam quæ à te remittitur, nec ad præsentem consolationis gratiam quæ à te immittitur, nec ad futuram gloriam quæ à te gratis promittitur.* Contempl. de vera patient. cap. 9. n. 3.

Hunc locum, tanquam *cautè legendum*, notauit F. Io. Maria Brasichelen in suo Indice expurgatorio, recognoscens Tomum V. Bibliothecæ Margarini. Suspectum enim habuit, quod gratia dicatur gratis promitti, cum iuxta Concilium Tridentinum sess. v. cap. 15. gloria sit merces pro exhibitio bonorum operum pretio repensæ, & corona legitime certanti iuste retributa.

Hæc tamen ad summum, illud probarem, gratiam non gratis reddi, ut sanè merx & corona non redduntur gratis. Non tamen inde probatur, falsum esse quod dixit Autor, gloriam gratis esse promissam. Promissio quippe de gloria rependenda operantibus potuit esse gratuita, quamuis ex suppositione quod opera sint exhibita, debentur ex fidelitate, vel etiam ex iustitia. Ut tamen Deus hoc pactum cum creatura sua iniret de rependenda ei gloria si operaretur, mera Dei gratia fuit. Itaque nihil fuit ab Autore timendum occasione illorum verborum, *Deus gratis promissit gloriam*. Aliiter dici potest, hunc loquendi modum eo sensu accipiendum esse quo ab Apostolo dictum est, *Gratia Dei, vita æterna*. Vbi gloria donatur nomine *gratiæ*, attenta radice prima totius meriti; siue quia gloria his redditur meritis quæ contulit gratia, ut ait S. Augustinus l. de corrept. & gratia c. 13. & diligenter ac plenè l. de grat. & lib. c. 6. & 7. Tanta enim est Dei erga hominem bonitas, ut dona sua velit esse ipsius merita iuxta Cælestinum 1. Epistola ad Gallos c. 12. quod item habent Aug. Epist. 105. & creditus Chrysostomus hom. de Adam & Eua. Alibi eodem sensu Augustinus ait in nobis coronare in celo dona sua non merita nostra. Ita ille conc. 2. in psal. 70. & l. de prædest. 55. cap. 15. Vnde non excluditur meritum nostrum, sed prima eius radix ex gratis inito pacto & gratuita præuentione ad gratiam quæ semen gloriæ est aperitur. Itaque in Autore non fuit causa timendi ut adhibitum Loquendi modum Augustino & ipsi Scripturæ familiarem.

XIX. *Quamuis mihi certò constet quod fidem habeo per quam credo, nemini autem nec de se, nec de alio, certò constet quod fidem habeat formatam charitate.* Contempl. de morte cap. 1. num. 1.

Non est facile assignare discrimen inter fidem & charitatem quoad rem propositam, aut quomodò possit quis certus esse se habere fidem, siue actualement siue habitualement, nec tamen possit certus esse quod charitatem habeat. Proportio enim charitatis cum fide quoad hoc, videtur perspicua. Quod autem fides intellectui, charitas voluntati inexistat, parum refert: Non enim propterea intellectus notior sibi est, quàm nota eidem sit voluntas: Actus item suos distinctius & penitius non peruadit, quàm eos qui profunduntur à voluntate, siue eadem, siue multiplex sit potentia. Nā principia ad perspicendam voluntatem, & actus eius, æque sunt intellectui admota, ac illa quibus voluntas & eius actus perspicui possunt. Quinetiam supernaturalitas fidei actualis, pendet ab actu voluntatis, de cuius motu nequit constare. Neque igitur constare videtur posse de actu fidei, & quod consequens est de habitu. Nam quo modo quis actum se habere cognoscit, eodem, de habitu tanquam de forma ad eam ultimam dispositionem consequente, docetur: id quod Durandus rectè vidit in 1. d. 17. q. 4. num. 11.

Sunt tamen graues DD. qui cum concedant, actum nostrum contritionis, & amoris in Deum super omnia, non posse nobis certò esse comperitum, (alioqui gratia cuique sua certò innotesceret, contra fidei scita), actum tamen fidei, certò à nobis ac etiam euidenter agnosci, inde confirmant, *quod actiones voluntatis, non sint nobis tam nota, quàm actiones nostri intellectus.* Dedi ipsa verba Gabrielis Vasques, qui in ea est sententia 1. 2. d. 201. c. 2. num. 11. Qui tamen ut reconditiores illas actuum voluntatis latebras stabiliat, addit actum nostrum spei, eadem certitudine à nobis deprehendi, qua actum fidei, de quo dixerat, quemlibet fidelem diuina fide credere, & certò ac euidenter experiri, se eum habere; non quod habeamus euidentiam ipsius veritatis fidei nostræ, quod cum obscuritate obiecti crediti non cohæret: sed quod habeamus euidentiam de actu ipso & assensu, quatenus fidei, & credulitatis cuiusdam est. Illam euidentem ac certam fidei nostræ actualis, non contritionis vel perfecti nostri in Deum amoris experientiam, agnoscit quoque Iustinianus 2. Cor. ultimo. Alij verò negata euidentia assensus quo credamus nos fidem habere, certitudinem ei tribuunt, siue fidei diuinæ, ut Conradus, Medina, Caietanus. 1. 2. q. 11. artic. 5. & Soto 1. 3. de nat. & grat. c. 10 siue assensus Theologici, quod innuit D. Bonauentura, in 3. d. 23. dub. 4. literaliter, & tradit apertè Becanus 2. 2. cap. 11. q. 5. nu. 8. Discrimen quod hi Doctores, inter certam de nostra vera fide noticiam, nec

FACVLÆ AD IDIOTAM.

593

nec nisi ambiguam cognitionem de nostra vera contritione assignabunt, æquæ Autori commodabit, quem satis tutum reor, tot grauibz ac optimæ notæ Doctoribus stipantibus.

Tametſi mihi quidem longè verisimilius philosophari videntur, qui vt charitatis & perfectæ pœnitentiæ, ita & fidei diuinæ actum, explorari certò per nos posse, diffitentur. Hoc enim neque per euidentem notitiam scire licet: (nisi absurdè admittatur, eius quoque actus, atque adeò etiam obiecti crediti veritatem, euidenter penetrari:) neque per fidem diuinam, cum desit reuelatio de adhibitis per nos omnibus ad fidei diuinæ actum requisitis: neque per assensum Theologicum, qui saltem vno fidei principio niti debet. At hoc, contractum ad aliquam personam, non est nisi conditionatum, ac proinde sufficere tantum potest ad formandum assensum, quod ad sit vera fides actualis, si adhibeatur hoc aut illud, de quo non potest esse absolutè certum, quod abhibeatur. Itaque quamuis certi esse debeamus, quæ credimus esse certissima, tamen non possumus esse vsquequaque certi, an ipsa ea credamus illo optimo modo quo par est, ita vt etiam si adsit nobis certitudo ex parte obiecti, desit tamen certitudo ex parte actus nostri prout est in tali specie. Quod addo, quia habemus certam & euidentem experientiam actus nostri, secundum gradum quasi genericum, seu in ratione actus credendi, non internoscendo euidenter, an ea credulitas exerceatur per motuum diuinæ fidei, an per motuum fidei acquisitæ. Ea quippe internotio, difficillima est: vnde hæreticorum in errore obfirmatio. Nam si liceret actus nostros euidenter contueri quoad eorum speciem, viderent profectò hæretici, se, etiam quod veros articulos, mera fide humana duci, atque ita redirent præuaticatores ad cor.

XX. Timuisti Domine, & tristis fuisti quodam timore, & tristitia quodam naturali, quæ tantum fuit in appetitu sensitivo, nec in aliquo tetigit appetitum rationalem. Contempl. de morte c. 12. num. 1.

Non est sensus, voluntatem, quæ est appetitus rationalis, fuisse in Christo tristitiæ ac timoris expertem. Id enim falsò asseretur; quia appetitus sensitivus & voluntas cum sint potentiæ eiusdem suppositi, non disparatæ sed subordinatæ tam arctè colligantur, vt vna circa obiectum suum negotiante, ab altera quoque circa idem, obiectum per sympathiam actus aliquis sub ratione sibi propria & accommodata extundatur. Aliam rationem optimam, Canus 12. de locis cap. 14. ad vltimum, ex eo dicit quod tristitia Christi fuerit peccati medicina, quam æquum fuit admoueri voluntati, quandoquidem hæc facultas, peccati sedes est in puris hominibus, quorum infirmitates Medicus noster portare venerat. Accedunt Patrum

Fffff

594 FACVLÆ AD IDIOTAM.

suffragia, & Conciliorum decreta, quæ longo ordine prostant apud Suarum t. 1. 3. p. d. 38. f. 3. per quatuor primas assertiones. Copiosè item idem confirmat adductis variis Patribus, Facundus Hermianensis nunc nunc refossus lib. 3. pro tribus capitulis ad Iustinianum Imperatorem cap. 3.

Non igitur negat Autor, tristitiam & timorem cecidisse in appetitum Christi rationalem, nec affirmat hæsisse in solo appetitu sensitivo prout contradistinguitur appetitui rationali, siue voluntati, quod verborum propositorum cortex sonare videtur: sed nomine appetitus sensitui contrappositi appetitui rationali, intelligit Autor, non modò appetitum materiale cordi implantatum, sed etiam appetitum spirituale siue voluntatem, non quatenus operatur ex præscripto prudentiæ (quo pacto vocatur appetitus rationalis, seu voluntas vt ratio,) sed quatenus prosequitur proprium commodum, refugitque incommodum, iuxta naturalem inclinationem omnibus insertam; quo pacto vocari solet voluntas vt natura. Duas illas voluntatis denominationes, breuiter ac benè explicat Durandus in 3. d. 17. q. 1. num. 6. Quamuis ergo spiritualis Christi voluntas, quatenus natura, refugeret tantam ærumnarum molem quantam per hostium rabiem imminere præfagus intellectus monstrabat; tamen eadem voluntas vt ratio, conformauit se Deo, & magna demissione excepit, quicquid Patris decretum ferebat vt exciperet si inferretur. Quod vnum, voluisse Autorem, docent illa quæ subdit continenter eodem capite: *Secundum appetitum rationalem, conformabas te voluntati Patris*, dicens non quod ego volo, sed quod tu.

XXI. *Virgo Maria, sacrificia seruorum suorum, & maxime quæ sibi exhibentur, representat in conspectu diuinæ maiestatis.* Prolo. Contempl. de Virg. Mar. num. 2.

A Bsit vt id accipiamus de sacrificiis ipsi Deiparæ oblati. Alteri enim, quàm Deo sacrificium offerre, absque idolomania atrocitate non licet: & à nullo vnquam Catholico tale quid cogitatum, contra Faustum, & Manichæorum calumnias, demonstrat S. Augustinus lib. 20. contra Faustum cap. 21. & pulcherrimè sermone 101. de diuers. c. 7. Quæ etiam ex causa lib. 1. contra Maximinum Arrianum, negat puræ vlli creaturæ templum de lignis & lapidibus construi posse: & qui secus facerent, ait, *anathematizari à veritate Christi, & ab Ecclesia Dei, quoniam creatura exhibent eam seruitutem, quæ vni tantum debetur Deo.* Vbi Erasmus ad marginem, cœnum illiuit, scribens id nunc fieri omnibus Diuis; atque adeò præsertim Deiparæ, cuius nomen tot vbique templa præferunt. Sed tam verum est, templa à nobis in sensu quem D. Augustinus reprobat, (prout scilicet referuntur ad sacrificium, ei cui tēplum inscribitur, offerendum,)

FACVLÆ AD IDIOTAM. 595

sanctis' ac ipsi etiam Deiparæ sanctis quibusvis superiori dicatis; quàm verum est, vltos aliquando veros Sacerdotes, alteri quàm Deo, sacrificasse, quod qui fecerit, eradicandus decernitur. Mens ergo Autoris fertur tantum in sacrificia, quæ Deo in honorem Virginis, offeruntur; aut Deo oblata, exhibentur eidem Deiparæ, vt quod per offerentium indignitatem minùs acceptum foret, nobiscum offerens, ac dignitatem suam tenuitati nostræ adiungens, plenè gratum atque acceptum reddat.

XXI. *Dulcedinem suæ diuinitatis, tibi singulariter degustandam indulsit, quia tota pulcra eras, &c.* Contempl. de Deipa. cap. 2.

Singulari Deiparæ gloriæ & diuinitatis degustationem hic ab Autore propositam, fuit qui longè alio modo acciperet, quàm hic ab Autore factum; illud singulare imprimis & eximium suscipiens, in diuinitatis degustatione per Deiparam, consentaneè ad exelsum illum purè creatæ dignitatis verticem, quod cum cæteri beati, interuentu luminis gloriæ ad Dei contuitum sustollantur, Virgo absque creato illo subsidio, & vulgari beatorum, veluti ocularibus, Deum videat. Ad eam singularem prærogatiuam. Deiparæ asserendam, vnica adhibita probatio, ex eo Apocalypsis loco ducta, quo Deiparam Ioannes describit in cælesti gloria Deo potientem, vocans mulierem Sole amictam. Quem locum is quem dico Doctor amplissimus, penitissimè scrutatus, deprehendit, alios quidem Beatos, iuxta Plaltem, in lumine Dei, videre lumen, hoc est iuxta Conciliium Viennense, ad visionem subuehi, indito intellectibus eorum, lumine gloriæ: At Virginem, citra omnem circumfusi luminis beatifici opem, Sole ipsa Iustitiæ immediatè amiciri, eoque circumfuso conuerti, vt proinde creato illo amiculo quo beati reliqui conteguntur, & ad Deum excipiendum aptantur, non egeat. Alterum degustatæ per Deiparam diuinitatis decus singulare, priori annectebat idem Deiparæ singularium scrutator, quod reliqui cœlites efformato speciei expressæ mentali fœtu, (verbum mentis, appellant. Deum contueantur, atque beentur; Non ita Virgo; sed absque vltio verbi mentalis enixâ, feratur in Deum. Quod demonstrabat illis sponsa de sponso verbis cap. 5. epithalamij. *Oculus eius, sicut columba super riuos aquarum, quæ lacte sunt lotæ, & resident iuxta fluentia plenissima.* At columbaum, cum esse genium ferunt Phisici, vrlacte lotæ, obiecta distinctissimè peruadant. Quod item sponsæ attributum, ea verba sonant. Vt quid ergo interiectus speciei expressæ, aut verbi mentis? Et quamquam prolata de sponso verba illa, non de sponsa, ferat contextus, tamen iure tantæ affinitatis, & societatis adeo arctæ, quæ sponsæ cum sponso intercedit, accommodari sponsæ quæ de sponso leguntur, non videtur nouum. Et hæc quoque, vnica tam singularis prærogatiuæ, adhibita pro-

FFFF ij

batio. Nam Patrum consensum, Theologorum suffragium, firmamenta rationum, post tam luculentum Scripturæ locum quasi ad roborandam spiritus sancti assertionem, quis requirat?

Dignum est ex hac singulari per Deiparam diuinitatis degustatione, confectaria eximia, & singularia decora, in gloriosum eius corpus, quæ idem Doctor mirabilius, refusa diceret, non præterire. Nam cum reliquorum beatorum corpora, splendere dicantur, sicut Sol; Virginis corpus, paui specie variegatum, affirmabat; hac vna, sed numeri damnum pensante probatione subnixus, quod Victorem, Psaltes ita compellet Psalm.

44. *Astisti Regina à dextris tuis, in vestitu deaurato, circumdata varietate.* Vbi corporis Deiparæ, in cælo species, describitur. Antecesserat de eiusdem grauiissimi Doctoris sententia, singularem hanc rediuiui Deiparæ corporis gloriam, decus illud singularissimum, quod reliquorum beatorum animæ, interim dum corpora sepulchris conduntur, exemptæ (vt in Heremotimum lusit Tertullianus,) vaginis suis, solitarie degant: Virginis autem anima, per triduum illud, quo sacrum corpus intra tumulum iacuit, non aliud sit nacta diuersorium, quàm corpus suum, iuxta illud quod de Virgine interpretabatur, *erit sepulchrum eius gloriosum.* Aliam huius prærogatiuæ probationem, non proferebat.

Quæ contra *satinos* vt vocat, *Theologos*, receptam doctrinam tanquam plebeiam atque protritam, aspernantes, suis vcrò quibusdam commentationibus addictos, disputat in Dione Synesius, hic locum habere censuit non nemo. *Ascipis, absurdis quibusdam agitationibus cientur. Et cum se, philosophia nomine magnifice ostentent, si quid tamen ab aliis traditum acceperint, hoc suis additamentis, deprauatum, & malignum reddunt, cecos quosdam paruos enixi, qui non mentis quidem illi, imò ne intellectus quidem dici debent, sed ex absurda opinione, & ab errante phantasia, prodierunt: ridiculi inquam, vel miserrimè potius, illos affectos videas.* Equum est enim, homines cum simus, hominum calamitatibus non illudere, sed easdem deplorare *PROH SERMONES!* *proh dogmata!* Nam si arietes, philosophiam ipsam capeffere vellent, haud scio, quidnam præterea aliud, in honore haberent. Ita planè de his Deiparæ singularibus pronunciauit, non nemo terfo iudicio ac naris emunctæ, aliis interim ad tantam doctrinæ profunditatem immanè hiantibus, & protenso sesquipede pandiculantibus.

Ego illud vnum dico. Vt Deiparæ ornamentorum, quæ verè quidem eam exornent, & iusto titulo tribuantur, debemus esse retinentissimi; ita abiicienda esse inania decora: inter quæ proposita sunt, operosum non dico euincere. Sanè illa luminis gloriæ abrogatio, de qua primo loco, siue factis rura, & Viennensi decreto consona sit, siue non sit, tantum abest vt singulare decus beato conferat, vt potius præternaturalem efficiat visionem, & non aptato ea cœlesti dispositione intellectu, improporionatam, ac quadantenus indecoram. Beatis enim lumine gloriæ aptatis, connaturale est Deum videre. At quanto dignius est ac nobilius, connaturaliter, &

cum proportionem aliqua operationem elicere, quàm præternaturaliter, & absque quacunque proportionem? Itaque ad depreciationem gloriæ pertinet, quod tanquàm singulare eius ornamentum proferebatur. Probatio verò ex Solis amictu, cuiusmodi sit, & quàm belè rem conficiat, ne expensione quidem dignum est. Eiusdem furturis est, alterum gloriæ illius singulare decus. Tametsi enim rancida nunc, & exoleta, paucorum Theologia olim tulerit, beatos citra speciei vllius expressionem, Deum conspiceret, tamen ea sententia, tanquam in recepta philosophiæ placita peccans, & quæ agrè defendi, vel etiam intelligi queat, passim exploditur. Nec etiam si admitteretur, aliquid reuera eximium & dignum Deipara proferret: cum decus visionis, non ex physica structura, si potest esse multiplex, sed ex obiecti exhibitione meliore & illustriore, sit petenda.

Iam rectè ne Deipara corpus gloriosum, pauci specie variegatum, vt ex Psalmo 44. ludicrè eruitur; Solari, imò septuplò, hoc est multis partibus auctiori, reliquorum gloriosorum corporum splendori anteponatur; noctuæ bubonèsq; iudices sunt. In altero singulari corporis decore proposito, agnoscenda est disruptio vittæ aureæ, siue vinculi quo anima cum corpore conferebatur; ne vitam perstitisse, & Deiparam nequaquam mortem oppetiisse, existimatio subeat. Idque suggerente qui primùm affuerat viro erudito, & periculum latentis in herba illa anguis denuntians, expressum postea, est in iterata eiusdem doctrina propositione, post annos aliquot. Sed ne sic quidem, conditur insulitas: cum animæ corpori non confertæ, nec à loco cui inexistit, perfectionem vllam aut decus emendicanti, perinde sit vbiuis degat. Probatio verò ex loco Isaiæ, tantoperè desipit, vt quanto-uis pipere insperfo, nunquam defatuanda videatur.

De his Scripturæ tormentis, eiusque contra Patrum & Conciliorum oracula, ad plausum nouitatis specie captandum, detorsionibus, lucubrationem plenam qua hæc ineptiendi licentia coërceatur, nuper apparauimus. Et breuiter rem tetigisse videntur sancti Chrysostomus altero in Psalmos proæmio, & sanctus Hieronymus epist. ad Paulinum, cum *vitiosissimum hoc docendi genus, puerile & circulatorium ludo simile*, (ita enim appellat Hieronymus,) superbiam puram putam, & ignorantia suæ ignorantiam definiunt.

XXIII. *Caput tuum vt Carmelus, quia limpidiùs contem-
plabaris præ omnibus alijs sanctis, Deum; celestis & terre-
na, quia cælos attingebas stans in terra; & vt à multis
creditur pie, etiam viatrix beata anima tua, frequentius
comprehendebat & fruebatur. Parte 1. Operis pleni de
Deip. Contempl. 1.*

Vides Autorem doctrinam sic propositam, non ex se asserere, sed
referre. Et quamuis eam non improbet, tamen neque suam facit.
Quamquam tamen eam asseruisset, non pateret criminationi: cum om-
nino multi, & veteres & recentiores, ita statuunt. Retuli complures in
Diptychis parte 2. punct. x n. 5 quibus addendus qui fusè in hoc argumèto
versatur Recupitus. l. p. l. 6. q. 14. c. 1. & 2. mihi ea sententià non arrisit, eam-
que & grauium Patrum autoritate, & ratione non inidonea adhibita, re-
iecit loco allegato n. 6. non puto tamen eam doctrinam posse vllatenus no-
tari; tum quia grauium Doctorum est, tum quia non destituitur ratio-
num eam asseruentium verisimilitudine. Itaque Auctor hac in parte est
planè innoxius, præsertim cum ex alijs duntaxat id referrat, vt præmissi.

XXIV. *Lingua Eue, totam progeniem ex se nascituram le-
thaliter vulnerauit; Paradisi portam cunctis clausit, &
Dei iracundiam ad vindictam prouocauit. Operis de B.
V. parte 1. Contempl. 11. n. 2.*

In contrarium esse videtur, quod sanctus Augustinus l. 2. responsionis
secundæ ad Iulian. c. 25. & l. 2. de Nupt. à c. 26. monstrat, per vnum A-
damum, peccatum introisse in mundum. Et quamuis Eua quoque pecca-
uerit & probabiliter controuertatur, grauius ne peccauerit Eua, quàm
Adam (vt videre est apud Bellarminum l. 3. de amiss. gratiæ c. 9.) tamen
ordine ad inferendum nobis nocumentum, solus Adam peccauit; quia so-
lus habuit ad nos rationem capitis, vt eruitur ex varijs dictis Apostoli in
Epistola ad Rom. c. 5. asserentis, *per unum hominem*; & *vnus hominis
peccato*; multos constitutos esse peccatores, & omnes in Adam mori. Et
idcirco quamuis Eua peccarit prima, & illico deiecta iustè è statu naturæ
integræ, & ppossessione iustitiæ originalis, fuerit in statu naturæ lapsa,
vt rectè statuit Suares Prolego. 4. de grat. c. 6. num. 11. Tamen si Adami
culpa non fuisset subsecuta, caruissimus peccato originali: vt habetur ex

Anselmo l. de Concept. Virg. c. 9. Bellarmin. l. 4. de amiss. grat. c. 13. Vasque. r. 2. d. 133. c. 3. Becan. l. 2. tract. 2. c. 9. q. 9. qui rectè, contra alios, id extendit ad mortalitatem, quam non incurrissemus si sola Eua peccasset. Itaque peccatum Eux, nulli alteri quàm ipsi nocuit: solus Adam, occulta tunc omnes de sua stirpe venientes tabificauit, ut loquitur sanctus Augustinus l. 1. de peccat. merit. c. 9. Solius Adami gula nos perdidit, ita ut omnes pereamus, quia in eo non ieiunauimus, ut tradunt Sophronius hom. de cruce, creditus Prosper l. 2. de vita contempl. c. 18. post. S. Basilium hom. 1. de ieiun. allegatum ab Augustino l. 1. in Iulia. c. 5. Quomodo ergo Autor tribuit peccato Eux, exitium nostrum?

Hunc nodum expedire dupliciter licet. Ac primum, quod peccatum Eux coniunctum cum peccato Adami posteritatem vniuersam vitiauerit, etiam si minus videtur consentaneum Scripturis & Patribus; tamen non est adeo apertè reprobum, quin à quibusdam Catholicis asseratur, ut à Palacio in 2. distinct. 30. disp. 1. Idipsum, vir doctus cuius sunt Notæ ad l. 1. de peccat. merit. c. 16. attexit tomo 7. D. Augustini tribuit Diuo Augustino, dicto capite 16. & in illud psalmi 50. *Liberà me de sanguinibus*, & tract. 2. in Ioan. citra illud *non ex sanguinibus*, & in respons. 2. ad Iulian. libro 2. nec non D. Ambrosio, quem D. Augustinus adducit l. 1. in Iulian. respons. prioris c. 3. credito item Ambrosio, & Anselmo, ac Hugoni Victorino in illud Rom. 5. *Sicut per unum hominem*. Bedæ ac Theophilacto in illud Ioan. 1. *Qui non ex sanguinibus*. Omnes hi, vel dicunt, vel insinuant, non Adami tantum, sed etiam Eux peccatum infecisse posteris, & vitiasse naturam. Et fauet illud Ecclesiastici 25. *A muliere initium factum est peccati, & propter illam omnes morimur*. Vti Cornelius, notat nonnullos Theologos, tribuere Eux quoque, vitiationem naturæ. Hinc satis superque tegi posset Autor, si reuera existimasset, peccatum Eux esse in nobis causam peccati originis, ita ut sicut ex Adamo & Eua descendimus, ita per vtriusque inobedientiam maculemur.

Nihil tamen est quod urgeat, adhibere pro Autore hanc responsionem, minus scripturis consentientem, & à D. Thoma repudiatam r. 2. q. 81. artic. 5. Facile enim est dicere, Euam (iuxta Autorem) sibi quidem soli nocuisse peccando, quia pactum non erat cum Eua inirum, sed cum solo Adamo, quippe totius generis capite. Adscribi tamen Eux calamitatem nobis per Adami inobedientiam Adæ illatam quia Eua per suam pelliciam infatuauit Adamum, & induxit eum ad violationem præcepti, cuius obseruationi per Adamum, fuisset comitatura in posteris naturæ integritas. Eatenus enim, Eua rectè dicitur vulnerasse totam progeniem ex se nascituram, & cunctis Paradisi portam clausisse, & Dei iustam ultionem in omnes suos & Adæ posteros aduocasse.

XXV. Tibi dicitur tota pulchra es. Fuisti pulchra quia sine aliquo peccato, & ab hac gratia nunquam cadere potuisti. Parte V. Contempl. 1. n. 1. & Contempl. 2. num. 1.

HOc Auctoris pronuntiatum videri poterit morbosum, quia status purè viatoris deposcere labendi capacitatem. Nec est necesse, plus tribuere Deiparæ viatrici quam cuiusvis peccati exclusionem, salua peccandi potestate, si libuisset. Multi tamen, & graues Doctores, quos retuli in Diptychis parte 2. puncto 9. n. 34. admittunt, B. Virginem etiamnum viatricem, non fuisse liberam ad peccandum: abiecto eo inepto modo quem iniuit Ioannes Zametus l. 2. de Eminentiss. Deip. perfect. c. 48. contendens B. Virginem fuisse liberam ad cadendum, quia quamuis non esset libera à necessitate, erat tamen libera à coactione. Ea quippè libertas spuria est & Caluiniana, de quo alibi plenius. Explosa ergo tali libertate, quam Apostolus ipse reprobauit, cum dixi de homine libero 1. Cor. 7. *Non habens necessitatem; potestatem autem habens suæ voluntatis*, admiserunt Autores prædicti, B. Virginem viatricem, caruisse libertate peccandi, atque adeò nullatenus cadere potuisse: id quod æquè de omnibus hic in gratia confirmatis, statuunt, quoad grauius peccata. Atque adeò Autor, quamuis id ipsum asseruisset, vacaret labe. Quid si verò accipiendus prius videatur, in eo sensu quem ipse amplector, (vt dixi in Diptychis loco annotato n. 35. & 36.) quod scilicet B. Virgo habuerit moralem impotentiam cadendi, sitam in vbertate auxiliorum; validissimorum quidem, sed tamen absolute eluctabilem, addita extrinseca prudentia submouente illices labendi, & benè operandi incentiua subministrante?

XXVI. In te Sola fides remansit, in te lumen sanctæ fidei absconsum fuit, te solam illuminauit. Parte 6. Contempl. 19. num. 2. & parte 14. Contempl. 1. n. 4. & Contempl. 14. n. 3.

ALibi etiam addit Autor, Ecclesiam tunc in sola Virgine mansisse. Hoc fateor mihi non probari; & reijcitur etiam à grauib. recentioribus quos signaui in Diptychis parte 10. puncto 9. n. 27. Quamuis autem id censeam falsum, tego tamen posse alterius notæ insinulari quàm falsitatis; quia plerique Doctores non ignobiles eodem loco adducti id tradiderunt; & nominatim creditus Bernardus Tract. de passio. Dom. in illud. Eg.

FACVLÆ AD IDIOTAM, 601

Ego sum vitis vera c. 2. & in lamentat. B. Virginis. Qui huc refert additionem Sabathi in cultum Deiparæ, & ritum Ecclesiasticum quo in Officio Majoris hebdomadæ, extinguuntur candelæ omnes, præter vnā. Ex quo populari sensu, Autor eam Deiparæ laudem de qua agimus, hausisse videtur, & bonafide expressisse. Vti etiam factum est à Gulielmo Durando in Rationali Diuini Offic.

XXVII. *In gloriosissimi Filij tui passione, Animam tuam sanctissimam pertransiuit doloris gladius. Longè enim plusquam Martyres censenda; quia in te passionis sensum, excessit compassionis affectus.* Parte 4. Contem. 5. n. 1.

ERit qui hoc reprehendat, eo ductus argumento, quod B. Virgo, præ eo acerrimo sensu doloris non obierit, quod tamen esse de ratione martyrij in confesso est. Sed quamuis mors defuerit, potuit tamen Virgo dici martyr. Nihilominus enim admotio causæ ad mortem reipsa inferendam sufficientis, nisi diuina manus præter naturæ ordinem obstarat ac vitam retineret, censetur sufficere ad veritatem Martyrij: & hoc pacto defenditur à plerisque verum discipuli dilecti martyrium, quamuis sicca morte sit defunctus. Qui ergo volunt B. Virginem fuisse verè martyrem, agnoscunt, ex dolore de Christi perpeffionibus debuisse in ea naturaliter mortem existeret, nisi eam auertisset diuina manus. Ita Ioannes Bagotius Tomo 2. demonstr. dogm. lib. 5. disp. 7. c. 5. n. 35. & eidem principio innituntur necesse est, Lucas Castellinus in Appendice ad librum de exigentia miraculorum pro canonizatione SS. Martyrum, puncto 1. Spinellus in Throno Dei. c. 11. n. 2. Ioannes Gruzewski lib. 1. de coniunct. cum Deo c. 14. sect. 15. & alij pro vero B. Virginis martyrio certantes, quos adduxi in Diptychis parte 2. puncto 10. num. 19. Mihi tamen contrarium placitum verius videtur, vt eo loco dixi in opere de Martyr. parte. 2. c. 1. n. 4. quamuis non idcirco verisimile esse negem, quod Autor, & cum eo tam multi alij, de vero Deiparæ martyrio asseruerunt. Illud dumtaxat apud Autorem videri possit obscurum, quando dixerit, in B. Virgine, compassionis affectum, excessisse sensum passionis. Dicendum est, conferri eo loco ab Autore, compassionem Deiparæ, cum sensu passionis afficiente alios Martyres, non autem Christum.

XXVIII. *Non minùs meruisti Virgo sanctissima, fundendo lac de vberibus tuis pijsimis, ad nutriendum tuum Filium benedictum, quàm meruerunt Martyres fundendo sanguinem suum per Martyriū.* Parte 1. Contempl. 17. n. 2.

HOc Autor neque primus dixit, neque postremus, vt in Diptychis dixi parte. 2. princ. 5. num. 11. vbi etiam monstratum est, quo sensu

Ggggg

602 FACVLÆ AD IDIOTAM.

hæc comparatio (cæteroqui inuidiosa) admitti posset, consentaneè ad rationem dicti sui ab Autore his verbis subiunctam; *Omnium namque operum merces, secundum charitatis radicem pensatur.* Itaque quia B. Virgo, supponitur, ex maiori, vel saltem æquali charitate lactasse Christum, quam fuerit charitas qua Martyres pro eo sanguinem fuderunt! fas est, lactationem illam, cum merito profusionis sanguinis per martyres comparare. Dummodò autem Autor circa hanc comparisonem indemnis abeat, non sum sollicitus de exactiore eius expensione, instituta loco annotato.

XXIX. *Speciosissima Virgo Maria, nullus defectus gratia in te fuit; sed sicut in mari est plenitudo aquarum, quarum nec fundum potest aliquis inuenire, neque mensurare, sic sanctissima Virgo Maria, in te est omnis plenitudo omnium gratiarum immensurabilis, quam profundare non potest intellectus humanus.* Parte 5. Contempl. 2. n. 7.

Videntur ista sonare, gratiam sanctificantem Deiparæ fuisse infinitam; cum tamen Deus omnia fecerit in numero, pondere, & mensura; ac ne de ipso quidem Christo, de quo scriptum est, *Non ad mensuram dat Deus spiritum filio*, potior pars Theologorum, admittat, fuisse in eo gratiam creatam, quantitate infinitam. Hic nodus facile expeditur, dicendo, sensum Autoris duntaxat fuisse B. Virginis gratiam, præ ea quæ cæteris puris creaturis communicata est, fuisse omnino magnam, & bolide ingenij nostri ac captus impertentabilem, tametsi finitam; & in oculis Dei certo demenso comprehensam. Nec aliter accipiendum est, quod varij Patres de abyssu gratiæ Virginis dixerunt, ut fusè retuli in Diptychis parte 2. puncto 7. à num. 5. dicunt enim fuisse in Virgine *gratia pelagus, & abyssum immensam*, ut nominatim loquitur Damascenus Orat. 21. de Assumpt. Non quod Patres intendant, gratiam sanctificantem B. Virginis caruisse suo modulo, nec fuisse terminum vllum intensiōis in se Deiformi qualitate: sed vel significant cumulum eius absolute magnum: vel certè eam conferendo cum gratia cæterarum purarum creaturarum, affirmant, eam gratiam supergredi gratiam aliarum omnium; & (ut dixi loco allegato à num. 8.) esse extrinsecum terminum gratiæ, omnium purarum creaturarum.

XXX. *Puritatis fuit, quia sine concupiscentia seminare posuisti.* Operis pleni de B. V. Parte 3. Contempl. 10.

Agnoscat Autor, Deiparam concepisse Christum, adhibito semine suo. Quam doctrinam Nicolaus Chichonus, habuit pro reprobâ;

que nomine, proximè superioribus annis, institit acriter, vt Franciscus Suares qui t. 2. 3. p. d. ro. f. 1. & 2. visus erat eam doctrinam non habere pro reprobâ, (quamuis in contrarium potius inclinaret,) Operis illius proscriptioe multaretur.

Esse tamen eam doctrinam planè securam, & à multis Patribus traditam, monstraui in Opere de Christo lib. 3. sect. 2. c. 3. & ita nominatim habet S. Epiphanius hæc. 30. n. 31. expendens illud Plaltis, *Imperfectum meum viderunt oculi tui.* Sanctus Bernardus Ser. 2. de Pentec. circa illud erit *Germen Domini.* Hincmarus Opusc. de diuort. ad interrog. 12. Beda in c. 11. Luca Rupertus in c. 1. Matth. vers. *Pariet autem filium.* & in c. 3. Ioan. vers. *Filius hominis qui est in celo.* Haymo in c. 8. ad Rom. ad illud, *in similitudinem carnis peccati.* Rich. Victor. l. 1. de Emman. c. 12. Petr. Damia. Serm. de S. Victore. Rich. à S. Laur. lib. 12. Martial. ad illud, *Cuius semen in semetipso.* Ex posterioribus, idem tradunt Baptista Mantuanus Tract. de Conceptione Christi contra Petrum de Luca 2. parte Tractatus, *Circa quintum,* (habetur Tom. 4. Operum.) Torniellus anno mundi 4051. n. 2. Peramatus in Appendice ad Tract. de femine. Petrus Hurtado de Mendoza disp. 2. de gener. S. Fortunius Licetus Tom. 2. de quæst. per Episto. c. 37. & ibidem Sebastianus Baldus c. 36. Paulus Zacchia in qq. Medicolegal. Idem volunt quotquot admittunt B. Virginem concurrisse actiue ad Christi productionem, vt Scotus in 3. d. 4. Bonau. ibid. art. 2. q. 1. Maior q. 3. Gabr. q. vnica & omnes Sco- ristiæ. Nam concursus actiuus matris in prolem, præstatur per semen ab ipsa femina suppeditatum, quod actiuum esse, Galenus & omnes Medici, contra Aristotelem asserunt. Cum ergo B. Virgo fuerit verè ac perfectè Christi mater, atque adeò omnem concursum ab alijs matribus in fœtus productionem conferri solitum, verè contulerit; fatendum est, eam interuentu sui seminis, ad formationem corporis Christi esse coope- peratam; Spiritu sancto naturalem illius seminis efficaciam vegetante; in- superque supplente reliquum concursum à viro præstati solitum, vt be- nêstataunt Richar. in 3. d. 4. art. 2. q. 1. Auerſa 3. p. q. 27. sect. 1. Bonac. disp. 1. de Incar. q. 4. p. 3. Quare doctrina Autoris quam expendimus, est planè tuta, & nulli obnoxia criminationi.

Temperanda tamen est eo modo quo ipse Autor illam temperauit, di- cta contempl. 10. & parte 1. contempl. 2. & parte 3. contempl. 2. dicenda scilicet, spiritu sancto obumbrante, & omnes motus corporis Deiparæ componente, nullum fuisse in ea feminis subministratione sensum libidi- nis, nullam ac ne tenuissimam quidem virginitatis labem: sed vniuersum hoc opus, nitentissimè, & dignè spiritu sancto, principali corporis Chri- sti artifice, fuisse peractum. Quinetiam vt benè loco annotato admonuit S. Bonauentura, sobriè admodum euulganda est hæc doctrina; præsertim agendo ad populum, aut cum minùs peritis. Imitanda potius est circum- spectio & verecundia SS. Patrum, qui frequentius dicunt, Christum ex purissimis B. Virginis sanguinibus esse efformatum: quod non dicunt ad

Ggggg ij

excludendum materni seminis interuentum; sed ad honestatem locutionis. Qua ratione S. Ioannes, ait, filios Dei adoptiuos; non ex sanguinibus, id est non ex feminibus viri ac mulieris nasci; nam carnem ex cuius voluntate negat eos nasci S. August. tract. 2. exponit mulierem. Passim item dicimus, aliquem esse ex Regio sanguine; quamuis non idcirco negemus, interuenisse in eius conceptu, principia ordinaria humanæ generationis. Atque ita commodè expeditur, quod vnum aduersus Autoris doctrinam virgeri poterat ex autoritate Patrum.

Lubens ad hanc doctrinam traherem, quod Autore, non quidem ex suo, sed tamen ex multorum sensu, habet parte 4. Contempl. 4. n. 3. & aliquoties alibi; nimirum carnem primò assumptam à Verbo, & in qua Christus conceptus est, portiunculam esse carnis B. Mariæ, quam pro Christi materia decerpserit spiritus sanctus. Quæ assertio si intelligatur de carne iam formata, decisa per spiritum sanctum, & effigiata in corpus Christi; non est admittenda, vt latè dixi in Diptychis parte 1. puncto 5. num. 25. quia huiusmodi assertio, non coheret cum vera Virginis conceptione actiua, & vera Christi conceptione passiua; quam non ex carne iam formata, sed ex purissimis sanguinibus esse peractam, in confesso est. Si tamen ea assertio intelligeretur de carne potentiali, seu de substantia in carnem transitura; rectè haberet, & sufficeret ad Autoris institutum, quod erat, ex ea multorum doctrina mōstrare, quomodò accipiamus in Eucharistia carnem B. Virginis, id est carnem formatam ex Virginis substantia. Verisimile tamen est, illos multos è quibus Autor huiusmodi propositionem refert; (absque approbatione, nec nisi ex suppositione illius doctrinæ, sensum pietatis inde eruens;) plus voluisse, & locutos esse in sensu quem reieci.

XXXI. *Vera & sincera conscientia, credit quod vitam æternam nullis potest operibus promereri, nisi tu Domine gratis eam dederis. l. 1. statu religios. c. 16.*

Non pugnant ista sententia admodum recepta inter Theologos, quod gloria, etiam quoad suam substantiam, cadere possit sub meritum iusti condignum, vt rectè statuit S. Thomas 1. 2. q. 112. art. 2. ad 1. & ibi Caiet. Conrad. ac Medina: Vasques 1. 2. d. 219. c. 2. Bellarm. 1. 5. de Iustif. c. 20. Suar 1. 12. de grat. c. 28. n. 7. Valent. 1. 2. d. 8. q. 6. p. 4. 5. 3. Quid enim deest actionibus hominis iusti, quominus gloriam per eas promereatur? idcirco sanè, gloria dicitur brauium, & corona iustitiæ, & merces. Non igitur aduersus hanc doctrinam pugnat Autor. Sed tantum inuere voluit, radicem meriti vitæ æternæ esse gratiam Dei, iuxta illud Apostoli, *Gratia Dei, vita æterna.* Quia enim gloria redditur meritis quæ per gratiam sunt parta, idcirco gloria ipsa dicitur *gratia.* Videndus in hanc rem S. Augustinus 1. de corrept. & gratia c. 13. & lib. de gratia &

FACVLÆ AD IDIOATAM.

lib. arbit. c. 6. & 7. subdit item Autor, aliam optimam dicti sui glossam, inferiūs hoc ipso capite, dicens. *Scimus quia non sunt condigne passionēs temporis huius ad futuram gloriam, etiamsi unus omnes sustineat: neque talia sunt nostra merita, ut propterea vita aeterna iure debeat, sic ut tu Domine aliquam iniuriam faceres, nisi eam donares.* Tradit idipsum S. Bern. Serm. 1. de Annunc. Ex quo Autor, magna ex parte ita profecit, ut verba quoque exscripserit. Ac proinde sicut D. Bernardus extra omnem suspicionem erroris est hac in parte, ita nitor Autoris in hoc negotio, non debet in controuersiam vocari. Recolenda quæ præmissimus facula 13.

Haud dissimiliter accipiendum est quod Autor l. 2. c. 13. docet vitam æternam *perperam queri in fiducia propriorum meritorum.* Quamuis enim verum sit, hominem posse suis meritis fidere, quatenus nituntur diuino auxilio & promissione gratuita quæ ex parte Dei antecessit: tamen quia opera nostra nisi perfundantur roræ gratiæ, & cœlesti veluti aspergine rigentur, arida sunt & exsucca; propterea in eis prout præcisè à nobis sunt, non est fidendum. Id enim esset sibi ipsi lucum facere, contra diuinum præscriptum, ut Philo-l. 1. allegor. est interpretatus. Quin potius sæpe admonent Patres, ut ad opera bona quæ fecimus, occludamus oculos, & in solos defectus admistos intueamur: quod præter cæteros ritè admonet S. Gregorius 22. mor. c. 6. Quod tamen in operibus nostris prout per gratiam animatis, fidere fas sit, benè ex doctrina Patrum illustrat Vaf. 2. 2. d. 2. q. 1. in fine.

XXXII. *Toruosus serpens, superna & aeterna nobis conatur auferre; non tamen ut sibi cedat ad bonum quod irreparabiliter amisit, sed ne illuc pauper de puluere suscitatus accedat, vnde ipse in gloria conditus irreparabiliter cecidit. l. 1. cap. 22.*

Angelos qui ceciderunt, & non seruauerunt suum principatum, adeptos esse ante casum, gloriam essentialē, doctrina est ab omnibus scholasticis explosa; & à Ludouico Viues 11. Ciuit. c. 9. perperam affecta S. Augustino, qui disertè agnoscit, Angelos qui steterunt, priusquam confirmarentur potuisse peccare, ut videre est l. de corrept. & grat. c. 11. & lib. 11. de Gen. ad liter. c. 26. annuentibus S. Basilio hom. quod Deus non sit Autor malorum, Fulgentio de fide ad Petrum c. 3. Gennadio de Eccl. dog. c. 28. Anselmo de casu diab. c. 5. & passim alijs, At qui gloriam essentialē adeptus est, peccare ultra non potest. Si igitur Angeli boni, non sunt creati possessores gloriæ, certe neque Angeli mali. Quomodo ergo Autor, ait dæmonem in gloria creatum esse? Depecanda est eius cespitatio, nisi dicamus, obrepisse libris mendum: ita ut cum Au-

Ggggg iij

606 FACVLÆ AD IDIOTAM.

tor scripſiſſet, *in gloriam conditus*, vnus literulæ omiſſio ab oſcitante librario facta, verum Autoris ſenſum peruerterit, ſicut aliàs vnus i. & vnus apicis mutatio magnas blaſphemias induxit. At ſi legamus Satanam fuiſſe *in gloriam* (ſiue *in finem potiùs gloria*, à Deo creatum), omnia ritè cohærebunt.

XXXIII. Merces gratiæ operanti augetur, quando non ſpe mercedis quis operatur, ſed ſtudio placendæ tibi Domine.
lib. 2. c. 27.

N Vm Autor præiuit Sectarijs, mercenarium ingenium eorum qui intuitu mercedis operantur, acriter criminantibus, vt apud Belarminum videre eſt l. 5. de Iuſtif. c. 8. & 9. Non eſt quod dubitetur, hunc eſſe errorem exploratum, cum Eccleſia in Concilio Tridentino ſeſſ. 6. cap. 11. & can. 31. eum damnauerit; id quod etiam pridem fecerat Innoc. 3. adductus in Directorio inquit. p. 2. q. 9. & 10. cui verò non eſt auditus Dauid, inclinans cor ſuum ad faciendas iuſtificationes Dei, propter retributionem? Deus ipſe acuit plerumque induſtriam noſtram, proponendo mercedem, vt apud Richardum videre eſt in Beniamino minore c. 38. habeturque Eccleſiaſtici 18. Matth. 19. 2. Cor. 9. ad Gal. 6. quod certè non faceret, ſi intuitus mercedis, meritum profligarer, & actionem inficeret. Multa in hanc rem peti poſſunt ex Vega l. 11. in Conc. c. 40. & 41. itemque ex Suare diff. 1. de ſpe ſect. 5. Non igitur mens Autoris tulit, excludere meritum, ab omni amore concupiſcentiæ boni proprij, qui amor in Deum denique refertur, ſaltem virtualiter (vt bene præter cæteros exponit Durandus in 3. d. 29. q. 3.) nec ſcribit in re temporali propter ſeiſam; vel ordinando obſequium ſpirituale & ſupernaturale ad rem temporalem tanquam finem vltimum; ſicut faceret qui ita mercedem ſpectaret, vt ſimul haberet voluntatem non operandi, quantumuis vrgente præcepto, niſi ad eſſet præmium; qui nodus operandi forderet peccato, vt bene viderunt Val. 2. 2. d. 3. q. 5. p. 2. & Sanches l. 2. in decal. c. 35. n. 3. iſque eſt modus operandi ob præmium, quem Patres reprehendunt. Aliàs autem, depreciant operationem factam intuitu præmij, præ operatione ex pura charitate; quem nobiliorem agendi modum fidelibus inculcatum volunt, vt eum potiùs adhibeant; quamuis modus operandi intuitu præmij etiamſi imperfectus ſit tamen vitio vacet, & poſſit eſſe meritoriùs augmenti gratiæ, quamuis nulla aliunde in eo ſupponeretur honeſtas; præter eam quam habet ex præmij ſupernaturalis tanquam obiecti ſui propoſitione, vt ſuares rectè notauit l. 12. de grat. c. 12. à n. 12. & iuxta hæc, accipiendum eſt quod Autor dixit de augmento gratiæ, rependendo, operanti non ex ſpe mercedis. Similiterque molliendus eſt, duriuſculè alioqui in hac re locutus S. Bernardus l. de diligendo Deo. 55. diſto proinde. Præclare S. Chryſoſtomus, & huius actus im-

FACVLÆ AD IDIOTAM.

607

perfectionem, & honestatem, etiam si despiciatorem, exponit hom. 2. in 2. ad Thessalo.

XXXIV. *Maximum delictum est, (praesertim in Religioso) concupiscentia, qua interiorem & exteriorem hominem occupat vniuersum; adeo ut in eo non sit à planta pedis, vsque ad verticem sanitas, quin totum inficiat concupiscentia.* l. 3. de statu religiosi. c. 17.

Fide Catholica sanctum est, concupiscentiam quomodocunque sumatur, si sola sit, desitque assensus voluntatis superioris, non esse peccatum. Interdum enim *concupiscentia*, sumitur pro facultate sensibilibus bonorum persecutrice; pro illis eius moribus inuoluntarijs, qui in renatis quoque, perseverant. Aliàs verò *concupiscentia* vox, sumitur pro totius hominis & omnium potentiarum eius propensione in peccatum. Quod voluerunt Nuperi sectarij, quibus perpetuum est, asserere, totum hominem non esse ex se aliud quam *concupiscentiam*. Videndus de his *concupiscentia* notionibus Stapletonius l. 1. de iustific. c. 11. & l. 3. c. 1. necnon Paya l. 3. Orthod. explicatio, ac Ruardus ad art. 2. Iouan. Quomodocunque verò eam vocem usurpent sectarij, pronuncientque concupiscentiam ex se peccatum esse, exploduntur à Catholicis: qui cum Richardo in expositione dubiorum à sancto Bernardo propositorum 5. *De expurgatione veteris fermenti*, negant omnem concupiscentiam pertinere ad malitiam: & addunt, aliud esse *concupiscentiam sentire*, quod potest esse labis purum; aliud verò *concupiscentia ex lege consentire*, quod peccato non vacat. Verum tamen est, concupiscentiam, extra rationis praescriptum, voluntate assensum non praestante excitatam, metonymicè peccatum dici, quia à peccato ortum habuit eius effrenatio, & ad peccatum inclinatio. Idque vnum voluit Autor, cum dixit, concupiscentiam esse peccatum.

FACVLARVM CLAVSVLA.

Quæ censoribus, aspera & mollitionis indiga, nobis autem ad summum illustrationem vel discussionem aliquam deposcere in his libellis visa sunt, non plura occurrerunt. Et hæc ipsa non magno dispendio præteriri potuissent, si mens non læua cuius lectorum esset, & peritiæ ad diiudicandum, ac charitatis ad benignè interpretandum quæ benignam interpretationem admittunt, satis omnibus foret: sed quia nonnullis, etiam in plano, salebræ placent, dedi aliorum iudicio, ut meum de propositionibus non admodum obscuris, iudicium interponerem: eam in-

608 FACVLÆ AD IDIOTAM.


super utilitatis accessionem ex hac qualicunque opella affulgentem non spernens, quod addictas pijs studijs bonas mentes, sanè vndeunque ac purè in his libellis doctrinæ securas, auidius ac iucundius, proposito sibi in eis pietatis pabulo reficiendas, sperare licet.


Sanè in hoc autorum genere, vt ferè eminet pietas, ita ab ignorantia non vanus cespitationum metus esse potest. Nam pietate quidem, amica Deo simplicitas attestari videtur. Deicnim sermocinatio cum simplicibus, quæ causa est cur Nazianzenus orat. 26. de Salomonis sententiâ, statuat: Meliorem esse pauperem ambulantem in simplicitate sua, & qui sermonis ac scientiæ inopia laborat, simplicibusque verbis innititur, atque in illis tanquam in parua & tenui rate salutem assequitur, quàm multæ literaturæ ac ingenij virum, Deo ferè minùs familiaritate iunctum. Quod aliter dixit alter Gregorius 6. mor. c. 4. Stellionem, vt est item apud Salomonem, manibus miti, & morari in ædibus Regis: *Plerunque enim aues quas ad volatum penna subleuat, in vepribus resident, & stellio qui ad volatum pennas non habet, nitens manibus, Regis discium tenet, quia nimirum sæpe ingeniosi quique dum negligentia torpent in pravis actionibus remanent, & simplices quos ingenij penna non adiuuat, ad obtinenda æterni Regis mania, virutis operationis lenat. Stellio ergo dum manibus nititur in Regis ædibus moratur quia illo simplex per intentionem recti operis pervenit, quo ingeniosus minimè ascendit.* At cum vberi pietate simplicitatem ferè affectante, iungi plerunque novos doctrinæ periculosos, sanctus Hieronymus non dissimulavit, monens epist. 103. rusticitatem sanctam quantum ædificat ex vitæ merito Ecclesiam Christi, tantum plerunque nocere ob ignorantiam. Eademque ex causa S. Chrysostomus hom. 16. in Ioan. graviter inculcat stultam simplicitatem, qua nixos suo tempore aliquos doctrinæ incurios refert, eamque esse omnium in Ecclesia malorum originem proficitur. Quare ne Autor, quia ascito sibi Idiota nomine simplicitatem præfert, perspersus nãvis doctrinæ videretur, indèque fructus qui ex eius lectione existere potest, auerteretur; placuit sanam doctrinam locorum in quibus hæsueros nonnullos timor censores incessit, adhibita breui illustratione demonstrare. Superuacaneam peritis operam, aliqua rudiorum necessitas, apud æquos æstimatores excusabit.

FINIS.

† † †







005646177